

**TIUS
NAMUN
WAMINCHIP**

Las ilustraciones se usan por cortesía de la
©1978 David C. Cook Publishing company
Paginas 4,25,47,49,69,100,104,112,133,153,173,176,
187,203,215,236,269,280,283,318,322,343,350,357,
359,367,379,383,415,422,451,470,525,564,598,679,689,
723,728,751,791

El Nuevo Testamento
en el idioma guambiano de Colombia, S.A.

Segunda edición
Publicado por
©2010, Wycliffe Bible Translators

Primera edición
Publicado por
©2000, La Liga Bíblica

Licencia Creative Commons



Usted es libre de copiar, distribuir y comunicar públicamente la obra bajo las condiciones siguientes:



Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).



No comercial. No puede utilizar esta obra para fines comerciales.



Sin obras derivadas. No se puede alterar, transformar o generar una obra derivada a partir de esta obra.

- Al reutilizar o distribuir la obra, tiene que dejar bien claro los términos de la licencia de esta obra.
- Alguna de estas condiciones puede no aplicarse si se obtiene el permiso del titular de los derechos de autor
- Nada en esta licencia menoscaba o restringe los derechos morales del autor.

<http://creativecommons.org/licenses/by-nc-nd/3.0>

Índice

	<i>Página</i>
San Mateo	1
San Marcos	103
San Lucas	166
San Juan	275
Los Hechos	355
Romanos	455
1 Corintios	501
2 Corintios	542
Gálatas	570
Efesios	586
Filipenses	600
Colosenses	610
1 Tesalonicenses	619
2 Tesalonicenses	628
1 Timoteo	633
2 Timoteo	645
Tito	654
Filemón	660
Hebreos	663
Santiago	697
1 Pedro	708
2 Pedro	719
1 Juan	727
2 Juan	737
3 Juan	739
Judas	741
Apocalipsis	744
Palabras Claves	792

San Mateo

Jesucristoi merrab misaamera
(Lc 3.23-38)

1 ¹Iibe Jesucristoi merrabsrø misaamerai munchimera gøn, tru Davidweinukkurimba, Abrahamweinukkurimba amrrub misag.

- ² Abrahambe Isaacwei mōskain gøben;
Isaacbe Jacobwei mōskain gøben;
Jacobbe Judába, nui nunelaimba mōskain gøbig kōn.
- ³ Judábe Faresweimba, Zaraimba mōskain gøben, tru uregwei usrimbe Tamar gøbig kōn.
Faresbe Esromwei mōskain gøben;
Esrombe Aramwei mōskain gøbig kōn.
- ⁴ Arambe Aminadabwei mōskain gøben;
Aminadabpe Naasónwei mōskain gøbig kōn.
Inchen Naasónbe Salmónwei mōskaingue.
- ⁵ Salmónbe Boozwei mōskain gøben, nui usrimbe Rahab gøbig kōn.
Boozbe Obedwei mōskain gøben, nui usrimbe Rut gøbig kōn.
Obedbe Isáfwei mōskain gøben;
- ⁶ Isáfbe Davidwei mōskain gøbig kōn.

Inchen rey Davidba, Uríaswei srain gøbiibabe Salomónwei mōskalø gøbig kōn.

- ⁷ Salomónbe Roboamwei mōskain gøben;
Roboambe Abíaswei mōskain gøben;

Abíasbe Asaiwei mōskain gøbig kōn.

8 Inchen Asabe Josafatwei mōskain gøben;

Josafatbe Joramwei mōskain gøben;

Jorambe Uzíaswei mōskain gøbig kōn.

9 Uzíasbe Jotamwei mōskain gøben;

Jotambe Acazwei mōskain gøben;

Acazbe Ezequíaswei mōskain gøbig kōn.

10 Ezequíasbe Manaséswei mōskain gøben;

Manasésbe Amonwei mōskain gøben;

Amonbe Josíaswei mōskain gøbig kōn.

11 Inchen Josíasbe Jeconíasweimba, nunelaimba mōskain gøbig kōn, tru israelitasmeran Babiloniamay merrarrowa srua ambub uras.

12 Øyeeg chab srua amben, Jeconíasbe Salatielwei mōskain gøben;

Salatielbe Zorobabelwei mōskain gøben;

13 Zorobabelbe Abiudwei mōskain gøben;

Abiudbe Eliaquimwei mōskain gøben;

Eliaquimbe Azorwei mōskain gøbig kōn.

14 Azorbe Sadocwei mōskain gøben;

Sadocbe Aquimwei mōskain gøbig kōn.

Inchen Aquimbe Eliudwei mōskaingue.

15 Inchen Eliudbe Eleazarwei mōskain gøben;

Eleazarbe Matánwei mōskain gøben;

Matánbe Jacobwei mōskain gøben;

16 Jacobpe Joséwei mōskain gøbig kōn. Inchen tru Josébe Maríai keg køben, tru Maríagurri Jesús kal-laig købig kōn, tru Cristo taig.

17 Inchawei Abraham køb uraskurri merrabsrø kølli misaamerai ureemera katøle srøig, srøig kurrab arrubig David køb uraskatiibe catorce gøbig kōn. Inchen David køb uraskurri tru israelitasmeran Babiloniamay merrarrowa srua ambub uraskatig katøgan catorce treetøwei katøle srøig, srøig misaamera kurrab arrig købig kōn. Incha tru israelitasmeran Babiloniamay srua ambub uraskurri tru Cristo kal-lamnegatiibe misaamera katøgan catorce treetøwei kurrab arrig kōn.

Jesucristo kal-laig

(Lc 2.1-7)

¹⁸Jesucristo kal-laibe øyeeg kuig køn: Maríá nui usrimbe Joséba kasharanrrab misra uñen, Josébe kasharanrrab permøwatø Maríabe Espíritu Santogurri kwanrriig kenamisøptinchibig køn.

¹⁹Inchen José tru nui keg kønrrabiibe sølgandø tabig kua, Maríane maya misagwei malau ‘øyeeg kuin gøn’ chib kenamarmønrrab, nuinetø niløtø tarømisøptinchab isubig køn. ²⁰Nøbe treeg martrab chab isubguen inchen, Señorwei kan ángel piabyu kenamisrabe trenchibig køn:

—José, ñi Davidwei misagugurri arrubig, Marían ñui srain gønrrai utamigwan kørig kui inchimøta cha. Kaguende tru unø tøgagømibe Espíritu Santoin gøn cha. ²¹Nøbe kan møg-unø tøgagøben, truigwane Jesús munchi basrtrig chibig køn. Nøbe øyeeg wamig kønrrun chibig køn, kaguende nui misagwan kaig mariiløyugurri wesranrrabig kuimba.—

²²Kerrigu øyeeg pureppe, Tius maig karuigwan eshkabigwan Señor truigwan øyah taig nebunrrai treeg kuig køn:

²³“Kan srusrø mu møøbagucha kimíig kwanrriig kørrømisra, kan unø tøgagønrrun daig. Truibe Emanuel cha wamig kønrrun” cha, trenchibig køn.

(Tru Emanuel munchibe “Tiusbe namba basran” daig.) ²⁴Incha José tru piabyugurri kiagasrabe, Señorwei ángel maig karuig køben treeg mara, Maríane nui srain gønrrai kørrømarøbig køn.

²⁵Incha Josébe Marían nui nusrkawan tøgagømnegatig keeba, sraimba lataig nømui asrtøga chi marmuig køn. Incha Josébe unane Jesús munchi basrøbig køn.

Pørr gal-labgatøsreelø tru estrellameran ashib

kusrebelø Jesúswan ashchab amrrub

2 ¹Jesúsbe Judea birau Belén puebloyu kal-labig køn, Herodes tru birau rey gøb uras. Inchen tru uras pørr gal-labgatøsreelø kusreb møguelø tru estrellameran ashib kusrebelø Jerusalén puabe, ²trenchib payibelø gøn:

—¿Judíosmerai tru rey kal-labiibe chu tsuh? cha. Kaguende nambe nui estrellan webarri asha, køriibala nune tabig waminchab amrruer— cha.



San Mateo 2.1-12

³Inchen rey Herodesbe trendaigwan mørabe, ni mumaygucha gòmui inchibig kòn. Inchen katø Jerusalén misaamerangucha treetøweim bubig kòn. ⁴Inchen reybe sacerdotsmeran karubelanba, tru Moisés pørigwan kusrenanøbelanba wama, payibig kòn:

—¿Cristobe chu gal-lanrrabig kø?— cha.

⁵Inchen nømbe trenchibelø gòn:

—Judea birau Belén cha. Kaguende Tius maig karuigwan eshkabig øyah pørig kòn cha:

⁶ Judea birau, ñi Belén pueblo-unøbe,
 tru birau purø wamindig ciudamerai utu
 ñibe chigucha gømozhiḡ lataig kønrrab gømo,
 purø nuig køn cha.

Kaguende ñuinukkurrimbe misagwan ashib karunrrabig kan
 webattrun cha,

nai Israel misagwan nø pera marøb ashib pasrønrrabig.—

⁷Inchen Herodesbe tru srømbalasrø estrellameran ashib
 kusrebelan mu ashmøwatø wama, estrellabe tappe chu uras
 kenamisrigwan payibig køn. ⁸Incha nømune Belénmay ørabe,
 trenchibig køn:

—Trusrømay amba, tru unaimburab tab payrrigay cha. Incha
 wetørrawabe, eshkarrunrrigay cha, nagucha køriibala tabig
 waminchab inrrab— cha.

⁹Tru kusrebeløbe rey øyeeg eshkailø ambubelø gøn. Inchen
 estrella tru pørr gal-labgatøsrø asiibe nømui merraptø ya, yandø
 tru unø tsuim bala pasramisren, ¹⁰tru kusreb møguelø estrellan
 ashabe, truba rruba kasraarabelø gøn. ¹¹Incha yau kebambabe,
 unamba, usri Marianba ashabe, tømboñsra, køriibala tabig
 wamincha, nømui ketamelan kura, oro gøben, incienso gøben,
 mirra gøben ketøbelø gøn. ¹²Incha yandø nømune piabyu
 Herodesweimburab ammønrrain cha, eshkailø gua, nømui
 pirausrømaybe peg maywan ambubelø gøn.

Egiptosrømay trubab ambub

¹³Yandø tru kusreb møguelø chab amben, Señorwei kan ángel
 Joséwan piabyu kenamisrabe, trenchibig køn:

—Kurra, unan usranba perøb Egiptosrømay trubab inrrø cha.
 Incha trusrø na eshkamnegatig kørrømisrtrig cha. Kaguende
 Herodesbe unan kwetchab lanrrab gøn— cha.

¹⁴Inchen Josébe kurra, unan usranba pera, yem Egiptosrømay
 webya, ya, ¹⁵trusrø tru Herodes kwamnegatig waraig købig køn.
 Øyeeg nebuppe, Tius maig karuigwan eshkaikkurri øyah taig, truig
 nebunrrain gúig køn: “Nai Nusrkawan Egiptogurri wamar” taig.

Herodes uregwan kwetchai karub

¹⁶Inchen Herodes nun tru kusreb møguelø isin gúi mørabe,
 truba rruba nama, tru kusreb møguelø tru ureg chu uras kal-

laigwan eshkaigwan, trunun cuenta mara kal-laingurrimbunø pa bilagatiguelø Belén pøtøgatan warabelan kerriguba kwetchain garubig køn. ¹⁷Øyamay nebuig køn Tius maig karuigwan eshkabig Jeremías øyah pørig:

¹⁸Ramá pueblosø kan wam mørig køn cha.

Truibe kan truba rruba isuig wamab kishib,
tru Raquel nui uregweimburab isua, kishibig køn.

Incha ‘kishmø, ka awentau’ taingucha, awentanrrab
gaimabig køn cha,
kaguende yandø ureemera chab gwaikken gøben.

Egiptogurri katø amrruig

¹⁹Inchen yandø Herodes kwaben, Señorwei kan ángel Joséwan Egiptosø piabyu kenamisra, trenchibig køn:

²⁰—Kurra, unanba usranba pera, Israel birausrømay katø inrrø cha. Kaguende unan kwetchab inchibeløbe yandø chab gwan— cha.

²¹Inchen Josébe kurra, unanba usranba Israel birausrømay pera, ibig køn. ²²Inchen Herodeswein cuentabe nui nusrkai Arquelau Judea birau truig karub wan daig mørøppe, Josébe trusrømay yamig køriimatøben, Tius piabyu Judeasømay imønrrai eshkaben, Galileasømay ambig køn. ²³Incha Josébe trusrø puabe, Nazaret pueblosø tsunrrab ibig køn. Iig øyeeg nebuppe, Tius maig karuigwan eshkab møguelø øyah taig nebunrrain gúig køn: “Jesúsbe nazaretsriig cha wamig kønrrun” daig.

Juan Bautista mu misag warab waraimønug eshkab kusrenanøb

(Mr 1.1-8; Lc 3.1-9, 15-17; Jn 1.19-28)

3 ¹Tru gwalømmerawan Juan Bautista Judea birau mu misag warab waraimønug ²trenchib eshkab kusrenanøb arrubig køn: —Kaig mariilan isua møra, Tiusweimay lliray chib. Kaguende srømbalasø Tius nø ashib karub waibe lutau basran— cha.

³Tru Tius maig karuigwan eshkabig Isaiás øyah pørig Juanbe truig kuig køn:

Kan wam mu misag warab waraimønug trenchib trasan, daig:

“Señorwei maywan tamarøb,
nuyasig maymerane ølmarøb inday,” chib.

⁴Juan kewagúibe camello isiitøga marig købig køn. Inchen nui pørønaibe kaluswan marig køben, nui mamibe nørø chapullba

kaambu mielba gøbig kòn. ⁵Jerusalén misaameraba, mayeelø Judea birau misaameraba, Jordán bi buluwaneløba nun mørtrab werrubelø gøn. ⁶Incha nòmui kaig mariilan ‘kaig marig kòn’ chib eshkaben, Juanbe truilan Jordán biyu piu umbu ulsrøbig kòn.

⁷Inchen Juanbe fariseosmera gøben, saduceosmera gøben, truba nørø nø piu umbu ulsrailø gønrrab amrrui ashabe, trenchibig kòn:

—iÑimbe ul lataig inchib misaamera! ¿Ñimune mu eshkata cha, Tiuswei purø gørig kømndiig ñimuim bala attrabig pub pasrabigugurri wegørrønrraimbe? ⁸Ñimui kaig mariilan isua møra, Tiusweimay llirawar guy, chibig kòn, tøgandø asamdiig kønrrain cha. ⁹Incha ñimbe ñimasitø øyeeg chib mendømøtay cha: “Nambe Abrahamwei misaamera guer” chib. Kaguende nabe trendamønrrun cha: Tiusbe i sruumeranguen Abrahamwei misaamera gønrrai marøg købene, martrun cha. ¹⁰Katø walømbe tusrmeran srølba para øramig chabguen srølyu pasringuen basran cha. Chi tusrwandøgucha tab mamig niimfi gwane para, nagu kegutsan cha. ¹¹Nabe ñimune ciertonwei pi pinøbulrrai piu umbu ulsra cha, kaig mariilan isua møra, Tiusweimay llirain gønmab asamdiig kønrrai. Trune nai wendau arrubiibe si, Espiritu Santotøgaba, naatøgaba pinøbulrrun cha. Truibe si, na lataguen gømø, maramburab marøbig køben, nabe truburab gømfi g kua, nui alpargatiswanguen srua inrrabgaig kur cha. ¹²Nøbe tirigun isig øra tarømartrab tru kala gutsamig tsig utigwan sruguen basran cha. Incha truyu tru tirigu chishmari yabaløwan kerrigu chab chishmarabe, tirigune tirigu esegainug esegappe, shauwane mana kwamø nagu patrun— chibig kòn Juanbe.

Jesúsuan piu umbu ulsrøb

(Mr 1.9-11; Lc 3.21-22)

¹³Jesúsbe Galileasrøngurri Jordán biyumay arrubig kòn, tru Juan uninuumay nun piu umbu ulsrønrrai. ¹⁴Srøtøbe Juanbe nune piu umbu ulsrøg kømui incha, trenchibig kòn:

—Nane ñiguen rreeg marig kømndiig købendø, ¿ñiguen nan attirru?— cha.

¹⁵Inchen Jesúsbe trenchiptinchibig kòn:

—Møimbatøbe øyamay ka mar cha. Tius tru sølgandø tabig maramigwane nambe kutøgue øyamay maramig kòn— cha.

Inchen Juanbe ka treeg marøbig kòn. ¹⁶Incha Juanbe Jesúsuan piu umbu ulsrøben, piyugurri webibig kòn. Inchen mømimbe

srømbalabe kurøptinchen, Jesúsbe Tiuswei Espíritu nuim bala kan paloma lataig kørraarri ashibig kòn. ¹⁷Inchen srømbalasrøngurri kan wam trenchib waminchibig kòn:

—Iibe nai Nusrkai undaaraig kòn cha. Nabe nuimbura truba tab gúi war— cha.

Satanás Jesúswan chinchibig kòtashchab inchib

(Mr 1.12-13; Lc 4.1-13)

4 ¹Inchen Espíritu Santobe mu misag warab waraimøsrømay Jesúswan pera yaig kòn, nugwaimandzig nun kebenøsrkønrab inchai. ²Inchen cuarenta días yem gwaløm chigucha mamøwa, yandø parøgwai mørøbig kòn. ³Inchen tru kebenøsrkønrab inchibiibe Jesúswan kemallabe, trenchibig kòn:

—Isa gømmø, tru ñi Tiuswei Nusrkain guabe, i sruumeran pirri misringaru— cha.

⁴Inchen Jesúsbe trencha løtabig kòn:

—Tiuswei wamwan pørigube trenchibig kòn cha: “Møøbe pirrindøgatø øsig tsumøtø, kerrigu Tiuswei wamdøgagucha tsumig kòn”— cha.

⁵Incha nugwaimandziibe Jesúswan Jerusalén tru Tiusweindø tarømari ciudasrømay srua ya, tru Tiuswei yau purø balasrø pasrabe, ⁶trenchibig kòn:

—Isa gømmø, tru ñi Tiuswei Nusrkain guabe, pirausrø pørsrau cha. Kaguende Tiuswei wamyube trenchibig pørig pasran cha:

Tiusbe nui ángelesmeran ñun ashchai ørtrun chibig.

Incha ñui srøbwan srugu srurrengwamønrrai nømui tasiimeratøga ñun kusranrrun— chibig.

⁷Inchen Jesúsbe trenchibig kòn:

—Katø Tiuswei wamwan pørigube treekkucha chibig kòn cha: “Ñui Señor Tiuswane ke chinchibig kòtashchab lataikkucha maramig kømøn”— cha.

⁸Katøbe nugwaimandziibe kan truba bala tunsrømay srua yabe, yu pirau chutøgucha nørreelø tru nøm ashib karub purrailanba, katø nømui chigurrimbunø tabig tørig tøgagúigwanba kenamarabe, ⁹trenchibig kòn:

—Iigwan nabe kerriguba tranrrumøn cha, ñi nan srالا, køriibala tabig waminchene.—

¹⁰Inchene Jesúsbe trencha løtabig kòn:

—iSatanás, mõi mõi iptsu! cha. Kaguende Tiuswei wamwan pørigube trenchibig kòn cha: “Señor ñui Tiuswandø kørìibala tabig waminchib, nuyasiitø marøb megamig kòn”— cha.

¹¹ Inchen nugwaimandziibe nuinukkurri tarømisren, ángelesmera amrrua, purugubelø gòn Jesúsuan.

Jesús tru nui maramigwan Galilea pølbasrøb

(Mr 1.14-15; Lc 4.14-15)

¹² Juan Bautistan kailan keeri yau keerin gòn daig Jesús wammørabe, Galileamay ibig kòn. ¹³ Incha Nazaret puebloyugurri webyabe, Capernaum pueblosrø pisu menda, Zabulónwei misag warainuuba, Neftalíwei misag warainuuba tru birau tsunrrab ibig kòn. ¹⁴ Øyeeg nebuppe, Tius maig karuigwan eshkabig Isaías øyah taig nebunrrain gúig kòn:

¹⁵ Zabulónwei misag warainuuba, Neftalíwei misag warainuuba tru birau,

Jordán bi ambøgatø tru nu bisugatømayrø,

Galilea tru judío gømeelø warainug,

¹⁶ misaamera løstøyu warabeløbe

kan truba tørig asan chib.

Kwamig nømuim bala itøgasraig lataig warabelø gøbelane

kan tørig kebin kòn, chib pørig.

¹⁷ Trugurrimbunø Jesúsbe eshkab kusrenanøb trenchibig kòn:

—Kaig mariilan isua møra, Tiusweimay lliray cha. Srømbalasrø Tius nø ashib karub waibe lutau basran— cha.

Jesús pibgatø peskabelan wamab

(Mr 1.16-20; Lc 5.1-11)

¹⁸ Jesús Galilea nu bisu mendawan ib pasrøwabe, pa nunelan ashibig kòn, kane Simón, truigwane katø Pedrogucha taig, kane Andrés taig. Truiløbe peskabelø gua, nømui atarrayameran piyu keguchib warøben, ¹⁹ Jesúsbe trenchiptinchibig kòn:

—Nai mendig amrruy cha. Nabe ñimune misaameran peskabelø gønrrai maramønrrun— cha.

²⁰ Inchen tru urastø nømbe nømui atarrayasmeran warøb, nøba ambuptinchibelø gòn.

²¹ Incha Jesúsbe katøguchi mas ambuurø yabe, katøgan pa nunelø warai ashibig kòn, truiløbe Zebedeowei nusrrkalø,

Santiagoba, Juanba. Nømbe nui mōskaimba barcoyu atarrayamera kōlsrailan tamarøb purrøbene, Jesúsbe tru nusrkalan wamabig kōn. ²²Inchen nømbe tru urastø barconba, nømui mōskawanba kōrrōmarøppa, Jesúswei mendig ambuptinchibelø gōn.

Misag truba nuwan Jesús kusrenanøb

(Lc 6.17-19)

²³Jesúsbe Galilea birau ørøba llirab ibig kōn, judíosmera tulundzuni yamørig Tius nō ashib karub pasrainuguig tabig srø wamwan eshkab kusrenanøb. Incha misaameran chi gwanrreelan gøben, chi busrkwailan gøben tamarøbig kōn. ²⁴Jesúswane Siria birausrø kerrigu wammøra gua, mayan gwanrreelan srua amrrubelø gōn. Tru chi gwanrø gøben tøgarmēran, katø ni mumayguen tab gømui mørøb inchibelan, tru kwaimandziimera tøgarmēran gøben, itōnab pesannabig tøgarmēran gøben, kōnōnrrab gaimabelan gøben srua amrrubelø gōn. Inchen Jesúsbe tamarøbig kōn.

²⁵Inchen misaamera galileasreelø gøben, decapolissreelø gøben, jerusalénsreelø gøben, judeasreelø gøben, Jordán bi tru pørr gal-labgatøsreelø gøben Jesúswei mendig truba nu ambubelø gōn.

Jesús nu tunyu wamisra kusrenanøb wamindig

5 ¹Incha Jesúsbe misag truba rruba nuwan ashabe, kan tun bala nebya wamisren, nui kusrenanøb pera uniilø kemallen, ²nøbe øyeeg chib kusrenanøb mendabig kōn:

³—Mayanguen tab gūilø gōn cha, tru Tiusweimburabigwan ke kagømōnrraindøzhig tøgaguerma isua palai mørøbelaimbe. Kaguende srømbalasrø Tius nō ashib karub waibe nømuiwein gōn cha.

⁴Mayanguen tab gūilø gōn cha, tru truba isuig kishibelaimbe. Kaguende Tiusbe nōmun chi isui inchimōnrrai tab gøbigwan tranrrun cha.

⁵Mayanguen tab gūilø gōn cha, tru larrø tammayelø lata lata inchimeelaimbe. Kaguende nømbe tru pirøwan Tius tranrrab misrigwan ketig utōnrrun cha.

⁶Mayanguen tab gūilø gōn cha, tru sōlgandø tabigwan kan parøgwaig mørøb lataig, pi mulgwaig mørøb lataig inchibelaimbe.

Kaguende maig isua palai melaigwan Tiusbe nòmun nòrrø
traniilø gønrrun cha.

7 Mayanguen tab gúilø gøn cha, katøganelan lastima
ashibelaimbe.

Kaguende nòmungucha Tiusbe treetøwei lastima ashib
tøgagønrrun cha.

8 Mayanguen tab gúilø gøn cha, chi kaig isumø manrrømera
chishig tøgärweimbe.

Kaguende nømbe Tiuswan ashchun cha.

9 Mayanguen tab gúilø gøn cha, tru ambugurri igurri tab
gømigwan lab marøbelaimbe.

Kaguende truilane Tiusbe ‘nai ureg køn’ chinrrun cha.

10 Mayanguen tab gúilø gøn cha, tru Tius mandø martrai
miaigwan marikkurri kaig martraindinab kaig nebui
melabelaimbe.

Kaguende srømbalasrø Tius nø ashib karub waibe nømuin
gøn cha.

11’Ñimbe mayanguen tab gúilø gøn cha, nagurrindø misaamera
tsalø waminab, kaig marinab, katø ñimun chine, chine isa
wamindinab melabelaimbe. 12Pøs truba kasraarab tab gúi
møray cha. Kaguende srømbalasrømbe truba rruba nuig ketig
utamig tøgagønrrun cha. Ñimguen kømøwatøsrøwei tru Tius
maig karuigwan eshkabelan øyeetøwei kaig marig købig køn cha,
trenchibig køn Jesúsbe.

Tiuswei ureebe yu pirau treba, tərba lataig køn

(Mc 9.50; Lc 14.34-35)

13’Ñimbe yu pirau tre latailø gøn. Inchendø yandø tre larrmíig
misrabe, ¿katøbe chinchä gúi larrøbig misriasamø? Yandø mas
chiweingucha larrmíig misrene, wambig petøben, misaamerabe
itøbunan, chibig køn.

14’Ñimbe yu piraueleyasig tər latailø gøn. Kan ciudama tun
balasrø pasrabiibe trubønrrab gaiman cha. 15Katø kan aceite
lámparan chigucha piløgøppe, køtsø umbu basrtrab piløgømøn
cha. Treeg kømøtø, masken pala basrene, mayeelan yau purrabelan
pilan chibig køn. 16Øyeetøwei ñimgucha misaamerai merrab ñimui
tør pilønrrai inday chibig køn, ñimui tabig mariilan asha, nømbe
ñimui Møskai srømbalasrø wabigwan truba tabig waminchain cha.

Maig maramigwan martrai Moisés pørigwan Jesús kusrenanøb

17'Nabe arruppe, maig maramigwan martrai Moisés pørigwanba, Tius maig karuigwan eshkabelø kusrenaniilanba na patsøgønrrab arritamab isumøtay chibig køn. Nabe treeg kømøtø, arruppe, tru Moisés pørigu maig chibig køben, trunun newan mara kørømartrab arrig køn. 18Pøs nabe ñimun cierton trendamønrrun: Srømbalaba, pirøba pønrrøbenbatøbe, tru maig maramigwan martrai Moisés pørigu maya lamøzhig pørig pønrrabeløguen pinappe, purainrraamøn cha, kerrigu tru pørigu maig taig nebumnegatig. 19Inchawei møikkøben tru maig maramigwan martrai Moisés pøriiløyu karua pønssailan møigu gøben maya lamøzhigwandøguen kalø marøb, katø misagwan treetøwei kalø martrai kusrenanøbiibe srømbalasrø Tius nø ashib karub waisrømbe truipe purø lamíig kui asig køn daig kønrrun. Trune møikkøben martrai karua pønssailan marøb, katø treetøwei martrai kusrenanøbiibe, truipe si, srømbalasrø Tius nø ashib karub waisrømbe nuig kui asig kønrrun cha.

20'Inchawei nabe ñimune eshkar: Ñimui sølgandø marigwan tru Moisés pørigwan kusrenanøbeløba, fariseosmeraba marøb pønrrai lataitøguen gømø, katøguchi tabig marmuisruandøbe, srømbalasrø Tius nø ashib karub waisrømbe managuen kebamrraamøn cha.

Trømbøig namiguelø gømumigwan Jesús kusrenanøb

(Lc 12.57-59)

21'Ñimbe mørøbelø gúinrrun ñimui merrabsreelane trendaigwan: “Kweechimøta cha. Møikkøben kweechibiibe kaigyu pasrønrrai pasrig kønrrun” cha. 22Trune nabe trendamønrrun: Møikkøben nui nunewan namig kørørmisrøbiibe kaigyu pasrønrrai pasrig kønrrun cha. Nunewan tsalø wamabigwane tru Setenteelø maig maramigwan asha marøbelø asha marig kønrrun cha. Inchen møikkøben nunewan trømbøig inchib: “Larrø gaig chugúi mørmíig køn” chib wamabiibe, tru kwamø nagu møra melamnug kegutsig kømigwan lab pasran cha.

23'Inchawei ñi Tiuswei tranamigwan altaryumay srua arrua, ñui nunewan ñi chigøben kaig mara tøgagúigwan ñi isuptinchabe, 24tru ñi Tiuswan tranamigwan altaryu pasrøppa, ñui nuneeba tab gørrømisramigwanmerrig lanrrab yamig køn. Trugurrimbe si, altaryumay arrua, ñui tranamigwan tranø.

25'Møikkøben ñun kejawa, juezweimay merranene, tru kejabiiba mayu ib pasrappatø, tammay kørørmisrkun cha, petø wamindam lau, tru juezwei tasku tranmønrraimbe. Inchippa juezbe policíameran tranen, truiløbe ñun kailan keeri yau kegutsinamønrrappe. 26Pøs nabe ñimun cierton trendamønrrun: Truyugurri webinrrappe, maig pagaramigwan chishtø pagarawatøwei webinrrabguen cha.

Kasharawaig itølulumigwan Jesús waminchib

27'Merrabsrø øyah taigwan ñimbe mørøbelø gúinrrun: "Møikkøben kasharawaig købendø, peg ishuuba itølulamig kømøn", daigwan. 28Trune nabe trendamønrrun: Møikkøben kan ishuwan trømbøig martrab isub chull ashibiibe nui manrraube yandø chabguen itølulig lataig kørørmisran cha.

29'Inchawei treekkurri ñui kusrmay gab kaig maringarua, kaigu ñun kebenøsrkøbene, wesrua, kuchi chibig køn. Trembe ñui asru kanbaløtø palab misrikken chi gømønrrun cha, tru møra melamnug asr ørøba kegutsig købgunrriibe. 30Ñui kusrmay tasig kaig maringarua, kaigu ñun kebenøsrkøbene, tasigwane para, guchi, chibig køn. Trembe ñui asru kanbaløtø palabikken chi gømønrrun cha, tru møra melamnug asr ørøba kegutsig købgunrriibe.

Kasharawar petiyamumigwan Jesús waminchib

(Mt 19.9; Mc 10.11-12; Lc 16.18)

31'Katø merrabsrømbe trendaig købig køn: "Møikkøben nui srawan kucha, tarømisrtrappe, kan kilga tarømisrtrab chibig mara, nun purøøramig køn" cha. 32Trune nabe trendamønrrun: Mu møtøgucha nui srai, itølulumubendø, srawan kucha, tarømisrøbiibe, nui srawane itøluløb uñchai maran cha. Inchen mu møtøgucha kan tarømisra ishuuba kasharabiibe nøgucha treetøwei itølulan cha.

Isa waminchimumigwan Jesús kusrenanøb

33'Katø ñimbe møriinrrun ñimui merrabsreelan øyah tailan 'Señorwei merrab, igatø! marmø gømø, nabe maramønrrun' cha kørørmisrigwane wamindiitø gømø, maramig køn daigwan. 34Inchendø nabe ñimun trendamønrrun: 'igatø! marmø gømø,

nabe maramønrrun' chib mumaygucha ke treeg chimøtay cha. Srømbalawei merrab pasramisra 'igatø! marmø gømø, nabe maramønrrun' chimøtay cha. Kaguende srømbalabe Tius nø wamisra waig køn cha. ³⁵Katø ñimbe pirøwei merrab pasramisra, 'igatø! marmø gømø, nabe maramønrrun' chimøtay cha. Kaguende pirøbe Tius itøbuna waig køn cha. Ni katø Jerusalénwei merrab chigucha treeg maramig kømøn. Kaguende trube Tius, tru purø nu Reywei ciuda gøn. ³⁶Ni katø ñimui turwan 'igatø! marmø gømø, nabe maramønrrun' chimøtay chibig køn. Kaguende ñimbe pusrugwan ni kandøguen puliig martrab gaimabwei, ni kandøguen yaliig martrab gaimabwei inchun cha. ³⁷Inchen ñimbe martrappe: "Øø" damig køn. Inchen marmønrrappe: "Ka" tamig køn. Pøs yandø i trendaigyugurri mas nemarøb, 'igatø! marmø gømø, nabe maramønrrun' taibe nugwaimandzigweinukkurri arrubig køn.

Kaig inchen lata marmumigwan Jesús kusrenanøb

(Lc 6.29-30)

³⁸Katø ñimbe merrabsrø trendaigwan mørøbelø gúinrrun: "Katøganui kabwan mindishibigwane nuin gabwangucha mindisamig køn", daigwan. "Katøganui trugulwan lanchibigwane nuin rrugulwangucha landamig køn", daigwan. ³⁹Trune nabe trendamønrrun: Møikkøben ñun kaig marene, lata inchimøta cha. Treeg kømøtø, møikkøben ñun kusrmay maløbøtø pashene, kandarømayigwangucha yul cha. ⁴⁰Møikkøben kejawa kewagúigwan kerranrrab inchene, turiwangucha srúa ibasingaru cha. ⁴¹Møikkøben ñun nama, kan kilómetro chigøben ninguingarubene, trube, pa kilómetro nig cha. ⁴²Inchen møikkøben ñun chi miabigwane tranø cha. Møikkøben 'peberra' cha, miabene, 'ka' chimø, peb cha.

Ashig kømui inchibelan undaaramigwan Jesús waminchib

(Lc 6.27-28, 32-36)

⁴³Ñimbe katø merrabsrø trendaigwan mørig kuinrrun: "Ñui tab linchibigwane isua, undaaramig køn chippe. Ñun tsaliigwane ashig kømui indamig køn", daigwan. ⁴⁴Trune nabe ñimun trendamønrrun: Ñimun ashig kømui inchibelane undaaray cha. Inchen ñimun kaig martrabgøba inchibelaimbe nòmuyasig Tiusba wamindamig køn cha. ⁴⁵Treeg marabe, ñimbe Møskai srømbalasrø

wabigwei ureg kōnrrabguen. Kaguende nōma nui nōsigwan kailaim bala lata, tabelaim bala lata pōrr batingarub, katō sōlgandō tabig marōbelaim bala lata, chi sōlgandō tabig marmeelaim bala lata sre bunrrai ørøb inchibig kōn cha. ⁴⁶Kaguende ñimun undaarabelandō undaarawabe, ¿truburøbe chigúi utōnrrague? ¿Romasreelayasig an utabeløguen treetøweimbe marøbelø gōmuitarru? ⁴⁷Inchen ñimui nunelandō tab wamabiibe, ¿chigúi srøig peg marig kōnrrautah? Kaguende ¿Tiuswan ashmeelø tru judfos kōmø misaameraguen treetøweimbe marøbelø gōmuitarru? ⁴⁸Ñimbe sōlgandō newan tabelø guy, ñimui Mōskai srømbalasrø wabig newan tabig kōb lataitøweingue.

Tabig maramigwan Jesús kusrenanøb

6 ¹Ñimui tabig mariilan misaamerai malau marmøtay, misaamera ka ashchaindø lataig. Ñim treeg marene, ñimui Mōskai srømbalasrø wabiibe chigucha truburøbe tranrraamøn. ²Inchawei palai inchibelan ñi puruguppe, mayeelø wammørtrai waminchib kenamarmøta. Tru palatø tab inchibelø latawei judfosmera tulundzuni yamerayu, callesmerayu misaamera nōmun tabig waminchai marøbelø lataig marmøta. Kaguende nabe ñimun cierton trendamønrrun: Yandø treeg marøbeløbe nōmui truburø ketig utamigwane utabguen indan cha. ³Inchen palai inchibelan ñi puruguppe, ñui kusrmay tasig marigwane atsimay tasig asha gōnrrai marmøta. ⁴Inchen ñi mun kenamarmøtø mariilan Tius ñui Mōskai ashibiibe ñun truburø ketamigwan kettrun.

Tiusba mandø wamindamigwan Jesús kusrenanøb

(Lc 11.2-4)

⁵Ñim Tiusba waminchib pōnrrappe, tru palatø tab inchibelø lataig kōmøtay. Truiløma judfosmera tulundzuni yamerayu gøben, plazayu ya tsøbmerasrøn gøben pōnrramisra, Tiusba wamindamig chullelø gøn, misaamera ashchai. Nabe ñimun cierton trendamønrrun: Nōmun misaamera tabig wamindiibe, truiibe truburø ketig chabguen utabguen indan cha. ⁶Trune ñibe Tiusba waminchappe, ñui kwartuyu kebya, yaskabwan kasra, ñui Mōskai Tiusba waminchi cha, mu asiimíig truyu ñibatø pasrabigwan. Inchen ñi mun kenamarmøtø marigwan Tius ñui Mōskai ashibiibe ñun truburø ketamigwan kettrun.

7'Tiusba waminchib pasrappe, trunundø katøle, katøle ka yandø wama mormøta, judíos komeelø latawei. Kaguende truiløbe truba rruba waminchene, Tiusbe katøguchinguen mōrtraitamab isubelø gøn. 8Ñimbe nøm lataløwein gømøtay. Kaguende ñimui Møskai Tiusbe ñim miamøwatø ñimui chi palai indigwane chab ashaguen wan. 9Ñimbe Tiusba waminchib pōnrrappe, øyah chinrrigay:

Namui Møskai srømbalasrø wabig, ñui munchibe tabigweindø tarømara, newan tab indig kōnrrun.

10 Ñi ashib karub pasraibe pirau larrøbitchab amø, srømbalasrø latawei yu piraugucha,

ñi maig maramdiig køben, treegwei marig kōnrrai.

11 Kwalømmørig nam mamig maig palabigwan mõi tranøb,

12 namui kaig mariilan ulø baymø, pesannarrunrrig chib, nam namun kaig marøbelan ulø baymø, pesannawa kōrrømisrøb lataløwei.

13 Chigøben namun kegørrøsrkōnrraptiig pōnrrøbene, truwane namun ambashmørrunrrig. Masken tru kaigweinukkurrimbe tarømartra. Kaguende, tru ashib karub waiba, maramburab mariiba, purø nuig, purø tabiibabe managatiig ñuin gøn chib.

14'Kaguende katøganelø ñimun kaig maren, truilan ñim ulø baymø, ñim pesannabene, ñimui Møskai srømbalasrø wabikkucha ñimun ulø bayamigwan paymønrrun cha. 15 Inchen katøganelan ñim pesannamø, ulø bayene, ñimui Møskai srømbalasrø wabikkucha pesannamø, ñimui kaig mariilan ulø bayrrun chibig kōn Jesúsbe.

Ayunamigwan Jesús kusrenanøb

16'Ñim ayunappe, malømera kwa isuig lataig mismøtay. Tru palatø tab inchibeløma malømerabe kwa isuig latalø kenamarøbelø gøn, misaamera nømbe ayunab gúi ashchai. Treeløwein gōnrrab gømø. Pøs nabe ñimun cierton trendamønrrun: Yandø nømun misaamera tabig wamindiibe, truike truburø keti lataig chabguen utabguen indan cha. 17 Inchen ñibe ayunappe, maløwan kwalla, pusrugwan tabig tamar cha, 18 misaamerabe ñun ayunab wain gōnmab ashmōnrrai. Ñuinetø marigwan ñui Møskai ashib pasrabiibe trunun asha, nøbe ñune truburø tranamigwan tranrrun chibig kōn.

Srømbalasrø chigurrimbunø pønrrabig

(Lc 12.33-34)

19'Yu pirau chine, chine tulishimøtay, pullillamera mab, trerawa pinab, nileelø kebamba nilab indinug. 20Trembe srømbalasrøwei tøgamisrøb tulisay, pullilla mamøwei, trerawa pinømøwei, nileelø nilønrrab kebammøwei indinug. 21Kaguende ñimui chi tøgagúilø chu esegaig pønrrøbene, ñimui manrrøgucha ke truyutø isub pasrønrrun cha.

Kabmerabe asrwei lámpara gøn

(Lc 11.34-36)

22'Asru kappe kan lámpara gøn cha. Inchawei ñui kab tabig købene, ñui asrube kerriguba tørsulu gønrrun. 23Inchen ñui kab kaig købene, ñui asrube kerriguba løstiig kønrrun. Inchawei tru tør ñuinug pasrabikken løstiig købene, tru løstiibe mas maig løstøgølig kerah chibig køn Jesúsbe.

Møigwanmerrig mas isua tøgagømig

(Lc 16.13)

24'Nun karunrrabelø muguen pagatøbe tøgagønrrab gaimanrrun. Kaguende kanune tsalø ashippe, kanune undaaranrrun cha. Kanune chiyugucha truba tab mørøb megappe, kanune kaashib webinrrun cha. Inchawei Tiusweimburabigu marøb pasrønrrab isumba, anweimburabigu marøb pasrønrrab isumba inchibiibe martrab gaimanrrun cha, pabaløbabe.

Tiusbe nui uregwan ashibig køn

(Lc 12.22-31)

25'Inchawei nabe ñimun trendamønrrun: Øsig amønarnig, ñim mamigwanba, mutsamigwanba, asru chi guemermab isumigwanba menrra isumøtay cha. Øsig amønarnikkan kan mamig lataitø gúitarru cha. Kabe asrkan kan asru keelø lataitø gúitarru cha. 26Pala amønñibelø illimeran asay chibig køn. Ellguamøwei, ellmarig tulishimøwei, ellmarig tulisaiawan esegainug esegamøwei inchibelanguen, truilanma ñimui Møskai srømbalasrø wabiibe manrrai mannøbig køn cha. ¿Ñimbe illimera lataguen gømø, maselø gømøtirru? chibig køn. 27¿Ñim mõiløgøben maya, maya incha katøgan tøbø metrotøguen nurabsruguh? cha.

28'¿Chindimbarre ñimbe asru keegwan truba rruba isubelø gøgue? cha. Wambig umeranma asay chibig køn. Kwallmøwei, kumøwei inchibelø gøbendø, tabig nørrøran cha. 29Inchendø nabe trendamønrrun: Rey Salomónguen nui chine purø tabzhig tøgagua, umera lata tabzhiibe kemuig køn cha. 30Wambig kaumera, mõi ka bønrrøwa, srønabe nagu parrig kønrrabigwanguen Tiusbe øyeeg tabzhig kenanøb lataig marøbiibe, ñimune treetøguen gømøtø, masken marmønrraitarru cha, ñim ya ñimui isubigwan Tiusweinug pasra ke kagømønrraindøzhig tøgarwan. 31Inchawei øyeeg chib chi isumøtay chibig køn: “¿Chi mamer?” chib; “¿Chi mutsamer?” chib; “¿Chi guemer?” chib. 32Kaguende tru Tiuswan ashmeelø judíos kømø misaamerabe iigwandø isub labelø gøn. Inchen ñimui Møskai srømbalasrø wabiibe ñimui chi palabelan ashaguen wabig køn. 33Inchawei Tius nø ashib karub wainuguigwanba, katø tru sølgandø tabigwanba, truilanmerrig lab maramig køn. Trumaybe tru katøgan chi palabelangucha ñimbe nemarig kerrigu utønrrun. 34Inchawei srøna gwalømweyigwane chi isumøtay. Kaguende srøna gwalømweyigwane srøna isumig nøørø gøn. Kaguende kwalømmørig chi pub arrubiitø tsabø gøn isumibe.

Katøganelan ‘øyeelø, øyeelø gøn’ chimøtay

(Lc 6.37-38, 41-42)

- 7** 1'Ñimbe katøganelan ‘øyeeg, øyeeg marøbelø gøn’ chib waminchimøtay, ñimungucha ‘øyeelø gøn’ tainamønrrappe. 2Ñim katøganelan ‘øyeelø, øyeelø gøn’ chib wamindiibe, ñimungucha treetøwei martrun. Ñim kanelan maig unaasha traniibe, ñimungucha treetøwei unaasha tranrrun. 3¿Chindimbarre ñui nunewan kabyu shauzhig wabigwangøba ashku cha, tru ñuin gabyu nu tsig wabigwanguen ashmubendøbe? 4Inchawei ñitøweinguen ñuin gabyu nu tsigwan ashmubendøbe, ñui nunewane chinchu øyeeg chinrragu: “Nai nuneg, ¿ñuin gabyu shauzhig wabigwan wesrarruah?” cha. 5Ñi, palatø tabig, ñuin gabyu nu tsig wabigwanmerrig wesru chibig køn. Trenchabe si, ñui nunewein gabyu shauzhig wabigwan wesrumig tab ashchabguen cha. 6'Chigøben Tiusweindø tarømarigwane werameran tranmøtay. Katø ñimui perlasmerane kuchimeran kebusrmøtay, inchippa truilan itølula, llirawa, amrrua, kurmillustøga kwanaguchib ñimun pitis marinamønrrappe.

Tiuswan miab, nun lab, katø yaskabu wamab inday

(Lc 11.9-13; 6.31)

7'Miabene, Tiusbe ñimune tranrrun. Lawabe, wetørranrrun. Yaskabu wamubene, ñimune kurtrun. 8Kaguende mugucha miabiibe utøben, labiibe wetørraben, yaskabu wamabigwane kurtrun.

9'Kabe ñimma møikkøben ñui nusrkai pirri miabene, kabe, ÷kan pillisrugwan rranøbsruguh? 10Kabe kan peskau miabene, ÷kan ulwan rranøbsruguh? 11Pøs ñimma ya kailø gøbenguen ñimui uregwane tabig keta tranøbelø gøben, kan mas ñimui Møskai srømbalasrø wabiibe nun miabelane, maig tabig tranrrer chibig køn.

12'Inchawei ñimma katøganelø ñimuyasig tabig maramig palai inchibeløbe, ñimgucha katøganelan treetøwei maray chibig køn. Kaguende maig maramigwan martrai Moisés pørigu lata, Tius maig karuigwan eshkabelø pøriiløyu lata iigwanwei martrai karubig køn.

Trag yaskappa, lendø yaskappa

(Lc 13.24)

13'Trag yaskabwan kebambay chibig køn. Kaguende tru kan lendø yaskappa, tru lendø maybabe managuen werrumikkaig kegørra pønrramsrømay pera ibig køben, truwane si, møiløgøben truba nu kebamban cha. 14Inchen tru trag yaskappa, trag mayba managuen patsømø øsig purramsømay pera ibiibe, truiløbe traguelø, trurrigu murelø gøben, trunun wetørrabeløbe mamdø gøn chibig køn.

Tusrbe mamikkurri asamdiig køn

(Lc 6.43-44)

15'Tab asha guy, chibig køn, 'Tius maig karuigwan eshkabelø guer' chibelø isa waminchibelan, ñimuimay kan ubisha lataig amrrubendø, nømui umbube kan namig lobosmera latailø gøn cha. 16Trune ñimbe nømui maig mariiløytøguen tsabø ashchun, tusryu mamig niguigwan latawei. Kaguende kal dusryugurrima uvas lurrmøwei, katø kaldø misrøb tusryugurri yashig lurrmøwei indan. 17Inchawei kan tab tusrbe tab mamig niguen. Trune kan kaig tusrbe kaig mamitøwei nigan cha. 18Inchawei kan tab tusrbe kaig mamig niirrab gaimabwei, katø kan kaig tusrbe tab mamig niirrab

gaimabwei indan cha. ¹⁹Inchawei chi tusrwandøgucha tab mamig niimígwane para, nagu kegutsan. ²⁰Inchawei nòmui mariiløyu ñimbe ashchabguen chibig køn.

Tius nø ashib karub waisrømbe mayeeløba gømøtø guebamrrun
(Lc 13.25-27)

²¹'Nan: “Señor, Señor” chibelø srømbalasrø Tius nø ashib karub waisrømbe mayeeløba gømøtø guebamrrun. Treeg kømøtø, nai Møskai srømbalasrø wabig maig maringaruben, trunun marøbeløtøwei kebamrrun. ²²Tru srabe gwalømbe nane møiløgøben truba nu trenchinrrun: “Señor, Señor, yamba nambe ñui munchiyu ñi maig karuigwan eshkab, ñui munchiyu kwaimandziimeran webetab, ñui munchiyu maramburab mariilan marig købig køn” cha. ²³Inchene nabe trendamønrrun: “Managuen nabe ñimune ashmíig kur cha. Ñim larrø gaig marøbeløbe, nainukkurri tarømisray” cha.

Pailø ya marøbelan kemesra wamindig
(Mc 1.22; Lc 6.47-49)

²⁴Møikkøben na wamindigwan mørøb, na maig taigwan møra marøbigwane kan møg tab isua marøbig lataig køn chinrrab. Nui yawan srug bala marøbig lataikke. ²⁵Sre bub, pimera nurab, yawan isig megambub itsingucha, yabe peñmøn cha, kaguen srug bala marig basrøwa. ²⁶Inchen nan mørøppe, mørendø, na maig taigwan marmígwane, kan møg tab isua marmíig lataig køn damønrrun cha, nui yawan pisrum balatø marøbig lataikke. ²⁷Sre buben, pimera nuraben, yawan isig megambub ichen, yabe peña, purø isumdiig mindisaig kørømisran— cha, trenchibig køn Jesúsbe.

²⁸Inchen Jesús iilan kerrigu chab waminchen, maya misaaba kwaara asha kørømisrøbelø gøn øyeeg kusrenaniilan. ²⁹Kaguende nøbe kusrenanøppe, nuinukkurrindøwei mu mandamgaig kusrenanøbig køn, tru Moisés pørigwan nòmui kusrenanøbelø lata gømø.

Asr trerab gwanrrø tøgagigwan Jesús tamarøb
(Mc 1.40-45; Lc 5.12-16)

8 ¹Yandø Jesús tun balasrøngurri kørøarruben, misag truba nu mendig amrrubelø gøn. ²Inchene kan møg asr trerab gwanrrø, lepra taig, tøgagig kemallippa, Jesúswei merrab tømønøsrabe trenchibig køn:

—Señor, nan ñi tamaramdiig købene, tamartra— cha.

³Inchen Jesúsbe tasigwan larrøbicha estsarabe, trenchibig køn:

—Tamarøg køtan cha. Tamarig kørrømisr— cha.

Inchen tru urastø nui trerab gwanrrøbe chishig kørrømisren,
⁴Jesúsbe trenchibig køn:

—Au, mungøben eshkawabesín cha. Inchendø ya, ñui asrwan sacerdotendø kenamara, katø Tiusweyasig tru Moisés tranrrig taigwane srúa ya, tranrrig cha, mayeeløba ñui kwanrrøwan chishig kørrømisrin gúi ashchain— cha.

**Suldau sötøwan nø garub pera basrabigwei mendig
 megabigwan Jesús tamarøb**

(Lc 7.1-10; Jn 4.43-54)

⁵Yandø Jesús Capernaumsrø kebibene, romanosmerai suldau cienelan ashibig, kan centurion daig, nuimay arruabe, nun purugurra chib, ⁶trenchibig køn:

—Señor, nai mendig megabiibe yau kwanrrø tsun cha, truba rruba pusrkwai inchib, kerrigu kønønrab gaimaig.—

⁷Inchene Jesúsbe trenchibig køn:

—Nabe arrua, tamaramønrrun— cha.

⁸Inchen tru centurionbe trenchibig køn:

—Señor, ñi nai yau kebattraimbe, nabe trengatig kōmuinatan cha. Tammisr cha, treetø chirra cha. Nai karuindiig megabiibe tammisrtrun cha. ⁹Kaguende nagucha mas nørreelø karuig kur cha. Katø treeg køben na karub tøgagúilø suldaumera tøgagur cha. Truilanma na mōigwan gøben: “Inrrø” chibene, ib; katø na mōigwan gøben: “Amø” chibene, arrub; katø nai karuindiig megabigwan chigøben: “Mar” chibene, marøb inchibig køn— cha.

¹⁰Jesús iigwan mōra, kwaara asha gørrømisrabe, nui mendig amrrubelan trenchibig køn:

—Nabe ñimun cierton trendamønrrun: Israelsrø mōigweinukken isubigwan nainug pasra tøgagúig øyangatig nuig wetørramur cha, i mōwei lataig. ¹¹Incha nabe ñimune trendamønrrun chibig køn: Pørr gal-labgatøsrøngurrin gøben, pørr guebibgatøsrøngurrin gøben truba nu amrrua, Abrahamba, Isaacba, Jacobpa manrrab purramisrtrun cha, srømbalasrø Tius nø ashib karub waisrø. ¹²Trune Tius nø ashib karub waisrø purrønrrab ureemerabe wambig purø rrømbø løstøyu

webusriilø gønrrun cha. Truyube kishib, trugulmeran tsatsamig kørnrun— cha.

¹³Incha Jesúsbe tru centurionwan trenchibig kørn:

—Yamay inrrø cha. Ñi maig køreig treeg kørnrun— cha.

Inchen tru urastø tru mendig megabiibe tammisrig kørn.

Jesús Pedroi sueeran tamarøb

(Mc 1.29-31; Lc 4.38-39)

¹⁴Jesús Pedroi yamay arrua, kebyabe, Pedroi sueerabe camayu pachiiba tsui ashibig kørn. ¹⁵Incha Jesúsbe tru ishuwei tasigwan katørabene, pachiibe weetaptingen, nõbe kurra, tru pubelayasig chi maramigwan marøb mendabig kørn.

Kwanrreelø truba nõrrøwan Jesús tamarøb

(Mc 1.32-34; Lc 4.40-41)

¹⁶Yandø yem misren Jesúsweimay truba yamelan kwaimandzig tøgárwán misaabe srua amrruben, kan wamitøgátø tru kwaimandziimeran webetab, katø chi gwanrrø gøben tøgárwán mayeelan tamarøbig kørn. ¹⁷Øyeeg pureppe, Tius maig karuigwan eshkabig Isaiás øyah taig nebunrrain gúig kørn:

Nõtøwei namui pusrkwabelanba,

namui kwanrrømeranba kerran, daig.

Jesucristoi mendig ambamibe murig kørn

(Lc 9.57-62)

¹⁸Jesúsbe nuin bõtøgatan misaamera truba nu tulsrua gúi ashabe, nui kusrenanøb pera uniilane pisu ambøgátømaysrø larramrai karubig kørn. ¹⁹Inchen tru maig maramigwan martrai Moisés pørigwan kan kusrenanøb big kemallabe trenchibig kørn:

—Kusrennøbig, ñi chu ibendø, nabe mendig arrumønrún— cha.

²⁰Inchene Jesúsbe trencha løtabig kørn:

—Zorramerabe waramig trab tøgagøben, katø pala amøñib illimeragucha nõmui lemera tøgárwán cha. Trune na, Møg Misra Arrubiibe ni nai turwan chu nerrarramikken chigaig kur— cha.

²¹Inchen katøgárwán mõikkøsrøn, Jesúswan mendig uñibiibe, trenchibig kørn:

—Señor, nai mõskawan sørønrabmerrig ibashcha— cha.

²²Inchene Jesúsbe trenchibig kørn:

—Ñibe nai wendau amø cha. Tiusweimburabigu kwaig latailøbe nømui kwailan sørøbash— cha.

Jesús isig ichibigwanba, pi latøgushibigwanba kønøbashmub

(Mc 4.35-41; Lc 8.22-25)

23Jesús yandø barcoyu nebiben, nui kusrenanøb pera uniiløbe nun lincha ambubelø gøn. 24Inchene mømibe maryube truba trømbøig mur isig ichib kurra, pi welarmera barcoyu mas, mas negutsingucha, Jesúsbe kib tsubig køn. 25Inchen nui kusrenanøb pera uniiløbe kasrønannrab amba, trenchibelø gøn:

—iSeñor, namun wesrurra chib, chab asentab meler!— cha.

26Inchen nøbe trenchibig køn:

—¿Chindimbarre kørig kōta? cha. Ñim gúi ñimui isubigwan nainug ke kagømønrraindøzhig pasra tōgar— cha.

Incha kurrabe, isigwanba, marwanba kønømønrrai kandø wamuben, igatø! yandø kerrigu wasrønzhig kørørmisrøbig køn. 27Inchen nømbe kwaara asha gørrømisra, trenchibelø gøn:

—¿Øyeebe chi mōg kerah? cha. iIsig ichibig lata, mar lata, iiløguen nun mōrtrappe!—

Jesús Gadarasrø pailø kwaimandzig tōgarmeran tamarøb

(Mc 5.1-20; Lc 8.26-39)

28Jesús pisu ambøgatø Gadara birausrø larraibene, pailø kwaimandzig tōgarmera sörin rrabmerayugurri werrua, Jesúswan kemallibelø gøn. Truiløbe truba namiguelø gøptø, tru maywane mugucha puramrrab gaimabelø gøn. 29Inchabe trenchib trashibelø gøn:

—Tiuswei Nusrkai, ¿namune chi martrab inchigu? cha. ¿Namun igatø! purø rrømbøig mōra melønrrai martrab attirru cha, tru treeg maramig pumøwatøbe?—

30Truyugurri maya yab gøsrøn kuchimera truba nu lawa mab amøñibelø gøn. 31Inchen tru kwaimandziimerabe Jesúswan trenchib rrugabelø gøn:

—Namun webetappe, trube, tru kuchimerayu kebambingarurrunrrig— cha.

32Inchene Jesúsbe trenchibig køn:

—Ambay bøs— cha.

Inchen tru kwaimandziimerabe mөгuelainukkurri webamba, kuchimerayu kebamben, tru urastø kuchimerabe luløb mendappe, truba trømbø lendeyu lula, chab pinөгөrraptincha, larrø nu bisuyu kegørra, pi guesra, chab gwabelø gøn.

³³Inchen tru kuchi ashibeløbe chab lula, pueblosrø puabe, tru kwaimandzig tøgær gøbelan maig purayaigwan kerriguh waminchib mendabelø gøn. ³⁴Inchen puebloyu maya misaabe Jesúswan katønrrab webamba, nun ashabe, tru biraugurri ‘irra’ cha, truba rrugabelø gøn.

Jesús kan kønønrrab gaimabigwan tamarøb

(Mc 2.1-12; Lc 5.17-26)

9 ¹Inchen Jesúsbe kan barcoyu nebya, pisu ambөгatøsrø larraya, nui puebloyu pubig køn. ²Inchen truyube kan mөг kønønrrab gaimabigwan kan tsigalyu muta amrruben, Jesúsbe nømui isubigwan ke nuinuutø pasra bønrrai ashabe, kwanrriigwane trenchibig køn:

—Nai nusrkai, kullaaramøta cha. Ñui kaig mariilan ulø bayamig kømíig, pesannaig kørørmisran— cha.

³Inchen mөilөгøsrøn tru Moisés pөrigwan kusrenanøbeløbe treeg isubelø gøn: “Nøbe Tiusweimburab purø trømbøig waman” chib.

⁴Inchen Jesúsbe nøm chi isub güilan ashabe, trencha payibig køn:

—¿Ñimbe ñimui manrraube chindimbarre øyeeg kaig isub gөгue? cha. ⁵¿Mөгigwan mas kørømø trendamdiig købsruerah? cha. Kabe: “Ñui kaig mariilan ulø bayamig kømíig pesannaig kørørmisran”, ¿tamiteh? Kabe: “Kurrab, inrrø”, ¿tamiteh? cha. ⁶Pøs, na, Mөг Misra Arrubiibe yu pirau kaig mariilan ulø bayamig kømíig pesannaig kønrrai mu mandamgaig marøbig kui mөimbe ñim ashchai kenamaramønrrun— chibig køn.

Inchabe tru kønønrrab gaimabigwane trenchiptinchibig køn:

—iKurrø! cha. iÑui tsigalwan mutab, ñui yamay inrrø!— cha.

⁷Inchen kwanrriibe kurra, nui yamay ibig køn. ⁸Inchen misaamera iigwan ashabe, truba kørig kui inchibelø gøn, Tiusbe mөгuelan øyeeg mu mandamgaig maramig tranitamab isua. Incha øyeeg marikkurri Tiuswan truba tabig waminchibelø gøn.

Jesús Mateowan wamab

(Mc 2.13-17; Lc 5.27-32)

⁹Jesús truyugurri yabe, kan Mateo taig mөwan romasreelayasig an utabelø purrainug wai ashabe, trenchibig køn:

—Nai mendig amø— cha.

Inchen nøbe kurrab, nui mendig ibig køn.

¹⁰Indiibe Jesúsbe tru Mateowei yau mab wabene, truba yamelø romasreelayasig an utabelø gøben, katøganelø kaig marøb misaamera gøben puabe, Jesúsba, nui kusrenanøb pera uniiløba mishatsigu trubalatø purrøben, ¹¹møiløgøsrøn fariseosmera



San Mateo 9.10

trunun ashabe, nui kusrenanøb pera uniilan trencha payibelø gøn:

—¿Ñimui kusrennøbiibe an utabeløba, kaig marøbeløba mab, muchib wappe, øyeebe maig marøb wah?— cha.

¹²Inchene Jesús trunun mørabe, trenchibig køn:

—Tabelø kwanrrøgarbe mø marøbig palain gømøn cha. Kwanrreeløbeguende palain gøn cha. ¹³Amba, i pørigu chi chibig kuigwan kusrey cha, tru Tiuswei wamyu øyah chibigwan: “Animal gweecha, nan tranøb gømøtø, ñimbe lastima ashibelø gønrrai inchar” taigwan. Kaguende nabe sølgandø amønñibelan wamønrrab arrumøtø, kaig marøbelan wamønrrab arrig køn— chibig køn Jesúsbe.

Ayunamigweimburab Jesúswan payib

(Mc 2.18-22; Lc 5.33-39)

¹⁴Juan Bautistai mendig amønñibelø Jesúswan kemallabe, trencha payibelø gøn:

—Namba, fariseosmerababe ayunamigwan katø gatø marer cha. ¿Inchen ñui kusrenanøb pera uniiløbe chindimbarre trunun marmeelø gøh?— cha.

¹⁵Inchene Jesúsbe trenchibig køn:

—¿Kan novios yaumay linchai eshkailanma novio nømba wabengan isuin burrønrraitarru? cha. Inchendø yandø novion srua ambam gwalømmera punrrun cha. Inchen ayunabwei inchun cha.

¹⁶Muguen kan køllin camisanma kølsraigu srø llensu søtiimíigwan waya, tsushimøn cha. Kaguende tru srø llensube kesruppa, kølli llensune kølsrøben, mas trømbøikken kølsraig kørrømisrtrun cha. ¹⁷Katø srø vinonma køllin galusmerayu usrmøwei inchibelø gøn cha. Kaguende treeg marene, kalusmerabe srurrøben, vinobe lushen, yandø kalusmerabe ka pinønrrun cha. Inchawei srø vinone srø galusmeran marigu usramig køn cha. Trumaybe møigwandøgucha chi mindisaig kømønrrun— chibig køn Jesúsbe.

Jesús kan ishuwan kwanrrøwan tamarøb

(Mc 5.21-43; Lc 8.40-56)

¹⁸Jesús waminchib pasramne, judíosmeran chi maramigwan kan karubig puabe, nui merrab tømboñsra, trenchibig køn:

—Nai nimbasr ke mōindø gwan cha. Øyeeg kuindøgucha, ñi arrua, tasigwan nuim bala estsarene, katø øsiiranrrun— cha.

¹⁹Inchen Jesúsbe kurra iben, nui kusrenanøb pera uniilø nun lincha amben, nøbe tru møøba ibig køn. ²⁰Indiibe kan ishug doce años ørøba ani ib gwanrrø tøgag chiguen tab gømui megawa, Jesúswan wendaugurri kemallippa, Jesús nø kewagúig urøzhigwandø katørabig køn. ²¹Kaguende nøbe treeg isubig køn: “Nui kewagúigwan ka katøraitø tammisrig kørørmisramønrrun” cha.

²²Inchen Jesúsbe keesha asha, tru ishuwan ashabe, trenchibig køn:

—Chi isumøta cha. Nimbasr, ñui isubigwan nainuutø pasra tøgagúikkurri tamarig kørørmisran— cha.

Indiibe tru uraskurri yandø tammisrig kørørmisrig køn.

Kan ishug-unan Jesús øsiiranøb

²³Incha Jesús tru judíosmeran karubigwei yau pubene, lus urrabelø gøben, katø misaamera truba trashib kishib gúi ashibig køn. ²⁴Inchabe trenchibig køn:

—Yugurri webambay cha. Ishug-unøbe kwaig kømøtø, ka kiptø tsun— cha.

Inchen misaamerabe Jesúswane ka indzatø mørøbelø gøn.

²⁵Incha nømun webambingaruben, Jesúsbe kebya, ishug-unan tasigu kemørene, unøbe kurraptinchibig køn. ²⁶Inchen tru biraube muba kuimbura treeg purayaigwan wammørig kørørmisrøbig køn.

Pailø kabgailan Jesús tamarøb

²⁷Jesús truyugurri webya ibene, pailø kabgailø trenchib trashib wendautø amrrubelø gøn:

—iNamun lastima ashcha chib, merrabsrø Davidwei Nusrkai!—

²⁸Inchen Jesúsbe yau kebiben, tru kabgailø kemallene, nøbe trencha payibig køn:

—¿Ñimbe na øyeegwan martraitamab køregueh?— cha.

Inchen nømbe:

—Señor, øø— cha, løtabelø gøn.

²⁹Inchene Jesúsbe nømui kabmeran katørawabe, trenchibig køn:

—Ñim ñimui isubigwan nainug maig tøgagúig treeg kønrrain— cha.

³⁰Inchen nømui kabmerabe ashibelø misren, Jesúsbe trenchib karubig køn:

—Mun gøben eshka b gønrab gø mø cha, i marigwan.—

³¹Trendaingucha nømbe webambuptø, Jesús nø chi marigwan tru birau mayeelan waminchibelø gøn.

Kwaimandzig tøgag waminchab gaimabigwan Jesús tamarøb

³²Inchen tru kabgailø gøbeløbe webambub gømnetø, møiløgøsrøn Jesúsweimay kan wamgaig kwaimandzig tøgagwan srua amrrubelø gøn. ³³Inchen Jesús tru kwaimandzigwan weguchen latatø, tru wamgaibe waminchiptinchen, misaabe kwaara asha kørømisra, trenchibelø gøn:

—iManaguen nam Israel misaamerai utube øyeekkatiibe ashmer!— cha.

³⁴Inchen fariseosmerabe trenchibelø gøn:

—Kwaimandziimeran ke nøasha garub pasrabikkurri kwaimandziimeran nøbe webusrøbig køn cha.—

Jesús misagwan yeekkucha nebuig melaitamab lastima ashib

³⁵Jesús maya pueblomerasrø, yamera tsitsø bønrrabsrø, judíosmera tulundzuni yamørig kusrenanøb, tabig srø wam Tius nø ashib karub wainuguigwan eshka b waminchib, chi gwanrrømeragurrimbunø tøgagwan pusrkwabelan tamarøb lllirab ibig køn. ³⁶Incha truba nu sötø misagwan ashabe, lastima isui inchibig køn. Kaguende nømbe truba isuilø, chinchabguen gaimar, kan ubishamera mu ashchabig chigar latailø gøben. ³⁷Incha nui kusrenanøb pera uniilan trenchibig køn:

—Ellmarig tulisamibe truba nørø gøben, trune tulishinrrabeløbe mamdø gøn cha. ³⁸Inchawei tru ellmarig buaig Tiuswan miay chibig køn, nui ellmarigwan tulishinrrabelø ørtrai.—

Jesús nøashib karua øramelø doce lawa wesrub

(Mc 3.13-19; Lc 6.12-16)

10 ¹Jesús nui doce kusrenanøb pera uniilan wamabe, mu mandamgaig maramig tøgagønrrai tranøbig køn, trømbøig maringarub gwaimandziimeran webusrøb, katø chine kwanrrømeranba, pusrkwabelanba tamartrai.

²Ilø gøn tru doce nøashib karua øriilai munchimera: Srøsriibe Simón truigwane katø Pedrogucha taig, nui nuneg Andrésba, Zebedeowei nusrkai Santiagoba, nui nuneg Juanba, ³Felipe gøben,

Bartolomé gøben, Tomás gøben, Mateo tru romasreelayasig an utabig køben, Alfeowei nusrkai Santiago gøben, Tadeo gøben, ⁴Simón tru Cananistameraingatiig køben, Judas Iscariote tru wendø Jesúswan ashig kømui inçhibelaingatø misra tranøbig købengue.

Jesús tru doceelan kusrenanrrai ørøb

(Mc 6.7-13; Lc 9.1-6)

⁵Jesús i doceelan øyah martrigay chib karua ørøbig køn: —Judíos kømeeleø waraisrø ammøwei, samaritanosmerai pueblomerasrø kebammøwei inçhigay cha. ⁶Trembe tru Israel misaamerai utu tru ubisha rrubiilø latailaimaytø amrrigay cha. ⁷Trusrø ambabe, srømbalasrø Tius nø ashib karub waibe lutau basran chib eshkab kusrenanrrigay cha. ⁸Kwanrreelane tamarøb, kwailan øsiiranøb, asr trerab gwanrrø tøgarwan tamarøb, kwaimandziimeran webetab inçhigay cha ñimbe. Ñimun øyeeg martrai tranigwan ñimma ka ketig utig køn cha, ñimgucha gatø treegwei marøppe, anwei marmøtay cha.

⁹Oro gøben, an gøben, cobre gøben ñimui pørønailøyu pusra ammøwei, ¹⁰katø mayuwei murrall ila ammøwei, turingucha yunømaramiba gømøtø, kandø tøga; alpargatiskucha keeta gømøwei; ni pøtønain tsikkucha srua ammøwei inday cha. Kaguende chigøben marøbiibe nui marimburøbe mu chi chinrrainga mamigwane utamig køn cha.

¹¹Ñim kan puebloyu gúi, ya tsitsø bønrrabyu gúi puabe, kan misag chi isumgaig tabigwan lawa, truigwei yau kørørmisrtrigay ñim truyugurri ambamnégatig. ¹²Yau kebambuppe, ‘ñimun chi isumgaig tab gøn’ chib wamønrrigay. ¹³Tru yau misaamera truburab tabelø gøbene, tru ñimui tab gøbiibe nømum bala treeg kønrrun. Inchen trengatig kønrrabgailø gøbene, ñimui tab gøbiibe ñimuinuutøwein gønrrun. ¹⁴Inchen ñimun wamømøwei, ñim wamindigwan mørmøwei inçhene, nømui yaugurrin gúi, nømui puebloyugurrin gúi webambuppe, srøbyu usrøwan chishtø gørrøga webamrrigay chibig køn. ¹⁵Inçhawei nabe ñimun cierton trendamønrrun: Srabe gwalømbe tru puebloimbe Sodomaimba, Gomorraimba pirau lataitøguen gømø, Tiuswei tru maig kønrrabigwan asha maram gwaløm attrabiibe mas purø rrømbøig kønrrun cha.

Wendøsrø kaig indinab melamig attrabig

16'Au, nabe ñim ubishamera latailan lobosmerai utu ørar. Chiyugøben kegørrømønrrab ñimbe ul latailø guy. Inchen chi kaig inchimeelømaybe palomamera latailø gømig køn. 17Ashiptø gønrrigay misaameran. Kaguende nømbe ñimune karubelai tasku tranøb, katø judíosmera tulundzuni yamerayu ñimune ichabetab inchun. 18Katø karubelø nørreelai merrab, reymeraí merrab nagurrindø srua amrrun, trumay ñimbe nømunba, judío gømeelanba naimburabigwan wamindamig kønrrai. 19Inchen tru karubelan ñimun tranene, ñimbe mandø løtamigwan chi isumøwei, mandamermab chi isumøwei inchigay. Kaguende tru wamindamig pubene, wamindamig tøgagønrrai Tius tranrrun, chibig køn. 20Kaguende ñim waminchain gømøtø, Tius ñimui Møskawei Espíritu ñimgurri waminchun.

21'Inchen nunebe nømui nunewandøwei kwetchai tranen, møskaimbe nusrkawan rranen, ureemerabe møskalan namig kurra, kwetchai tranrrun cha. 22Maya misaabe ñimune nagurrindø tsalø indiilø gønrrabguen cha. Inchen srabe gwalømgatig chigúingucha megabig megabiibe kebeñchabig kómíig kaigyugurri wesraig kønrrun chibig køn. 23Ñimun kan ciudayu chigøben kaig martrab inchene, katøgansrømay wegørra ambay. Pøs nabe ñimun cierton trendamønrrun: Møg Misra Arrubiibe Israel birau ciudamerayu ñim kerrigu naimburab eshkab liramøwatø attrun cha.

24'Kan kusreb mendig megabiibe nui kusrenanøbigwan purab nuig kømøn. Katø kan karuindiig megabiibe nui ya buaigwan purab nuig kømøn. 25Kan kusreb mendig megabiibe nui kusrenanøbig lataitøwei misrabe, trutø tsabø gúi møramig køn. Inchen tru karuindiig megabiibe tru ya buaig lataitøwei misrabe, trutø tsabø gúi møramig køn. Yau møskai ashib wabigwanguen kwaimandzig Beelzebú cha wamibe, mas nui yau burrabelane chitø tai asamø chibig køn.

Mun kørig tøgagømig

(Lc 12.2-7)

26'Inchawei misaameran kørig kui inchimøtay. Pøs chitøgucha søriibe søriitø kørrømisrmø, kenamistrun. Katø kan søratø tøgagúibe søratø kørrømarig kømø, wammørig kørrømisrtrun.

27 Na ñimun lõstøyu wamindigwane ñimbe kwaløm tõryu waminday. Katø na ñimun nilø wamindigwane ñimbe yabalasrøngurri trasay. 28 Asrwandø kweechibelane kørig kui inchimøtay. Kaguende ñui møsigwane kwetchab gaimanrrun. Treeg kømøtø, asrwanba, møsigwanba managatig tru møra melamnug pinishinrrabigwan, tru Tiuswane si, kørig tøgaguy, chibig køn.

29 '¿Pagatø illinzheelan kan centavozhigweindø yanøbelø gømuitarru? Treweindøzhigwanguen ñimui Møskai piraui kørørbashmubene, ni kanzhikken kørørmøn. 30 Pøs, ñimuimburappe ñimui turyu pusruumeranguen kan gan mundziizheelø gøn. 31 Inchawei ñimbe chi kørig kui inchimøtay. Truba yam illimera lataitøguen gømø, ñimbe mas purø nuweyelø gøn.

32 'Møikkøben misaamerai merrab 'Jesúsweingatiig kur' chibigwane nagucha nai Møskai srømbalasrø wabigwei merrab treetøwei truigwane 'ningatiig kur' tamønrrun. 33 Inchen misaamerai malau 'Jesúsweingatiig kømur' chibigwane nagucha nune nai Møskai srømbalasrø wabigwei merrab 'ningatiig kømur' cha, trendamønrrun chibig køn, Jesúsbe.

Jesúskurri misaamera nøørøtø misrøb

(Lc 12.51-53; 14.26-27)

34 'Nabe piraumay arruppe, ambumay imay tab gøbigwan srua arritamab isumøtay. Nabe truigwan srua arrumøtø, kwayab gømigwan srua arrur cha. 35 Nabe arruppe,

møøbe møskaimba namig kurrøben, nimbasrbe usrimba namig kurrøben, yernabe sueeraba namig kurrønrrai martrab arrur.

36 Inchawei møigwandøgucha ashig kømui inchibeløbe yaeløtøwein gønrrun.

37 'Møikkøben møskawan gúi, kabe usran gúi, nan lataguen gømø, mas undaarabiibe truburab chinha nain gønrrabgaig køn. Nui nusrkawan, kabe nui nimbasrwan, nan lataguen gømø, mas undaarabiibe truburab chinha nain gønrrabgaig køn.

38 Inchen møikkøben kuruswan mutab nai mendig arrumíibe truburab chinha nain gønrrabgaig køn. 39 Inchen møikkøben øsig kømigwan wetørrabiibe yandø pinab pinamig nebunrrun cha. Inchen nagurrindø kwabiibe managatig øsig kømigwan wetørrawa tøgagønrrun cha.

Ketigwan utab*(Mc 9.41)*

40 Møikkøben ñimun tab wamab utabiibe nan utan. Inchen nan utabiibe nan karua ørøbigwan utan. 41 Inchen møikkøben Tius maig karuigwan eshkabig kui ashiptø nun tab wamab utabiibe, tru Tius maig karuigwan eshkabigwan ketigwandøwei nøbe Tius tranig utønrrun chibig køn. Katø møikkøben kan sølgandø tabig marøbigwan, sølgandø tabig marøbig kuimburo utabiibe, sølgandø tabig marøb mowan ketigwandøwei Tius tranig utønrrun cha. 42 Inchen møikkøben nai mendig amønibelø gúi ashiptø trengatig kømøzheelan kan pi bishi basuzhiitøguen srørrøbiibe, truburo nui ketig utamigwane utømø gømø, utønrrun cha, ñimun trendamønrrun.—

11 1 Jesús yandø nui doce kusrenanøb pera uniilan øyeeg, øyeeg marøb amøninnrigay cha, chab gusrenanabe, truyugurri ibig køn, tru birau katøgan pueblomerasrø nui srø wam tabigwan kusrenanøb katø eshkab waminchib inchab.

Juan Bautistai kusrenanøb pera uniilo*(Lc 7.18-35)*

2 Juan Bautista kailan keeri yau keerig pasrøwa, Cristo chi marøb uniilan wammørøbig køn. Inchabe mōilan gøsrøn nui mendig amønibelan Jesúswan trencha payrrai ørøbig køn:

3—¿Tru Cristo attrabig købiibe ñi gúin gúi, kabe nambe katøganun muniiramøh? chinrrai.—

4 Inchene Jesúsbe nōmun lōtappe trenchibig køn:

—Amba, ñim chi mōrigwan, ñim chi asigwan Juanwan eshkanrrigay cha. 5 Kabgailøbe ashen, cojosmerabe amben, asr trerab gwanrrø tōgarmerane nōmui kwanrrōwan tamara chishmariilo gøben, kalu mōrmeeløbe mōrøbelø misren, kwailøbe øsiiraben, waachamerane Tiuswei tabig srø wamwan eshkab kusrenaniilo gøn cha. 6 Mayanguen tab gúig køn chibig køn, nan peg kuitamab isumøtø, na gúitamab isubigweimbe.—

7 Inchen yandø nōm amben, Jesúsbe Juanweimburab misagwan trenchib waminchib pølbaserøbig køn:

—¿Mu misag warab waraimøsrømbe ñimbe chi ashchab webamgue? cha. ¿Kan caña ambumay imay ka isig srua

yainaptiigwandeh? cha. ⁸Trube, ¿chi ashchab webamgue? cha. Kabe, ¿kan mөг truba tabig keweigwandeh? cha. Ñimbe ashibelø gøn, truba tabig kebeløbe reymerai yau purrabelø gúi. ⁹Trube, treeg købene, ¿chi ashchab webambig kø? Kabe, ¿Tius maig karuigwan kan eshkabigwandeh? Øø, nabe ñimun trendamønrrun cha: Treegwanwei ashchab webambig køn cha, katø treetøguen gømø, trurrigu Tius maig karuigwan eshkabigwan lataguen gømø, mas purø nuigwan. ¹⁰Juanbe tru Tiuswei wamwan pørigu øyah taig truig køn:

Au, nabe nai wam srua inrrabigwan ñui merrab ørar cha, trube ñui maywan tamartrai ñui merrab.

¹¹Nabe ñimun cierton trendamønrrun: Maya mөгuelø kal-laelai utu Juan Bautista lata nuibe muguen kurrømuig køn cha. Inchendø treeg kuindøgucha, srømbalasrø Tius nø ashib karub wainuube chigucha gømíikken mas nuig køn cha, Juan lataguen gømø.

¹²Juan Bautista marøb pølbaserø uraskurri mөingatig srømbalasrø Tius nø ashib karub waibe truba kaig indinab pasran. Inchen tru treeg kaig marøbeløbe treeg mara, trunun nøm kanammørø indan. ¹³Mayeelø Tius maig karuigwan eshkabeløba, tru maig maramigwan martrai Moisés pøriibabe Juan arrumnegatig Tius maig karuigwan eshkaig købig køn. ¹⁴Ñim iigwan kørewa utønrrappe; Juanbe Tius maig karuigwan eshkabig Elías attrabig købig, truigwein gøn. ¹⁵iMøramig kalu bønraibe mør!

¹⁶¿Mөin gwaløm misaamerane chi latailø gøn chinrrab gøh? chibig køn. Kan plazayu ureemera esheerrab purramisra, nөmui linchibelan øyah chib trashib purrabelø latailø gøn cha:

¹⁷Nambe ñimuyasig luswan urringucha,

ñimbe pailamuig køn chib.

Cantailø isumdeelø cantaben,

ñimbe miirab kishmuig køn, chib.

¹⁸Pøs Juan mamøwei, muchimøwei inchibig arrubene, nөmbe: “Kwaimandzig tøgag køn” chibelø gøn cha. ¹⁹Inchen Mөг Misra Arrubig mab, muchib inchibig arrubene, trube, nөmbe: “Menrra maptiig køn”, damba: “Menrra muchiptiig køn”, damba: “Romasreelayasig an utabeløba, kaig marøb misaameraba linchibig køn”, damba inchibelø gøn nөmbe. Inchendø mu mөkken nebua isumgaig Tius marøb pasraibe nui mariiløtøga treeg kuitamab ashchai törgandø kenamaran— chibig køn.

Isua mORMØ misaameran isumdiig nebunrrabig

(Lc 10.13-15)

20Incha Jesúsbe maramburab mariilan nØ truba mari pueblomerasrØ namig waminchibig kØn, kaguende tru pueblomerayu warab misaamerabe nØmui kaig mariilan isua mØra, Tiusweimay llliramuikkurri. Incha Jesúsbe trenchibig kØn:

21—iAy, ñi Corazín pueblo waacha! iAy, ñi Betsaida pueblo waacha! Kaguende TiosrØ SidónsrØ tru maramburab mariilan na ñimui utu lataitØwei marig kuimbe, manawei truilØbe nØmui kaig mariilan isua mØra, Tiusweimay lllirabsruig kuinrrun cha. Incha kaig marmØnrrab yandØ isua mØrer chib kenamartrab, trØsrkØleelØ keb, nagusrØwan itØbusrØb inchibsruinrrun cha. 22PØs nabe trendamØnrrun: Tiuswei tru maig kØnrrabigwan asha maram gwalØmbe Tiroba, Sidónba misaamera lataitØguen gØmØ, ñimbe mas purØ rrØmbØigwan utØnrrun cha. 23¿Inchen ñi Capernaum pueblogan, purØ tab incha srØmbalasrØngatig kusruig kØnrrurmab isutirru? Treeg kØmØtØ, tru mØra melamnug kegutsig kØnrrabguen ñibe. Kaguende ñimui utu maramburab mariilan SodomasrØ na marig kØbig kuimbe, mØingatig tru ciudabe pinØmubsruinrrun cha. 24Inchawei nabe ñimun trendamØnrrun: Tiuswei tru maig kØnrrabigwan asha maram gwalØm attrabiibe tru Sodoma pirausrØ misaamerai lataitØguen gØmØ, ñimuimbe mas purØ rrØmbØig kØnrrun— cha.

Naimay amrrua isray

(Lc 10.21-22)

25Tru uras Jesús trenchibig kØn:

—Nai MØskai, srØmbalawanba, pirØwanba ashib karubig, ñun tabig waminchar cha, kaguende ñibe kusrebelØ chigúi mØrØbelan ashmØnrrai tru sØrig pØnrrabelane tru chigucha gØmeelØ kusremeelan kenamarikkurri. 26Treegwein gØn, nai MØskai, ñi treeg kØnrrai maramig tab gúig kua.

27Nai MØskaimbe chiwandØgucha nan trandan. Mugucha na Nusrkawane mu ashmuben, MØskaindØwei asan. Mugucha MØskawane mu ashmuben, na Nusrkaimbah, mØilØgØben na kenamariilØ truilØbatØ asan. 28Ñim mayeelØba ñimui amØnailØyu chine chine nebuig truba muraarailØ, trurrigu kwatsig nigarbe

naimay amrruy, nabe ñimun isramig tranrrumøn. ²⁹Arau merrarrabig tru nai nukabala trarrigwan kashmø, uta, naba latatø srua amun chibig køn. Incha na maig køben nan treeg asha kusrey cha. Nama purø tammayig, manrraugurri newan tabig chish inchimig, nabe treeg kur cha. Øyamaybe ñimui mõiimerayasis isramig wetørranrrun cha. ³⁰Kaguende nuka bala trarrig arau merrarrab tsig naimbe kwatsiguig kømø, ka niga ambamdiig køn— chibig køn Jesúsbe.

Jesúswei kusrenanøb pera uniilø isrin gwaløm tirigu tur lurrøb
(Mc 2.23-28; Lc 6.1-5)

12 ¹Inchen tru uras kan isrin gwaløm Jesús tirigu ellmari utuwan pureb ibene, nui kusrenanøb pera uniiløbe parøgwaben, tirigu turwan lurra, trulwan mab mendabelø gøn.

²Inchen fariseosmerabe asha, Jesúswan trenchibelø gøn:

—Au, ñui kusrenanøb pera uniiløbe isrin gwaløm chigøben marmønrrai merigwan marøb gøn— cha.

³Inchene nøbe trencha løtabig køn:

—¿Ñimgan lemeelø gøtirru cha, mana gøsrøn Davidwanba nui linchibelanba parøgwaben mandø indigwan? ⁴Pøs truima Tiuswei carpa ya tabzhigu kebya, nøba nui linchibeløba Tiusweyasiitø tarømarig pirrimeran maig købig køn dan cha, ni nun lata, nui linchibelan lata mamønrrai merigwan, tru sacerdotesmeratø mamigwan. ⁵¿Kabe ñimgan tru maig maramigwan martrai Moisés pørigu lemeelø gøtirru cha, isrin gwaløm gúindøgucha sacerdotesmera Tiuswei yau marøb purrappe, isrin gwaløm gømui lataig, isrømø, marøb purrøben, truigwanma Tiusbe kalø gúi asig kuitarru? cha.

⁶Inchen gøben nabe ñimune trenchar: Tiuswei ya lataitøguen gømøtø, mas purø nuikken gur cha, na yu pasrabiibe. ⁷Ñimbe ni chi tainguen mormuin gøn: “Animal gweecha, Tiuswan tranøb gømøtø, ñimbe lastima ashibelø gønrrai inchar” taigwan. Tru trendaigwan ñim mandø gúi mørig kuimbe, kaig mara gømeelane ‘øyeeg kaig marøbelø gøn’ chimubsruiinrrun cha. ⁸Inchawei na, Møg Misra Arrubiibe isrin gwaløm nan nø garunrrain gømøtø, maramdiigwane marøb, maramgaigwane marmub, nabe na asha garubig kur— chibig køn, Jesúsbe.

Kan mөг tasig mul-laig

(Mc 3.1-6; Lc 6.6-11)

⁹Incha Jesúsbe truyugurri ya, judíosmera tulundzuni yau kebibene, ¹⁰truyube kan mөг tasig mul-laig wabig køn. Inchen kaguen mөilөгөsrøn Jesúswan chigøben chi køptø, Jesúswane trencha payibelø gøn:

—¿Isrin gwaløm kan kwanrriigwan ka tamartrain gø chindah?— cha.

¹¹Inchene Jesúsbe trenchibig køn:

—¿Ñimma mөikkøben kan ubisha tøgagua, isrin gwaløm trabyu kebeñene, ya, kemøra, wesramønrraguh? cha. ¹²Pøs kan mөøbe kan ubisha lataitøguen gømø, purab nuikken gøn cha. Inchawei treeg købene, isrin gwalømmerawangucha tabig maramigwane merømø, ka marbasamig køn— chibig køn.

¹³Incha tru mөwane trenchibig køn:

—Kwalwan larrøbichi— cha.

Inchen nøbe larrøbichene, kandarø gwal latawei tabig kørørmisrøptinchibig køn. ¹⁴Inchen fariseosmerabe webamba, Jesúswan namig kurra, mandø incha pinisamigwan waminchib mendabelø gøn.

Jesúsweimburab maig nebunrrabigwan wamindig

¹⁵Inchen Jesús iigwan wammørabe, truyugurri iben, misag truba nu mendig ambubelø gøn. Inchen Jesúsbe mayan gwanrreelan tamarøbig køn. ¹⁶Incha nune mu gøn cha, mun gøben misaameran mørø waminchimønrrain garubig køn. ¹⁷Iibe tru Tius maig karuigwan eshkabig Isaíaskurri øyeeg taig nebunrrain gúig køn:

¹⁸Iibe tru nai karuig marøb megabig køn cha, tru na lawa wesruig,

na undaaraig, truigweimburappe nabe truba tab gúi mørøb kasrag war taig.

Nabe nai Espíritun nuim bala pasren,

chu birausreelø gøben maya misaameran tru sølgandø tabigwan nø eshka kusrenanrrun daig.

¹⁹Nøbe kwayam lamøwei, trashimøwei,

callesmerayu nui wamwan wamindi mormøwei indig kønrrun taig.

- 20 Kan caña kegurisaigwan nòbe kebinab lanchimøwei,
 katø mecha ke chab gwab pilab pasrabigwan kweechimøwei
 inchun taig,
 tru sølgandø tabigwan kerrigu kanawa wesrawa basramnegatig.
 21 Inchen judíos kømø misaamerabe nui munchiyutø isua
 muniirab gønrrun, daig.

Jesúswan kwaimandzigwei maramburab mariitøga maran chib
(Mc 3.20-30; Lc 11.14-23; 12.10)

22 Inchen Jesúsweimay kan møg kabgaig, wamgaig kwaimandzig
 tøgagigwan srua amben, nòbe nun tamarene, tru wamgaibe
 waminchib, ashib inchibig køn. 23 Inchene mayeeløba kwaara ashib
 trenchib payiyabelø gøn:

—¿Iibe tru merrabsrø Davidwei Nusrkain gøppeendi?— cha.

24 Inchen fariseosmera iigwan mørabe, trenchibelø gøn:

—Nugwaimandzig, Beelzebú, tru kwaimandziimeran ke nòasha
 garubig treeg martraí tranig kua, truikkurri kwaimandziimeran
 weeran— cha.

25 Inchen Jesúsbe nøm chi isub pønrraigwan ashabe, trenchibig
 køn:

—Kan rey karub tøgaweim birauma misag nòmasiitø nørøtø
 misrøb kurrabe, pinønrrun cha. Katø kan ciuda lata, katø kan
 yaelø lata nòmasiitø nørøtø misrøb kurrabe, warønrrab
 gaimanrrun cha. 26 Øyeetøwei Satanáskucha Satanáswandøwei
 weguchabe, nòasiitø nørøtø misran cha. Inchen nò ashib karub
 waibe, trube, ¿chinha pasrabig basrønrrab gø? cha. 27 Tru
 kwaimandziimeran na webetappe, Beelzebúgurri webetig købene,
 trube, ¿ñimui mendig amønibeløbe kwaimandziimerane mu
 webetingaruitøgarre webetah? cha. Inchawei, treeg købene, maig
 kuigwan ñimun uyube nøm gusrenrrun chibig køn. 28 Trune na
 Tiuswei Espíritutøga kwaimandziimeran webetøbene, Tius nò ashib
 karub pasraibe ñimui utube puaguen basran cha.

29 Kabe kan møikkøben kan mur møwei yauma kebya, tru
 mur mowan lusrøbmerrig lusrmøwatøbe, ¿nui chi tøgagúigwan
 chinha kerranrrab gø? cha. Lusra rrarratøwei nui chi tøgagúilan
 kerranrrun chibig køn.

30 Naingatø basrømíibe, nan tsaleelaingatø maran. Inchen naba
 tulishimíibe truørøtø wiitan.

³¹’Inchawei nabe ñimun trendamønrrun: Misaamera kaig mariilan lata, chigøben Tiuswan purø rrømbøig wamab wamindiilan lata Tiusbe kerriguh pesannawa ulø baymønrrun cha. Trune Espíritu Santon purø rrømbøig wamab wamindiilane si, Tiusbe pesannamø, ulø bayrrun chibig køn. ³²Møikkøben na, Møg Misra Arrubigwan chigøben kaig waminchibigwane Tiusbe ulø baymønrrab pesannanrrun. Trune møikkøben Espíritu Santon kaig waminchibigwaneguende ni mõi yu lata, ni kansrø lata pesannamø, ulø bayrrun cha.

Tusrwane mamikkurri asan

(Lc 6.43-45)

³³’Pøs kan tab tusrbe, tab mamitøwei niirrun. Inchen kan kaig tusrbe kaig mamitøwei niirrun. Kaguende kan tusrwane mamig niguinug asan. ³⁴!Ul lataig inchib misaamera! ¿Ñim chinchatabig waminchague, trendø kailøbe? Kaguende nui manrrau chine isua tøgagúilø pinøguchen, nui triibe treeg wamindan. ³⁵Kan møg tabiibe tabig isuilan nui manrrau esegabig kua, truyugurrimbe tabig wesrub wamindan. Inchen kan møg kaibe kaig isuilan nui manrrau esegabig kua, truyugurrimbe kaig wesrub wamindan. ³⁶Inchawei nabe trendamønrrun: Chigøben wamindamgailan misag ke ka wamincha møriilan Tiuswei tru maig kønrrabigwan asha maram gwaløm mayeeløba tru urasbe kerriguh maig kuigwan eshkamig kønrrun cha. ³⁷Pøs ñui wamindiitøgatøwei ‘tabig køn’ dain gúi, kabe ‘kaig køn’ dain gúi Tius treeg marig kørrømisrtrabguen.—

Jesúsuan mu køremgaig mana asiimíig martrai miab

(Mc 8.12; Lc 11.29-32)

³⁸Inchen møiløgøsrøn Moisés pørigwan kusrenanøbeløba, fariseosmeraba Jesúsuan trenchibelø gøn:

—Kusrennøbig, Tius ñiba pasrain gúi nam asha gønrrab mar— cha.

³⁹Inchene Jesúsbe trencha løtabig køn:

—Møin gwaløm kaig misaamera, kan kasharawar peebe itøluløpteelø lataitøwei Tiusbatø bønrrømø misaamera kailø, Tius naba pasrain gúi ashchab maramig miatan cha. Inchendø asha gønrrai katøgan chigøben peg kenamara tranmøtø, Tius maig

karuigwan eshkabig Jonásweiwandø eshkamønrrun cha. ⁴⁰Tru Jonás truba nu peskau umbu pøn gwaløm, pøn yem wab lataitøwei Møg Misra Arrubikkucha pøn gwaløm, pøn yem pirø umbu wanrrab gøn cha. ⁴¹Tru Nínive ciudasrø misaamerabe Tiuswei tru maig kønrrabigwan asha maram gwalømbe kenamisrtrun cha, tru møin gwaløm misaameran kaiyu pønstrønrrab. Kaguende nínivesreeløbe Jonás eshkaigwan møra, nømui kaig mariilan isua møra, Tiusweimay lliraig køn cha. Inchen yu pasrabiibe Jonás lataitø gømø, mas nuig kur cha.

⁴²Tru ambø umbu birausrø reinagucha Tiuswei tru maig kønrrabigwan asha maram gwalømbe kurrønrrun cha. Incha nøbe tru møin gwaløm misaamera ñimun møra melønrrai maringarunrrun. Kaguende noma purø yabsrøngurringuen pirau arrig købig køn, Salomón, tru purø gusrebig wamindigwan mørtrab. Inchen yu pasrabiibe Salomón lataitø gømø, mas nuikken gur chibig køn.

Kwaimandzig moweinuumay katøle arrub

(Lc 11.24-26)

⁴³Kan trømbøig maringarub kwaimandzig moweinukkurri webippe, chugøben purmerasrø isramig lab uña, yandø wetørranrrab gaimappe, treeg isun: ⁴⁴“Katø nai yamay inrrab cha, na chugurri webarrua arrinuumaytøwei”. Incha katø arruabe, tru mowane kan yawan chiguchagaig chishtø paluuncha tamara basrig lataig wetørranrrun cha. ⁴⁵Incha ippe, katøgan kwaimandziimera, nø lataguen gømø, mas larrø rrømbøig marøbelan sieteba tulundzuna, søteeløba trubalatø tru moweinug purrønrrab kebamrrun cha. Inchen tru møøbe yandø srabebe mas purø gaikken kørømisrtrun cha, tru srøsrø lataitøguen gømø. Inchawei i møin gwaløm misaameran kailan treetøwei purainrrun— chibig køn Jesúsbe.

Jesúswei usrimba, nui nuneløba

(Mc 3.31-35; Lc 8.19-21)

⁴⁶Jesús misaameran waminchib srø basramne nui usrimba, nui nuneløba pua, nøba waminchig kui wambiitø pønrrabelø gøn.

⁴⁷Inchen mõikkørøn Jesúswan eshkabig køn:

—Ñui usrimba, ñui nuneløba wambig pønrran cha, ñiba waminchab ñun payib.—

48Inchene Jesúsbe tru eshkabigwane trenchibig køn:

—¿Nai usri, nai nuneløbe mumera gøh?— cha.

49Inchabe nui kusrenanøb pera uniilan kwaneshkab trenchibig køn:

—Nai usri, nai nuneløbe iilø gøn cha. 50Kaguende møikkøben nai Møskai srømbalasrø wabig maig martrai karuben, treeg marøbig, truibe sí, nai nuneg, nai nuchag, nai usrin gøn— cha.

Kan ellmarøb kwallibigwan ‘øyeeg lataitøwein gøn’ cha,

kemesra wamindig

(Mc 4.1-9; Lc 8.4-8)

13 1Tru gwalømdøwei Jesús yaugurri webya, nu bisu menda wamisrøbig køn. 2Inchen misag truba nu tulundzunikkurri, Jesúsbe kan barcoyu kebya wamisren, maya misaabe tru pisu mendatø pønrrabelø gøn. 3Inchen nøbe waminchib pølbaserøbig køn ‘øyeeg lataitøwein gøn’ chib wamindiiløtøga chineh kemesra kusrenanøb.

Incha trenchibig køn:

—Kan kwallibiima tsurøb kwallchab webyan cha. 4Incha tsurøb ibene, kanbalø yellbe mayu gørrøben, illimera amrrua, man cha. 5Katøganbaløbe sruurrøldø birau pirø tre chiganug kørta, pirø palatiikkurri tru yellbe kal-lappe, petø kal-labendø, 6pørr webarruabe, mergurangaruben, srøl tre chigaig kua, mul-laptindan cha. 7Katøganbalø yellbe kal shau utu gørrøben, kalmera nørrørab mendappe, chab gasrøb tsibisan cha. 8Inchen katøganbalø tab pirau gørrabiibe si, tabig ellmarig misra, møiløbe kan yellgurrindø mamig rrulzheelø cien niguen, møiløbe sesenta niguen, katøganeløbe kan rrulzhikkurrindø treinta nigan cha. 9iKalu bønraibe, mør!— chibig køn.

Mandøgurri ‘iilan øyeeg lataig køn’ cha Jesús wamindig

(Mc 4.10-12; Lc 8.9-10)

10Inchen nui kusrenanøb pera uniiløbe Jesúswan kemalla, trenchib payibelø gøn:

—‘Øyeeg lataitøwein gøn’ chib, ¿misaamerane chindimba øyamay waminchigu?— cha.

11Inchene Jesúsbe trencha løtabig køn:

—Srømbalasrø Tiusbe nø ashib karub wainug mu asiimíg tøgagúilan ñimun ashchai tranan cha. Trune katøganelane

treeg kòmøn cha. ¹²Kaguende tøgagwane masken rranen, uñchaguen tögagønrrun cha. Trune chigaigwane nui lamøtiig tögagúigwanguen kerranrrun cha. ¹³Inchawei nabe ‘øyeeg lataitøwein gøn’ chib wamindiiløtøga chineh kemesra waminchar chibig køn. Kaguende:

nømbe ashendø, ashmøn cha,
mørendø mormøwei, ni katø chigúinguen mormøwei indan cha.

¹⁴Inchawei nømune øyeeg køben, Tius maig karuigwan eshkabig Isaías øyah wamindig ciertonwei nebun cha:

Maya, maya mørendø, ni chi tainguen mormønrrun cha.
Ashippe, ashendø, chigúi ashmønrrun cha.

¹⁵Kaguende i misaamerai manrrøbe larrø tranrreelø srug lataig misrin gøn cha.

Kalumera, kabmera kasrailø tøgar gøn cha,
ashmøwei, mormøwei,

ni chi tainguen mormøwei,
nuimay amrrumøwei inchai,

katø na tamariilø gømøwein gønrrain daig.

¹⁶Trune ñimbe mayanguen tab gúilø gøn, kaguende ñimui kabmera Tiusweimburabigwan ashib, kalumera nuimburabigwan chigúi mörøb inchibelø tøgarbe. ¹⁷Inchawei nabe ñimun cierton trenchar: Tius maig karuigwan eshkabelø gøben, sølgandø tabig marøb misaamera gøben, truilø truba nu, i ñim asigwan asinrrabna gúi inchendø, ashmuig køn cha. I ñim morigwan mörinrrabna gúi inchendø, mormuig køn cha, trenchibig køn.

‘Øyeeg lataig køn’ cha, kemesra wamindigwan Jesús tab eshkab
(Mc 4.13-20; Lc 8.11-15)

¹⁸Au, ñim möray, tru kwallibigwan ‘øyeeg lataitøwein gøn’ cha, kemesra wamincha basrigwan na eshkanrrab. ¹⁹Tiuswei tru srø wam srømbalasø karub waisriigwan mørendø, chigúinguen mormeelane tru nugwaimandziibe arrua, tru manrrau ellgwaigwane kerran cha. Inchen truiløbe tru yell mayu gørrabelø latailø gøn. ²⁰Inchen tru sruurrøldø birau pirø tre chiganug kørørrab yellbe tru misag Tiuswei wamwan tru urastøbe truba tab gúi mörøb utabelan trunun eshkabig køn. ²¹Inchendø srøl tre umbu keetiimífig kua, maya yanaguen amøñimøn. Incha tru Tiuswei wamgurrindø chigøben puben,

katø chigøben kaig nebub arruben, mõi møin gørran. ²²Inchen tsuren, tru kal shau utu gørrab yellbe øyeeg misagwan eshkabig køn: Tiuswei wamwan mørøppe, mørendø, i birau chine købigwan menrra isubiibah, nømui chine palømø tøgagüilø purø tabig lataig asønaikkurrimbatø, tru Tiuswei wamwan mørigwane kerrigu truitø kasrøben, chigucha nømbe ellmarig misrmøn cha. ²³Inchen tru yell tab pirau tsuriiløbe tru misag Tiuswei wamwan møra, katø tab chigüi møra, truiibe sí, tab ellmarig misrigwan eshkabig køn. Truiløbe tru kan yellgurrindø mamig rrulzheelø cien, kaneløbe sesenta, kaneløbe treinta nigabelø latailø gøn— cha, trenchibig køn Jesúsbe.

Tirigu utu arrucillu gal-labigwan kemesra wamindig

²⁴Incha Jesús katøgan ‘øyeeg lataitøwein gøn’ cha eshkawa pasrøb trenchibig køn:

—Srømbalasrø Tius nø ashib karub waibe kan møg nui trau tab yellwan tsuri lataig køn cha. ²⁵Inchen søteeløba kib waramne nun kan ashig kømui inchibig arrua, tirigu tsuri utu kaig yellwan wiitappa, yan cha. ²⁶Inchen tirigu nørrørawa, urø weetøbene, tru kaig kau arrucillugucha kenamisrøptindan cha. ²⁷Inchen tru tra buaigwei marøb melabeløbe nune trenchinrrab ambubelø gøn: “Señor, ñi trau tru tsurig yellbe tabig købendøbe, ¿tru kaig kaube chugurrin gal-lah?” cha. ²⁸Inchene tru ellmarig buaibe trenchibig køn: “Mutø tsaliig øyeeg mariinrrun” cha. Inchen truyu marøb melabeløbe trencha payibelø gøn: “¿Kabe tru kaig kauwan nam kitønrrab ambamøh?” cha. ²⁹Inchene nøbe trenchibig køn: “Kagøbasay cha. Inchippa kaig kauwan kitønrrab incha, tirigungucha tōga kitabgun cha. ³⁰Trembe paramnegatig trubalatø ka nørrørabasay chibig køn. Tru uras tru tulishinrrabelan øra, tru kaig kauwanmerrig tulisha, lusrø mara, pattrai karumønrrun cha. Incha tirigune nai tirigu esegainug keeringarumønrrun”, dan— cha, trenchibig køn Jesúsbe.

Murtasa yellwan kemesra wamindig

(Mc 4.30-32; Lc 13.18-19)

³¹Jesús katøgan ‘øyeeg lataitøwein gøn’ cha, kemesra waminchibig køn:

—Srømbalasrø Tius nø ashib karub waibe kan murtasa yell lataig køn cha, kan møg nui trau tsurig. ³²Maya yellmerai utu purø lamø

yellzhig købendø, nurappe, tru ellmarig shush tusrmerai utu mas nuibe murtasa gøn cha. Yandø kan tusrburabig misren, nuig køptø, illimera pala amøñibeløguen amrrua, tru srarmerayu le marøbelø gøn— chibig køn.

Levaduran ‘øyeeg lataitøwein gøn’ cha, kemesra wamindig
(Lc 13.20-21)

³³Katø Jesúsbe katøgan ‘øyeeg lataitøwein gøn’ cha, kemesra waminchibig køn:

—Srømbalasrø Tius nø ashib karub waibe levadura lataig køn cha, kan ishuuma pa arruba harina sòmara, levaduran pusren, maya sòmaringwan trunun ørøba pulingarub lataig køn— cha.

Mandøgurri ‘iilan øyeeg latailø gøn’ chib Jesús kemesra wamindig
(Mc 4.33-34)

³⁴Jesúsbe misaamera nørrø basrabigwan kerrigu iigwan kusrenanøppe, ‘øyeeg lataitøwein gøn’ chib wamindiitøga eshkabsulu waminchibig køn. ‘Øyeeg lataitøwein gøn’ cha, eshkawa pønsra gømuppe, waminchimig køn. ³⁵Øyeeg nebuppe, tru Tius maig karuigwan eshkabig maig taig nebunrrain gúig køn, tru øyah taig:

Waminchib kusrenanøppe, ‘øyeeg lataitøwein gøn’ chibgøba eshka wamindamønrrun cha.

Tius pirowan marøb uraskurri sørig pønrrabelan torgandø eshka wamindamønrrun cha.

Tirigu utu arrucillu gauwan kemesra wamindigwan
‘øyeeg lataitøwein gøn’ cha, Jesús tab eshka

³⁶Incha Jesús tru nu sötø misagwan ungwa cha, yau kebibene, nui kusrenanøb pera uniiløbe kemallabe trenchibelø gøn:

—Tru ellmarinug kaig kauwan ‘øyeeg lataitøwein gøn’ cha, namun eshka wamindigwan tab eshkarra— cha.

³⁷Inchene Jesúsbe trenchibig køn:

—Tru tab yellwan ellmarøbiibe Møg Misra Arrubigwan eshka wamindigwan køn cha. ³⁸Inchen tru ellmarig trabe yu pirau maya misagwan eshka wamindigwan køn, tru tab yellbe Tius nø ashib karub waigwei uremeran eshka wamindigwan køn cha. Inchen tru kaig kaube

nugwaimandzigwei ureg køn cha, eshkabig køn. ³⁹Inchen tru ashig kømui inchib tsaliig tru kaig kauwan ellguawa pasrøbiibe nugwaimandzigwan eshkabig køn cha. Inchen tru ellmarig srønøbe srabe gwaløm patsønrrabigwan eshkabig køben, tru ellmarigwan tulishibeløbe ángelesmeran eshkabig køn cha. ⁴⁰Tru kaig kauwan tulisha, nagu pattrai kebetab lataitøwei srabe gwaløm patsab uraskucha øyeeg punrrun chibig køn. ⁴¹Tru Møg Misra Arrubiibe tru katøganelan kaig maringarub pønrrabelanba, ke kaigwandø marøb pønrrabelanba nø ashib karub wainukkurri truilane mayamba nui ángelesmeran tulishinrrai ørtrun cha. ⁴²Inchen nu nag naarabigu kebusren, truyube kishib, trugulmeran tsatsamig kønrrun cha. ⁴³Inchen tru sølgandø tabig marøbeløbe nømui Møskai ashib karub waisrømbe kan nøsig bilab latailø pilønrrun cha. iKalu bønssraibe, mør! chibig køn.

Purø tabig sora tøgagúigwan kemesra wamindig

⁴⁴'Srømbalasrø Tius nø ashib karub wainuguibe kan chigøben truba tabzhigwan pirø umbu sora basrig lataig køn. Kan møg tru tabig sörig pasrabigwan wetørrawa, katøle truyutøwei sora basran. Incha truba kasrag ya, nui chi tøgagúilan kerrigu yanabe, tru pirøwan penaptindan.

Tørguebilab sruuzheelø truba nuweyig lataitøwein gøn cha, kemesra wamindig

⁴⁵'Katø tru srømbalasrø Tius nø ashib karub wainuguibe kan tørbilab sruuzheelan lawa, penab, yanøb inchibig lataig køn cha. ⁴⁶Incha kan tørbilab sruuzhig truba rruba tabzhig nuweyig wetørrappe, ya, nui chi tøgagúigwan kerriguh yana, tru purø tab sruuzhigwan penan, chibig køn.

Atarraya lataitøwein gøn cha, kemesra wamindig

⁴⁷'Katø tru srømbalasrø Tius nø ashib karub wainuguibe kan atarrayan maryu keguchen, chi beskaugurrimbunø kemørøb lataig køn cha. ⁴⁸Incha atarrayayu peskau netsabene, tru peskabeløbe pi menda wesrua, peskaumeran lawa tarømartrab purramisran cha, tabelane tasinyu busrøppe, kailane petaptø betan cha. ⁴⁹Srabe gwaløm patsab uraskucha øyeetøweih purainrrun, chibig køn. Inchen ángelesmera webamrrun cha, kailanba, sølgandø tabig marøbelanba

nøørø tarømartrab. ⁵⁰Incha kailane nu nag naarabigu kebetønrrun cha, truyube kishib, trugulmeran tsatsamig kønrrun— cha.

Kusrenaniilø kōlliiba, srōiløba

⁵¹Incha Jesúsbe trencha payibig køn:

—¿Ñimbe iilan kerriguba chigúi mōrgueh?— cha.

Inchene nømbe:

—Señor, øø— cha, lōtabelø gøn.

⁵²Inchene Jesúsbe trenchibig køn:

—Mutøgucha Moisés pørigwan kan kusrenanøbig srømbalasrø Tius nø ashib karub wainuguigweimburab kusrebig misrabe, kan ya buaig mōskai latawei nui tabzheelø esegaig tøgagúinukkurri srōilø gøben, kōlleelø gøben wesrub lataitøwei maran— cha.

Jesús Nazaretsrø

(Mc 6.1-6; Lc 4.16-30)

⁵³Yandø Jesús tru ‘øyeeg lataitøwein gøn’ chib iilan eshkab chab waminchabe, truyugurri webya ibig køn. ⁵⁴Incha nuim birausrøndøwei puabe, tru judfosmera tulundzuni yau kusrenanø mendøbene, misaamerabe truba kwaara ashib trenchibelø gøn:

—¿I mōøbe øyeeløbe churre øyeeg kusreh? cha. ¿Katø tru maramburab mariilan chincharre marerah? cha. ⁵⁵¿Iibe tru tsiimeratøga chine marøbigwei nusrkai, katø nui usrimbe María taig kōmuitarru? cha. ¿Santiagoin gøben, Joséwein gøben, Simónwein gøben, Judaswein gøben nuneg kōmuitarru? cha. ⁵⁶¿Yamba nui nuchaløgucha kerriguba namui ututøwei warabelø gōmuitarru? cha. ¿Trube, kerrigu iigwane i mōøbe chugurrinre øyeelø tøgaguerah?— cha.

⁵⁷Treeg isua nune kaashibelø gøn. Inchen Jesúsbe trenchibig køn:

—Chutøgucha Tius maig karuigwan kan eshkabigwane tab indan cha. Inchendø nui biraueløba, nui yaeløba, truiløbe chi tab inchimøn— cha.

⁵⁸Incha truyube maramburab mariilø tre marmfiig køn, kaguende truyu misaamerabe nōmui isubigwan nuinug pasrmuikkurri.

Juan Bautista kwaig

(Mc 6.14-29; Lc 9.7-9)

14 ¹Tru gwalømmerawan Galilea birau karubig Herodesbe Jesúsweimburabgøba wamindi mōrabe, ²nui karuindiig melabelane trenchibig køn:

—Truibe tru Juan Bautista gúinrrun cha, kwailai utugurri katø kurriinrrun cha. Incharre øyeeg maramburab maramig tøgagig kuinrrun— chibig køn.

³Kaguende Herodesbe tru Juanwan kemøringarua, lusra, kailan keeri yaumay kertrai srua ambingaruig købig køn, tru nui nuneg Felipei srai Herodíascurrindø. ⁴Kaguende Juan Bautistabe Herodeswane trendaig købig køn:

—Tru Herodíaswan ñui srai mara tøgagømibe merig basran— cha,

⁵Herodesbe Juanwan kwetchab inchendø, misagwan køriimatabig køn, kaguende mayeeløba Juanbe Tius maig karuigwan eshkabig kui kørewa gøben. ⁶Inchen tru Herodeswei kal-lain gwalømwana isub kasrag waram gwaløm, tru Herodíaswei nimbasrbe tru linchai eshkailø mayeelø purrabelai merrab pailaben, Herodeswane truba tabig asønaptø, tru susrane:

⁷—iGatø, tranmø gømø! chi miabendø tranrrumøn— chibig køn.

⁸Inchen tru susrøbe usri øyeeg chinrrig cha eshkaig køppe, Herodeswane trenchiptinchibig køn:

—Juan Bautistai turwan kan platilloyu tranrra— cha.

⁹Inchen reybe truba isui inchendø, tru mayeelø lincha purrabelai malau, treeg tranrrumøn cha, tranrrab misrig køppe, traningarubig køn. ¹⁰Incha Juanbe kailan keeri yau waben, Herodesbe turwan paringarubig køn. ¹¹Inchen tunwan para, kan platilloyu srua ya, susran tranen, nøbe usran tranøbig køn.

¹²Inchen Juanwei mendig amøñibeløbe amrrua, Juanwei asrwan srua amba, sørabelø gøn. Incha Jesúswan trunun eshkanrrab ambubelø gøn.

Trattrø mil misagwan Jesús manrrai tranøb

(Mc 6.30-44; Lc 9.10-17; Jn 6.1-14)

¹³Inchen Jesús Juanwan kweetsin gúi wammørabe, truyugurri nøtø kan barcoyu nørø mu misag warab waraimøsrømay ibig køn. Inchen misaamerabe truba nu wammørøppe, pueblomerayugurri webamba, nuimay katsikkatø ambub mendabelø gøn. ¹⁴Inchen Jesús barcoyugurri pinaya, truba nu misag basrai ashabe, nømun lastima gøben, nømui utu kwanrreelan tamarøbig køn. ¹⁵Inchen yandø mawabrab gøbene, nui kusrenanøb pera uniiløbe Jesúswan kemallabe, trenchibelø gøn:

—Yube mu misakkanug kòn cha. Inchagucha yandø maabenwein gòn cha, misagwan amrrai ‘ungwa’ chi cha, yamera pønrrabsrø amba, nòmuyasig mamig pena manrrain— cha.

¹⁶Inchene Jesúsbe trenchiptinchibig kòn:

—Chi ambamibe palømøn cha. Manrrai ñim mannay— cha.



¹⁷Inchene nømbe trenchibelø gòn:

—Nambe trattrøgatø pirrimbah, pagatø peskaubatø tøgaguer— cha.

¹⁸Inchene Jesúsbe trenchibig kòn:

—Yu srua amrrurray— cha.

¹⁹Incha tru nu misagwan pubilayu purramisringarua, tru trattrøgatø pirrimeraña, pagatø peskaumeranba, tasku muta, srømbalaneb neesha, Tiuswan ‘mayanguen pay’ chibig kòn. Incha pirrimerañ pirisha, nui kusrenanøb pera uniilan tranen,

nømbe misagwan pirishibelø gøn. ²⁰Inchen mayeeløba øska ma kørromisren, katøgucha pitis undailan tasinmerayu netsøbatø doce tulishibelø gøn. ²¹Inchen tru mabeløbe ishumburwan, uregwan munchimuben, møgueløtø trattø mil gøbig køn.

Jesús pi balawan arrub

(Mc 6.45-52; Jn 6.16-21)

²²Incha yandø Jesúsbe nui kusrenanøb pera uniilan pisu ambøgatøsrømay merrab amrrai barcoyu nebambingarubig køn, tru nu misagwan ‘ungwa’ chib pasrappatø. ²³Incha yandø misagwan chab ‘ungwa’ chabe, nøbe nøtø kan tunbalasø Tiusba waminchab ya, yem gøben nøtø trusrø wabig køn. ²⁴Trune yandø barcobe pisuyu yabsrønguen iben, pi welarmerabe barcongøba megambubig køn, kaguende isiibe nømui malaugøba megambub ichen. ²⁵Inchen løtsøzhig yemdø Jesús pi balawan katsikka nømuimay kemallib ibene, ²⁶nui kusrenanøb pera uniilø pi balawan arri ashippe, truba kwaarøb kørig købiitø trenchib trashibelø gøn:

—Kan møsig køn— cha.

²⁷Inchen Jesúsbe mõi mõi nømune waminchib trenchibig køn:

—iKørmø, mur isua burray! cha. Na gur cha. Kørig kui inchimøtay— cha.

²⁸Inchene Pedrobe trenchiptinchibig køn:

—Señor, trube, ñi guabe, nan ñuimay pi balawan: “Amø” chirra— cha.

²⁹Inchene Jesúsbe trenchibig køn:

—Amø bøs— cha.

Inchen Pedrobe barcoyugurri pinaya, pi balawan Jesúsweimay ib mendabig køn. ³⁰Incha tru mur isig ichibigwan tab ashippe, køriimataptinchibig køn. Inchen nune asentab mendaptinchen trashibig køn:

—iSeñor, wesrurra!— chib.

³¹Inchene Jesúsbe mõi mõi tasigu kemørabe, trenchibig køn:

—Ñi gúi ñui isubigwane nainug ke ka gømønrraindiitø pasra tøgag cha. ¿Chindimbarre kaimamuitamab isugu?— cha.

³²Incha barcoyu nebamben latatø, isiibe wasrøngandø pasramisrøptinchen, ³³barcoyu purrabeløbe nune køriibala tabig waminchib trenchibelø gøn:



San Mateo 14.30

—Isa gømmø, ñibe Tiuswei Nusrkain gøn— cha.

Jesús Genesaretsrø kwanrreelan truba nu tamarøb
(Mc 6.53-56)

³⁴Incha yandø tru pisuyu chab larraamba, Genesaret birausrø pubene, ³⁵misaamera Jesús kui nebua ashabe, wammørøsrøngarubelø gøn tru birau ørøba. Inchen nuimay maya kwanrreelan srúa amrrua:

³⁶—Ñi pala itøguewa gúig urøzhigwan namun katørabashcha—chib, rrugabelø gøn.

Incha mayeeløba katørabeløbe tabig kørørmisrøbelø gøn.

Møwan trømbøig kaig marøbiibe ¿chi guerah?
(Mc 7.1-23)

15 ¹Møiløgøsrøn Jerusalénsrøngurri amrrubelø fariseosmeraba, Moisés pørigwan kusrenanøbeløba Jesúswan kemallabe, trencha payibelø gøn:

²—¿Ñui kusrenanøb pera uniiløbe namui merrabsreelø trendø treeg marøb tøgagúigwane chindimbarre itøbunabelø gøh? cha; pøs mappe, nømbe tasigwan kinømø mabelø gøn— cha.

³Inchene Jesúsbe trencha payibig køn:

—Trube, ñningucha Tius maig maramigwan martrai pønsrailane chindimbarre marmeelø gøgue cha, ñim ñimuimbura trendø treeg marigwan marøg købiitø? ⁴Kaguende Tiusbe trendaig køn: “Ñui møskai, ñui usrane maig købash inchimø, tab indamig køn” cha. Katø: “Møskawan gúi, kabe usran gúi trømbøig nebunrrai wamabigwane trunune kwanrrai pasrig kønrrun” cha. ⁵Trune ñimbe trenchibelø gøn: “Kan møøbe møskawan gúi, kabe usran gúi trenchinrrun cha: ‘Na ñimun purugumig tøgagúigwan Tiuswan tranar cha. Ñimune purugunrrab gaimamønrrun’ chinrrun cha. ⁶Incha mōikkøben øyeeg taikkurrimbe, yandø møskawan, usrane lastima ashib purugumibe chi palømøn” cha, ñimbe trenchibelø gøn cha. Øyeeg marøppe, ñimbe Tius martrai karua pasrigwane chigucha gømíig kui lataig mara srua gøn cha, ñimui trendø treeg marøb tøgagúilan marøg køptø. ⁷iPalatø tabelø! Tius maig karuigwan eshkabig Isaías ñimuimbura sөлwein dain gøn øyah chippe:

⁸I misaamerabe nan ka triitøgatø tab inndan cha.

Inchendø nømui manrrøbe nainukkurrimbe yab pønrran cha.

⁹Nan køriibala tabig waminchib taibe chiweingucha chi tabig marig kømøn cha,
møguelø martrai karua pønsrailan øyeeg maramig køn chib kusrenanøb.—

¹⁰Incha Jesús misagwan nuimay wama trenchibig køn:

—Kalutøga mørøb, katø chigúi mørøb inday cha. ¹¹Møwan trigu kebibiibe nune chi kaig trømbøig marmøn cha. Treeg kømøtø, møwan kaig trømbøig marøbiibe trigugurri webibig, truike si, nune trømbøig maran— chibig køn.

¹²Inchene nui kusrenanøb pera uniiløbe Jesúswan kemallabe trenchibelø gøn:

—¿Ñi øyeeg tailan fariseosmera mørabe, namig mørigwan ashtirru?— cha.

¹³Inchene nøbe trenchibig køn:

—Chi tusr køben nai Møskai srømbalasrø wabig ellgwaimíigwane srølbañau kitig kønrrun cha. ¹⁴Nømune kagøbasay cha. Kagen nømbe kabgailø katøgan kabgailandøwei srua ambubelø gøn cha. Kan kabgaima katøgan kabgaigwan srua yabe, trabyu pailøba guegørrønrrun— cha.

¹⁵Inchene Pedrobe Jesúswan trenchibig køn:

—Tru ‘øyeeg lataitøwein gøn’ cha, kemesra wamindigwan namun tab eshkarra— cha.

¹⁶Inchene Jesúsbe trenchibig køn:

—¿Ñimgucha chigúinguen mormøwa bønrrøtirru cha?

¹⁷¿Chitøgucha trigu kebibiibe patsau kørraigui kui ashmeelø gøtirru? cha, katø asrugurri webinrrab. ¹⁸Trune trigugurri webarrubiibe si, møwei manrraugurri arrubig kua, truike nune trømbøig marøb mindisan cha. ¹⁹Kaguende møwei manrrø umbugurrimbe kaig isuilø gøben, kweetsamelø gøben, kasharawarmera itølulamig køben, kasharameelø gøbendø ishumburba, møgueløba trømbøig maramelø gøben, nilamelø gøben, isa wamindiilø gøben, tsalø wamiilø gøben, øyeelø kerriguh werrun cha. ²⁰Iiløbe si, mowan kaig rrømbøig maran cha. Inchen manrraptø tasigwan kinømutøbe mowane chi trømbøig marøb mindishimøn— cha, trenchibig køn Jesúsbe.

Kan ishug peg birausriig Jesúsban køreig

(Mc 7.24-30)

²¹Incha Jesúsbe truyugurri tarømisra, Tiroba, Sidónba tru ciudadamera pønrrab piraumay ibig køn. ²²Inchen kan ishug canaansriig tru birau tsubiibe arrua, Jesúsban trenchib wamab kemallibig køn:

—Señor, merrabsrø Davidwei Nusrkai, nan lastima ashcha chib. Nai nimbasrøbe kan kwaimandzig ni mumayguen tab uñchaingai indinab megan— cha.

²³Inchen Jesúsbe chigucha lètømuben, nui kusrenanøb pera uniiløbe kemallabe, trenchibelø gøn:

—Tiusmanda, ishuwane ‘inrrø’ chi cha, namui wendautø trashib arrun— cha.

²⁴Inchene Jesúsbe trenchibig køn:

—Nane Israel misaamerai utu tru ubisha rrubiilø latailaimaytø ørig køn— cha.

²⁵Inchene tru ishuube nui merrab arrua, tømønørøb trenchibig køn:

—¡Señor, purugurra!— cha.

²⁶Inchene Jesúsbe trenchibig køn:

—Pirriwan uregwan kerrawa, wera-ureezheelan kebusramibe søl gømøn— cha.

²⁷Inchene ishuube trenchibig køn:

—Øø, Señor, treebe treegwein gøbendø, wera-ureezheeløguen nòmui puarwei mishatsigugurri kørrabzhigwan man— cha.

²⁸Inchene Jesúsbe trenchibig køn:

—iIshug, ñui isubigwan nainug pasra tøgagúibe purø nuig køn! cha. Ñi maig palain basraig, treeg kønrrun— cha.

Inchen tru uraskurri nui nimbasrbe tabig kørromisrig køn.

Kwanrreelø truba nørrowan Jesús tamarøb

²⁹Jesús truyugurri webya, Galilea pisu buluwan purayabe, kan tunbalasrø nebya, truyu wamisrøbig køn. ³⁰Misag truba rruba nørro nò wainug tulundzuna, cojosmera gøben, kabgailø gøben, asru chiyu gøben kesruilø gøben, waminchab gaimabelø gøben, katøgan chi gwanrrø gøben tøgarmera truba nu treelan gøben Jesúswei merrab srúa amrrua, pønsrøben, nòbe tamarøbig køn. ³¹Treekkurri tru nu misaabe ashippe, ke kwaara asha kørromisrøbelø gøn, waminchab gaimabeløbe wamindamba, asru chiyu gøben kesruiløbe tabig kørromisramba, cojosmerabe ambamba, kabgailøbe asamba indi ashabe, nømbe Israel misaamerai Tiuswan truba tabig waminchibelø gøn.

Jesús pib mil misagwan manrrai tranøb

(Mc 8.1-10)

³²Incha Jesús nui kusrenanøb pera uniilan wamabe, trenchibig køn:

—Misaameran lastima gøtan cha. Chabguen yu pøn gwalømguen naba warøwa, yandø chi mamig chigar gøn cha. Nòmui yamay chi mameeløbe ambashig kømøtan cha. Kaguende mayutø pesannabgun— cha.

³³Inchene nui kusrenanøb pera uniiløbe trenchibelø gøn:

—Ya nu misagweimbe ñnambe chinchá mamig wetørrayasamø? cha, ya yu mu misag warab warømøsrømbe.—

³⁴Inchene Jesúsbe payibig køn:

—¿Ñimbe pirri mam døgagøgue?— cha. Inchene nømbe:

—Pirri sietebah, katø mamdø peskau-ureebatø tøgaguer— chibelø gøn.

³⁵Inchen nòbe misagwan pirau purramisringarua, ³⁶nui tasigu tru pirri sietenba, peskaumeranba muta, Tiuswan ‘mayanguen pay’ chabe, pirisha, nui kusrenanøb pera uniilan tranen, nømbe

misagwan pirishibelø gøn. ³⁷Inchen mayeeløba øska ma kørørmisren, katøgucha tru pirisaig undailan tasinmerayu siete netsøbateelø tulishibelø gøn. ³⁸Inchen tru mabeløbe ishumburwan, uregwan munchimuben, mөгueløtø pib mil gøbig køn. ³⁹Incha Jesúsbe yandø misagwan chab ungwa chabe, barcoyu kebya, Magadan birausrømay ibig køn.

Fariseosmeraba, saduceosmeraba kan mana asiimfiig martrai miab

(Mc 8.11-13; Lc 12.54-56)

16 ¹Fariseosmera gøben, saduceosmera gøben Jesúswan ashchab ambabe, nun chiyugøben kebenøsrkøg køptø, mana asiimfiig miabelø gøn Tius nøba pasrain gúi ashchab.

²Inchene Jesúsbe trencha løtabig køn:

—Yandø maaben misrene, ñimbe øyah chibelø gøn cha: “Tab gwaløm gønrrab asønan cha. Kaguende srømbalabe ke pigøzhig basran” cha. ³Inchene løtsøbe ñimbe trenchibelø gøn cha: “Møimbe kaig kwaløm kønrrab asønan cha. Kaguende srømbalabe ke wañindø kasraim basran” cha. Pøs pala wañi maig basrai asha, ñim ‘øyeeg kønrrun’ chib, ‘øyeeg kønrrun’ chib waminchibeløbe, iMøin gwaløm chi pureb arrubigwane, trube, ‘øyeeg kønrrun’ chinrrab wetøgørrørrab gaimabeløbe mailø gøgue! cha. ⁴Møin gwaløm kaig misaamera, kan kasharawar peebe itøluløpteelø lataitøwei Tiusbatø bønrrømø misaamera kailø, Tius naba pasrain gúi ashchab marig miatan cha. Inchendø asha gønrrai katøgan chigøben peg kenamara tranmøtø, tru Jonásweiwandø eshkamønrrun— cha.

Incha nømune pønrramnetø, iptinchibig køn.

Fariseosmeraba, saduceosmeraba kusrenanigwan ashiptø guy

(Mc 8.14-21)

⁵Nui kusrenanøb pera uniilø pisu ambøgatøsrø chab larraambabe, pirri srua amrrumigwan pesan amrrubrain gúi isuptinchibelø gøn. ⁶Inchen Jesúsbe trenchibig køn:

—Au, ñimbe levadura fariseosmeraiwanba, saduceosmeraiwanba ashiptø guy— cha.

⁷Inchene nui kusrenanøb pera uniiløbe kangurriin gangurri trenchibelø gøn:

—Nam pirriwan srua amrrumuimbarre trenda chindah— cha.

⁸Inchene Jesúsbe nòm trenchib purrai ashabe trenchibig køn:

—¿Chindimbarre kangurrin gangurri ‘pirringar guer’ chib purrøgue? cha. Ñim gúi ñimui isubigwan nainug ke kagømønrraindøzhig pasra tøgar cha. ⁹¿Katøgucha ni chigúinguen mørmeelø gø chindah? cha. ¿Tru na trattøgatø pirriwan trattø mil møguelan pirishiben, undailø mam tasin tulisaigwan ni trunundøguen ke isumeelø gø chindah? cha. ¹⁰Katø tru siete pirriwan tru pib milwan pirishiben, ¿tru unchibigwan mam tasin tulisaigwan isumeelø gø chindah? cha. ¹¹¿Ñimbe mandeelø gøh cha, chigúinguen mormønrrappe, na pirriwan waminchib wamubendøbe, nabe tru levaduran fariseosmeraiwanba, saduceosmeraiwanba ashiptø guy cha, nabe trunun waminche?—

¹²Inchen nòmune ‘tru pirriyu pusri levaduran ashiptø gønrrigay’ chimøtø, ‘tru fariseosmeraba, saduceosmeraba kusrenaniilan ashiptø gønrrigay’ tain gúi yandø wetøgørrabelø gøn nømbe.

Pedrobe Jesúswan: “Cristo gøn” chib

(Mc 8.27-30; Lc 9.18-21)

¹³Jesús Filipo birau Cesareasø puabe, nui kusrenanøb pera uniilan payibig køn:

—¿Misaamerabe Møg Misra Arrubigwane mu gøn dah?— cha.

¹⁴Inchene nømbe trencha løtabelø gøn:

—Møiløbe ‘Juan Bautista gøn’ chiben; møiløbe ‘Elías køn’ chiben; møiløbe ‘Jeremías kuinrrun’ dan cha, kabe møikkøben ‘Tius maig karuigwan eshkabig kui’.—

¹⁵Inchene nøbe trencha payibig køn:

—¿Trune ñimbe nane mu gøn chinrrague?— cha.

¹⁶Inchen Simón Pedrobe trencha løtabig køn:

—Ñibe tru Cristo, Øsig wab Tiuswei Nusrkain gøn— cha.

¹⁷Inchene Jesúsbe trenchibig køn:

—Ñibe mayanguen tab gúig køn cha, Simón Jonáswei nusrkai. Kaguende ñune iigwane yaumbaig, animbaig, ka møg kenamarøb eshkamøtø, nai Møskai srømbalasrø wabig eshkan cha. ¹⁸Inchen nagucha ñune, ñibe Pedro gøn char cha. Nai iglesian i srug bala mara pasramønrrun cha. Inchen kwamig kønrrai marøb

pasrabigwei maramburab marøbikken tru iglesiane ni chinchaguen kananrrab gaimanrrun cha. ¹⁹Srømbalasrø Tius nø ashib karub wainug llavimeran ñun tranamønrrun cha. Ñi yu pirau lusrøb lataig marene, srømbalasrøngucha lusrøb lataitøwei martrun cha. Ñi yu pirau pichib lataig marene, srømbalasrøngucha pichib lataitøwei martrun— cha.

²⁰Incha Jesúsbe nui kusrenanøb pera uniilan mungøben eshkab gønrrain gømø garua basrøbig køn, nøbe tru Cristo gúi.

Jesús nø kwamigwan eshkab

(Mc 8.31-9.1; Lc 9.22-27)

²¹Incha tru uraskurrimbunø Jesúsbe nui kusrenanøb pera uniilan ‘øyeeg kønrrabig køn’ cha, eshkab mendabig køn. Nune Jerusalénsrømay yamig nebuben, misagwan karubelø kølli misaamera, sacerdotesmeran karubelø gøben, Moisés pørigwan kusrenanøbelø gøben, truba rruba kaig indinab megawa, kweetsig kømig nebunrrun cha. Inchendø pøn gwalømyube katø øsiiranrrun chibig køn. ²²Inchen Pedrobe nun nøørøsrø pera ya, murtø waminchib mendabig køn:

—Tius ashib wawa, Señor, ñun øyeeg puraimuimbe— cha.

²³Inchen Jesúsbe keeshabe Pedrone trenchibig køn:

—Satanás, nainukkurri tarømisr cha. Ñibe nane peñchai ke ka srurrengwangerub attan cha. Kaguende ñibe isuppe, Tius lataig isumøtø, møguelø isuimay isun— cha.

²⁴Inchabe Jesúsbe nui kusrenanøb pera uniilan trenchibig køn:

—Møikkøben nai mendig uñig købene, nøasiitø nuimburabigwangøba isumøtø, nuiuruswan mutab, nai mendig arrum nebunrrun cha. ²⁵Inchen møikkøben øsig kømigwangøba isubiibe yandø pinab pinamig nebunrrun cha. Inchen nagurrindø kwabiibe managatig øsig kømigwan wetørrawa, tøgagønrrun cha. ²⁶¿Kan møg yu pirau chine købigwan kerrigu nuindø maringucha, nui øsig kømigwan trubisaibe, chiwein gúi tabig kønrrab gø? cha. Kabe ¿kan møøbe kwamønrrappe, chi rranøbsruerah? cha. ²⁷Kaguende tru Møg Misra Arrubiibe Møskawei purø nuig tørguegwalmabigu nui ángelesmeraba arrua, møilandøgucha nøm maig marig køben treeg tranrrun cha. ²⁸Pøs nabe ñimun cierton trendamønrrun: Møiløgøben yu purrabelø tru Møg Misra Arrubig nø ashib karunrrab attrab kenamisren, trunun nebua ashmøwatøbe, kwanrraamøn— cha.

Jesús ke peemayig misrøb

(Mc 9.2-13; Lc 9.28-36)

17 ¹Øyeeg taig yandø trunewei kan gwalømdø baløben, Jesúsbe Pedronba, Santiagonba, nui nuneg Juanwanba nørø kan pala tunsrømay pera ibig køn. ²Incha trusrø nømui merrab Jesúsbe ke peg lataig misrøbig køn. Inchen nui maløbe nøsig lataig tørbilabig misren, nui kewagúiløbe puløzhig pilabig lataig misrøbig køn. ³Inchene mømbe Moisésba, Elíasba, Jesúsba waminchib pønrrai ashiptinchibelø gøn. ⁴Inchen Pedrobe Jesúswane trenchibig køn:
—Señor, nam yu pønrramibe purø tab gøtan cha. Ñi martrain gøbene, pøngatø ya-ureg na maramøh cha, kan ñui, kan Moiséswei, kan Elíasweingue.—

⁵Inchen Pedro waminchib pasramnetø, kan wañi tørbilabig nømun pinøbulen, wañi umbugurri kan wam trenchibig køn:
—Iibe nai Nusrkai undaaraig køn cha. Nabe nuimburab truba tab gúi war cha. Nune møray— chibig køn.

⁶Inchen iigwan mørøppe, nui kusrenanøb pera uniiløbe truba rruba kørig kuilø, maløwan pirau kebatamnegatig utsøbasrøbelø gøn. ⁷Inchen Jesúsbe nømun kemalla katørab trenchibig køn:
—Chi køríimatømøtø, kurray— cha.

⁸Inchen nøm kurraashene, mugucha kenamuben, Jesúswane nøtø basrai ashibelø gøn.

⁹Incha tru tunsrøngurri kørørrub amrruabe, Jesúsbe trenchib karubig køn:

—Mungucha waminchib gønrrab gømø cha, tru asigwan, tru Møg Misra Arrubig kwailai utugurri øsiirawa katø kurramnegatig.—

¹⁰Inchen nui kusrenanøb pera uniiløbe Jesúswan payibelø gøn:
—Trube, treeg købene, Moisés pørigwan kusrenanøbeløbe ¿chindimba Elíasmerrig arrumig køn dah?— cha.

¹¹Inchene Jesúsbe trenchibig køn:

—Elíasbe arrubwei inchun cha. Incha nøbe kerrigu katøyug tamara pønrrønrrun cha. ¹²Inchendø nabe trendamønrrun: Elíasbe arrubguen inchen, nune mu gúi nebua ashmøtø, nømun maig marøg købendø, marig køn cha. Møg Misra Arrubikkucha treetøwei nømui tasku kaig marinab meganrrun— cha.

¹³Inchen nui kusrenanøb pera uniiløbe Jesúsbe tru Juan Bautistan wamindin gúi wetøgørrabelø gøn.

Kwaimandzig tōga unan Jesús tamarōb

(Mc 9.2-13; Lc 9.28-36)

14 Misag truba nu pasrainug nōm chab pubene, kan mōg pua, nui merrab tōmbōnsrabe, trenchibig kōn:

15—Au, nai nusrkawan lastima ashcha cha. Kaguende pesannabig tōgaig kua, truba trōmbōig nebuinab megabig kōn cha. Katō gatō nagu kebeñib, piyu kebeñib inchibig kōn cha. 16 Na ñui kusrenanōb pera uniilaimay pera arrubendō, tamartrab gaiman— cha.

17 Inchine Jesúsbe trencha lōtabig kōn:

—iKan ñim mōi misaamera kōrenrrab inchimeelō larrō gailō! cha, ñnabe managatig ñimba unamig kōnrrerah? cha. ñKan øyeeg ashiptō managatig ñimba unamerah? cha. Unan yusrō naimay srua amrruy— chibig kōn.

18 Inchen Jesúsbe tru kwaimandzigwan nama, unainukkurri wambig weguchen latatō, unōbe tabig kōrrōmisrōbig kōn.

19 Inchen nui kusrenanōb pera uniilōbe nōmdō nōrō Jesúsban kemalla, trencha payibelō gōn:

—ñNambe kwaimandzigwan wambig weguchappe, chindimba kaimah?— cha.

20 Inchine Jesúsbe trenchibig kōn:

—Kaguende ñimbe ñimui isubigwan nainug ke ka gōmōnrraindiig basra tōgar gōn cha. Pōs nabe ñimun cierton trendamōnrrun: Ñim kan murtasa yellburaptiitōguen ñimui isubigwan nainug pasra tōgar gúimbe, ñim i tunwan: “Yugurri mendamisra, katōgansrō purainrrō” chibene, tru tunbe purainrrun cha. Pōs ñimuimbe chitōgucha kaimamdiibe chi gaagōn cha.

21 Kaguende øyeeg kwaimandziibe Tiuswan purugurra chib miaitōgaba, ayunab indiitōgaba treeg marendōwei webibig kōn— cha.

Jesús katōle nui kwamigwan eshkab

(Mc 9.30-32; Lc 9.43-45)

22 Galilea birausrō ketōtō amōñippatō Jesúsbe trenchibig kōn:

—Tru Mōg Misra Arrubigwane mōguelai tasku tranig kōnrrun cha. 23 Inchen kweechen, pōn gwalōmyube gatō øsiirawa kurrōnrrun— cha.

ligwan wammōrabe, nōmbe truba isui inchibelō gōn.

**Tiuswei yawan tøgagúimburø an
bagaramigwan Jesús pagarangarub**

²⁴Jesúsba nui kusrenanøb pera uniiløba Capernaumsrø pubene, Tiuswei yaburø trendø an bagaranrrain daigwan an utabelø Pedroimay ambabe trenchibelø gøn:

—¿Ñimui kusrennøbikkan Tiuswei yaburø trendø truburø an bagarab gømigwan pagaramíig kuitarru?— cha.

²⁵Inchen Pedrobe:

—Øø, pagarabwei inchibig køn— cha løtabig køn.

Incha Pedro yau kebibene, Jesúsbe øyeemerrig trenchib waminchibig køn:

—¿Simón, ñibe maig isuguh? cha. ¿Yu pirau reymerabe trendø pagaramigwan pagaraig utappe, mumeran utah? cha: ¿Nømui misaamerandøweindeh? Kabe: ¿Peesrøngurri amrrub misaamerandeh?— cha.

²⁶Inchene Pedrobe trenchibig køn:

—Peesrøngurri amrrub misaameran utabelø gøn— cha.

Inchene Jesúsbe trenchibig køn:

—Trube, treeg købene, tru birau misaameratøweimbe chi pagaramikken palømuinrrun cha. ²⁷Treeg kuingucha, nambe mungucha namishimønrrab, nu bisuyumay ya, anzuelun ke keguchendø, megamisrøb peskauwan wesrunrrig, chibig køn. Incha peskauwei trigwan kurabe, kan an wetørranrrabguen cha, maya tranamigwan neikke. Incha naimburøba, ñuimburøba srua ya, pagarau— chibig køn.

¿Tiuswei merrab mas nuibe mu guerah?

(Mc 9.33-37; Lc 9.46-48)

18 ¹Inchen tru urastøwei nui kusrenanøb pera uniilø Jesúsban kemallabe, trencha payibelø gøn:

—¿Srømbalasrø Tius nø ashib karub waisrømbe mas nuibe mu gøh?— cha.

²Inchene Jesúsbe kan unan wama, nømuin døbøtag pasrabe, ³trenchibig køn:

—Pøs nabe ñimun cierton trendamønrrun cha: Ñim peemayelø misrøb, ureg lataig misrmuisruandøbe, srømbalasrø Tius nø ashib karub wainuube managuen kebamrraamøn cha. ⁴Nøasiitø ‘nuig

kurmaḃ' isumíḡ, i unø lataig misrøḃiibe, srømbalasrø Tius nø ashib karub waigu mas nuig køn cha. ⁵Inchen møyikkøben kan i unø lataigwan nai munchiyu tab wamab utabiibe, nan utan chibig køn.

Kaig mara kebenamibe kørig kømdiig køn

(Mc 9.42-48; Lc 17.1-2)

⁶Møigwan gøben i shushmera latailan nan kørebelan kaig mara kebenørskøbigweimbe, trembe tru tirigu kitsig nu srugwan naashigu mesra, mar umbusrø kegucha, pi gueesra kwangaruinguen søl gøbsruinrrun cha. ⁷Yu nam waraig pirøwaimburappe kan yeekkucha gúita, chine pønrrabelø misagwan kaig martrai inchib pønrrøben, trune kaigwan nø bera mara kebenørskøb mowaimbe ¿maig kønrrerah?

⁸Inchawei ñui tasig kui, ñui srøb gúi kaig maringarua kaigu ñun kebenørskøbene, para, kuchi. Managatig øsig wamsrø tasig palabig kui, cojo gúi kebyamikken søl gønrrun, pa tasig tøgag, pa srøb tøgag tru managuen kwamø nagu kegutsig købgunrriibe. ⁹Inchen ñui kab kaig maringarua kaigu ñun kebenørskøbene, wesrua, kuchi chibig køn, managatig øsig wamsrø kan gaptø tøgag kebyamikken søl gønrrun cha, pa gab pusraig mōra melamnug kwamø nagu kegutsig købgunrriibe.

Kan ubisha rrubigwan kemesra wamindig

(Lc 15.3-7)

¹⁰Au, i shushmeran mõilandøgucha kashmøtay. Kaguende srømbalasrø nømui ángelesmerabe nai Møskai srømbalasrø wabigwei maløwan chu urastøgucha ashib pønrran char nabe. ¹¹Kaguende Møg Misra Arrubiibe tru trubig købigwan kaigyugurri wesranrrab arrig køn cha. ¹²¿Nimune maig asønata? chibig køn. Kan møg cien ubishamera tøgagua, kan pella ya, trubøbenma, noventa y nueve tunbalawan waramnetø, tru pella trubabigwan kabe ¿chugøben lanrrab imønrraitarru? cha. ¹³Incha nabe ñimun cierton trendamønrrun: Wetørrappe, tru trubabigweimburab mas purø kasraaranrrun cha, tru noventa y nueve ka amøñibelaimburab lataguen gømø. ¹⁴Oyeetøwei ñimui Møskai srømbalasrø wabiibe i shushmeran ni kanguen trubømuimbemab indan chibig køn.

Ñui nuneg ñun kalø marene, ulø baymø mandø pesannamig
(Lc 17.3)

15'Inchawei ñui nuneg ñun chigøben kaig marene, ya, ñibe nundø mara, waminchi. Incha nui kalø marigwan kalø marig kui ashchai nebua isungaru. Inchen ñun mørene, ñibe ñui nunewane tab gørrømisrtrai kusrawa basran. 16Inchen ñundø mørøg kømui inchene, trube, kandø gúi, pagatø gúi wamø, chi bub arrubigwandøgucha pailø gúi, pønelø gúi maig kuigwan nøm wamindigu treeg kørørmarig kørnrai. 17Inchen truilangucha mørøg kømui inchene, trube, iglesiayuelan eshkau chibig køn. Inchen gatø iglesiayuelan mørøg kømui inchene, trubeguende, yandø Tiuswan ashmíig judío gømíig lataig, kabe kan romasreelayasig an utaptø wabig lataig mara kørørmaray cha.

18'Pøs nabe ñimun cierton trendamønrrun: Ñim yu pirau lusrøb lataig marene, srømbalasrøngucha lusrøb lataitøwei martrun cha. Inchen ñim yu pirau pichib lataig marene, srømbalasrøngucha pichib lataitøwei martrun cha.

19'Nabe katø ñimun trendamønrrun: Ñim møikkøben pailø yu pirau chigøben Tiuswan mianrrab lata kandø isua burramisra, miabene, nai Møskai srømbalasrø wabiibe ñim miaigwan tranrrun cha. 20Kaguende pailø gúi, pønelø gúi nai munchiyu tulundzuna purrainuube nabe nømui utu pasrar— cha.

21Inchen Pedrobe Jesúswan kemalla, trencha payibig køn:
—Señor, nai nuneg nan chigøben kaig marøbig marene, nabe ¿mam biejegatig pesannab ulø baymumig kørnrai gø? cha. ¿Kabe sietegatiitøteh?— cha.

22Inchene Jesúsbe trenchibig køn:
—Nabe siete nebumnegatiitø chimur cha. Treeg kømøtø, sietebatø setenta biejeskatig char— chibig køn.

Karuig megabig larrø gaigwan kemesra wamindig

23—Srømbalasrø Tius nø ashib karub waibe kan rey nui karuindiig melabelø nømui ulø misriilan mayambatø ulø gøtashchab ashchab wamisrøb lataig køn. 24Incha truigwan ashib mendøbene, kan truba rruba nu an ulø misraigwan pera amrrubelø gøn. 25Inchen tru i møøbe katøburø anwan ungwa chinrrab gaimaptinchene, nui reybe nunba, nui srawanba, nui uregwanba

nui chi tøgagúigwanbañau yanrrai karubig køn, tru ulømisri anwan wartrai. ²⁶Inchen nui karuindiig megabiibe reywei merrab tømþonsra trenchibig køn: “Au, nai rey, tiusmanda, nan øyeeg nebui megaben lastima ashibsrumugu cha, kerrigu nai uløwan wartrumøn” cha. ²⁷Inchene reybe waachawan yeeg nebutamab isua, nui ulø misrigwan paymønrrab kaabasha, ka inrrai, ka elachibig køn.

²⁸Inchen tru karuindiig megabiibe webya ya, katøgan nøba lincha karuindiig megabig nun lamøtiig ulø misraigwan katappe, naashigu merrarrawa, ke chab isrømbuløsrkøb trenchibig køn: “Nai uløwan tranrra” chib. ²⁹Inchene tru nøba lincha karuindiig megabiibe nui merrab tømþasra trenchibig køn: “Tiusmanda, nan lastima ashcha chib. Uløwan tranrrumøn” cha. ³⁰Inchen kane kagøbashig kømuptø, kailan keeri yau keeringarubig køn nui uløwan tranamnegatikke.

³¹Inchen katøganelø tru karuindiig lincha melabeløbe øyeeg inchen trunun asha, nømune truba pusrkwabən, chi purayaigwan kerrigu reywan eshkanrrab ambubelø gøn. ³²Inchen reybe tru kagøbashmø ulø bayiptiigwan wamønrrab øra trenchibig køn: “iKaruindiig megabig, larrø gaig! cha. Ñi nan ulø gúigwan nagurrima ñun ulø baymø, pesannar cha, ñi kaabashcha chib truba rrua rrugaben. ³³Pøs ñigucha tru karuindiig ñui lincha megabigwane maindi lastima asambala chibig køn, na ñun lastima ashib lataitøwei.” ³⁴Incha reybe truba namaptø, maya ulø gúigwan kerrigu anwan waramnegatig kaigyu mōra meganrrai marøbelan tranøbig køn cha. ³⁵Inchabe Jesúsbe trenchibig køn:

‘Nai Møskai srømbalasrø wabikkucha ñimune øyeetøwei martrun cha, ñim møitøgucha ñimui nunewan manrraugurri kerrigu newan pesannab, kagøbashmuisruandøbe.—

Sraimba, keeba petiyamumigwan kusrenanøb

(Mc 10.1-12; Lc 16.18)

19 ¹Jesús øyeelan chab waminchabe, Galileasrøngurri ya, Judea biraursø pubig køn, Jordán bi ambøgatø pørr gal-labgatøsrø. ²Inchen misag truba nu mendig amben, truyu kwanrreelan tamarøbig køn.

³Inchen fariseosmera Jesúswan kemallabe, chinha gøben kebenøsrkønrrab isua, trencha payibelø gøn:

—¿Ka chigurrin gøben sawan kutsamig chi merømíig kø chindah?— cha.

4Inchene Jesúsbe trenchibig køn:

—¿Ñimgan Tiuswei wamwan pørigu lemeelø gøtirru cha, tru srøsrø marøb uras marøbig Tiusbe: “Møwanba, ishuwanba ellmarigwan”? 5Incha Tiusbe trendaig køn: “Øyeekkurri møøbe møskawanba, usranba elatchun cha, nui sraimba kandø gønrrab. Incha tru pailøbe kan asrtø gønrrun” cha. 6Inchawei yandø pailø gømø, kan asrtø gøn. Inchawei treeg købene, Tius kandø mara lindisaigwane møøbe tarømaramig kømøn— chibig køn.

7Inchene nømbe trencha payibelø gøn:

—¿Trube treeg købene, Moisésbe chindimba kilga mara, purørtrain garuig køh? cha, sawan tarømisrtrab— cha eshkabig.

8Inchen Jesúsbe trenchibig køn:

—Ñimui manrrømera isumíig larrø mureløgurri Moisésbe ñimui sralan ka treeg marbasig køn cha. Inchendø srøsrøbe øyeeg kømuig købig køn cha. 9Trune nabe trendamønrrun: Kan møg, nui sraimbe katøgan møøba trømbøig marøb itølulmubendø, nui sawan kucha, katøgan ishuuba kasharabiibe, itølulan— cha.

10Inchen nui kusrenanøb pera uniiløbe trenchibelø gøn:

—Srawanba, kewanba øyeeg pubig købene, trembe kasharamuinguen— cha.

11Inchene Jesúsbe trenchibig køn:

—Kasharamønrrab tamibe mayeelain gømøn cha. Tius truburab gønrrai traniilaindøwein gøn cha. 12Møguelane kasharamumig chigurrin gøben øyeeg katabelø lataig pønrran cha. Kan utueløbe kasharamigwane chi palai mørtrabgailø usrai patsaugurri treeg kal-lawar gøn cha. Inchen kan utuelane sralø balai mørmønrrai capawa gørrømarilø gøben, kan utueløbe srømbalasrø Tius nø ashib karubweimburabikkurri ka trendø nømuinetø tre latailøtøwei misran cha. Møikkøben Tiusweimburabeløyu marøb uñchab treeg kørørmisramdiig kui mørabe, treeg kørørmisr— chibig køn.

Uregwan Jesús mayanguen tab gúilø gønrrain chib

(Mc 10.13-16; Lc 18.15-17)

13Inchen Jesúsweimay ureemeran srúa amrrubelø gøn, nømuim bala tasigwan estsara, nømuimburab Tiuswan mianrrai. Inchen nui

kusrenanøb pera uniiløbe tru srua amrrubelan namaptinchibelø gøn. ¹⁴Inchene Jesúsbe trenchibig køn:

—Uregwane merømø, naimay ka amrrubasay cha. Kaguende srømbalasrø Tius nø ashib karub waibe nøm latailaiwein gøn— cha. ¹⁵Incha tasigwan uregweim bala estsarabe, nøbe truyugurri ibig køn.

Kan pua møg Jesúsba waminchib

(Mc 10.17-31; Lc 18.18-30)

¹⁶Kan møg Jesúsban ashchab yabe, trencha payibig køn:

—Kusrennøbig, managatig øsig kømigwan na tøgagønrrappe, ÷chigøben tabiibe chi maramø?— cha.

¹⁷Inchene Jesúsbe trencha løtabig køn:

—¿Ñibe nane tru tabigweimburappe chindimba paygu? cha. Mugucha tabiibe kaaben, Tiustøwein gøn cha, tabiibe. Inchawei managatig øsig kømigwan tōga basrønrrappe, Tius maig maramigwan martrai pønsraigwan mōra, mar— chibig køn.

¹⁸Inchen matsinøbe:

—¿Møilø gøh?— chibene,

Jesúsbe trenchibig køn:

—Kweechimøwei, itølulmøwei, nilømøwei, katøganuimbura isa waminchimøwei, ¹⁹usri møskawan maig købash inchimø, tab inchib, katø ñima ñiasiitøwei maig undaguig køppe, ñui mendaigwangucha treetøwei undaarab inchi— chibig køn.

²⁰Inchene matsinøbe trenchibig køn:

—Nabe iilane kerriguh marøbig kur cha. Masbe ÷chitø balerah?— chiben,

²¹Jesúsbe trenchibig køn:

—Chigucha palømiig newan tabig kønrrappe, ya, ñui chi tøgagúigwan yana, waachameran tranø cha. Treeg marabe, srømbalasrømbe chigurrimbunø tøgagønrrabguen cha. Trugurrimbe arrua, nai mendig amø— chibig køn.

²²Inchen tru matsinøbe iigwan mørøppe, truba isui ibig køn, kaguende truba puaig kua.

Chi tøgagúigwangøba isubigweimbe køramdiig køn

²³Incha Jesúsbe trenchibig køn nui kusrenanøb pera uniilan:

—Nabe ñimun cierton trendamønrrun cha: Srømbalasrø Tius nò ashib karub wainug kan puaig kebyamibe truba murig køn cha. ²⁴Kan camelloquen tsusain gal rrabyu illmø larrayandiig køben, kan puaibe Tius nò ashib karub waisrø kebinrrab gaimanrrun— cha.

²⁵Inchen nui kusrenanøb pera uniiløbe iigwan mørabe, truba kwaarøb trenchibelø gøn:

—Treeg købene, ÷kaigyugurrimbe mu gúi wesraig kønrrautah?— cha.

²⁶Inchen Jesúsbe nòmun ashabe, trenchibig køn:

—Møgueløbe iigwan martrab gaimanrrun cha. Trune Tiusweimbe si, chitøgucha maramdiitø gøn— cha.

²⁷Inchen Pedrobe trenchibig køn:

—Au, nambe chi tøgagúigwan kerrigu elacha, ñui mendig amrruig køn cha. ÷Nambe, trube, chi utamig kønrrerah?— cha.

²⁸Inchene Jesúsbe trencha løtabig køn:

—Pøs nabe ñimun cierton trendamønrrun cha: Katøyug chi købigwan srøig tamarøb uras tru Møg Misra Arrubig nò wamisrig torguegwalmabigu nò wamisrøb uras, ñim nai mendig amõñibeløbe tru purramisra karub purraig doce pønrrabeløyu purramisra, tru doce nusrkalo Israelwainukkurri karrab misaameran ñim ashib karub purramisrtrun cha. ²⁹Inchen mayeeløba yameran, nunelan, nuchalan, usri møskawan, uregwan, pirømeran nai munchigurrindø elachibeløbe cien biejes menrraguen utab, katø managatig øsig kømigwangucha Tius tranig utønrrun cha. ³⁰Inchen møiløgøben møi ya yu pirau nømmerrig bønrrabeløbe trusrømbe srobe melønrrun cha. Inchen yu pirau srobe melabeløbe, trusrømbe nømmerrig bønrrønrrun— chibig køn Jesúsbe.

Uvas trau kwallibelan kemesra wamindig

20 ¹—Srømbalasrø Tius nò ashib karub waibe øyeeg lataig køn, kan pirø buaig truba løtsøzhig nui uvas ellguailøyu kwallchabelø lanrrab webibig lataikke. ²Incha tru piunmeran mawawan mayan bagaramig køben treeg bagaranrrab misra, incha nui uvas ellgwainug kwallchay øran cha. ³Incha tru løtsø las nueve katøyug webarruabe, katøganelø plazayu chi maramikkar purrai ashabe, ⁴trenchibig køn cha: “Ñimgucha nai

uvas ellgwainug kwallchab ambay cha, maig pagaramigwan treeg bagararrumøn” cha. Inchen nømbe ambubelø gøn. ⁵Incha puaibe katøyug kwaløm døbøtag webya, katø maaben las treskucha webya, treetøwei marøbig køn. ⁶Incha maaben las cinco gøsrøn katøyug plazayumay yabe, katø møylogøsrøn chigucha maramikkar purrai ashabe, trencha payibig køn: “¿Nimbe mawa ørøba chi marmøbe yube chinchib purrøgue?” cha. ⁷Inchene nømbe trencha løtabelø gøn: “Namune muguen chi maramig tranmøtan” cha. Inchen nøbe trenchibig køn: “Nimgucha ambay cha, nai uvas ellgwainug kwallchab.”

⁸Inchen yandø yem misren, tru ellmarig buaibe nui kwallibelan ashibigwane trenchibig køn: “Kwallib melabelan wama, pagarau cha. Tru srabe guerrubelanmerrig pølbasa, srøsrø guerrubelane srabe bagaranrig” cha. ⁹Tru maaben las cinco lutau gøben kebambubelømerrig kemalla, møyøgucha mawa ørøba marøb meløwa lataitøwei neig utabelø gøn. ¹⁰Inchen yandø merrab kebambubeløbe mas utamuitamab isua meløbenba, nøm møyøgucha mawa ørøba marøb melaigwandøwei utabelø gøn. ¹¹Incha tru marøb melaimburø anwan utabe, tru ellmarig buaigwane nømdø truba namig waminchib mendabe, ¹²tru puaigwane trenchibelø gøn: “I tru srabe guerrubelø kan urazhiitø marendø, ñibe truilangucha nam pørryu mawa mawa marøb melabelan lataitøwei lata bagaran” cha. ¹³Inchen tru tra buaibe nømun møyigwan gøsrøn trenchibig køn: “Kasuku, nabe ñune chigucha chi kalø marmur cha. ¿Yamba mawa marigwan ñune øyah pagararrumøn chiben, ñibe treeg kørørmisrømmørgøppeh? cha. ¹⁴Ñui an ganaigwan cha, chibig køn. Møyimbe inrrø cha. I srabe martrab kebarrubigwan ñun lataitøwei pagarag køben treeg pagarar cha. ¹⁵¿Nan maig maramdiig køben, naiwane nabe na asha maramig kømuitarru? cha. ¿Kabe na merøgømiig menrra tabig kui ashiptø ñibe pusrkwai ashkuh?” cha.

¹⁶Inchawei møy ya srabe melabeløbe nømmerrig bønrrøben, møy ya nømmerrig bønrrabeløbe srabe melønrrun— cha.

Jesús nui kwamigwan pønmayguen eshka

(Mc 10.32-34; Lc 18.31-34)

¹⁷Jesús yandø Jerusalénsrømay nebib yabe, nui doce kusrenanøb pera uniilan nøørø wama, trenchibig køn:

18—Au, nambe Jerusalénmay nebambub amber cha. Trusrømbe Møg Misra Arrubigwane sacerdotesmeran karubelanba, tru Moisés pørigwan kusrenanøbelanba tranen, truiløbe nune kwanrrai pasrtrun cha. 19Incha nømbe nun indzatø ashib, kurraguchib, kurussyu mesrøb inchai judíos kòmeelan tranrrun cha. Inchen pøn gwalømyube katø øsiirawa kurrønrrun— chibig køn.

**Santiagonba, Juanwanba pinrrø menda purrønnoðsrumugu cha,
Señorwan usri treeg miab
(Mc 10.35-45)**

20Zebedeowei nusrkalai usrimbe nui nusrkaløba Jesúswei merrab chigøsrøn mianrrab, nøbe tømbarøbig køn. 21Inchene Jesúsbe payibig køn:

—¿Chi baløta?— cha.

Inchene nøbe trenchibig køn:

—Ñi ashib karub wainug nai nusrkalan, kanun kusrmay, kanun ñnui atsimay purramisringarurra— cha.

22Inchene Jesúsbe trencha løtabig køn:

—Ñimbe chi miab pønrrermabguen mørmøn cha. ¿Na tru copayu mutsam biwan, kabe ñim muchibsrugueh?— cha.

Inchene nømbe trenchibelø gøn:

—Øø, mutsamønrrun— cha.

23Inchen Jesúsbe trenchibig køn:

—Na mutsim biwane si, ñimbe muchibwei inchun cha. Inchendø tru kusrmayba, atsimayba purrønnamigwane na rranamig kømøn cha. Tru purramibe nai Møskai tru purrønrrabelayasig tamariilaindøwein gøn— cha.

24Inchen tru nui kusrenanøb pera uniilø diezeløbe trunun mørabe, tru pa nunelane namabelø gøn. 25Inchen Jesúsbe nømun wamabe trenchibig køn:

—Ñimguen ashen, judíos kømø misaameran karub purrabeløbe nøm karub tøgagúilane maig købash inchib ke nøm garub purran cha. Inchen truyu møguelø nørreelø nøm garub purrabeløbe mungucha manchinrraingaig karub purrabelø gúi ashchai nømbe kenamaran cha. 26Trune ñimui utube ñimbe øyeelø gømunig køn cha. Treeg købgunrriibe, ñimui utu mas nuikkug købene, katøganelø karuindiig

megamig kòn cha. ²⁷Inchen ñimui utu mòiikkøben ñimmerrig melag købene, katøganelø karuindiig megamig kòn cha.

²⁸Kaguende øyetøwei tru Møg Misra Arrubikken katøganelø nuyasig marøb melønrrai arrumøtø, nøguen katøganelayasig marøb meganrrappa, nø kwaitøga truba nu misagwan purøbagarawa, kaigyugurri wesranrrappa arrig kòn— chibig kòn.

Pailø kabgailan Jesús tamarøb

(Mc 10.46-52; Lc 18.35-43)

²⁹Nøm Jericógurri webamba ambene, misaamerabe truba nu wendautø ambubelø gøn. ³⁰Inchen pailø kabgailø may menda purrøwabe, Jesús purayai mørøppe, trenchib trashibelø gøn:

—iNamun lastima ashcha chib, merrabsrø Davidwei Nusrkai!—

³¹Inchen misaamerabe niløtø burrønrrai namingucha, nømbe mas mur trashib trenchibelø gøn:

—iSeñor, namun lastima ashcha chib, Davidwei Nusrkai!—

³²Inchen Jesúsbe pasramisra, kabgailan wamabe, trencha payibig kòn:

—¿Ñimuyasig na chi maramig baløta?— cha.

³³Inchene nømbe trenchibelø gøn:

—Señor, namune namui kabmera ashibig misrimbe gøtan— cha.

³⁴Inchen Jesúsbe nømun lastima asha, nømui kabmeran katørabene, tru urastø kabgailøbe ashibelø misra, Jesúswei mendig ambubelø gøn.

Jesús Jerusalénsrø kebib

(Mc 11.1-11; Lc 19.28-40; Jn 12.12-19)

21 ¹Yandø Jerusalénsrø chab pub amba, Betfagé pueblo tru Olivos Tunsrø chab puabe, Jesúsbe nui kusrenanøb pera uniilø pailan ²trenchib karua ørøbig kòn:

—Ø pinrrøguesrø yamera tsitsø bønrrabsrømay ambay cha.

Trusrømbe pubyutø kan burra, burro-unøzhig peraig, litsig wetørranrrun cha. Incha picha, srua amrrunrrigay cha naimay.

³Inchippa mòiikkøben chigøben chibene, øyah chinrrigay chibig kòn: “Señor palai indan” cha. Inchen truipe pebrrun— cha.

⁴Øyeeg pureppe, Tius maig karuigwan eshkabig maig taig treeg nebunrrain gúig kòn, tru øyah chib pørig:

⁵ Sion ciudayuelan øyah chib eshkau cha:

“Asay chib, ñimui Rey ñimuimay arruppe,
chigucha chi nuig kómíig lataig kan burroyu,
burro-unøyu itøguana arrun daig, kan carga nigab animal
lluig unøyu.”

⁶ Inchen nui kusrenanøb pera uniiløbe Jesús maig karuigwan treeg mara, ⁷ burran unanbañau srua amrrua, nømbe nømui kewagúilan burranba, unanba kayen, Jesúsbe itøguanabig køn. ⁸ Inchen misag truba nu basrabiibe møyiløbe nømui kewagúilandøwei maywan kayen, møyiløbe kullag srarcheelø lutiicha kayibelø køn. ⁹ Inchen merrab amrrubelø lata, wendau amrrubelø lata, øyah chib trashib amrrubelø køn:

“iRey Davidwei Nusrkai Hosanna! chib.

iSeñor Tiuswei munchiyu nø ørig arrubiibe mayanguen tab
gúig køn! chib.

iSrømbalasrømbe Hosanna!” chib.

¹⁰ Jesús Jerusalénsrø kebibene, maya misaamera ke chi indi asamgaig inchib, møyiløgøben trenchib payibelø køn:

—¿Iibe mu gøh?— chib.

¹¹ Inchen tru nu misag sötøbe trenchibelø køn:

—Iibe Tius maig karuigwan eshkabig Jesús Galilea birau nazaretsriig køn— cha.

Jesús Tiuswei yawan chish marøb

(Mc 11.15-19; Lc 19.45-48; Jn 2.13-22)

¹² Jesús Tiuswei yau kebya, truyu mayeelø yanøb, penab inchib warabelan sötøba wambig webetabig køn. Katø misagwan an yunømarøbelai mishatsiimeran utsøbetab, palomasmera yanøbelø purraigwan utsøbetab inchibig køn. ¹³ Incha trenchibig køn:

—Tiuswei wamwan pørigube trenchibig køn cha: “Nai tab yabe Tiuswan wamindi ya gøn cha, trencha wamig kønrrun” cha. Trune ñimbe nileelø warain rrab marin gøn— cha.

¹⁴ Inchen tru Tiuswei yau kabgailø gøben, cojosmera gøben Jesúswan kemallen, nøbe tamarøbig køn. ¹⁵ Inchen sacerdotesmeran karubeløba, Moisés pørigwan kusrenanøbeløba Jesúswei tru purø nørreelø mariilan ashib katø Tiuswei yau shush ureemera: “iRey Davidwei Nusrkai Hosanna!” chib trasai mørabe, truba namabelø køn. ¹⁶ Incha Jesúswan trenchibelø køn:

—¿Iilø øyeeg chib gøben mørtirru?— cha.



San Mateo 21.12

Inchene Jesúsbe trenchibig kòn:

—Øø, mørar cha. ¿Ñimgan Tiuswei wamwan pørigu iig øyeeg chibigwan managuen lemeelø gøtirru? cha:

Pitsø muchib shush ureemeran gøben, katø nørø ureemeran gøben
ñun newan tabzhig waminchai, ñi Tius treeg marin gøn
daigwan.—

¹⁷Incha nømun pønrramnetø, ciudayugurri webya,
Betaniasrømay yabe, trusrø kørømisrøbig kòn.

Higuera tusr mamig niimígwán Jesús kaig nebunrrai wamab
(Mc 11.12-14, 20-26)

¹⁸Incha løtsø katø ciudayumay arruabe, Jesúsbe parøgwai
mørøbig kòn. ¹⁹Incha kan higuera tusr may bulu pasrai asha,
kemallabe, tru higuera tusrbe ka ishiitø tøgaig kui ashabe, Jesúsbe
tru hignerane trenchibig kòn:

—iMøingurrimbe yandø managucha mas mamig niimubash!— cha.

Inchen tru urastø higerabe mul-laptinchibig køn. ²⁰Inchen tru chi purayaigwan nui kusrenanøb pera uniiløbe ashabe, truba kwaarøb, Jesúswan trenchib payibelø gøn:

—Higerabe mõi mõi mul-lanrrappe ìmandø indah?— cha.

²¹Inchene Jesúsbe trenchibig køn:

—Pøs nabe ñimun cierton trendamønrrun cha: Ñim ñimui isubigwan Tiusweinuutø pasra tøgagua treeg kòmuptinchaitamab isumubene, na higeran øyeeg mari lataitøguen gømøtø, ñim i tunwanma: “Yugurri mendamisra, maryu kebeñ” chibene, treeg burainrrun cha. ²²Inchawei ñim Tiusba waminchib miappe, chiwandøgucha nõ martraitamab kørewa, miawabe, ñimbe utønrrun— chibig køn.

Jesúswei karumburab karuig mu mandamgaig

(Mc 11.27-33; Lc 20.1-8)

²³Jesús Tiuswei yau kebya, kusrenanøb wamnetø, sacerdotesteran karubeløba, misagwan karubelø kølli misaameraba Jesúswan kemallabe, trencha payibelø gøn:

—¿Ñi mariilane mu garua basriitøgarre margu? cha. ¿Ñi øyeeg maramigwane mu garua basrta?— cha.

²⁴Inchen Jesúsbe lötappe, trenchibig køn:

—Nagucha ñimun kan chigøsrøn payrrab inchar cha. Ñim iigwan lötøbene, trube, nagucha eshkarrumøn chibig køn, iilan mu garuitøga marar cha. ²⁵¿Misagwan Juan piu umbu ulsraibe chugurri arrig køh? cha: ¿Srømbalasrøngurrin gønrrab gøh? Kabe: ¿Møgueløgurrin gønrrab gø chindah?— cha.

Inchen kangurrin gangurri payiyab mendabelø gøn: “ ‘Srømbalasrøngurrin gúig køn’ chibene, nõbe namune trenchinrrun cha: Trube, ‘¿chindimba nune køremøgue?’ cha. ²⁶Katø: ‘Møgueløgurrin gúig køn’, damgawein gøn cha. Kaguende misagwan namune kørig køtan cha. Kaguende ya mayeeløba Juanbe Tius maig karuigwan eshkabig købig kui asha tøgar gøn” cha. ²⁷Trekkurri Jesúswane trencha lötabelø gøn:

—Maig kuindøbeh— cha.

Inchene Jesúsbe trenchibig køn:

—Trube, nagucha eshkamumønrrun cha, iilan na mu garuitøga marigwan.—

Pagatø nusrralø lataitøwein gøn cha, kemesra wamindig

²⁸Jesúsbe payibig køn:

—¿Ñimbe iigwan maig isugue? cha. Kan mөг pagatø nusrkalø tøgagua, kanunmerrig trendan cha: “Nai nusrkai, nai uvas ellgwain rrau mөi kwallchab inrrø” cha. ²⁹Inchene nөbe trencha lөtabig køn cha: “Ig kømөtan” cha. Inchendø nөbe yanayube treeg marmønrrurmab isua mөra, ka yan cha. ³⁰Inchen mөskaimbe katøgan nusrkaweimay yabe, katø treetøwein chiben, nusrkaimbe: “Øø, Papa, na inrrur” chibendø, imøn cha. ³¹Trube, tru i pa nusrkaløyu mөskai maig maringaruigwan ìmөig marerah?—chiben, nөmbe:

—Tru srøsrø garuinab nusrkai— chibelø gøn.

Inchen Jesúsbe trenchibig køn:

—Pøs nabe ñimun cierton trendamønrrun cha: Romasreelayasig an utabeløba, ishumburmera asrwan anwei yanøbeløba Tius nө ashib karub waisrөmbe nөmmerikken kebamrrun cha, ñimguen kebammөwatø. ³²Kaguende Juan Bautistabe sølgandø tabig mandø amөнamigwan kusrenanrrab arruben, ñimbe køremuig køn cha. Trune tru an utabeløba, tru ishumbur an bagarwei trөmbөig marөptø warabeløba, truiløguen køreig køn cha. Trune ñimbe iilan kerrigu ashendø, kørenrrab isua mөrmuig køn chibig køn.

Kwallibelø larrø gailan kemesra wamindig

(Mc 12.1-12; Lc 20.9-19)

³³Incha mөray, chibig køn, katøgan ‘өyeeg lataitøwein gøn’ cha, kemesra wamindigwan. Kan mөг pirø buaig uvas tra mara, trugurrimbe panig basra, uvas piwan chu wesrumigwan truyu tamara basra, incha tru ellmarigwan ashib laramig kan ya-unø palaig mara basran chibig køn. Incha nui pirөwan katөгanelan misrigwan pirishinrraptø kwallchai tranabe, yabsrөmay yan cha.

³⁴Incha yandø tru mamig misrigwan lurramig luturauben, mөilan gөsrøn nui karuindiig melabelan tru nuimburabigwan tru kwallchab utabelan mianrrab øriibe, ³⁵tru kwallibeløbe karua øriilan merrarrowa, kanune kurraguchib, kanune kweechib, kanune sruutøga petab inchibelø gøn cha. ³⁶Inchen tru pirø buaibe srøsrø lataguen gөmө, katøbe karuindiig melabelan mas yam øren, tru kwallibeløbe søteelanba treetøweih maran cha.

³⁷Incha yandø trugurrimbe nui trag nusrkawan ørөbig køn cha, treeg isub: “Nai nusrkawane chinchimønrrun” cha. ³⁸Treendingucha

tru kwallibeløbe nusrkawan ashippe, nōmdø trenchibelø gøn:

“Pirøwan ketig utōnrrabiibe iigwein gøn cha. Kwetchab amun chibelø gøn, nuimburab nō utamigwan nam dōga gōrrōmisrtrab” cha. ³⁹Incha merrarrawa, uvas traugurri wegucha, nune kweechibelø gøn cha.

⁴⁰Mōimbe, trube, ðtru uvas tra buaig arruabe, tru kwallibelane chi marttrerah?— chibig kōn.

⁴¹Inchene nōmbe trenchibelø gøn:

—Tru larrø gailane treetøwei kaig mara kwetchun cha. Incha tru uvas trawane gatōgan mendailan tranrrun cha, lurrimørig nuimburabigwan tranrrai.—

⁴²Inchene Jesúsbe trenchibig kōn:

—ðÑimgan Tiuswei wamwan pørigu øyeeg chibigwan managuen lemeelø gōtirru? cha:

Ya marøbelø kaasig sruube

katsiisrø pølbasa wayamig mas purø tab srukken misrin
gøn daigwan.

Señor Tius øyeeg marene,

namuin gabyube truba tabig asōnatan cha.

⁴³Inchawei nabe ñimune trenchar: Tius nō ashīb karub waigwane ñimune kerrawa, katōgan peg misaameran Tius tranrrun cha, ellmarig maig misrtrabig kōben, treeg ellmarig misrtrabelan.

⁴⁴Inchen mōikkōben tru srug bala beñippe, pitis misrtrun cha. Inchen tru srug muim bala gōben peñippe, nune usrø tuindø martrun— chibig kōn.

⁴⁵Inchen tru sacerdotsmeran karubeløba, fariseosmeraba tru ‘øyeeg lataitøwein gøn’ chib Jesús eshkab wamindiilan mōrabe, nōmun guemesra wamindin gúi wetøgørrabelø gøn. ⁴⁶Incha Jesúswan merrarranrrab inchendø, misag sōtōwan kōriimatabelø gøn, kaguende misaamerabe Jesúswane Tius maig karuigwan eshkabig kui treeg tōgagōben.

**Kasharab yaumay linchab amrrunrrai eshkai lataitøwein gøn
cha, kemesra wamindig**

(Lc 14.15-24)

22 ¹Katø Jesúsbe nōmun ‘øyeeg lataitøwein gøn’ cha, kemesra kusrenaniilan waminchib mendappe trenchibig kōn:

²—Srømbalasrø Tius nō ashīb karub waibe øyeeg lataig kōn cha. Kan rey nui nusrkai kasharaben fiesta marøbig lataikke.

³Incha nui karuindiig melabelan novios yaumay lynchunrrigay cha eshkailan wamønrrab øriibe, tru lynchab amrrunrrai eshkailøbe amrrug kømui indin gøn cha. ⁴Inchen nui karuindiig melabelan katøganelan katøyug trencha karua ørøbig køn: “Nai tsal-lanin toromeran kweetsingarua mamigwane yandø chab tamaraguen war cha, mømimbe si yandø kerrigu ke chab tamarikken bønrran cha, novios yaumay lynchubash tan” chinrrai. ⁵Trune tru lynchai eshkailøbe cuentaguen marmø, møykkørønbe nui trausrømay iben, katøgane penab, yanøb inchab ibig køn cha. ⁶Inchen katøganeløbe tru reywei karua øriilan merrarrowa, truba kaig marøb kurrabetab gøptø kweechibelø gøn cha. ⁷Inchen reybe truba namaptø, tru kweechibelane nui suldaumeran truilane kweetsingarua, nømui pueblone parringarun cha.

⁸Incha nui karuindiig melabelane trendan cha: “Isa gømø, tru noviosmerai fiesta maramibe chab tamarig bønrrøben, tru lynchab amrrunrrai eshkailøbe treegube lynchabgailø gúig kua, amrrumuig køn cha. ⁹Incha mas nørø callesmerawan amba, mun wetørrabashtø novios yaumay lynchab amrrunrrai eshkanrrigay” tan cha. ¹⁰Inchen tru karuindiig melabeløbe callesmerawan webamba, mun wetørrabashtø tulundzunabelø gøn, tabelan gøben, kailan gøbengue. Inchen kasharabelø purrai salayube igatø! misaatø netsaptinchibig køn.

¹¹Inchen reybe tru lynchab amrrunrrai eshkailan ashchab kebyabe, kan møg noviosyu lynchab keegwan keweig pasrømui ashabe, trenchiptinchibig køn: ¹²“Au, kasuku, kasharabyu keegwan keweig kømubendøbe, ñibe ¿chinha kebarrugu?” cha. Inchen nøbe ke wamguen binim basramisrøbig køn cha. ¹³Inchen reybe tru mishatsigu ashib pønrrabelane trenchiptindan cha: “Srøbwanba, tasiimeranba lusra, wambig purø rrømbø løstøyu wegutsay cha. Truyube kishib, trugulmeran tsatsamig kønrrun” cha. ¹⁴Kaguende wamiiløbe truba nu gøben, lawa wesruiløbe mamdø gøn— chibig køn.

Tiuswein gønrrabigwane Tiuswan rranøppe, Césarwein gønrrabigwane Césarwan rranøb

(Mc 12.13-17; Lc 20.20-26)

¹⁵Øyeelø chab puraiben, fariseosmerabe nørø mendamisra, nømdø waminchibelø gøn, Jesúswan chigøben payen, kalø

lõtøbene, kebenøsrkønrrab cha. ¹⁶Inchabe mõilan gøsrøn nømui mendig amøñibelanba, Herodesweingateelanba øyah chinrrai ørøbelø gøn:

—Kusrennøbig, ñibe ciertonigwan waminchib møg, Tius maig amøñinrrai karuigwan, isa gømø, trunun treeg kusrenanøb, katø misag maig chitanmaptø mørøb pasrømíig kui ashibelø guer cha. Kaguende ñibe mundøgucha nømun mailø gøtasha kandarøtø imøwei inchibig køn cha. ¹⁷¿Ñune maig købsruerah? cha, namun eshkarra chibelø gøn. ¿Tru Romasrø maya misagwan karub wabigwan nam an pagaramig merig køh, kabe merømuig køh, chinderah?— chinrrai.

¹⁸Inchen Jesúsbe nømun ka kaig martraptø isua inchib pønrrain gúi ashabe, trenchibig køn:

—Ñim palatø tabelø, ¿nane chindimbarre kebenøsrkønrrab inchigue? cha. ¹⁹Tru pagaram anwan eshkarra— chibig køn.

Inchen nømbe kan an srua amrruben, ²⁰Jesúsbe trencha payibig køn:

—¿I anyu maløba, i munchi pøriibabe muin gøh?— cha.

²¹Inchene nømbe trenchibelø gøn:

—Tru Césarwein gøn— cha.

Inchene Jesúsbe trenchiptinchibig køn:

—Inchawei Césarwein gøbene, Césarwan tranay cha. Inchen Tiuswein gøbene, Tiuswan tranay— cha.

²²Inchen iigwan mørabe, kwaara asha gørrømisra, nømbe nune pasramnetø, ambuptinchibelø gøn.

Kwawa katø øsiiramigwan payib

(Mc 12.18-27; Lc 20.27-40)

²³Tru gwalømdøwei kan mõiløgøsrøn saduceosmera Jesúswan ashchab ambubelø gøn, truiløbe tru kwabeløbe øsiiramønrrun chibelø guabe, Jesúswane øyeeg bayibelø gøn:

²⁴—Kusrennøbig, Moisésbe trendaig køn cha: “Møikkøben kan møg urekkaig kwabene, nunebe tru piudan kasharam nebunrrun cha, tru nuneg kwabigweimburab ureg kørrømartrab.” ²⁵Pøs yu namui utuma sieteelø nunelø købig køn cha. Indiiibe srøsriibe kasharawa, urekkaig kwawa, srawane nunewan kørrømaran cha.

²⁶Katø tru wendø nunewan treetøweim buraiben, katø tru wendau nunewan treetøweim buraiben, sieteelanba treetø rreetø buraibig køn

cha. ²⁷Yandø srabebe tru ishukkucha kwan cha. ²⁸¿Pøs treeg købene, tru kwabelø katø øsiirabene, tru maya nunelø tru ishuwan kasharaig kuig køppe, nøbe sieteelai utu møjigwei srain gønrrerah?— chibelø gøn.

²⁹Inchen Jesúsbe trencha løtabig køn:

—Ñimbe mandø gúinguen mormøwa, pella bønrran cha, kaguende Tiuswei wamwan pørigwan lata, Tiuswei maramburab marøbigwan lata nebua ashmeelø gua. ³⁰Kaguende kwailø katøyug øsiirappe, kasharamøwei, kasharanrrab gømøwein gønrrun cha. Treeg kømøtø, srømbalasrø ángelesmera latailøtøwein gønrrun chibig køn. ³¹Inchen tru kwailø øsiiranrrun daigweimburaeppe, ¿ñimgan lemeelø gøtirru? cha, Tius nøtøwei øyah taigwan: ³²“Nabe Abrahamwei Tius, Isaacwei Tius, Jacobwei Tius kur” cha, trendaigwan. Inchawei Tiusbe kwailai Tius kømøtø, øsiguelai Tius køn— chibig køn.

³³Inchen misag truba nu basrabiibe iigwan mørabe, Jesús kusrenanigwan ke kwaara asha gørrømisrøbelø gøn.

Martrai karua pasrig mas nuig

(Mc 12.28-34)

³⁴Fariseosmera tru saduceosmeran Jesús niløtø bønrram wamindin gúi wammørabe, tulundzuna, ³⁵kan møikkøsrøn tru maig maramigwan martrai Moisés pørigwan kusrenanøbiibe Jesús kalø løtøbene kebenøsrkønrrab isua, trencha payibig køn:

³⁶—Kusrennøbig, ¿maig maramigwan martrai Moisés pørigu karua pønrrailø, mas nuibe møjig køh?— cha.

³⁷Inchen Jesúsbe trenchibig køn:

—“Señor ñui Tiuswane ñui manrraugurri kerrigu newan undaaraitøgaba, kerrigu ñui øsig basraitøgaba, kerrigu ñui turtøga isumburab isuitøgaba undaaramig køn, chibig køn” cha.

³⁸Tru maig maramigwan martrai pønrrailøyu, iimerrig køn cha, trurrigu mas nuibe. ³⁹Inchen tru wendauikkucha treeg lataitøwei chibig køn: “Ñima ñiasiitøwei maig undaguig køppe, ñui mendaigwangucha treetøwei undaaramig køn” cha. ⁴⁰Tru maig maramigwan martrai Moisés pørigu kerrigu pønrrabig lata, Tius maig karuigwan eshkabelø kerrigu kusrenaniilø lata i pagatø maig maramigwan martrai pønrrailøyugurri pølbasa amrrubig køn— cha, trenchibig køn.

¿Cristobe mui misagugurri arrubig kerah?*(Mc 12.35-37; Lc 20.41-44)*

⁴¹Inchen fariseosmera tulaamba srø burramnetø, ⁴²Jesúsbe trencha payibig køn:

—¿Ñimbe Cristoimburab maig isugue? cha. ¿Mui misagugurri arritamague?— cha.

Inchen nømbe trenchibelø gøn:

—Davidwei misagugurri arrub nusrkain gøn— cha.

⁴³Inchen Jesúsbe trenchibig køn:

—¿Trube, treeg købene, Davidbe Cristone chindimba Señor tah? cha, nun Espíritu trendingaruben. Kaguende Davidbe trendaig køn:

⁴⁴Señor Tiusbe tru nai Señorwane trendan cha:

“Nai kusrmaygatø wamisr cha,

ñui ashig kømui inchib tsalø inchibelan

ñi itøbunønrrai ñui srøb umbu na pønstramnegatig.”

⁴⁵Cristone Davidbe: “Señor” cha, øyeeg wamøbene, trube, ¿mandøgurri Cristobe Davidwei nusrkain gønrrab gøh?— chiben,

⁴⁶muguen mancha kusrua lötønrrab gaimabelø gøn. Incha tru gwalømgurri mugucha chigøben mas payrrab inchimeelø gøn.

Fariseosmeranba, Moisés pørigwan kusrenanøbelanba Jesús**‘øyeelø gøn’ chib***(Mc 12.38-40; Lc 11.37-54; 20.45-47)*

23 ¹Øyeelø chab puraiben, Jesúsbe misaameranba, nui kusrenanøb pera uniilanba trenchibig køn:

²—Moisés pørigwan kusrenanøbeløba, fariseosmerababe tru Moisés pørigwan øyeeg chibig køn cha eshkab nømui marøb purramibe truig køn cha. ³Inchawei nøm ñimun chi maringaruben, kerrigu møra marøb esegay cha. Inchendø nøm maig marigwane, trunun asha marmønrrigay chibig køn. Kaguende nømbe chigøben tabig martrappe chibendø, peemaytø marøbelø gøn cha. ⁴Incha nømbe tru pørigu mas nemarøb, mutamguenga gwatsiguelø latailø mara, katøganelane kildunyu muta ambub lataitøwei inchai marendø, nømgurrimbe ni tasig-unøtøgaguen kebachig kømui inchibelø gøn cha. ⁵Chiwandøgucha marøppe, misaamera ka ashchайдø marøbelø gøn, cha. Tiuswei wamwan pørigwan kappaløyu gøben, kwalmerayu gøben nørriig kena

melsra amønamig tab gúi inçibelø gøn cha, katø u tulurmera yab srølmera melsra amønamiba. ⁶Lincha tabig mabyugucha nørreelø purrainug purø tabigu purrag kui indamba, judfosmera tulundzuni yamerayube purø tab purramdønug purrag kui indamba inçibelø gøn cha. ⁷Incha misaamerabe penab yanøb indinug nømune purø tabzhig wamønrrai inçibelø gøn cha, trurrigu nømune “Kusrennøbig” cha, wamønrraingue.

⁸Trune ñimbe “Kusrennøbig” cha, wamønrrai inçimumig køn. Kaguende ñimbe soteeløba nunelø latailø gøn. Incha ñimbe kusrennøbiibe kandø tøgær gøn cha. ⁹Katø ñimbe yu piraube mungucha, “Møskain” chimøtay. Kaguende ñimbe Møskaimbe kandø tøgær gøn, trube srømbalasrø wabig. ¹⁰Katø ñimune “Kusrennøbig” cha, wamønrrain gømøwein gúi, kaguende ñimuimbe ashibig mas nuibe Cristo, nøtø gøn. ¹¹Ñimui utu mas nuibe katøganelø karuindiig megamig køn. ¹²Kaguende nøasiitø ‘nuig kurmb’ isubigwane, ka kørig martrun cha. Inchen chigucha gømfiig ‘nuig kurmb’ isumfiigwane ‘i møøbe si, nuig køn’ daig kønrrun, chibig køn.

¹³’iAy, ñim waachamera Moisés pørigwan kusrenanøbeløba, fariseosmeraba, palatø tabelø! Srømbalasrø Tius nø ashib karub wainug kebambam yaskabwan gatøganelø kebammønrrai kasrøb, ni ñimdøweinguen kebammøwei, ni gatøganelø kebambug kui inchen kebambashmøwei inçibelø gøn cha ñimbe.

¹⁴’iAy, ñim waachamera Moisés pørigwan kusrenanøbeløba, fariseosmeraba, palatø tabelø! Pøs ñimbe piudasmeran nømui yameran kerrawabe, tabelø misrøb ke ka yandø truba yana Tiuswan waminçibelø gøn cha. Øyeekkurri ñimbe møra melamig mas nuigwan utanrrun chibig køn.

¹⁵’iAy, ñim waachamera Moisés pørigwan kusrenanøbeløba, fariseosmeraba, palatø tabelø! Pirau lata, maryu lata munabatsø ambubelø gøn cha, kandøguen ñimuingatø purøsrunrrab. Incha yandø ñimuingatø purøsrubae, ñim lataitøguen gømø, purab tabelø chibelø gønrrai mara, truigwane tru managuen kwamø nagu kegutsam unø gønrrai marøbelø gøn cha.

¹⁶’iAy, ñim waachamera chigúinguen ashmeelø gøbendø, katøganelan pera ambubelø! “Møikkøben Tiuswei yawei merrab pasramisra, ‘igatø! marmø gømø, nabe maramønrrun’ daigwan treeg marmuingucha, ñimbe chigucha gømøn chibelø gøn. Inçhendø tru Tiuswei yau oro basrabigwei merrab pasramisra,

‘igatø! marmø gømə, nabe maramønrrun’ daigwan trenchibig, trube, martrab taigwane nune maramig nebunrrun” cha, trenchibelø gøn, ñimbe. ¹⁷ ¡Tontos, chigúinguen ashmeelø! ¿Møimerrig mas nuig kerah? cha. ¿Oroteh? Kabe ¿tru oron Tiusweyasig tabig kørnrai nørø tarømarøbig, Tiuswei yateh?

¹⁸ Katø ñimbe trenchibelø gøn: “Møikkøben, chigøben martrab cha altarwei merrab pasramisra, ‘igatø! marmø gømə, nabe maramønrrun’ daigwan, marmuingucha, chigønrraamøn cha. Inchendø tru altar bala Tiusweyasig trana pasrigwan truigwei merrab pasramisra, ‘igatø! marmø gømə, nabe maramønrrun’ daigwane, nune maramitøwei nebunrrun” cha, trenchibelø gøn. ¹⁹ ¡Chigúinguen ashmeelø! ¿Mas nuibe chigø? ¿Tiuswan traniiteh? Kabe ¿tru Tiusweyasig tranigwan tabig kørnrai nørø tarømarøbig, tru altarteh? ²⁰ Altar merrab pasramisra, ‘igatø! marmø gømə, nabe maramønrrun’ chibiibe, altarwandø ke treeg maramønrrun chimøtø, tru bala chi pønrrabigwangucha kerriguba treeg maramønrrun cha, tøgä rrendan cha. ²¹ Tiuswei yawei munchiyu ‘igatø! marmø gømə, nabe maramønrrun’ chibiibe, tru yawandø gømətø, Tius truyu pasrabigwangucha tøgä rrenchib pasran cha. ²² Inchen srømbalawei munchiyu ‘igatø! marmø gømə, nabe maramønrrun’ chibiibe, purø tabzhig Tius wamisra waigwanba, katø tru tabzhigu wamisra wabigwanba tøgä rrencha basran chibig køn.

²³ ¡Ay, ñim waachamera, Moisés pørigwan kusrenanøbeløba, fariseosmeraba, palatø tabelø! Ñimbe erbabunanba, aniswanba, cominoswanba, truilane Tiusweyasig diezmørig kanzhig, kanzhig wesrawa tranøbelø gøn cha. Inchendø tru maig maramigwan martrai Moisés pørigu kusrennøbig mas nørreelø pønrrabigwane marmø, pinab amban cha, tru sølgandø tabig maramigwanba, lastima ashibelø gømigwanba, isubigwan Tiusweinug pasra tøgagømigwanba. Ñimbe marøppe, iilanwei maramig kuig køn cha, tru diezmørig kan gan wesrawa Tiuswan tranamigwangucha pesannamø, tøgatø marøb. ²⁴ ¡Ñim chigúinguen ashmeelø gøbendø, katøganelan pera ambubelø! Pøløm-unøzhigwane tøgä muchimønrrab larruusra muchendø, camellone kebinab pinan cha.

²⁵ ¡Ay, ñim waachamera Moisés pørigwan kusrenanøbeløba, fariseosmeraba, palatø tabelø! Pasunba, platillonba wambiimaybe pillmabendø, ñimui umbube ñimbe misagwan kwaarøsa kerranrrab isuiløba, chigurrimbunø tøgagønrrab parø isuiløba,

trutø netsailø gøn cha. ²⁶iFariseo chigúinguen ashmíg! Pasun umbumaymerrig chish mar cha, wambiimaygucha chishig korrømisrtrai.

²⁷iAy, ñim waachamera Moisés pørigwan kusrenanøbeløba, fariseosmeraba, palatø tabelø! Kwaig sörin rrabmera wambiimaybe puløzhig pisig latailø tabzhig latailø gøbendø, umbumaybe kwabelain tsutsiimerabah, chigøben køsongønrraptiibatø netsailø, ñimbe tre latailø gøn cha. ²⁸Ñimbe øyeeg latailø gøn: Misaamerai merrappe sølgandø tabelø lataig asønabendø, wambiimay maig køben treegwein gømøtø, umbumaybe isatø tabig lataig indiiløbah, larrø gaibatø netsailø gøn cha ñimbe.

²⁹iAy, ñim waachamera Moisés pørigwan kusrenanøbeløba, fariseosmeraba, palatø tabelø! Tius maig karuigwan eshkabelai söriløyu ñimbe tamara pønørøb, sølgandø tabig amøñibelan sörim bala tabzhig tamarøb inçhibelø gøn cha. ³⁰Inçhabe ñimbe trenchibelø gøn: “Namui merrabsreelø warab uras nam warabelø gúig kuimbe, Tius maig karuigwan eshkabelan kweechib ani lushib nomba tøgatø marøb pønrrømubsrubrainrrun” cha. ³¹Pøs øyeeg taikkurri ñimbe Tius maig karuigwan eshkabelan kweechibelainukkurri amrrub misaamera guer cha ñimðweinguen wamindan cha. ³²Inçhawei ñimui merrabsreelø pølbasa marig købigwane, trube, ñimbe patsøga basray chibig køn.

³³iUlmera latailø, ñim namig ulmera latailainukkurri karrab misaamera! Inçhawei ñimbe tru møra melamnug kebusriilø gømønrrab ¿chinchawegørrønrrague? cha. ³⁴Inçhawei asay chibig køn. Nabe Tius maig karuigwan eshkabelø gøben, nørø gusrebelø gøben, Moisés pørigwan kusrennøbelø gøben ñimuimay øren, møilan gøben ñimbe truilane kweechib, kurussyu melsrøb inçhun cha. Katø judíosmera tulundzuni yamerayu maig købash marøb ichabetab, pueblosmørig chu amben, chu amben, ñimbe pasraørøb wendautø amrrun cha. ³⁵Øyeekkurri tru sølgandø tabig amøñibelan kweetsiilai ani mayamba pirau lusiibe ñimuim bala gønrrun cha, tru Abel sølgandø tabigwei ani lusikkurrimbunø, Berequíaswei nusrkai Zacarías tru altarba, santuarioba pønrrabnug, tru tøbøtag pasrøben, ñim kweecha, truigwei ani lusigwangatig. ³⁶Pøs nabe ñimun cierton trendamønrrun: Kerrigu øyeeg marikkurri Tiusbe møi ya misagwan ulø bayrrun cha.

Jesús Jerusalénwan isua kishib*(Lc 13.34-35)*

³⁷iJerusalén! iJerusalén! iTius maig karuigwan eshkabelan kweechibig, katø ñimuyasig Tius karua øriilan sruutøga petabig! iNabe yamba, kan biejetø gømmø, kan atøwall nui pullichu-uregwan kwaldzarig umbu kanbalatø mara, maatanab lataitøwei ñui uregwan tulundzunørrab inchen, ñibe nane kaasig køn! cha. ³⁸Au, ñim waraig yamerabe elatsig muguchagaig kørrømisrtrun cha. ³⁹Kaguende nabe trendamønrrun chibig køn: Nane gatøbe mas ashchaamøn cha, øya tamnegatig: “iSeñorwei munchiyu nø ørig arrubiibe mayanguen tab gúig køn!” cha.—

Jesús Tiuswei yawan pinisaig kønrrun chib*(Mc 13.1-2; Lc 21.5-6)*

24 ¹Jesús Tiuswei yaugurri webya iben, nui kusrenanøb pera uniiløbe nun kemallibelø gøn, tru Tiuswei yau yameran eshkanrrab. ²Inchene Jesúsbe nømune trenchibig køn: —¿Iilan kerrigu ashke? cha. Pøs nabe ñimun cierton trendamønrrun cha: Yube ni kan srukken katøgan srug balabe kørrømisrmønrrun cha. Kerriguba pøtiitsig kønrrun— cha.

Chigurrimbunø købig misaabañau patsam lutau chigøben køb*(Mc 13.3-23; Lc 21.7-24; 17.22-24)*

³Incha Jesús Olivos Tunsrø wabene, nui kusrenanøb pera uniiløbe nundø nøørø trencha payrrab kemallabe trenchibelø gøn: —Øyeebe mana burainrrab gúi namun eshkarra cha. Katø ñi katøle arrumigwanba, yandø srabe gwaløm punrrabigwanba asamibe ¿chitø guenamistrerah?— cha.

⁴Inchene Jesúsbe trencha løtabig køn:

—Ashiptø guy cha, mugøben ñimun peløsrkønrrain gømmø.

⁵Kaguende møiløgøben nai munchiyu truba nu amrrua trenchinrrun cha: “Nabe Cristo gur” chib. Trumay misaameran isa wamincha, truba nu peløsrkønrrun cha. ⁶Incha ‘misaamera gatøgan peesrø misaameraba purø rrømbøig kørig kømdiig kwayab kweetsiyab gøn’ chib, katø ‘purø rrømbøig kørig kømdiig kwayanrrab gøn’ chib ñim wamindi mørabe, mandøguen gømui inchib kwarmøtay cha. Kaguende øyeebe trendø treeg

purainrrabigwein gòn cha. Inchendø gatøgucha patsamibe pumø srø gønrrun chibig kòn. ⁷Peg misaamerabe katøgan peg misaameraba kwayaben, katø rey karumburab ashib karuim biraueløbe katøgan reywei misaameraba kwayanrrun cha. Trune parø arruben, chusrøn gøben pirø trømbøig kònørrun cha. ⁸Inchendø kerrigu øyeeg pureb arrubiibe kan ishuwan unø tammisrtrab pusrkwab pølbasri lataitø gønrrun cha.

⁹Inchen ñimune maig købash inchib kaig marøb srua gønrrai tranen, ñimune kwetchun. Katø chu birauelø gøben maya misaamerabe nagurrindø ñimun tsalø asiilø gønrrun cha. ¹⁰Inchen tru gwalømmerawane møiløgøben truba nu nan tarømisra, kangurrin gangurri tsalø inchibelai tasku pønsrøb, kangurrin gangurri ashig kømui indiyab inchun chibig kòn. ¹¹‘Tius maig karuigwan eshkabelø guer’ chib isatø eshkabelø truba rruba kurra, isatø misagwan truba nu peløsrkønrrun cha. ¹²Kaibe purø rrømbøig larrøbichib arruptø, misaamerabe kerrigu lutau kangurrin gangurri katøganelan isua undaaramigwane yandø isumønrrun cha. ¹³Inchen srabe gwalømgatig chigúingucha megabig megabiibe kebeñchabig kømíig kaigyugurri wesraig kònrrun cha. ¹⁴Tius nø ashib karub waigwei tabig srø wambe yu pirau pirø muba kuimbura chi misaamerandøgucha eshka kusrenanig kønrrun, chigúi nebua ashchai misaamera. Inchen yandø srabe gwaløm punrrun chibig kòn

¹⁵‘Inchawei Tius maig karuigwan eshkabig Daniel wamindig tru pinishinrrabig trømbøig køsøngønrraptiig Tiusweyasiitø marinug marøb pasramisrin gúi ashabe, (lebiibe iigwan tab chigúi mør), ¹⁶yandø treeg bubene, Judea birau warabeløbe tunmerasrømay wegørra lulay. ¹⁷Katø nui ya bala wambig wabiibe kørraarra chigucha wesranrrab kebimumig kòn. ¹⁸Katø chugøben trausrø uñibiibe nui itøtsinigwan tranrrab arrumumig kòn. ¹⁹Ishumbur waachamera, tru gwalømmerawan patsø gwanrreelø, kabe muchib ureg tøgarmearaimbe maig kønrrer! chibig kòn. ²⁰Ñimbe Tiuswan miay cha, pishin gwalømmerawan wegørra lulamig nebumøwei, katø isrin gwaløm nebumøwei inchain cha. ²¹Kaguende tru gwalømmerawane purø rrømbøig nebuinab melamig attrun. Pirøwan pølbasra marøb uraskurri møingatig øyeebe kaagúig, katøbe managuen øyeebe kaanrrun chibig kòn. ²²Tius tru gwalømmerawan landøranmuisruandøbe, mugucha øsig

waramgaig kønrrun cha. Inchendø tru nuyasiitø tarø mariiløgurri landøranrrun cha.

**Ka isatø ‘Cristo guer’ chibeløba, ‘Tius maig
karuigwan eshkabelø guer’ chibeløba**

23^oIncha mōikkōben ñimun: “Au, Cristo yu pasran” chib, kabe: “Au, Cristo uyu pasran”, daingucha, køremøtay. 24Kaguende mōilōgōben ‘Cristo guer’ chib isatø inchibeløba, katø, ‘Tius maig karuigwan eshkabelø guer’ chib isatø inchibeløba amrrunrrun cha. Incha nōmui maramburab mariilø truba nørreelø asha gōmig kenamariiløba, kwaara asha gōnrrai nørreelø mariiløba martrun cha, misagwan treeg incha pelōsrkōnrrab. Incha Tius nuyasiitø tarø mariilanguen kegōrrōsrkamdiig kuimbe, kegōrrōskōnrrab inchun. 25Au, nabe ñimune øyeelø puraimōwatø chab eshkar. 26Inchawei ñimun mōikkōben: “Au, øsrø mu misag warab waraimōnug pasran” chibene, ashchab webammøtay cha. Kabe: “Yu yaambusrø wan”, daingucha, køremøtay cha. 27Kaguende kan palaig bilabig wagurri walli umbusrø kebilab lataitøwei, tru Møg Misra Arrubig arruppe, treeg attrun chibig køn. 28Kwaig chu tsubene, truyube kallinasumera tulundzunōnrrun cha.

Møg Misra Arrubig mandø arrumigwan waminchib

(Mc 13.24-37; Lc 17.26-30, 34-36; 21.25-33)

29^oInchen tru treeg isumdø gwalōmmera chab puraiben latatø, nōsiibe yandø kwaben,
pōlbe yandø pilōmuben,
estrellamerabe srōmbalasrōngurri kōrrōben,
katø srōmbalasrø purø nørreelø pōnrrabelane kōnōgōb
sruagutsiilø gōnrrun chibig køn.

30^oInchen Møg Misra Arrubig tru arrumigwan eshkabig srōmbalasrø kenamisren, chu birausrōn gōben misag nōrrō pōnrrabelø truba rruba isub kishchun cha. Inchen Møg Misra Arrubiibe maramburab maramig tōgaig srōmbalasrōngurri purø nuig tōrguegwalmabig wañiyu arruben ashchab gōn, chibig køn. 31Inchen trompetan truba mur urrōben, nōbe nui ángelesmeran amrrai ørtrun chibig køn, ambugurri, igurri, walligurri, wagurri, srōmbalasrø kandarōmaysrōngurri katōgandarōmaysrōngatig nui lawa wesruilan kanbalatø tulishinrrai.

³²Kan higuera tusrwanma asha kusrey. Nui srarmera uturcheelø misrøb, ishiimera weguchene, ñimbe pachig kwalømmerra arrumig yandø lutau gúi ashibelø gøn cha. ³³Øyeetøwei ñim kerrigu iilan ashabe, attrabiibe attrab yaskabuguen basraitamab isua guy, chibig køn. ³⁴Pøs nabe ñimun cierton trendamønrrun: Møin gwaløm misaamera pinømøwatø, øyeeløbe kerrigu purainrrun cha. ³⁵Srømbalaba, pirøbabe patsøben, na wamindiibe ka wamindiitøbe purainrraamøn cha.

³⁶Inchen tru treeg punrrab gwalømwana, uranbabe mugucha ashmøn cha. Srømbalasrø ángelesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskaindøwei asan chibig køn. ³⁷Noé tsub gwalømmerawan maig purayaibe tru Møg Misra Arrubig katø arrum gwalømgucha treetøwei purainrrun cha. ³⁸Kaguende tru gwalømmerawan sre puben pi bulabig attrab srø gøbenbatø, tru urasma misaamerabe mab, muchib, kasharab, kasharanøb waraig købig køn cha, Noé nui truba nu barcoyu kebyam gwalømgatikke. ³⁹Incha treeg pumnegatig øyeeg kønrraitamab isumø warøbenba tru pi bulab arrubiibe maya misagwan patsø srúa yaig købig køn cha. Øyeetøwei purainrrun chibig køn, tru Møg Misra Arrubikkucha katøle arruben. ⁴⁰Incha tru uras pailø møguelø trau warøben, kanune srúa iben, kanune kørrømarig kønrrun cha. ⁴¹Pailø ishumburmera kitsøsrugu kichib gøben, kanune srúa iben, kanune kørrømarig kønrrun chibig køn.

⁴²Ñimbe pesannamø, isua, ashiptø guy. Kaguende ñimui Señor chi gwaløm attrab gúi ashmøwa gøn. ⁴³Trube, treeg købene, iigwan isua guy, kan ya buaima niliig yem chu uras attrab gúi mörimbe, ashib megawa, yau nilønrrab kebibashmubsruinrrun cha. ⁴⁴Inchawei ñimgucha tamara melay chibig køn. Kaguende tru Møg Misra Arrubiibe chi isumø gøbenba arruptinchun cha.

Mendig megabig maig taigwan marøbigwanba, maig taigwan marmíigwanba kemesra wamindig

(Lc 12.41-48)

⁴⁵Kan karuindiig megabig maig taigwan møra marøb, katø chi maramelan nõtø tsabø asha marøbigwan, ya buaig nui yau warabelan mannam ura buin gúindø nømui mamigwan srøttrab muniitø wabig kønrrai ashai wanninabiibe ðmøig kerah? cha. ⁴⁶Truibe mayanguen tab gúig køn nun karua basrigwan

marøb megabenh ya buaig puptindinabigweimbe. ⁴⁷Pøs nabe ñimun cierton trendamønrrun: Ya buaibe nui chi tøgagúigwan kerrigu nõ asha marøb pasrønrrai tranrrun cha. ⁴⁸Inchen karuindiig megabig larrø gaibe nuinetø treeg isubig køn: “Nai ashib karubiibe peguen attraamøn” cha. ⁴⁹Katøgan karuindiig melabelan kurrabetab menda, katø mutsigueløba mab, muchib, tsubenba, ⁵⁰nui ya buaibe ni attraitamab isuinguen gømø gwaløm, ni ø uras punrraitamab isumø tsubenba, puptincha, ⁵¹purø rrømbøig ichagucha, palatø tabelø pønrrainug kertrun cha. Truyube kishib, trugulwan tsatsamig kønrrun chibig køn Jesúsbe.

**Diez srusralmera novian linchab webambubelø
lataitøwein gøn cha, kemesra wamindig**

25 ¹Srømbalasrø Tius nõ ashib karub waibe øyeeg lataig kønrrun: Diez srusralmera mu møøba kimeelø aceite lámparameran piløga muta, tru keg misrtrabigwan linchab katønrrab webambubelø lataikke. ²Truilø tru trattrogatøbe ni chiguen tre isumeelø gøben, katøgan trattrogatøbe tamara isuatø muniitø melabeløgue. ³Tru trattrogatø chi tre isumeeløbe lámparamerane srúa ambendø, aceitebe srúa ammuin gøbig køn, tru patsøben katø usramig. ⁴Trune tru isuptø melabeløbe lámparamerayu usriilø gømnetø, katø usramig nõørø køtsø-ureezhigu srúa ambubelø gøn. ⁵Inchen tru keg misrtrabig peguen arrumubene, nõmune søteelanba yandø ki ganaben, søteeløba kiptindin gøbig køn.

⁶Inchen yem døbøtasrømbe trenchib trasay mōran: “iKeg misrtrabiibe yu arrun cha. Katønrrab amrrab werruy!” chib. ⁷Inchen søteeløba tru srusralmerabe kurra, nõmui lámparameran tamarøb mendabelø gøn. ⁸Inchen tru trattrogatø tre isumeeløbe, tru trattrogatø isuatø melabelane trenchibelø gøn cha: “Ñimui aceiten kuchi namun ketøbsrumugu cha, namui lámparamerabe ke chab gwab amrrun” cha. ⁹Inchen tru srusralmera tamara isuatø melabeløbe trencha lötabelø gøn: “Kaimaysruandøbe cha. Kaguende ñimui lata namui lata nebunrraamøn cha. Trembe yanøbelaisrø penønrrab ambay chibelø gøn, ñimuyasiitøwei.”

¹⁰Inchen tru trattrogatø srusralmera aceiten penønrrab ambamnetø tru keg misrtrabiibe puptinchen, tru trattrogatø isuatø

melabeløbe keg misrtrabiiba kasharab fiestayumay kebamben, yandø yaskabwan kasrøbig køn.

¹¹Inchen yana wendau tru kan srusralmeragucha trenchib pubelø gøn: “iSeñor, Señor, namun yaskabwan kurtra!” chib.

¹²Inchen nøbe trencha løtabig køn: “Pøs nabe isa gømø, ñimune mumera gúi ashmfig kur” cha.

¹³Inchawei ñimbe pesannamø, ashiptø melay chibig køn Jesúsbe. Kaguende tru Møg Misra Arrubig arrumigwane ñimbe chi gwaløm attrab gúi mormøwei, ni chu uras attrab gúi mormøwei indan cha.

Anwan uta øyeeg marøbig lataig køn cha, kemesra wamindig
(Lc 19.11-27)

¹⁴Tius nø ashib karub waibe øyeeg lataig køn cha: Kan møg yabsrømay inrrab, nui karuindiig melabelan wama, nui chi tøgagúilan asha marøb gønrrai trana ib lataikke. ¹⁵Kan møgigwan gøsrønbe an trattro mil rranøppe, møgigwan gøsrønbe pa mil, møgigwan gøsrømbe milgue, møgigwandøgucha nøm maig martrapteelø gøben treeg trana, yandø inrrab yan cha. ¹⁶Tru karuindiig megabig an trattro mil utabiibe trutøga penab, yanøb incha, katøgan trattro mil nemaran cha. ¹⁷Inchen katø tru pa milwan utabikkucha katøgan pa mil nemaran cha. ¹⁸Inchen tru milwan utabiibe pirau kan trab lalla, tru an rranøbigwei anwane truyu søraptindan cha.

¹⁹Indiibe yandø truba yana misrøb iben, tru karuindiig melabelan treeg marøb melønrrai karua basrøbiibe katø arrua, nøm chitø maritashchab wamisra ashib mendan cha. ²⁰Inchen tru an trattro mil utabig puabe, trendan cha: “Nai ashib karubig, ñibe nan trattro mil tranig kømøh cha. Møimbe tru gømnetø nabe katøgan trattro mil nemara, yu srúa arrur” tan cha. ²¹Inchen truiibe trendan cha: “Øyambesin cha, ñi nai karuindiig megabig tabig, chi isumgaig maig maramigwan marøbig. Ñi lamøtiigwanma chi isumgaig øya søl mariibe, mas nuwan martrai pasrtrumøn tan chibig køn. Incha kebarrua, naba truba kasraarau” tan cha.

²²Inchen tru karuindiig megabig pa mil utabiibe trendan cha: “Nai ashib karubig, ñi nan pa mil tranig kømøh cha. Møimbe katøgan pa mil nemara, yu tøgagur” tan cha. ²³Inchen tru an rranøbiibe trendan cha: “Øyambesin cha, ñi nai karuindiig megabig tabig, chi isumgaig maig maramigwan marøbig. Ñi

lamøtiigwanma chi isumgaig øya søl mariibe, mas nuwan martrai pasramønrrun cha, trendan cha. Kebarrua, incha naba truba kasraarau” tan chibig køn.

²⁴Inchen tru mendig megabig tru milwan utabiibe trendan cha: “Nai ashib karubig, ñibe ñiashib ellgwaig kømubendø, ellmarigwan tulishib, ñiashib tsurig kømubendø, parøb, katø ñibe chiwandøgucha chi chippe, ke kandø chibig kui nabe ashibig kuabe, treekkurri nane kørig køben, ²⁵ñui anwan srua ya, pirau sørig køn cha. Inchendø ñui anwan utørra” tan chibig køn. ²⁶Inchene nui ashib karubiibe trendan cha: “Karuindiig megabig larrø gaig, trurrigu pøig køn cha. Pøs naashib ellgwainug kømubendø, ellmarigwan tulishib, naashib tsurinug kømubendø, parøb inchibig kui ashabe, ²⁷trube, maindi nai anwan bancoyu an utabelan pastrai tranamdiigwan dan chibig køn, na katøle arrua, nai anwan nemisrigwanbañau utamig kønrrain cha. ²⁸Inchawei, nai anwan kerrawa, tru an diez mil tøgaiigwan tranay tan. ²⁹Kaguende tøgaiigwane masken rranen, uñchaguen tøgagønrrun cha. Inchen chigaigwane nui lamøtiig tøgagúigwanguen kerranrrun cha. ³⁰Incha i karuindiig megabig chigucha chi marmfiigwane wambig purø rrømbø løstøyu wegutsay tan chibig køn. Truyube kishib, trugulwan tsatsamig kønrrun” cha.

Chu birausrø misaamerandøgucha Tius maig kønrrabigwan asha marøb

³¹Møg Misra Arrubig nui tørguegwalmabigu tru maya ánglesmeraba arrua, wamisra nui ashib karub waig tørguegwalmabigu wamisrtrun. ³²Inchen yu pirau chi misaameratøgucha nui merrab tulundzunøben, nøbe nøørø, nøørø tarømartrun cha, kan ubisha ashibig ubishameranba, kabrameranba nøørø, nøørø tarømarøb lataitøweingue. ³³Incha ubishamerane kusrmay bønørøppe, kabramerane atsimay bønørønrrun.

³⁴Incha Reybe tru kusrmay bønrrabelane trenchinrrun: “Nai Møskai ñimun mayanguen tab indiiløbe naimay amrruy cha. Incha Tius pirøwan marøb uraskurri ñimuyasig tamarig pasrabig tru ashib karub wainuguigwan ñimuyasig utay chinrrun cha.

³⁵Kaguende na parøgwai uñen, ñimbe na manrrai nan srørrig køn

cha. Na pi mulgwai inchen, ñimbe pi mutchai srørrig køn cha. Na arruatiig chugucha pumikkaig uñen, ñimbe tab wamab, ya bebøb indig køn cha. ³⁶Asru chi kemig chigaig uñen, ñimbe nan tranig køn cha. Na kwanrrø tsuben, nan ñimbe ashchab amrruig køn cha. Kailan keeri yau na pasrøben, nan ñimbe neshchab amrruig køn” chinrrun cha.

³⁷Inchen tru sòlgandø tabig marøbeløbe trenchib løtab pønrrønrrun cha: “Señor, ¿ñi parøgwai uñen, nambe mana mamig srørrøb, katø ñi pi mulgwai indi ashabe, nambe pi mutchai mana srørrig køh? cha. ³⁸¿Arruatiig chugucha pumikkaig uñen, nambe ñune tab wamab mana ya bebíg køh? cha. ¿Asru kemig palai uñene, nambe mana rranig køh? cha. ³⁹Kabe ¿kwanrrø tsuben gúi, kailan keeri yau keerig pasrøben gúi, nambe mana neshchab amrrubrah?” chinrrun cha. ⁴⁰Inchen Reybe trencha lètønrrun cha: “Pøs nabe ñimun cierton trendamønrrun cha: I nai nunelan chigucha gømøzheelø latailan mariibe, nan marig køn” cha.

⁴¹Incha gatø atsimay bønrrabelangucha Reybe trenchinrrun cha: “Ñimbe nainukkurri tarømisray cha; kaigyu pønrrønrrai pønrsailøbe, nugwaimandzigweimba, nui ángelesweimba tru managuen kwamø nag tamarig pasrabigumay ambay cha. ⁴²Na parøgwai uñen, ñimbe mamig srørrmuig køn cha. Pi mulgwai inchen, pi mutchai srørrmøwei indig køn cha. ⁴³Na arruatiig chugucha pumikkaig uñen, tab wamab nan ya bebmuig køn cha. Asru chi kemikkaig uñen, ñimbe nan tranmuig køn cha. Na kwanrrø tsub, katø kailan keeri yau na pasrab inchen, ashchab amrrumuig køn” chinrrun cha.

⁴⁴Inchen nømbe trenchib pønrrønrrun cha: “Señor, ñune parøgwai uni ashib, pi mulgwai uni ashib, kabe chugucha pumikkaig uni ashib, asru chi kemikkaig uni ashib, kabe kwanrrø tsui ashib, kailan keeri yau pasrai ashib inchendø, ¿namgan ñun purugumuig kuitarru?” chinrrun cha. ⁴⁵Inchen Reybe trencha lètønrrun chibig køn: “Pøs, nabe ñimun cierton trendamønrrun cha: I nai nunelan chigucha gømøzheelø latailan ñim chigucha marmuibe, nan rreeg marmuig køn cha. ⁴⁶Iiløbe managatig purø rrømbøig mōra melamnuumay tarømisra amrrun cha. Inchen tru sòlgandø tabeløbe managatig øsig purramsrømay amrrun” chinrrun— cha, trenchibig køn Jesúsbe.

Jesúswan kemøra kwetchab waminchib*(Mc 14.1-2; Lc 22.1-2; Jn 11.45-53)*

26 ¹Jesús iilan kerrigu chab waminchabe nui kusrenanøb
pera uniilan trenchibig køn:

²—Ñimguen ashen pa gwalømyube Pascua Fiestan martrab gøn
cha. Inchen tru Møg Misra Arrubiibe kurusu mesraig kønrrai
tranig kønrrun— cha.

³Inchen tru urastøwei sacerdotesmeran karubeløba,
misagwan karubelø kølli misaameraba Caifás, tru
maya sacerdotesmeran nø garub sacerdotei palacioyu
tulundzunabelø gøn. ⁴Incha Jesúswan chinchagøben
tammaytø chi isa gøben kemøra, kwetchab waminchendø,
⁵trenchibelø gøn:

—Fiesta utu marmønrrab cha, misaamera ke chindi asamgaig
inchimønrrain— cha.

Betaniasrø kan ishug may irrabigwan**Jesúswan itølushib***(Mc 14.3-9; Jn 12.1-8)*

⁶Betaniasrø tru Simón leproso taigwei yau Jesús wabene,
⁷kan ishug alabastro limetayu truba may irrabig netsiig
truba nuweyigwan srúa, kemalla, Jesús mishatsigu wamnetø,
tru may irrabigwan tur bala itølushibig køn. ⁸Inchen nui
kusrenanøb pera uniiløbe ashabe, ishuwan trenchib namabelø
gøn:

—¿Ke ka yandøbe iigwane chinchabrre lushibig køh? cha.

⁹Waachameran purugumig purø nuwei yanøbsruinrrun— cha.

¹⁰Inchen Jesús wetøbeñabe, trenchibig køn:

—¿Ishuwane chi chibrren burrøgue? cha. Pøs iig nan mariibe
truba tabig maran chibig køn. ¹¹Kaguende waachamerane
chu uragucha ñimui utu tøgagønrrun cha. Trune nane treeg
kønrraamøn cha. ¹²Ishug tru may irrabigwan nan asru itølusiibe
nan søramigweyasig tamaran cha. ¹³Pøs nabe ñimun cierton
trendamønrrun: Yu pirau chutøgucha Tiuswei tabig srø wam
kaigyugurri wesrabigwan eshka kusrenaniisrømbe tru nø
marigwangucha tøgga waminchun cha, nun pesannamø, isuig
kønrrain— chibig køn.

Judas Jesúsuan ashig kòmui inçhibelan tranøb

(Mc 14.10-11; Lc 22.3-6)

14Judas, tru Iscariote taig, Jesús doce kusrenanøb pera uniilai utuig, sacerdotesmeran karubelan ashchab yabe, 15trenchibig køn: —¿Jesúsuan ñimui tasku tranene, nane chi rranrrunrrague?— cha. Inchen nømbe an treinta tranøbelø gøn. 16Inchen tru uraskurri Judasbe Jesúsuan mandø incha tranamigwan yandø lab mendabig køn.

Señorwei Pascua mamig

(Mc 14.12-25; Lc 22.7-23; Jn 13.21-30; 1 Co 11.23-26)

17Tru Pirri Levaduragaig Maig Fiesta pølbaserøb gwaløm Jesúswei kusrenanøb pera uniilø nun kemallabe, trencha payibelø gøn:

—¿Pascua mamigwan ñuimbe nambe chu tamaramø?— cha.

18Inchene nøbe trenchibig køn:

—Ciudayu kan møyemay ambabe trenchinrrigay cha:

“Kusrennøbiibe trendan cha: ‘Nai urabe yandø puin gøn’ cha. ‘Pascua maramigwan nai kusrenanøb pera uniiløba ñui yau martrab’ tan”— cha.

19Inchen nui kusrenanøb pera uniiløbe Jesús maig karuigwan mara, tru Pascuan tamarøbelø gøn.

20Inchen yandø yem gøben, nui kusrenanøb pera uniiløba mishatsigu wawa, 21mab wappe, trenchibig køn:

—Pøs nabe ñimun trendamønrrun cha: Ñim møykkøsrøn nan ashig kòmui inçhibelaingatø misra, nan trannrrab gøn— cha.

22Inchen nømbe truba rruba isui incha, kan gan nun payib mendabelø gøn:

—¿Señor, kabe na gøbra chinderah?— chib.

23Inchen Jesúsbe trencha løtabig køn:

—Kan møykkøsrøn pirriwan i nindagutøwei naba kebishibig, truig nan ashig kòmui inçhibelaingatø misra, trannrrautan cha. 24Tru Møg Misra Arrubiibe Tiuswei wamwan pørigu maig pørig basrøben, truwan pureb iben, trune itru møg waacha! tru Møg Misra Arrubigwan ashig kòmui inçhibelan trannrrabigweimburappe, yeekkucha gúita chibig køn, trembe truike kal-lamuig kuinguen søl gøbsruinrrun— cha.

²⁵Inchen tru Judas, tru ashig kòmui inchi belaingatø misra trannrrabiibe:

—¿Kusrennøbig, kabe na gøbra chinderah?— cha payene, Jesúsbe:

—Ñibe sөлwein dan— chibig køn.

Señor nui doce pera uniiløba mab

²⁶Incha mab purrappatø, Jesúsbe pirriwan muta, Tiuswan ‘mayanguen pay’ cha, pirisha, nui kusrenanøb pera uniilan trenchib srørrøbig køn:

—Cha, may cha. Iibe nai asr køn— cha.

²⁷Incha katø copan muta, Tiuswan ‘mayanguen pay’ cha, nòmun trenchib purøørøbig køn:

—Søteeløba i copayuigwan mutsay cha. ²⁸Kaguende iig, nai animbe, Tius tru misagweyasig srø acuerdon mari anin gøn cha. Tru animbe truba nu misagweyasig kaig mariilan ulø baymø pesannaig kønrrai lusig køn cha. ²⁹Incha nabe ñimun trendamønrrun chibig køn: Uvas piwane mas muchimumønrrun cha, nai Møskai nø ashib karub waisrø katøyug ñimba mutsam gwalømgatig.—

Jesús Pedron, nan ‘ashmíig kur’ chinrrautan cha, kanmaytø eshkab

(Mc 14.26-31; Lc 22.31-34; Jn 13.36-38)

³⁰Incha yandø kan himnon chab cantawabe, Olivos Tunsrømay amba, ³¹Jesúsbe trenchibig køn:

—Ñimbe mayeeløba nagurrindø mõi yembe nainug isua pønrraigwan trubishinrrun cha. Kaguende Tiuswei wamwan pørigu øyeeg chibig pørig pasran cha:

Ubisha ashibigwan na kweechen,
ubishamerabe nørøtø chab lulrrun, chibig.

³²Inchendø nabe katøyug øsiirappe, ñimguen ammøwatø, nabe Galileasrømay yamønrrun— chibig køn.

³³Inchen Pedrobe trenchibig køn:

—Mayeeløba ñuinug isua pønrraigwan trubisaingucha, na gúimbe managuen tarømismumønrrun— cha.

³⁴Inchen Jesúsbe nune trenchibig køn:

—Pøs nabe cierton ñun trendamønrrun cha: Mõi yemdøweinguen kallu wamømwatø, ñibe pønmayguen nan ‘ashmíig kur’ chinrrautan— cha.

³⁵Inchen Pedrobe trenchibig kòn:

—Ñiba nan kwamig nebinguen, nabe managuen ñun ‘ashmíg kur’ chimumønrrun— cha.

Inchen mayeeløba nui kusrenanøb pera uniiløgucha treetøwein chibelø gøn.

Jesús Getsemanísrø Tiusba waminchib

(Mc 14.32-42; Lc 22.39-46)

³⁶Incha Jesúsbe nui kusrenanøb pera uniiløba, kanbalø Getsemaní taisrømay ambabe, trenchibig kòn:

—Yu purramisray cha, na øsrø nai Møskaimba waminchab yamne.—

³⁷Incha Pedronba, Zebedeowei nusrkalan pailanba pera yabe, truba isui, ni mumayguen tab gømui inchib menda, ³⁸trenchibig kòn:

—Nai manrraube isubiitø kwabguen ka kwamdiig køtan cha. Ñimbe yutø kørørmisra, naba ñimgucha kimø, purray— chibig kòn.

³⁹Incha Jesúsbe katøguchi ambuurø ya, nui maløwan piraugatig kebachib sraløptinchabe, trenchib Tius Møskaimba waminchibig kòn:

—Nai Møskai, i copan nan tarømartra cha. Inchendø na maig isuig køben, treeg kønrrain gømøtø, ñun maig maramdiig køben, treeg kønrrain— cha.

⁴⁰Incha gatø nui kusrenanøb pera uniilaimay arrua, kib purrai wetørrawabe, Pedrone trenchibig kòn:

—¿Kan uratøguen kimø, naba kasrig burrønrrab gaimatirru? cha.

⁴¹Kimø, Tiusba waminchib purray chibig kòn, chiyugøben kaigyu kegørrømønrrappe. Ñimbe tabigwan martrabwei isuingucha, ñimui asrbe kullaguig kòn— cha.

⁴²Incha katøle Jesús Tius Møskaimba waminchab ya, trenchibig kòn:

—Nai Møskai, i copan na muchimønrrai tarømaramgaig købene, trube, ñun maig maramdiig køben treeg martra— cha.

⁴³Incha katø arruabe, katøguen nui kusrenanøb pera uniilane kiptøweim burrain gúi wetørrabig kòn, kaguende nømui kabmerabe kigøbiitø ke kanain burrowa. ⁴⁴Incha nømun purramnetø katø pønmay gønrrabyu Tius Møskaimba waminchab ya, srøsrø mandø wamindig treetøwein chib waminchibig kòn.

⁴⁵Incha nui kusrenanøb pera uniilaimay arruabe, trenchibig kòn:

—¿Katøgucha ñimgan israb, kib srø warøtirru? cha. Yandø ura pun cha, tru Møg Misra Arrubigwan kaig marøbelai tasku tranamig. ⁴⁶iKurray, chibig køn, amrrab! cha. Nan ashig kømui inchibelaingatø pasramisrøbig nan trannrrab arrubguen indan cha. iAsay!— chibig køn.

Jesúswan kemøra srua ambub

(Mc 14.43-50; Lc 22.47-53; Jn 18.2-11)

⁴⁷Jesús waminchib pasramne, Judas, tru doce kusrenanøb pera uniilai utuibe truba rruba nu misaaba arrubig køn, nømbe espadamera gøben, tsiimera gøben sruargue. Truiløbe sacerdotesmeran karubeløba, misagwan karubelø kølli misaameraba misra, karua øriilø gøbig køn. ⁴⁸Tru Judas Jesúswan ashig kømui inchibelaingatø pasramisrøbiibe nømune: “Merrarramig kuitamab ñim ashchai, na chi señal gøsrøn maren, ashib pønrrønrrigay cha, eshkain gøbig køn. Tru na muchaig, truig kønrrun cha. Kemørtrigay” cha. ⁴⁹Incha Judasbe mõi mõi Jesúsweim bulu kemallib trenchibig køn:

—iKusrennøbig, yandø yem gøn!— cha.

Incha muchabene, ⁵⁰Jesúsbe trenchibig køn:

—Nai trendø lincha uñibig, chi martrab arruabe, mar— cha.

Inchen kaneløbe kemalla, Jesúswan kemøra, sruamrrab merrarrabelø gøn.

⁵¹Inchen møikkøsrøn Jesúsba pasrabiibe espadan wesrub, maya sacerdotesmeran nø garub sacerdotei karuindiig megabigwan kaluwan kelarrab lutiichtinchibig køn. ⁵²Inchen Jesúsbe trenchibig køn:

—Ñui espadane wayinug way cha. Kaguende mutøgucha espadatøga kwayabiibe, espadatøgatøwei kweetsig kønrrun cha. ⁵³Ñi isubgan nai Møskawan miamønrraitamatirru cha. Na miabene, nøbe møindøweinguen ángelesmera muguen nebua muntsamgaig ørøbsruinrrun cha. ⁵⁴Pøs treeg købene, Tiuswei wamwan pørigu øyeeg purainrrun daibe, trube, ¿chinha burainrrab gø?— cha.

⁵⁵Incha tru urastø Jesúsbe misaameran payibig køn:

—¿Chindimbarre ñimbe espadamera gøben, tsiimera gøben sruar werrugue cha, nan kemørtrab, nabe kan niliig kui lata? Nabe kwalømmørig Tiuswei yau kusrennøb waben, ñimbe managuen nane kemørmuig køn chibig køn. ⁵⁶Inchendø iig kerrigu øyeeg

nebuppe, Tius maig karuigwan eshkabelø Tiuswei wamwan pørigu maig taig treeg nebunrrain gúig køn— cha.

Inchen nui kusrenanøb pera uniiløbe nundø elachippa, mayeeløba chab luløptinchibelø gøn.

Jesús tru Setenteelø maig maramigwan asha marøbelai merrab

(Mc 14.53-65; Lc 22.54-55, 63-71; Jn 18.12-14, 19-24)

⁵⁷Incha Jesúswan merrarrabeløbe tru maya sacerdotesmeran nø garub sacerdote Caifáswei yamay nune srua ambubelø gøn, tru Moisés pørigwan kusrenanøbeløba, misagwan karubelø kølli misaameraba tulundzuna pasrainuumay. ⁵⁸Inchen Pedrobe Jesúswei wendau yaptø, yaptø tru maya sacerdotesmeran nø garub sacerdotei ya wambiisrøngatig ya, umbu kebyabe, tru ashchay pønsraig pønrrabeløba wabig køn maig kørørmisrtashchab ashchab.

⁵⁹Inchen sacerdotesmeran karubeløba, tru Setenteelø maig maramigwan asha marøbelø mayeeløbabe Jesúswan kwanrrai pasrtrab møilan gøben 'Jesúsbe kaig maren, nambe ashibwei indig køn' chib isa waminchabelø labendø, ⁶⁰wetørranrrab gaimabelø gøn, møiløgøben 'øyeeg køn' chib, 'øyeeg marøbig køn' chib isa waminchibelø, truba werruppe werrubendø. Yandø truinchib gøptø, pailø werrua, ⁶¹trenchibelø gøn:

—I møøbe øyah taig køn cha: “Nabe Tiuswei yawan pøtiicha, pøn gwalømyutø gatø mara basramønrrun”— cha.

⁶²Inchen tru maya sacerdotesmeran nø garub sacerdote Caifásbe kurra, Jesúswan payibig køn:

—¿Chigucha lètømønrrapteh? cha. ¿Ñune øyeebe chi galø maran charre inchib gøh?— cha.

⁶³Inchen trendaingucha, Jesúsbe chigucha lètømuben, tru maya sacerdotesmeran nø garub sacerdotebe trenchibig køn:

—Øsig wab Tiuswei munchiyu nabe ñun, ñi Cristo Tiuswei Nusrkain guabe, 'truig kur' cha, namun eshkau tamønrrun— cha.

⁶⁴Inchene Jesúsbe trencha lètabig køn:

—Ñitøweinguen chab rrendan cha. Katø nabe ñimune trendamønrrun cha: Møg Misra Arrubiibe tru maramburab marøb Tiuswei kusrmay waben ñim ashib, katø srømbalasrøngurri wañiyu arruben ashib inchun— cha.

⁶⁵Inchen tru maya sacerdotesmeran nø garub sacerdotebe nui kewagúigwandøwei kølsrøb, trenchibig køn:

—I mөөbe Tiuswane purø rrømbøig waman cha. ¿Namun nuimburab waminchabelø mas chiwein gúi palønrrab gø? cha. Ñimdøweinguen Tiuswan tru purø rrømbøig wamab wamindigwan mōran chibig køn. ⁶⁶Incha ññimune maig asønata?— chiben, nømbe trencha løtabelø gøn:

—Kaigwein gøn cha. Kwabash— cha.

⁶⁷Inchen nømbe malau illimbi itøtutamba, kurramba inchen, katøganeløbe pashaguchib ⁶⁸trenchibelø gøn:

—iCristo, mu gurragutsin gúi, namun kelarrab eshkau bøs!— chib.

Pedro Jesúsuan ‘ashmíig kur’ cha isab

(Mc 14.66-72; Lc 22.56-62; Jn 18.15-18, 25-27)

⁶⁹Inchen Pedrobe ya wambig wabene, kan mendig megabig srusrø kemallabe, trenchibig køn:

—Ñigucha galileasriig Jesúsba uñibig kuig kømøh— cha.

⁷⁰Inchen Pedrobe mayelai merrab ‘ashmíig kur’ chib trenchibig køn:

—Ñibe ni chi waminchib pasrainguen mōrmur— cha.

⁷¹Incha yaskabyu Pedro webibene, katøgan srusrø nun ashabe, katøganelan trenchibig køn:

—Øikkucha Nazaretsrø Jesúsba uñibig kuig kømøh— cha.

⁷²Inchene Pedrobe katøygug:

—‘Tiusken ashen, katø nabe isa waminchibgucha basrømur’ chib, trenchibig køn. Nabe tru mōwane ashmíig kur— cha.

⁷³Inchen yanayu truyu purrabeløbe Pedron kemallabe, trenchibelø gøn:

—Isa gømø, ñigucha truilai utuigwein gøn cha.

Waminchibutøguen mōramdiig waminchibig køn— cha.

⁷⁴Inchen Pedrobe:

—‘Na isab pasraig købene, trube, nan chigøben nebunrrappe nebubash chib, Tiusken ashen katø nabe isa waminchibgucha basrømur chibig køn’. Tru mōwane nabe ashmíig kur— chib.

Inchen tru urastø kan kallu wamaptinchen, ⁷⁵Pedrobe Jesús øyah taig kømørramab isuptinchibig køn: “Kalluguen wamømøwatø, ñibe nan pønmayguen ashmíig kur chinrrun”, daigwan. Incha Pedrobe truyugurri webya, truba rruba isuig kishibig køn.

Jesúswan Pilaton tranøb
(Mc 15.1; Lc 23.1-2; Jn 18.28-32)

27 ¹Yandø tør-rraben, sacerdotesmeran karubeløba, misagwan karubelø kølli misaameraba mayeelø Jesúswan kwetchab treeg martrab kandø isua bønrramisrøbelø gøn. ²Inchen nun lusra, srua amba, kubenadur Pilaton tranøbelø gøn.

Judas kwaig

³Judas, tru Jesúswan ashig kømui inchibelaingatø pasramisrøbiibe, Jesúswan kwanrrai pasrig kui ashabe, treeg marmumøtømab, truba rruba isua, sacerdotesmeran karubelanba, misagwan karubelø kølli misaameranba tru an treintan ⁴trenchib katø kebusrøbig køn:

—Nabe kaig marar cha, chi kaig marmø møwan kwanrrai tranøb.—

Inchene nømbe trencha løtabelø gøn:

—Øibe ñuimburab gøn cha, namune trunune manguaasamø— cha.

⁵Inchene Judasbe anwan Tiuswei yau kebetappa, truyugurri webya yabe, naashigu tsi basra, megamisrøppa, kwaptinchibig køn.

⁶Inchen tru sacerdotesmeran karubeløbe tru anwan tulishabe, trenchibelø gøn:

—I anbe yandø ani lushaig kaig an gøn cha, Tiusweyasig an pusrinuube pusrmønrrai, merig køn— cha.

⁷Incha nømbe tru andøga køtsø marøbigwei tulwan penønrrab cha, treeg martrab kandø isua kørømisrøbelø gøn, tru peesrøngurri amrrub misaameran sōramig tōgagønrrab cha. ⁸Inchawei tru pirøbe mōin gwalømgatig “Ani Lusra Tul” cha wamig køn. ⁹Øyamay tru Tius maig karuigwan eshkabig Jeremías øyah taig treeg nebuig køn: “Tru an treinta, tru israelitasmera nune an øya pagaranrrab taig anwan nøm srua bønrramisra, ¹⁰trutøgabe køtsø marøbigwei tulwan penan daig, Señor nan maig karuig køben treeg” taig.

Pilato Jesúswan ‘¿øyeebe maig kø?’ cha payib
(Mc 15.2-5; Lc 23.3-5; Jn 18.33-38)

¹¹Incha Jesúbe yandø kubenadurwei merrab pasrøben, nøbe trencha payibig køn:

—¿Ñigan judíosmerai rey gøtirru?— cha.

Inchen Jesúsbe trenchibig køn:

—Ñitøweinguen chab rrendan— cha.

¹²Inchen sacerdotesmeran karubeløba, misagwan karubelø kølli misaameraba ‘øyeeg køn’ chib, ‘øyeeg marøbig køn’ chib gømne, Jesúsbe chigucha lètómíg køn. ¹³Inchene Pilatobe trencha payibig køn:

—¿Ñun chigøben yeeg chib gømne mormøtirru?— cha.

¹⁴Inchen Jesúsbe ni chi chib gúingucha manchagucha lètømuben, tru kubenadurbe ‘øyeebe maig kermab’ ke kwaara asha gørrømisrøbig køn.

Jesúsuan yandø kwanrrai pasrøb

(Mc 15.6-20; Lc 23.13-25; Jn 18.38-19.16)

¹⁵Tru fiesta gwalømmerawane kubenadurbe kailan keeri yau pønrrabelan misag møyigwan elatchai miaben, trendø treeg marøb elachibig købig køn. ¹⁶Inchen truyu Barrabás taig mayeelø mu gúi asig kailan keerig yau pasrabig køn. ¹⁷Inchen tru nøm tulundzuna gømne, Pilatobe trencha payibig køn:

—¿Ñimbe møyigwan na elatsamig balain gøgue cha, Barrabáswandeh, kabe Jesús tru Cristo taigwandeh?— cha.

¹⁸Kaguende Pilatobe Jesúswane uni ashig kømuptø nun tranin gúi ashibig køn.

¹⁹Inchen Pilatobe nø wamisra karub waigu srø wamnetø, nui sraimbe trenchinrrai eshkawa ørøbig køn: “Ñibe ñuimburappe chigucha marmøta cha, ø mowan sølgandø tabigwane. Kaguende mira yem purø rrømbøig nan piaig køn cha, ø møkkurrindø.”

²⁰Inchen sacerdotesmeran karubeløba, misagwan karubelø kølli misaameraba misaamerane miamne indingarubelø gøn, Barrabáswane elatchai miappe, Jesúswane kweetsingarunrrai.

²¹Incha kubenadurbe katøle payibig køn:

—¿Ñimbe i pailan møyigwan elatsamig palain gøgue?— cha.

Inchene nømbe trenchibelø gøn:

—iBarrabásuan!— cha.

²²Inchen Pilatobe trencha payibig køn:

—¿Jesús, tru Cristo gøn daigwane, nabe mandø indamø?— cha.

Inchene mayeeløba:

—iKurusyu mesraig kønrrain!— chiben,

23Pilatobe trenchibig kòn:

—¿Chindimba øyeeg martreenchigue? cha. ¿Nøbe chi galø marig kø?— cha.

Inchen nømbe masken mur trashibelø gòn:

—iKurusyu mesraig kørnrrain!— chib.

24Inchen Pilatobe mumaygucha yandø chi maramgaig kui asha, trune mas mas trømbøig inchen, pi rranrrab øra, mayeelai malau trenchib tasigwan kinabig kòn:

—Nabe naimburappe i kwanrrabigweimburappe, chi marig kaagøn cha. Iibe ñimuimburab gørrrun— chib.

25Inchen maya misaabe trencha løtabelø gòn:

—Nø kwawa ani lusiibe namuimburappa, namui uregweimburappa gørrrun— cha.

26Inchen yandø Pilatobe Barrabáswan ka inrrai elacha, Jesúswane chab ichagutsingaruabe, kurusyu mesrønrrai tranøbig kòn.

27Incha tru kubenadurwei suldaumerabe tru palacioyu Jesúswan mas umbusrø srua amba, maya suldau sòtø nuim bøtøgatan tulundzunøben, 28Jesúsuan nui kewagúigwan wesrua, kan keeg kørrabig piguiig kørrabig itøguenanøbelø gòn. 29Incha kan kaldiig corona mara, petsøsa, kusrmay taskube kan caña tsig rrana, nui merrab tømboñsrabe, ka indzatø ashib trenchibelø gòn:

—iJudíosmerai Rey, viva!— chib.

30Katø illimbi tutamba, tru cañatøga turbøtø itsamba inchibelø gòn. 31Nun øyeeg marøb ka indzatø ashib srua gøptø, tru kørrabig kenanigwan wesrawa, nuiwan kenanabe, kurusyu mesrønrrab srua ambubelø gòn.

Jesúsuan kurusyu mesrøb

(Mc 15.21-32; Lc 23.26-43; Jn 19.17-27)

32Incha truyugurri webamba amben, kan møg Simón daig cirenesriig arrub pasrain gøben, tru møwane Jesúswei kuruswan ke mutamne incha mutøsrøbelø gòn.

33Incha kanbalø Gólgota tainug pubelø gòn (tru trenchippe, “Calaverasrøn” dainug). 34Incha truyu Jesúsuan vinoba, purø rrømbø møb piba lindisaigwan mutchai yuuløbelø gòn. Inchen Jesúsbe kaizhig muchamørabe, muchimuptinchibig kòn.

³⁵Incha yandø kurusu chab mesrabe, suldaumerabe Jesúswei kewagúilan mu merrarramig kòtashchab suerte guchibelø gòn.

³⁶Inchabe truyu chindashchab ashìb purrabelø gòn. ³⁷Inchen nui tur balabe kan pørig mesrøbelø gòn, chigurrin gwanrrai mesraig kòn cha eshkaibig. Truibe trenchibig pørig købig kòn:

IIBE JUDIOSMERAI TRU REY JESUS KØN

chibig.

³⁸Katø pagatø nileelangucha nòba kurusu melsrøbelø gòn, kanun kusrmay, kanune atsimaygue. ³⁹Inchen truwan puraambubeløbe tsalø wamab, turwandø gònøgøb, ⁴⁰trenchibelø gòn:

—iÑi tru Tiuswei yawan pøtiicha, katø pøn gwalømyutø kusranrrabiibe ñi kwamønrrab ñitøwei chigøben mar! cha. iTiuswei Nusrkain guabe, kurusyugurri pinaamø!— chib.

⁴¹Incha sacerdotsmeran karubeløba, Moisés pørigwan kusrenanøbeløba, misagwan karubelø kølli misaameraba misra, ka indzatø ashìb trenchibelø gòn:

⁴²—Kanelane kaigyugurri wesrubendø, nòasiitøweimbe kaiman cha. Israel misagwei rey guabe, mømimbe kurusyugurri kørraarrubash cha, treenchene, nambe nun køremønrrun chibelø gòn. ⁴³Nòbe igatø! Tiuswandø isun cha. Trube, Tius nun undaguig kuabe, mømimbe nun kwamønrrai marbash cha. Kaguende nòbe: “Tiuswei Nusrkain gur” taig kòn— cha.

⁴⁴Inchen nileelø nòba kurusu melsraig melabeløguen treetøwei nun tøgä tsalø wamabelø gòn.

Jesús kwaig

(Mc 15.33-41; Lc 23.44-49; Jn 19.28-30)

⁴⁵Inchen kwaløm døbøtakkurri maaben las treskatig pirø ørø kerrigu løstiig kørørmisrøbig kòn. ⁴⁶Tre uras Jesúsbe truba mur trashib trenchibig kòn:

—Eli, Eli ìlama sabactani?— cha. (Trenchippe, “Nai Tius, nai Tius ìchindimba nandø elachigu?” chib.)

⁴⁷Inchen møiløgøsrøn truyu pønrrabelø mørabe, trenchibelø gòn:

—Øibe Elíaswan wamøtan— cha.

⁴⁸Inchen mòi mòi nømui utu møikkøsrøn kan ñab esponja lataigwan tranrrab lula, trunun køchiibiyu kebisha, kan caña

tsigu pucha, trunun mutchai trig bulusrongatig nun yuuløbig køn.

⁴⁹Inchene kaneløbe trenchibelø gøn:

—Kagøbasay cha. Inchippa kwamønrrai pinøsrannrab Elías attashchab— cha.

⁵⁰Inchen Jesús katøle mur trashabe, kwaptinchibig køn.

⁵¹Inchen tru urastø Tiuswei yau tru purø tab llensuzhig kelarrab sötø mesraibe pabaliig misrøb palasrøngurri kørrab gølsrøbig køn. Inchen pirøbe mur gønøben, nørro sruumerabe pushen,

⁵²kwabelan sörin rrabmerabe kuren inchibig køn. Inchen Tiuswei tarømari misaamera truba nørro kwabelai asrmeraguen øsiiraig købig køn. ⁵³Inchen Jesús kwawa, yandø katø øsiirabene, nømbe tru sörin rrabmerayugurri webamba, tru Tiuswei tarømari ciuda Jerusalénsrø kebambubelø gøn. Incha misaameran mamdeelandø gømø, guenamisrøbelø gøn.

⁵⁴Inchen tru Roma suldaу cienelan nø garubiiba, truyu Jesúswan chindashchab ashib pønrrabelø katøganeløba pirø gønabigwan gøben, chine purayaigwan gøben ashabe, igatø korig købiitø! ke chinchimmørø inchib trenchibelø gøn:

—Ilsa gømø, iibe Tiuswei Nusrkain gøbwei indin gøn!— cha.

⁵⁵Inchen truyube ishumburmera truba nu yabsrøngurrindø ashib pønrrabelø gøn. Truiløbe Galileasrøngurri Jesúswei mendig amrruar, katø nømbe nun purugub lynchibelø gøbig køn.

⁵⁶Inchen tru ishumburwei utube María Magdalena gøben, katø Santiagoimba, Joséweimba usri María gøben, katø Zebedeowei nusrkalai usrin gøben pønrrabelø gøn.

Jesúswan sörig

(Mc 15.42-47; Lc 23.50-56; Jn 19.38-42)

⁵⁷Yandø yem misren, kan truba pua møg Arimatea birausriig José taig pubig køn, truikkucha Jesúswei mendig uñibig købig. ⁵⁸Truibe Pilatoimay yabe, Jesúswei asrwan miaben, Pilatobe truigwan traningarubig køn. ⁵⁹Inchen Josébe asrwan srua ya, kan lino llensu chishchiitøga kirra, ⁶⁰kan peñayu José tru nuyasig söramig trab lalig srøig pasrabigu wayibig køn. Incha tru trabyu truba nu srugwan merrana, kebambinug kasma basrabe, yandø ibig køn. ⁶¹Inchen María Magdalenaba, katøgan Maríaba sörinug pinrrøgue purrabelø gøn.

Jesúswan sörinug ashib pønrrønrrai pønrrailø

⁶²Inchen katø gwaløm tru isram gwalømweyasig tamarøb gúin gwaløm chab puraiben, katø gwaløm, tru sábado isrin gwalømbe, tru sacerdotesmeran karubeløba, fariseosmeraba kanbalatø misra Pilaton ashchab ambabe, ⁶³trenchibelø gøn:

—Au, namui kubenadur, nambe isua guer cha; tru isa waminchiptiibe øsig uñippatø trendaig køn cha: “Kwawa, pøn gwalømyube katø øsiiramønrrun” cha. ⁶⁴Inchawei treeg købene, ñibe pøn gwalømgatig sörigwan tab ashib tøgagønrrai karu, chibelø gøn. Inchipa nui kusrenanøb pera uniilø yem amrrua, nui asrwan nilabgun cha. Incha misaameran ‘katø øsiirain gøn’ chimønrrai. Treeg burayaisruandøbe si, trube, srørø isa wamindi lataikken gømø, katøbe purø rrømbøig isa wamindig kønrrun— cha.

⁶⁵Inchen Pilatobe trenchibig køn:

—Suldaumera pønrrabelan pera ambay, cha. Ñim maig tamaramdiig køben, treeg tamartrigay— cha.

⁶⁶Incha ambabe, tru sörin rrabwan mu chinchimønrrai may tamarøbelø gøn. Tru kasrøb srugwane kan sello mesrøb, katø truyu suldaumera ashib pønrrønrrai pønrrøb, treeg inchibelø gøn.



San Mateo 27.66

Jesús kwawa katø øsiirab
(Mc 16.1-8; Lc 24.1-12; Jn 20.1-10)

28 ¹Indiibe yandø isrin gwalø m puraiben, tru srø rrune pølbaserb gwalø ullarbatø, María Magdalenaba, katøgan Maríaba tru sörinug ashchab ambubelø gön. ²Inchen mømibe pirø truba mur gönaptinchibig kön, kaguende Señorwei ángel srømbalasrøngurri kørraarruben. Inchabe sörin rrabyu kemalla, tru srug truyu kasrøbigwan wemalsra, tru srug bala wamisrøbig kön. ³Tru ángelbe kan sre bilabig lataig tørbilabzhig købig kön, nui kewagúibe puløzhig kan pulø wañi latazhikke. ⁴Inchen suldaumerabe trunun ashabe, korig købiitø itønab, ke kwailø latailø warambuben, ⁵ángelbe tru ishumburmerane trenchibig kön: —Korig kui inchimøtay cha. Ñimbe tru Jesús kurusu mesraigwan lab gúi, nabe ashar cha. ⁶Yube mu gaagøn cha. Nøbe kwailai utugurri katø øsiirain gön cha, nø maig taig. Nun wayinug ashchab amrruy cha. ⁷Incha mømibe malla ambay chibig kön, nui kusrenanøb pera uniilan øyah chinrrab: “Jesúsbe øsiirawa, Galileasrømay ñimguen ammøwatø, nømerrig inrrun dan chinrrigay cha. Trusrø ñimbe nun ashchun dan” chinrrab. Nabe ñimune yandø chab eshkar— cha, ángelbe trenchibig kön.

Jesús ishumburmeran kenamisrøb

⁸Inchen ishumburmerabe tru sörinukkurri truba kwaariilø webambuppe, webambendø, truba kasrag luløb ambubelø gön, nui kusrenanøb pera uniilan eshkanrrab. ⁹Inchen trunetø Jesúsbe nømun kenamisra, wamaptinchibig kön. Inchen nømbe Jesúsban kemalla, nui srømmeran ira, kóriibala tabig waminchibelø gön. ¹⁰Inchen nøbe trenchibig kön:

—Chi korig kui inchimøtay cha. Nai nunelan Galileasrømay amrrai eshkanrrab ambay chibig kön. Nømbe trusrø nan ashchun— cha.

Maig purayaigwan mørø waminchimønrrai
suldaumeran an nørø pagarab

¹¹Incha ishumburmera ambub gømne, suldaumera møiløgøsrøn tru ashib pønrrabelø ciudayumay ambabe, tru chi purayaigwan sacerdotesmeran karubelan kerriguh eshkabene, ¹²truiløbe

tru misagwan karubelø kølli misaameraba maig maramigwan wamincha korrømisrtrab tulundzunabe, suldaumerane an truba nørø pagaravelø gøn. ¹³Incha:

—Nimbe øya chinrrigay chibelø gøn: “Nam kib waramnetø, nui kusrenanøb pera uniilø amrrua, Jesúswei asrwane nilin gøn” cha. ¹⁴Inchippa kubenadur wammørøb chinchene, trube, trunune nam asamønrrun chibelø gøn. Ñimun chi puraimønrrai.—

¹⁵Inchen suldaumerabe anwan uta, maig karuben treeg marøbelø gøn. Incha øyeeg purayaig køn chib wamindiibe judíosmerai utube møin gwalømgatig wambe larrøbitsig pasrabig køn.

**Jesús nui kusrenanøb pera uniilan martrai purø nuig karua
basrig**

(Mc 16.14-18; Lc 24.36-49; Jn 20.19-23)

¹⁶Inchen tru once kusrenanøb pera uniiløbe Galilea birau tunsrø Jesús eshkainuumay ambubelø gøn. ¹⁷Incha Jesúswan ashippe, køriibala tabig waminchibelø gøn, møiløbe ‘øtruig køh? kabe, øpeg køh? chindermab’ isuatøgucha.

¹⁸Inchen Jesúsbe nømun kemallabe, trenchibig køn:

—Tiusbe srømbalasrø lata, pirau lata chiwandøgucha mu mandamgaig marøb karumigwane nan tranig køn cha.

¹⁹Treeg købene, yu pirau maya misaameran mundøgucha na kusrenanigwan marøb melabelø gønrrai martrab amrrigay cha, Møskaweimba, Nusrkaweimba, Espíritu Santoi munchiyuba misaameran piu umbu ulsrøb. ²⁰Incha na ñimun maig karuigwan kerriguh trunun møra martrai kusrenrrigay chibig køn. Inchen nabe naimburappe kwalømmørig srabe gwalømgatig ñimba pasramønrrun— cha, trenchibig køn Jesúsbe.

San Marcos

**Juan misagwan piu umbu ulsrøbig mu misag warab
waraimønug eshkaab kusrenanøb**

(Mt 3.1-12; Lc 3.1-9, 15-17; Jn 1.19-28)

1 ¹Tiuswei Nusrkai Jesucristoimburab tru tabig srø wambe øyamay pølbasing køn: ²Tru Isaías Tius maig karuigwan eshkaabig maig pørimbala:

Au, nabe nai wam srua inrrabigwan ñui merrab ørar cha, truike ñui maywan tamartrai.

³Mu misag warab waraimøsrø kan wam trenchib trasan chib: “Señorwei maywan tamarøb, nuyasig maymerane ølmarøb inday” tan, chib.

⁴Treekkurri Juan Bautistabe mu misag warab waraimønug kenamisra, misaameran mas kaig marmønrrab isua møra, Tiusweimay llirain gønmab asamig piu umbu ulsrailø gømigwan eshkaab kusrenanøbig køn, kaig mariilan ulø bayamig kømíig pesannailø gønrrai. ⁵Inchen maya misag Judea birausreelø gøben, Jerusalén ciudasreelø gøben nuimay mørtrab amrruabe, nømui kaig mariilan ‘øyeeg marig køn’ chib eshkaabene, truilan Juanbe Jordán biyu piu umbu ulsrøbig køn.

⁶Juan kewagúibe camello isiitøga marig købig køn. Inchen nui pørønaibe kaluswan marig køben, nui mamibe nørrø chapullba, kaambu mielba gøbig køn. ⁷Incha misagwan eshkaab waminchibig køn:

—Nai wendaube gatøgan na lataguen gømø, maramburab marøbig maskenig attrun cha. Trunune nabe nui alpargatisyu tsiwan utsøbasra, pichibguen pitchabgaig kur chibig køn. ⁸Nabe


ñimune pi pinøbulrrai piu umbu ulsrair cha. Trune nøbe ñimun Espíritu Santotøga pinøbulrrun— chibig køn.

Jesús piu umbu ulsraig

(Mt 3.13-17; Lc 3.21-22)

⁹Inchen tru gwalømmerawan Galilea birau, Nazaret puebloyugurri Jesús webiben, nune Jordán biyu Juan piu umbu ulsrøbig køn. ¹⁰Inchen piu umbugurri webarrub latatø, Jesúsbe srømbala kuri ashib, Espíritu Santo nuim bala kan paloma lataig kørraarri ashib inchen, ¹¹Srømbalasrøngurrimbe kan wam treeg mørø waminchib trenchibig køn:

—Ñibe nai Nusrkai undaaraig køn cha. Nabe ñuimburab truba tab guí war— cha.



San Marcos 1.10

Nugwaimandzig Jesúswan chindashchab inchib

(Mt 4.1-11; Lc 4.1-13)

¹²Inchen tru urastø Espíritu Santobe Jesúswan mu misag warab waraimøsørø mõi mõi ingarubig køn. ¹³Inchen Jesúsbe truyu kwalømmerna cuarenta nemisramne tsuben, Satanásbe kebenørskønrrab ke chinetø maringarunrrab inchibig køn. Inchen ángelesmera purugubelø gøn, Jesúsbe namig animalmerai utu tsuben.

Jesús Galilea birau nui chi maramigwan pølbaserø

(Mt 4.12-17; Lc 4.14-15)

¹⁴Juanwan kailan keeri yau keeri wendø, Jesúsbe Tiusweimburab tabig srø wamwan Galilea birausrø eshkab kusrenanøb ya, ¹⁵trenchibig køn:

—Yandø øyeeg kønrrabig puben, Tius nø ashib karub pasraibe lutau basran cha. Ñimui kaig mariilan isua møra, Tiusweimay llirab, tabig srø wamwan kørey— cha.

Jesús pibgatø peskabelan nui mendig amrrunrrai wamab

(Mt 4.18-22; Lc 5.1-11)

¹⁶Jesús Galilea nu bisu mendawan ib pasrøwabe, Simónwanba, nuneg Andréswanba, truiløbe peskabelø gua, nømui atarrayameran pisuyu keguchib warai ashibig køn. ¹⁷Inchabe Jesúsbe trenchibig køn:

—Nai mendig amrruy cha. Nabe ñimune misaameran peskabelø gønrrai maramønrrun— cha.

¹⁸Inchen nømbe mõi mõi nømui atarrayameran waramnetø Jesúswei mendig ambubelø gøn.

¹⁹Inchen Jesúsbe katøguchi ambuurø yabe, Zebedeowei nusrkalo Santiagonba, nuneg Juanwanba ashibig køn. Truiløbe kan barcoyu nømui atarrayameran tamara tsushib purrabelø gøn. ²⁰Inchabe tru urastø wamøben, nømbe nømui møskai Zebedeowanba, purugubelanba barcoyu purramnetø, Jesúswei mendig ambuptinchibelø gøn.

Kan møg kwaimandzig tøgagigwan Jesús tamarøb

(Lc 4.31-37)

²¹Incha Capernaum puebloyu pua, tru isrin gwalømbe Jesúsbe judíosmera tulundzuni yau kebya, kusrenanøb mendøben, ²²nø

wamindiilan mōra, misaamerabe kwaara ashibelø gøn. Kaguende kusrenanøppe, nuinukkurrindøwei mu mandamgaig kusrenanøbig køn, tru Moisés pørigwan kusrenanøbelø lata gømø. ²³Inchen tru puebloyu judíosmera tulundzuni yaube kan møg trømbøig maringarub kwaimandzigwan tøgag wawa, trenchib trashibig køn:

²⁴—¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu gúi ashar chibig køn. Ñibe tru Tiuswei Newan Tabig, truig køn— cha.

²⁵Inchen Jesúsbe kwaimandzigwan namab trenchibig køn:

—iÑibe trashimøtø, møweinukkurimbe webinrrø!— cha.

²⁶Inchen trømbøig marøngarub kwaimandziibe mōwan truba mur sruagucha, tru møweinukkurri mur trashib webibig køn. ²⁷Inchen mayeeløba kwaara asha, nōmasiyaitø trenchib payiyabelø gøn:

—¿Øyeebe chi guerah? cha. iKusrenanig iibe ke srøig, trurrigu nø maig chippe ke treeg kønrrai maran! cha. I mōøbe trømbøig maringarub kwaimandziimeranguen mu chindamgaig wamøben, nune mōran— cha.

²⁸Inchen petø Galilea birau ørøba misaamerabe Jesús nø chi marigwan wammørøbelø gøn.

Jesús Simón Pedroi sueeran kwanrrøwan tamarøb

(Mt 8.14-15; Lc 4.38-39)

²⁹Incha tru urastø judíosmera tulundzuni yaugurri webambabe, Jesúsbe Jacoboba, Juanba, Simónweimba, Andrésweimba yamay amben, ³⁰Simónwei sueerabe camayu pachiiba tsuben: “Kwanrrø tsun” cha, tru urastø Jesúsban eshkaben, ³¹Jesúsbe kemalla, tasigu kemørøb kusrabene, pachiibe weetaptinchen, nøbe tru pubelayasig chi maramigwan marøb mendabig køn.

Jesús truba yam kwanrreelan tamarøb

(Mt 8.16-17; Lc 4.40-41)

³²Yandø pørr binaiben, chab pilliraben, Jesúsweimay mayeelø kwanrrø tøgarmenba, kwaimandziimera tøgarmenba srua amrruben, ³³puebloyu maya misaaba yaskabugøba tulundzuna basrøben, ³⁴Jesúsbe truba yamelø chi gwanrrø gøben tøgarmenba tamarøb, katø truba yam kwaimandziimeran misaamerainukkurri webusrøbig køn. Incha kwaimandziimerane waminchibashmíg køn, kaguende truiløbe nune mu gúi ashibelø gøben.

Jesús Galilea birau truørø srø wam tabelan eshkaab kusrenanøb

(Lc 4.42-44)

³⁵Incha løtsøzhig ullarbatø, Jesúsbe kurra, ciudayugurri wambig mu misakkasrø, trusrø Tius Møskaimba waminchib wabig køn. ³⁶Inchen Simónba, nui linchibeløba lanrrab webamba, ³⁷wetørrawabe, trenchibelø gøn:

—Mayeeløba ñune lab gøn— cha.

³⁸Inchen nøbe trencha løtabig køn:

—Misaamera puluwandø katøganbalømera warabsrømay amrrab cha. Trusrøngucha srø wam tabelan eshkaab kusrennrrab, kaguende nabe truweiwei arrur— cha.

³⁹Incha Jesúsbe Galilea birau ørøba judíosmera tulundzuni yamerayu chutøgucha eshkaab kusrenanøb, katø kwaimandziimeran misaamerainukkurri webusrøb inchibig køn.

Asr trerab gwanrrø, lepra taig, tøgagwan Jesús tamarøb

(Mt 8.1-4; Lc 5.12-16)

⁴⁰Kan møg asr trerab gwanrrø, lepra taig, tøgagw Jesúsban kemalla, tømønørabe trenchibig køn:

—Ñi nan tamaramdiig købene, tamartra— cha.

⁴¹Inchen Jesúsbe lastima asha, tasigwan larrøbicha estsarabe, trenchibig køn:

—Tamarøg køtan cha. Tamarig kørrømisr— cha.

⁴²Inchen mõi mõi nui trerab gwanrrøbe pinøben, nøbe chishig kørrømisren, ⁴³Jesúsbe yandø ‘inrrø’ cha, nune kuchi murtø waminchib trenchibig køn:

⁴⁴—Au, mungøben eshkawabesin cha. Inchendø ya, ñui asrwan sacerdotendø kenamara, tru ñi yandø chishig kørrømisrimburø tru Moisés tranrrig taigwane srua ya, tranrrig cha, mayeeløba ñui kwanrrøwan chishig kørrømisrin gúi ashchain— cha.

⁴⁵Trendaingucha møøbe ya, chi purayaigwan mayeelan waminchib mendøben, treekkurri Jesúsbe chu puebloyutøgucha misag ashene, yandø kebinrrab gaima, mendawansrø misakkanug uñibig køn. Inchen chugurrielø gøben nun ashchab amrrubelø gøn.

**Jesús nui maramburab mariitøga kaig marigwan ulø baymumig
kønrrai marøbig kui ashchai kenamarøb**

(Mt 9.1-8; Lc 5.17-26)

2 ¹Mam gwaløm wendau gøsrøn, Jesús katø Capernaum puebloyu kebiben, nø yau wan taig wammørøppe, ²misaabe petø truba nu tulundzuna, ni yaskabuguen kemuben, nøbe Tiuswei srø wam tabelan waminchibig køn. ³Inchen pibgatø møguelø kan møg kønørrab gaimabigwan muta, puben, ⁴menrra misag køptø, Jesúsweim bulugatig kemallchab gaimappe, tru nø pasraim bala yawan picha, trugurrimbe tru trabyu kwanrriigwane kan tsigalyu kørørøbelø gøn. ⁵Inchen Jesúsbe nømui isubigwan ke nuinuutø pasra bønrrai ashabe, Jesúsbe kwanrriigwane trenchibig køn:

—Nai nusrkai, ñui kaig mariilan ulø bayamig kømíg, pesannaig kørømisran— cha.

⁶Inchen mõiløgøsrøn tru Moisés pørigwan kusrenanøbeløbe nømui manrrautø truba isub purrabelø gøn: ⁷“¿Nøbe øyeebe chi waminchib pasarmah? cha. Øyeeg chib pasrappe, Tiusweimburab purø rrømbøig wamab pasran cha. Kaig mariilane ulø bayamig kømíg pesannaig kønrraimbe ¿mu gúin rreeg mariasamø? cha. Tiustøwei øyeeg martrun” chib. ⁸Inchen tru urastø Jesúsbe nømuinetø øyeeg isub pønrrailan kelarrab ashabe, trencha payibig køn:

—¿Ñimbe ñimui manrraube chindimbarre øyeeg isugue? cha. ⁹¿Møigwan mas kørmø trendamdiig købsruerah? cha, tru kønørrab gaimabigwan: “Ñui kaig mariilan ulø bayamig kømíg pesannaig kørømisran” ¿damiteh? Kabe: “Kurrab, ñui tsigalwan muta, inrrø” ¿tamiteh? cha. ¹⁰Pøs, na, Møg Misra Arrubiibe yu pirau kaig mariilan ulø bayamig kømíg pesannaig kønrrai mu mandamgaig marøbig kui mõimbe ñim ashchai kenamaramønrrun— chibig køn.

Inchabe tru kønørrab gaimabigwane trenchibig køn:

¹¹—Nabe ñun trenchar cha: Kurrab, ñui tsigalwan mutab, yamay inrrø— cha.

¹²Inchen truike kurrappa, nui tsigalwan muta, mayeelø ashen, truyugurri webibig køn. Inchen trugurrimbe mayeeløba truba kwaara ashib, Tiuswan truba tabig waminchib trenchibelø gøn:

—Managuen nambe kan øyeekkatiibe ashmuig køn— cha.

Jesús Levíwan wamab*(Mt 9.9-13; Lc 5.27-32)*

¹³Incha katø Jesús nu bisu mendasromay iben, maya misag nuim bulu kemallen, nõbe kusrenanøbig køn. ¹⁴Incha pureb ya, Alfeowei nusrkai Leví, romasreelayasig an utabelø purrainug wai ashabe, trenchibig køn:

—Nai mendig amø— cha.

Inchen nõbe kurrab, nui mendig ibig køn.

¹⁵Indiibe Jesúsbe Levíwei yau mab wabene, truba yamelø romasreelayasig an utabelø gøben, katøganelø kaig marøb misaamera gøben Jesúsba, nui kusrenanøb pera uniiløba mishatsigu trubalatø purrøben, kaguende truba nu gøbig køn nui mendig amøñibeløbe. ¹⁶Inchen fariseosmerai utu tru Moisés pørigwan kusrenanøbeløbe Jesúswane mayeelø tru kaig marøbeløba, an utab purrabeløba mishatsigu mab wai ashabe, nui kusrenanøb pera uniilane trencha payibelø gøn:

—¿Nøbe an utaptø burrabeløba, kaig marøbeløba mab, muchib wappe, øyeebe maig marøb wah?— cha.

¹⁷Inchene Jesúsbe trunun mørabe, nõmun trenchibig køn:

—Tabelø, kwanrrøgarbe mø marøbig palain gømøn cha. Kwanrreeløbeguende palain gøn cha. Nabe tru sølgandø amøñibelan wamønrrab arrumøtø, kaig marøbelan wamønrrab arrig køn— cha.

Ayunamigwan payib*(Mt 9.14-17; Lc 5.33-39)*

¹⁸Juanwei mendig amøñibeløba, fariseosmerai mendig amøñibeløbabe ayunab gøben, møløgøsrøn amrrua, Jesúswan payibelø gøn:

—Juanwei mendig amøñibeløba, fariseosmerai mendig amøñibeløbabe tru ayunamigwan katø gatø maren, ¿ñui kusrenanøb pera uniiløbe chindimbarre trunune marmeelø gøh?— cha.

¹⁹Inchene Jesúsbe trenchibig køn:

—¿Kan novios yaumay lynchai eshkailanma keg mistrabig nõmba wabengan, mamø burrønrraitarru? cha. Keg misrtrabig nõmba wabene, manrrun cha. ²⁰Inchendø keg misrtrabigwan srua ambam

gwalømmerna punrrun cha. Tru gwalømbeguende, trube, nømbe ayunabwei inchun cha.

²¹ 'Muguen kan køllin camisanma kølsraigu srø llensu søtiimfigwan waya tsushimøn chibig køn. Treeg marene, srø llensube kesruppa, kølli llensune kølsrøben, mas trømbøikken kølsraig kørrømisrtrun cha. ²² Katø muguen srø vinonma køllin galusmerayu usrmøwei indan cha. Kaguende treeg marene, srø vinobe køllin galusmeran srurrøgøben, vinobe lushen, kalusmerabe ka kølsrønrrun cha. Inchawei srø vinone srø galusmeran marigu usrøbelø gøn— cha.

Isrin gwaløm maramgaigwan maran cha, Jesúswan alegab

(Mt 12.1-8; Lc 6.1-5)

²³ Kan isrin gwaløm Jesús tirigu ellmari utuwan pureb ibene, nui kusrenanøb pera uniiløbe puraambub ambuppe, tirigu tur lurrøb mendøben, ²⁴ fariseosmerabe Jesúswan trenchibelø gøn:

—Au, ðñui kusrenanøb pera uniiløbe isrin gwalømbe chigøben marmønrrai merigwan chindimba øyeeg marøb gøh?— cha.

²⁵ Inchen Jesúsbe trenchibig køn:

—ðÑimgan managuen lemeelø gøtirru cha, mana gøsrøn Davidwanba, nui linchibelanba chindamgaig palabig arruben, parøgwaben, mandø indigwan? ²⁶ Abiatar, tru maya sacerdotesmeran nø garub sacerdote gøben, Davidbe Tiuswei carpa ya tabzhigu kebya, Tiusweyasiitø tarømarig pirrimera, tru sacerdotesmeratø maim birrimeran mendaibe mu mamønrrai merigwan nø mab, katø nøba purrab misagwangucha srørrøb indigwan.—

²⁷ Incha Jesúsbe katø trenchibig køn:

—Isrin gwalømwane møweyasig marig køn cha, møwan isrin gwalømwegasig kømøtø. ²⁸ Inchawei na, Møg Misra Arrubiibe isrin gwaløm nan nø garunrrain gømøtø, maramdiigwane marøb, maramgaigwane marmub, isrin gwalømwanguen nabe na asha garubig kur— chibig køn.

Tasig mul-laig møwan Jesús tamarøb

(Mt 12.9-14; Lc 6.6-11)

3 ¹ Jesús katø judíosmera tulundzuni yau kebibene, truyu kan møg tasig mul-laig tøgais waben, ² Jesúswan larab gøbelø gøn, isrin gwaløm tamarøbig køtashchab, chigøben chi køptø. ³ Inchen Jesúsbe tru tasig mul-laig tøga møwane trenchibig køn:

—Kurra, yu tøbøtag pasramisr— cha.

⁴Inchabe katøganelan trenchibig køn:

—¿Tru maig maramigwan martrai Moisés pøriiløyube isrin gwalømbe chiwan martrain daig køh cha, tabiiteh, kabe kaiteh? cha. ¿Kwamønrrai indamig køh, kabe kweetsamig kø, chindah?— cha.

Inchen nømbe chigucha chimuben, ⁵Jesúsbe nuingatan pønrrabelan namig ashib, truba isui inchibig køn, kaguende nømui manrrømerabe purø murelø gúimba. Incha tru møwan trenchibig køn:

—Kwalwan larrøbichi— cha.

Inchen nøbe larrøbichene, nui kwalbe tabig kørørmisrøbig køn. ⁶Inchen fariseosmerabe webamba, tru urastø Herodesweingateeløba Jesúsban namig kurra, mandø incha pinisamigwan waminchib mendabelø gøn.

Nu bisu menda misag truba nuwan Jesús kusrenanøb

⁷Inchen Jesúsbe nui kusrenanøb pera uniiløba tarømisra, nu bisu mendasrømay iben, misag truba nu Galilea birausreelø nui mendig ambubelø gøn. ⁸Inchen nø chinetø nørreelø marigwan wammørabe, judeasreelø gøben, jerusalénsreelø gøben, idumeasreelø gøben, Jordán bi tru pørr gal-labgatøsreelø gøben, tirosreelø gøben, sidónsreelø gøben, truba nu ashchab amrrubelø gøn. ⁹Incha tru treeg nu misakkurri Jesúsbe nui kusrenanøb pera uniilan kan barco ke tamara tøgagønrrai eshkabig køn, tru nu misag nun menrra trag marmønrrai. ¹⁰Kaguende Jesúsbe kwanrreelan truba rruha tamarin gøben, mayan gwanrreeløba katøranrrab nuimaygøba kemallchab tranrrabelø gøn.

¹¹Inchen trømbøig maringarub gwaimandziimera nun ashippe, nui merrab tømboñsra, trenchib trashibelø gøn:

—Ñibe Tiuswei Nusrkain gøn— chib.


¹²Inchen Jesúsbe nune mu gøn cha, mun gøben misaameran mørø waminchimønrrain garubig køn.

Jesús nøashib karua øramelan doce lawa bønørøb

(Mt 10.1-4; Lc 6.12-16)

¹³Incha Jesúsbe kan tunsrø nebya, nø wamønrrab asiilan wamøben, nømbe nuimay amrrubelø gøn.

¹⁴Incha doce wesrawa pøñsra treeg kørørmara, iilane nøashib karua øriilø gøn cha, wamabig køn, nøba amøñibelø gønrraimba,



katø eshkaab kusrenanrrab amrrai øramigweyasiiba, ¹⁵katø kwaimandziimeran webusramig mu chindamgaig marøbelø gønnraimba. ¹⁶Tru doce wesrawa pønsrailøbe iilø gøn: Simón, nundøwei katø Pedro cha, munchi basrig køben, ¹⁷Zebedeowi nusrkai Santiagoba, nui nuneg Juanba, truilane Boanerges cha, munchi basriilø, tru treeg munchibe: “palaig rrashibig taigwei nusrkalø”, ¹⁸katø Andrés køben, Felipe gøben, Bartolomé gøben, Mateo gøben, Tomás køben, Alfeowi nusrkai Santiago gøben, Tadeo gøben, Simón Cananistameraingatiig køben, ¹⁹katø Judas Iscariote, tru wendø Jesúswan ashig kømui inchielaingato pasramisra, tranrrabig købengue.

**Møiløgøsrøn Jesúswan Beelzebúwei maramburab marigwan
tøgaig køn chib**

(Mt 12.22-32; Lc 11.14-23; 12.10)

²⁰Inchen Jesús katø nui kusrenanøb pera uniiløba kan yau kebiben, katø misag menrra tinmarøb tulundzunaptø, manrrabguen gaima gøbig køn. ²¹Inchen Jesúswei yaueløbe treeg inchi gøn daig wammørabe, nune merrarrawa, sruamrrunrrab ambubelø gøn. Kaguende lukiaín gøn chib gøben.

²²Inchen tru Moisés pørigwan kusrenanøbelø Jerusalénsrøngurri amrrubeløgucha trenchibelø gøn:

—Nugwaimandzig, tru Beelzebúwan tøgaig køn cha. Treekkurri, tru kwaimandziimeran nøasha garubigwan tøgaig kua, i møøbe kwaimandziimeran weeran— cha.

²³Inchen Jesúsbe nømun wama, ‘øyeeg lataitøwein gøn’ chib, kemesra wamindiiløtøga trenchib waminchibig køn:

—¿Satanásbe Satanáswandøweimbe chinchá wegutchaitamague? cha. ²⁴Kan rey karub tøgaweim birau misaama nòmasiitø nørøtø

misrøb kurrabe, warabig warønrrab gaimanrrun cha. ²⁵Katø kan yauelø nòmasiitø nøørøtø misrøb kurrabe, chab pinønrrun cha.

²⁶Inchawei Satanás nøasiitøwei nøørø, nøørø misrøb kurrabe, treegu yandø pasrønrrab gaimaben, truyu patsønrrun, chibig køn.

²⁷Kabe kan møikkøben kan mur mōwei yauma kebya, tru mur mōwan lusrøbmerrig lusrmøwatøbe, nui chi tøgagúigwan kerranrrab gaimanrrun cha. Lusra rrarratøwei nui chi tøgagúilan kerranrrun chibig køn. ²⁸Nabe ñimun cierton trendamønrrun cha: Misaamera chi kaig mariilan lata, chigøben Tiuswan purø rrømbøig wamindiilan lata Tiusbe kerriguh pesannawa, ulø baymønrrun cha. ²⁹Trune Espíritu Santon purø rrømbøig wamab waminchibigwane ulø bayamigwane managuen pesannaimíig kønrrun cha. Treeg kømøtø, nui kaig marigwan managatig tōga gørrømisrtrun— chibig køn.

³⁰Jesúsbe øyah chippe, kaguende nømbe nun trømbøig marøngarub kwaimandzigwan tōgaig køn chib gøben, trendaig køn.

Jesúswei usrimba, nuneløba

(Mt 12.46-50; Lc 8.19-21)

³¹Inchen Jesúswei usrimba, nuneløba pua, wambiitø pønrramisra, wamønrrab øren, ³²Jesúsweim bōtøgatan truba nu purrabeløbe trenchibelø gøn:

—Au, ñui usrimba, ñui nuneløba wambig pønrran cha, ñun payib.—

³³Inchen nøbe trencha lōtabig køn:

—¿Nai usri nai nuneløbe mumera gøh?— cha.

³⁴Incha nuim bōtøgatan purrabelan ashabe, trenchibig køn:

—Nai usri nai nuneløbe iilø gøn cha. ³⁵Kaguende møikkøben Tius maig martrai karuben, treeg marøbig, truike sí, nai nuneg, nai nuchag, nai usrin gøn— cha.

Kan mōg mandø kwaligwan trunun Jesús kemesra wamindig

(Mt 13.1-9; Lc 8.4-8)

4 ¹Jesús katø nu bisu menda kusrenanøb mendøben, nø wainug misag truba nu tulundzunøben, treekkurri Jesúsbe pisuyu kan barcoyu kebya wamisren, maya misaabe tru pisu mendatø kōrrømisrøbelø gøn. ²Inchen nøbe nōmun ‘øyeeg lataitøwein gøn’ chib wamindiilōtōga chineh kemesra, kusrenanøbig køn. ³Inchabe nui kusrenanigube trenchibig køn:

—Iigwan mōray cha. Kan kwallibiima tsurøb kwallchab webyan cha. ⁴Incha tsurøb ibene, kanbalø yellbe mayu gōrrøben, illimera amrrua, man cha. ⁵Inchen katøganbaløbe srug rrøldø birau pirø tre chiganug kōrrøben, pirø palatiig kua, tru yellbe kal-lappe, petø kal-labendø, ⁶pōrr webarrua, mergurangaruben, srøl tre chigaig kua, mul-laptindan cha. ⁷Katøganbalø yellbe kal shau utu gōrrøben, kalmera nōrrørab mendappe, chab gasrøb tsibishiben, truike chigucha misrmøn cha. ⁸Inchen katøganbalø tab pirau gōrrabiibe sí, kal-lawa, tabig nōrrørawa, truba nu nigan cha. Mōiløbe kan yellgurrindø mamig rrulzheelø treinta niguen, mōiløbe sesenta niguen, mōiløbe cien nigan— chibig køn.

⁹Incha trenchibig køn:

—iMōramig kalu bōnsraibe, mōr!— cha.

Mandøgurri Jesús ‘iigwan øyeeg lataig køn’ cha, kemesra wamindig

(Mt 13.10-17; Lc 8.9-10)

¹⁰Jesús yandø nōtø kōrrømisren, tru doce kusrenanøb pera uniiløba kanbalatø Jesúsweim bulu pōnrrabeløbe trenchibelø gøn:

—¿Tru ‘øyeeg lataitøwein gøn’ chib kemesra wamindiiløbe chi chibig køh?— cha.

¹¹Inchen nøbe trenchibig køn:

—Tiusbe nō ashib karub wainug mu asiimíig tøgagúilan ñimune ashchai tranan cha. Inchendø misaamera nōøreelø truyuilø gōmeelane ‘øyeeg lataitøwein gøn’ chib kemesragøba wamindiiløtøga wamindig køn cha,

¹²nōmbe ashippe ashendø, ashmōwa lataig kōrrømisrøb;

mōrøppe mōrendø, chi tainguen mōrmōwa lataig

kōrrømisrøb inchain cha.

Incha isua mōra Tiusweimay liramøwei, nōmui kaig mariilan

Tius ulø bayamigwan pesannamø,

ulø bayamig kønrrain gúig køn— cha.

Tru kwaliibe ‘øyeeg lataig køn’ cha, kemesra wamindigwan

Jesús øyeeg køn cha eshka

(Mt 13.18-23; Lc 8.11-15)

¹³Incha katø trenchibig køn:

—Ñimgan ‘øyeeg lataitøwein køn’ cha, tru kemesra wamincha basrigwane ¿chigúi wetøgōrrøtirru? cha. Katøgan

‘øyeeg lataitøwein gøn’ cha, kemesra tru wamindiilangucha kerriguba ÷chinha wetøgørrønrrague? cha. ¹⁴Tiuswei wamwan waminchibiibe yellwan tsurøbig lataig køn cha. ¹⁵Inchen tru mayu gørrab yellmerabe iilø latalilø gøn cha. Nømbe Tiuswei wamwan møren latatø, Satanásbe arrub, tru tab wamwan nømuinug ellmarigwane kerran cha. ¹⁶Inchen tru srug rrøldø birau pirø tre chiganug tsuri yellmera lataliløbe iilø gøn cha: Tiuswei wamwan møra, tru urastøbe truba tab gúi utøbendø, ¹⁷nømasiitø srøl tre umbu gueetiimeelø gua, maya yanaguen amøñimøn cha. Incha tru Tiuswei wamgurrindø chigøben puben, katø chigøben kaig nebub arruben, nømbe mõi møin elachiptindan cha. ¹⁸Inchen katøganeløbe tsuren, tru kal shau utu gørrab yell latalilø gøn cha. ¹⁹Tiuswei wamwam mørøppe mørendø, i birau chine købigwan menrra isubiiabah, nømui chine palømø tøgagúilø purø tabig lataig asønaikkurrimba, trugurri chine tøgagømmørø chull inchib isuiløbatø Tiuswei wamwan mørigwane kerrigu truitø kasrøben, chigucha nømbe ellmarig misrmøn cha. ²⁰Inchen tru tab pirau tsuriiløbe tru Tiuswei wamwam møra, ellmarig misrøbelø, truilø gøn: kan rrulzhikkurrindø treinta, kabe sesenta, kabe kan rrulzhikkurrindø cien nigabelø lataliløgue.—

Lámparan kemesra wamindig

(Lc 8.16-18)

²¹Katø Jesúsbe trenchibig køn:

—¿Kabe kan lámparanma køtsø umbu basrtrab, kabe cama umbu basrtrab srua guerrubelø gúitarru? cha. Treeg kømøtø, ÷tør gønrraimbe, pala basramig kømuitarru? cha. ²²Chigøben sorig basrabiibe soriitø pasrømøtø, kenamaramig kønrrun cha. Katø chinchaguen asamgaig kasra basrigwane ashchai tøryu wesraig kønrrun cha. ²³Møikkøben møramig kalu bønsraig kuabe, mør— cha.

²⁴Incha katø trenchibig køn:

—Ñim chi mørigwane tab isua guy cha. Ñim kanelan maig unaasha traniibe, ñimungucha treetøwei unaasha trana, ñimune nemariibaguen tranrrun cha. ²⁵Kaguende tøgagigwane masken rranen, trune chigaigwane nui lamøtiig tøgagúigwanguen kerranrrun— cha.

Yell nurab lataitøwein gøn cha, kemesra wamindig

²⁶Jesúsbe katø trenchibig køn:

—Tius nø ashib karub pasraibe kan møg pirau yellwan tsurì lataig køn cha. ²⁷Incha kib tsui lata, kurra uni lata, yem gúi lata, kwaløm gúi lata, yellbe kal-lawa nuran cha, møøbe mandø indinguen ashmøwatø. ²⁸Kaguende pirøbe nøasiitø mamig ninguingarubig køn cha. Srøsrøbe ishiimerrig kal-laben, trugurrimbe urø weetøben, urøyube trulmera netsan cha. ²⁹Inchen yandø trul srønøben latatø, usestøga paran cha, kaguende yandø param gwaløm puin gøben.—

Iibe murtasa yell lataitøwein gøn cha, kemesra wamindig

(Mt 13.31-32; Lc 13.18-19)

³⁰Katø Jesúsbe trenchibig køn:

—¿Tius nø ashib karub pasraibe chi lataig asøna cha, kabe chiwan kemesra, ‘øyeeg lataitøwein gøn’ chinrrab gøh? cha. ³¹Kan murtasa yell lataig køn cha. Tsurøb uras truike yu pirau maya yellmerai utu purø lamøzhig købendø, ³²tsurinukkurrimbe shush mamig tusrmerai utu katøguchinguen palaig nu tusr-unø srarmerabaig nuraben, illimera pala amønibeløguen truyu le martrun— cha.

Jesús ‘iibe øyeeg latailø gøn’ cha, kemesra wamindig

(Mt 13.34-35)

³³Jesúsbe Tiuswei wamwan øyamay kusrennøbig køn, ‘øyeeg lataitøwein gøn’ chib, truba yambalø kemesra eshkab. Møi eshkaig latailø, nøm mayangatig chigúi nebua mørtrapteelø gøben, treetøh marøbig køn. ³⁴‘Øyeeg lataitøwein gøn’ chib kemesrømøbe, waminchimíig køn. Inchendø nui kusrenanøb pera uniilane nømundø nøørø kerrigu tør marøb eshkabig køn.

Isig ichibigwanba, pi welar gurrabigwanba

Jesús pasramisringarub

³⁵Incha tru gwalømdøwei yandø pilliraben, nui kusrenanøb pera uniilan trenchibig køn:

—Pisu ambøgatøsrømay larraamun— cha.

³⁶Inchen nømbe misagwan ‘ungwa’ cha, Jesúsban tru nø waig barcoyutøwei pera amben, katøgan barcomeragucha lincha

ambubelø gøn. ³⁷Inchen truba mur isig ichibig webarruben, pi welarmerabe barcoyu keguchen, yandø ke pitø netsab arruben, ³⁸Jesúsbe wendau kan labzhigu ne kib waben, nømbe kasrønanabe trenchibelø gøn:

—iAu, Kusrennøbig! ðnam asentanrreenchib melamne, ñigan isubguengaig watirru?— cha,

³⁹Inchen Jesúsbe kurra, isigwan kònømønrrai kandø wama, piwane trenchibig kòn:

—iWanrrømø, mõi mõi wasrørau!— cha.

Inchene isiibe pasramisren, yandø kerrigu wasrønzhig kòrrømisrøbig kòn. ⁴⁰Inchen Jesúsbe nui kusrenanøb pera uniilan:

—ðChindimbarre kørig kòta? chibig kòn. ðÑimui isubigwan nainuutø pasra gømeelø gø chindah?— cha.

⁴¹Inchen nømbe truba kwaariilø gørrømisra, kangurrin gangurri trenchibelø gøn:

—ðIibe mu guerah cha, isig ichibig lata, mar lata, nun mørtrappe?—

Gerasasriig kwaimandzig tøga møg

(Mt 8.28-34; Lc 8.26-39)

5 ¹Pisu ambøgatømaysrø larraamba, Gerasa birausrø puben, ²Jesús barcoyugurri webiben latatø, kan møg trømbøig maringarub gwaimandzig tøgaig sørin rrabmerayugurri webarrua, Jesúswan kemallibig kòn. ³Tru møøbe sørin dulyutø tsubig, muguen lusrtrab gaimaig købig kòn, ni cadenastøgaguen. ⁴Kanmaybe srøbmeran tasiimeran cadenastøga gøben, katø chitøga gøben lusrendø, lusrimørig pitischig marøb lurren, muguen kaimabelø gøn. ⁵Incha yem gwaløm chu uragucha tunmerasrø, sørin dulmerasrø trashib, sruutøga nòasiitø kørriinchib uñibig kòn. ⁶Incha Jesúswane yabgurrindø asha, lula, nui merrab tømbønsra, ⁷trenchib trashibig kòn:

—ðÑibe nane chi martrab inchigu? cha, Jesús, Tius Mayeelaim Bala Pasrabigwei Nusrkai. Purø rrømbøig møra megamig kømønrrai Tiuswei munchiyu ka gøbash cha, chib miarrumøn— cha.

⁸Pøs øyeeg chippe, kaguende Jesúsbe:

—iÑi, trømbøig maringarub gwaimandzig, i mōweinukkurri webinrrø!— chib pasrøben, trendaig køn.

⁹Inchene Jesúsbe nun trencha payibig køn:

—¿Chi munchi gugu?— cha

Inchen nøbe:

—Legión munchi gur, chibig køn. Kaguende nambe purø nu guer— cha.

¹⁰Inchabe tru biraugurri nørøø peesrømay ørmørrunrrig chib, Jesúswan truba rruba rrugabig køn. ¹¹Inchen tru tun buluwan kuchimera lawa mab truba nu amøñibelø gøn. ¹²Inchen tru kwaimandziimerabe rrugab trenchibelø gøn:

—Kuchimeraimay ambingarurra cha, nam truilainug kebamrrab— cha.

¹³Inchen Jesúsbe ka kebambashen, trømbøig maringarub kwaimandziimerabe mōweinukkurri webamba, kuchimerayu kebambene, truyu kuchimerabe pa milburab warabeløbe truba rrømbø lendeyu lula, chab pinøgørraptincha, larrø nu bisuyu kegørra, pi guesra, chab gwabelø gøn.

¹⁴Inchene kuchi ashibeløbe kwaariilø lula, puebloyu gøben, wambig nørøwansrøn gøben eshkað ambubelø gøn. Inchen misaamerabe chi purayaigwan ashchab amrrubelø gøn. ¹⁵Incha Jesús waisrø pubene, tru kwaimandzig tøgäig købiibe mōimbe køsatiig kømø, keweig, tabig wai ashabe, truiløbe kørig kui inchibelø gøn. ¹⁶Inchen tru kwaimandzig tøgäig købigwanba, kuchimeranba maig purayaigwan ashibeløbe nømun eshkaben, ¹⁷nømbe Jesúswan nømuim biraugurri ‘irra’ chib truba rrugabelø gøn.

¹⁸Inchen Jesús barcoyu kebibene, tru kwaimandzig tøgäig købiibe:

—¿Ñui mendig arruah?— cha, truba inchen,

¹⁹Jesúsbe arrubashmøtø, trenchibig køn:

—Ñui yamay inrrø cha, ñui yau misaameraimay Señor ñun yeeg nørriig mara, mandø lastima asigwan nømun eshkanrrab.—

²⁰Inchen tru mōøbe ya, Decápolis pueblosø Jesús nun yeeg nørriig marigwan truba eshkað mendøbene, mayeeløba kwaara ashibelø gøn.

Jesús kan ishuwan kwanrrøwan tamarøb

(Mt 9.18-26; Lc 8.40-56)

²¹Jesús barcoyu gatø pisu ambøgatømay larraibene, nuim bøtøgatan misag truba rruba nu tulundzunøben, nøbe pisu

mendatø korrømisrøbig køn. ²²Inchen judíosmera tulundzuni yau ashib karubig, Jairo taig, puabe, Jesúswan ashippe, nui srøb pulu tømønstra, ²³arrubsrømuugu chib truba inchib, trenchibig køn:

—Nai nimbasr-unø kwanrrab inchib tsun cha. Kwanrrø tammisren, katø øsig uñchai ñui tasigwan nuim bala estsartrab attra— cha.

²⁴Inchen Jesúsbe nøba iben, menrra misag mendig ambuptø nun trag maren, ²⁵tru misag utube kan ishug doce años ørøba ani ib gwanrrø tøgag kua, ²⁶chu uraskucha purø rrømbøig kui uña, mø marøbelai yam dasku pureb megawa, nui chi tøgagúigwan kerrigu patsøgøben, chiweingucha puraimø, kwanrrøbe masken inchib iben, ²⁷Jesúswan wamindi mørøppe, tru ishuube misag utu wendaugurri Jesúsweim bulu kemallippa, nø kewagúigwan katørabig køn. ²⁸Kaguende nøbe treeg isubig køn: “Kewagúilandøguen katøraitø, tammisrig korrømisramønrrun” cha. ²⁹Inchen tru ani ibiibe mõi mõi pasramisrøptinchen, asru nui kwanrrøbe yandø purayai møren, ³⁰Jesúsbe nø mun gøsrøn nui maramburab mariitøga tamarøbrain gúi mørabe, nu misag sötøwan keeshabe, payibig køn:

—¿Na kewagúigwane mu gatørah?— cha.

³¹Inchene nui kusrenanøb pera uniiløbe trenchibelø gøn:

—Misag sötø yeeg trag mari ashatø, ñibe: “¿Mu gatørah?” taibe— cha.

³²Inchen Jesúsbe mu gatøraitashchab ambumay, imay ashene, ³³tru ishuube korig købiitø itønab, nun maig purayaigwan møra, ya, Jesúswei merrab tømønstrøb srala, isømø, kerriguwan eshkaben, ³⁴Jesúsbe trenchibig køn:

—Nimbasr, ñui isubigwan nainuutø pasra tøgagúikkurri tamarig korrømisran cha. Chi isumø, inrrø cha. Ñui kwanrrøbe yandø purayaig køn— cha.

Jesús Jairoi nimbasrwan øsiiranøb

³⁵Trune Jesús waminchib pasramnetø, tru judíosmera tulundzuni yau ashib karubigwei yaugurri møiløgøsrøn amrruppe, unai møskawane trenchibelø gøn:

—Ñui nimbasrbe kwabguen indan cha. ¿Kusrennøbigwan mas chinrrabrre øyeeg chigu?— cha.

³⁶Inchen nòm trenchib gúingucha Jesúsbe trunun mørøb pasrømøtø, tru tulundzuni yau ashibigwane trenchibig køn:

—Chi kørig kui inchimøtø, køreptø køreu— cha.

³⁷Incha mas mungucha amrrubashmøwa, Pedronbah, Jacobonbah, Jacoboi nuneg Juanwanbatø amrrungarubig køn.

³⁸Incha tru judíosmera tulundzuni yau ashibigwei yau puabe, ke chindi asamgaig misaabe kishib, miirab, trashib inchib gúi ashabe,

³⁹Jesúsbe kebya, trenchibig køn:

—¿Chindimbarre øyeeg inchib, kishib gøh? cha. Unøbe kwaig kømøtø, ka kiptø tsun— cha.

⁴⁰Inchen misaamerabe Jesúswane ka indzatø mørøbelø gøn. Inchen Jesúsbe mayeelan mõi mõi webambingarua, møskawanbah, usranbah, tru nøba ambubelanbatø pera ya, tru ishug-unø tsuinug kebya, ⁴¹tasigu kemørabe, trenchibig køn:

—Talita, cumi— cha. (Trenchippe: “Ishug-unø, ñun kurrø char” chib.)

⁴²Inchene tru doce años tøga ishug-unøbe mõi mõi kurrappa, llibab mendøben, misaamerabe truba rruba kwaara asha gørrømisrøbelø gøn. ⁴³Inchen Jesúsbe mun gøben eshkaab gønrrab gømø cha, unan mamig srøttraí karubig køn.

Jesús Nazaret puebløsrø

(Mt 13.53-58; Lc 4.16-30)

6 ¹Jesúsbe truyugurri webya, katø nui birausrømay iben, nui kusrenanøb pera uniiløbe nøba ambubelø gøn. ²Incha isrin gwaløm pubene, Jesúsbe judíosmera tulundzuni yau kusrenanøb mendøben, møyiløgøben mørøbeløbe truba kwaara asha, trenchibelø gøn:

—¿I møyøbe kerrigube churre øyeeg kusreh? cha. ¿Ilig nui øyeeg truba rruba kusreebe chiguerah? cha. iKan i møy nui tasiimeratøga maramburab mariilø yeekkucha gúita! cha. ³¿Iibe tru tsiimeratøga chine marøbig kømuitarru? cha, tru Maríai nusrkai. Katø ¿Santiagoimba, Joséweimba, Judasweimba, Simónweimba nøbe nuneg kømuitarru? cha. ¿Yamba nui nuchaløgucha yu namui ututøwei warabelø gømuitarru?— cha.

Treekkurri nømbe nune chinetø cha mørøbelø gøn. ⁴Inchen Jesúsbe trenchibig køn:

—Chutøgucha peesrømbe Tius maig karuigwan eshkabigwane tab indan cha. Trune nui biraueløba, nømmisaameraba, nui yaueløbabe chi tab inchimøn— cha.

⁵Incha truyube maramburab marig chi martrab gaima, mamdø kwanrreelan nui tasiitøga estsara, trutøh tamarøbig køn. ⁶Inchen Jesúsbe yeekkucha køremø misaamera gønrrabmab ke kwaara ashibig køn.

Jesús nui doce pera uniilan kusrenanrrai ørøb

(Mt 10.5-15; Lc 9.1-6)

Incha Jesúsbe tru buluwan yamera tsitsø bønrrabwan kusrenanøb uñibig køn. ⁷Incha nøbe nui doce kusrenanøb pera uniilan wama, pagatø, bagatø ørøb menda, trømbøig maringarub gwaimandziimeran mu chindamgaig marøb amrrai tranøbig køn. ⁸Incha treeg karubig køn:

—Mayuweimbe chigucha sruammønrrain cha. Kan pøtønain tsiitø srua amrrain cha. Pirri srua ammøwei, wasr ila ammøwei, pørønailøyu an busra ammøwei inchain cha. ⁹Alpargatistø keeta amrrain cha. Pala itøgueikkucha yunømaramiba gømøtø, kandø guewa amrrain— cha.

¹⁰Incha Jesúsbe gatø trenchibig køn:

—Ñim kan yau kebambuppe, tru puebloyugurri ambamnegatig kørørmisrtrigay cha. ¹¹Inchen ñimun wamømøwei, ñimun mørøg kømui indinuube, trube, tru puebloyugurri webamrrappe, ñimui srøbyu usrøwan chishtë gørrøgønrrigay cha. Treeg marøppe, trube: “Ñim kaasig købene, mømbe ñim gusrenrrigay” chib eshkab.—

¹²Inchen nømbe webamba, misagwan:

—Ñim kaig mariilan isua mørøb, Tiusweimay lliray— chib eshkab kusrenanøbelø gøn.

¹³Incha misagweinukkurri kwaimandziimeran truba yam webetab, truba yam kwanrreelan aceite srøla, tamarøb inchibelø gøn.

Juan Bautista kwaig

(Mt 14.1-12; Lc 9.7-9)

¹⁴Rey Herodesbe Jesúsban wamindi mørøbig køn, kaguende Jesúswei munchiwane misaamerabe nun, nun waminchib gøben. Inchen møiløbe trenchibelø gøn:

—Juan Bautista kwailai utugurri katø kurriinrrun cha. Incharre tru maramburab øyeeg maramig tøgagig kuinrrun— cha.

¹⁵Inchen katøganeløbe trenchibelø gøn:

—Tius maig karuigwan eshkabig Elías kuinrrun— cha. Inchen kaneløbe:

—Nøbe Tius maig karuigwan eshkabig kuinrrun, chibelø gøn, tru møikkøben merrabsreelø lataitøwei.—

¹⁶Inchen Herodes trunun mørabe, trenchibig køn:

—Iibe Juan, na tru turwan paringaruiig kuinrrun cha. Møimbe kwailai utugurri katø kurriinrrun— cha.

¹⁷Kaguende Herodesbe tru Juanwane kemøringarua, kailan keeri yau lusra wanningaruiig købig køn, tru nui nuneg Felipei srai Herodíascurrindø. Tru Herodíasbe Herodeswei nuneg Felipei srain gøbig køn. Inchen Herodesbe truigwane nui srai marin gøben, ¹⁸Juanbe Herodeswane trenchibig køn:

—Ñi ñui nunewei srawan ñui srai mara tøgagømibe merig basran— cha.

¹⁹Inchen tru ishug Herodíasbe Juanwan tsalø gøptø kwetchab inchendø, kaimabig købig køn. ²⁰Kaguende Herodesbe Juanwane sølgandø tabig, katø Tiusweindø tarømari møg kwaasha, køriimata, trugurri nune mu chinchimønrrai ashib tøgagøbig køn. Incha Herodesbe Juan wamindigwane mandøguen gømui inchendø, tammay ka mørøbig køn. ²¹Indiibe Herodíasbe Juanwan maig maramigwan yandø treeg maramdiig puin gúi ashibig køn. Kaguende Herodesbe tru chiwangucha nøm asha garubelaimba, suldaumeran karubelø nørreelaimba, Galilea mas kusreb møguelaimba nui kal-lain gwalømwana isub kasrag waram gwaløm tabig maren, ²²møimbe Herodíaswei nimbasrbe truyu kebya, pailaben, Herodeswanba, truyu mab purrabelanba tru pailaibe truba tabig asønaben, reybe tru srusrane trenchibig køn:

²³—Ñun chi miag købendø, miarra cha. Na tranrrumøn cha. iGatø! ñune tranmø gømø, nabe trunun tranamønrrun chib. Ñi chi miaben, tranrrumøn cha. Na muburab ashib karub waigwan tøbøtakkatikken tranrrumøn— chibig køn.

²⁴Inchen nimbasrbe webya, usran:

—¿Chi miamø?— cha payen, usri Herodíasbe trenchibig køn:

—Juan Bautistai turwan miao— cha.

²⁵Inchen tru srusrøbe tru urastø tru rey waisrø petøzhiitø kebyabe, trenchib miabig køn:

—Møindøwei Juan Bautistai turwan kan platilloyu trannrra— cha.

²⁶Inchen reybe truba rruba isui inchendø, tru mayeelø lincha purrabelai malau ‘treeg tranrrumøn’ cha, trannrrab misrig køppe, tru miaigwan ka chimø, ka rranøbig køn. ²⁷Incha tru urastø reybe kan suldauwan Juanwei turwan para, srua arringaruben, ²⁸truibe tru kailan keeri yaumay ya, Juanwei turwan para, kan platilloyu srua arruabe, srusran tranen, nøbe usran tranøbig køn. ²⁹Inchen Juanwei mendig amønibelø iigwan wammørabe, amrrua, nui asrwan kusrua, srua amba sørabelø gøn.

Jesús trattør mil møguelan manrrai tranøb

(Mt 14.13-21; Lc 9.10-17; Jn 6.1-14)

³⁰Inchen Jesús nøashib karua øriilø katø amrrua, nøba tulundzuna, nøm chi marigwanba, kusrenanigwanba kerriguh eshkaben, ³¹Jesúsbe trenchibig køn:

—Nøørørørø mu misakkasrø kuchi isrønrrab ñimbe amrruy— cha.

Kaguende menrra misag køptø amben, amrruben inchen, nømune mab purramikken nebumíig køn. ³²Incha Jesúsba, nui nøashib karua øriiløba nømdø kan barcoyu mu misakkasrømay ambubelø gøn. ³³Inchen møiløgøben nøm amben asha, Jesúsban mu gúi nebua asha, chu puebloyuelø gøben trusrømay lula, nømmerrig pubelø gøn. ³⁴Incha Jesús barcoyugurri pinaya, truba nu misag basrai ashabe, lastima isui inchibig køn, kaguende nømbe ubishamera mu ashchabig chigar latailø gøben. Incha chine truba kusrenanøb mendabig køn. ³⁵Inchen yandø menrra maaben gøben, nui kusrenanøb pera uniiløbe Jesúsban kemallabe, trenchibelø gøn:

—Yube mu misakkanug køn cha. Inchagucha yandø kwa maaben gøn cha. ³⁶Misagwan amrrai, ‘ungwa’ chi cha, chugøben nøørørørøn gøben, puluwandø yamera pønrrabsrøn gøben amba, nømuyasig chigøben pena manrrain— cha.

³⁷Inchen Jesús lötappe trenchibig køn:

—Manrrai ñim mannay— cha.

Inchene nømbe trenchibelø gøn:

—¿Manrrai mannamig kan mōg doscientos días ørøba marøb megawa an bagaraig utiitøga pirrim benønrrab ambam nebunrrautah?— cha.

³⁸Inchen Jesúsbe trenchibig køn:

—¿Ñimbe mam birrin døgagøgue? cha. Ashchab ambay— cha.

Inchen nømbe ashabe, trenchibelø gøn:

—Trattrøgatø pirrimbah, pagatø peskaubatø tøgaguer— cha.

³⁹Inchen Jesúsbe misaameran kan sötø, kan sötø pillim bubilayu purramisringarubig køn. ⁴⁰Inchen kan sötømørig cienbatø, cienbatø purramisren; kan sötømerabe cincuentabatø, cincuentabatø purramisrøbelø gøn. ⁴¹Inchen Jesúsbe tru trattrøgatø pirriwanba, pagatø peskaumeranba nui tasku muta, srømbalaneb neesha, Tiuswan ‘mayanguen pay’ chabe, pirrimera pirisha, nui kusrenanøb pera uniilan misagwan pirishinrrai trana, katø tru pagatø peskaumerangucha mayeelan pirishinrrai tranøbig køn. ⁴²Inchen mayeeløba øska ma kørrømisren, ⁴³tru pirrim bitis, peskau bitis pirisaig undailan tasinmerayu tulishiben, tasinmera doce netsabig køn. ⁴⁴Inchen tru pirriwan mabeløbe mōgueløtø trattrø mil gøbig køn.

Jesús pi balawan arrub

(Mt 14.22-27; Jn 6.16-21)

⁴⁵Incha tru urastø Jesúsbe nui kusrenanøb pera uniilan pisu ambøgatø Betsaidasrømay merrab amrrai barcoyu nebambingarubig køn, nø tru nu sötø misagwan ‘ungwa’ chib pasrappatø. ⁴⁶Incha yandø misagwan chab ‘ungwa’ chabe, tunsrø Tius Møskaimba waminchab ibig køn. ⁴⁷Incha yem gøben, barcobe chabguen pisu tøbøtaasrønguen iben, Jesúsbe nõtø pirau kørrømisrøbig køn. ⁴⁸Inchen kaguen isiibe nømui malaugøba megambub ichen, nømbe barcoyu amrrab gaima, muraaraig remab melai ashib pasrabig køn Jesúsbe. Incha løtsøzhig yemdø nøbe pi balawan katsikka nømuimay kemallib ya, purab inrrab lataig inchen, ⁴⁹pi balawan arri ashippe, nømbe mōsig kønmab isua, trashibelø gøn. ⁵⁰Kaguende mayeeløba ashagurri purø rrømbøig korig kui inchen, Jesúsbe mõi mõi nømune waminchib trenchibig køn:

—iKørmø, mur isua burray! cha. Na gur cha. Korig kui inchimøtay— cha.

⁵¹Incha nõ barcoyu nebibene, isiibe wasrøngandø pasramisrøptinchen, kan øyeebe chi maig kermab nõmbe truba kwaarøbelø gøn. ⁵²Kaguende tru pirriwan øyee marigwanma katøgucha nõmbe tab chigúi mormøwa gørrømisrin gøbig køn, larrø mur manrrømera tøgar srø gua.

Jesús Genesaretsrø kwanreelan tamarøb

(Mt 14.34-36)

⁵³Incha yandø tru pisuyu chab larraamba, Genesaret birausrø pua, truyu barcon pi menda licha pasrøbelø gøn. ⁵⁴Incha barcoyugurri nõm webamben latatø, misaamerabe Jesús kui nebua asha, ⁵⁵nõmbe tru birau truørø lula, Jesús chu wan daig mørøppe, trusrømay kwanreelan tsigalyu muta, amrrub mendabelø gøn. ⁵⁶Inchen Jesúsbe yamera tsitsø bønrrabsrø, pueblomerasrø, wambig nõørørsrø chugøben kebibene, penab, yanøb indiisrø kwanreelan wara:

—Ñi pala itøguewa gúig urøzhigwandøguen namun katørabashcha— chib, Jesúswan rrugabelø gøn.

Incha mayeeløba katørabeløbe yandø tamariilø kørørmisrøbelø gøn.

Fariseosmerai kusrenaniilø

(Mt 15.1-20)

7 ¹Inchen fariseosmeraba, Jerusaléngurri amrrubelø mõiløgøsrøn tru Moisés pørigwan kusrenanøbeløbabe Jesúsweim bulu kemallibelø gøn. ²Incha truiløbe Jesúswei kusrenanøb pera uniilø mõiløgøsrøn nõmui tasigwan kinømø mai ashibelø gøn, tru kaigwan chish misrøb chib, tasig kinigwan. ³Kaguende fariseosmeraba, maya judíosmeraba merrabsreelø maig marøb, amrruilane ke tindøga pønrrabelø gua, maig taigwan tasigwanmerrig kinømuppe, mameelø gøn. ⁴Katø penab, yanøb indiisrøngurri amrrua chigucha, tru tasig kinønrrain daigwan kinømuppe, mameelø gøn. Katø nõmbe chigøben katøgan trendø treeg mariilan pesannamø marøb tøgagøbelø guabe, mutsim basumeran pillmab, katø køtsømeran, tsandzøn nindaameran pillmab, manrrab purramisriilan chishmarøb inchibelø gøn. ⁵Incha fariseosmeraba, katø tru Moisés pørigwan kusrenanøbeløbabe Jesúswan trencha payibelø gøn:

—¿Ñui kusrenanøb pera uniiløbe namui merrabsrø
kølleeløgurrimbunø trendø treeg marøb amrruig købigwan
treegwan marøb amønīmøtø, kaigwan chish misrøb tasigwan
kinømø, maptø manrrappe, chindimba rreelø gøh?— cha.

6Inchene Jesúsbe trencha løtabig køn:

—Tru Tius maig karuigwan eshkabig Isaíasbe ñim palatø
tabelaimburab maig kønrrabigwan kanmaytø trenchippe, sølwein
dain gøn cha, øyah chib pørøppe:

I misaamerabe nane ka triitøgatø tab inndan cha.

Inchendø nømui manrrøbe nainukkurrimbe yab pønrran
cha.

7Nan køriibala tabig waminchib taibe chiweingucha chi tabig
marig kømøn cha,
møguelø martrai karua pønsrailan øyeeg maramig køn chib
kusrenanøb.

8Kaguende ñimbe Tius maig maramigwan martrai pønsraigwan
elacha, møguelø ka trendø treeg marøb tøgagúilangøba
kebasrøbelø gøn— cha.

9Incha katø Jesúsbe trenchibig køn:

—Ñimbe ñim trendø treeg marøb gúilan tøgagøbig tøgagug køptø,
Tius maig maramigwan martrai pønsraigwane elachippa, møguelø
marøb amrruigwangøba marøbelø gøn cha.

10Kaguende Moisésbe trendaig køn: “Ñui mōskai, ñui usrane
maig købash inchimø, tab indamig køn” cha. Katø: “Mōskawan
gúi, kabe usran gúi trømbøig nebunrrai wamabigwane trunune
kwanrrai pasrig kønrrun” cha. 11Trune ñimbe trenchibelø gøn:
“Kan møøbe mōskawan gúi, kabe usran gúi trenchinrrun cha:
‘Na ñimun purugumig tøgagúibe *Korban* gøn cha, (trenchippe,
“Tiuswan keta, tranig køn” chib) ñimune purugunrrab
gaymamønrrun’ chinrrun” cha. 12Treeg chippe, yandø ñimbe
usri mōskawane isua ashib purugumibe chi palømøn dan cha.
13Treekkurri Tius martrai karua pønsraigwane chigucha gømfiig
kui lataig mara srua gøn cha, ñimui kusrenaniilø kanun ganun
puraarrub arrubiitøga. Incha ñimbe gatøgan øyeelø latailøtøwei
truba marøbelø gøn— cha.

14Incha katø Jesúsbe misagwan nuimay wama, trenchibig køn:

—Ñim mayeeløba nan mørøb, katø chigúi mørøb inday cha.

15Chitøgucha mōwan wambikkurri kebibiibe truigwane kaig

trømbøig marøb mindishinrraamøn cha. Møwei manrrøygurri webarrubiibe sí, nun trømbøig marøb mindishibwei indan cha. ¹⁶IMøikkøben møramig kalu bønstraig kuabe, mør!— chibig køn.

¹⁷Incha Jesús misagwan tarømisra, kan yau kebiben, nui kusrenanøb pera uniiløbe:

—¿Tru ‘øyeeg lataitøwein gøn’ chib kemesra kusrenanigwan chi chibig køh?— cha payene, ¹⁸nøbe trenchibig køn:

—¿Nimgucha chigúinguen mormøwa bønrrøtirru? cha. ¿Møwan chitøgucha wambikkurri kebibiibe kaig trømbøig marøb mindishimíig kui ashmeelø gøtirru? cha. ¹⁹Kaguende manrrau guebimøtø, patsau kørraya, katø asrugurri webinrrun— cha.

Iigwan øyah chippe, chi mamitøgucha kaig marmíig ‘chishelø’ gøn, chibig køn. ²⁰Incha katø Jesúsbe trenchibig køn:

—Møweinukkurri webarrubiibe sí, nune kaig trømbøig marøb mindishibwei indan cha. ²¹Kaguende umbu manrraugurri webarrubiibe sí, kaig isuilø gøben, ishumburba, møgueløba trømbøig maramelø gøben, nilamelø gøben, kweetsamelø gøben, kasharawarmera peebea itølulamelø gøben, ²²katøganuiwan tøgagønrrab isumelø gøben, trømbøig kaig maramelø gøben, may wamincha isamelø gøben, chine kaig marøg købiitø srua yaig kømig køben, chigurrin gøben pusrkwai asamelø gøben, chi purayailan trømbøig wam gusamelø gøben, ke puro nuig kømmørø indamelø gøben, chugúi mormíig lataig unamelø gøben werrun cha. ²³Iiløbe si, kerriguba umbugurri webarrubig kua, møwan kaig trømbøig marøb mindisha kørrømaran— chibig køn.

Judío gømø ishug nui isubigwan Jesúsweinuutø pasra tøgagøb
(Mt 15.21-28)

²⁴Incha Jesúsbe kurra, truyugurri Tiroba, Sidónba, tru ciudadamera pønrrab piraumayba yabe, kan yau kebya, mugucha wammormønrraimab isubig køn. Inchendø trubønrrab gaimabig køn. ²⁵Inchen trømbøig maringarub kwaimandzig kebyainab ishug-unai usri, tru urastø wammørabe, arrua, Jesúsweim bulu tømønstrøbig køn. ²⁶Tru ishuube griega Sirofenicia birausriig købig køn. Truibe arrua, nui nimbasrweinukkurri kwaimandzigwan wegutcha chib, Jesúsban miab megaben, ²⁷Jesúsbe trenchibig køn:

—Nusrkælømerriig pirriwan mamne mabash cha. Kaguende pirriwan uregwan kerrawa, wera-ureezheelan kebusramibe søl gømøn— cha.

Inchene ishuube trenchibig kòn:

²⁸—ØØ, Señor, pøs treebe treegwein gòn cha. Inchendø tru mishatsig umbu werá-ureezheeløguen pitischigwan man cha, nusrkalø kørøgaigwan.—

²⁹Inchen Jesúsbe trenchibig kòn:

—Ñi ya may isua tab løtiitøgabe, møimbe inrrø cha. Tru kwaimandziibe ñui nimbasrweinukkurri webyainguen gòn— cha.

³⁰Inchen nøbe yau pubene, kwaimandziibe unainukkurri webyainguen gøben, nui nimbasr-unøbe camayu tsuin gøbig kòn.

Kalu mormøwei, waminchimøwei inchibigwan Jesús tamarøb

³¹Jesús katø Tiro biraugurri webya, Sidónwansrø pureb ya, trugurrimbe Decápolis birau pueblomerawan puraarrub arrua, Galilea nu bisuyu pubig kòn. ³²Inchen tuyube kan møg kalu mormøwei, tør waminchimøwei inchibigwan srua amrrua, truba inchibelø gòn:

—Ñui tasigwan nuim bala estsarøbsrumuguh— chib.

³³Inchen Jesúsbe menda nørørørø pera ya, tasig-uregwan kalumerayu keera, illimbi tucha, niløwangucha katørawabe,

³⁴srømbalaneb neesha, nu israbe, trenchibig kòn:

—iEfata!— cha, (trenchippe, “iKur!” chib).

³⁵Inchene tru mørtrab gaimabigwein galumerabe mõi mõi kuren, nilø kemendikkucha kònab tammisren, yandø tab waminchibig kòn. ³⁶Inchen Jesúsbe nømune mungucha waminchimønrrain garua, maya eshkamønrrain daingucha, nømbe masken wam larrøbichibelø gòn. ³⁷Incha misaamerabe truba kwaara ashib trenchibelø gòn:

—Chiwandøgucha nøbe tab maran cha. Kalugarwanguen møringarub, waminchimeelanguen wamindingarub indan— cha.

Jesús misag pib milwan mannrrai tranøb

(Mt 15.32-39)

8 ¹Tru gwalømmerawan misag truba nu tulundzuna basrøben, mamibe chigucha gaaben, Jesúsbe nui kusrenanøb pera uniilan nuimay wamabe, trenchibig kòn:

²—Misaameran lastima gøtan cha. Chabguen yu pøn gwalømguen naba warøwa, yandø chi mamig chigar gòn cha. ³Chi mameelan na nømui yamay ka ambashendøbe, mayu parøgwab chab

pesannanrrun cha. Kaguende kan utueløbe yabsrøngurri amrruar gøn— cha.

⁴Inchen nui kusrenanøb pera uniiløbe trencha lötabelø gøn:
—¿Yu ya mu misag warømønuube pirri manrrai nòmun chinchasrøttrab?— cha.

⁵Inchen Jesúsbe trencha payibig køn:
—¿Ñimbe mam birrin døgagøgue?— cha.

Inchen nømbe lötappe:

—Siete tøgaguer— chiben,

⁶Jesúsbe misagwan pirau purramisringarua, nui tasku tru pirri sieten muta, Tiuswan ‘mayanguen pay’ chabe, pirisha, nui kusrenanøb pera uniilan tranen, nømbe misagwan pirishibelø gøn. ⁷Katø peskau-urekkucha mamdø tøgagøben, Jesúsbe trunun Tiuswan ‘mayanguen pay’ chabe, katø trunungucha misagwan pirishinrrai karubig køn. ⁸Inchen mayeeløba øska ma kørørmisren, katøgucha pitis undailan tasinmerayu netsøbatailø siete tulishibelø gøn. ⁹Inchen tru mabeløbe pib milburab gøbig køn. Incha Jesúsbe misagwan ‘ungwa’ chabe, ¹⁰nui kusrenanøb pera uniiløba barcoyu kebya, Dalmanuta birausrømay ibig køn.

Fariseosmera Jesúsban kan mana asiimfiig martrai miab

(Mt 16.1-4; Lc 12.54-56)

¹¹Inchen fariseosmera amrruabe, Jesúsban ‘¿øyeebe maig køh?’ chib payib menda, nune srømbalasrøngurriigwan asamig martrai miabelø gøn, Tius nøba pasrain gúi ashchab, ke chinchibig køtashchab ashig køptø. ¹²Inchen Jesúsbe truba isui inchib, nu israbe, trenchibig køn:

—¿Møin gwaløm misaamerabe Tius naba pasrain gúi ashchab chindimba maramig miah? cha. Nabe ñimun cierton trendamønrrun cha: Møin gwaløm misaameran ashig kui indigwane chigucha marig kømønrrun— cha.

¹³Incha nøbe nòmun pønrramnetø, katø barcoyu kebya, pisu ambøgatøsrømay ibig køn.

Fariseosmerai levadura

(Mt 16.5-12)

¹⁴Inchen nui kusrenanøb pera uniiløbe pirri srua amrrumigwan pesan amba, barcoyube pirri kandø tøgarrubabelø gøn. ¹⁵Inchen Jesúsbe nømune trenchib eshkabig køn:

—Au, ñimbe levadura fariseosmeraiwanba, saduceosmeraiwanba ashiptø guy— cha.

16Inchen nui kusrenanøb pera uniiløbe kangurrin gangurri trenchibelø gøn:

—Kaguen nam pirrin chigar gúimba, nøbe trendan— cha.

17Inchen Jesúsbe nøm trenchib purrai ashabe, trenchibig køn:

—¿Chindimbarre ñimasiyaitø ‘pirringar guer’ chib purrøgue? cha. ¿Katøgucha ni chigúinguen mormøwei, chiwan wamindinguen mormøwei inchigueh? cha. ¿Katøgucha ñimui manrrømerane mur mara tøga bønrrøtirru? cha. 18¿Ñimbe kabmera tøgar gøbendø ashmøwei, kalumera tøgar gøbendø mormøwei inchigue? cha. ¿Yamba isumuitarru? cha. 19Tru na trattrøgatø pirriwan trattrø mil møguelan pirishib urasma tasinyu netsøbatø ñimbe ¿mam tasin tulisaig køh?— cha.

Inchen nømbe løtappe:

—Doce— chibelø gøn.

20Inchen Jesúsbe trenchibig køn:

—¿Tru na siete pirriwan pib mil misagwan pirishib uras chigucha netseelø mam tasin tulisaig køh?— cha payene:

—Siete— chibelø gøn:

21Inchen nømune Jesúsbe trenchibig køn:

—¿Inchendø katøgucha chigúi mormøwa gøtirru?— cha.

Betsaidasriig kabgaigwan Jesús tamarøb

22Incha Betsaida pueblosrø pubene, Jesúsweimay kan kab ashmígwan srúa amrrua, kabyu katørabsrumugu chib, meløben, 23nøbe nun tasku kemøra, puebloyugurri wambiisrø srúa ya, kabyu illimbitøga srøla, nui tasigwan kabgaigweim bala estsarabe:

—¿Maytøguen ashkuh?— cha payibig køn.

24Inchen tru møøbe ashabe, trenchibig køn:

—Møguelan ashar cha. Tusrmera latailø gøbendø, amønan— cha.

25Inchen Jesúsbe katøyug nui tasiimeran kab pala estsarabe, nune asingaruben, yandø tabig ashibig kørørmisra, chiwandøgucha tørgandø nebua ashibig misrøbig køn. 26Inchen Jesúsbe nui yamay ørøppe, trencha ørøbig køn:

—Puebloyu kebimøwei, truyu mungucha eshkamøwei inchig— cha.

Pedro Jesúswan: “Cristo gòn” chib*(Mt 16.13-20; Lc 9.18-21)*

²⁷Incha Jesúsbe nui kusrenanøb pera uniiløba Filipino birau Cesareasrø yamera tsitsø bønrrabsrømay webamba ambabe, mayu nòmun trencha payibig kòn:

—¿Misaamerabe nane mu gòn dah?— cha.

²⁸Inchen nømbe trencha lètabelø gòn:

—Møiløbe Juan Bautista gòn chiben; katøganeløbe Elías kòn chiben; møiløbe møikkøben Tius maig karuigwan eshkabig kuinrrun dan— cha.

²⁹Inchen Jesúsbe trencha payibig kòn:

—¿Trune ñimbe nane mu gòn chinrrague?— cha.

Inchene Pedrobe trencha lètabig kòn:

—Ñibe Cristo gòn— cha.

³⁰Inchen Jesúsbe nòmun mungucha eshkamønrrain garubig kòn.

Jesús nø kwamigwan eshkab*(Mt 16.21-28; Lc 9.22-27)*

³¹Incha nø tru Møg Misra Arrubiibe truba rruba kaig indinab megamig nebunrrun chib, kusrennøb mendabig kòn. Misagwan karubelø kølli misamera gøben, sacerdotesmeran karubelø gøben, tru Moisés pørigwan kusrenanøbelø gøben nune kaasig kømig nebunrrain gòn chib. Nune kweechen, pøn gwalømyube øsiiranrrun chib. ³²Iigwane Jesúsbe nømune tøgandø eshkabig kòn. Inchen Pedrobe nun nørørørø pera ya, murtø waminchib mendabig kòn. ³³Inchen Jesúsbe keesha asha, nui kusrenanøb pera uniilan ashabe, Pedrone trenchib namabig kòn:

—Satanás, inainukkurri tarømisr! cha. Kaguende ñibe isuppe, Tius lataig isumøtø, møguelø isuimay isun— cha.

³⁴Incha Jesúsbe nui kusrenanøb pera uniilanba, misagwanba wama, trenchibig kòn:

—Møikkøben nai mendig uñig købene, nøasiitø nuimburabigwangøba isumøtø, nuiuruswan mutab, nai mendig arrum nebunrrun cha. ³⁵Inchen møikkøben øsig kømigwangøba esegabiibe yandø pinab pinamig nebunrrun cha. Inchen nagurrimba, Tiuswei tabig srø wamgurrimba kwabiibe, managatig øsig kømigwan esegawa tøgagønrrun

cha. ³⁶¿Kan mөг yu pirau chine kөbigwan kerrigu nuindө maringucha, nui өsig kөmigwan trubisaibe, chiwein гúi tabig kөnrrab гө? cha. ³⁷¿Kabe kan mөөbe kwamөnrrappe, chi rranөbsruerah? chibig kөn. ³⁸Inchawei mөikkөben i mөin gwalөm misaamera itөлulөpteelө, kaig marөb misaamerai merrab naimburappa, na wamindiilaimburappa kөrig isub kөrig kui inchibigwane, nungucha kөrig burөrtrun, chibig kөn, Mөг Misra Arrubig tru nui Mөskawei tөrguegwalmabigu Tiusweindө tarөmari ángelesmeraba arrua.—

9 ¹Incha Jesúsbe katө trendaig kөn:
—Nabe ñimun cierton trendamөnrrun cha: Mөilөгөben yu purrabelө Tius nө ashib karub waig maramburab marөb arri ashmөwatөbe kwanrraamөn— cha.

Jesús ke peemayig misrөb

(Mt 17.1-13; Lc 9.28-36)

²Өyeeg taig yandө trunewei kan gwalөmdө balөben, Jesúsbe Pedronba, Santiagonba, Juanwanba nөmundө kan pala tunsrөmay pera ibig kөn. Incha trusrө nөmui merrab Jesúsbe ke peg lataig misrөbig kөn. ³Inchen nui kewagüilөbe pulө tөrchig tөr bilabig misrөbig kөn, muguen i pirau kewagüigwan tsara, өyeeg pulөzhig mariinrraamөnikke. ⁴Inchen Elíasba, Moisésba kenamisra, truilөbe Jesúsba waminchib pөnrrai nөmbe ashibelө гөn. ⁵Inchen Pedrobe Jesúswane trenchibig kөn:

—iKusrennөbig, nam yu pөnrramibe purө tab гөtan! cha. Pөngatө ya-ureg margun, chibig kөn, kan ñui, kan Moiséswei, kan Elíasweingue.—

⁶Kaguende nөmbe kwariilө bөnrrөwa, Pedrobe ni chi chib pasrarmabguen isumíig kөn. ⁷Inchene kan wañi nөmun pinөbulen, wañi umbugurrimbe kan wam trenchibig kөn:

—Iibe nai Nusrkai undaaraig kөn cha. Nune mөray— cha.

⁸Inchen mөimbe nөmuim bөtөгatan ashene, mu katөgan peebe nөmba kenamuptinchen, Jesúsтө pasrai ashibelө гөn.

⁹Incha tru tunsrөngurri kөrrөrrub amrruabe, Jesúsbe trencha garubig kөn:

—Mungucha waminchib гөnrrab гөmө cha, tru ñim asigwane, Mөг Misra Arrubig kwailai utugurri katөle өsiiramnegatig.—



San Marcos 9.4

¹⁰Inchen nɔmbe truigwane nɔmuinetɔ isub esegabendɔ, tru kwailai utugurri ɔsiiramnegatig taigwane, treebe mandɔ cha rrendermab nɔmdɔ payiyabelɔ gɔn. ¹¹Inchabe Jesúswane trencha payibelɔ gɔn:

—Tru Moisés pɔrigwan kusrenanɔbelɔbe ɛchindimba Elíasmerriḡ arrumig kɔn dah?— cha.

¹²Inchen Jesúsbe nɔmun trencha lɔtabig kɔn:

—Elíasmerriḡ arrubwei inchun cha, kerrigu katɔyug tamara kɔrrɔmartrab. Katɔ Tiuswei wamwan pɔrigube tru Mɔḡ Misra Arrubiibe truba kaig indinab, kaasinab indig kɔnrrun chippe, ɛmandɔgurrin rendah? cha. ¹³Inchendɔ nabe ñimune trendamɔnrrun, chibig kɔn: Elíasbe manawei arrubguen inchen, nɔmbe maig marɔḡ kɔbendɔ nun kerrigu treeḡ marig kɔn cha, Tiuswei wamyu Elíasweimburab maig taig treekke.—

Jesús kan unan kwaimandzig tøgagigwan tamarøb

(Mt 17.14-21; Lc 9.37-43)

¹⁴Incha nømbe katøle nui kusrenanøb pera uniilø purrainuumay amrrubene, nømune misag truba nu pøtøgatan tulundzuna gúin gøbig køn. Inchen truyube katø møiløgøsrøn tru Moisés pørigwan kusrenanøbeløgucha Jesúswei kusrennøb pera unielane øyeebe maig kø chib gúin gøbig køn. ¹⁵Incha Jesúswan ashippe, maya misaaba truba kwaara ashíb ‘manguen attirru’ chinrrab luløbelø gøn. ¹⁶Inchen Jesúsbe trencha payibig køn:

—¿Nømbabe chi gøn chibren gøgue?— cha.

¹⁷Inchen møikkøsrøn tru nu misag utu pasrabiibe trenchibig køn:

—Kusrennøbig, yu nai nusrkawan kan kwaimandzig waminchimig marig srua arrur cha. ¹⁸Chugøben pasrøben, kwaimandziibe kemøra, pirausrøn guchen, nøbe triimay chall guchib, trugulwan tsachib igatø! tinrranrrig misrøbig køn cha. Inchen nabe ñui kusrenanøb pera uniilan kwaimandzigwan wegutcha chiben, nømbe kaiman— cha.

¹⁹Inchene Jesúsbe trencha løtabig køn:

—iKan mõi misaamera øyeebe mailø gwaasamø cha, chigucha køremeeløbe! ¿Nabe managatig ñimba unamig kønrrerah? cha. ¿Kan øyeege ashiptø managatig ñimba unamerah? cha. Unan naimay srua amrruy— chibig køn.

²⁰Inchen srua amrruben, kwaimandziibe Jesúswan ashippe, unan mõi mõi purø rrømbøig sruaguchen, unøbe pirau peña, latøgushib triimay chall guchibig køn. ²¹Inchen Jesúsbe møskawan trencha payibig køn:

—¿Øyeege indiibe maya yana gøh?— cha.

Inchen møskaimbe trenchibig køn:

—Unøgurri treeg kuig køn cha. ²²Katø gatø kwaimandziibe kwetchab nagu gúi, piyu gúi keguchibig køn cha. Ñi chi maramdiig købene, namun øyeege kui meløben lastima asha, purugurra— chiben,

²³Jesúsbe trenchibig køn:

—Ñibe: “Chi maramdiig købene, martra” taibe cha, pøs, ke treeg martraitamab kørebigweimbe chitøgucha maramdiitø gøn— cha.

24Inchen tru urastø unai mōskaimbe øyah chib trashibig køn:
—iTreeg martraitamab kører cha. Kørenrrab inchimíig
kømønrrab purugurra!— chib.

25Inchen Jesúsbe misag ke kanbalatø tulundzunab amrrui
ashabe, trømbøig maringarub kwaimandzigwan trenchib namabig
køn:

—Kwaimandzig wamgaig, kalugaig, na ñun i unainukkurri
møi møi webinrrø tamønrrun cha. Katøbe yandø nuinug
kebarrumønrrabgue.—

26Inchene kwaimandziibe trashib, unan purø rrømbøig
sruagucha, webiben, unøbe kwaig lataig kørørmisren, møiløgøben
trenchibelø køn: “Kwain tsun” cha.

27Inchen Jesúsbe kwalyu kemørøb kusrabene, unøbe
pasramisrøptinchibig køn.

28Incha Jesúsbe yau kebibene, nui kusrenanøb pera uniiløbe
nundø trencha payibelø køn:

—Nambe kwaimandzigwan wambig weguchappe, ÷chindimba
kaimah?— cha.

29Inchen Jesúsbe trenchibig køn:

—Øyeeg kwaimandzigwane Tiusba waminchib miawatøwei
weeramig køn— cha.

Jesús nø kwamigwan katø eshkab

(Mt 17.22-23; Lc 9.43-45)

30Incha truyugurri ambabe, Galileawan puraambub amba,
Jesúsbe mugucha wammørmønrrai inchibig køn. 31Kaguende nui
kusrenanøb pera uniilan trenchib kusrenanøb arrig køn:

—Tru Møg Misra Arrubigwane møguelai tasku tranen,
nømbe kwetchun cha. Inchendø kwaig pøn gwalømyube katø
øsiiranrrun— chib.

32Inchen nømun treeg wamindigwane nømbe chi tainguen
mørmøwa, payamibe kørig kui inchibelø køn.

÷Mas nuibe mu guerah?

(Mt 18.1-5; Lc 9.46-48)

33Incha Capernaumsrø pua, Jesúsbe yau kebyabe, nui
kusrenanøb pera uniilan trencha payibig køn:

—÷Mayube chi charre payiyab amrrub gøgue?— cha.

³⁴Inchen nømbe chigucha lètømeelø gøn, kaguende mayube nømui utube møig mas nuig kønrrerah charre payiyab gúig kua.

³⁵Incha Jesúsbe wamisra, tru doceelan wamabe, trenchibig køn:

—Møikkøben nømerrig merrab pasrag købene, mayelai wendau basramisra, mayeelø karuindiig megamig køn— cha.

³⁶Incha kan unan srua ya, nømui tøbøtag pasra, nui kwalyu mutabe, trenchibig køn:

³⁷—Møikkøben i unø lataigwan nai munchiyu tab wamab utabiibe, nan utan cha. Inchen nan utabiibe, nan utømø, nan karua ørøbigwan utan— cha.

Katøganelaingatiig kømíibe namuingatiig køn

(Mt 10.42; Lc 9.49-50)

³⁸Inchene Juanbe trenchibig køn:

—Kusrennøbig, kan møikkøsrøn ñui munchiyu kwaimandziimeran webusri aser cha. Inchendø namba uñibig kømubene, nambe truigwane merer— cha.

³⁹Inchene Jesúsbe trenchibig køn:

—Merømøtay cha. Kaguende mugøben kan maramburab marig nai munchiyu mara, katøburøbe nan trømbøig waminchaamøn cha.

⁴⁰Namun namig kurrømíibe namuingatiig køn cha. ⁴¹Nabe ñimun cierton trendamønrrun cha: Møikkøben ñimun Cristoielø gua asha, kan pi basutøguen nai muchiyu ñimun srørrøbiibe, truburø nui ketigwane utømø gømø, utønrrun cha.

Katøganun kaig mariiløyu kebenøsrkamibe kørig kømðiig køn

(Mt 18.6-9; Lc 17.1-2)

⁴²Møigwan gøben i shushmera latailan nan kørebelan kaig mara kebenøsrkøbigweimbe trembe tru tirigu guitsig nu srugwan naashigu iløsrā, mar umbusrø kegutsig kuinguen søl gøbsruinrrun cha. ⁴³Pøs ñui tasig kaig maringarua kaigu ñun kebenøsrkøbene, par, chibig køn. Trembe managatig øsig wamsrø kan dasiitø tøgāig kebyamikken søl gønrrun cha, pa tasig tøgāig tru mōra melamnug tru managuen kwamø naasrø kebibgunrriibe; ⁴⁴truyube nømui yau mab gushimera kwamøwei, katø nag managuen kwamøwei inchibsrø.

⁴⁵Katø ñui srøb kaig maringarua kaigu ñun kebenøsrkøbene, trunungucha par, chibig køn. Trembe managatig øsig wamsrø

kandarø srøbgaig kebyamikken səl gønrrun cha, tru mōra melamnug pa srøppaig kegutsig kōbgunrriibe, ⁴⁶truyube nōmui yau mab gushimera kwamōwei, katø nag managuen kwamōwei inchibsrø.

⁴⁷'Kabe ñui kab kaig maringarua kaigu ñun kebenørskōbene, trunun wesru, chibig kōn. Trembe Tius nō ashib karub wainug kan gaptø tōgaig kebyamikken səl gōn cha, pa gab pusraig tru mōra melamnug kegutsig kōbgunrriibe;

⁴⁸nōmui yau mab gushimera kwamōwei,
nag managuen kwamōwei inchibsrø.

⁴⁹'Kaguende mayeelōba tretōga larrørskōb lataitōwei naatōga larrørskailō gønrrun cha. ⁵⁰Trebe tabig kōn. Inchendø yandø tre larrmīg misrene, ÷katōbe ñimbe chinha larrōbig martrague? Incha ñimbe ñimasiitø tre may larrig latailō guy. Inchawei ñimbe ambugurri igurri lata tab waramig kōn— cha, Jesúsbe trenchibig kōn.

Keeba, sraimba petiyamumigwan Jesús waminchib

(Mt 19.1-12; Lc 16.18)

10 ¹Jesúsbe tuyugurri webya, Judea birausrōmayba, Jordán bi ambōgatø pōrr gal-labgatōsrōmayba iben, katø trusrōngucha misaamera tulundzunab mendōben, nōbe trendø treeg marōbig kua, katø nōmun kusrenanōb mendabig kōn.

²Inchen mōilōgōsrōn fariseosmera Jesúsban kemallabe, trencha payibelø gōn, maig inchibig kōtashchab:

—÷Keebe sawan kutsamig chi meriimīg kō, chindah?— cha.

³Inchen nōmune trencha lōtabig kōn:

—÷Moisésbe ñimune maig karuig kōh?— cha.

⁴Inchen nōmbe trenchibelø gōn:

—Moisésbe ka tarōmisriyabasig kōn cha. Sawan treeg martrab cha, eshkabig kilga marabe, ka tarōmisramig kōn daig kōn— cha.

⁵Inchene Jesúsbe trenchibig kōn:

—Moisés treeg marbashippe, ñimui manrrōmera isumīg larrø murelōgurri ka treeg martrai ñimun pōrig kōn cha. ⁶Inchendø srōsrø gwalōm chiwandōgucha marōb uras: “Tiusbe mōwanba, ishuwanba ellmarig kōn cha. ⁷Øyeekkurri mōōbe mōskawanba, usranba elatchun cha, nui sraimba kandø gōnrrab. ⁸Incha tru pailōbe kan asrtø gōnrrun” cha. Inchawei yandø pailø gōmō,

kan asrtø gøn cha. ⁹Inchawei treeg købene, Tius kandø mara lindisaigwane møøbe tarømaramig kømøn— chibig køn.

¹⁰Incha yausrø purrøwabe, nui kusrenanøb pera uniiløbe trunun katøyug payen,

¹¹Jesúsbe trencha løtabig køn:

—Møikkøben srawan kucha, tarømisra, katøganba kasharabiibe nune itølula kørømaran cha. ¹²Kabe sraingurringucha kewan kucha, tarømisra, katøganba katø kasharawabe, treetøwei itølulan— cha.

Uregwan Jesús mayanguen tab gúilø gønrrain chib

(Mt 19.13-15; Lc 18.15-17)

¹³Inchen ureemeran Jesúsweimay srua amrrubelø gøn, nø estsartrai. Inchen kusrenanøb pera uniiløbe tru srua amrrubelane namaptinchen, ¹⁴Jesúsbe trunun ashabe, nama, trenchibig køn:

—Ureemerane merømø, naimay ka amrrubasay cha. Kaguende Tius nø ashib karub waibe nøm latailaiwein gøn cha. ¹⁵Nabe ñimun cierton trendamønrrun cha: Møikkøben Tius nø ashib karub wainuguigwan kan unø lataitøwei utaptinchimíibe managuen truyube kebinrraamøn— cha.

¹⁶Incha nui kwalyu muta, tasigwan uregweim bala estsarabe, ‘mayanguen tabelø gønrrigay’ chibig køn.

Kan pua møg Jesúsba waminchib

(Mt 19.16-30; Lc 18.18-30)

¹⁷Jesús nui maywan inrrab ibene, kan møg luløb arrua, nui merrab tømønrsabe, trencha payibig køn:

—Kusrennøbig tabig, ¿managatig øsig kømigwan Tius tranig tøgagønrrappe nabe chi maramerah?— cha.

¹⁸Inchen Jesúsbe nune trencha løtabig køn:

—¿Chindimba nane: “tabig” cha wamøgu? cha. Tabiibe kandø gøben, truike Tiustø gøn cha. ¹⁹Ñibe Tius maig maramigwan martrai pønrsailane yandø ashibig køn cha: “Kweechimøwei, itølulømøwei, nilømøwei, katøganelaimburab isa waminchimøwei, may wamincha chiyugøben kebenøsrkømøwei, ñui usri mōskawane maig købash inchimø, tab indamig køn” tailan.—

²⁰Inchen tru møøbe trencha løtabig køn:

—Kusrennøbig, nabe iilane kerriguh matsinø-unøgurri marøbig kur— cha.

²¹Inchen Jesúsbe tru matsinan tab ashabe, nun undag køptinchen, nøbe trenchibig køn:

—Kan chigøsrøndø palan cha. Ya, ñui chi tøgagúigwan yana, waachameran tranø cha. Treeg marabe, ñibe srømbalasrømbe chigurrimbunø tøgagønrrun cha. Trugurrimbe arrua, nai mendig amø— chibig køn.

²²Inchen tru møøbe øyeeg taigwan mørøppe, nui maløbe minchiptinchibig køn. Incha truba isui ibig køn, kaguen truba puaig kua.

²³Inchen Jesúsbe pøtøburab ashabe, nui kusrenanøb pera uniilan trenchibig køn:

—iTius nø ashib karub wainug puarmera kebambamibe truba murig kønrrun!— cha.

²⁴Inchen nui kusrenanøb pera uniilø trunun mørabe, truba kwaaren, Jesúsbe katøyug nømun trenchibig køn:

—Ñim nai ureezheelø, Tius nø ashib karub wainug kebambamibe truba murig køn cha. ²⁵Kan camelloquen tsusain gal rrabyu illmø larrayandiig køben, kan puaibe Tius nø ashib karub waisrø kebinrrab gaimanrrun— cha.

²⁶Inchen iigwan mørabe, nømbe masken kwaara, nømasiyaitø trenchib payiyabelø gøn:

—Treeg købene, ðkaigyugurrimbe mu gúi wesraig kønrrautah?— cha.

²⁷Inchen Jesúsbe nømun ashabe, trenchibig køn:

—Møgueløbe iigwan martrab gaimanrrun cha. Trune Tiusweimbe, chi treeg kømøn cha. Kaguen Tiusweimbe chitøgucha maramdiitø gøn— cha.

²⁸Inchen Pedrobe trenchib mendabig køn:

—Au, nambe chi tøgagúigwan kerrigu elacha, ñui mendig amrruig køn— cha.

²⁹Inchen Jesúsbe trencha løtabig køn:

—Nabe ñimun cierton trendamønrrun cha: Møikkøben nui yawan, nunelan, nuchalan, kabe usri mōskawan, ureemeran, pirømeran nagurrimba, Tiuswei tabig srø wamgurrimba elachibiibe, ³⁰møi yu piraube cien biejes menrraguen yamera, nunelø, nuchalø, usral, nusrkalø, pirømera utønrrun cha,

chigøbendø indinab melamig kuindøgucha. Inchen kansrømbe managatig øsig kømigwan utønrrun cha. ³¹Inchen møiløgøben møiya yu pirau nømmerrig bønrrabeløbe trusrømbe srabe melønrrun cha. Inchen yu pirau srabe melabeløbe trusrømbe nømmerrig bønrrønrrun— chibig køn Jesúsbe.

Jesús katøyug nø kwamigwan eshkab

(Mt 20.17-19; Lc 18.31-34)

³²Katø Jerusalénmay nebambub amba, Jesúsbe nui kusrenanøb pera uniilai merrab ib pasrøbene, nømbe truba kwaariilø ambub gøben, kaneløbe wendau kørig kuilø ambubelø gøn. Inchen Jesúsbe katø tru doceelan nørø wama, nun chi purainrrabigwan eshkab menda trenchibig køn:

³³—Au, nambe Jerusalénmay nebambub amber cha. Trusrømbe tru Møg Misra Arrubigwane sacerdotesmeran karubelanba, tru Moisés pørigwan kusrenanøbelanba tranen, truiløbe nune kwanrrai pasra, judíos komeelan tranrrun cha. ³⁴Inchen nune indzaashib, illimbi tuchib, ichib srua gua, kweechen, pøn gwalømyube katøle øsiiranrrun— chibig køn.

Jacoboba, Juanba kan chigøsrøn nòmuyasig miab

(Mt 20.20-28)

³⁵Inchen Zebedeowi nusrkalo Santiagoba, Juanba, Jesúsban kemallabe, trenchibelø gøn:

—Kusrennøbig, namuyasig nam kan chigøsrøn mianrreender cha. Kan treeg marøbsrumuguh— cha.

³⁶Inchen Jesúsbe trencha payibig køn:

—¿Nimuyasig chi maramig balain gøgue?— cha.

³⁷Inchen nømbe lötappe:

—Ni wainug torguegwalmabiisrø namun kanun ñui kusrmay, kanun atsimay purrønnobsrumuguh— cha trenchibelø gøn.

³⁸Inchen Jesúsbe nømune trenchibig køn:

—Ñimbe chi miab pønrrermabguen mormøn cha. ¿Na tru copayu mutsam biwan kabe ñim muchib, katø nan treeg chine trømbøig nebub pinøbuløb arrubig na utamigwan ñim trunun utab inchague?— cha.

³⁹Inchen nømbe lötappe:

—Øø, maramønrrundø— chibelø gøn.

Inchene Jesúsbe trenchibig kòn:

—Na mutsim biwane ñimbe muchibwei inchun cha.

Katø tru nan purø rrømbøig nebub pinøbuløb arrubig na utamigwangucha ñimbe utabwei inchun cha. ⁴⁰Inchendø tru kusrmayba, atsimayba purramigwane, na rranamig kømøn cha. Tru purramibe nøm purrønrabelayasig tamariilaindø gøn— cha.

⁴¹Inchen tru nui kusrenanøb pera uniilø diezeløbe trunun mørabe, Juanwanba, Jacobonba namab mendabelø gøn. ⁴²Inchen Jesúsbe nømun wamabe, trenchibig kòn:

—Ñimguen ashen judíos kømø misaameran karub purrabeløbe nøm karub tøgagúilane maig købash inchib, ke nøm garub purran cha. Inchen truyu møguelø nørreelø nøm garub purrabeløbe mungucha manchinrraingaig karub purrabelø gúi ashchai nømbe kenamaran cha. ⁴³Trune ñimui utube ñimbe øyeelø gømumig kòn cha. Treeg købgunrriibe, ñimui utu mas nuig kukkøbene, katøganelø karuindiig megamig kòn cha. ⁴⁴Inchen ñimui utu møykkøben ñimmerrig melag købene, mayeelø karuindiig megamig kòn cha. ⁴⁵Pøs tru Møg Misra Arrubikken katøganelø nuyasig marøb melønrrai arrumøtø, nøguen katøganelayasig marøb meganrrappa, nø kwaitøga truba nu misagwan purøbagarawa, kaigyugurri wesranrrappa arrig kòn— chibig kòn.

Tru kabgaig Bartimeowan Jesús tamarøb

(Mt 20.29-34; Lc 18.35-43)

⁴⁶Incha Jericósrø pua, Jesúsbe tru ciudayugurri nui kusrenanøb pera uniiløba misag truba nu beraig webya iben, kan kabgaig Bartimeo taig Timeowei nusrkai, ‘anzhig kettra’ chib, miab may menda wawabe, ⁴⁷Jesús nazaretsriig kemallib arri mörøppe, trashib mendabig kòn:

—iJesús, merrabsrø Davidwei Nusrkai, nan lastima ashcha!— chib.

⁴⁸Inchen ke møyiløgøben niløtø wanrrai namingucha, nøbe trenchib mas mur trashibig kòn:

—iMerrabsrø Davidwei Nusrkai, nan lastima ashcha!— chib.

⁴⁹Inchen Jesúsbe pasramisrabe:

—Wamay— chiben, nømbe kabgaigwane trenchibelø gøn:

—iChi isumø, kurraptinchi! cha. Kaguende ñune wamab pasran— cha.

⁵⁰Inchene nøbe nui tsina waigwan kuchib, pørtrappe, pasrambua, Jesúsweim bulusrø pubig køn. ⁵¹Inchen Jesúsbe trencha payibig køn:

—¿Ñuyasig na chi maramig baløta?— cha.

Inchen tru kabgaibe trencha løtabig køn:

—Kusrennøbig, nai kabmera ashibig misrimbe gøtan— cha.

⁵²Inchen Jesúsbe trenchibig køn:

—Inrrø cha, ñui isubigwan nainug pasriitøgatø, tabig kørømisran— cha.

Inchen tru urastø tru kabgaibe ashibig misra, Jesúswei mendig ibig køn maywan.

Jesús Jerusalén kebib

(Mt 21.1-11; Lc 19.28-40; Jn 12.12-19)

11 ¹Yandø Jerusalénsrø chab pub amba, Betfagéba, Betaniaba pueblomerayu tru Olivos Tunsrø chab puabe, Jesúsbe nui kusrenanøb pera uniilø pailan trenchib karua ørøbig køn:

²—Ø pinrrøguesrø yamera tsitsø bønrrabsrømay ambay cha. Trusrømbe pubyutø kan burro-unø muguen itøguaniimíig litsig wetørranrrabguen cha. Picha, srua amrrunrrigay cha. ³Inchippa møikkøben: “¿Chinchainchigue?” cha payene: “Señor palai indan cha. Katø petø pegutchn” chinrrigay— cha.

⁴Inchen nømbe ambene, burrobe mayu kan yaskab pulu litsig pasrain gøbene, nømbe pichen, ⁵møiløgøsrøn truyu pønrrabeløbe trenchibelø gøn:

—¿Burrone chinchab pichigue?— cha.

⁶Inchen nømbe Jesús maig taigwan treeg lètøben, truiløbe ka sruambashen, ⁷nømbe Jesúsweimay burro-unane srua amba, nømuim bala kewagúilan burron kayen, Jesúsbe itøguanabig køn. ⁸Inchen truba yamelø nømui pala kewagúilan maywan kayen, kaneløbe chugøben nøørørørø kullag srarcheelø lutiicha, maywan kayen, ⁹merrab amrrubelø lata, wendau amrrubelø lata trenchib trashibelø gøn:

—iHosanna! chib;

iSeñor Tiuswei munchiyu nø ørig arrubiibe mayanguen tab gúig køn! chib.

¹⁰ iNamui merrabsrø mōskai David nō ashib karub waig kōbig arrubiibe mayanguen tab indig kōn! chib.

iSrōmbalaserōmbe Hosanna!— chib, trashibelō gōn.

¹¹ Inchen Jesúsbe Jerusalén pua, Tiuswei yau kebyabe, truyu chiwan gōben ambumay imay tab ashabe, yandō maaben gōben, Betaniasrōmay nui doce kusrenanōb pera uniilōba ibig kōn.

Jesús mamig niimō higuera tusrwan kaig nebunrrain chib

(Mt 21.18-19)

¹² Katō gwalōm Betaniagurri webamba, Jesúsbe parōgwai mōra, ¹³ yabgurri kan higuera tusr ishiibaig pasrai ashabe, mamig niga tusr kōtashchab ibene, tru higos nigam bōlmera gōmuben, ka ishiitō tōgaig wetōrrabig kōn. ¹⁴ Incha Jesúsbe tru higuera trenchibig kōn:

—Managuen ñuinukkurri mamig niguigwan muguen manrrab tamibe chi gaanrrun— cha. Inchen nui kusrenanōb pera uniilōbe nō trendaigwan mōrōbelō gōn.

Tiuswei yawan Jesús chish marōb

(Mt 21.12-17; Lc 19.45-48; Jn 2.13-22)

¹⁵ Incha nōmbe Jerusalénsrō pua, Jesúsbe Tiuswei yau kebyabe, truyu yanōb, penab inchib warabelan wambig webetab mendaptinchibig kōn. Katō misagwan an yunōmarōb purraig mishatsiimeran utsōbetab, palomamera yanōbelō purraigwan utsōbetab incha, ¹⁶ katō mungucha truyube chigōben srua puramrramamīg kōn. ¹⁷ Incha trenchib kusrenanōbig kōn:

—Tiuswei wamwan pōrigube trenchibig kōmuitarru cha:

“Nai tab yabe mayeelō chu birausrō misaameraindōgucha

Tiuswan wamindi ya gōn cha wamig kōnrrun” daig.

Trune ñimbe nileelō warain rrab marin gōn— cha.

¹⁸ Inchen sacerdotsmeran karubelōba, tru Moisés pōrigwan kusrenanōbelōba mōrabe, mandō incha kweetsamdiig kōtashchab lab mendabelō gōn, nun kōriimata, kaguende maya misaamera Jesús kusrenanigwan ke kwaara asha gōben. ¹⁹ Inchen yandō yem gōben, Jesúsbe nui kusrenanōb pera uniilōba ciudayugurri webya ibig kōn.

Higuera tusr mamig niimíig yandø mul-laig

(Mt 21.20-22)

²⁰Incha gatø løtsø truwan puraamben, tru higuera kutøgue srolbañau mul-lain gúi ashabe, ²¹Pedrobe Jesús trendaigwan isua, nune trenchibig køn:

—Au, Kusrennøbig, tru ñi kaig nebubash cha trendaig higuera chab mul-labguen indin gøn— cha.

²²Inchen Jesúsbe trenchibig køn:

—Ñimui isubigwan ke Tiusweinuutø pasra bønrray cha.

²³Nabe ñimun cierton trendamønrrun cha: Møikkøben i tunwanma øyah taimbe: “Yugurri mendamisra, maryu kebeñ” cha. Incha nui manrrøyu treeg kòmuptinchaitamab isumøtø, maig taig ke treeg marig kønrraitamab kørebene, treeg marig kønrrun cha. ²⁴Inchawei nabe ñimun trendamønrrun chibig køn: Ñim chiwandøgucha Tiusba waminchib miappe, chabguen trunun utabguen indermab kørewabe, ñimbe utønrrun cha. ²⁵Incha ñim Tiusba waminchib pønrrappe, møyigwan gøben namig isuig tøgaguabe, nø kaig marigwan ulø baymønrrab, pesannamig køn cha, srømbalasrø wabig ñimui Møskaingucha ñimui kaig mariilan treetøwei ulø baymø, pesannaig kønrraimbe. ²⁶Kaguende katøgan ñimun kaig maren, ñimma pesannamø, ulø bayene, ñimui Møskai srømbalasrø wabikkucha pesannamø, ñimui kaig mariilan ulø bayrrun—chibig køn.

Jesúswei karumburab karuibe mu mandamgaig

(Mt 21.23-27; Lc 20.1-8)

²⁷Incha katøle Jerusalénmay amrrua, Jesúsbe Tiuswei yau llirab uñene, sacerdotesmeran karubeløba, tru Moisés pørigwan kusrenanøbeløba, misagwan karubelø kølli misaameraba nun kemallabe, trencha payibelø gøn:

²⁸—¿Ñi mariilane mu garua basriitøgarre margu? cha. Kabe ðøyeeg maramelane mu garua basrta?— cha.

²⁹Inchen Jesúsbe trencha løtabig køn:

—Na ñimun kan chigøsrøn payrrab inchar cha. Nan løtøbene, øyeelan martraimbe nan i mu mandamgaig marig chugurriig kuig na ñimun eshkarrumøn cha. ³⁰Juan misagwan piu umbu ulsrøb

uniibe ðsrømbalasrøngurrin gúig kø chindah, kabe møgueløgurrin gúig kø chindah? cha. Løtørray— chibig køn.

³¹Inchene nømdø trenchib payiyab mendabelø gøn:

—Trube, nam: “Srømbalasrøngurrin gúig køn” chibene, nøbe namune trenchinrrun cha: “¿Chindimba nune køremøgue?” cha. ³²Kabe:

“Møgueløgurrin gúig køn chinrrab ashendø, ðmaig købsruerah?”— cha. Øyan chippe, kaguende nømbe misagwan kørig isuarre inchibelø gøn, kaguende mayeeløba Juanwane cierton Tius maig karuigwan eshkabig kui asha tøgagøbelø gøben. ³³Treekkurri Jesúswane trenchibelø gøn:

—Maig kuindøbeh— cha.

Inchen Jesúsbe trenchibig køn

—Trube, nagucha eshkamumønrrun cha, iilan na mu garuitøga marigwan.—

Kwallibelø larrø gailan kemesra wamindig

(Mt 21.33-46; Lc 20.9-19)

12 ¹Incha Jesúsbe ‘øyeeg lataitøwein gøn’ chib kemesra wamindiiløtøga eshkab menda, trenchibig køn:

—Kan møg nuim birau uvas tra mara, trugurrimbe panig basra, uvas piwan wesrumikkucha pirau tamara basra, katø tru ellmarigwan ashib laramig kan ya-unø palaig mara basran cha. Incha nui pirøwan katøganelan misrigwan pirishinrraptø kwallchai tranabe, yabsrømay yan cha. ²Incha yandø lurramig puben, nui kan karuindiig megabigwan tru kwallchab utabelan tru kanbalø lurrigwan utønrrai karua øriibe, ³nømbe nun kemøra, kurragucha, chiguchagaig ørøbelø gøn cha. ⁴Inchen tru puaibe katøgan karuindiig megabigwan øren, truigwane turyu larrøgucha, nømbe tsalø wamabelø gøn. ⁵Inchen tru ellmarig buaibe katøgucha katøgan karua øren, truigwane kweetsin gøben, katøbe mas yam øren, kanelane kurrabetab, kanelane kweechib inchibelø gøn.

⁶Inchen srabe yandø katøgucha kandø kørrømisrøbig køn, truipe nui trag nusrkai, undaaraig. Incha yandø srabebe truigwan ørøbig køn, trenchib: “Nai nusrkawane chinchimønrrun” cha. ⁷Treendingucha tru kwallibeløbe kangurrin gangurri nømasiyaitø trenchibelø gøn: “Pirøwan ketig utønrrabiibe iigwein gøn cha. Kwetchab amun cha. Pirøbe namuin gørrømisrtrun” cha. ⁸Incha nusrkawane kemøra, kweecha, asrwane tru uvas traugurri weguchibelø gøn— cha.

⁹Incha Jesúsbe trenchibig køn:

—¿Tru uvas tra buaibe chi martrerah? cha. Arrua, tru kwallibelane kweecha, tru uvas trawane katøganelan tranrrun cha.

¹⁰¿Ñimgan Tiuswei wamwan pørigu iigwan mana lemeelø gøtirru? cha:

Tru ya marøbelø kaasig sruube katsiisrø pølbasa wayamig mas purø tab srukken misrin gøn daigwan.

¹¹Señor Tius øyeeg marene,
namuin gabyube truba tabig asønatan cha.—

¹²Inchen Jesúsuan merrarrawa sruamrrab kemørtrab inchibelø gøn, kaguende tru ‘øyeeg lataitøwein gøn’ cha waminchippe, nòmun guemesra wamindi møra. Inchendø nømbe misag truba nuwan køriimata, kagøbasha, pasramnetø ambuptinchibelø gøn.

Tiuswein gønrrabigwane Tiuswan rranøppe, Césarwein

gønrrabigwane Césarwan rranøb

(Mt 22.15-22; Lc 20.20-26)

¹³Incha Jesúsweimay mø fariseosmeran gøsrønba, Herodesweingateelanba ørøbelø gøn, chigøben wamindingarua, nø kalø lètøbene, truyu kebenøsrkønrrab isua. ¹⁴Inchen truiløbe amrrua, trenchibelø gøn:

—Kusrennøbig, ñibe ciertonigwan waminchib møg kui aser cha. Katø misag maig chitanmaptø mørøb pasrømíig køn cha. Kaguende ñibe mundøgucha nòmun mailø gøtasha kandarøtø imøtø, Tiuswei maywan ñibe maig kusrenanamigwan cierton sølwan gusrenanøbig køn cha. Trube, ¿tru Roma maya misagwan karub wabigwan nam an pagaramig merømuig køh? Kabe, ¿merig køh, chinderah? cha. ¿Tranrrautah? Kabe ¿tranmønrrautah?— chibelø gøn.

¹⁵Inchen Jesúsbe nòmune ka isatø, palatø tab inchib chib pønrrai ashabe, trenchibig køn:

—¿Nane chindimbarre kebenøsrkønrrab inchigue? cha. Kan pagaram anwan srua amrruy cha, na ashchab.—

¹⁶Inchen srua amrruben, Jesúsbe trenchibig køn:

—¿I anyu maløba, i munchi pøriibabe muin gøh?— cha.

Inchen nømbe:

—Tru Césarwein gøn— chiben,

¹⁷Jesúsbe trencha løtabig køn:

—Césarwein gøbene, trube, Césarwan tranay cha. Inchen Tiuswein gøbene, Tiuswan tranay— cha.
Inchen nune ke kwaara ashibelø gøn.

Kwailø gatøle øsiiranrrab gúigwan payib

(Mt 22.23-33; Lc 20.27-40)

¹⁸Inchen mø saduceosmera gøsrøn Jesúswan ashchab ambubelø gøn. Truiløbe tru kwabeløbe øsiiramønrrun chibelø guabe, Jesúswane øyeege bayibelø gøn:

¹⁹—Kusrennøbig, Moisésbe namun treeg bōra gørrømarig køn cha: “Møigwei nuneg køben kwawa, sawan urekkaig kørrømarene, trube, tru nunebe piudaba kasharawa, nuneg kwabigweimburab ureg tøgagømig køn” chibig. ²⁰Trube, siete nunelø købig køn cha. Indiibe srøsriibe kasharawa, chi urekkaig kwaben, ²¹tru wendauikkucha tru piudaba kasharawa, katø chi urekkaitøwei kwaben, katø tru pøn gønrrabyuigwangucha treetøwei nebuben, ²²yandø soteeløba tru ishuuba kasharawa, møikkucha ureg kørrømarig køn cha. Inchen yandø srabebe ishukkucha kwan cha. ²³Trube, tru kwabelø katø øsiirabene, ñnøbe møigwei srain gønrrerah? cha payibelø gøn, tru sieteeløba nune srai mara tøgagúig købene.—

²⁴Inchene Jesúsbe trencha løtabig køn:

—Ñimbe mandø gúinguen mormøwa pella bønrrappe, ñTiuswei wamwan pørigwanba, katø Tiuswei maramburab marigwanba tab nebua ashmeelø guarre pella bønrrømøtirru? cha. ²⁵Kaguende kwailø katøyug øsiirappe, kasharamøwei, kasharanmøwei inchun cha. Treeg kømøtø, srømbalasrø ángelesmera lataløtøwein gønrrun cha. ²⁶Inchen tru kwailø katø øsiiramigweimburappe ñnimgan Moisés pørigu lemeelø gøtirru? cha, tru tusr-unø naarabigugurri Tius nun øyah taigwan: “Nabe Abrahamwei Tius, Isaacwei Tius, Jacobwei Tius kur” cha trendaigwan. ²⁷Tiusbe kwailai Tius kømøtø, øsiguelai Tius køn cha. Inchawei ñimbe purø nu pella bønrran— chibig køn.

Tius karua martrai pønsrailai utuig mas nuig

(Mt 22.34-40)

²⁸Inchen tru Moisés pørigwan kan kusrenanøbig tru ‘maig køh’ cha, payiyab gøben mørøb pasrabiibe, Jesúsbe söl løti mōra, nun kemallabe, trencha payibig køn:

—¿Tius martrai karua pønsrailai utuig mas nuibe møig køh?— cha.

²⁹Inchen Jesúsbe trencha løtabig køn:

—Tru martrai karua pasrig mas nuibe iig køn cha: “Au, Israel misag, møray cha. Namui Señor Tiusbe, Señor nøtø gøn cha. ³⁰Señor ñui Tiuswane ñui manrraugurri kerrigu newan undaaraitøgaba, kerrigu ñui øsig basraitøgaba, kerrigu ñui turtøga isumburab isuitøgaba, katø kerrigu ñui asru chishkømburab chish kuitøgaba undaaramig køn” tan cha. ³¹Inchen tru wendauibe iig køn cha: “Ñima ñiasitøwei maig undaguig køppe, ñui mendaigwangucha treetøwei undaaramig køn” cha. Tru maig maramigwan martrai pønsrailø i pagatø lataig nørreeløbe katøgane chi gaagøn— cha, trenchibig køn.

³²Inchen tru Moisés pørigwan kusrenanøbiibe trenchibig køn:

—Kusrennøbig, ñibe sølwein dan cha. Tiusbe kandø gøn chib, katøgane mu gaagøn chib, ³³Tiuswan kerrigu ñui manrrøtøgaba, kerrigu ñui isumburab isuitøgaba, kerrigu ñui asru chish kømburab chish kuitøgaba undaarab, katø mendaigwangucha nøasiitø lataitøwei undaarab indamig køn cha trenchippe. Iilan mariibe Tiusweyasig traniiba, katø animalmeran kweecha Tiusweyasig parriiløba lataitøguen gømøtø, mas nuig køn— cha.

³⁴Inchen Jesúsbe truibe ke tab isua løti ashabe, nune trenchibig køn:

—Tius nø ashib karub pasrainug pumibe ñibe ke tre yab pasrømøn— cha.

Inchen yandø gatøbe Jesúswane mugucha chi payrrab inchimeelø gøn.

¿Cristobe mui Nusrkain gøh?

(Mt 22.41-46; Lc 20.41-44)

³⁵Jesús Tiuswei yau kusrenanøb pasrøwabe, trencha payibig køn:

—¿Tru Moisés pørigwan kusrenanøbeløbe chindimba tru Cristone Davidwei misagugurri arrubig køn dah? cha.

³⁶Kaguende Davidtøweinguen Espíritu Santo eshkaig trendaig køn cha:

Señor Tiusbe tru nai Señorwane trendan cha:

“Nai kusrmaygatø wamistr cha,
 ñui ashig kømui inchib tsalø inchibelan
 ñi itøbunønrrai ñui srøb umbu na pønramnegatig.”
³⁷Pøs Cristone David nõtøweinguen: “Señor” cha wamøbene, trube,
 ¿mandøgurri Cristobe Davidwei nusrkain gønrrab gøh?— chibig
 køn.

Inchen misaamera truba nu basrabiibe truba chull mørøbelø
 gøn.

**Moisés pørigwan kusrenanøbelan nøm mailø gúigwan Jesús
 waminchib**

(Mt 23.1-36; Lc 11.37-54; 20.45-47)

³⁸Jesús kusrenanøb pasrøwabe trenchibig køn:
 —Tru Moisés pørigwan kusrenanøbelane ashiptø guy cha.
 Truiløbe kørrelø kewa llirab amønami g chullelø gøn cha, katø
 penab, yanøb indiisrø nømune maig købash kømø, truba tab
 wamønrrai inchib, ³⁹katø judíosmera tulundzuni yamerayube
 purø tab purramdønug purrag kui indamba, katø lincha tabig
 mabyugucha nørreelø purrainug purø tabigu purrag kui indamba
 inchibelø gøn cha. ⁴⁰Incha gatø piudasmeran nømui yameran
 kerrawabe, tabelø misrøb ke ka yandø truba yana Tiuswan
 waminchibelø gøn cha. Truiløbe møra melamig mas nuigwan
 utønrrun— chibig køn.

Waacha biudai an guegutsig

(Lc 21.1-4)

⁴¹Mana gøsrøn Jesús Tiuswei yau Tiusweyasig an
 guebusrinug tru binrrøgue wabene, truba nu misaabe truyu an
 guebusrøb gøben, truba yamelø puarmerabe truba nørøweyig
 an kebusri ashibig køn. ⁴²Inchen truyu kan waacha piuda
 arruabe, truyu pagatø øskø andø purø lamøzhig kebusren,
⁴³Jesúsbe nui kusrenanøb pera uniilan wamabe, trenchibig
 køn:

—Nabe ñimun cierton trendamønrrun cha: I waacha piudabe
 cajayu pusrøbelø kanelø lataguen gømø, mas nu guebusran cha.
⁴⁴Kaguen mayeeløba nømbe undaigwandø rranen, trune nøbe
 waacha gøptø, nui kerrigu tøgagúigwan tranan cha, tru nui øsig
 tsumig kerrigu tøgagúigwan.—

Tiuswei yawan pinisaig kōnrrun cha, Jesús eshkab*(Mt 24.1-2; Lc 21.5-6)*

13 ¹Jesús Tiuswei yaugurri webibene, mōikkōsrōn nui kusrenanōb pera uniilai utuibe, trenchibig kōn:
—iKusrennōbig, ñiguen ash cha, kan yeeg nōrrō sruumera, yeeg nōrrō yamera gúita!— cha.

²Inchen Jesúsbe trencha lōtabig kōn:

—¿Yeeg nōrrō yamera mariilan ñigan ashkuh? cha. Yube ni kan srukken katōgan srug balabe kōrrōmismōnrrun cha. Kerriguba pōtiitsig kōnrrun— chibig kōn.

Señor arrum lutau chigōben kōnrrabig*(Mt 24.3-28; Lc 21.7-24; 17.22-24)*

³Incha Jesús Olivos Tunsrō Tiuswei ya basrab pinrrōguesrō wabene, Pedroba, Jacoboba, Juanba, Andrésbabe nundō nōrō trencha payibelō gōn:

⁴—Øyeebe mana purainrrab gúi namun eshkarra cha. ¿Tru kerrigu treeg nebunrrabigwan asamibe chitō guenamistrerah?— cha.

⁵Inchen Jesúsbe trenchibig kōn:

—Ashiptō guy cha, mugōben ñimun pelōsrkōnrrain gōmō.

⁶Kaguende mōilōgōben nai munchiyu truba nu amrrua trenchinrrun cha: “Nabe truig kur” chib. Trumay misaameran isa wamincha truba nu pelōsrkōnrrun chibig kōn. ⁷Incha, ‘misaamera gatōgan peesrō misaameraba purō rrōmbōig kōrig kōmdiig kwayab kweetsiyab gōn’ chib, katō, ‘purō rrōmbōig kōrig kōmdiig kwayanrrab gōn’ chib ñim wamindi mōrabe, mandōguen gōmui inchib kwarmōtay cha. Kaguende øyeebe trendō treeg purainrrabigwein gōn cha. Inchendō katōgucha patsamibe pumō srō gōnrrun chibig kōn. ⁸Peg misaamerabe katōgan peg misaameraba kwayaben, katō rey karumburab ashib karuim birauelōbe katōgan reywei misaameraba kwayanrrun cha. Trune chusrōn gōben pirō trōmbōig kōnōben, parō arruben, iilōbe kan ishuan unō tammistrab pusrkwab pōlbasri lataitō gōnrrun cha.

⁹Inchawei ñimasiyaitō tab ashiptō guy cha. Kaguende ñimune karubelai tasku tranen, katō judíosmera tulundzuni yamerayu ichabetab inchun cha. Katō ñimune karubelō nōrreelai merrab,

reymeraí merrab nagurrindø pønrramig kønrrai martrun cha, trumay ñimbe naimburabigwan wamindamig kønrrain cha. ¹⁰Srabe gwaløm pumøwatø Tiuswei tabig srø wamwan yu pirau maya misaameran eshkar kusrenanamig nebunrrun cha. ¹¹Inchen ñimun merrarrawa, tru misagwan ashí karub purrabelaimay tranrrab srua ambene, chí tamermab merrabwei isumønrrigay cha. Tru uras wamincheenchen Tius maig waminchai tranen, treeg waminchigay cha. Kaguende ñim gømøtø, Espíritu Santo waminchun, chíbig køn. ¹²Inchen nuneebe nømui nunewandøwei kwetchai tranen, møskaimbe nusrkawan rranen, ureemerabe møskalan namig kurra, kwetchai tranrrun cha. ¹³Maya misaabe ñimune nagurrindø tsalø indiilø gønrrabguen cha. Inchendø srabe gwalømgatig chígúingucha megabig megabiibe kebeñchabig kømíig kaigyugurri wesraig kønrrun, chíbig køn.

¹⁴'Tru pinishinrrabig trømbøig køsøngønrraptiig truig nø basramnug kømubendø, ñim truyu pasrai ashabe (lebiibe iigwan tab chíguí mør), trube, Judea birau warabeløbe tun balasrømay wegørra lulay cha. ¹⁵Inchen tru gwaløm nui ya bala wambig wabiibe chígøben wesrunrrab kørraarra, umbu kelulmumig køn cha. ¹⁶Katø chugøben trausrø uñibiibe nui itøtsinigwan tranrrab arrumumig køn. ¹⁷Ilshumbur waachamera, tru gwalømmerawan patsø gwanrreelø, kabe muchib ureg tøgarmearimbe maig kønrrer! chíbig køn. ¹⁸Inchawei ñimbe Tiusba waminchib miay cha, trømbøig pishin gwalømmerawan lulamig nebumønrrai. ¹⁹Kaguende tru gwalømmerawane purø rrømbøig nebuinab melamig attrun cha. Tius chígurrimbunø købigwan marøb uraskurri møingatig øyeebe kaagúig, katøbe managuen øyeebe kaanrrun cha. ²⁰Señor tru gwalømmerawan landøranmuisruandøbe, mugucha øsig waramgaig kønrrun cha. Inchendø nuyasiitø gønrrai tarømariilø, tru nø lawa wesruiløgurri landøranin gøn cha.

²¹'Inchawei tru gwalømmerawan møikkøben ñimun: "Asay, yu Cristo pasran" chíb, kabe: "Asay, yu pasran" daingucha, køremøtay cha. ²²Kaguende møiløgøben 'Cristo guer' chíb, isatø inchibeløba, katø 'Tius maig karuigwan eshkabelø guer' chíb isatø inchibeløba amrrunrrun cha. Incha nømui maramburab marøb mariilø, nørreelø asha gømig kenamariiløba, nørreelø kwaara asha gønrrai mariiløba martrun cha, misagwan treeg incha peløsrkønrrab. Incha Tius nuyasiitø tarømariilanguen kegørrørskamdiig kuimbe, kegørrørskønrrab inchun, chíbig køn. ²³Inchawei ñimbe tab isua ashiptø guy cha. Nabe ñimune iigwan kerriguba puraimøwatø chab eshkar cha.

Møg Misra Arrubig mandø arrumigwan waminchib

(Mt 24.29-35, 42, 44; Lc 21.25-36)

24^{*}Inchen tru gwalømmerawan, tru treeg isumdø gwalømmera chab puraibene,

nøsiibe yandø kwaben, pølbe yandø pilømuben,

25^{*}estrellamerabe srømbalasrøngurri kør rab amrruben,

katø srømbalasrø purø nørreelø pønrrabelan

kønøgøb sruagutsiilø gønrrun chibig køn.

26^{*}Inchen tru Møg Misra Arrubiibe purø nuig maramburab maramig tøgäig törguegwalmabig wañiyu arruben, misaamerabe ashchun chibig køn. 27^{*}Incha nøbe nui ángelesmeran øra, ambugurri, igurri, walligurri, wagurri pirau maya yabsrøngurri kandarø srømbalasrøngatig nui lawa wesruilan kanbalatø tulishinrrun cha.

28^{*}Kan higuera tusrwanma asha kusrey. Nui sramera uturcheelø misrøb, ishiimera weguchene, ñimbe pachig kwalømmera arrumig yandø lutau gúi ashibelø gøn cha. 29^{*}Øyeetøwei ñim iilan purayai ashabe, attrabiibe attrab yaskabuguen basraitamab isua guy, chibig køn. 30^{*}Pøs nabe ñimun cierton trendamønrrun cha: Møin gwaløm misaamera pinømøwatø, øyeeløbe kerrigu purainrrun cha. 31^{*}Srømbalaba, pirøbabe patsøben, na wamindiibe ka wamindiitøbe purainrraamøn cha.

32^{*}Inchendø tru treeg punrrab gwalømwana, uranbabe mugucha ashmøn cha. Srømbalasrø ángelesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskaindøwei asan, chibig køn.

33^{*}Inchawei ñimbe pesannamø, tab ashiptø guy cha, kaguende ñimbe øyeebe mana burainrrabig kui ashmøwabe. 34^{*}Kaguende iibe kan møg nui yaugurri yabsrømay webya inrraptø, nui karuindiig melabelane nui yawan ashib gønrrai kørømara, kanun ganun nømui maramigwan marøb gønrrai karua bønsra, tru yaskabu ashib pasrabigwane chigøben kømønrrai ashib pasrønrrai karua basra ibig lataitøwein gøn cha. 35^{*}Inchawei ñimbe ashiptø guy, chibig køn. Ya buaig pilliraben gúi, kabe yem døbøtag kui, kabe kallu wamøben gúi, kabe løtsø gúi, mana attrab gúi mormøwabe. 36^{*}Inchippa mõi mõi arrua, kib warøben wetørrainanrrab gømø cha. 37^{*}Inchawei na ñimun maig taibe, mayeelan katø treetøwein damønrrun: iMunig, kasriitø guy!— cha.

Jesúsuan mandø incha kemøramigwan waminchib

(Mt 26.1-5; Lc 22.1-2; Jn 11.45-53)

14 ¹Pascua fiestan maramiba, tru Pirri Levaduragaig maig Fiestan maramiba yandø pa gwalømdø baløben, sacerdotsmeran karubeløba, tru Moisés pørigwan kusrenanøbeløbabe Jesúsuan kwetchab chigøben isa mandø incha kemøramdiig kòtashchab inchib guabe, ²trenchibelø gøn:

—Fiesta utu marmønrrab cha, misaamera ke chindi asamgaig inchimønrrain— cha.

Kan ishug Jesúsuan may irrabzhiitøga itø lushib

(Mt 26.6-13; Jn 12.1-8)

³Betaniasrø tru Simón Leproso taigwei yau Jesús wabene, kan ishug alabastro limetayu nardotøzhig chi undisaimíig, netsiig, truba may irrabig, purø nuweyigwan srua, kemalla, Jesús



mishatsigu wamnetø, limetan pushippa, tru may irrabigwan tur bala itølushibig køn. ⁴Inchen møiløgøsrøn truyu purrabeløbe nama, nømdø trenchibelø gøn:

—¿Purø may irrabzhigwan ke ka yandøbe chinchabrre lusah? cha. ⁵Waachameran purugumig kan trescientos denarios menrraweinguen yanøbsruinrrun— cha.

Nømbe tru ishuwane truba namig waminchib gøbelø gøn.

⁶Inchen Jesúsbe trenchibig køn:

—iKagøbasay! cha. ¿Chinchabrre inchigue? cha. Nøbe nayasig truba tabzhig maran cha. ⁷Waachamerane chu uragucha ñimui utu tøgagua, ñim nømun tabig maramdiig købene, tabig martrun cha. Trune nane yube chu uragucha tøgagønrraamøn cha. ⁸I ishuube nun maig maramdiig nebuben treeg maran cha. Nai asrwan manawei kanmaytø may irrabzhigwan srølan cha, nan søramigweyasig. ⁹Nabe ñimune cierton trendamønrrun chibig køn: Yu pirau chutøgucha Tiuswei tabig srø wam kaigyugurri wesrabigwan eshka kusrenaniisrømbe, tru nø marigwangucha tōga waminchun cha, nun pesannamø, isuig kønrrai.—

Judas Jesúswan ashig kømui inchibelan tranøb

(Mt 26.14-16; Lc 22.3-6)

¹⁰Inchen Judas Iscariote, tru doce Jesús kusrenanøb pera uniilai utuig, sacerdotesmeran karubelan Jesúswan nømui tasku tranrrab waminchab ibene, ¹¹nømbe trunun mørøppe, truba kasraarawa, an rrannrrab misrøbelø gøn. Inchen Judasbe Jesúswan mandø incha tranamigwan yandø lab mendabig køn.

Señorwei Pascua mamig

(Mt 26.17-29; Lc 22.7-23; Jn 13.21-30; 1 Co 11.23-26)

¹²Tru Pirri Levaduragaig maig Fiesta pølbaserøb gwaløm, tru Pascuayasig ubisha-unan kweechib gwaløm, Jesúswei kusrenanøb pera uniiløbe nun trencha payibelø gøn:

—¿Pascua mamigwan ñuimbe chu tamartrab ambamø?— cha.

¹³Inchen nøbe nui kusrenanøb pera uniilan pailan trencha karua ørøbig køn:

—Ciudayumay ambay cha. Truyube kan møg pigøtsø mutaig ñimun katøben, truigwei wendautø amrrigay cha. ¹⁴Incha truig kebyainug kebambabe, ya buaigwane ñimbe trenchinrrigay cha:

“Kusrennøbiibe ñun trendan cha: ‘¿Nai kusrenanøb pera uniiløba pascua mamigwan mab purram salabe chu gøh?’” cha. ¹⁵Inchene ya buaibe pala pisusrø kan nu sala chiguen palømfīg yandø ke chab tamarikken ñimun eshkanrrun cha. Inchen ñimbe namuyasig truyu tamartrigay— chibig køn Jesúsbe.

¹⁶Inchen nømbe amba, ciudayu puabe, Jesús nømun maig taig treeg wetørrawa, tru Pascuan tamarøbelø gøn.

¹⁷Inchen yandø yem gøben Jesúsbe nui doce kusrenanøb pera uniiløba pua, ¹⁸mishatsigu mab purrøwabe, Jesúsbe trenchibig køn: —Nabe ñimun cierton trendamønrrun cha: Ñim møikkøsrøn naba mab wabig nan ashig kømui inchibelaingatø misra, nan trannrrab gøn— cha.

¹⁹Inchen nømbe truba isui inchib menda, Jesúswan kan gan payibelø gøn:

—¿Kabe na gøbra, chinderah?— chib.

²⁰Inchen Jesúsbe trencha løtabig køn:

—Ñim doceelai utuig køn cha, naba i nindagutøwei pirriwan kebishibig. ²¹Pøs, tru Møg Misra Arrubiibe Tiuswei wamwan pørigu maig pørig basrøben, truan pureb iben, trune itru møg waacha! tru Møg Misra Arrubigwan ashig kømui inchibelan trannrrabigweimburappe, yeekkucha gúita, chibig køn. Trembe truike kal-lamuig kuinguen søl gøbsruinrrun— cha.

²²Incha mab purrappatø, Jesúsbe pirriwan muta, Tiuswan ‘mayanguen pay’ cha, pirishabe, nømun trenchib srørrøbig køn:

—Cha, may cha. Iibe nai asr køn— cha.

²³Incha katø copan muta, Tiuswan ‘mayanguen pay’ chabe, nømun purørrøbig køn. Inchen tru copayuigwan søteeløba muchibelø gøn. Inchen nøbe nømun trenchibig køn:

²⁴—Iig, nai animbe, Tius tru misagweyasig srø acuerdon mari anin gøn cha. Tru animbe truba nu misagweyasig lusig køn cha ²⁵Nabe ñimun cierton trendamønrrun cha: Uvas piwane mas muchimumønrrun cha, nai Møskai nø ashib karub waisrø katøyug ñimba mutsam gwalømgatig.—

Pedro nan ‘ashmīg kur’ chinrrautan cha, Jesús trenchib

(Mt 26.30-35; Lc 22.31-34; Jn 13.36-38)

²⁶Incha kan himnon chab cantawabe, Olivos Tunsrømay amba, ²⁷Jesúsbe trenchibig køn:

—Ñimbe mayeeløba nainug isua pønrraigwan trubishinrrun cha. Kaguende Tiuswei wamwan pørigu øyah chibig pørig basran cha:

“Ubisha ashibigwan na kweechen,
ubishamerabe nøørøtø chab lulrrun” chibig.

²⁸Inchendø nabe katøyug øsiirappe, ñimguen ammøwatø, nabe Galileasrømay yamønrrun— cha.

²⁹Inchen Pedrobe trenchibig køn:

—Mayeeløba ñuinug isua pønrraigwan trubisaingucha, na gúimbe tarømisrmumønrrun— cha.

Inchen Jesúsbe trencha løtabig køn:

³⁰—Nabe ñun cierton trendamønrrun cha: Møi yemdøweinguen kallu pamay wamømwatø, ñibe pønmayguen nan ‘ashmíg kur’ chinrrautan— cha.

³¹Inchen Pedrobe truba inchib trenchibig køn:

—Ñiba nan kwamig nebuinguen, nabe managuen ñun ‘ashmíg kur’ chimumønrrun— cha.

Inchen søteeløba treetøwein chibelø gøn.

Jesús nui Møskaimba Getsemanísø waminchib

(Mt 26.36-46; Lc 22.39-46)

³²Incha nømbe kanbalø Getsemaní taisrø puabe, Jesúsbe nui kusrenanøb pera uniilan trenchibig køn:

—Yu purramisray cha, nai Møskaimba na wamindamne.—

³³Incha Pedronba, Jacobonba, Juanwanba pera yabe, truba rruba isui, ni mumayguen tab gømui inchib menda, ³⁴trenchibig køn:

—Nai manrraube isubiitø kwabguen ka kwamdiig køtan cha. Ñimbe yutø kørrømisra, kimø burray— chibig køn.

³⁵Incha Jesúsbe katøguchi ambuurø ya, pirau sraløptincha, Møskaimba waminchib miabig køn:

—Tru purø rrømbøig attrabig nan treeg punrrain gømubene, treeg pumugasam— chib. ³⁶Katø Tiuswan trenchib miabig køn:

—Abba, nai Møskain chib, ñuimbe chitøgucha kaimamø, maramdiitø gøn cha. I copan nan tarømartra cha. Inchendø na maig isuig køben, treeg kønrrain gømøtø, ñun maig maramdiig køben, treeg kønrrain— chib.

³⁷Incha nui kusrenanøb pera uniilaimay arrua, kib purrai wetørrawabe, Pedrone trenchibig køn:

—Simón, ¿kib watirru? cha. ¿Kan uratøguen kimø, kasriibe wanrrab gaimatirru? cha. ³⁸Kimø, Tiusba waminchib purray, chibig køn, chiyugøben kaigyu kegørrømønrrappe. Ñimbe tabigwan martrabwei isuingucha, ñimui asrbe kullaguig køn— cha.

³⁹Incha gatøle Jesúsbe ya, treetøwein chib Møskaimba waminchibig køn. ⁴⁰Incha katø arruabe, katøguen nui kusrenanøb pera uniilane kiptøwei burrain gúi wetørrabig køn, kaguende nømui kabmerabe kigøbiitø ke kanaim burrowa. Incha nømbe mancha lètønrrab gaimabelø gøn. ⁴¹Inchen Jesúsbe pønmay gønrrabyu arruabe, trenchibig køn:

—¿Katøgucha ñimgan israb, kib srø warøtirru? cha. Yandø tsabø gøn cha. Ura pun cha. Yandø tranan, chibig køn, tru Møg Misra Arrubigwan kaig marøbelai tasku. ⁴²iKurray, chibig køn. Amrrab! cha. Nan ashig kømui inchibelaingatø pasramisrøbig nan tranrrab arrubguen indan cha. iAsay!— chibig køn.

Jesúsuan merrarrawa srúa ambub

(Mt 26.47-56; Lc 22.47-53; Jn 18.2-11)

⁴³Incha Jesús waminchib pasramne, tru Judas, tru doce kusrenanøb pera uniilai utuibe truba nu misaaba arrubig køn, nømbe espadamera gøben, tsiimera gøben srüargue. Truiløbe sacerdotesmeran karubeløba, tru Moisés pørigwan kusrenanøbeløba, misagwan karubelø kølli misaameraba misra, karua øriilø gøbig køn. ⁴⁴Tru Judas Jesúsuan ashig kømui inchibelaingatø pasramisrøbiibe nømune: “Merrarramig kuitamab ñim ashchai, na chi señal gøsrøn maren, ashib pønrrønrrigay” cha, eshkain gøbig køn. “Tru na muchaig, truig kønrrun cha. Truigwan kemøra, suldaumeraba sruamrrigay” cha. ⁴⁵Inchen Judas puabe, mõi mõi Jesúsweim bulu kemallib trenchibig køn:

—iNai Kusrennøbig!— cha.

Inchabe muchabig køn. ⁴⁶Inchene nømbe Jesúsuan kemøra, sruamrrab merrarrabelø gøn.

⁴⁷Inchen mõikkøsrøn truyu pasrabiibe nui espadan wesrub, maya sacerdotesmeran nø garub sacerdotei karuindiig megabigwan kaluwan kelarrab lutiichiptinchibig køn. ⁴⁸Inchen Jesúsbe misaameran trenchibig køn:

—¿Chindimbarre ñimbe espadamera gøben, tsiimera gøben sruar werrugue cha, nan kemørtrab, nabe kan niliig kui lata? ⁴⁹Nabe ñimba kwalømmørig Tiuswei yau kusrennøb waben, ñimbe managuen nane kemørmuig køn cha. Inchendø Tiuswei wamwan pørigu maig taig treeg nebunrrain gúig køn— chibig køn.

⁵⁰Inchene nui kusrenanøb pera uniiløbe nundø pasramnetø, mayeeløba chab luløptinchibelø gøn. ⁵¹Inchen kan matsinube køsaatiig llensutø tsinaig tru wendautø iben, nune kemørøptinchen, ⁵²nøbe llensun wesølønnøb, køsatiig igatø! pinaptinchibig køn.

Jesús tru Setenteelø maig maramigwan asha marøbelai merrab

(Mt 26.57-68; Jn 18.12-14, 19-24)

⁵³Incha Jesúswan tru maya sacerdotesmeran nø garub sacerdoteimay srua ambubelø gøn. Inchen mayeelø sacerdotesmeran karubeløba, misagwan karubelø kølli misaameraba, tru Moisés pørigwan kusrenanøbeløba kerriguh tulundzunabelø gøn. ⁵⁴Inchen Pedrobe Jesúswei wendau yaptø, yaptø tru maya sacerdotesmeran nø garub sacerdotei ya wambiisrøngatig ya, tru ashchai pønsraig pønrrabeløba pachiirab naabulu wamisra wabig køn.

⁵⁵Inchen sacerdotesmeran karubeløba, tru Setenteelø maig maramigwan asha marøbelø mayeeløba misra Jesúswan kwanrrai partrab, møilan gøben ‘Jesúsbe kaig maren, nambe ashibwei indig køn’ chib, waminchabelø labendø, treeg waminchabelø wetørranrrab gaimabelø gøn. ⁵⁶Inchen møiløgøben nuimburab chigøben isa waminchendø, nøm wamindiibe ka peetø, beetø webibig køn. ⁵⁷Inchen møiløgøben kurra, isatø Jesúswan trenchibelø gøn: ⁵⁸—Nambe nø trendai mørig køn cha: “Nabe i Tiuswei yawan møguelø marigwan pinisha, pøn gwalømyube Tiuswei ya gatøgan, møguelø marig kømøtø, mara basramønrrun” dan— chib.

⁵⁹Inchen treendingucha, katøgucha nømui wamindiibe peetø, beetø webiben, ⁶⁰tru maya sacerdotesmeran nø garub sacerdotebe mayelai utu kurra basramisra, Jesúswane payibig køn:

—¿Chigucha lètømønrrapteh? cha. ¿Ñune øyeebe chi galø maran charre inchib gøh?— cha.

⁶¹Inchen Jesúsbe niløtø basrøwa, chigucha løtømuben, tru maya sacerdotesmeran nò garub sacerdotebe katøyug trencha payibig køn:

—¿Ñigan tru Cristo gøtirru cha, tru Tius mayanguen Tab Indigwei Nusrkai?—

⁶²Inchen Jesúsbe trenchibig køn:

—Nabe truigwein gur cha. Inchagucha tru Møg Misra Arrubig tru maramburab marøb Tiuswei kusrmay waben ñim ashíb, katø srømbalasrøngurri wañiyu arruben ashíb inchun— cha.

⁶³Inchen tru maya sacerdotesmeran nò garub sacerdotebe nò kewagúigwandøwei kølsrøb, trenchibig køn:

—¿Namun nuimburab waminchabelø mas chiwein gúi balønrrab gø? cha. ⁶⁴Ñimdøweinguen Tiuswan purø rrømbøig wamab wamindigwan møren cha. ¿Ñimune maig asønata?— chibig køn.

Inchen nømbe mayeeløba treeg kaig kuin gúi mara, kwanrrai kørømarab basrøbelø gøn.

⁶⁵Inchen møiløgøben nun illimbi tuchib, maløwan kasra, nun kurraguchib mendabe trenchibelø gøn:

—iNamun kelarrab eshkau bøs, chib, mu gurragutsin gúi!—

Inchen tru Tiuswei yau ashchay pønsraig pønrrabeløbe Jesúswan merrarrawa, pashaguchibelø gøn.

Pedro Jesúswan ‘ashmíig kur’ chib

(Mt 26.69-75; Lc 22.56-62; Jn 18.15-18, 25-29)

⁶⁶Inchen Pedrobe pinaamay yawambig waben, trunetø tru maya sacerdotesmeran nò garub sacerdotei mendig megabig kan srusrø puabe, ⁶⁷Pedro nag bulu pachíirab waben, nun tab ashabe, trenchibig køn:

—Ñigucha tru nazaretsriig Jesúsba uñibig kuig kømøh— cha.

⁶⁸Inchen Pedrobe trenchib isabig køn:

—Ashmíig kur cha. Ni chi wamindinguen mørmur— cha.

Incha wambig kerruisrø webibene, kan kallu wambig køn.

⁶⁹Inchen tru srusrøbe gatøle Pedron ashabe, truyu purrabelan katø eshkaab mendappe:

—Iibe truilai utuigwein gøn— chiben,

⁷⁰Pedrobe katøguen ‘ashmíig kur’ chib isabig køn. Inchen truyu purrabeløbe yanayutø katøguen Pedrone trenchibelø gøn:

—Isa gømmø, ñigucha truilai utuigwein gøn cha; kaguende ñibe galileasriig køn— cha.

⁷¹Inchen Pedrobe:

—Na isab pasraig købene, trube, nan chigøben nebunrrappe nebubash chib. Tiusken ashen, katø nabe isa waminchibgucha basrømur, chibig køn. Ñim waminchib gúi mowane ni ashibguen ashmíig kur— cha.

⁷²Inchen trenchiben latatø kallube katøganguen wamaptinchibig køn. Inchene Pedrobe Jesús øyah taig kømørramab isuptinchibig køn: “Kallu pamayguen wamømowatø, ñibe nan pønmayguen ‘ashmíig kur’ chinrrautan” daigwan. Incha trunun isuabe, truba rruba isuig kishibig køn.

Jesús Pilatoi merrab

(Mt 27.1-2, 11-14; Lc 23.1-5; Jn 18.28-38)

15 ¹Inchen yandø chab tør-rrabendø sacerdotesmeran karubeløba, misagwan karubelø kølli misaameraba, katø tru Moisés pørigwan kusrenanøbeløba, tru Setenteelø maig maramigwan asha marøbelø kerrigueløba tulundzunabelø gøn. Incha nømbe Jesúswane lusra, srua amba, Pilaton tranøbelø gøn.

²Inchen Pilatobe Jesúswan trenchibig køn:

—¿Ñigan judíosmerai rey gøtirru?— cha.

Inchen Jesúsbe trencha løtabig køn:

—Ñitøweinguen chab rrendan— cha.

³Inchen sacerdotesmeran karubeløbe nune chine, chine ‘øyeeg marøbig kuig køn’ chiben, ⁴Pilatobe katøyug trenchibig køn:

—¿Chigucha løtømønrrapteh? cha. Ñiguen ash cha, ñune chigøben yeeg waminchib gøn cha, nømbe.—

⁵Inchen Jesúsbe treeg indingucha løtømuben, Pilatobe ‘kan øyeebe maig kermab’ isub kørømisrøbig køn.

Jesúswan kwanrrai pasrøb

(Mt 27.15-31; Lc 23.13-25; Jn 18.38-19.16)

⁶Fiesta gwalømmerawane kubernadurbe kailan keeri yau pønrrabelan misag møigwan elatchai miaben, trendø treeg marøb elachibig køn. ⁷Inchen tru keeri yaube kan møg Barrabás taibe keerig pasrabig køn, nøbe larrø gailøba søtømisra, ashib karubelan namig kurrabyu misag kweechaig. ⁸Inchen misaamerabe amrrua:

—Ñi trendø treeg marøbiibe, treeg mar— chib, Pilatone miab mendøben,

⁹Pilatobe trencha løtabig køn:

—¿Ñimbe judíosmerai reywan na elatsamig balain gøgue?— cha.

¹⁰Kaguende Pilatobe tru sacerdotesmeran karubeløbe Jesúswane uni ashig kòmuptø nun tranin gúi ashibig køn. ¹¹Inchen sacerdotesmeran karubeløbe Jesúswan gømtø, nømbe Barrabáswane elatchai inchibelø gøn. ¹²Inchen Pilatobe katøyug payippe, trenchibig køn:

—Trube, ¿ñim tru judíosmerai rey gøn daigwane nabe mandø indamø?— cha.

¹³Inchen nømbe katø trenchib trashib løtabelø gøn:

—iKurusyu mesrø!— chib.

¹⁴Inchen Pilatobe trenchibig køn:

—¿Nøbe chi galø marindørre øyeeg martrainchigue?— cha.

Inchen nømbe masken mur trashibelø gøn:

—iKurusyu mesrø! iKurusyu mesrø!— chib.

¹⁵Inchen Pilatobe tru nu misagwan ka tab gønrrai inchig køptø Barrabáswan ka inrrai elacha, Jesúswane ichagutsingaruabe, kurusyu mesrønrrai tranøbig køn.

Suldaumera Jesúswan indzatø ashib

¹⁶Inchen suldaumerabe palacioyu mas umbusrø srua amba, maya suldau sètøwan tulundzuningarua, ¹⁷kan yalø biguiig itøguenana, kaldiigwan corona mara, petsørøbelø gøn. ¹⁸Incha trugurrimbe trenchib trashib mendabelø gøn:

—iJudíosmerai Rey, viva!— chib.

¹⁹Incha cañatøga turbøtø itsamba, illimbi tutamba, tab inchib chib, nui merrab tømønramba inchibelø gøn. ²⁰Incha øyeeg marøb ka indzatø ashib srua gøptø, tru yalø biguiig itøguenanigwan wesrawa, nuiwan katøle kenana, kurusyu mesrønrrab nune wesrubelø gøn.

Jesúswan kurusyu mesraig

(Mt 27.32-44; Lc 23.26-43; Jn 19.17-27)

²¹Kan møg cirenesriig Simón daig, Alejandroimba, Rufoimba møskai wambig nørørørøngurri purainrrab arruben, nune Jesúswei kuruswan ke mutamne incha mutørøbelø gøn.

²²Incha kanbalø Gólgota taisrømay nune srúa ambubelø gøn, (tru trenchippe, “Calaverasrø” tainug). ²³Jesús wane vinoba, mirraba lindisaig yuulingucha, Jesúsbe muchimfig køn. ²⁴Inchen kurussyu mesra, suldaumerabe Jesúswei kewagúilan mu merrarramig nebutashchab suerte guchibelø gøn.

²⁵Inchen løtsø las nuevetø gøbig køn, tru Jesús wane kurussyu mesrøben. ²⁶Incha kan pørig mesrøbelø gøn, chigurrin gwanrai mesraig køn cha eshkabig:

JUDIOSMERAI TRU REY GØN

chibig. ²⁷Incha gatø pagatø nileelangucha kanun kusrmay, kanun atsimay nunba kurussyu melsrøbelø gøn. ²⁸Inchen tru Tiuswei wamwan øyah chib pøriibe nebuig køn: “Tru kailai utu nune tøgá basrig kønrrun” daig.

²⁹Inchen truwan puraambubeløbe tsalø wamab, turwandø gønøgøb trenchibelø gøn:

—iAu, ñi Tiuswei yawan pøtiicha, katø tru pøn gwalømyutø kusranrrabiibe, ³⁰kwamønrrab ñitøwei chigøben mar! cha. iKurusyugurri pinaamø!— cha.

³¹Inchen tru sacerdotessmeran karubeløba, tru Moisés pørigwan kusrenanøbeløba treetøweih nun indzatø ashib kangurrin gangurri trenchibelø gøn:

—Kanelane kaigyugurri wesrabendø, nøasiitøweimbe kaiman cha. ³²Tru Cristo, Israel misagwei reybe, mõi kurusyugurri pinaarrubash cha, nam asha, nø gúitamab kørenrrab— cha.

Inchen nøba kurussyu melsraig melabeløgucha Jesús wane tsalø wamabelø gøn.

Jesús kwaig

(Mt 27.45-56; Lc 23.44-49; Jn 19.28-30)

³³Yandø kwaløm døbøtag misrene, maaben las treskatig pirau ørøba løstiig kørrømisren, ³⁴tre uras Jesúsbe truba mur trashibig køn:

—iEloi, Eloi! ¿Lama sabactani?— cha. (Trenchippe: “iNai Tius, nai Tius! ¿Chindimba nandø elachigu?” chib.)

³⁵Inchen møiløgøsrøn truyu pønrrabelø mørabe, trenchibelø gøn:

—Møray cha. Elías wane wamøtan— cha.

³⁶Inchen mōikkōsrōn lulabe, ñab esponjan kōchiibiyu kebisha, kan caña tsigu pucha, mutchai pulusrō yuulōb trenchibig kōn:

—Kagōbasay cha. Inchippa kwamōnrrai pinōsrānrrab Elías attashchab— cha.

³⁷Inchene Jesúsbe mur trashippe, yandō isrōmuptinchibig kōn. ³⁸Inchen Tiuswei yau tru purō tab llensuzhig kelarrab sōtō mesraibe palasrōngurri kōrrab gōlsra, yandō paig misrōbig kōn.

³⁹Inchen tru Roma suldaу cienelan nō garubiibe Jesúsweim binrrōgue pasrōwa, ōyeeg trasaigwan mōrōb, mandō kwaigwan ashib inchabe, trenchibig kōn:

—Isa gōmō, i mōōbe Tiuswei Nusrkaiwein gūin gōn— cha.

⁴⁰Inchen ishumburmera mōilōgōsrōn yabsrōngurrindō ashib pōnrrabelō gōn. Tru utube María Magdalena gōben, tru Wendiig Santiagoimba, Joséweimba usri María gōben, katō Salomé gōbengue. ⁴¹Inchen tru ishumburmerabe Jesús Galileasrō uñen, nui mendig amōñib, purugub inchibelō gōbig kōn. Inchen truyube truilōtō gōmōtō, katōgan ishumburmera Jerusalénmay Jesúsba nebamba yam basrabig kōn.

Jesúswan sōrig

(Mt 27.57-61; Lc 23.50-56; Jn 19.38-42)

⁴²Inchen yandō yem misrōb gōben, tru isram gwalōmweyasig tamarōb gūin gwalōm gōbig kōn, kaguende katō gwalōmbe isram gwalōm gōnrrab gōben. ⁴³Inchen José arimateasriig, tru Setenteelō maig maramigwan asha marōbelai utuig truba nuig tabig kui asig mōg, nōgucha Tius nō ashib karub wainuguigwan muniirabig arrua, Pilato wainug kōrmō kebinrrab isua, nōbe kebya, Jesúswei asrwan miabig kōn. ⁴⁴Inchen Pilatobe, trube, kwabguen inditamab isua, nōbe truba kwaara, kan suldaу cienelan nō garubigwan wama, kwabguen inditarru cha, payibig kōn. ⁴⁵Inchen truibe nun eshkaben, Pilatobe Jesúswei asrwan Joséwan pinōsrungarubig kōn. ⁴⁶Inchen Josébe kan lino llensutōga kirra, Jesúswei asrwan pinōsrua, truyu pulabe, kan peñayu sōramig trab lalig pasrabigu waya, trugurrimbe kan nu srugwan merrana, kebambinug kasrōbig kōn. ⁴⁷Inchen María Magdalenaba, María Joséwei usrimbabe chu sōrōben ashibelō gōn.

Jesús øsiiraig*(Mt 28.1-10; Lc 24.1-12; Jn 20.1-10)*

16 ¹Inchen sábado gwaløm buraiben, María Magdalenaba, katø Jacobwei usri Maríaba, Saloméba Jesúswei asrwan srøllrab ambamig may irrabzheelø penabelø gøn. ²Incha tru srørrune pølbaserøb gwalømbe, ullarbatø ambubelø gøn søriisrømay. ³Inchendø nømbe kangurriin gangurri trenchibelø gøn:
—¿Sørin rrabyu kebambamnug srugwane namune mu tarømara rraniasamø?— cha.

⁴Incha møyimbe ashene, tru sørinug truba nu srug kasraibe truyu gømøtø, manawei malsrainguen tsuptinchen, ⁵umbu sørinug kebambabe, kan matsinø puliig kørørabig keweig truyu kusrmay wai ashiptinchibelø gøn. Inchen nømbe kwaaren, ⁶truibe trenchibig køn:
—Kwarmøtay cha. Ñimbe Jesús nazaretsriig tru kurussyu mesraigwan lan cha. Øsiirain gøn cha. Yube mu gaagøn cha. Ñimguen asay, chibig køn, yu nun wayinug. ⁷Møyimbe ambay, chibig køn, nui kusrenanøb pera uniilanba, katø Pedrongucha øyah chinrrab: “Galileasrømay ñimguen ammøwatø, nømerrig inrrun dan chinrrigay cha. Trusrø ñimbe nun ashchun dan cha, ñimun nø maig taig.”—

⁸Inchene tru ishumburmerabe sørinukkurri wegørra ambuppe, kwaarøptø ke itønab chab luløbelø gøn. Incha mungucha chigucha eshkameelø gøn, kaguende kwaariilø gua.

Jesús María Magdalenan kenamisrøb*(Jn 20.11-18)*

⁹Tru truaaløm ullarbatø Jesúsbe gatøyug øsiirawabe, María Magdalena tru siete kwaimandziimeran webusrinabigwanmerrig kenamisrøbig køn. ¹⁰Inchen nøbe ya, Jesúsba amøñibelan eshkabig køn, truiløbe isuilø kishib gøben. ¹¹Inchen nømbe ‘Jesús øsiirain gøn’ daigwanba, katø María ‘nø ashar’ taigwanba mørabe, nømbe køremeelø gøn.

Jesús nui pagatø kusrenanøb pera uniilan kenamisrøb*(Lc 24.13-35)*

¹²Indiibe iilø chab puraiben, kusrenanøb pera uniilø pailø wambig nørørsrømay ambub pønrrøbene, Jesúsbe, nø gømø, peg

lataig kenamisrøbig køn. ¹³Inchen nømbe amba, katøganelan eshkaben, truiløgucha nømune køremeelø gøn.

Jesús nui pera uniilan nøashib karua ørøb

(Mt 28.16-20; Lc 24.36-49; Jn 20.19-23)

¹⁴Indiibe mas wendøbe tru once pera uniilø mishatsigu mab purramnetø Jesúsbe truyu nømun kenamisrabe, namabig køn, tru ‘nø katøle øsiirawa uni aser’ cha eshkabelan nømui manrrømera murelø gúikkurrimbah, katø kørenrrab inchimeelø gúikkurrimbatø. ¹⁵Inchabe trenchibig køn:

—Ñimbe yu pirau truørø amba, Tiuswei tabig srø wamwan mu misagwandøgucha eshkab kusrenanrrigay cha. ¹⁶Inchen møikkøben køreb, katø piu umbu ulsraig køb inchibiibe kaigyugurri wesraig kønrrun cha. Inchen møikkøben køremígwane kaigy pasrønrrai pasrig kønrrun cha. ¹⁷Inchen nan kørebelane, nabe nømbe pasrain gúi asamig iig tru øyeeg asha gønrrai mariiløbe nømbe pønrrabig pønrrønrrun cha: nai munchiyube kwaimandziimeran webusrøb, srøig peg wammera waminchib, ¹⁸nømui taska ulmeran kemørinaingucha, chinchimub, katø inchipa chigøben kwetchaptiig tøgga mutsinaingucha, chi gømub, katø nømui tasiimeran kwanrreelaim bala estsarene, truiløbe tabelø gørrømisrøb inchun— cha, trenchibig køn Jesúsbe.

Jesús srømbalasrømay nebib

(Lc 24.50-53)

¹⁹Incha Señor Jesúsbe nømun chab waminchene, nune srømbalasrømay kusraben, Tiusweim bulu kusrmay wamisrøbig køn. ²⁰Inchen nømbe webamba, Jesucristoimburabelan chutøgucha truørø eshkab kusrenanøbelø gøn. Inchen Señorbe nømbe marøb pasrabig køn, nøm wamindigwane nui wam gúi asig kønrrai maramburab mariiløtøga kenamarøb.

San Lucas

Maig kuigwan eshkaib pølbaserbig

1 ¹Pøs møiløgøben maig purayaigwan eshkaibig kan pørig tamara kørrømartrab indig købig køn lutøgurri, namui utu isa gømøtø, cierton treeg purayeelan. ²Tru srøsrøgurri nømui kaptøga nømashib ashibelø, katø Tiuswei wamwan nøm waminchib pønrrabelø namun maig eshkaig køben, treeg. ³Inchen nagucha kerriguba chitø burayailø maig kuigwan srøsrøgurriigwan tab nebua ashene, nangucha tabig asønaben, lutøgurri tamara ñun pørtrab inchar, ñi nai purø tab Teófilon, ⁴tru ñun maig kusrenanig købigwan, tru ciertonigwan ñi tab nebua asamig kønrrai.

Kan ángel Juan kal-lamigwan eshkaib

⁵Herodes Judea rey gøben, judíosmerai kan sacerdote Zacarías taig merrabsrø Abíaswei sacerdotesmerai utuig tsubig køn. Sraimbe Aarónwei misagugurri arrubig købig køn, Elizabet taig. ⁶Tiuswei merrab pailøba sølgandø amøñibelø gua, Señor chi martrain daigwanba, katø chi maramigwan martrai karua pønsrailanba muguen chi tamgaig marøbelø gøbig køn. ⁷Inchendø chi urekkar gøbig køn, kaguende Elisabetbe trendø ureg chigaig, pailøba yandø kølleelø gua.

⁸Indiibe kan gwaløm Zacaríaswei sacerdotes sötøwan Tiuswei merrab Tiusweiwan maramig nømun nebuben, ⁹sacerdotesmerai utu trendø treeg marøbelø gua, suerte gucha ashene, Zacaríaswan Tiuswei yau incienso battrib kebyamig nun neubig køn. ¹⁰Inchen incienso barrøb pasramne, maya misaabe wambig Tiusba waminchib gøbig køn. ¹¹Inchen mømibe incienso barri altar bulu

kusrmaygatømay Señorwei ángel Zacaríaswan kenamisrøptinchen, ¹²Zacaríasbe ángelwan ashabe, igatø! mandøguen gømuptyinchen, ke chinchimmørø inchib kørig kui inchibig køn. ¹³Inchen ángelbe trenchibig køn:

—Zacarías, kørig kui inchimøta cha. Kaguende Tiusbe ñi nun miaigwan mørig kua, ñui srai Elisabetbe kan nusrkai tøgagønrrun cha, truigwane ñibe Juan munchi basrtrig chibig køn. ¹⁴Inchen ñibe truba tab gúi mørøb kasraaraben, nø kal-labene, katøganelø møiløgøben tab gúi mørtrun cha. ¹⁵Kaguende ñui nusrkaimbe Tiuswei merrab truba nuig kønrrun cha, managuen vino muchimøwei, mutsiiranrraptiig kørapi muchimøwei inchabig. Incha usrai patsau wappatøwei Espíritu Santotø netsaig kua, ¹⁶møilan gøben, Israelwei misaameran nømui Señor Tiusweimay truba nu llirangarunrrun cha. ¹⁷Tru Juanbe Señorwei merrab ippe, tru merrabsrø Tius maig karuigwan eshkabig Elías maig isubig køben treetøwei isubig, katø truigwei maramburab marigwan tøgag inrrun cha. Møskaløbe nusrkaløba katøle tabig waramig kønrrai marøb, katø kailø mørmeeløbe sølgandø amøñibelø misaasun marigu amøñinrrab lliranrrai inchun cha. Kan nu sötø misaamera Señorwan utønrrab ke muniitø melønrrabelø gønrrai tamarøb.—

¹⁸Inchen Zacaríasbe ángelwan payippe:

—¿Ilgwane mandø incha treeg kønrraitamab isumø? cha, trencha bayibig køn. Kaguende nabe yandø køllig køben, nai sraingucha treetøwein gøn— cha.

¹⁹Inchen ángelbe trencha løtabig køn:

—Na, Gabrielbe Tiuswei merrab pasrabig kur cha. Incha nane i tabig srøigwan ñun wammørørskønrrai ørtan cha. ²⁰Incha mømimbe tru treeg nebum gwalømgatig ñibe wamgaig, chigucha waminchab gaimabig kørrømisrtrabguen cha, na maig taigwan køremikkurri. Tru na trendailøbe treeg pum gwaløm punrrun— cha.

²¹Trune misaabe wambig munig kua, Zacarías Tiuswei yaugurri ke peguen webarrumuben, chindermab isub gøbene, ²²Zacarías webarruppe, waminchab gaimabig webarruptinchen, Tiuswei yau chitø kenamisren, asiitamab isubelø gøn. Inchen nøbe wamgaig kørrømisra, nømune ka señas maratø eshkabig køn.

²³Inchen Zacaríasbe Tiuswei yau Tiusweiwan maram gwalømmerra chab patsøben, nøbe nui yamay iben, ²⁴tru

gwalømmëra puraiben, Elisabetbe kwanrriig kørørmisra, nui yaugurri trattro bøl webimíig kòn, øyeeg isub: ²⁵“Møi i gwalømmërawan Señor nayasig øyeeg tabig martan cha, misaamera kaasiinab megamig kømønrrai martrab.”

Kan ángel Jesús kal-lamigwan eshka

²⁶Indiibe tøbø bilayu ángel Gabrielwan Galilea, kan pueblo Nazaret tainuumay Tiusbe ørøbig kòn, ²⁷kan managuen mu møøba kimø srusrø, María taigwan ashchai. Truibe kan møg, José taig, merrabsrø rey Davidweinukkurrin garrab misaaba kasharanrrab misraig købig kòn. ²⁸Inchen ángelbe María wainug kebyabe, trenchibig kòn:

—iKa watirru! cha. iTius mayanguen tab indig! Señorbe ñiba basran cha. Katøgan ishumburmeran lata gømø, ñundø purø tab indig kòn— cha.

²⁹Inchen Maríabe ángel wamindiilan mørabe, kan øyeeg chib tab wamibe maig kermab isubig kòn. Katø ángel øyeeg chib tab wamibe chi chibig kermab isubig kòn. ³⁰Inchen ángelbe trenchibig kòn:

—María korig kui inchimøta cha. Kaguende ñibe Tiuswei merrab mayanguen tabig asønaig kòn cha. ³¹Møimbe kwanrriig kørørmisra, kan nusrkai kal-labene, Jesús munchi basrtrig chibig kòn. ³²Nøbe purø nuig, Tius Mayeelaím Bala Pasrabigwei Nusrkain cha wamig kònrrun cha. Inchen Señor Tiusbe tru møskai David wamisra ashib karub waigwan tranrrun cha. ³³Inchen nøbe Jacobwei misaameran managatig ashib karub wanrrun cha. Inchen tru nø ashib karub wamibe managuen patsønrraamøn— chibig kòn.

³⁴Inchene Maríabe:

—¿Na mu møøbagucha kimíigwane øyeebe chinha burainrrab gø?— cha, payene, ³⁵ángelbe trenchibig kòn:

—Espíritu Santo ñuim bala kørørraruben, Tius Mayeelaím Bala Pasrabigwei maramburab marøbig kan wañi lataig ñun pinøbullen, treekkurri tru newan tabig kal-lanrrabiibe, Tiuswei Nusrkain cha wamig kònrrun chibig kòn. ³⁶Katø ñimui Elisabetgucha ya køllim balasrø kan nusrkai tøgagønrrab gøn cha. Chi ureg tøgagønrrab gaimabig kòn daikken seis mesesken kwanrriig kòn cha. ³⁷Kaguende Tiusweimbe chitøgucha kaimamdiibe kaabig kòn— cha, trenchibig kòn.

³⁸Inchene Maríabe trenchibig køn:

—Nabe Señor maig karuigwan marøb megabig kur cha. Ñi nan maig taig treeg kønrrain— chiben, yandø ángelbe truyugurri ibig køn.

María Elisabetwan ashchab ib

³⁹Tru gwalømmerawan Maríabe tamara, Judea birau tunmeragøba tøga birømerasø kan puebloyumay petø ya,
⁴⁰Zacaríaswei yau kebyabe, Elisabetwan ‘ka undirru’ chibig køn.

⁴¹Inchen Elisabet María ‘ka undirru’ taigwan mørene, unøbe patsø umbu kønaptinchen, Elisabetbe Espíritu Santo netsaig kørrømisra, ⁴²nøbe truba mur wamab trenchibig køn:

—Tiusbe maya ishumburmerai utu ñune mayanguen tab gúig kønrrai indig køben, katø ñui patsau tøgagúig unangucha mayanguen tab gúig kønrrai indig køn cha. ⁴³¿Nan øyeeg lastima asiibe chugurri arrerah? cha, ¿Nai Señorwei usri nan ashchab punrraimbe? ⁴⁴Kaguende ñi nan ‘ka undirru’ cha wamigwan møren latatø, nai unøbe kasrag køptø nai patsø umbu kønaptinndan cha. ⁴⁵Kørebigweimbe mayanguen tab køn cha. Kaguende Señor maig kønrrun cha, chi taibe, nøbe treeg nebunrrai martrun— chibig køn.

⁴⁶Inchen Maríabe trenchibig køn:

“Nai møsiibe Señorwan maya nuguen tabig wamindan cha.

⁴⁷Katø nai espíritube Tius nai Kaigyugurri Wesrabigweinug truba kasraaran cha.

⁴⁸Kaguende Tiusbe na nø karuigwan marøb megabig, na chigucha gømø waachawan isua asin gøn cha. Pøs møingurrimbunøbe misaamera srøig srøig kurrab amrrubeløbe nane mayanguen tab gúig køn chinrrautan cha.

⁴⁹Kaguende Tius maramburab marøbiibe nan purø nørriig tabelø marin gøn cha, nui munchibe newan tabig køben.

⁵⁰Inchen nui lastima asiibe, nun køriibala melabelaimbe, srøig srøig misag kurrab arrimørig truilain gønrrun cha.

⁵¹Nui taska chigøben purø nørreelø mara, tru nørreelø truba møg inchib, chigøben martrab isuilane chindinguen møriimíg ka isuitø burainrrai kørrømarin gøn cha.

⁵²Karumburab karub purrabelane nøm purramisra karub purraigwan kerrawa, chigucha gømeelan tabigu neerin gøn cha.

⁵³Parøgúilane tabig tøgagønrrai unchaguen rranøppe, puarmerane chiguchagar ambasan cha.

54 Katø nò karuigwan marøb megabig Israelwan purugun cha, nò lastima asigwan isub,

55 tru merrabsrø namui kølli misag Abrahamwanba, nuinukkurri karrab misaameranba maig wamindig managatig treeg kønrrai.”

56 Incha Mariábe Elisabetba pøn bølburab kørørmisra, nui yamay gatø ibig køn.

Juan kal-laigwan waminchibig

57 Yandø Elisabetwan unø kal-lam gwaløm puben, kan nusrkai tøgagøbig køn. 58 Inchen nui ya bulueløba, nui yaeløba Señor nun truba lastima asin gúi ashabe, nømbe Elisabetba truba kasraarabelø gøn. 59 Indiibe ke trune gwalømyube unan circuncidanrrab srúa amba, unane munchi basrøppe, mōskawei munchi Zacarías basrtrab inchen, 60 usrimbe trenchibig køn:

—Kah, treeg kōmøtø, unøbe Juan munchi gōnrrun— cha.

61 Inchen nømbe trenchibelø gøn:

—Mugucha ñimui yaeløbe treeg munchi tōgarbe kaagøn— cha.

62 Incha mōskawan: “¿Chi munchi basrtrab?” cha, señas maratø payene, 63 Mōskaimbe pōramig kan tabla-unø miawabe: “Nui munchibe Juan gøn” chib, pørøbig køn. 64 Inchen tru urastø Zacaríaswane nilø kemendikkucha kurrøben, wam larraiben, Tiuswan tabig waminchib mendabig køn. 65 Treekkurri mayeeløba nui ya bulueløbe truba rruba kwaariilø gōrrømisren, tru Judea birau tunmeragøba tōga birømerasrø warab misaamerabe, øyeelø purayaigwangøba waminchib gøbelø gøn. 66 Inchen mayeelø wammørøbeløbe nōmui manrrautø esegab trenchibelø gøn:

—¿I unøbe chi maig kønrrabig kerah?— cha.

Kaguende Señorwei tasiibe nōba basrøben.

Zacarías cantaig

67 Zacarías tru unai mōskawane Espíritu Santo netsaben, maig pub attrabigwan øyah chib waminchibig køn:

68 “Israelwei Señor Tiusbe mayanguen tabig wamindig kønrrain cha. Kaguende namun ashchab arrua, nui misagwane gatøle nuielø gōnrrai wesrun cha.

69 Maramburab Marøbig Kaigyugurri Wesranrrabig kusrain gøn cha, tru karuigwan marøb megabig Davidwei yaugurri.

- 70 Tru merrab manasrøngurri tru Tiusweindø tarømariilø Tius maig karuigwan eshkabeløgurri nø maig taig:
- 71 Namun tru ashikken gømui inçhibelainukkurrimba, katø mayeelø namun tsalø inçhibelainukkurrimbe wesranrrab cha trendaigwan.
- 72 Merrabsrø namui kølli misaameran truba lastima asigwanba, katø Tius tru misaaba øyeeg martrab cha, tru newan tabig nuinukkurri nø lata kandø isua martrab pasrigwan isumig kønrraimba,
- 73 tru namui kølli misag Abrahamwan treeg marmø gømmø igatø! treeg marig kønrrun cha kørromarig købigwan.
- 74 Tru namun ashig kømui inçhibelai taskugurri namun wesraikkurrimbe, chigucha chi kørig kuin gømmø, nuiwan marøb,
- 75 katø nam amønain gwalømmerawan kwalømmørig chu urastøgucha nui merrab kerrigu newan tabig, sølgandø marøb gømig kønrrai.
- 76 Inchen ñi nai unøzhiibe, Tius maig karuigwan eshkabig tru Mayeelaim Bala Pasrabigweimburab waminçhibig køn daig kønrrun cha. Kaguende ñibe Señorwei merrab inrrabig køn cha, nui maymeran tamarøb,
- 77 katø kaigyugurri wesrailø gømigwan misaameran nebua ashchai kenamarøb inçhab, tru nømui kaig mariilan ulø baymø pesannab indikkurri.
- 78 Namui Tius purø nu lastima asikkurri, kan srø gwaløm pørr törguegwalmabig neeshibig lataig kal-lanrrun cha,
- 79 purø løstøyu warabelanba, katø kwamitø itøgasraig warabelanba kebilønrrab. Incha ambumay imay tabig amønnam maywan ambamig kønrrai martrab.”
- 80 Inchen unøbe nurab ippe, Tiusweimburabeløyu treetøwei mur basrabig nurab ya, Israel misaameran kenamisram gwalømgatig mu misag warab waraimøsrø tsubig køn.

Jesús kal-laigwan eshkab

(Mt 1.18-25)

2 ¹Tru gwalømmerawan Roma maya misagwan ashib karub wabig César Augustobe treeg maramig kønrrai kan kilga treeg pøra weerig købig køn, chutøgucha misaamera maya nu gøtashçhab munchimeran tulisamig. ²Iig køn, tru srøsrøwan

munchimeran tulisingaruig, Cirenio Siria birausrø kubenadur gøb uras. ³Inchen mayeeløba tru trendø nømuim birau pueblomerasrø munchiwan pøra gørrømartrab ambamig nebubig køn.

⁴Treekkurri Josébe Galilea birau Nazaret puebloyugurri webya, Judea birau Belén tru Davidweim pueblo tainuumay ibig køn, kaguende nøbe merrabsrø Davidwei misagugurri arrubig kua.

⁵Incha Maríaba Belénsrø nømui munchiwan pøra gørrømartrab ibig køn. Maríabe Joséba kasharanrrab misraig kwanrriig købig køn. ⁶Indiibe Belén waramnetø, Maríane unan tammisramig ura puben, ⁷nui mayor nusrkawan tøgamisra, may bula, animal maig kan patiyau wayibig køn, kaguende nømuimbe ya bebøbelainuube chu kørrømisramig kaaben.

Angelesmera ubisha ashibelan eshkab

⁸Inchen tru birau Belén bulu møiløgøsrøn ubisha ashibelø ubisha ashib yem warøbene, ⁹møimbe Señorwei ángel nømun kenamisren, Señorwei torguegwalmabig nømuim bötøgatan kebiløben, nømbe truba rruba kørig kui inchibelø gøn.

¹⁰Inchen ángelbe trenchibig køn:

—Kørig kui inchimøtay cha. Kaguende ñimun wammørøsrkønrrab kan tabig srøig wam srua arrur cha, mayeelø kasraaramig kønrrai. ¹¹Møi Davidwei puebloyu ñimuyasig kan Kaigyugurri Wesrabig kal-lain gøn cha, Cristo tru Señor. ¹²Incha truig kuitamab asamibe, unane pula, animal maig kan patiyau wayig wetørranrrabguen— cha, trenchibig køn ángelbe.

¹³Inchen møimbe tru urastø ángelweim bulube katøgan ángelesmera srømbalasreelø kenamisra, Tiuswan tabig waminchib trenchibelø gøn:

¹⁴“iSrømbalasrømbe Tiusweimbe purø tabig køn chib

kasraarab,

katø piraube misaamera Señor nø mayanguen tab gúi

wamig kønrrai,

treeg pønrrabelaimbe ambumay imay mayanguen tab gøn!”

chib.

¹⁵Inchen ángelesmera katø srømbalasrømay amben, ubisha ashibeløbe kangurriin gangurri trenchibelø gøn:



San Lucas 2.12

—Chi burayaitashchab, Señor namun chi taitashchab, mōindøwei Belénsrø ashchab amun— cha.

¹⁶Incha malla amba, Maríanba, Joséwanba wetørrabelø gøn, unane animal main batiayu wayig. ¹⁷Incha ashabe, ángel tru unaimburab chi taigwan tru ubisha ashibeløbe eshkaben, ¹⁸mayeeløba chi eshkaigwan mørabe, truba kwaarøbelø gøn.

¹⁹Inchen Maríabe chi tailane treebe maig kermab isub, nuinetø esegabig køn. ²⁰Inchen ubisha ashibeløbe katøle ambuppe:

—Tiusbe maya nuguen tabig køn chib— truba tabig waminchib ambubelø gøn, nøm chi mørigwan nøm chi asigwan, tru ángelesmera maig taig treeg purayaigwan asha.

Jesús-unan Tiuswei yaumay srua ambub

21 Inchen trune gwalømyube unan circuncidamig puben, treeg mara, Jesús munchi basrøbelø gøn. María kwanrriig kømøwatø ángel chi munchi basringaruig, treeg basrig købig køn.

22 Inchen tru maig maramigwan martrai Moisés pørigu maig chibig køben, tru chilliguig kørømisrigwan chish maram gwalømmera puben, unan Jerusalén ciudayu Señorwan ‘nuin gønrrai tranrrumøn’ chinrrab srua ambubelø gøn. 23 Tru maig maramigwan martrai Señor pasrigu maig chibig køben treeg: “Mutøgucha srøsrø gal-lab nusrkawane Señorweindø tarømarig kønrrain” daigwan. 24 Tru maig maramigwan martrai Señor pasrigu maig chibig køben, pagatø nushin gúi, kabe pagatø paloma-ureezheelø gúi Tiusweyasig tranrrab ambubelø gøn.

Simeón cantaig

25 Inchen tru gwalømmerawan kan møg Jerusalén Simeón daig tsubig køn, sølgandø tabig, Tiuswan chu uragucha pesannamíig, Israel misaamera tab gømui melaigugurri webambamigwan muniirabig. Inchen Espíritu Santobe Simeónba basrabig køn. 26 Incha nune Espíritu Santobe maig kønrrabigwan eshkain gøbig køn, Criston tru Señorwan ashmøwatøbe ñibe kwanrraamøn cha. 27 Inchen tru møøbe Espíritu Santo inrrai inchen Tiuswei yaumay ya, tru Jesús-unai møskalø tru maig maramigwan martrai Moisés pørigu maig chibig køben, nuimbura martrab Tiuswei yaumay srua amrrubene, 28 Simeónbe Jesús-unan nui kwalyu muta, Tiuswan tabig waminchib, trenchibig køn:

29 “Señor, Mayeelaim Bala Pasrabig,

na ñi karuig megabigwan

chi isumø pishindø tabig kwabashcha chib,

ñi nan maig eshkaig købiibe yandø treeg nebui ashar cha.

30 Kaguende nai kaptøga kaigyugurri ñi wesraig kømigwan ashar cha.

31 Truigwane maya misaamera ashen, ñi tamara basrin gøn cha.

32 Ìibe tru maya misag judíos kømeeaimbe ñun kenamaramig tør gøben,

katø ñui misag israelitasmeraimbe maya nuguen tabig køn”
cha.

³³Inchen Joséba, Jesúswei usrimba unaimburab tru Simeón maig taigwan mørabe, kan øyeebe maig kermab isub kwaara ashen, ³⁴Simeónbe mayanguen tab gúilø gønrrain chabe, Jesúswei usri Maríane trenchibig kòn:

—Au, i unøbe Israel misagwan truba nuwan møilane nørreelø gúigwan chigucha gømeelø gønrrai marøb, møilane nørreelø gønrrai marøb inchabig, treeg kòn cha. Tiusweimburabigwan nø kenamaren, misamera nun kashchab gúi asamig, nøbe truig kòn cha. ³⁵Truba nu møilaiwan gøben, nømui manrrømerayu maig isubelø gúigwan kenamarig kønrrain cha. Inchen ñibe ñui manrrau isubigube kan espadatøga kelarrab gwani lataig isub pusrkwaig kørørmisramig kønrrun— chibig kòn.

Ana maig kuigwan waminchibig

³⁶Inchen truyu kan ishug, Tius maig karuigwan eshkabig, Fenuelwei nimbasr, Aserwei misagugurri arrubig, Ana taikkucha wabig kòn. Truibe yandø truba køllig købig kòn. Truba unø gasharawa, siete años keeba tsua, ³⁷yandø keg kwaben nøtiig kørørmisra, yandø ochenta y cuatro años tøgag købig kòn. Tiuswei yaugurri managucha tarømisrmíig købig kòn, Tiuswan kóriibala tabig waminchib, ayunab, katø Tiusba waminchib yem, gwaløm Tiusweyasig treeg marøb. ³⁸Inchen Anabe tru urastøwei arrua, Tiuswan ‘mayanguen ungwa, ungwa’ chibig kòn. Incha nøbe tru unaimburab waminchib mendabig kòn tru mayeelø Jerusalén misag Tiusweilø gønrrai kaigyugurri wesrailø gømigwan isub muniirabelane.

Nazaretmay katø ambub

³⁹Incha tru maig maramigwan martrai Señor pasrigu maig karuilan kerrigu chab marabe, Galilea birau Nazaretsrømay ambubelø gøn, tru nømuim puebloyumay. ⁴⁰Inchen unøbe nurab ippe, murig chishig, purø gusrebig misrøb iben, Tiuswei tru ka yandø tab indiibe nuim bala basrabig kòn.

Jesús-unø kusrebeløba waminchib Tiuswei yau

⁴¹Inchen nui møskaløbe Jerusalén pascua fiestayumay pilamørig ambubelø gøbig kòn. ⁴²Incha Jesúsbe doce años tøgag misren, fiestayumay ambubelø gøn, trendø maig marøbelø gøben, treeg

martrab. ⁴³Inchen fiesta chab patsøben, nømbe yamay katø amrruben, Jesús-unøbe Jerusalén kørømisrin gøben, møskaløbe ashmuin gøbig køn. ⁴⁴Nømbe tru misag utu unøbe arritamab isua, mawa ambiisrø amba, nømui nømmisaamerai utuba, asiilai utuba lab menda, ⁴⁵kalawabe, Jerusalénmay katø lliabelø gøn, trusrø lanrrab.

⁴⁶Incha pøn gwalømyube Tiuswei yau tru Moisés pørigwan kusrenanøbelai utu mørøb, nøgurri payib wabyu wetørrabelø gøn. ⁴⁷Inchen mayeeløba mørøbeløbe truba rruba kusrebig kui ashib, katø nø maig løtiilan mørøb inchabe, ke kwaara ashibelø gøn. ⁴⁸Inchen møskalø ashabe, ke kwaara asha, Jesúswei usrimbe trenchibig køn:

—¿Nai nusrkai, namun chindimbarre øyeeg margu? cha. Ñui møkaimba, nababe truba rruba isuilø lab guer— cha.

⁴⁹Inchene Jesúsbe trenchibig køn:



San Lucas 2.48

—¿Nane chinchabrre lague? cha. ¿Nabe nai Møskawei chi maramelan na marøb wamigwan ñimgan ashmeelø gøtirru?— cha.

⁵⁰Inchen nømbe ni chi tainguen mørmeelø gøn.

⁵¹Inchabe nui møskaløba Nazaretsrømay katø mendig ya, maig karuben treeg mørøb megabig køn. Inchen nui usrimbe kutøgue iilan nui manrrautø isua esegabig køn. ⁵²Inchen Jesúsbe trurrigu kusrebig misrøb, nurab ibig køn, Tius lata, misaamera lata mayanguen tab indinab.

Juan Bautista mu misag warab waraimønug waminchib

(Mt 3.1-12; Mc 1.1-8; Jn 1.19-28)

3 ¹Roma maya misagwan ashib karub wabig Tiberio chabguen quince años karub waben, Pilatobe Judea birau kubenadur gøben, Herodesbe Galilea birau ashib karub wabig køn. Inchen Herodeswei nuneg Felipebe Iturea birøwanba, Traconite birøwanba karub waben, Lisaníasbe Abilinia birau ashib karub wabig køn.

²Inchen Anásba, Caifásbabe maya sacerdotesmeran tru uras nøm garubelø gøben, Zacaríaswei nusrkai Juanwan Tius wamindig køn, mu misag warab waraimønug tsuben. ³Inchen Juanbe Jordán bi buluwan chuguen palømo pureb ippe, misaameran mas kaig marmønrrab isua møra, Tiusweimay llirain gønmaab asamig piu umbu ulsrailø gømigwan eshkab kusrenanøbig køn, kaig mariilan ulø baymø pesannailø gønrrai. ⁴Truibe merrabsrø Tius maig karuigwan eshkabig Isaías pørigu maig taig øyeeg:

“Kan wam mu misag warab waraimønug trenchib trasan cha:

‘Señorwei maywan tamarøb, nuyasig maymerane ølmarøb inday tan chib.

⁵Kullimera gøbeløbe netsøganiilø gøben, nørø tunmeraba, shush tunmerababe kanguelarrøtø chag mariilø gøben, andul maymerabe ølmariilø gøben, mitør maymerabe min mariilø gønrrun chib.

⁶Inchen maya misaabe Tius misagwan kaigyugurri wesranrrai ørigwan ashchun” daig køn.

⁷Inchen misaamera Juan piu umbu ulsrailø gønrrab webambene, trenchibig køn:

—iÑimbe ul lataig inchib misaamera! ¿Ñimune mu eshkata cha, Tiuswei purø gørig kømdiig ñimuim bala attrabig pub pasrabigugurri wegørrønrraimbe? ⁸Ñimui kaig mariilan isua

møra, Tiusweimay llirawar guy torgandø asamdiig kønrrai treelø gua, ñimbe ñimasiitø øyeeg chib mendømøtay cha: “Nambe, Abrahamwei misaamera guer” chib. Kaguende nabe trendamønrrun cha: Tiusbe i sruumeranguen Abrahamwei misaamera gønrrai marøg købene, martrun cha. ⁹Katø walømbe tusrmeran srølba para øramig chabguen srølyu pasringuen basran cha. Chi tusrwandøgucha tab mamig niimígwane para, nagu kegutsan— cha.

¹⁰Inchene misaamerabe truba nu basrabiibe trencha payibelø køn: —¿Nambe chi maramø?— cha.

¹¹Inchen Juanbe trencha løtabig køn:

—Møikkøben pa turin døgaibe chiguchagaigwan kan tranø cha. Inchen møikkøben mamig tøgaike, chigaigwan pirishi— cha.

¹²Inchen gatø møiløgøsrøn tru romasreelayasig an utabelø piu umbu ulsrailø gønrrab amrruabe, Juanwane trencha payibelø gøn: —Kusrennøbig, ¿nambe chi maramø?— cha.

¹³Inchen Juanbe trenchibig køn:

—Anwan maya utønrrai karua basrigwan menrra utønrrab gømø, maig utamigwandø utønrrigay— cha.

¹⁴Inchen gatø mø suldaumera gøsrøn trencha payibelø gøn:

—¿Nambe chi maramig kønrrerah?— cha.

Inchene nøbe trenchibig køn:

—Mun gøben ‘chigøben martrumøn’ cha kwaarøsa chigøben kerramøwei, katø mun gøben ka isatø chigøben guemesra kebenøsrkømwøwei inday cha. Ñim chigøben marøb gúimburø ñimun maig pagaraitøgatø kasraaray— cha, trenchibig køn.

¹⁵Inchen misaamerabe ke nungøba isua ashib gúig køppe, Juanwane nømuinetøbe Cristo gøppeendimab isub gøbelø gøn.

¹⁶Inchen Juanbe mayeelan trenchibig køn:

—Nabe ñimune pi binøbulrrai piu umbu ulsraa cha. Trune nai wendau arrubiibe si, Espíritu Santotøgaba, naatøgaba pinøbulrrun cha. Truibeguende, na lataguen gømø, maramburab marøbig køben, nabe truburab gømíig kua, nui alpargatisyu tsiwanguen pitchabgaig kur chibig køn. ¹⁷Nøbe tirigun isig øra tarømartrab tru kalagutsamig tsig utigwane sruaguen basran cha. Incha truyu tru tirigu chishmari yabaløwan kerrigu chab chishmarabe, tirigune tru esegainug esegappe, shauwane mana kwamø nagu pattrab.—

¹⁸Incha maig melamigwan treeg marøb melay chib, katøgan øyeelø lataløba misaameran waminchibig køn, Tiuswei tabig srø wamwan. ¹⁹Inchen tru Galilea birau ashib karub wabig Herodesbe nui nuneg Felipei srai Herodíaswan nø bera tsumba, katø chigurrimbunø kaig mariiløgurrimba Juanbe Herodeswane ‘øyebe kalø gøn’ chib namuben, ²⁰Herodesbe møri urasbe, trubalatø mas kaig marøb, Juanwane merrarrawa, kailan keeri yau pasrøbig køn.

Jesúsuan piu umbu ulsraig

(Mt 3.13-17; Mc 1.9-11)

²¹Inchen Juan maya misagwan piu umbu ulsrøb uñib uras, Jesúswangucha piu umbu ulsraig kuig køn. Inchen Jesús Tius Møskaimba waminchib pasramne, srømbalabe kuren, ²²Espíritu Santobe nuim bala kan paloma lataig kørraarruben, srømbalasrøngurrimbe kan wam treeg mørø waminchib trenchibig køn:

—Ñibe nai Nusrkai undaaraig køn cha. Nabe ñuimbura truba tab gúi war— cha.

Jesucristoi merrab misaamera

(Mt 1.1-17)

²³Jesúsbe nui maramigwan pølbaserppe chabguen treinta años køsrøn døgaig købig køn.

Jesúsbe Joséwei nusrkain gúitamab isubelø gøn.

²⁴Joséwei møskaimbe Elí gøben,

Elíwei møskaimbe Matat købig køn.

Matatwei møskaimbe Leví gøben,

Levíwei møskaimbe Melqui gøben,

Melquiwei møskaimbe Jana gøben,

Janai møskaimbe José gøbig køn.

²⁵Joséwei møskaimbe Matatías køben,

Matatíaswei møskaimbe Amós køben,

Amóswei møskaimbe Nahum gøben,

Nahumwei møskaimbe Esli gøben,

Esliwei møskaimbe Nagai gøbig køn.

²⁶Nagaiwei møskaimbe Maat køben,

Maatwei møskaimbe Matatías køben,

Matatíaswei møskaimbe Semei gøben,

- Semeiwei mǝskaimbe José gǝben,
 Joséwei mǝskaimbe Judá gǝbig kǝn.
- 27 Judáwei mǝskaimbe Joanan gǝben,
 Joananwei mǝskaimbe Resa gǝben,
 Resai mǝskaimbe Zorobabel gǝben,
 Zorobabelwei mǝskaimbe Salatiel gǝben,
 Salatielwei mǝskaimbe Neri gǝbig kǝn.
- 28 Nerii mǝskaimbe Melqui gǝben,
 Melquiwei mǝskaimbe Adi gǝben,
 Adii mǝskaimbe Cosam gǝben,
 Cosamwei mǝskaimbe Elmodam gǝben,
 Elmodamwei mǝskaimbe Er gǝbig kǝn.
- 29 Erwei mǝskaimbe Josué gǝben,
 Josuéwei mǝskaimbe Eliezer gǝben,
 Eliezerwei mǝskaimbe Jorim gǝben,
 Jorimwei mǝskaimbe Matat kǝbig kǝn.
- 30 Matatwei mǝskaimbe Leví gǝben,
 Levíwei mǝskaimbe Simeón gǝben,
 Simeónwei mǝskaimbe Judá gǝben,
 Judáwei mǝskaimbe José gǝben,
 Joséwei mǝskaimbe Jonám gǝben,
 Jonámwei mǝskaimbe Eliaquim gǝben,
 Eliaquimwei mǝskaimbe Melea gǝbig kǝn.
- 31 Meleai mǝskaimbe Mena gǝben,
 Menai mǝskaimbe Matata gǝben,
 Matatai mǝskaimbe Natán gǝbig kǝn.
- 32 Natánwei mǝskaimbe David gǝben,
 Davidwei mǝskaimbe Isaí gǝben,
 Isaíwei mǝskaimbe Obed gǝben,
 Obedwei mǝskaimbe Booz kǝben,
 Boozwei mǝskaimbe Salomón gǝben,
 Salomónwei mǝskaimbe Naasón gǝbig kǝn.
- 33 Naasónwei mǝskaimbe Aminadab gǝben,
 Aminadabwei mǝskaimbe Admin gǝben,
 Adminwei mǝskaimbe Arni gǝben,
 Arnii mǝskaimbe Esrom gǝben,
 Esromwei mǝskaimbe Fares kǝben,
 Fareswei mǝskaimbe Judá gǝbig kǝn.

- 34 Judáwei mǝskaimbe Jacob gǝben,
 Jacobwei mǝskaimbe Isaac kǝben,
 Isaacwei mǝskaimbe Abraham gǝben,
 Abrahamwei mǝskaimbe Taré gǝben,
 Taréwei mǝskaimbe Nacor gǝben,
 Nacorwei mǝskaimbe Serug kǝbig kǝn.
- 35 Serugwei mǝskaimbe Ragau gǝben,
 Ragauwei mǝskaimbe Peleg kǝben,
 Pelegwei mǝskaimbe Heber gǝben,
 Heberwei mǝskaimbe Sélaj kǝben,
 Sélajwei mǝskaimbe Cainán gǝbig kǝn.
- 36 Cainánwei mǝskaimbe Arfaxad gǝben,
 Arfaxadwei mǝskaimbe Sem gǝben,
 Semwei mǝskaimbe Noé gǝben,
 Noéwei mǝskaimbe Lamec kǝbig kǝn.
- 37 Lamecwei mǝskaimbe Matusalén gǝben,
 Matusalénwei mǝskaimbe Enoc kǝben,
 Enocwei mǝskaimbe Jared gǝben,
 Jaredwei mǝskaimbe Mahalaleel gǝben,
 Mahalaleelwei mǝskaimbe Cainán gǝbig kǝn.
- 38 Cainánwei mǝskaimbe Enós kǝben
 Enóswei mǝskaimbe Set kǝben,
 Setwei mǝskaimbe Adán gǝben,
 Adánwei Mǝskaimbe Tius kǝn.

Nugwaimandzig Jesúswan chinchibig kǝtashchab marǝb

(Mt 4.1-11; Mc 1.12-13)

4 ¹Jesús Espírítu Santotǝ netsaig Jordán biyugurri gatǝ
 arruben, Espírítu Santobe mu misag warab waraimǝsrǝmay
 pera iben, ²truyu kwalǝmmerra cuarenta nemisramne tsuben,
 nugwaimandziibe ke kebenǝsrkǝnrrab marǝbig kǝn. Tru
 gwalǝmmerrawan chigucha mamǝwa, yandǝ parǝgwai mǝren,
³nugwaimandziibe:

—Ni isa gǝmǝ, Tiuswei nusrkain guabe, i srugwan ‘pirri misr’
 cha, trenchi— chibig kǝn.

⁴Inchene Jesúsbe trencha lǝtabig kǝn:

—Tiuswei wamwan pǝrigube trenchibig pǝrig pasran cha:
 “Mǝǝbe pirrindǝgatǝ ǝsig tsumig kǝmǝn” chibig.—

⁵Inchen nugwaimandziibe kan tun balasrømay pera ya, yu pirau chutøgucha nørreelø nøm ashib karub purrailan kerriguba ke pestø Jesúswan eshkab kenamarabe, ⁶trenchibig kòn:

—Nabe ñi karumburab karumigwan kerrigu ñun tranøb, katø nømui chigurrimbunø purø tabig tørigwan tranøb inchumøn cha. Kaguende nane iilan kerrigu tranig kòn cha. Incha nabe mun tranøg køben, tranamønrrun cha. ⁷Inchawei ñi nan tømbrasra, køriibala tabig waminchene, iibe kerriguba ñuin gønrrun— cha.

⁸Inchene Jesúsbe trencha løtabig kòn:

—Trenchibig pørig pasran cha: “Señor ñui Tiuswandø køriibala tabig waminchib, nuyasiitø marøb megamig kòn” chibig.—

⁹Inchen trugurrimbe nugwaimandziibe Jerusalén ciudasrømay pera ya, tru Tiuswei yau purø balasrø pasrabe, trenchibig kòn:

—Isa gømø, ñi Tiuswei Nusrkain guabe, yugurri pirausrø pørsrau cha, ¹⁰kaguende Tiuswei wamyube trenchibig pørig pasran cha:

“Tiusbe nui ángelesmeran ñun chinchimønrrai ashchai ørtrun chibig.

¹¹Incha ñui srøbwan srugu srurrengwamønrrai nømui tasiimeratøga ñune kusranrrun” chibig.—

¹²Inchen Jesúsbe trencha løtabig kòn:

—Øyeeg chibig pasran cha: “Ñui Señor Tiuswane ke chinchibig køtashchab lataikkucha maramig kømøn” chibig.—

¹³Inchen nugwaimandziibe øyeeg chiyutø kebenøsrkønrrab indamigwan kerrigu chab marabe, Jesúsweim bulugurri maya yana gøsrøn tarømisrøbig kòn, katøle treeg maramdiig pumnegatig.

Jesús Galilea nui maramigwan pølbasrøb

(Mt 4.12-17; Mc 1.14-15)

¹⁴Jesús Espíritu Santoi maramburab maramigwan tøgäig Galileamay gatø arruben, tru birau tru pøtøgatanbe chutøgucha nungøba, nungøba waminchib gøbelø gøn. ¹⁵Inchen judíosmera tulundzuni yamørig nøbe kusrenanen, mayeeløba nun truba tabig waminchibelø gøn.

Jesús Nazaretsrø

(Mt 13.53-58; Mc 6.1-6)

¹⁶Incha Jesúsbe nø nurainuumay Nazaretsrømay ya, nø trendø treeg marøbig køppe, isrin gwalømbe judíosmera tulundzuni yau

kebya, lenrrab pasramisren, ¹⁷Tius maig karuigwan eshkabig Isaíaswei pørigwan lenrrai tranen, larrøbicha kurøppe, øyeeg pørig basrabigu gurøbig køn:

¹⁸ “Señor Tiuswei Espíritube naim bala basran cha.

Kaguende nane waachameran tabig srøigwan

eshkanrrai aceite itølusha tarømarig køn cha;

merrarraig pønrrabelan ‘Elatsiilø gønrrun’ chinrraimba,

katø kabgarwan ashibelø gønrrai martraimba,

katø kaig indinab melabelane, amrrai wesrab inchaimba,

¹⁹ katø Señorwei truba tab pila attrabigwangucha

eshkanrraimba nane ørig køn” chibigwan.

²⁰ Incha Jesúsbe tru pørig tøgagwan judíosmera tulundzuni yau purugubigwan katøle kirra tranabe, wamisrøbig køn. Inchen

mayeeløba judíosmera tulundzuni yau purrabeløbe ke nungøba

ashib purrabelø gøn. ²¹ Inchen nøbe trenchib eshkab mendabig køn:

—Na leben ñim mørig, i Tiuswei wam pøriibe, ñimui merrab møi yandø treeg nebun— cha.

²² Inchen misaabe mayeeløba nuimbura tabig waminchib, katø nui trigugurri purø tabzhig wamindi wammeran ke kwaara ashib trenchibelø gøn:

—¿Iibe Joséwei nusrkain gømmørgøppeh?— cha.

²³ Inchen Jesúsbe trenchibig køn:

—Ñimbe nane indzabelø chibgunrrig øyeeg chinrrautan

cha: “Ñi mø marøbiibe ñiasiitøwei mø mar” cha. Katø nane: “Ñi

Capernaumsrø chine, chine mariilan nam tru wammørigwan, yu

ñuim biraugucha treegwei mar”,— cha.

²⁴ Inchabe katø trenchibig køn:

—Nabe ñimun cierton trendamønrrun cha: Tius maig

karuigwan eshkabigwane møigwanguen nui biraueløtøweimbe

chi tab indiimfiig køn cha. ²⁵ Isa gømø, Tius maig karuigwan

eshkabig Elías uñib uras tru pøn bila y tøbø bila sre bumubenma,

tru birau ørøba truba rruba parø basrøben, Israel misaamerai

utube piudamera truba yam waraingucha, ²⁶ Tiusbe Elíaswane

Israel birau warabelan purugunrrab ørmøtø, Sidón ciuda bulu

Sareptasrø tsub piudan purugunrrab ørig købig køn cha. ²⁷ Katø

Tius maig karuigwan eshkabig Eliseo uñib uras chigucha, Israel

misaamerai utube lepra gwanrreelø truba nu gúig køn cha.

Inchendø truiløbe ni kanguen kwanrrøwan chishmariimeelø

gøben, Siria birausrig Naamánwane kwanrrøwan chishmarig købig køn— cha.

²⁸Inchen iigwan mørøppe, judíosmera tulundzuni yau purrabeløbe namig købiitø ke chinchimmørø incha, ²⁹kurra bønrramisra, puebloyugurri weera, tru nøm waramig ciuda marim basrab tunyu pala trømbøsromay pera ambubelø gøn, trusrø pinørtrab. ³⁰Inchen Jesúsbe nømuin døbøtagwan pureppa, iptinchibig køn.

Kan møg kwaimandzig tøgagig

(Mc 1.21-28)

³¹Incha Jesúsbe Galilea birau Capernaum puebloyumay ya, isrin gwalømmerawan misagwan kusrenanøbig køn. ³²Inchen nø kusrenanigwane kwaara ashibelø gøn, kaguende nø wamindiiløbe mu mandamgaig wamindig køben.

³³Inchen judíosmera tulundzuni yau kan trømbøig maringarub kwaimandzig tøgagig wawabe, mur trashib trenchibig køn:

³⁴—iAu! ¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu gúi ashar chibig køn. Ñibe tru Tiuswei Newan Tabig, truig køn— cha.

³⁵Inchen Jesúsbe kwaimandzigwan namab trenchibig køn:

—iÑibe trashimøtø, møweinukkurrimbe webinrrø!— cha.

Inchen kwaimandziibe nøm mayelai merrab mōwane pirau penørka, tru møweinukkurri webibig køn, chigucha chi kørriinchimøtø. ³⁶Inchen mayeeløba kwaara, kangurrin gangurri:

—¿Kan øyeeg wamindi wammerabe chi gøh? chibelø gøn. iI mōøbe mu mandamgaig karuitøgaba, maramburab mariitøgaba trømbøig maringarub kwaimandziimeranguen webingaruben, truilø webamrrappe!—

³⁷Inchen nune tru birau ørøba chutøgucha nun, nun waminchibelø gøn.

Jesús Pedroi sueeran tamarøb

(Mt 8.14-15; Mc 1.29-31)

³⁸Incha Jesús judíosmera tulundzuni yaugurri webya, Simónwei yau kebibene, Simónwei sueerabe mur bachiiba kwanrrø tsuben, nømbe kwanrriigweyasig Jesúswan:

—Purugurra— cha, rrugaben,

³⁹Jesúsbe kwanrriigweimbala utsøbasrabe, pachigwan webinrrai kandø wamøben, pachiibe weetaptinchen, nøbe tru urastø kurra, tru pubelayasig chi maramigwan marøb mendabig køn.

Jesús truba yam kwanreelan tamarøb

(Mt 8.16-17; Mc 1.32-34)

⁴⁰Yandø nøsig pinaiben mayeeløba chi gwanrrø gøben tøgarmen misaamerabe Jesúsweimay srua amrruben, kwanreelømmørig nøbe nui tasiimeran nømuim bala estsara, tamarøbig køn. ⁴¹Inchen gatø truyu møilan gøben truba yamelainukkurri kwaimandziimerabe trenchib trashib webambubelø gøn:

—Ñibe Tiuswei Nusrkain gøn— chib.

Inchen Jesúsbe kwaimandziimerane kandø wamab, waminchibashmíig køn, kaguende nømbe Cristo gúi ashibelø gøben.

Jesús Galileasrø eshkab kusrenanøb

(Mc 1.35-39)

⁴²Yandø chab tør-rraben Jesúsbe ciudayugurri webya, katøganbalø mu misakkasrø tarømisra iben, misaamerabe lab gua, nø waisrø puabe, ibashmønrrab inchen, ⁴³Jesúsbe trenchibig køn:

—Misag sètømera katøganbaløsrø warabelangucha nabe Tius nø ashib karub pasrainuguigwei tabig srøigwan eshkab kusrenanamig køn cha. Kaguende truweiwei ørig kur— cha.

⁴⁴Incha Judeasrø judíosmera tulundzuni yamerayu Jesúsbe eshkab kusrenanøb uñibig køn Tiuswei wamwan.

Mana øyeeg asiimíig peskaumera purø norrø wesrub

(Mt 4.18-22; Mc 1.16-20)

5 ¹Kan gwaløm Jesús Genesaret nu bisu menda pasrøbene, misaamerabe Tiuswei wamwan mørtrab nuingatan ke nømdø rrawaguchib tulundzunøben, ²nøbe tru pisu mendabe pagatø barcomera mu misakkar pønrrai ashibig køn, kaguende peskabeløbe truyugurri webamba, nømui atarrayameran chishmarøb warøben. ³Inchen Jesúsbe tru pagatø barcomera bønrrabyu tru Simónwei barcoyu kebyabe, pi mendagurri katøguchi amburøsrø ørtra cha, nøbe tru barcoyu wamisra, truyugurri misagwan kusrenanøb mendabig køn. ⁴Incha yandø chab waminchabe, Simónwane trenchibig køn:

—Barcon amburø mas umbu bisrø øra, peskanrrab ñimui atarrayameran kebetay— cha.

⁵Inchen Simónbe trencha løtabig køn:

—Kusrennøbig, nambe kwalma gwalma peskab meløbendø, kanguen wesranrrab gaymer cha. Inchendø ke ñi trendaig køptø, atarrayan kegutchab— cha.

⁶Incha keguchene, peskaube nu guegørraptø atarrayabe kølsrøb mendøben, ⁷nømbe nømui lincha amøñibelø katøgan barcoyu purrabelan, purugunrrab amrrunrrai keberen, nømbe amrrua, pa barcomeran peskautø netsøganen, barcomerabe piu ke asentanrraptiig inchibelø gøn. ⁸Inchen trunun ashabe, Simón Pedrobe Jesúswei srøb pulu tømboñsrøb trenchibig køn:

—Señor, naim bulugurri tarømisrtra cha. Kaguen nabe kaig marøb møg kur— cha.

⁹Peskau treeg nørrø wesraikkurri Simónbe truyu mayeelø nøba pønrrabeløba kwaarøbiitø ke chindamdiig kui inchibelø gøn.

¹⁰Katø tru Zebedeowei nusrkalo Jacoboba, Juanba, tru Simónwei trendø lincha peskab amøñibeløgucha treetøwein gørig kui inchibelø gøn. Inchene Jesúsbe Simónwan trenchibig køn:

—Chi kørig kui inchimøta cha, møingurrimbunøbe misaameran peskabig kønrrig— cha.

¹¹Inchen nømbe barcomeran pisu mendasrø wesrawabe, kerrigu pønrramnetø, Jesúswei mendig ambuptinchibelø gøn.

Jesús kan lepra gwanrrø tøgagwan tamarøb

(Mt 8.1-4; Mc 1.40-45)

¹²Jesús mø pueblomerayu gøsrøn tsubene, kan møg asr trerab gwanrrø, lepra taig, tøgag pua, Jesúswan ashabe, tømboñsra, maløwanguen pirau kebatamnegatig utsøbasrabe, trenchib miabig køn:

—Señor, nan ñi tamaramdiig købene, tamartra— cha.

¹³Inchen Jesúsbe tasigwan larrøbicha estsarabe, trenchibig køn:

—Tamarig køtan cha. Tamarig kørrømisr— cha.

Inchen tru urastø nui trerab gwanrrøbe chishig kørrømisren,

¹⁴Jesúsbe trencha garubig køn:

—Au, mungøben eshkawabesin cha. Inchendø ya, ñui asrwan sacerdotendø kenamara, tru ñi yandø chishig kørrømisrimburø tru

Moisés trannrrig taigwane srua ya, tranrrig cha, mayeeløba ñui kwanrrowan chishig korrømisrin gúi ashchain— cha.

¹⁵Treendingucha Jesús wane ke nun, nun waminchen, nune mas wammørig korrømisren, misaamerabe truba norrø nun mørtrappa, katø nømui kwanrromeran tamariilø gønrappa tulundzunabelø gøn. ¹⁶Inchendø Jesús be chugøben mu misakkasrø ya, truyu Tius Møskaimba waminchibig køn.

Jesús kønørrab gaimabigwan tamarøb

(Mt 9.1-8; Mc 2.1-12)

¹⁷Kan gwaløm Jesús kusrenanøb wabene, møløgøsrøn fariseosmeraba, tru maig maramigwan martrai Moisés pørigwan kusrenanøbeløba truyu



San Lucas 5.18

purabelø gøn. Truiløbe Galilea birau maya
pueblosrøngurrimba, Judea birausrøngurrimba,
Jerusaléngurrimba amrruar. Inchen Tiuswei maramburab
maramibe Jesúsba basrabig køn kwanrreelan
tamarøb. ¹⁸Inchen mø møguelø gøsrøn katøgan møg
kønønrab gaimabigwan tsigalyu muta pua, yau keera,
Jesúswei merrab pasrtrab inchendø, ¹⁹mumayguen
kebambamig wetørranrrab gaimabelø gøn. Kaguende menrra
misag basrøben, trugurri ya bala nebamba, tejameran picha,
trab gura, kwanrriigwan tsigalbañau misag utu Jesúswei
merrab kørrørøbelø gøn. ²⁰Inchen Jesúsbe nømui isubigwan
ke nuinuutø pasra ashabe, kwanrriigwane trenchibig køn:

—Au, kasuku, ñui kaig mariilane yandø ulø bayamig kømíig
pesannaig kørrømisran— cha.

²¹Inchene tru Moisés pørigwan kusrenanøbeløba
fariseosmerababe treeg isub mendabelø gøn: “I møg
Tiusweimburab purø rrømbøig wamab waminchibiibe, ¿mu gøh?
cha. Kaguende kaig mariilan ulø bayamig kømíig pesannaig
kønrraimbe ¿mu gúin rreeg mariasamø? cha, Tiustøweimbe rreeg
martrun” chib, isubelø gøn.

²²Inchen Jesúsbe nøm chi isub pønrrailan kelarrab ashabe,
trenchibig køn:

—¿Ñimbe ñimui manrraube chindimba øyeeg isugue? cha.

²³¿Møigwan mas kørmø trendamdiig købsruerah? cha. Kabe:
“Ñui kaig mariilan ulø bayamig kømíig pesannaig kørrømisran”
¿damiteh? Kabe: “Kurrrab, inrrø” ¿tamiteh? cha. ²⁴Pøs, na, Møg
Misra Arrubiibe yu pirau kaig mariilan ulø bayamig kømíig
pesannaig kønrrai mu mandamgaig marøbig kui møimbe ñim
ashchai kenamaramønrrun— chibig køn.

Inchabe tru kønønrab gaimabigwane trenchibig køn:

—Nabe ñun trenchar cha: Kurrrab, ñui tsigalwan mutab, ñui
yamay inrrø— cha.

²⁵Inchen tru urastø tru kwanrriibe nømui merrabgurri kurra, nø
tsuig tsigalwan muta, Tiuswan truba tabig waminchib nui yamay
ibig køn. ²⁶Inchene mayeeløba kwaara asha gørrømisra, Tiuswan
truba tabig waminchib, truba kwaariilø:

—Møin gwaløm kan yeekkucha tabelø mari aser— cha
trenchibelø gøn.

Jesús Levíwan wamab

(Mt 9.9-13; Mc 2.13-17)

²⁷Øyeeg purayaig wendø Jesús webyabe, kan møg Leví taig, romasreelayasig an utabelø purrainug wai ashabe, trenchibig køn: —Nai mendig amø— cha.

²⁸Inchen Levíbe chi tøgagúigwan kerrigu kørømarabe, kurrappa, Jesúswei mendig ibig køn.

²⁹Incha trugurrimbe Levíbe Jesúsweyasig nui yau truba nu fiesta maren, tru romasreelayasig an utabelø truba yameløba, katøganeløba mishatsigu nomba truba nu burrabelø gøn. ³⁰Inchen fariseosmeraba, tru Moisés pørigwan kusrenanøbeløbabe nui kusrenanøb pera uniilane namig, Jesúsweimburab chinetø chib, trenchibelø gøn:

—¿An utabeløba, kaig marøbeløba ñimbe truiløbabe chindimba lincha mab, muchigue?— cha.

³¹Inchene Jesúsbe nòmune trencha løtabig køn:

—Tabelø, kwanrrøgarbe mø marøbig palain gømøn cha. Kwanrreeløbeguende palain gøn cha. ³²Nabe tru sølgandø amøñibelan wamønrrab arrumøtø, kaig marøbelan wamønrrab arrig køn cha, yandø nømui kaig mariilan isua mørøb, Tiusweimay lliranrrai.—

Ayunamigwan Jesúswan payib

(Mt 9.14-17; Mc 2.18-22)

³³Inchen kaneløbe Jesúswan trencha bayibelø gøn:

—Juanwei mendig amøñibeløbe katø gatø truba ayunab, katø Tiusba waminchib indamigwan marøbelø gøn cha. Katø fariseosmerai mendig amøñibelø treetøwei maren, trune ñuieløbe ka mab, ka muchib inchibelø gøn— cha.

³⁴Inchene Jesúsbe trencha løtabig køn:

—¿Kan novios yaumay linchai eshkailanma keg mistrabig nomba wabengan, mamø burrønrrai inchaitarru? cha. ³⁵Inchendø yandø keg mistrabigwan srua ambam gwalømmerra punrrun cha. Inchen tru gwalømmerrawane ayunabwei inchun— cha.

³⁶Incha gatø Jesúsbe ‘øyeeg lataitøwein gøn’ cha, kemesra trenchibig køn:

—Mugucha kan srø camisanma para wesrumøn cha, køllin camisayu waya tsushinrrab. Treeg marene, srø camisabe ka

minchen, inchagucha srøigwan waya tsusaibe køllin camisayube chi tab punrraamøn chibig køn. ³⁷Katø muguen srø vinonma køllin galusmerayu usrmøwei indan cha. Kaguende treeg marene, srø vinobe kalusmeran srurrøgøben, vinobe lushen, kalusmerabe ka kòlsran cha. ³⁸Inchawei srø vinone srø galusmeran marigu usramig køn cha. ³⁹Katø mugucha øl-laig vinon muchibiima srø vinone mugucha muchig kømui indan cha. Kaguende: “Øl-laibe mas mayig køn” chibelø gøn— cha, trenchibig køn Jesúsbe.

Jesúswei kusrenanøb pera uniilø isrin gwaløm tirigu tur lurrøb
(Mt 12.1-8; Mr 2.23-28)

6 ¹Kan isrin gwaløm Jesús tirigu ellmarig utuwan pureb ibene, nui kusrenanøb pera uniiløbe tirigu turmeran lurrøb ambabe, tirigu turwan tasiitøga katsøstra, mabene, ²mø fariseosmera gøsrøn nømune trenchibelø gøn:

—Ya isrin gwaløm chigøben marmønrrai merigwan ðñimbe chindimba øyeeg margue?— cha.

³Inchene Jesús trencha løtabig køn:

—ðÑimgan lemeelø gøtirru cha, tru mana gøsrøn Davidwan parøgwab, nui linchibelan parøgwab inchen, nø mandø indigwan?

⁴Nøbe Tiuswei carpa ya tabzhigu kebya, Tiusweyasiitø tarømarig pirrimera, tru sacerdotessmeratø maim birrimeran mendaibe mu mamønrrai meriilan nø mab, katø nøba purrab misagwangucha srørrøb indigwan.—

⁵Incha gatø trenchibig køn:

—Møg Misra Arrubiibe tru isrin gwaløm nan nø garunrrain gømøtø, maramdiigwane marøb, maramgaigwane marmub, nabe na asha garubig kur— cha.

Kan møg tasig mul-laig
(Mt 12.9-14; Mc 3.1-6)

⁶Indiibe katøgan gwaløm isrin gwalømdøwei Jesúsbe judíosmera tulundzuni yau kebya, kusrenanøb pasrøbene, truyube kan møg nui kusrmay tasig mul-laig tøgag waben, ⁷tru Moisés pørigwan kusrenanøbeløba, fariseosmerababe Jesúsban larab gøbelø gøn, isrin gwaløm tamarøbig køtashchab, chigøben chi køptø. ⁸Inchen nøbe chi isub pønrrailan asha, tru tasig mul-laig tøga mōwane: —Kurra, uyu tøbøtag pasramisr— cha trenchibig køn.

Inchen tru mөөbe нөмуин дөбөtag kurra pasramisрөbig көн.

⁹Inchen Jesúsbe katөгanelan trenchibig көн:

—Na ñimun payrrab inchar cha: ¿Maig maramigwan martrai Moisés пөриibe isrin gwalөmbe chiwan martrain daig көh cha, tabiiteh, kabe kaiteh cha; kwamөnrrai indamig көh, kabe kweetsamig кө, chindah?— cha.

¹⁰Incha Jesúsbe mayeelө nuim бөтөгatan пөnrabelan ashabe, tru мөwan trenchibig көн:

—Kwalwan larrөbichi— cha.

Inchen mөөbe treeg inchen, nui kwalbe tabig көrrөmisрөptinchibig көн. ¹¹Inchen treekkurri kanelөbe truba nama, kangurri gangurri Jesúsban chi kaig maramdiig көtashchab payib mendabelө гөн.

Jesús нөashib karua өramelө doce lawa wesrub

(Mt 10.1-4; Mr 3.13-19)

¹²Tru gwalөmmerawan Jesús kan tun balasрө Tius Mөskaimba waminchab ya, kwalma өрөba treeg marөb wawa, ¹³tөр-rabene, nui kusrenanөb pera uniilan wama, truilai utu doce lawa, wesrawa, truilane нөashib karua өриilө гөн cha, wamabig көн. ¹⁴Truilөbe iilө гөн: Simón, nundөwei katө Pedro cha munchi pasrig көбен, Simónwei nuneg Andrés көбен, Santiago гөбен, Juan гөбен, Felipe гөбен, Bartolomé гөбен, ¹⁵Mateo гөбен, Tomás көбен, Alfeowei nusrkai Santiago гөбен, Simón Zelote cha wamig көбен, ¹⁶Judas Santiagoi nusrkain гөбен, Judas Iscariote, tru wendө Jesúsban ashig көmui inchibelaingatө pasramisra, tranrrrabig көбөgue.

Misag truba nuwan Jesús kusrenanөb

(Mt 4.23-25)

¹⁷Incha Jesús tun balasрөngurri нөмба көrraarrua, kan chagu pasramisрөbig көн. Inchen truyu nui mendig amөñibelөbe truba nu tulundzuna, basrabig көн, Judea birauelө kerrigu, jerusalөnsreelө гөбен, Tiroba, Sidónba tru mar bulusreelө гөбен, ¹⁸truilөbe Jesúsban мөрtrab amrruin гөbig көн, нөmui kwanrrөmeran tamartraimba. Inchen tru kwanrreelө трөmbөig maringarub kwaimandziimera larrө rrөmbөig kuig melөnrrai marinabelөbe tamariilө гөбен, ¹⁹maya

misaabe nun katøranrrab inchibelø gøn, kaguende Jesúswei maramburab marøbig nuinukkurri webarrua, mayeelanba tamaren.

Kasrag købiiba, chigucha tab gømíiba

(Mt 5.1-12)

20 Incha Jesús nui kusrenanøb pera uniilan ashabe trenchibig køn:

—Mayanguen tab gúilø gøn cha, ñim waachamerabe.

Kaguende Tius nø ashib karub waibe ñimuiwein gøn cha.

21 Mayanguen tab gúilø gøn cha, ñim mõi ya parøgwailøbe.

Kaguende maig palai melaigwan Tiusbe nømun unchaguen traniilø gønrrun cha.

Mayanguen tab gúilø gøn cha, ñim mõi ya kishibeløbe.

Kaguende wendøbe indzønrrabguen cha.

22 Mayanguen tab gúilø gøn cha,

ñimun misaamera tsalø ashib,

ñimune nøørø gønrrai tarømarøb,

ñimun tsalø waminab,

ñimui munchiwan ke kaigwan lataig indinab,

tru na, Møg Misra Arrubikkurrindø ñimun treeg marene.

23 Treeg bureb gwalømbe ñimbe truba rruba tab gúi mørøb, truba kasraarab pørtray chibig køn. Kaguende truburø ñimbe srømbalasrømbe truba nuig ketig utamig tøgagønrrun cha.

Kaguende merrabsrø nømui kølli misaamerama Tius maig karuigwan eshkabelan øyeegwei kaig marøbelø gúig køn cha.

24 ¡Ay, ñim waacha, puarmeraimbe!

Kaguende yandø tsabøtø utarguen gøn cha, kasrag købigwan.

25 ¡Ay, ñim waacha, mõi ya chi palømø tøgarme!

Parøgwai mørtrun cha.

¡Ay, ñim waacha, mõi ya indzabeløbe!

Ñimbe wamamøra isub kishchun cha.

26 ¡Ay, ñim waacha, ñimun mayeelø tabig

wamindinabelaimbe!

Kaguende ñimui merrabsrø kølli misaamerama treetøwei tabig waminchibelø gøbig køn cha, tru ‘Tius maig karuigwan eshkabelø guer’ chib isabelan.

Ñimun ashig kòmui inchibelan tsalø ashmumig

(Mt 5.38-48; 7.12)

27⁷Inchendø ñim nan mørøbelane nabe trendamønrrun: Ñimun ashig kòmui inchibelane undaarab, ñimun tsalø gúi inchibelane tabig marøb inday cha. 28⁸Ñimun ‘trømbøig nebubash’ chib wamabelaimbe ñimbe nòmune ‘mayanguen tabig nebunrray’ chib trenday cha. Ñimun kaig marøbelaimbe, nòmuyasig Tiusba wamindamig køn cha. 29⁹Møikkøben ñun kandarø maløbøtø pashene, kandariigwangucha yul cha. Møikkøben ñui turiwan kerrabene, ñui camisangucha ka srua ibasingaru cha. 30¹⁰Ñun mu chi miabigwane tranøb, chiwan gøben ñuiwan kerrabene, miamøta cha. 31¹¹Ñimgurrima gatøganelø ñimuyasig tabig maramig palai inchibeløbe, ñimgucha katøganelan treetøwei tab inday chibig køn.

32¹²Ñim ñimun undaarabelandø undaarawabe, ¿ñimbe chigúin dabig martrague? cha. Kaguende kaig marøbeløguen nòmun undaguelane nømgucha undaarabelø gøn cha. 33¹³Ñim ñimun tab inchibelandøwei tab inchabe, ¿ñimbe chigúin dabig martrague? cha. Kaguende kaig marøbeløgucha treetøweimbe marøbelø gøn cha. 34¹⁴Peba tranøppe, katø utamdeelandø pebøbeløbe, ¿ñimbe chigúin tabig martrague? cha. Kaguende kaig marøbeløgucha katøganelø kaig marøbelandøweimbe, katø kerriguwan treetøwei utønrrab pebøbelø gøn cha. 35¹⁵Trune ñimbe ñimui ashig kòmui inchibelan undaarab, tabig marøb, pebøb indamig køn, katøyug utønrrab isua gømøtø. Treeg marene, ñimui utamibe truba nuig køben, ñimbe Tius Mayeelaim Bala Pasrabigwei ureemera gønrrun chibig køn. Kaguende nøma chiweinguen ungwaguengarwan, larrø kailan, tab inchibig køn cha. 36¹⁶Ñimui Tius Møskaima lastima ashibig købene, ñimgucha treetøwei lastima ashibelø guy cha.

Katøganelane ‘kailø gøn’ chib

(Mt 7.1-5)

37¹⁷Ñimbe katøganelan ‘øyeeg køn, øyeeg marøbelø gøn’ chib waminchimøtay, ñimungucha ‘øyeelø, øyeelø gøn’ chimønrraimbe. Katøganelan kaigyu pønrrønrrai pønstrømøtay, ñimun treetøwei kaigyu pønrrønrrai pønstrømønrraimbe. Ñimun kaig maren, ulø baymø pesannay, ñimungucha Tius ulø baymø pesannailø gønrrappe. 38¹⁸Katøganelan tranay; ñimungucha tranrrun, talegayu

tab unaasig tingandø kørøguana, pinølusam netsøganig. Kaguende ñim kanelan maig unaasha traniibe, ñimungucha treetøwei unaasha tranrrun— chibig køn.

³⁹Incha gatø Jesúsbe ‘øyeeg lataitøwein gøn’ cha, kemesra trenchibig køn:

—¿Kan ashchab gaimabiima katøgan ashchab gaimabigwandøwei srua inrrautah? cha. ¿Pailøba treeløtøbe trabyu kegørrømønrraitarru? chibig køn. ⁴⁰Kan kusreb mendig megabiibe nui kusrenanøbigwan purab nuig kømøn. Inchendø chi kusremigwan ne gusrewabeguende, nun kusrenanøbig lataitøwein gønrrun.

⁴¹¿Chindimbarre ñui nunewan kabyu shauzhig wabigwangøba ashku cha, tru ñuin gabyu nu tsig wabigwanguen ashmubendøbe? ⁴²Inchawei ñitøweinguen ñuin gabyu nu tsigwan ashmubendøbe, ñui nunewane chinch a øyeeg chinrragu: “Nai nuneg, ¿ñuin gabyu shauzhig wabigwan wesrarruah?” cha. iÑi, palatø tabig! Ñuin gabyu nu tsig wabigwanmerrig wesru chibig køn. Treenchabe si, ñui nunewin gabyu shauzhig wabigwan wesrumig tab ashchabguen cha.

Tusrbe mamikkurri asig køn

(Mt 7.17-20; 12.34-35)

⁴³Kan tab tusrbe kaig mamig niimfig køben, katø kan kaig tusrbe tab mamig niimfig køn cha. ⁴⁴Kaguende tusrmørig chi mamig niguen tabig kui, kaig kui truyu asan cha. Kal dusrmerayugurri yashig lurrmøwei, kaldø misrøb tusryugurri uvas lurrmøwei inchibelø gøn cha. ⁴⁵Inchawei kan møg tabiibe tabig isuilan nui manrrau esegabig kua, truyugurrimbe tabig wesrub wamindan. Inchen kan møg kaibe kaig isuilan nui manrrau esegabig kua, truyugurrimbe kaig wesrub wamindan. Inchawei nui manrrau chine isua tøgagüilø pinøguchen, nui triibe treeg wamindan chibig køn.

Pailø ya marøbelan kemesra wamindig

(Mt 7.24-27)

⁴⁶¿Ñimbe nane chindimba: “Señor, Señor” chib wamøgue cha, na maig karuigwane møra marmeelø gøbendøbe? ⁴⁷Mugucha naimay arrua, nan møra, na maig taigwan marøbigwane, øyeeg møg lataig køn damønrrun cha: ⁴⁸Truibe kan møg yawan

martraptø pirøwanmerrig srugu larrayamnegatig umbu lalla, trugurrimbe tru srug bala yawan niga basrønrrabigwan marøbig lataig køn cha. Inchen pibe nurawa, arrua, tru yawan purø rrømbøig neguchib megambuagucha, kønøgønrrab gaiman cha, kaguende purø may mara basrig kua. ⁴⁹Inchen kan møg nan mørendø, na maig karuigwan marmíbe, nui yawan niga basrønrrabig srug busrmøtø, ka pirø balatø kusrubig lataig køn cha. Pi nurawa arrubig, tru yawan mur megambub neguchene, tru yabe kebeñen, kerrigu pinisaig kørrømisran— cha, trenchibig køn.

**Suldau sötøwan nø garub pera basrabigwei mendig
megabigwan Jesús tamarøb**

(Mt 8.5-13; Jn 4.43-54)

7 ¹Yandø misagwan Jesúsbe chab waminchabe, Capernaumsrø kebibene, ²truyu kan romanosmerai suldau, cienelan ashibig, centurion daig, kan karuindiig megabig truba undaaraig tøgagúibe, trube kwanrrøtøga yandø ke pinamdø balabig tsubig køn. ³Inchen tru cien suldaumeran ashibiibe, Jesúswan wamindi mørabe, judío misaameran karubelø kølli misaameran karua ørøbig køn, nui kwanrriigwan tamartrab attrai. ⁴Inchen nømbe amba, Jesúsweim bulu kemallabe, ke tiusmanda chib truba inchib trenchibelø gøn:

—Tru mōwane ñi treeg ka purugumdiig treeg møg køn cha.

⁵Kaguende yu nam warain birau maya misagwan undaguig kua, nøashib nam judíosmera tulundzuni yawan maringaruig køn— chib.

⁶Inchen Jesúsbe nømbe iben, yandø yau pub lutau ambene, tru suldaumeran ashibiibe nui trendø linchibelan mõilan gøsrøn trenchinrrai karua ørøbig køn:

—Señor, øyangatiizhiitø attra tan chinrrai. Kaguende ñi nai yau kebattraimbe, nabe trengatig kōmuinatan cha. ⁷Incha treekkurri ni naashibguen ñun lanrrab arrumur cha. Tammisr cha, treetø chirra chibig køn. Nai karuindiig megabig tammisrig kønrrai.

⁸Kaguende nagucha mas nørreelø karua pasrig kur cha. Katø treeg køben na karub tøgagúilø suldaumera tōgaig kur cha. Truilanma na mõigwan gøben: “Inrrø” chibene, ib; katø na mõigwan gøben: “Amø” chibene, arrub; katø nai karuindiig megabigwan: “Chigøben mar” chibene, marøb inchibig køn cha. Nøbe trendan— chibelø gøn.

⁹Inchen Jesús iigwan mōrabe, tru mōwan nōguen kwaara asha, nui mendig truba nu misag amōñibelan keesha ashabe, trenchibig kōn:

—Nabe ñimun trendamōnrrun cha: israelitasmerai utuguen isubigwan nainug pasrig øya nuig wetørramur cha, i mōwei lataig.—

¹⁰Indiibe tru karua øriilø katøle yau pubene, tru karuindiig megabiibe tabikken waptinchibig kōn.

Jesús kan piudai nusrkawan katø øsiirangarub

¹¹Yandø øyeeg chab puraiben, Jesúsbe kan pueblo Naín daisrōmay iben, nui kusrenanøb pera uniiløba, truba nu misaaba linchibelø gōn. ¹²Inchen tru puebloyu kebambam yaskab pulu pubene, kan kwaigwan sōrōnrrab muta, amrrubelø gōn, tru kwabiibe kandø nusrkain gōben, usrimbe piuda. ¹³Inchen Señorbe tru ishuwan lastima ashabe, trenchibig kōn:

—Kishmōta— cha.

¹⁴Incha Jesúsbe kemalla, taulwan katøraben, muta ambubeløbe pōnrramisren, Jesúsbe kwaigwane trenchiptinchibig kōn:

—Matsinø, na ñun ikurrø! char— cha.

¹⁵Inchen tru kwabiibe kurra, wamisra, waminchib mendøben, Jesúsbe usran tranøbig kōn, pera inrrai.

¹⁶Inchen iigwan ashene, nōmune mayeelanba kōrig kōbiitø ke chindamdiig kōben, Tiuswan truba tabig waminchib trenchibelø gōn:

—iTius maig karuigwan eshkabig purø nuig namui utu kurrin gōn! chib. iTiusbe nui misagwan purugunrrab arrin gōn!— chib.

¹⁷Inchen Judea birau kerriguba, katø tru birau tru bōtøgatanwan kerriguba Jesús chi marigwan wammørøbelø gōn.

Juan Bautistai kusrenanøb pera uniilø

(Mt 11.2-19)

¹⁸Inchen Juanwei kusrenanøb pera uniiløbe øyeeg purayailan kerrigu nun eshkaben, Juanbe nui mendig amōñibelan pailan wama, ¹⁹Jesúsban trencha payrrai ørøbig kōn: ¿Tru Cristo attrabig kōbiibe ñi gúin gúi, kabe nambe katøganun muniiram gúin gúi?

²⁰Inchen tru Juanwei kusrenanøb pera uniiløbe amrrua, Jesúsban kemallabe, trenchibelø gōn:

—Juan Bautistabe, ñun payrrai, namun karua ørtan cha. ¿Tru attrabig købiibe ñi gúin gúi, kabe nambe katøganun muniiramig kuin chindi?—

²¹Inchen tru uras, Jesúsbe kwanrreelø truba yamelan tamarøbig køn, chigurrimbunø kaig kwanrrø tøgarmeran gøben, kwaimandzig tøgarmeran gøbengue. Katø truba yam kabgailan ashchai tamarøb inchibig køn. ²²Inchabe Jesúsbe Juan karua øriilan trenchibig køn:

—Amba, ñim chi mørigwan, ñim chi asigwan Juanwan eshkanrrigay cha. Kabgailøbe ashen, cojosmerabe amben, asr trerab gwanrrø tøgarmerane nømui kwanrrøwan tamara chishmariilø gøben, kalu mørmeeløbe mørøbelø misren, kwailøbe øsiraben, waachamerane Tiuswei tabig srø wamwan eshka kusrenaniilø gøn cha. ²³Mayanguen tab gúig køn chibig køn, nan peg kuitamab isumøtø, na gúitamab isubigweimbe.—

Juan Bautistaimburab maig kuigwan Jesús waminchib

²⁴Incha Juanwei kusrenanøb pera uniilø ambene, Jesúsbe Juanweimburab truba nu misagwan trenchib waminchib pølbasrøbig køn:

—¿Misag warab waraimøsrømbe ñimbe chi ashchab webamgue? cha. ¿Kan caña ambumay, imay isig srua yainaptiigwandeh? cha. ²⁵Trube, ¿chi ashchab webamgue? cha. ¿Kabe kan møg truba tabig keweigwandeh? cha. Ñimbe ashibelø gøn cha, truba tabig kebeløbe nømun maig marøg købendø marøb, reymerai yau purrabelø gúi cha. ²⁶¿Trube, treeg købene, chi ashchab webambig kø? chibig køn. ¿Kabe Tius maig karuigwan kan eshka bigwandeh? cha. Øø, nabe ñimun trendamønrrun cha: Treegwanwei ashchab webambig køn cha, trurrigu Tius maig karuigwan eshka bigwan lataitøguen gømø, mas nuigwan. ²⁷Juanbe tru Tiuswei wamwan pørigu øyah taig truig køn cha:

“Au, nabe nai wam srua inrrabigwan ñui merrab ørar taig, ñui maywan ñui merrab tamartrai.”

²⁸Nabe ñimun trendamønrrun chibig køn: Maya møguelø kal-labelai utu tru Juan lata nuibe muguen kaagúig køn cha. Inchendø treeg kuindøgucha, Tius nø ashib karub wainuube kan møg chigucha gømíikken mas nuig køn cha, Juan lataguen gømø.—

²⁹Inchen maya misaameraba, tru romasreelayasig an utabeløba Jesús wamindigwan mørabe, Tiusbe maig kōnrrabigwan tabig sōlgandø marøbig kuin gōn chibelø gōn, tru Juan piu umbu ulsrainabeløbe. ³⁰Trune tru fariseosmeraba, tru maig maramigwan martrai Moisés pørigwan treeg maramig kōn chib kusrenanøbeløbabe nōmuimbura Tius maig martrab isua indigwan kaashibelø gōn, kaguende truiløbe Juan piu umbu ulsraimeelø gua.

³¹Katø Señorbe trenchibig kōn:

—¿Mōin gwalōm mōguelane chi latailø gōn chinrrab gōh? cha. ¿Chi lataig asōnan chinrrab gōh? cha. ³²Kan plazayu ureemera esherrab purramisra, kangurrin gangurri øyeeg chib trashib purrabelø latailø gōn cha:

“Nambe ñimuyasig luswan urringucha,
ñimbe pailamøwei;
cantailø isumdeelø cantaben,

ñimbe miirab kishmøwei indan” chibelø latailø.

³³Pøs Juan Bautista pirri mamøwei, vino muchimøwei inchibig arrubene, ñimbe nune, kwaimandzig tōgaig kōn, chibelø gōn.

³⁴Inchen tru Møg Misra Arrubig mab, muchib inchibig arrubene, trube, ñimbe menrra maptiig kōn damba, menrra muchiptiig kōn damba, romasreelayasig an utabeløba, kaig marøb misaameraba linchibig kōn damba inchibelø gōn. ³⁵Inchendø mu mōkken nebua isumgaig tru Tius marøb pasraigwane nui ureemerainug ashchai kenamaran— chibig kōn.

Jesús Simón fariseowei yau

³⁶Kan mōikkørørōn fariseo Jesúswan nōba lincha manrrab attrai eshkaben, Jesúsbe truigwei yau kebyabe, mishatsigu wamisrøbig kōn. ³⁷Inchen tru puebloyutøwei kan kaig marøb ishug tsubig, tru fariseowei yau Jesús mab wan dai wammørøppe, kan alabastro limetayu truba may irrab aceite srua puabe, ³⁸kishib Jesúswei wendau srøb pulu wamisra, nui kappinwan Jesúswei katsig tambal bala kōrrøgøb sōmara, trugurrimbe nui pusruutōga pinømōra, katsigu muchawa, yandø tru may irrab aceiten nui srøb pala itølushibig kōn. ³⁹Inchen tru fariseo Jesúswan manrrab attrai eshkabig ashabe, nuinetø treeg isubig kōn: “I møg Tius maig karuigwan eshkabig kuimbe, nun katørabiibe mu ishug kui, kaig

marøb ishug kui asin gømbala” cha. ⁴⁰Inchen Jesúsbe fariseowan trenchibig køn:

—Simón, ñun chigøsrøn tamig tøga war— cha.

Inchen fariseobe:

—Kusrennøbig, eshkarra— chiben,

⁴¹Jesúsbe trenchibig køn:

—Kan an bebigwan pailø møguelø nun ulømisrar købig køn cha, kane quinientos denaríos ulø gøbene, kane cincuenta ulø gøbig køn cha. ⁴²Indiibe truiløbe chugurringuen trannrrabgailø gøben, tru an bebøbiibe pailanba paymønrrab kagøbashiptindig køn cha. Treeg købene, ¿i pailøbe tru an bebøbigwan møig mas undaarerah?— cha.

⁴³Inchen Simónbe trenchibig køn:

—Tru mas nu anwan ulø baymø, kagøbasinabig, na møren truig kømmørgøtan— cha.

Inchen Jesúsbe trenchibig køn:

—Søl isua rrendan— cha.

⁴⁴Inchen Jesúsbe ishuan keesha ashabe, Simónwane trenchibig køn:

—¿I ishuan ashkuh? cha. Nabe ñui yau kebarruben, nai katsigwan kwalamig ñibe nan pi rranmuben, trune i ishuube nui kappinwan kørøga sòmara, nui pusruutøga pinømortan cha. ⁴⁵Ñibe nan muchamuben, trune nøbe na kebarrinukkurri nai srømmeran muchab wan cha. ⁴⁶Ñibe nai tur bala aceite srølmuben, nøbe may irrab aceiten nai srøb pala itø lushtan cha. ⁴⁷Inchawei ñun trendamønrrun chibig køn: I ishukei truba nørø kalø mariilan nun ulø baymø pesannaikkurri nøbe truba rruba undaaran cha. Inchen møikkøben tre nu gømfigwan ulø baymø pesannainabiibe, tru ulø baymø kagøbashiwigwane tre undaaramøn— cha.

⁴⁸Inchabe tru ishuwane trenchibig køn:

—Ñui kaig mariiløbe payamig kømfig, pesannaig kørømisran— cha.

⁴⁹Inchen truyu lincha mab nøba purrabeløbe, nòmasiyaitø trenchib mendabelø gøn:

—¿Chigøben kaig mariilanguen ulø baymø pesannamig kønrrai marøbiibe, iibe mu møg køh?— cha.

⁵⁰Inchen Jesúsbe ishuan trenchibig køn:

—Ñi ñui isubigwan nainuutø pasra tøgagúikkurri, kaigyugurri wesraig kørørmisran cha, mømbe chi isumø, innrø— cha.

Ishumburmera Jesúswan mendig amøñibelø

8 ¹Yandø iig chab puraiben, Jesúsbe tru tabig srø wam Tius nø ashib karub wainuguigwan eshkab kusrenanøb pueblomerasrø yamera tsitsø bønrrabsrø uñibig køn, nui doce kusrenanøb pera uniiløba. ²Inchen gatø mø ishumburmera gøsrøn nø kwaimandziimeran webusriiløba, kwanrrømeran tamariiløba linchibelø gøn. Inchen trulai utube tru siete kwaimandziimera webambinabig, María Magdalena gøben, ³Herodeswei yau ya ashib tsubig Cuzai srai Joana gøben, Susana gøben, katøgan ishumburmera gøben linchibelø gøn. Iiløbe nømui chi tøgagúiløtøga Jesúswanba, nui kusrenanøb pera uniilanba purugubelø gøbig køn.

Kan kwallibig mandø kwaligwan kemesra kusrenanøb

(Mt 13.1-9; Mc 4.1-9)

⁴Misag truba nørø tulundzuna, chu puebloyuelø gøben, Jesúswan itømaytø ashchab webamben, nøbe ‘øyeeg lataitøwein gøn’ cha, kemesra waminchib trenchibig køn:

⁵—Kan kwallibiibe nui yellwan tsurøb kwallchab webyan cha. Incha tsurøb ibene, kanbalø yellbe mayu gørrøben, itøbunøben, illimera amrrua, man cha. ⁶Inchen katøganbaløbe srug rrølyu gørra, kal-lappe, kal-labendø, pirø søig kømøwagurri mul-lan cha. ⁷Kan utu yellmerabe kalshau utu gørra, kal-laben, kalbe kanbalatø nørørawa, chab tsibisan cha. ⁸Inchen kanbaløbe yell tab pirau gørra, nørørawa, tabig misra, kan yellgurrindø trulzheelø ciengatig nigan— cha.

Iigwan trenchabe, Jesúsbe truba mur waminchib trenchibig køn: —iMøramig kalu bønsraibe, mør!— cha.

Mandøgurri ‘iibe øyeelø latailø gøn’ cha Jesús wamindig

(Mt 13.10-17; Mr 4.10-12)

⁹Inchen nui kusrenanøb pera uniiløbe:

—¿Tru ‘øyeeg lataitøwein gøn’ cha wamindiibe tappe, mandø gøh?— cha payen,

¹⁰Jesúsbe trenchibig køn:

—Tiusbe nò ashib karub wainug mu asiimfig tøgagúilan ñimun ashchai tranan cha. Trune katøganelane ‘øyeeg lataitøwein gøn’ chib wamindiiløtøga eshkab waminchar cha,

“nømbe ashippe ashendø,
ashmøwa lataig kørørmisrøb;
mørøppe mørenðø,
chigúi mormøwa kørørmisrøb inchain” cha.

‘Tibe kan ellmarøbig lataitøwein gøn’ cha wamincha pasrigwan

Jesús tab eshkab

(Mt 13.18-23; Mr 4.13-20)

11 ‘Tru ‘øyeeg lataitøwein gøn’ cha, kemesra wamindiibe øyeeg chibig køn cha: Tru yellbe Tiuswei wamwan eshkabig køben, 12 tru may bulu gørrab yellmerabe, tru Tiuswei wamwan mørøbelan truilan eshkabig køn cha. Inchen nugwaimandziibe arruppa, nømui manrrau tru wam ellmarigwan kerran cha, nøm Tiuswan køreben, kaigyugurri wesrailø gømønrrai. 13 Inchen srug rrølyu gørrab yellbe tru Tiuswei wamwan møra, truba rruba tab gúi mørøb utabelan, truilan eshkabig køn cha. Inchendø truiløbe chi srølga gua, maya yanagatiitø kørewa amøña, chigøben maig inchibelø gøtashchab pubene, tarømisrøptinchibelø, truilø gøn cha. 14 Inchen tru kal shau utu gørrab yellbe tru wamindigwan mørøbelan eshkabig køn cha. Inchendø truiløbe nømui ambam maywan ambub gøben, tru chine, chine menrra isubiibah, puamisrøg købiibah, chigurrimbunø marøb kasrag amøñinrrab treeg marøg købiibatø kasran cha. Incha tru ellmarigwane nørørabashmøn cha. 15 Inchen tru tab pirau gørrabiibe tru nømui manrrau purø tabig isub, trurrigu sölwan isub, Tiuswei wamwan møra, truigwan elachimø, tøgagua, melabig meløwa, ellmarig misrøbelan eshkabig køn cha.

‘Aceite lámpara lataitøwein gøn’ cha, kemesra wamindig

(Mr 4.21-25)

16 ‘Mugucha kan aceite lámparan piløgøppe, chitøgagøben kasrømøwei, kabe cama umbu basrtrab gømøweim biløgøbelø gøn cha. Treeg kømøtø, kerrubelan tør gønrrai, pala basrøbelø gøn cha. 17 Inchawei chitøgucha søriibe søriitø kørørmismø, kenamistrun

cha. Katø chigøben ashmønrrai kasra basriibe, nebua asiimíig kòrrøismrøtø, tøryu webattrun cha.

18'Inchawei ñim mørigwane tab isua asha guy cha. Kaguen tøgagwane masken rranen, trune chigaigwane nui lamøtiig tøgagurmab isuigwanguen kerraig kønrrun— chibig køn, Jesúsbe.

Jesúswei usrimba, nuneløba nun lab

(Mt 12.46-50; Mr 3.31-35)

19Inchen Jesúswei usrimba, nuneløba nø wainug pubendø, menrra nu misag basrøwa, nuim bulugatig kemallchab gaima gøben, 20møikkøsrøn Jesúswan trencha eshkabig køn:

—Ñui usrimba, ñui nuneløba wambig pønrran cha, ñun ashchab isua amrrua.—

21Inchene Jesúsbe lètappe trenchibig køn:

—Tiuswei wamwan møra, trunun marøbeløbe, nai usri, nai nunelø gøn— cha.

Isig ichibigwanba, pi welarmeranba Jesús kønøbashmub

(Mt 8.23-27; Mc 4.35-41)

22Kan gwaløm Jesús nui kusrenanøb pera uniiløba barcoyu kebyabe, trenchibig køn:

—Pisu ambøgatøsrømay larraamun— cha.

Inchabe ambubelø gøn. 23Incha larraambub ambub gøbene, Jesúsbe barcoyu kiptinchen, møyimbe tru nu bisuyube isig ichibig purø rrømbøig namab webarruben, pibe barcoyu michab mendøben, yandø ke asentanrraptiig inchibig køn. 24Inchen Jesúswan kasrønanabe trenchibelø gøn:

—iKusrennøbig! iKusrennøbig! iNambe piu ke chab asentab meler!— cha.

Inchen Jesúsbe kurra, isig ichibigwanba, pi welar trømbøig latøgushib gurrabelanba pasrambunrrai kandø wamabig køn. Inchen truiløbe pønrrambuben, yandø kerrigu wasrønzhig kòrrømisrøbig køn. 25Inchen Jesúsbe nui kusrenanøb pera uniilan trenchibig køn:

—¿Ñimui isubigwan nainuutø pasra tøgagúigwane chinchigüe?— cha.

Inchen nøyimbe truba kwaariilø, kan øyeebe mandø guermab isub kangurrin gangurri trenchibelø gøn:



San Lucas 8.23

—ǎlibe mu guerah cha, isig ichibig lata, pi latøgushib gurrabig lata, nø pasrambungarubene, iiløguen nun mørtrappe?—

Kan gadarasriig kwaimandzig tøgäig

(Mt 8.28-34; Mr 5.1-20)

²⁶Incha yandø gadarenosmeraim birausrø larraambubelø gøn, tru Galilea nu bisu ambøgatømayrø. ²⁷Incha Jesús barcoyugurri pirau pinaiben latatø, tru puebloyuig kan møg kwaimandziimera tøgäig katønrrab webibig køn, truike manasrøngurri chigucha kemøwei, yau tsumøwei inchibig, sörin rrabmerayutø tsubig. ²⁸Incha Jesús swan ashippe, nui merrab mur trashib tømbarøb peñabe, trenchibig køn:

—ǎñibe nane chi martrab inchigu cha, Jesús, Mayeelaim Bala Pasrabigwei Nusrkai? iñi nan purø rrømbøig möra megamig kømønrrai marmørrunrig!— chib.

²⁹Kaguende Jesús be tru trømbøig maringarub kwaimandzigwane: “Møweinukkurri webinrrø” chibguen indin

gøben nøbe trendaig køn, kaguende truigwane kwaimandziibe katø gatø nø merrarrowa sruaig købig kua. Inchen chu imønrrai, misaamerabe tasiimeran srøbmeran cadenastøga lusra tøgagúingucha, nøbe cadenasmeran lurren, kwaimandziibe mu misag warab waraimøsrø ingarubig køn. ³⁰Inchen nune Jesúsbe payibig køn:

—¿Chi munchi gugu?— cha.

Inchen nøbe løtappe:

—Nabe: “Legión”, munchi gur— chibig køn, kaguende tru møweinuube kwaimandziimera purø nu guebamba gua. ³¹Incha tru kwaimandziimerabe ‘tru purø rrømbø umbu rrabyumay ørmørrunrrig’ chib truba rrugabelø gøn, Jesúswane. ³²Inchen tru tunyube kuchimera truba nu sètø mab llirab amøñiben, tru kwaimandziimerabe ‘tru kuchimerayu kebamingarurra’ chiben, Jesúsbe ka kebambashibig køn. ³³Inchen kwaimandziimerabe møweinukkurri webamba, kuchimerayu kebambene, tru kuchi sètøbe truba rrømbø lendeyu lula, chab pinøgørraptincha, pisuyu kegørra, pi guesra chab gwabelø gøn.

³⁴Inchen tru kuchi ashibelø treeg purayaigwan ashabe, kwaariilø lula, puebloyu gøben, wambig nørørowansrøn gøben eshkaab ambubelø gøn. ³⁵Inchen misaamerabe chi purayaigwan ashchab werrua, Jesús waisrø pubene, tru kwaimandzig tøga møg købiibe Jesúswei srøb pulu, yandø asru keweig ke yandø tabig wai ashibelø gøn. Inchabe truba kørig kui inchibelø gøn. ³⁶Inchen tru treeg purayaigwan ashibeløbe tru kwaimandzig tøga møwan Jesús mandø incha tamarigwan gatøganelan eshkaben, ³⁷tru Gadara birau maya misaamerabe Jesúswan nømuinukkurri ‘irra’ chib truba rrugabelø gøn, kaguende nømbe truba rruba kørig kuilø gua. Inchen Jesúsbe barcoyu kebya ibig køn. ³⁸Inchen tru kwaimandziimera webambinab møøbe:

—¿Ñui mendig arruah?— chib truba inchen,

Jesúsbe trenchibig køn:

³⁹—Ñui yamay katø inrrø cha, ñun Tius chigøben yeeg nørriig mariilan kerriguh eshkanrrab.—

Inchen tru møøbe, Jesús nun øyeeg nørreelø marigwan kerrigu eshkaab ibig køn tru pueblo ørøba.

Kan ishuwei kwanrrøwan Jesús tamarøb

(Mt 9.18-26; Mr 5.21-43)

⁴⁰Incha gatø Jesús pisu ambøgatøsrømay larraibene, mayeeløba munig kuig køppe, misaabe nune truba kasrag utabelø gøn.

⁴¹Inchen kan møg judíosmera tulundzuni yau chi maramigwan ashibig, Jairo taig, puabe, Jesúswei katsig bulu tømboñsra, nui yamay tiusmanda arrubsrømu chibig køn, ⁴²kaguende nui kandø nimbasr doce añosig tøgagúibe ke kwanrrab inchib tsuben.

Inchen Jesús ibene, nu misag sötøbe nui mendig trag marøb ambubelø gøn. ⁴³Inchen tru ututø kan ishug doce años ørøba ani ib gwanrrø tøgag kua, nui chi tøgagúigwan kerrigu patsøgøben, mugucha tamartrab gaimaig købig køn. ⁴⁴Tru ishuube Jesúswan wendaugurri kemallippa, Jesús nø kewagúig urøzhigwandø katørabene, tru urastø tru ani ibiibe pasramisrøptinchibig køn.

⁴⁵Inchen Jesúsbe trenchibig køn:

—¿Nane mu gatørah?— cha.

Inchen mayeeløba: “Ñune mu katøramer” chiben, Pedrobe trenchibig køn:

—Kusrennøbig, misag sötøbe ñun yeeg tinmarøb ambumay imay trawagutsan— cha.

⁴⁶Inchen Jesúsbe trenchibig køn:

—Møikkøben nan katørainrrun cha. Kaguende nai maramburab marig nainukkurri webrain gúi mørar— cha.

⁴⁷Inchen ishuube nø treeg marigwan chi sòramgaig kuin gúi ashabe, itønab arrua, Jesúswei merrab tømboñsrøb srala, maya misagwei merrab chindimba katøraigwanba, katø tru urastø mandø tabig kørørmisrigwanba eshkabene, ⁴⁸Jesúsbe trenchibig køn:

—Nimbasr, ñui isubigwan nainuutø pasra tøgagúikkurri tamarig kørørmisran cha. Chi isumø, inrrø— cha.

Jairoi nimbasrwan Jesús øsiiranøb

⁴⁹Inchen Jesús waminchib pasramnetø, tru judíosmera tulundzuni yau ashib karubigwei yaugurri møikkøsrøn puabe, unai møskawane trenchibig gøn:

—Ñui nimbasrbe kwabguen indan cha. Kusrennøbigwan mas chi chimøta— cha.

⁵⁰Inchen Jesúsbe mørabe trenchibig køn:

—Kørig kui inchimøtø, køreptø køreu cha, ñui nimbarsbe tammistrun— cha.

⁵¹Incha yau puabe, Jesúsbe mungucha kerrubashmøtø Pedronbah, Jacobonbah, Juanwanbah unai mōskalanbatø kerrubashibig køn. ⁵²Inchen mayeeløba unan isub waminchib truba kishib gøben, Jesúsbe trenchibig køn:

—Kishmøtay cha, unøbe kwaig kømøtø, ka kiptø tsun— cha.

⁵³Inchen nømbe kwain tsui asha gua, Jesúswane ka indzatø mørøbelø gøn. ⁵⁴Inchen unan Jesúsbe tasigu kemøra, mur wamab trenchibig køn:

—Ishug-unø, ikurrø!— cha.

⁵⁵Inchen espíritube katø nuinug puben, øsiirawa tru urastø kurraptinchen, Jesúsbe manrrai manningarubig køn. ⁵⁶Inchen mōskaløbe ke kwaara asha gørrømisren, Jesúsbe chi purayaigwan nømune mungucha eshkamønrrain garubig køn.

Jesús nui doce kusrenanøb pera uniilan karua ørøb

(Mt 10.5-15; Mc 6.7-13)

9 ¹Jesús nui doce kusrenanøb pera uniilan wama, tulundzunabe, mayan gwaimandziimeran wambig webusrøb, kwanrrømeran tamarøb inchai, maramburab maramigwanba, mu chindamgaig karumigwanba tranøbíg køn. ²Incha Tius nø ashib karub wainuguigwan eshkab kusrenanrraimba, kwanrreelan tamartraimba karua ørabe, ³nømune trenchibig køn:

—Mayuweimbe chigøben srúa ammønrrigay cha. Pøtønain tsig srúa ammøwei, wasr ila ammøwei, pirri srúa ammøwei, an srúa ammøwei, turingucha pagatø gømø, kandø guewa ambay cha. ⁴Chugøben puebloyu yau puppe, webamba ambamnegatig truyutø kørrømisrtrigay cha. ⁵Inchen ñimun wamab utag kømui indinuube, trube, tru puebloyugurri webamrrappe, ñimui srøbyu usrøwan chishtø gørrøgønrrigay cha. Treeg marøppe, trube ‘ñim kaasig købene, mømbe ñim gusrenrrigay’ chib eshkab.—

⁶Inchen nømbe wembamba, pueblomørig puraambub ambuppe, Tiuswei tabig srø wamwan eshkab kusrenanøb, chutøgucha kwanrreelan tamarøb ambubelø gøn.

Jesúsuan Herodes mu gúinguen mormub

(Mt 14.1-12; Mc 6.14-29)

⁷Inchen Galilea birau ashíb karub wabíg Herodesbe Jesúsweimburab wamindi mórøb nò chi mariilan kerrigu wammørabe, chi isum gúinguen mormíig kòn, kaguen mòiлогòsròn: “Juan Bautista kwailai utugurri katò kurriinrrun” chiben. ⁸Inchen kan utueløbe: “Tius maig karuigwan eshkabíg Elías kenamisrin gòn” chiben, kan utueløbe: “Tius maig karuigwan eshkabíg merrabsriig mòiikkøben katò øsiirain gòn” chiben, inchibelø gòn. ⁹Inchen Herodesbe trenchibíg kòn:

—Juanwane natøwei turwan paringaruíg kòn cha. ¿Trube, chigøben na yeeg wamindíg wammøriiløbe mu gønrrab gøh?— cha. Incha Herodesbe Jesúsuan ashíg kui inchibíg kòn.

Trattrø mil møguelan Jesús mamíg tranøb

(Mt 14.13-21; Mr 6.30-44; Jn 6.1-14)

¹⁰Jesús nøashíb karua øriilø katò amrruabe, nøm chi marigwan nun eshkaben, nømune Jesúsbe Betsaida pueblosrømay nømundø nørøø pera ibíg kòn. ¹¹Inchendø tru nu misag sètøbe wammørøppe, wendautø amben, Jesúsbe tabíg wamab uta, nømun Tius nø ashíb karub wainuguigwan waminchib, kwanrrøwan tamaramíg palai melabelane tamarøb inchibíg kòn.

¹²Inchen yandø mawab misrøb arruben, nui doce kusrenanøb pera uniiløbe Jesúsuan kemallabe, trenchibelø gòn:

—Misaameran yandø amrrai, ungwa chi cha, puluwandø yamera pønrrabsrøn gøben, chugøben nørørsrøn gøben, ya beba kørørmisrtrappa, mamíg benønrrappa amrrain cha. Kaguende yube nambe mugucha warømønug bønrrer— cha.

¹³Inchene Jesúsbe trenchiptinchibíg kòn:

—Manrrai ñim mannay— cha.

Inchen nømbe trenchibelø gòn:

—Nambe trattrøgatø pirrimbah pagatø peskaubatø tøgaguer cha. Ya nu misagweimbe srøíg penønrrab ambatøwein gønrrun— cha.

¹⁴Kaguende møgueløtø trattrø milburab gøbig kòn. Inchen Jesúsbe nui doce kusrenanøb pera uniilan trenchibíg kòn:

—Kan sètø, cincuentabatø, cincuentabatø purramisringaruy— cha.

¹⁵Inchen treeg maren, misaabe mayeeløba chab purramisrøbelø gøn. ¹⁶Inchen Jesúsbe tru trattrogatø pirriwanba, pagatø peskaumeranba nui tasku muta, srømbalaneb neesha, Tiuswan ‘mayanguen pay’ cha, pirrimera pirishabe, nui kusrenanøb pera uniilan misagwan pirishinrrai tranøbig køn. ¹⁷Inchen mayeeløba øska ma gørrømisren, pitis undailan tasinmerayu netsøbatø doce tulishibelø gøn.

Pedrobe Jesúsban: “Cristo gøn” chib

(Mt 16.13-19; Mc 8.27-29)

¹⁸Kan gwaløm Jesús nørørørø Tius Møskaimba waminchib wabene, nui kusrenanøb pera uniiløbe nøba purrøben, Jesúsbe trencha payibig køn:

—¿Misaamerabe nane mu gøn dah?— cha.

¹⁹Inchen nømbe trencha løtabelø gøn:

—Møiløbe: “Juan Bautista gøn” chiben, møiløbe: “Elías køn” chiben, møiløbe: “Tius maig karuigwan kan eshkabig merrabsriig katø øsiirainrrun” chiben indan— cha.

²⁰Inchen Jesúsbe trencha payibig køn:

—¿Trune ñimbe nane mu gøn chinrrague?— cha.

Inchene Pedrobe trencha løtabig køn:

—Ñibe Tiuswei tru Cristo gøn— cha.

Jesús nø kwamigwan eshka

(Mt 16.20-28; Mc 8.30-9.1)

²¹Inchen Jesúsbe iigwane mungøben eshkamønrrain garubig køn. ²²Inchabe trenchibig køn:

—Møg Misra Arrubiibe chinetø kaig indinab megamig nebunrrun cha. Katø misagwan karubelø kølli misaamera gøben, sacerdotemeran karubelø gøben, Moisés pørigwan kusrenanøbelø gøben nune kaasig kømig kønrrab gøn cha. Incha kweechen, pøn gwalømyube kusraig kønrrun— chibig køn.

²³Incha mayeelan trenchibig køn:

—Møikkøben nai mendig uñig købene, nøasiitø nuimburabigwangøba isumøtø, kwalømmørig nui kuruswan muta, nai mendig arrum nebunrrun cha. ²⁴Inchen møikkøben øsig kømigwangøba esegabiibe yandø pinab pinamig nebunrrun cha. Inchen nagurrindø kwabiibe managatig øsig kømigwan

esegawa tɔgagɔnrrun cha. ²⁵¿Kan mɔg yu pirau chine kɔbigwan kerrigu nuindɔ maringucha, nɔasiitɔ minchib, nɔasiitɔ pinamigwei marɔb indiibe, chiwein gúi tabig kɔnrrab gɔ? ²⁶Pɔs mɔikkɔben naimburappa, na wamindiilaimburappa kɔrig isub kɔrig kui inchibigwane, nune kɔrig burɔrtrun chibig kɔn, tru Mɔg Misra Arrubig tru nui tɔrguegwalmabiiba, nui Mɔskawei tɔrguegwalmabiiba, Tiusweindɔ tarɔmari ángelesmerai tɔr bilabiiba arrua. ²⁷Nabe ñimun cierton trendamɔnrrun chibig kɔn: Mɔilɔgɔben yu purrabelɔ Tius nɔ ashib karub pasraigwan ashmɔwatɔbe kwanrraamɔn— cha.

Jesús ke peemayig misrɔb

(Mt 17.1-8; Mc 9.2-8)

²⁸Øyeeg taig trune wendau gɔsrɔn Jesúsbe Pedronba, Juanwanba, Santiagonba pera, kan tun balasrɔ Tius Mɔskaimba waminchab nebibig kɔn. ²⁹Inchen Jesúsbe Tiusba waminchib pasramnetɔ, nui malɔbe ke peg lataig misrɔptinchen, nui kewagúilɔbe truba pulɔzhig tɔrgwalmabelɔ misrɔbig kɔn. ³⁰Inchen mɔimbe pailɔ mɔguelɔ nɔba waminchib kenamisrɔptinchibelɔ gɔn. Truilɔbe Moisésba, Elíasba, ³¹nɔmbe tɔrguegwalmabig pinɔgasrailɔ, Jesús Jerusalénsrɔ mandɔ kaig indinab megawa, kwamigwan waminchib pɔnrrabelɔ gɔn. ³²Inchen Pedroba, nui linchibelɔba kigɔbiitɔ ke chindamdɔ gúim burrɔwagucha, kimɔ kasrig ka burrɔwa, Jesúswei tɔrguegwalmabigwanba, tru pagatɔ mɔguelɔ nɔba pɔnrrabelanba ashibelɔ gɔn. ³³Inchen tru mɔguelɔ yandɔ Jesúsweim bulugurri tarɔmisra ambene, Pedrobe nɔtɔwei chi chib pasrarmabguen mɔrmubendɔ, trenchibig kɔn:

—Kusrennɔbig, inam yu pɔnrramibe purɔ tab gɔtan! cha. Pɔngatɔ ya-ureg margun cha, kan ñui, kan Moiséswei, kan Elíaswei.—

³⁴Inchen tru waminchib pasramnetɔ kan wañi arrua, nɔmun kasrɔben, nɔmbe wañi umbu kɔrrɔmisra, Pedroba, Juanba, Santiagobabe truba rruba kɔrig kui inchibelɔ gɔn. ³⁵Inchen wañi umbugurrimbe kan wam trenchibig kɔn:

—Iibe nai Nusrkai, nai lawa wesruig kɔn cha. Nune mɔray— cha.

³⁶Tru wambe yandɔ mas mɔrɔ waminchimuptinchen, Jesúsbe gatɔ nɔtɔ basrai ashibelɔ gɔn. Incha nɔmbe tru chi asigwane tru gwalɔmmerawane mungucha maizhikken mɔrɔ waminchimeelɔ gɔn.

Jesús kan kwaimandzig tōga unan tamarōb

(Mt 17.14-21; Mr 9.14-29)

³⁷Katō gwalōm tunbalasrōngurri kōrrōrrubene, Jesúswan katōnrrab truba nu misag werruben, ³⁸mōimbe kan mōg tru misaamerai utugurri truba mur wamab trenchibig kōn:

—Au, Kusrennōbig, kabe tiusmanda nai nusrkawan ashibsrumuguh cha, nai kandō nusrkain gōn cha. ³⁹Nune kwaimandziibe merrarraben, nōbe mōi mōin rrashibig kōn cha. Inchen kwaimandziibe pirausrō kucha, itōnangarub, triimay chall gutsingarub, purō rrōmbōig lastimaig marōb, igatō! elachimōsraatō inchibig kōn cha. ⁴⁰Inchen ñui kusrenanōb pera uniilan kwaimandzigwan webusrtraí na rrugaben, kaiman— cha.

⁴¹Inchen Jesúsbe trenchibig kōn:

—iKan ñim mōi misamera kōrenrrab inchimeelō larrō gailō! cha, ¿Nabe managatig ñimba unamig kōnrrerah cha, ñimun øyeeg ashitō? Ñui nusrkawan yu srúa amō— chibig kōn.

⁴²Inchen unōbe kemallib iben, kwaimandziibe unan pirausrō kucha, sruaguchen, Jesúsbe trōmbōig maringarub kwaimandzigwan nama, webingarua, unane tamara, mōskawan tranōbig kōn.

⁴³Inchen Tiuswei purō nuig tabigwan mayeelōba kwaara ashibelō gōn.

Jesús nō kwamigwan katō eshkab

(Mt 17.22-23; Mc 9.30-32)

Inchen mayeelōba Jesús øyeeg marigwan kwaarōb gōmne Jesúsbe nui kusrenanōb pera uniilan trenchibig kōn:

⁴⁴—Pesannanrrab gōmō, iigwan tab mōray cha, tru Mōg Misra Arrubigwane mōguelai tasku tranig kōnrrabigwan.—

⁴⁵Inchen nōmun øyeeg taigwane nōmbe chi tainguen mōrmeelō gōn, kaguende Tius chigúinguen mōrmōnrrai indiilō gua. Incha nō øyeeg taigwan chi chibig kō cha payamibe nōmbe kōrig kui inchibelō gōn.

Mas nuibe mu guerah

(Mt 18.1-5; Mc 9.33-37)

⁴⁶Inchen nui kusrenanōb pera uniilōbe nōmui utu nōmbe mōig mas nuig kōnrraptiig kuin gúi waminchib payiyab mendabelō gōn.

47Inchen nòm chi isub purraigwan Jesúsbe wetøbeña, kan unan srua ya, nuim bulu pasrabe, 48trenchibig køn:

—Møikkøben i unan nai munchiyu tab wamab utabiibe, nan utan cha. Inchen nan utabiibe, nan karua ørøbigwangucha utan cha. Inchawei ñimui utu mas chigucha gømiig lataig kui asiibe, truibe si, mas nuig køn— chibig køn.

Namun maig købash inchimíibe namuingatø basran

(Mr 9.38-40)

49Inchene Juanbe trenchibig køn:

—Kusrennøbig, kan møikkøsrøn ñui munchiyu kwaimandziimeran webusri aser cha. Inchendø namba uñmíig købene, nambe truigwane merer— cha.

50Inchen Jesúsbe nun løtappe trenchibig køn:

—Merømøtay cha. Kaguende ñimun namig kurrømíibe ñimuingatiig køn— cha.

Jesús Jacobonba, Juanwanba namab

51Yandø Jesús srømbalasrø utig kømig lutau gøben, Jerusalénmay ke punrrab isua ib menda, 52eshkanrrabelø wam sruar merrab øren, nømbe Samaria birau kan pueblosrø chigøben nuyasig tamartrab ambene, 53samaritanosmerabe Jesús wane utømeelø gøn, kaguende nøbe Jerusalénsrømay inrrab arri asha. 54Inchen nui kusrenanøb pera uniilø Jacoboba, Juanba øyeeg indi ashabe, trenchibelø gøn:

—¿Señor, nømun pinishinrrab srømbalasrøngurri nam nag kørraarringaruah cha, Tius maig karuigwan eshkab møg Elías latawei?—

55Inchen Jesúsbe nømun keesha ashabe, namabig køn.

56Incha gatøganbalø yamera tsitsø pønrrabsrømay ambubelø gøn.

Jesúswei mendig ambamibe murig køn

(Mt 8.19-22)

57Nøm maywan ambub gøbene, kan møg Jesús wane trenchibig køn:

—Señor, ñi chu ibendø, nabe mendig arrumønrrun— cha.

58Inchen Jesúsbe trencha løtabig køn:

—Zorramerabe waramig trabmera tɔgar gøben, katø pala amøñib illimeragucha nɔmui lemera tɔgar gøn cha. Trune na, Møg Misra Arrubiibe ni nai turwan chu nerrarramikken chigaig kur— cha.

⁵⁹Incha Jesúsbe katøganun trenchibig kòn:

—Nai mendig amø— cha.

Inchen nòbe:

—Señor, nai mɔskawan sɔrønrrabmerrig ibashcha— chiben,

⁶⁰Jesúsbe trenchibig kòn:

—Ñibe nai wendautø amø cha. Tiusweimburabigu kwaig latailøbe nɔmui kwaitan sɔrøbash cha. Inchen ñibe ya, Tius nò ashib karub wainuguigwan gatøganelan eshkaib kusrenan— cha.

⁶¹Inchen katøgangucha trenchibig kòn:

—Señor, ñui mendig arrug kòtan cha. Inchendø nai yauelanmerrig ungwa chinrrab ibashcha— cha.

⁶²Inchen Jesúsbe trencha lɔtabig kòn:

—Mutøgucha arauwan kemøra arab pasrøbendø, wendømaygøba gueeshibiibe, Tius nò ashib karub wainuguigwane chi tab martrabgaig kòn— cha.

Jesús setenteelan karua ørøb

10 ¹Øyeeg chab puraiben, Señor katø setenta lawa wesrua, pagatø bagatø pueblomørig katøganbalømerasø nò yamsrømay nui merrab ørøbig kòn.

²Incha nòmun trenchibig kòn:

—Ellmarig tulisamibe truba nørø gøben, trune tulishinrrabeløe mamdø gøn cha. Inchawei tru ellmarig buaig Tiuswan miay chibig kòn, nui ellmarigwan tulishinrrabelø ørtrai. ³Ñimbe ambay cha. Au, nabe ñim ubishamera latailan lobosmerai utu ørar cha. ⁴An busramig urasr ila ammøwei, wasr ila ammøwei, alpargatis katø nørø srua ammøwei, ñim maywan ambuppe, mun gøben wamab waminchib pønrrømøwei inchigay cha.

⁵Incha kan yau kebambuppe, øyeemerrig chinrrigay cha: “I yaube chi isumgaig mayanguen tab gønrrun” cha. ⁶Inchen truyu chi isumgaig tab gøbigwan tøgä møg wabene, tru: “Chi isumgaig tab gønrrun” cha ñim trendaibe nuinug kørørmisrtrun chibig kòn. Inchen treeg møg kaabene, tru ñim trendaibe ñimuinuutøwei kørørmisrtrun cha. ⁷Inchen ñimbe tru yautøwei kørørmisra, nòm chi srørrendø mab, mutchigay cha. Kaguen chi

marøbiibe nui marimburøbe mu chi chinrraing, utamig køn cha. Yamørig, yamørig ammønrrigay cha. ⁸Ñim kan puebloyu kebamben, ñimun wamab utøbene, chi srørrendø manrrigay cha. ⁹Incha truyu kwanreelan tamarøb, tru misaameran: “Tius nø ashib karub wainuguiibe ñimuinuube luturaab pasran” chinrrigay cha.

¹⁰Inchen ñim kan puebloyu puben, ñimun wamømubene, trube, callesmerayu webamba, misagwan øyeeg chinrrigay cha: ¹¹“Ñimui puebloyu usrø namui srøbmerayu mendigwan mømimbe trube, ñim gusenrrigay chib pabørrguer chib. Inchendø mømimbe yandø ñimbe isua guy cha, Tius nø ashib karub wainuguibe ñimuinuube luturaain gøn” chib. ¹²Inchawei nabe ñimun trendamønrrun: Srabe gwalømbe tru puebloimbe Sodomai lataitøguen gømø, Tiuswei tru maig kønrrabigwan asha maram gwaløm attrabiibe mas purø rrømbøig kønrrun cha.

Isua mørmø misaameran isumdiig nebunrrabig

(Mt 11.20-24)

¹³iAy, ñi Corazín pueblo, waacha! iAy, ñi Betsaida pueblo, waacha! Kaguende Tirosrø, Sidónsrø tru maramburab mariilan na ñimui utu lataitøwei marig kuimbe, manawei truiløbe nømui kaig mariilan isua møra, Tiusweimay llirabsruig kuinrrun cha. Incha kaig marmønrrab yandø isua mører chib kenamartrab, trøsrkøleelø keb, nagusrøyu purramisrøb inchibsruiinrrun cha. ¹⁴Pøs Tiuswei tru maig kønrrabigwan asha maram gwalømbe Tiroba, Sidónba misaamera lataitøguen gømø, ñimbe mas purø rrømbøigwan utønrrun cha. ¹⁵Inchen ñi Capernaum pueblogan, ¿purø tab incha srømbalasrøngatig kusruig kønrrurmab isutirru? cha. Treeg kømøtø, ñibe tru møra melamnug kegutsig kønrrabguen— chibig køn.

¹⁶Incha nui pera uniilan trenchibig køn:

—Ñimun mørøbiibe, nan møran cha. Inchen ñimun kaashibiibe, nan gaasan cha. Inchen tru nan kaashibiibe, nan karua ørøbigwan gaasan— cha.

Karua ørig setenteelø katø amrrub

¹⁷Inchen tru setenteeløbe truba kasrag katø amrruabe, trenchibelø gøn:

—Señor, ñui munchiyube kwaimandziimeraguen namune mørtan— cha.

¹⁸Inchene Jesúsbe trenchibig køn:

—Satanásbe srømbalasrøngurri kan palaig beñib lataig peñen, nabe asig køn cha. ¹⁹Nabe mu mandamgaig maramburab maramigwan ñimun tranamønrrun cha, ulmeran, alacránmeran itøbunønrrai, katø tru ashig kømui inchibig, Satanás, nø ganawa, chi martrab gaimanrraimba. Inchen ñimbe chi indiimeelø buramrrun cha. ²⁰Inchen ñimbe, kwaimandziimera ñimun mørimba kasraaramøtø, ñimui munchimera srømbalasrø pørig pønrraimba kasraaray— chibig køn.

Jesús nuielaimburab kasraarab

(Mt 11.25-27; 13.16-17)

²¹Incha tru uras Jesúsbe Espíritu Santogurri truba kasraarawa, trenchibig køn:

—Nai Møskai, srømbalawanba, pirøwanba ashib karubig, ñun tabig waminchar cha, kaguende ñibe kusrebelø chigúi mørøbelan ashmønrrai tru sorig pønrrabelane tru chigucha gømeelø kusremeelan kenamarikkurri. Treewein gøn, nai Møskai, ñi treeg kønrrai maramig tab gúi g kua.

²²Nai Møskaimbe chiwandøgucha nan trandan cha. Mugucha na Nusrkawane mu gúi ashmuben, Møskaindøwei asan cha. Mugucha Møskawane mu gúi ashmuben, na Nusrkaimba, møiløgøben na asingaruilø truiløbatø asan— chibig køn.

²³Incha nui kusrenanøb pera uniilan ashabe, nømundø trenchibig køn:

—Tru ñimui kabmera nebua asigwan ñim ashibeløbe mayanguen tab gúi gøn cha. ²⁴Kaguende nabe ñimun trendamønrrun cha: Truba nørrø Tius maig karuigwan eshkabelø gøben, reymera gøben, i ñim asigwan asinrrabna gúi inchendø, ashmuig køn cha; i ñim mørigwan mørinrrabna gúi inchendø, mørmuig køn— cha.

Kan tabig marøb samaritanon Jesús kemesra wamindig

²⁵Inchen tru maig maramigwan martrai Moisés pørigwan kan kusrenanøbig Jesúsban mandø inchibig køtashchab nøba waminchab kurra yabe, trencha payibig køn:

—Kusrennøbig, ¿managatig øsig kømigwan Tius tranig tøgagønrappe, nabe chi maramerah?— cha.

²⁶Inchen Jesúsbe trencha løtabig køn:

—Maig maramigwan martrai Moisés pørigube ¿chi børig basrah? cha. ¿Ñibe truigwane mandø taitamab isugu?— cha.

²⁷Inchen nøbe trenchibig køn:

—“Señor ñui Tiuswane ñui manrraugurri kerrigu newan undaaraitøgaba, kerrigu ñui øsig basraitøgaba, katø kerrigu ñui asru chishkømburab chish kuitøgaba, kerrigu ñui turtøga isumburab isuitøgaba undaaramig køn cha. Katø ñima ñiasiiitøwei maig undaguig køppe, ñui mendaigwangucha treetøwei undaaramig køn” cha, trenchibig pørig pasran— cha.

²⁸Inchen Jesúsbe trenchibig køn:

—Ñibe sølwei løtan cha. ligwan mar cha. Treeg marabe si, ñibe managatig øsig kømigwan Tius tranig tøgagønrrabguen— cha.

²⁹Inchen tru møøbe nø payigwan tab webig køb, Jesúswane trencha payibig køn:

—¿Naimbe mendaibe mu guerah?— cha.

³⁰Inchene Jesúsbe trencha løtabig køn:

—Kan møg Jerusalénmay ambi maywan Jericómay kørraarrub arrubene, nileelø merrarrawa, kerrigu nui kewagúigwanbañau nila, kurragucha, kwaig lataig mara trarra ambubelø gøn cha.

³¹Inchen kan judíosmerai sacerdote tru maywandøwei chi isumø purainrrab arrub pasrøwa, tsui ashippe, yabwansrøndø purayan cha. ³²Katø treetøwei kan levitagucha truyu pubendø, ashabe, mendawansrøndø pureppa ib ibig køn cha. ³³Trune kan Samariasrø møg tru maywandøwei purainrrab arrua, nun ashabe, lastima isua, ³⁴møwan kemallabe, nui pisrøwan aceiteba, vinoba srøla, llensutøga lusra, trugurrimbe nui burroyutøwei itøguanøsa, kan ya bebøbelainuumay srua ya, truyu ashib tøgagúig køn cha.

³⁵Incha gatø gwaløm samaritanobe inrrappe, tru ya buaigwan pagatø an wesrawa, trana: “I møwan ashchunrrig tan cha. Ñi mas kastain gøbene, katø arruabe, pagararrumøn” dan— cha.

³⁶Incha Jesúsbe tru Moisés pørigwan kusrenanøbigwane trenchibig køn:

—¿Tru nileelø kemørinab møwan, tru i pønelø nøasi lataitøwei isua ashibiibe, ñune møig truig kønrraptiig kōta?— cha.

³⁷Inchen nøbe løtappe trenchibig køn:



San Lucas 10.34

—Tru mōwan lastima ashibig, truig kōmmōrgōtan— cha.

Inchen Jesúsbe trenchibig kōn:

—Ñigucha ya, treetōwei mar— cha.

Jesús Martaba, Maríaba waminchib

³⁸Incha Jesúsba, nui kusrenanōb pera uniilōba nui maywan amba, yamera tsitsō bōnrrabsrō pubene, truyube kan ishug, Marta taig, nui yaumay amō cha, utabig kōn. ³⁹Martabe kan numōsrai María taig tōgaig kōbig kōn. Inchen truike Jesúswei srōb pulu nō chi taigwan mōrtrab wamisren, ⁴⁰trune Martabe, ke chi maram gúinguen mōrmífig wawa, Jesúswan kemallabe, trenchibig kōn:

—Señor, chi maramelan nai numōsrai ke nandō gueguchen, ñungan isumuitarru cha, nan puruguptōguen wau taindō— cha.

⁴¹Inchen Jesúsbe trenchibig køn:

—Marta, Marta, ñi gúi ke chinsraatø inchib, ñui chigurrimbunø maramelangøba isun cha. ⁴²Inchendø kanbaløtø mas isumig pasran cha. Inchen Mariábe tru mas tabigwan trunun lawa wan cha. Truigwane kerraig kømønrrun— chibig køn.

Jesús Tius Møskaimba mandø wamindamigwan kusrenanøb

(Mt 6.9-15; 7.7-11)

11 ¹Kan bieje kanbaløsrø Jesúsbe Tius Møskaimba waminchib wawa, chab patsøgøbene, møikkøsrøn kan nui kusrenanøb pera uniibe trenchibig køn:

—Señor, tru Juan nui kusrenanøb pera uniilan kusrennøb lataitøwei, namungucha Tiusba wamindam gusrenanrra— cha.

²Inchen Jesúsbe trenchibig køn:

—Ñim Tiusba waminchib pønrrappe, øyah chinrrigay cha:

“Namui Møskai,

ñui munchibe tabigweindø tarømara, newan tab indig kønrrun.

Ñi ashib karub pasraibe pirau larrøbitchab amø.

³Kwalømmørig nam mamig maig palabigwan namun møi tranøb,

⁴namui kaig mariilan ulø baymø, pesannarrunrrig chib.

Kaguende namma namun kaig marøbelan mayeelan ulø baymø, pesannabelø guer chib.

Chiyugøben namun kegørrøsrkønrraptiig pønrrøbene, truwane ambashmørrunrrig chib.

Masken tru kaigweinukkurrimbe tarømartra”—

chib.

⁵Incha Jesúsbe katø trenchibig køn:

—Ñimma møikkøben kan trendø asig tøgagua, yem tøbøtag truigwei yamay ya: “Au, nai kasuku, pøngatø pirrim bebøbsrumugu chinrrun cha. ⁶Pøs nai trendø asig inrrab arrua, nai yau puben, chigucha srørramig chi gaagur” cha. ⁷Inchen kane yaambugurri trencha løtimbeh: “Yaskappe yandø kasraig basran cha. Mas wamab fregamørrunrrig chib. Nabe nai ureemeraba camayuguen warøwa, chigucha pebrab kurrønrrab gaimamønrrun” cha. ⁸Pøs nabe ñimun trendamønrrun: Pebrab kurrappe, nui trendø asig kuimbatø pebrab gurrømøtø, ke

wamabig wamab tsuikkurri kurra, chi palabigwan nõbe kerriguh tranrrun cha. ⁹Inchawei nabe ñimune trendamønrrun: Miabene, Tiusbe ñimune tranrrun cha. Lawabe, ñimbe wetørranrrun cha. Yaskabu wamubene, ñimune kurtrun cha. ¹⁰Kaguende mugucha miabiibe utøben, labiibe wetørraben, yaskabyu wamabigwane kurtrun cha.

¹¹¿Ñimma mõikkøben, mõskain gua, ñui nusrkai pirri miaben, pisrugwan rranrraitirru? ¿Kabe peskau miabene, ulwan rranøbsruguh? ¹²¿Kabe kan atøwall srug miabene, alacránwan rranøbsruguh? ¹³Pøs ñimma ya kailø gøbenguen ñimui uregwane tabig keta tranøbelø gøben, ¿kan mas ñimui Møskai srømbalasrø wabiibe nun miabelane Espíritu Santon tranmønrraitarru?— chibig køn.

**Møiløgøsrøn Jesúswan kwaimandzigwei maramburab
marigwan tøgag køn chib**
(Mt 12.22-30; Mc 3.20-27)

¹⁴Kan mowan kan kwaimandzig wamgaig marigwan Jesúspe wambig weguchen, kwaimandzig webibene, tru wamgaibe waminchiptinchen, misaamerabe truba kwaara ashen, ¹⁵kan utueløbe trenchibelø gøn:

—Kwaimandziimeran ke nõasha garub pasrabig, tru Beelzebúgurri kwaimandziimeran nõbe webusrøbig køn— cha.

¹⁶Inchen kaneløbe Jesúswan maig inchibig køtashchab ashig køptø, nune srømbalasrøngurriig asamig martrai miabelø gøn, Tius nõba pasrain gúi ashchab. ¹⁷Inchen Jesúspe nõm chi isub pønrraigwan ashabe, trenchibig køn:

—Kan rey karub tøgaweim birauma misag nõmasiitø nõørøtø misrøb kurrabe, pinønrrun cha. Katø kan yaelø nõmasiitø nõørøtø misrøb kurrabe, chab pinønrrun cha. ¹⁸Inchawei Satanáskucha nõasiitø nõørøtø misrene, nui ashib karub waibe ¿chinha basrabig basrønrrab gø? cha. Kaguende ñimbe nane trendan, chibig køn, Beelzebú martrai tranikkurri kwaimandziimeran webetan cha. ¹⁹Tru kwaimandziimeran na webetappe, Beelzebúgurri webetig købene, trube, ¿ñimui mendig amøñibeløbe kwaimandziimerane mu webetingaruitøgarre webetah? cha. Inchawei, treeg købene, maig kuigwan ñimun uyube nõm chibig køn. ²⁰Trune na Tiuswei tasig-unøtøga

kwaimandziimeran webetøbene, Tius nø ashib karub pasraibe ñimui utube puaguen basran cha.

21 'Kan mur møøma iitøgabe chinchamamønrrurmab may tamara, nui tab yawan tab ashib tøgagøbene, truyu nui chigurrimbunø tøgagúibe chi isumgaig basran cha. 22 Inchen katøgan møg, nø lataguen gømø, mas murig arrua, nun merrarrowa kanawa, tru chinchamamumig, iiløtøgabesimab isua tøgagúilan kerrawa, tru nø chi tøgagúilane katøganeløba pirisan cha.

23 'Naingatø basrømíibe, nan tsaleelaingatø maran. Naba tulishimíibe truørøtø wiitan cha, trenchibig køn Jesúsbe.

Kaig espíritu katøle møweimay arrub

(Mt 12.43-45)

24 'Kan trømbøig maringarub kwaimandzig møweinukkurri webippe, chugøben purmerasrø isramig lab uña, yandø wetørranrrab gaimappe, trenchibig køn: “Katø nai yamay inrrab cha, na chugurri webarrua arrinumaytøwei.” 25 Incha katø arruabe, tru mowane kan yawan chishtø paluuncha, tamara basrig lataig wetørranrrun cha. 26 Incha ippe, katøgan kwaimandziimera, nø lataguen gømø, mas larrø rrømbøig marøbelan sieteba tulundzuna, søteeløba trubalatø tru møweinug purrønrrab kebamrrun cha. Inchen tru møøbe yandø srabebe mas purø gaikken kørrømisrtrun cha, tru srøsrø lataitøguen gømø.—

Isa gømø, purø tab gøbig

27 Jesús iilan waminchib pasramne, misag utu kan ishug øyeeg chib trashibig køn:

—iÑun tøgagøb, mutsøsrøb ishuube mayanguen tab gúig køn!— cha.

28 Inchen Jesúsbe trenchibig køn:

—Tius maig taigwan mørøb, maig karuilan mørøbelø, truiløbeguende mayanguen tab gúilø gøn— cha.

Kaig misag Jesúswan mana asiimíig martrai miab

(Mt 12.38-42; Mc 8.12)

29 Misaamera Jesúsweim bøtøgatan mas mas tulundzunøben, nøbe trenchib waminchib pølbærøbig køn:

—Møin gwaløm larrø gaig misaamera, Tius naba pasrain gúi ashchab marig miatan cha. Inchendø asha gønrrai katøgan chigøben peg kenamara tranmøtø, tru Jonásweiwandø eshkamønrrun cha. ³⁰Jonásma Nínivesrø warab misaameraimbe chigøben kønrrab gúitamab isua asha gømig kønrrai nune treeg pasrig køn cha. Treetøwei na, Møg Misra Arrubikkucha møin gwaløm misaameraimbe isua asha gømig kønrrai pasrig kønrrun cha. ³¹Tru ambø umbu birausrø reinagucha Tiuswei tru maig kønrrabigwan asha maram gwalømbe kurrønrrun cha. Incha nøbe tru møin gwaløm møguelø ñimun møra melønrrai maringarunrrun. Kaguende nøma purø yabsrøngurringuen arrig købig køn, Salomón, tru purø gusrebig wamindigwan mørtrab. Inchen yu pasrabiibe Salomón lataitø gømo, mas nuikken gur chibig køn. ³²Tru Nínive ciudasrø misaamerabe Tiuswei tru maig kønrrabigwan asha maram gwalømbe kenamisrtrun cha, tru møin gwaløm misaameran kaiyu pønstrønrrab. Kaguende nínivesrø misaamerabe Jonás eshkaigwan møra, nømui kaig mariilan isua møra, Tiusweimay lliraig køn cha. Inchen yu pasrabiibe Jonás lataitø gømo, mas nuig køn— cha, trenchibig køn.

Kabmerabe asru kan lámpara latailø gøn

(Mt 5.15; 6.22-23)

³³—Muguen kan aceite lámparan piløga srørrøyu basrmøwei, ni køtsø umbu basrmøwei indan, masken kerrubelan tør gønrraimbe, pala basran. ³⁴Asru kappe kan lámpara lataig køn. Inchawei ñui kab tabig købene, ñui asrube kerriguba tør kebilig kønrrun. Inchen ñui kab kaig købene, ñui asrube kerriguba løstiig kønrrun. ³⁵Inchawei ashiptø guy, ñim tør tøgagúibe løstiig købgunmab. ³⁶Kaguen asru kerriguba tør gøben, katø truyu chigucha løstiig kaabene, ñibe kerriguba törgandø ashchun chibig køn, kan lámpara purø tørig, ñun piløben lataitøwei.—

Jesús fariseosmeranba, maig maramigwan martrai pørigwan kusrebelanba øyeelø gøn chib

(Mt 23.1-36; Mc 12.38-40; Lc 20.45-47)

³⁷Yandø Jesús chab waminchene, kan fariseo nui yau lincha manrrab attrai eshkaben, Jesúsbe kebya, mishatsigu wamisrene,

³⁸fariseobe Jesús mamigwan mamøwatø, tasig kinømø mai ashabe, truba kwaan, ³⁹Señorbe trenchibig køn:

—Trube, ñim fariseosmerabe pasunba, platillonba wambiimaybe pillmabendø, ñimui umbube ñimbe misagwan kwaarøsrá kerranrrab isuiløba, chigurrimbunø tøgagønrrab parø isuiløba, trutø netsailø gøn cha. ⁴⁰Ñim chugúinguen mormeelø! Tiusbe palamay asrwanma marig kōppe, ìkatø umbuigwangucha nõtøwei marig kōmuitarru? cha. ⁴¹Treeg inchibgunrriibe, tru umbu tøgagúigwan waachameran lastima asha, srørray chibig køn, treenchene, ñimune kerriguba chishig kørørmisrtrun cha.

⁴²’iAy, ñim fariseos waachamera! Ñimbe erbabunan, rudan, chigurrimbunø katøgan shush tusrmeran Tiusweyasig diezmørig kanzhig, kanzhig wesrawa, tranendø, tru sølgandø tabig maramigwanba, katø Tiuswei tru undag købigwanbabe, ñimbe pinab marøbelø gøn cha. Ñimbe marøppe, iilanwei maramig kuig køn cha, tru diezmørig kan gan wesrawa, Tiuswan tranamigwangucha pesannamø, tøgatø marøb.

⁴³’iAy, ñim fariseos waachamera! Judíosmera tulundzuni yamerayu purø tab misaamera purrainug purramig chullelø, katø penab, yanøb indinug ñimune maig købash kømø, purø tabzhig wamønrrai inchibelø gøn cha.

⁴⁴’iAy, ñim waachamera, kwaig sørin rrabmera latailø, chi kenameelø! Misaamera tru sørim balawan chigúinguen ashmø lliab gúilø latailø gøn— chibig køn.

⁴⁵Inchen tru maig maramigwan martrai Moisés pørigwan kusrennøbiibe trencha løtabig køn:

—Kusrennøbig, ñi øyeeg chippe, namungucha tōga wamøtan— cha.

⁴⁶Inchen Jesúsbe trencha løtabig køn:

—iAy, ñim waachamera, tru maig maramigwan martrai Moisés pørigwan kusrennøbelø chigucha! Ñimbe katøganelane niga ambamga gwatsiguelø neguanendø, ñimbe ñimdøweinguen ni kan tasig-unøtøgaguen kuñab kebachig kōmui indan cha.

⁴⁷’iAy, ñim waachamera! Tius maig karuigwan eshkabelan ñimui merrabsrø misaameratøwei kweecha, søriilø gøbelan ñimbe tamara pønsrøbelø gøn cha. ⁴⁸Treeg mariitōga ñimbe ñimui merrabsreelø treeg marigwane lata kandø isubelø gúí kenamaran cha. Kaguende

nømuimburappe kweechen, ñimuimburappe tru sörin rrabmeran tamaran cha.

⁴⁹’Inchawei Tius nø kusremburab kusrebig kuigu, trendaig køn: “Na maig karuigwan eshkabelanba, katø naashib karua øriilanba nabe øren, truilan kan utuelane kweechen, kanelane kaig martrun” cha. ⁵⁰Inchawei pirøwan marøb uraskurri Tius maig karuigwan eshkabelan mayeelan kweetsiilai ani lusigwan Tiusbe møin gwaløm misaameran ulø bayrrun cha, ⁵¹tru Abelwan kweecha ani lusigwangurrimbunø, tru Zacarias altarba, santuarioba pønrrabnug, tru tøbøtag pasrøben kweetsig, tru Zacariaswei ani lusigwangatig. Inchawei nabe ñimun trendamønrrun chibig køn: Tru misaameran kweetsiilan Tiusbe mõi ya misagwan ulø bayrrun cha.

⁵²’iAy, ñim waachamera, tru maig maramigwan martrai Moisés pørigwan kusrennøbelø! Kaguen tru nebua ashib kusreb gømig kan llavi lataig tøgagúigwan ñim kerrawa tøgagua, ñimdøweinguen kebammøwei, ni kebambug kui inchibelan chigucha kebambashmøwei indan— chibig køn.

⁵³Jesús truyugurri webibene, tru Moisés pørigwan kusrenanøbeløba, fariseosmeraba Jesúswan truba nama, ke chine payib mendabelø gøn, ⁵⁴kebenøsrkøg køptø, nø chi kusrua løtøbene, chigøben tamig tøgagønrrab.

Jesús palatø tabelø gømønrrai kusrenanøb

(Mt 10.26-27)

12 ¹Trune misaabe truba rruba nørrø tulundzuna, nu gøptø ke nømdø melambub itøbuniyaben, Jesúsbe nui kusrenanøb pera uniilan nòmunnemerrig trenchib pølbasrøbig køn:

—Au, fariseosmerai levaduran ashiptø guy cha, tru palatøbe truba tab indigwan. ²Pøs chitøgucha sora basriibe søriitø kørrømisrmø, ashchai kenamarig køben, katø wammørmønrrai sora tøgagúibe wammørimiibe kørrømisrtraamøn cha. ³Inchawei ñim løstøyu wamindigwane tøryu wammørøbguen inchen, ñim yaskabwan kasra nilø wamindigwane yabalastrøngurri trasaig kønrrun cha.

Jesús møigwan kørig tøgagømigwan waminchib

(Mt 10.28-31)

⁴’Na ñim nai linchibelane trenchar: Asrwandø kweechibelane kørig kui inchimøtay cha. Kaguen asrwane kweechendø, mas

trømbøibe chi martrab gaiman cha. ⁵Inchendø nabe ñim møjigwan korig tøgagømigwan eshkarrumøn cha. Kweecha, mu manchinrrainga tru mōra melamnug kegutchabig, truigwane korig tøgaguy cha. Nabe katøle trendamønrrun: Trunune si, korig tøgaguy cha.

⁶¿Trattrøgatø illinzheelan pa centavozhigweindø yanøbelø gømuitarru? chibig køn. Inchendø Tiusbe treelanguen pesannamø, ashibig køn cha. ⁷Pøs ñimuimburappe ñimui turyu pusruumeranguen kan gan mundziizheelø gøn cha. Inchawei chi korig kui inchimøtay chibig køn. Truba yam illimera lataitøguen gømø, ñimbe mas purø nuweyelø gøn cha.

Misaamerai malau ‘Jesúscriston ashmíig kur’ chib pønrrømeelø
(Mt 10.32-33; 12.32; 10.19-20)

⁸Katø nabe ñimun trendamønrrun: Møikkøben misaamerai merrab ‘Jesúsweingatiig kur’ chibigwane na, tru Møg Misra Arrubikkucha Tiuswei ángelesmerai merrab treetøwei truigwane ‘ningatiig kur’ cha, nabe trendamønrrun cha. ⁹Inchen misaamerai malau ‘Jesúsweingatiig kømur’ chibigwane Tiuswei ángelesmerai merrab nabe nungucha ‘ningatiig kømur’ tamønrrun cha.

¹⁰Møikkøben na, Møg Misra Arrubigwan chigøben kaig waminchibigwane Tiusbe uløwan paymønrrab pesannanrrun. Trune møikkøben Espíritu Santon purø rrømbøig waminchibigwaneguende pesannamø, ulø bayrrun cha.

¹¹Ñimun payrrab judíosmera tulundzuni yamerayumay, kabe juezmeraimay, kabe karubelaimay srúa ambene, mandø cha lötamermab, mancha lötamermab, chi tamermbab chi isumøtay chibig køn. ¹²Kaguende yandø wamindamig puben, Espíritu Santobe maig tamigwan ñimun kusrenanrrun— cha.

Kan pua møg chugúi mormíig lataigwan guemesra wamindig

¹³Kan møikkøsrøn misag utu Jesúswan trenchibig køn:
—Kusrennøbig, nai nunewan naimburabig kønrrabigwan pirisha, nan tranø chirra— cha.

Inchen Jesúsbe trenchibig køn: ¹⁴—Au, kasuku, ¿nan kan juez lataig, kabe kan pirø birishibig lataig kønrraimbe nane mu basrah?— cha.

¹⁵Incha gatø trenchibig køn:

—Parø indamigwane treenchimønrrab ashiptø guy cha. Kaguende kan møg øsig kømibe chi nørro tøgagúinug basrømíig kòn— cha.

¹⁶Incha gatø ‘øyeeg lataitøwein gøn’ cha, kemesra waminchib trenchibig kòn:

—Kan truba pua mowan nui pirømerayu truba rruba ellmarig misren, ¹⁷tru puaibe nuinetø isub mendabe trendan cha: “¿Chindamer? cha. Nai ellmarig tulisailan yandø chu esegamig chigagur” cha. ¹⁸Inchabe treeg isubig kòn cha: “Møimbe sí chi maram gúi ashar cha. Nai mamig keerøb esegailan picha, mas nørreelø mara, truyu nai ellmarig tulisailanba, chi tøgagúilanba kerrigu esegamønrrun cha. ¹⁹Incha nabe naasiitøwei trendamønrrun tan cha: ‘Møimbe si, chigøben truba nørro esegailø yam bilawei pønsra war cha. Møimbe israb, mab, muchib kasraarau’ tamønrrun” cha. ²⁰Inchene Tiusbe trendan: “Chugúinguen mormø møg, mõi yemdøwei ñui møsigwan miaben, kwamig nebuben, ñi esegawa tøgagúibe, ¿muin gørrømisrttrerah?” cha.

²¹Kan møøbe nuyasiitø chine palømø, tun bønssraindøgucha, Tiusweimburabigwan chiguchaga waachawane øyeeg purainrrun—chibig kòn, Jesúsbe.

Tiusbe nui uregwane chi palabigwan tranøbig kòn

(Mt 6.25-34)

²²Incha Jesúsbe nui kusrenanøb pera uniilan trenchibig kòn:

—Ñimune trendamønrrun cha: Øsig amønamig, ñim mamigwanba, asru chi guemermab isumigwanba menrra isumøtay cha. ²³Pøs øsig amønamikkan kan mamig lataitø gúitarru cha. Kabe asrkan kan asru keelø lataitø gúitarru cha. ²⁴Pøñiimeranma asay cha, chi ellguamøwei, ellmarig tulishimøwei, mamig esegamig chi gawei, mamig nørro keera tun bønsra esegamig chi gaweyelanguen Tiusbe manrrai mannøbig kòn cha. Ñimbe illimera lataguen gømø, maseløguen gøn cha. ²⁵¿Ñim møiløgøben, maya maya incha, katøgan tøbø metrotøguen nurabsruguh? cha. ²⁶Ñim yandøzhigwanguen martrab gaimabeløbe, ¿katøgan peg maramelane chinchabrre isugue? cha.

²⁷Umeranma asay chibig kòn, kwallmøwei, kumøwei inchibelø gøbendø, tabig nørøran cha. Inchendø nabe ñimune

trendamønrrun: Rey Salomónguen nui chine purø tabzhig tøgagua, umera lata tabzhiibe kemuig køn cha. ²⁸Wambig kaumera, mõi ka bønrrøwa, srønabe nagu parrig kønrrabigwanguen Tiusbe øyeeg tabzhig kenanøb lataig marøbiibe, ñimune treetøguen gømøtø, masken marmønrraitarru cha, ñim isubigwan Tiusweinug pasra tøgagúigwan ke kagømønrraindøzhig tøgárrwan. ²⁹Inchawei chindamermab isuptø menrra isui inchib lamøtay chibig køn, chi mamermab, chi mutsamermab. ³⁰Kaguende yu pirau misaamerabe mutøgucha iilan isua labelø gøn cha. Trune ñimui Møskaimbe ñimui chi palabelan ashaguen wabig køn cha. ³¹Treeg kømøtø, ñimbe Tius nø ashib karub wainuguigwan isua lay chibig køn. Trumaybe tru katøgan chi palabelangucha ñimbe nemarig utønrrun cha.

Srømbalasrø chigurrimbunø pønrrabelø

(Mt 6.19-21)

³²Nai mamdø ubishazheelø, chi kørig kui inchimøtay. Kaguende ñimui Møskaimbe nui karub wainuguigwan tranamig tab gúi indin gøn. ³³Chi tøgagúilan yana, chigarwan tranay, treeg marabeguende, an busrig urasrmera, pinønrrabig kømeeelø tøgagønrrabguen, chi tøgagúilø managuen pinønrrabgailan srømbalasrø eseganrrab. Truyube niliig kebinrrab gaimabwei, ni pullilla barmøwei inchibnug. ³⁴Kaguende ñimui chi tøgagúilø chu esegaig pønrrøbene, ñimui manrrøgucha ke truyutø isub pasrønrrun cha.

Tamara muniitø gømig køn

³⁵Ñimbe kewa, tamara, pørønawa, martrab ke muniitø guy; katø ñimui aceite usri lámparamerangucha piløga guy; ³⁶ñimbe kan mendig melabelø latailø gønrrigay ya buaig novios yaugurri attrab gøben muniirabelø latawei. Incha pua, nø yaskabwan pinrrøgøbene, kurtrab muniitø melabelø latailø gømig køn. ³⁷Mayanguen tab gúilø gøn tru karuindiig melabelø ya buaig nømun kib gøben gømø, kasrig burrabuyuh puinabeløbe. Nabe ñimun cierton trendamønrrun: Ya buaig nøashib tamara pørønawa, mishatsigu nømun purramisringarua, mamigwan nøashib pirishinrrun cha. ³⁸Yem døbøtag pui lata, løtsø pui lata nømun kib gømø, kasrig burrøben puinabeløbe mayanguen tab gúilø gønrrun

cha. ³⁹Kan ya buaima niliig chu uras attrab gúi mörimbe, yau nilønrrab kebibashmubsruinrrun cha. ⁴⁰Ñimgucha tamara melay chibig kòn. Kaguende tru Møg Misra Arrubiibe chi isumø gøbenba arruptinchun— cha.

Mendig megabig maig taigwan marøbigwanba, maig taigwan marmíigwanba kemesra wamindig

(Mt 24.45-51)

⁴¹Inchene Pedrobe trencha payibig kòn:

—Señor, ñiig ‘øyeeg lataitøwein gøn’ cha, kemesra wamindigwangan namuyasiitø waminchitirru? cha, kabe ñmayeelain gúitaru?— cha.

⁴²Inchen Señorbe trenchibig kòn:

—Kan karuindiig megabig maig taigwan mōra marøb, katø chi maramelan nōtø tsabø asha marøbigwan, ya buaig nui yau warabelan mannam ura puin gúindø nōmui mamigwan srōttrab muniitø wabig kōnrrai ashai wanninabiibe ñmøig kerah? cha. ⁴³Truibe mayanguen tab gúig kòn cha, nun karua basrigwan marøb megabenh ya buaig puptindinabigweimbe.

⁴⁴Pøs nabe ñimun cierton trendamōnrrun: Ya buaibe nui chi tøgagúigwan kerrigu nō asha marøb pasrōnrrai tranrrun cha.

⁴⁵Inchen tru karuindiig megabig nuinetø ya buaibe peguen arrumōnrraitamab isua, katōgan karuindiig melabelan mōguelan lata, ishumburmeran lata kurrabetab menda, katø mab, muchib, mutsiirab tsubenba, ⁴⁶nui ya buaibe ni attraitamab isuinguen gōmø gwaløm, ni ø uras punrraitamab isumø tsubenba, puptincha, purø rrōmbøig ichagucha, maig taigwan marmeelø pōnrrainug kertrun cha.

⁴⁷Inchen tru karuindiig megabig nun karua basrøbig ya buaig maig maramig palai indi ashibig købendø, tamarmøwei maig chiben mōrmøwei inchibigwane truba yam ichagutsig kōnrrun cha. ⁴⁸Inchen tru karuindiig megabig nun karua basrøbig ya buaig maig maramig palai indi mōrmōwa, kōrrø ichagutsamdiig marøbigwane trengatig yam ichagutsig kōmōnrrun cha. Inchen mōigwan gøben maramigwan mas nu rranøppe, treetøwei nu ulø bayrrun cha. Inchen mōigwan gøben mas purø nōrrø maramig traninabigwane, trunune masken nu ulø bayrrun chibig kòn.

Jesúskurri misaamera ke nòørøtø misrøb

(Mt 10.34-36)

⁴⁹'Nabe yu pirau nag lataig kegutchab arrig køn. iNabe yambe manawei pilabguen basrømønrrabmab truba isur! ⁵⁰Nane purø rrømbøig pinøbuløb arrubigu pureb yamig nebunrrautan. iNane purø isutan treeg nebumnegatiibe! ⁵¹¿Ñim isubgan nabe piraumay arruppe, ambumay imay tab gøbigwan srua arritamab isugueh? Nabe treeg kømøtø, nòørøtø, nòørøtø inchib gønrrai arrur cha trendamønrrun. ⁵²Kaguen møingurrimbunøbe kan yau trattrogatø burramnuube nòørøtø inchib gønrrun cha, pøneløbe pailan namig kurra tarømisren, pailøbe pønelan namig kurra tarømisrtrun cha. ⁵³Møskaimbe nusrkawan namig kurrøben, nusrkaingurrimbe møskawan namig kurrøben, usrimbe nimbasrwan namig kurrøben, nimbasrkurrimbe usran namig kurrøben, sueeragurrimbe yernan, katø yernagurrimbe sueeran namig kurrønrrun— cha, trenchibig køn.

Maig pub attrabigwan wamindig

(Mt 16.1-4; Mc 8.11-13)

⁵⁴Incha gatø Jesúsbe misagwan trenchibig køn:

—Wañimera pørr guebibrø kurra arrubene, ñimbe trenchibelø gøn cha: “Sre bunrrun” cha. Inchen pubwei inchibig køn cha.

⁵⁵Inchen isig ambø umbusrøngurri webarrubene: “Pachig kønrrun” chiben, treegwein gøbig køn cha. ⁵⁶iPalatø tabelø! Pala wañi maig basrai asha, pirau maig kui asha ñim øyeeg kønrrun chib, øyeeg kønrrun chib waminchibelø gøbendø, ¿møin gwaløm chi pureb arrubigwane, trube, øyeeg kønrrun chinrrab wetøgørrønrrab gaimabeløbe mailø gøgue? cha.

Ñui ashig kømui inchibiiba ambumay imay lata

tab gønrrai mar

(Mt 5.25-26)

⁵⁷¿Sølgandø tabig maig kønrrabigwan ñimasiyaitøwei chindimba asha tamarmøgue? ⁵⁸Ñun maig maramigwan asha marig kønrrai tru kejabiiba, tru maig maramigwan asha marøbigweinumay ambub pønrrappatø, mallatø trunun mayutø

nøba tamara gørrømisrtrab inchi. Inchipa ñun juezweimay srua amben, juezbe policíameran trana øren, truiløbe ñun merrarrawa kailan keeri yau keera pasrmørraimbe. ⁵⁹Pøs nabe ñimun trendamønrrun: Truyugurri webinrrappe, maya ulø misrigwan ke chishtø pagarawatøwei webinrrabguen— cha.

Kaig marmønrrab isua mørtrai wamiilø

13 ¹Inchen tru urastøwei møiløgøsrøn truyu pønrrøwabe Jesúswan trenchibelø gøn:

—Pilatobe mø møguelan gøsrøn galileasreelan kweecha, truilai aniwane tru nøm Tiuswan tranamig animal gweetsilai animba lindisain gøn— cha.

²Inchen Jesúsbe trenchibig køn:

—¿Ñim isuppe, Galilea møguelø treeg nebuinabeløbe, tru nømui birau katøganelø lataguen gømø, purab gailø gúimbarre treeg nebitamab isugueh? cha. ³Nabe ñimune treeg kømøn damønrrun. Ñimdøweinguen ñimui kaig mariilan isua møra, Tiusweimay lllramuisruandøbe, ñimgucha mayeeløba truilø lataitøwei kwanrrabguen cha. ⁴¿Kabe ñim isubgan Siloésrø tru purøbala ya itøguebeñen kwabelø tru dieciochoeløgan Jerusalénsrø maya misag warabelan purab gailø gúitamattirru? chibig køn. ⁵Nabe ñimune chi treeg kømøn damønrrun. Ñimdøweinguen ñimui kaig mariilan isua møra, Tiusweimay lllramuisruandøbe, truilø lataitøwei ñimgucha mayeeløba kwanrrabguen— cha.

Higuera tusr mamig niimífgwan kemesra wamindig

⁶Incha Jesús katø ‘øyeeg lataitøwein gøn’ chib, iigwan kemesra waminchibig køn:

—Kan møg nui pirau kan higuera tusr ellguawa, tøgagua, higos niguitashchab ashchab ya, chigucha wetørramíig lataig køn cha. ⁷Inchabe tru pirø ashib mowane trendan cha: “Au, na pøn bilawan mamig lanrrab i tusryu arrua, managuen wetørramur cha. ¡Lutiichi! tan cha. ¿Tusrwan pirøyu ke ka yandøbe chinchib pasrøbashchab?” tan cha. ⁸Inchen tru pirø ashibiibe trenchibig køn cha: “Au, nai ashib karubig, møm bilatøbe ka basrøbashchab cha. Na pirøwan alaaranøb, animal bøy busrtrab cha. ⁹Inchipa, treenchene mamig misrøbgun cha. Inchendø katøgucha misrmubene, trube, lutitchig” tan cha, trendan— chibig køn.

**Kan ishug kesruig kurrashchab gaimabigwan
isrin gwalòm Jesús tamarøb**

¹⁰Kan isrin gwalòm Jesús judíosmera tulundzuni yau kusrenanøb pasrøbene, ¹¹truyube kan ishug dieciocho años ørøba kwanrrø uñibig wabig køn, kwaimandzig utsømay kesrungaruig, ni chinchagucha kurrashchab gaimabig. ¹²Inchen Jesúsbe nun asha, wamabe trenchibig køn:

—Au, ishug, yandø ñibe kwanrrø gømø, tabig kørørmisran— cha.

¹³Incha nui tasigwan tru ishuweim bala estsarene, ishuube mõi mõi ølmisrøb, kurraashibig køn. Incha Tiuswan truba tabig waminchib mendabig køn. ¹⁴Inchen tru tulundzuni yau ashib karubiibe, Jesús isrin gwalòm treeg tamarikkurri truba nama, misaamerane trenchibig køn:

—Chigøben maramigwan maram gwalømmerabe seis días køn cha. Ñimui kwanrrømeran tamariilø gønrrappe, tru gwalømmerawan tamartrai amrrumbala cha, isrin gwaløm gømøtø.—

¹⁵Inchen Señorbe kusrub trenchibig køn:

—iPalatø tabelø! ¿Ñimma møikkøben ñimui weywan, kabe ñimui burron isrin gwaløm pi mutsørørnrrab sruamrrab pichimeelø gøtirru? cha. ¹⁶I ishug Abrahamwei misagwan Satanás kwanrrøtøga dieciocho años ørøba lusra lataig tøgagúigwan, ¿Kabe isrin gwaløm gøn chiptø i kwanrriigwane øyeeg iløsrkaig megaigugurri elatsamig kømø, chindah?— cha.

¹⁷Jesús nø øyeelan waminchene, nui ashig kømui inchibeløbe søteeløba kørørmisra gørrømisren, trune katøganeløbe Jesús tabig mana asiimíig mari ashabe, truba kasraarabelø gøn.

**Iibe murtasa yell lataig køn cha, kemesra wamindig
(Mt 13.31-32; Mc 4.30-32)**

¹⁸Incha gatø Jesúsbe trenchibig køn:

—¿Tius nø ashib karub pasraibe chi lataig asønan chinrrab gøh? cha. Kabe ¿møig lataig køn chinrrab gøh? cha. ¹⁹Pøs kan murtasa yellwan kan møg nui trau tsurøb lataig køn cha, nurawa, kan tusr-unøburabig misren, pala amøñibelø illimeraguen tru srrarmerayu le maran— cha.

Iibe levadura lataig kòn cha, kemesra wamindig*(Mt 13.33)*

²⁰Katø Jesúsbe trenchibig kòn:

—¿Tius nò ashib karub pasraigwane chi lataig kòn chinrrab gòh? cha. ²¹Pòs levadura lataig kòn cha. Kan ishug pa arruba harina sòmara, levaduran pusren, maya sòmariowan trunun ørøba pulingarub lataig.—

Trag yaskab*(Mt 7.13-14, 21-23)*

²²Pueblomerasrømba, yamera tsitsø bønrrabsrømba Jesúsbe kusrenanøb Jerusalénsrømay pureb ibig kòn. ²³Inchen møikkørør trencha payibig kòn:

—¿Señor, kaigyugurri wesrainanrrabeløgan mamdeelø gønrrab gúitarru?— cha.

²⁴Inchene nøbe trenchibig kòn:

—Trag yaskabwan kebambamigwan ñimbe kebamrrab tranrray cha. Kaguende nabe ñimun trendamønrrun: Mayamba kebamrrab inchendø, kaimanrrun cha. ²⁵Ya buaig kurra, yaskabwan kasrøbene, ñim wambig kørørmisrøbeløbe yaskabwan pinrrøgøb trenchinrrun cha: “Señor yaskabwan kurtra” cha. Inchen nøbe ñimune trencha lètønrrun cha: “Nabe ñimune chuelø gúi ashmíig kur” cha. ²⁶Inchen ñimbe trenchinrrun cha: “Nambe ñiba mab, muchib inchen, katø ñibe namui callesmerayu kusrenanøb indig kømøh” cha. ²⁷Inchene nøbe ñimune trencha lètønrrun: “Nabe ñimune chuelø gúi ashmur cha. Kaig marøbeløbe mayeeløba nainukkurrimbe tarømisray” cha. ²⁸Inchen ñimbe tuyube kishib, trugulmeran tsatsamig kørør cha, Abrahamwan, Isaacwan, Jacobwan, katø mayeelø Tius maig karuigwan eshkabelan, Tius nò ashib karub waisrø nøm trusrø purrøben ñim asha, ñimbe wambig webetiilø gua. ²⁹Kaguen pørr gal-labgatøsrøngurrielø gøben, pørr guebibgatøsrøngurrielø gøben, ambøgurrielø gøben, igurrielø gøben, yu pirau chugurrieløtøgucha amrrunrrun, Tius nò ashib karub wainug purramisra manrrab. ³⁰Inchen møiløgøben møi ya yu pirau srabe melabeløbe srømbalasrømbe nømmerrig pønrrørørørør. Inchen møi ya yu pirau nømmerrig bønrrabeløbe srømbalasrømbe srabe melønrrun— chibig kòn Jesúsbe.

Jesús Jerusalénwan isua kishib

(Mt 23.37-39)

³¹Inchen tru gwalømdøwei mø fariseosmera gøsrøn puabe, Jesúswan trenchibelø gøn:

—Ñiguen yugurri webya, inrrø cha. Kaguende Herodesbe ñune kweechig kuin gøn— cha.

³²Inchen Jesúsbe trencha løtabig køn:

—Ø zorra lataigwan trenchinrrab ambay cha: “Au, møimba, srønaba nabe kwaimandziimeran webetab, kwanrreelan tamarøb, trumarbe nai maramigwan patsøgamønrrun” tan chinrrab.

³³Inchendø nabe møimba, srønaba, trumarba nai maywan ib yamig køn cha. Kaguen Tius maig karuigwan kan eshkabiibe nørørsrøn gømø, Jerusalénsrø kwamig nebunrrun chibig køn.

³⁴¡Jerusalén! ¡Jerusalén! ¡Tius maig karuigwan eshkabelan kweechib, katø ñimuyasig Tius karua øriilan sruutøga petabig! ¡Nabe yamba, kan biejetø gømø, kan atøwall nui pullichu-uregwan kwaldzarig umbu kanbalatø mara, maatanab lataitøwei ñui uregwan tulundzunønrrab inchen, ñibe nane kaasig køn! cha. ³⁵Au, ñim waraig yamerabe elatsig kørørmisrtrun cha. Inchawei nabe trendamønrrun chibig køn: Nane mas ashchaamøn cha, øyah tamnegatig: “¡Señorwei munchiyu nø ørig arrubiibe mayanguen tab gúig køn!”— cha.

Kan møg parab gwanrrø tøgagwan Jesús tamarøb

14 ¹Kan isrin gwaløm Jesúsbe kan fariseo chi maramigwan nø ashibigwei yausrø manrrab kebya wabene, kaneløbe ke chindashchab ashibelø gøn. ²Inchene tuyube kan møg Jesúswei merrab parab gwanrrø tøgag wabene, ³Jesúsbe tru maig maramigwan martrai Moisés pørigwan kusrenanøbelanba, fariseosmeranba trencha payibig køn:

—¿Isrin gwaløm kan kwanrriigwan tamarmønrrai merig kø, chindah, kabe merømuig kø, chindah?— cha.

⁴Inchen nømbe chigucha løtømeelø gøn. Inchene nøbe kwanrriigwan srua arrua, tamarabe, yandø inrrai ‘ungwa’ chibig køn. ⁵Incha nømune trenchibig køn:

—¿Ñimma møikkøben, ñui nusrkain gúi, kabe ñui wey gúi pisuyu kebeñenma, isrin gwaløm gúingucha, tru urastø wesramønrraitirru?— cha.

⁶Inchen nømbe øyeelan chigucha lètønrrab gaimabelø gøn.

Novios yaumay lynchab amrrunrrai eshkailø

⁷Lynchab amrrunrrai eshkaig misaamera mishatsigu mas tab purramdønug, tab purramdønug laben, Jesúsbe treeg indi ashabe, øyeeg kømig køn chib eshkaib waminchibig køn:

⁸—Møikkøben ñun kan novios yaumay lynchab attrai eshkaibene, mas tab wamdønug merrarramøta cha. Inchippa ñi lataguen gømø, mas nuigwan lynchab attrai eshkaig kua, truig puben, ⁹tru ñunba, truigwanba lynchai eshkabiibe arruppa: “Ñi waigwan ønun tranø” chibene, ñibe køriimisra wendausrø wanrrab purainrrabguen cha. ¹⁰Treeg inchimøtø, masken ñun lincha cha eshkaibene, wendausrø wamistr cha, tru ñun lincha chibig arrua: “Ñi, kasukube, yu merrabsrø wanrrab puraamø” cha, ñun trenchinrrai. Inchen ñibe tru mishatsigu ñiba purrabelai merrab truba tab indig kønrrabguen cha. ¹¹Kaguen møikkøben nøasiitø ‘nuig kurmaib’ isubigwane, ka kørig martrun cha. Inchen nøasiitø ‘nuig kurmaib’ isumfigwane ‘i møyøbe si, nuig køn’ daig kønrrun— chibig køn.

¹²Incha gatø Jesúsbe tru lincha cha eshkaib møywangucha trenchibig køn:

—Ñi kan mamig srørrøppe, ñui asiilandø gømøywei, ñui nunelandø gømøywei, ñui misagwandø gømøywei, ñui ya bulu puarmerandø gømøywei wama srøsr cha. Kaguen truiløbe ñungucha treetøwei lynchai wama, nøygurringucha treetøwei marene, truburø ñibe utamigwan uta gørrømisrtrun cha. ¹³Treeg kømøtø, ñi kan fiesta marøppe, waachameran gøben, køyønrrab gaimabelan gøben, cojosmeran gøben, kabgarmeran gøben lynchab amrrunrrai eshkaibene, ¹⁴ñibe mayanguen tab indig kønrrabguen cha. Kaguende truiløbe ñune katøburø treetøwei marmuindøgucha, sølgandø tabigwan marøbelø gatø øsiirab gwalømbe, tru ututø ñungucha Señorbe truburø tranamigwan tøygatø tranig kønrrun— chibig køn.

Iibe mamig truba nu tamara gúigwan kemesra wamindig

(Mt 22.1-10)

¹⁵Inchen iigwan møyabe, tru kan mishatsigu wabiibe Jesúsban trenchibig køn:

—Tius nø ashib karub waisrø mamigwan mabiibe mayanguen tab gúig kønrrun— cha.

¹⁶Inchen Jesúsbe nun trenchibig kòn:

—Kan møg truba nòrrø mamimera mannamig tamara, misaamera truba nu lynchab amrrunrrai eshkawa, ¹⁷yandø mam urasbe nui karuindiig megabigwane tru lincha tailan trenchinrrab ørøbig kòn cha: “Yandø ke chab pønsrainguen bønrran cha, amrruy” chinrrai. ¹⁸Inchene møitøgucha ke chine guemesrøb mendabelø gøn cha. Srøtiibe: “Kanbalø pirø ke møindø chab pena, trunun ashchab inrrab war tan cha. Treekkurri kaimamønrrun dan chirrunrrig cha”, trendan cha. ¹⁹Inchen kane: “Weymera diez arabelø pena, maig marøbelø gøtashchab ashchab inrrab war tan cha. Treekkurri attrab gaimamønrrun dan chirrunrrig” tan cha. ²⁰Inchen katøgane: “Ke srø gasharawa gua, trugurri attrab gaimamønrrun dan, chirrunrrig” tan cha.

²¹'Inchen karuindiig megabiibe ya, tru nun karub pera wabig ya buaigwan kerrigu eshkaben, nøbe namappe, karuig megabigwane trenchibig kòn cha: “Malla inrrø cha, ciudayu calleswanba, maywanba ya, waachameran gøben, kònønrrab gaimabelan gøben, cojosmeran gøben, kabgarwan gøben yu pera attrig” cha. ²²Inchen mas yanasrø tru karuindiig megabiibe trenchibig kòn cha: “Ñi nan karub pera wabig, ñi maig karuigwan maren, katøgucha aldø basran” cha. ²³Inchen nøbe tru karuindiig megabigwane: “Ciudayu wambiisrø nòrrø maymerawan gøben, shush maywan gøben ya, nai ya netsanrrai katøganelan amrrumø gømø, ke amrrumne wamønrrig cha, trendan cha. ²⁴Kaguende nabe trendamønrrun: Tru srøsreelø na lincha cha wamiiløbe møikkucha nai mamigwane maig mamig kuinguen mørtraamøn” cha trendan— chibig kòn Jesúsbe.

Jesúswei mendig yamibe murig kòn

(Mt 10.37-38)

²⁵Misag truba nòrrø Jesúswei mendig amben, nøbe keesha ashabe trenchibig kòn:

²⁶—Møikkøben naimay arrua, nui møskawan, nui usran, nui srawan, nui uregwan, nui nunelan, nui nuchalan lataitøguen gømø, nan mas undaarab, katø nui øsig kømigwan lataitøguen gømø, nan mas isub undaaramíibe nai mendig uñibig kònrraamøn cha. ²⁷Inchen gatø møikkøben nui kuruswan nø muta arrumigwan muta, nai mendig arrumíibe, nai mendig uñibig

kønrraamøn chibig kòn. ²⁸Ñimma mōikkøben, kan truba bala ya martrab inchabe, ÷patsøgamdiig kōtashchab anwanmerrig ashchab wamismønrraitirru? cha. ²⁹Treenchimøtø, pøtøburab pølsrugwandø pølbasra, patsøgønrrab gaimabene, mayeelø ashibeløbe ñune indzatø ashib trenchinrrun cha: ³⁰“Ø mōøbe yawan martrab pølbasra, patsøgønrrab gaiman” cha. ³¹Kabe kan reyma katøgan reyba kwayanrrab webinrraptø, ÷suldaumera diez mil nø tøgagúitøgaba, katø tru nøba kwayanrrabig suldaumera veinte mil pera arrubiiba, ka kwayamdiig kōtashchab trununmerrig isunrrab wamismønrraitarru? cha. ³²Pøs kaimappe, tru katøgan rey yabsrø srø basrøbenbatø, kwayamø, tammay kōrrømisrkun chinrrai karuilø ørtrun cha. ³³Inchawei ñim mōikkøben chi tøgagúigwan kerrigu elachimibe, nai mendig uñibig kønrraamøn chibig kòn.

Tre yandø larrmíig misrøb

(Mt 5.13; Mc 9.50)

³⁴“Trebe tabig kòn. Inchendø yandø tru trebe larrmíig misrabe, ÷katøbe chinha gúi larrøbíg misriasamø? ³⁵Pirø tamisrtrai pirøyu wiitamdiig kømøwei, animal bøywan abono marigu pusramdiig kømøwein gøben, yandø petig kønrrun cha. iMøramig kalu bønstraibe mør!— chibig kòn.

‘Iibe ubisha rrubabig lataitøwein gøn’ cha, kemesra wamindig

(Mt 18.10-14)

15 ¹Romasreelayasig an utabeløba, kaig marøbeløba Jesúsuan mørtrab mayeelø kemallen, ²fariseosmeraba, tru Moisés pørigwan kusrenanøbeløbabe yeeg marøbig kòn chib, trenchibelø gøn:

—I mōøbe kaig marøbelan wamab, truiløba mab inchibig kòn— chib.

³Inchen Jesúsbe ‘øyeeg lataitøwein gøn’ cha, kemesra waminchibig kòn:

⁴—÷Ñimma mōikkøben ubishamera cien tøgagua, truilø kan palab misrene, noventa y nueve wambig nōørørørø nōmdø warønrrai warøbshippa, wetørramnegatig tru ubisha rrubabigwan lanrrab imønrraitirru? cha. ⁵Incha wetørrappe, kasrag kōbiitø, ñui kildunyu muta, arrua, ⁶yandø yau puabe, ñui ya buluelanba, ñui

trendø asielanba tulundzuna, trenchinrrun cha: “Naba kasraaragun cha. Kaguende nai ubisha rrubabigwan wetørrar” cha. ⁷Inchawei nabe trendamønrrun chibig køn: Srømbalarøngucha treetøwei kasraaran gøn cha, kan kaig marøbig nui kaig mariilan isua møra, Tiusweimay lllirabene, tru noventa y nueve sølgandeelø tabelø isua møramig chi palømeelaimburab lataguen gømmø.

An rrubigwan kemesra waminchib

⁸Kabe ðkan ishuuma anzheelø diez tøgagua, truyu kan trubøbene, kan lãmpara biløga, yawan paluunchib wetørramnegatig, tab lamønrraitarru? cha, ⁹Incha wetørrappe, nui trendø asielanba, nui ya buluelanba tulundzuna, trenchinrrun cha: “Kaguen nai an rrubigwan wetørrar cha, naba kasraaragun” cha. ¹⁰Inchawei kan kaig marøbig nui kaig mariilan isua møra, Tiusweimay lllirabene, Tiuswei ángelesmerai utugucha treetøwei kasraaranrrun— cha trendamønrrun.

Kan nusrkai chi tøgagúigwan maramgaig marøbigwan kemesra wamindig

¹¹Jesúsbe katø trenchibig køn:
—Kan møg pagatø nusrkalø tøgagúibe, ¹²wendiibe møskawane trenchibig køn cha: “Nai møskai, nan keta tranig naimburab gønrrabigwan pirishirra” cha. Inchen møskaimbe chi tøgagúilan nømun pirisha, tranen, ¹³mam gwalømyutø tru wendø nusrkaimbe nuimburabigwan kerrigu tulisha, yabsrø katøgan birausrømay ya, trusrø chigøben kaig marøbyutø patsø binishibig køn cha. ¹⁴Inchen nui anwan yandø chab patsøgøbenba, tru birausrømbe chutøgucha parøbe truba nuig arruben, nune yandø palabig arrub mendabig køn cha. ¹⁵Inchen tru birausrø kan møweinug maramig lanrrab ibene, truike nui kuchimera waraisrø, kuchi ashib meganrrai ørøbig køn cha. ¹⁶Inchen nøbe tru kuchi maig mamimeran øska mainrrabna isuben, nune muguen chi srørrmeelø gøn cha. ¹⁷Inchen nøbe gatøle isua mørabe trenchibig køn cha: “iKan nai møskawei yau marøb melabeløbe mamig yeeg nørø uncha tøgagøben, trune nabe yu parøgwab kwamønrrun! cha. ¹⁸Trembe nai møskawei yamay gatø kurrab ya, nune trendamønrrun cha: ‘Nai møskai, Tiusweimburappa, ñuimburappa kalø mara basrar cha. ¹⁹Møimbe yandø kan ñui nusrkain gúi

lataig tɔgagɔmgaig kur cha, ñui marɔb melabelan lataitɔwei
tɔgagɔrra' chinrrab tan" cha. ²⁰Incha mɔskawei yamay ib
mendabig kɔn cha.



San Lucas 15.20

'Inchen mōskaimbe yab arrubendø, nebua asha, kan nai unan yeekkucha nebutamab lastima ashabe, katønrrab lula, irab, muchab indan cha. ²¹Inchen nusrkaimbe mōskawane trendan cha: "Nai mōskai, Tiusweimburappa, ñuimburappa kalø mara basrar cha. Møimbe yandø nai nusrkain gøn cha wamig kōnrrabgaig kur" cha. ²²Inchen nui mōskaimbe nui karuig mendig melabelan wama, trendan cha: "Kenanamelan mas tabelan petø wesrua kenanøb, tasigu surtigas pasrøb, alpargatis keetøsrøb inday cha. ²³Incha tru ø tsal-lanin toron srua amrrua, kweetsay tan cha. Incha fiesta marøb, mab kasraaragun cha. ²⁴Kaguen i nai nusrkaimbe kwaig lataig kua, katø øsiirain gøn cha, trubig lataig kuigwan katø wetørrar" tan cha. Incha fiesta marøb mendabelø gøn cha.

²⁵'Inchen tru mayor nusrkai tru trau uñibiibe arrua, ya bulu pub guabe, truba may wanrrøb, palø ichib, katø pailab gúi mōrabe, ²⁶truyu kan mōigwan gøsrøn karuindiig megabigwan wama payibig køn cha: "¿Chinchibrren gøh?" cha. ²⁷Inchen truiibe trenchibig køn cha: "Ñui nuneg puben, ñui mōskaimbe tru tsal-lanin toron kweetsingarun cha, kaguen chigucha gømø, tabig ka øsig puben." ²⁸Inchene mayor nunebe namaptø, kebarrumønrrab inchen, mōskaimbe webya, kebattraí truba inchibig køn cha. ²⁹Inchen nøbe mōskawane trendan cha: "Yamba nabe ñun yeeg yam bila chu uragucha ñi maig karuigwan mōra marøb megaben, trune nane managuen kan cabro-unøtøguen ketømíig køn cha, nai linchibeløba fiesta maramig. ³⁰Trune mōimbe ñui nusrkai ñui anwan kaig ishumburmeraba chab patsøga pubene, ñibe tru tsal-lanin toron kweetsin gøn" cha.

³¹'Inchene mōskaimbe trendan chibig køn: "Nai nusrkai, ñibe chu uragucha naba waben, na chigurrimbunø chi tøgagúibe ñuiwein gøn cha. ³²Trune ñui nunebe kwaig lataig kua, katø øsiirain gøn cha; trubig lataig kuigwan, katø wetørrar cha. Treekkurri mōimbe fiesta marøb, kasraaramibe söl gøn" dan— cha, trenchibig køn Jesúsbe.

**Iibe tru chi købigwan ashib tsunrrai trarrig söl
marmíigwan kemesra wamindig køn**

16 ¹Incha gatø Jesúsbe nui kusrenanøb pera uniilan trenchibig køn:

—Kan pua møg nui chi købigwan ashib tsunrrai trarrig tøgagøbig køn cha. Indiibe mōiløgøsrøn tru pua mōwan trencha

eshkanrrab ambubelø gøn cha: “Tru ñui chi købigwan ashib tsunrrai trarriibe ñi chi tøgagúigwan ke ka yandø chine marøb ka patsøgøb tsun” cha. ²Inchen tru pua mөөbe tru ashib tsunrrai trarrigwan wamabe, trenchibig køn: “¿Chigúindørre ñune øyeeg waminchib gøh? cha. Trube mөimbe, ñi nai chi købigwan ashib tøgagúigwan nan lutøgurri eshkarra tan cha. Kaguen yandø nai chi købigwan ñibe ashib tsumibe mas kaanrrab gøn” cha. ³Inchen tru ashib tsunrrai trarrinabiibe nuinetø treeg isubig køn cha: “¿Nan øyeegwan martrai tranøbig tru maramelan yandø nan kerrabene, trube, mөimbe chi maramerah? cha. Yandø kwallchabgaig kur cha. ‘Chigøben kettra’ cha, miab unamibe korig køtan cha. ⁴Nan yandø ashib tsumønrrai weguchene, mugøben nөmui yamerayu nan wamab utønrrai, mөimbe si, nabe chi maram gúi asha basrar” tan cha.

⁵Inchabe nui ashib karubigwan ulø misrarwan kan gan wama, srøsriigwane trencha payibig køn cha: “¿Nai ashib karubigwan ñibe maya ulø gugu?” cha. ⁶Inchen nøbe: “Olivo aceite cien galones ulø gur” chiben, tru chi maramigwan ashib tsubiibe: “Ñui ulø misrig pörin guilgawan cha chiptinchibig køn. Petøzhiitø wamisrøb mөimbe cincüentaindiig kørørørøb pørøptinchi” tan cha. ⁷Incha gatøganune: “¿Ñibe maya ulø gugu?” chiben, nøbe: “Tirigu cien cargas ulø gur” chiben, tru maramigwan ashib tsubiibe: “Ñui ulø misrig pörin guilgawan utørra chibig køn. Mөimbe ochentaindiig truyu pør” cha. ⁸Inchen nui ashib karubiibe tru chi købigwan ashib tsunrrai trarrig maig maramigwan marmíigwane ke chi marmdiig køtasha ashib megawa marin gúi ashabe, kan trengucha mөг isua marøbig kønrrab tan cha. Pøs yu pirauigwandø isum misaamerabe nөm treeløtø misrөppe, purø mөг isua marøbelø gøn chibig køn, toryuelai ureemera lata gөmøtø.

⁹Nabe ñimune trendamønrrun cha: Yu tabig kөmө birau ñim an tøgamisriiløtøga misaamera asiimeelan asiilø mara tøgagønrrab inday cha. Treeg maren, ñimui tru chi tøgagúilø chab patsindøgucha, ñim managatig purramnug srөmbalasrөmbe nөm ñimun utønrrabelø purrønrrain cha.

¹⁰Inchen lamøtiigu sөл marøbiibe nuwangucha treetøwei sөл martrun chibig køn. Inchen lamøtiigu sөл marmíibe nuwangucha treetøwei sөл marmønrrun cha. ¹¹Inchawei yu pirau chi købig tabig

kòmígwanguen ñim maig maramigwan səl asha marmeelane, ÷mas tru newan tabigwane ashíb tøgagønrraimbe ñimune mu rraniaasamø? cha. ¹²Ñimuín gømíig pegwanguen ñim chi tab asha marmeelane, ÷mas ke ñimuyasig tøgagønrraimbe mu rraniaasamørra? cha.

¹³'Kan karuindiig megabiima muguen pailanbabe tab mara rranrrab gaimanrrun cha. Kaguende kanune tsalø ashippe, kanune undaaranrrun cha. Kanune chiyugucha truba tab mørøb megappe, kanune kaashib webinrrun cha. Inchawei Tiusweimburabigu marøb pasrønrrab isumba, anweimburabigu marøb pasrønrrab isumba inchibiibe martrab gaimanrrun cha, pabaløbabe.—

¹⁴Inchen fariseosmera anwane ke chinchimmørø inchib undaarabelø iigwan kerrigu mørøb pønrrøwabe, Jesúsuan indzatø ashen, ¹⁵Jesúsbe trenchibig kòn:

—Ñimwein gøn cha, misag malaube ñim ñimasiitøwei söl gandø amønibelø tabelø misrøb pønrrabeløbe. Trune Tiusbe ñimui manrrømerayu chi isuilan asan cha. Kaguen møguelø purø tabig asønai indigwane, Tiuswein gabyube ashikken gønrrabgaig trømbøig kòn cha.

**Maig maramigwan martrai Moisés
pøriiba, Tius nø ashíb karub waiba**

¹⁶'Maig maramigwan martrai Moisés pørigwanba, Tius maig karuigwan eshkabelø kusrenaniilanbabe Juan arrub gwalømgatig møra maramig købig kòn cha. Inchen tru uraskurrimbunøbe Tius nø ashíb karub waigwan tabig srø wamwan eshkab kusrenanen, mayeeløba kebamrrab tranrrabelø gøn cha.

¹⁷'Srømbalaba, pirøba pønrrabelø pinamikken chigucha gømuben, trune tru maig maramigwan martrai Moisés pørigu maya lamøzhig bønrrabikken ka yandøbe, purainrraamøn chibig kòn, Jesúsbe.

Keeba, sraimba petiyamumigwan waminchib

(Mt 19.1-12; Mc 10.1-12)

¹⁸'Mu møøtøgucha nui srawan kucha, tarømisra, katøganba kasharabiibe, itølulan cha. Inchen gatø tru keg kucha ishuuba kasharabiibe, katø treetøwei itølulan— chibig kòn.

Pua mөөba, Lázaroba

19Katø Jesúsbe trenchibig køn:

—Kan truba pua mөг købig køn cha, larrø tab yalø bigøzheelø kemba, linotøga mariilø nuweyelø kemba, kwalømmørig purø tab fiestamera maramba inchibig. 20Inchen gatø kan truba waacha mөг Lázaro taibe, asru pisrøtø netsaig chu uragucha puaigwei yau wambig kerruinug yaskabu wamisra, 21tru waachabe tru puaigwei mishatsigugurri kørriitøga øska mainrrabna isuben, trune pisrømerane werameratøø kemalla, nerab gøbelø gøn cha.

22Indiibe kan gwaløm tru waachabe kwaben, purø tabzhiisrø Abrahamba wanrrai ángelesmera pera ambubelø gøn cha. Inchen tru puaikkucha kwaben, sørabelø gøn cha. 23Inchen tru puaibe tru kwabelø amba møra melainug purø rrømbøig kui megawa, kurraasha, yabgurri Abrahamwanba, Lázaronba purrai ashabe, 24trashibig køn cha: “Abraham, merrabsrø nai møskai, nan lastima asha, Lázaron ørtra chib, nui tasig-unandøguen piyu keguana, nai niløwan sømartrab attrai. Kaguende nabe yu i nag naarabigu mumaygucha gømui purø rrømbøig kui megar” cha. 25Trendaingucha Abrahambe trenchibig køn: “Nusrkai, ñiguen isu cha. Ñi pirau øsig tsub urasbe ñibe tabiitø, tabiitø utøben, Lázarobe treetøwei kaitø, gaitø utig køn cha. Møimbe Lázarobe yube chi isumgaig tabig wamig utøben, ñibe mumaygucha gømui purø rrømbøig kui megan cha. 26Treeg køben katøgucha, namuimba, ñimuimba tøbøtag kan purø rrømbø umbu gulli pasran cha. Yugurri ñimuimay ambug kui inchibelø puramrrab gaimabwei, katø ñimuinukkurri namuimay purørrug kui inchibelø kaimabwei inchai.”

27Inchen tru puaibe trenchibig køn: “Treeg købene, trube, Lázaron nai møskawei yamay inrrai ørtra cha. 28Trusrø nunelø trattøgatø tøgagur cha, nøm isua gønrrai truilan waminchai, nømgucha yusrø mumaygucha gømfíg purø rrømbøigumay amrrumønrrain” cha. 29Inchen Abrahambe trenchibig køn: “Nømbe Tius maig karuigwan eshkabelø pøriilan gøben, Moisés pørigwan gøben tøgar gøn cha. iTruilan mørbash!” cha. 30Inchen tru pua mөөbe trenchibig køn: “Nai møskai Abraham, kah, treeg kømøtø, møikkøben nømuimay kwailai utugurri kurra ibenesi, nømbe nømui kaig mariilan isua møra, Tiusweimay lliiranrrun” cha.

³¹Inchen Abrahambe trenchibig køn: “Moiséswanba, Tius maig karuigwan eshkabelanba, truilanma mormuibe, kwailai utugurri møikkøben katø øsiiraingucha mana gørenrrab gø” tan— cha, Jesúsbe trenchibig køn.

Kalø marigwan ulø baymumigwan eshkabig

(Mt 18.6-7, 21-22; Mc 9.42)

17 ¹Jesúsbe nui kusrenanøb pera uniilan trenchibig køn: —Chine chinetø iløsrkøb kegørrørskøb attrabigwane arrumønrrai chinchka katamgaig køn cha. Inchendø imøg waacha! tru kaigwan nø bera mara kebenøsrkøbigweimbe ikan maig kuaasamørra! cha. ²Trembe kan tirigu guitsig nu srugwan naashigu iløstra, mar umbusrø kegutsig kuinguen søl gøbsruinrrun cha, i shushmeran kaig mara køgørrørskøbgunrriibe. ³Inchawei ñimdøwei ashiptø guy cha. Ñui nuneg ñun chigøben kaig marene: “Ñi øyeeg marmumbala” cha, alegau, chibig køn. Inchen nø nui kaig mariilan isua møra, Tiusweimay llirabene, ñibe trunun yandø mas ulø baymønrrab, pesannau cha. ⁴Mawawan nøbe katøle, gatøle siete nebumnegatig ñun kaig mara, tru kaig marimørig ñun: “Øyeeg maramgaigwan marar” chib arrubene, ñibe trunun mas ulø baymønrrab, yandø pesannamig køn— cha, trenchibig køn Jesúsbe.

Isubigwan nainuutø pasra tøgä bønrraibe maramburab martrun

⁵Jesús nøashib karua øriiløbe nun trenchibelø gøn:

—Namui isubigwan ñuinug mas tøgä melaigwan nemartra— cha.

⁶Inchen Señorbe trencha løtabig køn:

—Ñim kan murtasa yellburaptiitøguen isubigwan nainug pasra tøgä gúimbe, i sicomoro tusrwan: “Yugurri ucha, maryu ellgwawa basrambu” chibene, tusrbe maig chiben mørøbsruinrrun cha.

Karuig mendig megabig chi maramelø

⁷Ñimma møikkøben, kan karuindiig megabig tøgäguä arab uña, traugurrin gúi, kabe ubisha ashib uña gúi pubene: “¿Puraarrua, kabe yusrø manrrab wamisr” chinrraitirru? cha.

⁸Treeg chimøtø: “Nai mamigwanmerrig nena, pala itøgueigwan kewa, pørønawa, na chab mab, chab mutsamnegatig chi palain gúindø purørtrab ashib pasrau cha, treebe chinrrun cha. Incha trugurrimbe si, ñigucha mab, muchib inchig” chinrrun cha.

⁹Kabe nui karuindiig megabigwanma nò maig karuigwan maren, ìtruburò ‘ungwa’ chibelò gúitaru? cha. ¹⁰Ñimgucha treetòwei Tius maig karuigwan kerrigu marabe, trenchinrrigay chibig kòn: “Nambe mendig melabelò chiguen trengatig marmeelò guer cha. Kaguende ke maig karuizhigwandò nebua marer”— cha.

Diezelò asr trerab gwanrrò tògarwan Jesús tamaròb

¹¹Jesús Jerusalénsròmay ippe, Samaria biròwanba, Galilea biròwanba pureb maywan pureb ya, ¹²kan yamera tsitsò bònrrabnug pubene, móguelò diezelò lepra gwanrrò asr òrò trerabig tògar katònrrab werruppe, werrubendò, yaptò pònrramisra, ¹³trashibelò gòn:

—ìJesús, ñi Kusrennòbig, namun lastima ashcha!— chib.

¹⁴Inchen Jesús ashabe, trenchibig kòn:

—Judíosmerai sacerdotesmeran eshkanrrab ambay— cha.

Inchen nòm ambub pònrramnetò nòmui kwanrròbe tammisra, chishmisrikken gòrròmisròbig kòn. ¹⁵Inchen mòikkòsròn nun chishmisrin gúi ashabe, truba mur trashib Tiuswan truba tabig waminchib katò arruabe, ¹⁶Jesúswei merrab tòmbònsra ‘ungwa, ungwa’ chib malòwan piraugatig utsòbasròbig kòn. Tru mòòbe judíoguen gòmòtò, samariasriig kòbig kòn. ¹⁷Inchene Jesúsbe trenchibig kòn:

—ìKwanrròwan chishmariilò gòrròmisròbelòbe yamba diez kòmmòrgòppèh? cha. ìNueveelòbe chu ambah? cha. ¹⁸ìMu gatògan mòikken Tiuswan maya nuguen tabig kòn chib waminchab arrumuben, i peg birausriitò Tiuswan ‘ungwa’ chinrrab arru chindah?— cha.

¹⁹Incha tru mòwane trenchibig kòn:

—Kurra, inrrò cha. Kaguende ñui isubigwan nainuutò pasra tògagúikkurri tabig kòrròmisran— cha.

Tius Nò ashib karub wainuguibe mòì ya pasrabguen indan

(Mt 24.23-28, 36-41)

²⁰Fariseosmera Jesúswan Tius nò ashib karub wainuguiibe chu ura bunrrerah cha, payen, Jesúsbe trencha lètatabig kòn:

—Tius nò ashib karub wainuguig publiibe kaptòga ke asha gònrrai attrabikkucha gòmòn cha. ²¹Kabe: “Yu pasran” chimòwei: “Uyu pasran” chimòwei inchun cha. Kaguén Tius nò ashib karub wainuguiibe ñimui umbuguen basran— cha.

22Incha nui kusrenanøb pera uniilane trenchibig køn:

—Na, Møg Misra Arrubig ñimui utu unin gwalømmera, katø kan gwaløzmzhiitøguen pumønrrabmab, ñim isum gwaløm attrun cha. Inchendø treebe asamig kaanrrun chibig køn. 23Ñimun: “Yu pasran” tantø: “Uyu pasran” tantø indingucha, ashchab ammøwei, mendig ammøwei inchigay cha. 24Kaguen kan palaig bilabig kandarø srømbalasrøngurri katøgandarøsrø kebilab lataitøwei, tru Møg Misra Arrubig arrub gwalømbe treeg kønrrun chibig køn. 25Inchen treeg bumøwatøbe, nabe chigøben marinab, kaashib indig kømig nebunrrun cha, mõi misaamera. 26Noé tsub gwalømmerawan maig purayaibe tru Møg Misra Arrubigwein gwalømmerawangucha treetøwei purainrrun cha. 27Misaamerabe chi isumø mab, muchib, kasharab, kasharanøb inchib gúig køn cha, Noé nui nu barcoyu kebib gwalømgatig. Inchen sre kwarømíig pub menda, mayeeelanba chab pinisaig købig køn cha. 28Katø Lot tsub uras chigucha treetøweim burayaig køn cha. Misaamerabe chi isumø mab, muchib, penab, yanøb, ellmarøb yamera marøb inchib gøbenba, 29Lot Sodoma ciudayugurri yandø webibene, srømbalasrøngurri naaba, azufreba sre bua, mayeeelan patsø binisaig købig køn cha. 30Na, Møg Misra Arrubig kenamisrøb gwalømgucha treetøwein gønrrun chibig køn.

31’Tru gwalømbe ya bala wambig wabiibe, yaambu chigøben tøgaguabe, wesranrrab kørraarrumøta cha. Inchen mõikkøben trau uñibiibe, yamay arrumøta cha. 32Lotwei srawanma ñimguen isuy chibig køn. 33Inchen mõikkøben chigøben køben kwamønrrab inchibiibe pinab pinamig nebunrrun cha. Trune tru kwawa pinabiibe nui øsig kømigwan esegawa tøgagønrrun cha.

34’Inchawei nabe trendamønrrun: Tru arrub yembe pailø kan camayutø kib warøben, kane pera yaig køben, kane kørømarig kønrrun cha. 35Katø ishumburmera pailø kitsøsrugu kichib gøben, kanune srua iben, kane kørømarig kønrrun cha. 36Møguelø pailø trau warøben, kane pera yaig køben, kanune kørømarig kønrrun—cha, trenchibig køn.

37Inchen iigwan mørabe, nømbe payibelø gøn:

—¿Señor, øyeebe churre burainrrerah?— cha.

Inchene Jesúsbe trencha løtabig køn:

—Kwaig chu tsubene, truyu kallinasumera tulundzunønrrun—cha.

**Maig kønrrabigwan asha marøb wabigwanba,
piudanba maig indigwan waminchibig**

18 ¹Chu urastøgucha Tiusba wamindamigwane elachib kullaaramø melamig truba palabig køn chinrrab, Jesúsbe nui kusrenanøb pera uniilan ‘øyeeg lataitøwein gøn’ cha, kemesra waminchib ²trenchibig køn:

—Kan puebloyu kan juez wabig køn cha, truipe: “Tiuswan gørmøwei, ni møguelan naimburab gømøbashtømab” isubig. ³Inchen tru puebloyutøwei kan piudagucha wabig køn cha. Truipe tru juezweimay trenchinrrab arruptø arrubig: “Nan kalø marøbigwan maig maramigwan tamara guettra” chib. ⁴Inchen tru juezbe kan maya yana gøsrøngatig ke mørøg kømui inchibig køn cha. Inchabe yandø truipe treeg isubig køn cha: “Nabe Tiuswan gørmøwei, ni møguelan naimburab gømøbashtømab isubig kuagucha, ⁵i piudabe ke menrra bub llirab, ke pesrølig inchib ke katø gatø arrumønrrai, ka tamara rranrrab isur” tan— cha.

⁶Inchabe Señorbe trenchibig køn:

—Tru sølgandø tabigwan marmø juezken, nø øyeeg taigwan möray cha. ⁷¿Inchawei Tiusbe nuindø gønrrai lawa wesruilø yem gwaløm nun miabelane, nømuyasig sølgandø maig kønrrabigwan marøb purømisrmønrraitarru? cha. Kabe ¿muniitø, muniitø melønrrai inchautah? cha. ⁸Pøs nabe trendamønrrun cha: Tiusbe sølgandø maig kønrrabigwan petø tamara guettrun cha. Inchen treeg køben, na, tru Møg Misra Arrubig yu piraumay katø arrub gwalømbe ¿isubigwan nainuutø tōga misag pirau gatøgucha wetørranrrautah?— chibig køn.

**Chigøben tōgagúimburø an utab wabigwanba,
Fariseowanba kemesra wamindig**

⁹Møiløgøben nømdø sølgandiig tabelø guermab isua, katøganelane kaashibelaimburab Jesúsbe ‘øyeeg lataitøwein gøn’ chib kemesra waminchib trenchibig køn:

¹⁰—Pailø møguelø Tiuswei yau Tiusba waminchab ambubelø gøn cha, kane fariseo gøben, kane romasreelayasig an utabig.

¹¹Tru fariseobe pasramisra, øyah chib Tiusba waminchibig køn cha: “Nai Tius, ungwa, ungwa chib, kaguen nabe kanelø lata niliig kømøwei, kalø marøptiig søl marmíig kømøwei, itøluløptiig

kòmøwei, ni i an utabig lataig kòmøwein gur cha. ¹²Nabe truneyu pa gwaløm ayunab, na chi tøgagúigugurri diezmørig kan gan tranøb inchibig kur” chib. ¹³Trune tru an utabiibe wendausrøndø pasramisra, ni nui kabmeranguen srømbalaneb neeshig kømui inchib, nui pechondø kurrøb, trenchibig køn cha: “Tius, nan lastima ashcha chib. Nabe kaig marøbig kur” cha. ¹⁴Inchawei nabe trendamønrrun chibig køn: Tru an utabiibe nui yamay katø ippe, Tiusba chi kaig kømíig lataig Tius tabig kørømarig yan cha. Trune fariseobe treeg kømø yan cha. Kaguene møikkøben nøasiitø ‘nuig kurmab’ isubigwane ka kørig martrun cha. Inchen nøasiitø ‘nuig kurmab’ isumíigwane ‘i møøbe si, nuig køn’ daig kønrrun— cha.

Uregwan Jesús mayanguen tab gúilø gønrrain chib

(Mt 19.13-15; Mc 10.13-16)

¹⁵Ureezheelan chigucha Jesúsweimay srua amrrubelø gøn, nø estsartrai. Inchen nui kusrenanøb pera uniilø trunun ashabe, srua amrrubelan namøben, ¹⁶trune Jesúsbe ureemerane nuimay wama, trenchibig køn:

—Ureemerane merømø, naimay ka amrrubasay cha. Kaguende Tius nø ashib karub waibe nøm latailaiwein gøn cha. ¹⁷Inchawei nabe ñimun cierton trendamønrrun chibig køn: Møikkøben Tius nø ashib karub wainuguigwan kan unø lataitøwei utaptinchimíibe managuen truyube kebinrraamøn— cha.

Kan pua møg Jesúsba waminchib

(Mt 19.16-30; Mc 10.17-31)

¹⁸Kan møikkøsrøn chi maramigwan nø ashibiibe Jesúsban trencha payibig køn:

—Kusrennøbig tabig, ¿managatig øsig kømigwan Tius tranig tøgagønrrappe, nabe chi maramerah?— cha.

¹⁹Inchen Jesúsbe trenchibig køn:

—¿Chindimba nane tabig cha wamøgu? cha. Tabiibe kandø gøben, truike Tiustø gøn cha. ²⁰Tius maig maramigwan martrai pønrrailane ñibe yandø ashibig køn cha: “Itølulmøwei, kweechimøwei, nilømøwei, katøganelaimburab isa waminchimøwei, ñui usri mōskawan maig købash inchimø, tab indamig køn” tailan.—

²¹Inchen tru møøbe:

—Nabe iilane kerriguh matsinø-unøgurri marøbig kur— chiben,

²²Jesús iigwan mørabe trenchibig køn:

—Katøgucha kan chigøsrøndø palan cha. Ñui chi tøgagúigwan kerrigu yana, waachameran pirishi cha. Treeg marabe, srømbalasrømbe chigurrimbunø tøgagønrrabguen cha. Trugurrimbe arrua, nai mendig amø— chibig køn.

²³Inchen tru møøbe iigwan mørabe, truba isui inchibig køn, kaguen truba puaig kua. ²⁴Inchen Jesúsbe nun ashabe, trenchibig køn:

—iTius nø ashib karub wainug puarmera kebambamibe purø murig køn! cha. ²⁵Kan camelloquen tsusain gal rrabyu illmø larrayamdiig køben, kan puaibe Tius nø ashib karub waisrø kebinrrab gaimanrrun— cha.

²⁶Inchen mørøbeløbe trenchibelø gøn:

—Trube, treeg købene, ðkaigyugurrimbe mu gúi wesraig kønrrautah?— cha.

²⁷Inchen Jesúsbe lötappe:

—Møguelø martrab gaimaigwane Tiusbe sí, martrun— chibig køn.

²⁸Inchen Pedrobe trenchibig køn:

—Au, nambe namui chi tøgagúilan elacha, ñui mendig amrruig køn— cha.

²⁹Inchen Jesúsbe trenchibig køn:

—Pøs nabe ñimun cierton trendamønrrun cha: Møikkøben nui yawan, srawan, nunelan, møskalan, uregwan Tius nø ashib karub waigweimburabigwan isua elachibiibe, ³⁰møi yu piraube øyeetøguen gømø, mas purø nu uta tøgagua, kansrømbe managatig øsig kømigwan utønrrun— cha.

Jesús katøyug nø kwamigwan eshkaab

(Mt 20.17-19; Mc 10.32-34)

³¹Jesús nui doce kusrenanøb pera uniilan nøørø wamabe, trenchibig køn:

—Au, nambe Jerusalénmay nebambub amber cha. Trusrømbe tru Møg Misra Arrubigweimburab Tius maig karuigwan eshkaabig pøriibe kerrigu maig taig punrrun cha. ³²Kaguende nune judíos kømeeelan tranen, indzaashib, tsalø wamab, illimbi tuchaashib,

³³ichaguchib srua gua, yandø kwetchun cha. Inchendø pøn gwalømyube katø øsiiranrrun— chibig køn.

³⁴Inchen nømbe trunun mandø gúnguen mormøwei, ni wamindigwan chi tainguen mormøwei inchibelø gøn. Kaguende iig wamindiiløbe nømune sörin basrøben, nømbe ni chiwan dainguen mormeelø gøn.

Jesús kan jericósriig kabgaigwan tamarøb

(Mt 20.29-34; Mc 10.46-52)

³⁵Jesús yandø Jericó ciuda bub lutau ibene, may menda kan kabgaig ‘anzhig kettra’ chib, miab wawabe, ³⁶misag truba nu puraambi mørabe, kabgaibe:

—¿Chindah?— cha, payene:

³⁷—Nazaretsrø Jesús pureb yan— cha, trenchiptinchibelø gøn.

³⁸Inchen kabgaibe trenchib trashibig køn:

—iJesús, merrabsrø Davidwei Nusrkai, nan lastima ashcha!— chib.

³⁹Inchen tru merrab ambubeløbe niløtø wanrrai namingucha, nøbe trenchib mas mur trashibig køn:

—iMerrabsrø Davidwei nusrkai, nan lastima ashcha!— chib.

⁴⁰Inchen Jesúsbe pasramisra, srua amrrungaruben, nuim bulu pubene, trencha payibig køn:

⁴¹—¿Na ñuyasig chi maramig baløta?— cha.

Inchen kabgaibe trencha løtabig køn:

—Señor, nai kabmera ashibig misrimbe gøtan— cha.

⁴²Inchen Jesúsbe nun trenchibig køn:

—iAshibig misr! cha. Ñui isubigwan nainug pasriitøga tabig kørørmisran— cha.

⁴³Inchen tru urastø kabgaibe ashibig misra, Jesúswei mendig Tiuswan truba tabig waminchib iben, mayeelø iigwan ashibeløbe nømguicha Tiuswan tabig waminchibelø gøn.

Jesúsba, Zaqueoba

19 ¹Incha Jesús Jericó ciudayu kebya, truyu pureb ibene, ²kan truba pua møg romasreelayasig an utabelan nø asha garubig, kan Zaqueo taig, ³Jesúsban truba ashig kui inchibig wabig køn. Inchendø menrra misag køben ashchab gaimabig køn, Zaqueobe lamøtø møg kua. ⁴Incha merrab lula, Jesús purayam

buluwan, kan sicomoro tusryu ashchab nebiben, ⁵Jesúsbe tru buluwan puraya, palabunø neeshabe, trenchibig køn:

—Zaqueo, mallatø pinaamø cha. Kaguen mõi ñui yau korrømisram gønrrab gøn— cha.

⁶Inchen Zaqueobe mallatø pinaarrua, Jesúswan truba tab gúi inchib wamab utabig køn. ⁷Inchen iigwan ashabe, mayeeløba Jesúswan trenchib nømdø namig mullib mendabelø gøn:

—Kan kaig marøbigwei yau korrømisrtrab yan— chib.

⁸Inchen Zaqueobe pasramisra, Señorwan trenchibig køn:

—Au Señor, waachameran na kerrigu chi tøgagúigwan tøbøtagwan trannrrab cha. Inchipa na møigwan gøben isatø menrra utab, na kalø marig købene, trube, gatøburø pibmaybatø menrra tranamønrrun— cha.

⁹Inchen Jesúsbe nun trenchibig køn:

—Kaigyugurri wesrailø gømig mõi yu yau puin gøn cha.

Kaguende i mökkucha Abrahamwei misagugurrindøwein gal-laweig køn cha. ¹⁰Kaguende tru Møg Misra Arrubiibe trubigwan lanrrappa, kaigyugurri wesranrrappa arrig køn— cha.

Anmera diez trubigwan kemesra wamindig

¹¹Jesús øyeeg tailan misamera mørøb pønrramne, nøbe ‘øyeeg lataitøwein gøn’ cha, kemesra waminchibig køn. Kaguen nøbe Jerusalén pub lutau iben, nømbe Tius nø ashib karub wainuguiibe mõi mõi punrraitamab isubelø gøn.

¹²Inchen treekkurri Jesúsbe trenchibig køn:

—Kan møg, truba tab misagugurri arrubig, yabsrø katøgan peg birausrø ‘rey gønrrai mara gørrømarig kønrrab ibig køn’ cha, katø nuim biraumaytøwei attraptø.

¹³Incha inrraptø nui karuindiig melabelan diezelan wama, kanun ganun kan gan an truba nuweyelø tranabe, trenchibig køn cha: “I anwan nemisrøb larrøbitchai marøb gønrrigay” cha, na arrumnegatiibe. ¹⁴Inchendø nuim birau misaamerabe tsaleelø gua, møilan gøsrøn nui wendautø amrrai wesrawa ørøbelø gøn cha, øyah chinrrigay chib: “Nambe i møwane namui rey gønrraimbe palain gømer” cha.

¹⁵Inchen treeg indingucha, nøbe Rey gønrrai mara gørrømarig, katøle nuimbiraumay arruabe, tru nui karuindiig melabelan tru nø an rraniilan, nuimay amrrungarubig køn cha, tru anwan

kan gan utabelø mayambatø mariitashchab ashchab. ¹⁶Inchen srøsriig arruabe trendan cha: “Nai ashib karubig, ñi nan kan anzhig traniitøgatø mōimbe diez nemarar” cha. ¹⁷Inchen reybe: “Øyambesin dan cha, nai karuindiig megabig tabig. Ñi lamøtiiguma ñi øya søl mariibe, mōimbe pueblomera diezwan karubig kōnrrai martrumøn” cha, trendan cha. ¹⁸Inchen katøgan karuindiig megabig arrubiibe trenchibig kōn cha: “Nai rey, ñi nan kan anzhig traniitøgatø mōimbe trattøgatø nemarar” cha. ¹⁹Inchen trunungucha trenchibig kōn cha: “Trube, ñigucha trattø pueblomera karubig kōnrrabguen” cha.

²⁰Inchen katøgan karuindiig megabig arruppe, trenchibig kōn cha: “Ñi, nai ashib karubig, ñiguen ash cha, ñui anwane kan pañeluyu pula ka esegawa tøgagur cha, ²¹pøs ñun kōrig kōben, kaguende ñibe chiwandøgucha chi chippe kandø chibig kuimba; pøs ñi pōnsrømubendø, ñi merrarrab; ñibe ñiashib ellgwaig kōmubendø, ellmarigwan tulishib, treeg inchibig kuimba.”

²²Inchen nōbe trenchibig kōn cha: “Karuindiig megabig larrø gaig, pøs ñi nan øyeeg kōn chib, treeg kōn daig kuig kōbene, trube, ñui trig maig wamindiitøgatøwei mōimbe ñun trubalawei nebunrrai maig kōnrrabigwan marar cha. Nabe chiwandøgucha chi chippe kandø chibig kui ashib, na pōnsrømubendø, na merrarrab; na ellgwaig kōmubendø, tulishib inchibig kui ashabe,

²³trube, maindi nai anwan bancoyumay srua ya, pasrambala tan cha, na katøle arrua, nai anwan nemisrigwanbañau utabsrubrainrrun” cha. ²⁴Incha truyu purrabelan trenchibig kōn cha: “Nune anwan kerrawa, tru diez tøgagwan tranø” cha.

²⁵Inchen nōmbe trendan cha: “Namui ashib karubig, truibe diezken tøgagøn” cha. ²⁶Inchen tru an rranøbiibe trencha lōtabig kōn cha: “Nabe trendamønrrun cha: Tøgagwane masken rranen, trune chigaigwane nui lamøtiig tøgagüigwanguen kerranrrun tan cha. ²⁷Incha tru nan tsaleelø nōmui rey gōmønrrai inchibelane yu nai merrab srua amrrua, kweetsay” tan— cha, trenchibig kōn Jesúsbe.

Jesús Jerusalén kebib

(Mt 21.1-11; Mc 11.1-11; Jn 12.12-19)

²⁸Igwan chab waminchabe, Jesúsbe Jerusalénmay ibig kōn.

²⁹Incha yandø Betfagéba, Betaniaba pueblomerayu tru Olivos Tun

daisrø, trusrø pub ambabe, nõbe nui kusrenanøb pera uniilø pailan
³⁰trenchib karua ørøbig køn:

—Ø pinrrøguesrø yamera tsitsø bønrrabsrømay ambay
 cha. Truyu puabe, kan burro muguen itøguaniimfig litsig
 wetørranrrabguen cha. Picha, yumay srua amrrunrrigay cha.

³¹Inchippa møikkøben: “¿Chinchab pichigue?” cha payene: “Señor
 palai indan” chinrrigay— chibig køn.

³²Inchen nui kusrenanøb pera uniiløbe amba, Jesús nømun
 maig taig treeg wetørrawa, ³³burron pichib pønrrøbenba, puarbe
 trenchibelø gøn:

—¿Chinchab pichigue?— cha.

³⁴Inchen nømbe:

—Señor palai indan— cha løtabelø gøn.

³⁵Incha Jesúsweimay srua amba, nømui kewagúilan burro-
 unøyu kaya, itøguanøsrøben, ³⁶Jesús pureb ibene, misaamerabe
 nømui kewagúilan maywan kayibelø gøn. ³⁷Incha yandø Olivos
 Tun lendesrø misrøb ambuppe, mayeelø tru nu sötø nui mendig
 amønibeløbe tru maramburab mariilan kerrigu asikkurri Tiuswan
 truba tabig wamab kasraarab trashib mendappe, trenchibelø gøn:

³⁸—iSeñor Tiuswei munchiyu Rey arrubiibe mayanguen tab
 gúig køn! cha. iSrømbalasrømbe mayanguen tab gúinrrun! chib.
 iSrømbalasrømbe tørguegwalmabig kuinrrun!— cha.

³⁹Inchen mø fariseosmera gøsrøn, tru misag utu pønrrabeløbe
 trenchibelø gøn:

—Kusrennøbig, ñui mendig amønibelan niløtø bønrrønrrai
 namø— cha.

⁴⁰Inchen Jesúsbe trenchibig køn:

—Nabe trendamønrrun cha: Iilø chi chimø, niløtø bønrrøbene,
 sruumeraguen trashinrrun— cha.

⁴¹Incha Jesús Jerusalén bulusrø pua, ciudawan ashabe, trunun
 isua, kishib ⁴²trenchibig køn:

—iChi isumgaig tab gøbig tøgagømigwan kan møin
 gwalømdøguen ñigucha nebua isuimbe gøn! cha. Inchendø
 truigwane møimbe ñi ashmønrrai sørin basran cha. ⁴³Kaguende
 larrø gaig kwalømmerra ñun puben, ñui ashig kømui inchibeløbe
 ñuim bötøgatan chamba mara, ambumay imay ñun kata
 kønøbashmønrrun cha. ⁴⁴Incha ñune pirau pøtiicha, tru ñui umbu
 warab misaameran kweechen, ni kan sruutøguen katøgan srug

balabe korrømisrmønrrun chibig kòn, kaguen ñi, Jerusalénbe, Tius kaigyugurri wesranrrab arrub uras ke ka arrua uni lataitø indikkurri.—

Jesús Tiuswei yawan chish marøb
(Mt 21.12-17; Mc 11.15-19; Jn 2.13-22)

⁴⁵Incha Jesúsbe Tiuswei yau kebya, truyu yanøb warabelan wambig webetab mendabe, ⁴⁶nømun trenchibig kòn:

—Tiuswei wamwan pørigube trenchibig kòn cha: “Nai yabe Tiuswan wamindi ya gòn” cha. Trune ñimbe nileelø warain rrab marin gòn— cha.

⁴⁷Incha Jesúsbe kwalømmørig Tiuswei yau kusrenanøbig kòn. Inchen tru sacerdotesmeran karubeløba, tru Moisés pørigwan kusrenanøbeløba, katø maya misagwan karubeløbabe Jesúswan mandø incha kwetsamdiig køtashchab labendø, ⁴⁸chinchaguen martrab gaimabelø gòn, kaguende misaabe mayeeløba Jesús wamindigwane purø tab møren.

Jesús karumburab karuig
(Mt 21.23-27; Mc 11.27-33)

20 ¹Kan gwaløm Jesús misaameran Tiuswei yau kusrenanøb, tabig srø wamwan eshkað pasrøbene, sacerdotesmeran karubeløba, tru Moisés pørigwan kusrenanøbeløba, misagwan karubelø kølli misaameraba kemallabe, ²nune trenchibelø gòn:

—Namun eshkarra cha: ¿Ñi mariilane mu garua basriitøgarre margu? cha. ¿Ñi øyeeg maramigwane mu garua bashta?— cha.

³Inchene Jesúsbe løtappe, trenchibig kòn:

—Nagucha ñimun kan chigøsrøn payrrab cha. Løtørray bøs cha.

⁴¿Misagwan Juan piu umbu ulsrøb uniibe srømbalasrøngurrin gúig kø chindah, kabe møguelainukkurrin gúig kø chindah?— cha.

⁵Inchen nømbe nømasiyaitø trenchib payiyab mendabelø gòn:

“Nam: ‘Srømbalasrøngurrin gúig kòn’ chibene, nøbe namune trenchinrrun cha: ‘Chindimba nune køremøgue?’ cha. ⁶Kabe:

‘Møguelainukkurrin gúig kòn’ chibene, misaamerabe mayeeløba namune sruutøga petønrrun cha. Kaguen misaabe Juanwane Tius maig karuigwan eshkaðig kui ke yandø tsabø asha tøgær gòn” cha.

⁷Incha nømbe trencha løtabelø gòn:

—Maig kuindøbeh— cha.

⁸Inchen Jesúsbe trenchibig køn:

—Trube, nagucha eshkamumønrrun cha, iilan na mu garuitøga marigwan.—

Kwallibelø larrø gailan kemesra wamindig

(Mt 21.33-44; Mc 12.1-11)

⁹Incha Jesúsbe misaameran pølbasa waminchib mendappe ‘øyeeg lataitøwein gøn’ chib kemesra iigwan waminchibig køn:

—Kan møg uvas tra mara, trugurrimbe nui misrigwan pirishinrraptø pirøwan katøganelan kwallchai tranabe, yabsrømay truba yana yan cha. ¹⁰Incha yandø lurramig puben, nui kan karuindiig megabigwan tru kwallchab utabelan tru kanbalø lurrigwan nøm trannrai karua ørøbig køn. Inchen treeg øringucha, nømbe nun kurragucha, chiguchagaig ørøbelø gøn cha. ¹¹Inchen puaike katøgan karuindiig megabigwan øren, truigwangucha tsalø wama, kurragucha, chiguchagaig inrrai øran chibig køn. ¹²Inchen puaike pønmay gønrrabyu katøgan øren, tru kwallibeløbe trunungucha kørriincha, truyugurri wambig weguchibelø gøn cha.

¹³Inchen yandø tru pirø buaike trendan cha: “¿Chindamer? cha. Nai undaaraig nusrkawan ørtrab tan cha. Nune inchippa chinchimubgun” cha. ¹⁴Inchen tru kwallibelø nun ashabe, nømdø trenchibelø gøn cha: “Pirøwan ketig utønrrabiibe iigwein gøn cha. Pirøwan namui martrab nune kweechigun” dan cha. ¹⁵Inchabe uvas traugurri wegucha, nune kweechibelø gøn cha.

¿Trube tru uvas tra buaike tru kwallibelane chi marttrerah? cha. ¹⁶Arrua, tru kwallibelane kweecha, tru uvas trawane katøganelan tranrrun— chibig køn Jesúsbe.

Inchene misamera iigwan mørabe:

—iManaguen kan trengatikkucha puraimuimbe!— chibelø gøn.

¹⁷Inchene Jesúsbe nømun ashabe trenchibig køn:

—Trube, treeg købene, ¿Tiuswei wamwan pørigu øyah chibiibe mandø cha rendah? cha:

“Tru ya marøbelø kaasig sruube katsiisrø pølbasa wayamig mas purø tab srukken misrin gøn” chippe.

¹⁸Inchawei møikkøben tru srug bala beñippe, pitis misrtrun cha. Inchen tru srug muim bala gøben peñippe, nune usrø tuindø martrun— chibig køn.

¹⁹Inchen tru uras tru Moisés pørigwan kusrenanøbeløba, sacerdotesmeran karubeløba tru ‘øyeeg lataitøwein gøn’ cha waminchippe nòmun guemesra wamindi mōra, Jesúswan igatø! mōi mōi kemørtrab inchendø, misaameran kōrig kui inchibelø gøn.

**Tiuswein gønrabigwane Tiuswan rranøppe Césarwein
gønrabigwane Césarwan rranøb**

(Mt 22.15-22; Mc 12.13-17)

²⁰Inchabe kan mōilan gøsrøn larønrrai ørøbelø gøn, sølgandø amønibelø misrøb, Jesús chigøben wamindigu kebenørska trumay kubenadurwei tasku purørtrab, nui mu mandamgaig mariitøga nø asha martrai. ²¹Inchabe nømbe payibelø gøn:

—Kusrennøbig, ñibe söl waminchib, söl gusrenanøb indi nambe ashibelø guer cha. Ñibe misaameran mumera gøtasha asha gusrenmø, Tiuswei maywan ñibe maig kusrenanamigwan cierton sölwan gusrenanøbig køn cha. ²²Trube, ðtru Roma maya misagwan karub wabigwan nam an pagaramig merig køh, kabe merømuig køh, chinderah?— cha.

²³Inchen Jesúsbe nømune ka kaig isuatørre inchib pønrrai ashabe, trenchibig køn:

²⁴—Kan anwan eshkarra cha. ðI anyu maløba, i munchi pøriibabe muin gøh?— cha.

Inchen nømbe trencha lötabelø gøn:

—Tru Césarwein gøn— cha.

²⁵Inchen Jesúsbe trenchiptinchibig køn:

—Césarwein gøbene, Césarwan rranay cha. Inchen Tiuswein gøbene, Tiuswan rranay— cha.

²⁶Inchen misagwei malau nø chi tailøyu chiyugucha kebenørkønrrab gaimabelø gøn. Tru nø lōtilan nømguen kwaara asha, niltøt gørrømisrøbelø gøn.

Kwailø gatøle øsiiranrrab gúigwan payib

(Mt 22.23-33; Mc 12.18-27)

²⁷Inchen mōiløgøsrøn saduceosmera Jesúswan ashchab amrrubelø gøn. Tru saduceosmerabe kwailøbe katøbe øsiiramønrrun chibelø gua, Jesúswane øyeeg chib payibelø gøn:

28—Kusrennøbig, Moisésbe namune øyeeg pøra korrømarig køn cha: “Møigwei nuneg køben kwawa, srawan urekkaig korrømarene, trube tru nuneebe piudaba kasharawa, nuneg kwabigweimburab ureg tøgagømig køn” chibig.

29”Trube, siete nunelø gøbig køn cha. Indiibe srøsriibe kasharawa, chi urekkaig kwaben, 30tru wendauikkucha tru piudaba kasharawa, katø chi urekkaitøwei kwaben, 31katø tru pøn gønrabyuigwangucha treetøwei nebuben, yandø soteeløba tru ishuuba kasharawa, møikkucha urekkar kwabelø gøn cha. 32Inchen yandø srabebe tru ishukkucha kwan cha. 33Pøs treeg købene, trube, tru kwabelø katø øsiirabene, ònøbe møigwei srain gønrerah? cha, payibelø gøn, tru sieteeløba nune srai mara tøgagúig købene.—

34Inchen Jesúsbe trencha løtabig køn:

—Møi yu piraube kasharab, katø kasharanøb inchibelø gøn cha. 35Trune tru kansrø kanmaytø kebamrrai tøgagúinabeløbe trunun nebub, katø kwabelai utugurri øsiiramigwan nebub incha, truiløbe kasharanrrab gømøwei, kasharanøb gønrabelø gømøwein gøn cha, 36kaguende nømbe katøle kwanrrabelø gømøwa. Pøs nømbe ángesmera latailø, katø Tiuswei ureemera gøn cha, kwabelai utugurri øsiirab ureg kua. 37Inchen tru tusr-unø naaraigu maig purayaigwan pøra basriguma, tru kwabeløbe katø øsiiranrrab gúigwan Moisésken kenamarig køn, tru Señorwan øyah cha wamappe: “Tiusbe Abrahamwei Tius, Isaacwei Tius, Jacobwei Tius køn” cha. 38Pøs Tiusbe kwailai Tius kømøtø, øsiguelai Tius køn cha. Inchawei mayeeløba nuimbe øsigueløtø gøn— chibig køn.

39Inchen møiløgøsrøn tru Moisés pørigwan kusrenanøbeløbe trenchibelø gøn:

—Kusrennøbig, ñibe sölwein dan— cha.

40Trugurrimbe yandø mas payrrab inchimeelø gøn.

¿Cristobe mui misagugurri arrubig kerah?

(Mt 22.41-46; Mc 12.35-37)

41 Jesúsbe trencha payibig køn:

—¿Misaabe chinchá Cristone Davidwei misagugurri arrub nusrkain gøn damig kønrrab gøh? cha. 42Kaguende Davidbe nøtøweinguen Salmoswan pørigu trenchibig køn cha:

“Señor Tiusbe tru nai Señorwane trendan cha:

43 ‘Nai kusrmaygatø wamisr cha,
ñui ashig kømui inchibelan ñi nebuna wamig na
pønramnegatig.”

44 Cristone Davidbe: “Señor” cha, øyeeg wamubene, trube,
¿mandøgurri Cristobe Davidwei nusrkain gønrrab gøh?— chibig køn.

**Moisés pørigwan kusrennøbelø nøm mailø gúilan Jesús
waminchib**

(Mt 23.1-36; Mc 12.38-40; Lc 11.37-54)

45 Maya misaamera mørøb pønrrøben, Jesúsbe nui kusrenanøb
pera uniilan trenchibig køn:

46—Tru Moisés pørigwan kusrenanøbelan ashiptø guy cha.
Kaguen nømbe kørabelø kewa llirab amønavig chullelø, penab
yanøb indiisrø maig købash kømø, truba tab wamønrrai indamigwan
chullelø gøn cha. Katø judíosmera tulundzuni yamerayube purø tab
purramdønug purrag kui indamba, katø lincha tabig mabyugucha
nørreelø purrainug purø tabigu purrag kui indamba inchibelø gøn
cha. 47 Katø piudasmeran nømui yameran kerrawabe, tabelø misrøb
ke ka yandø truba yana Tiusba waminchibelø gøn cha. Truiløbe møra
melamig mas nuigwan utønrrun— chibig køn.

Kan waacha piuda Tiusweyasig an rranøb

(Mc 12.41-44)

21 1Tiuswei yau an guebusrinug, puarmera an guebusrøb
gøben Jesúsbe ashib wabig køn. 2Inchen gatø kan waacha
piudagucha, øskø an pagatøtøh kebusri ashabe, 3Jesúsbe trenchibig
køn:

—Nabe ñimun cierton trendamønrrun cha: I waacha piudabe
mayeelø lataitøguen gømø, menrraguen rranan cha. 4Kaguen
mayeeløba nømbe undaigwandø rranen, trune nøbe waacha gøptø,
tru nui øsig tsumig tøgagúigwanguen kerrigu rranan— cha.

Jesúsbe Tiuswei yawan pinisaig kønrrun chib

(Mt 24.1-2; Mc 13.1-2)

5Møiløgøsrøn Tiuswei yau tru tab sruuzheelanba, chigøben
tabzheelø Tiusweyasig tranig pønrrabelanba, truilan waminchib
gøben, Jesúsbe trenchibig køn:

6—Iig ñim ashib gúigwan pinisam gwaløm attrun cha. Yube ni kan srukken katøgan srug balabe kørørmismønrrun cha. Kerriguba pøtiitsig kørørrun— chibig kòn.

Chigurrimbunø kòbig misaabañau patsam lutau chigøben kòb

(Mt 24.3-28; Mc 13.3-23)

7Inchene nømbe trencha payibelø gòn:

—Kusrennøbig, ìøyebe mana burainrrerah? cha.

¿Truilø ke yandø treeg purainrrabigwan asamibe chitø guenamistrerah?— cha.

8Inchen Jesúsbe trenchibig kòn:

—Ashiptø guy cha, ñimun peløsrkønrrain gømø. Kaguende møyilgøben nai munchiyu truba nu amrrua trenchinrrun cha: “Nabe truig kur” chib, katø: “Møi ya srabe gwaløm punrrabiibe lutau gòn” chib amrrubene, truilan mendig ammotay, chibig kòn.

9Incha ‘misaamera gatøgan peesø misaameraba purø rrømbøig kørig kømdiig kwayab kweetsiyab gòn’ chib; ‘misaamera tru biraueletøwei rrømbøig namig kurra kwayab gòn’ daig ñim wamindi mørabe, ñimbe kwarmøtay cha. Kaguende iilømerrigwei trendø treeg purainrrabigwein gòn cha. Inchendø katøgucha patsamibe ke møi møin gønrraamøn— chibig kòn.

10Inchabe gatø trenchibig kòn:

—Peg misaamerabe katøgan peg misaameraba kwayaben, katø rey karumburab ashib karuim birauelebe katøgan reywei misaameraba kwayanrrun cha. 11Trune pirø purø rrømbøig kònabelø arrumba, chu birausrøn gøben parø amrrumba, kaig kwanrrømera amrrumba inchen, kørig kømdiig chigøben arrumba, katø srømbalaserøngurrimbe chigøben truba nørreelø kenamisrøb inchun cha.

12Inchendø øyeelø arrumøwatø, ñimune kemørøb, larrø gaig marøb inchun cha. Katø ñimune judíosmera tulundzuni yamerayumay payib sruagønrrab srua ambamba, kailan keeri yau keera pønstramba inchun cha. Incha nagurrindø reymerai merrab gøben, karubelai merrab gøben srua amben, 13naimburab ñim wamindamig kørørrun chibig kòn. 14Ñimui manrrøyube øyeegwan isua bønrrønrigay chibig kòn, mandø løtamigwan ke kanmaytø isua tøgä bønrrønrrab inchimønrrab. 15Kaguen ñimun ashig kømui inchibelø mayeelø, nøm manchaguen løtønrrain gømøwei,

nøm ñimun purab waminchib kasrønrrain gømøwei, nabe ñimun muguen øyeeg waminchimuinrrunig wamindamig tranamønrrun chibig køn. ¹⁶Inchen ñimui mōskalø gøben, nunelø gøben, ñimui ñimmisaamera gøben, ñimui trendø linchibelø gøben, ñimun ashig kōmui inchibelan tranen, ñimun mōilane kwetchun cha. ¹⁷Maya misaabe ñimune nagurrindø tsalø indiilø gønrrabguen cha. ¹⁸Inchendø ñimui turyu kan busruuzhikken chi indiimfig kōnrrun chibig køn. ¹⁹Ñim chi arringucha melabig meløwabe, ñimasiitøwei ñimui mōsiimerane øsiguig wesranrrabguen cha trenchibig køn.

Jerusalénwan pinisaig kōmig

²⁰Jerusalén ciudawan bōtøburab suldautø tulsruig kui ashabe, petø pinisaig kōnrraitamab isua, ²¹Judea birau warabeløbe tunmerasrōmay wegørta lulay. Inchen ciudayu warabeløbe truyugurri webambamig køn. Inchen ciudayugurri yabsrø warabeløbe ciudayumay katø ammøtay. ²²Kaguende trømbøig mōra melønrrai maram gwalømmēra kōnrrun, Tiuswei wamwan pørigu maig taig kerrigu treeg nebunrrai. ²³İshumbur waachamera, tru gwalømmērawan patsø gwanrreelø, kabe muchib ureg tōgarmeraimbe maig kōnrrer! chibig køn. Kaguēn yu pirau purø isumdiig arruben, katø i misaameraimburab namig kōbig purø gørig kōmndiig attrab gøn. ²⁴Mōiløbe espadatōga kweetsiilø gøben, mōiløbe chugøben asiimø birausrōmay kemōra srua ambiilø gōnrrun chibig køn. Inchen tru judíos kōmeelø Jerusalén ciudawan mindishib itōlulrrun, tru nōmui treeg maram gwalømmēra patsamnegatiitø.

Tru Møg Misra Arrubig katø arrumig

(Mt 24.29-35, 42-44; Mc 13.24-37)

²⁵Inchen chigøben truba nørreelø kenamistrtrun nōsigu gøben, pølyu gøben, estrellamerayu gøben. Inchen pirau misaamera nōrrø bōnrrabiibe purø rrōmbøig isui inchun, mar purø rrōmbøig wanrrab mullib, trømbøig latøgushib gurrøben. ²⁶Katø misaamerabe yu pirau maig purainrrabelan isubiibah kōrig kōbiibatø pesannanrrun, kaguende srōmbalasrø purø nørreelø pōnrrabelan kōnøgøb sruagutsiilø gøben. ²⁷Inchen tru Møg Misra Arrubiibe maramburab maramig tōgaig purø nuig tōrguegwalmabig wañiyu arruben ashchun, chibig køn. ²⁸Inchawei

iilø pureb arrub mendøbene, ølgandø pønrramisra, kurraasay chibig køn. Kaguen yandø ñim kaigyugurri wesruilø gømig lutau gønrrun— cha.

Higueran kemesra wamindig

²⁹Incha gatø ‘øyeeg lataitøwein gøn’ cha, kemesra trenchibig køn:

—Higueranma asay cha, katø mayan tusrmeranba, ³⁰ishiimera weguchib mendøbene, ñimbe pachig kwalømmera arrumig lutau gúi asan cha. ³¹Øyeetøwei ñim iilan purayai ashabe, Tius nø ashib karub pasraibe yandø lutau gúitamab isua guy cha.

³²Pøs nabe ñimun cierton trendamønrrun chibig køn: Møin gwaløm misaamera pinømøwatø, kerriguh purainrrun cha.

³³Srømbalaba, pirøbabe patsøben, na wamindiibe ka wamindiitøbe purainrraamøn cha.

³⁴Ñimbe ñimdøwei ashiptø guy cha, ñimui manrrømerayua øyeeløtø netsailø gømønrrab, mamburab mab, mutsiirab, yu pirau øsig waramig chigøben tøgagømigwangøba isub indiilø, tru Señor arrin gwalømbe ñimun kan ilagu kegørrørskra merrarrab lataig arrindø mormønrrappe. ³⁵Kaguen tru gwalømbe yu pirau muba kuimburab mayeelaim bala treeg attrun chibig køn. ³⁶Inchawei ñimbe ashiptø melay chibig køn, chu uragucha Tiuswan purugurra chib, øyeelø kerrigu pureb arrubigu kullaaramø, mur bønrramig kønrraimba, tru Møg Misra Arrubigwei merrab kemalla, pønrramig kønrraimba.—

³⁷Incha Jesúsbe kwalømmerawane Tiuswei yau kusrenana, yembe Olivos taig tunsrø kørrømisrtrab ibig køn. ³⁸Inchen kwalømmørig ke løtsøzhig, løtsøzhig maya misaamerabe Tiuswei yau nun mørtrab pubelø gøn.

Jesúsuan kemørtrab waminchib

(Mt 26.1-5, 14-16; Mc 14.1-2, 10-11; Jn 11.45-53)

22 ¹Pirri Levaduragaig maig Fiesta, tru Pascua Fiesta taig, lutau gøben, ²sacerdotesmeran karubeløba, tru Moisés pørigwan kusrenanøbeløbabe Jesúsuan mandø gweetsamigwan labendø, misagwan køriimatabelø gøn.

³Inchen Jesús tru doce kusrenanøb pera uniilai utuig, Judas, tru Iscariote cha wamigwan, Satanásbe kebiben, ⁴Judasbe webya,

sacerdotesmeran karubelanba, tru Tiuswei yau ashib pønrrab suldaumeran karubelanba ashchab ya, Jesúsuan mandø incha nømui tasku tranamigwan waminchene, ⁵nømbe truba kasraarawa, an rrannrrab misrøbelø gøn. ⁶Inchen nøbe treeg martrab misra, misag tre nu gaaben Jesúsuan mandø incha tranamigwan yandø lab mendabig køn.

Señorwei pascua mamig

(Mt 26.17-29; Mc 14.12-25; Jn 13.21-30; 1 Co 11.23-26)

⁷Yandø Pirri Levaduragaig main gwaløm puben, tru Pascua ubisha-unan kweecha tranamig købig køn. ⁸Inchen Jesúsbe Pedronba, Juanwanba trencha karua ørøbig køn:

—Pascua Fiesta mamigwan manrrab tamartrab ambay— cha.

⁹Inchen nømbe:

—¿Nambe chu tamaramø?— cha payen,

¹⁰Jesúsbe trenchibig køn:

—Ñim ciudayu kebambene, kan møg pigøtsø mutaig ñimun katøben, truigwei wendautø amrrigay cha, nø kebyam yaugatig. ¹¹Incha tru ya buaigwane trenchinrrigay chibig køn: “Kusrennøbiibe ñun trendan cha: ¿Nai kusrenanøb pera uniiløba pascua mamigwan mab purram salabe chu gøh?” cha. ¹²Inchen ya buaibe pala pisusrø kan nu sala chab tamarikken ñimun eshkaben, truyu tamartrigay— chibig køn.

¹³Inchen nømbe amba, Jesús maig taig treeg wetørrawa, tru Pascuan tamarøbelø gøn.

Señor nui doce pera uniiløba mab

¹⁴Incha yandø ura puben, Jesúsbe nui karua øriiløba mishatsigu wamisrabe, ¹⁵trenchibig køn:

—iNan øyeeg kaig nebuig megamig pumøwatø, Pascua Fiesta mamigwan ñimba manrrab truba rruba isuig køn! cha. ¹⁶Kaguende ñimun trendamønrrun chibig køn: Tius nø ashib karub wainug katøle ñimba manrrab wamisramnegatig nabe i mamigwane mamumønrrun— cha.

¹⁷Incha copan muta Tiusuan ‘mayanguen pay’ chabe, trenchibig køn:

—Cha iigwan, larrabelø mutsay cha. ¹⁸Kaguende ñimun trendamønrrun cha: Møingurrimbunøbe uvas piwane mas

muchimumønrrun cha, nai Møskai nø ashib karub waisrø katøyug ñimba mutsam gwalømgatig.—

¹⁹Incha pirriwan muta, Tiuswan ‘mayanguen pay’ cha, pirisha, nòmun trenchib srørrøbig køn:

—Iibe nai asr køn cha, ñimuyasig tranig. ligwan øyeeg marøppe, nan isunrrab maray— chibig køn.

²⁰Inchen chab ma, katø treetøwei copan mutabe, trenchibig køn:

—Iibe tru nai anindøga Tius tru misagweyasig srø acuerdon marig, tru copa gøn cha, tru ñimuyasig na ani lusig.

²¹Inchendø asay chibig køn. Nan ashig kømui inchibelan tranrrabigwei tasiibe i mishatsigutøwei nain dasiiba trubalatø trarra wan cha. ²²Tru Møg Misra Arrubiibe muwan inrrai pasrig, truwan iben, trune itru nun ashig kømui inchibelan tranrrab møg waachaweimbe, kan maig kønrrer!— chibig køn.

²³Inchen nòmasiyaitø:

—¿Treeg martrabiibe mu guerah?— cha payiyab mendabelø gøn.

Møig mas nuig kerah cha payiyab

²⁴Inchabe nømbe nømui utu møig mas nuig kønrraptiig kerah cha, payib aleguiyab gøbelø gøn. ²⁵Inchen Jesúsbe kusrub trencha løtabig køn:

—Tru reymera judíos komeeløbe nøm karub tøgagúilane maig købash inchib purran cha. Inchen tru nòmun ashib karub purrabelane ‘misaamerayasig tabig marøb møguelø gøn’ chib wamiilø gøn cha. ²⁶Trune ñimbe øyamay gømøtø gømig køn chibig køn. Masken ñimui utu tru mas nuibe matsinø-unø lataitø misramig køn cha. Inchen tru chi maramigwan nø ashibiibe kan karuig marøb megabig lataitø misramig køn cha. ²⁷Pøs trube, øyeeg købene, ¿møig mas nuig kønrrab gøh? cha. ¿Mishatsigu manrrab wamisrøbiiteh? Kabe ¿tru mishatsigu mamigwan pønsrøbiiteh? cha. ¿Pøs mishatsigu manrrab wamisrøbig, truig mas nuig kømuitarru? cha. Øyeeg kuingucha, nabe ñimui utube tru mishatsigu manrrai pønsrøb megabig lataig kur chibig køn.

²⁸Ñim gøn chu uragucha nan elachimø, chigøben murig pub arringucha treegu wendautø lincha melabeløbe. ²⁹Incha nai Møskai tru ashib karub waigwan nan rranøb lataitøwei, nabe

ñimun tranamønrrun chibig køn, ³⁰tru na ashib karub waisrø nai mishatsigu mab, muchib, katø tru ashib karub purramigu purramisra, ñim tru doce nusrrkalø Israelweinukkurri karrab misaameran ashib karub purramig kønrrain— cha.

Pedro nan ‘ashmíig kur’ chinrrautan cha, Jesús eshkab

(Mt 26.31-35; Mc 14.27-31; Jn 13.36-38)

³¹Incha Señorbe katø trenchibig køn:

—Au, Simón, Simón cha, Satanásbe ñimun miain gøn cha, kan tirigu rrulmeran latawei kønishib sruagutchab.

³²Inchendø nabe ñuimburappe ñui isubigwan nainuutø tōga basraigwan elachib pasrømønrrai ñuyasig Mōskawan miar chibig køn ‘purugurrunrrig’ chib. Ñi nan wendøbasra ya, naimay katøle arruabe, ñibe ñui nunelan chiyutøgucha kullaaramø, mur bønrrønrrai purugunrrig— cha, trenchibig køn.

³³Inchene Simónbe:

—Señor, ñun kailan keeri yau keeren, nabe ñiba truyu pasrønrrab treetø attrab pasrømøtø, nagucha ñiba tōga kwanrrab attrab pasrar— cha, trencha lōtabig køn.

³⁴Inchen Jesúsbe trenchibig køn:

—Pedro, nabe ñune trendamønrrun cha: Mōin gwalømdøwei kallu wamømøwatø, ñibe pønmayguen nan, ‘ashmíig kur’ chinrrautan— cha.

Purø rrømbøig kuim basramig lutaurab

³⁵Incha Jesúsbe trencha payibig køn:

—Na ñimun wasrkaig, katø an busramig chigaig, alpargatiskaig ørenma, ññimun chi palappuig køh?— cha.

Inchen nømbe:

—Chigucha chi palappumuig køn— cha lōtabelø gøn.

³⁶Inchen Jesúsbe trenchibig køn:

—Møimbe treeg kømøtø, an busrig tōgaibe, srua inrrø cha. Inchen wasr tōgaibe, ila inrrø cha. Inchen espadagaibe, trube, nui pala itøgueigwan yana, kan penø cha. ³⁷Kaguende nabe ñimun trendamønrrun cha: Tiuswei wamwan pørigu naimburab iig øyeeg chibig pasrabiibe treeg nebunrrain gøn cha: “Larrø kailai utu treeg kui lataitøwei asha tōgagúig køn” daig. Kagu

naimburab chi nebunrrai pørig basrabiibe kerriguh treeg nebunrrabig køn— cha.

³⁸Inchen nømbe:

—Señor, yuguen pagatø espadamera køn— chiben,

Jesúsbe:

—Øiløtø tsabø gøn— cha, løtabig køn.

Jesús Getsemanísro Tius Møskaimba waminchib

(Mt 26.36-46; Mc 14.32-42)

³⁹Incha Jesúsbe nø trendø treeg marøbig kuig køppe, Olivos Tunsrømay iben, nui kusrenanøb pera uniiløgucha mendig ambubelø gøn. ⁴⁰Incha truyu puabe, trenchibig køn:

—Tiusba waminchib purray cha, chiyugøben kaigyu kegørrab pønrrømønrrappe.—

⁴¹Incha Jesúsbe kan srug kutsimburab lataitø ya, Tius Møskaimba waminchab tømønrsrabe, ⁴²trenchibig køn:

—Nai Møskai, i copan nan tarømaramdiig købene, tarømartra cha. Inchendø na maig isuig køben, treeg kønrrain gømøtø, ñi nan maig maramdiig køben, treegwan maramig kønrrain— cha.

⁴³Inchen srømbalasriig kan ángel Jesúsban mas kullaaramønrrai purugunrrab kenamisrøbig køn. ⁴⁴Inchen truba rruba trømbøig køben, katøgucha igatø! miabig, miabig køn. Inchen nui pøsrimbigen pirau kan anim birrab lataig nørriig pirrabig køn.

⁴⁵Incha kurra, nui kusrenanøb pera uniilan ashchab yabe, isubiitø kamariilø, kib purrain gúi wetørrawabe, Jesúsbe trenchibig køn:

⁴⁶—¿Chindimba kib gøgue? cha. Kurra, Tiusba waminchib purray cha, chiyugøben kaigyu kegørrab pønrrømønrrappe.—

Jesúsban kemøra srua ambub

(Mt 26.47-56; Mc 14.43-50; Jn 18.2-11)

⁴⁷Inchen Jesús waminchib pasramne, truba nu misag buben, Judas taig, tru doce kusrenanøb pera uniilai utuibe, truilan pera arrua, Jesúsban muchanrrab kemallen, ⁴⁸Jesúsbe trenchibig køn:

—Judas, ¿Møg Misra Arrubigwan nan ashig kømui inchibelan kan muchawa tranrrreendirru?— cha.

⁴⁹Inchen Jesúsba pønrrabeløbe tru treeg purainrrabigwan ashabe, nune payibelø gøn:

—Señor, ¿nam espadatøga kørriincha betamøh?— cha.

⁵⁰Inchen nømui utu møikkøsrøn tru maya sacerdotesmeran nø garub sacerdotei karuindiig megabigwan kusrmay kaluwan kelarrab lutiichtinhibig køn. ⁵¹Inchen Jesúsbe trenchibig køn:

—Au, øyeebe marmøtay— cha.

Incha kaluwan katørawa, treetøwei tamarøbig køn. ⁵²Incha sacerdotesmeran karubelanba, misagwan karubelø kølli misaameranba, Tiuswei yau ashib pønrrabelø policíameranba nun tru sruamrrab amrrubelan trenchibig køn:

—Nabe kan niliig kui lata ñimbe espadamera gøben, tsiimera gøben sruar werrunrrappe, ¿chindimba rreeg werrugue? cha.

⁵³Nabe ñimba kwalømmørig Tiuswei yau waben, kemørmuig køn cha. Inchendø yandø mømimbe tru kaig maringarubig tru løstøyuig nø merrarrawa nø garub pasramisren, ñimuimburab ñim maramig ura puin gøn— cha.

Pedro Jesúsban ‘ashmfiig kur’ cha isab

(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴Incha Jesúsban kemøra, tru maya sacerdotesmeran nø garub sacerdotei yamay srua amben, Pedrobe yaptø, yaptø mendig ibig køn. ⁵⁵Incha tru yawambigu nag urra, tru bötøgatan purramisren, Pedrogucha nømui utu wamisren, ⁵⁶kan srusrø mendig megabiibe naabilabig toryu Pedron wai ashabe, ashib pasraptø, ashib pasraptø trenchibig køn:

—I møkkucha Jesúsba uñibiitøwein gøn— cha.

⁵⁷Inchen Pedrobe trenchib isabig køn:

—iPaare ishuube, nagan ashibig kuitarru!— cha.

⁵⁸Inchen yanazhigutø Pedron katøgan ashabe, trenchibig køn:

—Ñigucha truilai utuigwein gørreh— cha.

Inchene Pedrobe:

—iPaare møøbe! nagan truig kuitarru— chibig køn.

⁵⁹Katø kan ura wendau gøsrøn katøgan trenchibig trenchig køn:

—Isa gømo, i møkkucha Jesúsba uñibigwein gørreh cha. Kaguende nøbe galileasriitøwein gøn— cha.

⁶⁰Inchen Pedrobe trenchibig kòn:

—iPaare mөөbe! ñibe ni chi waminchib pasrainguen mormur— cha.

Inchen tru urastø Pedro waminchib pasramnetø, kan kallu wamaptinchibig kòn. ⁶¹Inchen Señorbe keesha, Pedron ashene, Pedrobe Señor øyah taig kømørramab isuptinchibig kòn: “Møi kallu wamømwatø nan pønmayguen, ‘ashmíig kur’ chib isønrrautan” daigwan. ⁶²Inchabe Pedrobe webya, truba rruba isuig kishibig kòn.

Jesús tru Setenteelø maig maramigwan asha marøbelai merrab

(Mt 26.59-68; Mc 14.55-65; Jn 18.19-24)

⁶³Inchen tru mөгuelø Jesúswan ashib srua gøbeløbe nun indza ashib, kurrøb incha, ⁶⁴kabwan lusra, maløbøtø pashabe, trenchibelø gøn:

—¿Mu gurragutsin gúi? Namun kelarrab eshkau bøs— cha.

⁶⁵Incha trømbøig tsalø wamab, katø chineh chibelø gøn.

⁶⁶Yandø tør-rraben tru misagwan karubelø kølli misaameraba, sacerdotesmeran karubeløba, tru Moisés pørigwan kusrenanøbeløba trubalatømisra, nømui tru Setenteelø tru maig maramigwan asha marøbelai merrab Jesúswan srua amben, ⁶⁷nømbe trenchibelø gøn:

—¿Ñi Cristo gøtirru? cha. Namun eshkarra— cha.

Inchen nøbe trencha løtabig kòn:

—Na ñimun: “Truig kur” cha, trenchibene, ñimbe køremøwei, ⁶⁸katø na chigøben payene, ñimbe løtømøwei inchautan cha.

⁶⁹Inchen møingurrimbunøbe na, Møg Misra Arrubiibe tru maramburab marøb Tiuswei kusrmaygatø wamistrun— chibig kòn.

⁷⁰Inchene mayeeløba trencha payibelø gøn:

—¿Trube, ñibe Tiuswei Nusrkain gøtirru?— cha.

Inchene Jesúsbe trencha løtabig kòn:

—Ñimdøweinguen nabe truigwein gøn cha chab rrendan— cha.

⁷¹Inchene nømbe trenchibelø gøn:

—¿Trube, nuimburab waminchabelø mas chiwein gúin balønrrab gø? cha. Nui triitøgatøwei wamindigwan namashib mører— cha.

Jesús Pilatoi merrab*(Mt 27.1-2, 11-14; Mc 15.1-5; Jn 18.28-38)*

23 ¹Incha mayeeløba truyu tulundzuna basrabiibe kurra, Pilatoimay Jesúswan srua amba, ²truyu ‘øyeeg køn, øyeeg marøbig køn’ chib mendabelø gøn:

—I møøbe namui misagwei isuigwan kaig isubelø gønrrai ke peemaytø chab yunømarøb, Roma maya misagwan karubig Césarwan nam trendø an bagarab gúigwan pagaramumig køndamba, katø nøbe tru Cristo, kan rey gurtamba indi aser— cha.

³Inchen Pilatobe Jesúswane trenchibig køn:

—¿Ñigan judíosmerai rey gøtirru?— cha.

Inchen Jesúsbe trencha løtabig køn:

—Ñitøweinguen chab rrendan— cha.

⁴Inchen Pilatobe sacerdotesmeran karubelanba, misaameranba trenchibig køn:

—I mowane nabe chigucha chi kaig mariibe wetørramur— cha.

⁵Inchen nømbe masken, masken inchib, trenchibelø gøn:

—Judea birau kerriguba, maya misaameran nui kusrenaniiløtøga ke chindi asamgaig maran cha. Galilea birausrø pølbasa, mømbe yusrø treeg inchib arrun— cha.

Jesús Herodeswei merrab

⁶Inchen Pilatobe trunun mørabe, trencha payibig køn:

—¿Trube, nøbe galileasriig kø chindah?— cha.

⁷Inchen:

—Trusriigwein gøn— chiben,

Pilatobe Jesúswane tru Galileasrø Herodes karub waim birauig kuin gúi ashabe, nune Herodesweimay purøørøbig køn, kaguen Herodeskucha tru gwalømmerawane Jerusalénsrøwei waben.

⁸Inchen Herodesbe Jesúswan ashabe, truba kasraarabig køn, kaguende mas merrabsrøwei ashimmørø inchibig købig kua. Pøs Jesúsweimburab chigøben wamindi mørøbig kua, nøgurri Tius maramburab marigwan mari ashig kui inchibig køn.

⁹Incha chigøben truba rruba payen, Jesúsbe chigucha kusrua løtømuben, ¹⁰sacerdotesmeran karubeløba, tru Moisés pørigwan kusrenanøbeløbabe ‘øyeeg køn’ chib; ‘øyeeg marøbig køn’ chib,

truiløbe truba rruba trenchib truyu purrabelø gøn. ¹¹Inchen Herodesbe nui suldaumeraba Jesúsuan truba kaig inchib, indzatø ashib srua gua, truba tabzheelø kenana, Herodesbe Pilatoimay katøle ørøbig køn. ¹²Tru gwalømbe Pilatoba, Herodesba tab linchibelø misrøbelø gøn, merrappe tsaleelø gøbig kuig.

Jesúsuan yandø kwanrrai pasrøb
(Mt 27.15-26; Mc 15.6-15; Jn 18.39-19.16)

¹³Inchen Pilatobe sacerdotsmeran karubelan gøben, tru birau ashib karub purrabelan gøben misaameran gøben tulundzunønrrai wama, ¹⁴trenchibig køn:

—Ñimbe nan i mowan misaameran ke chine martrab isunrrai marøb unan chib, naimay srua amrrutan cha. Inchen nabe ñimui merrab maig kuitashchab ashchab paya ashen, nuinuube chigucha chi kalø mariibe wetørramur cha, tru ñim ‘øyeeg, øyeeg kalø marøptiig køn’ chib pønrraigwane. ¹⁵Katø Herodeskucha chi maramgaig kui asha, katøle nøbe namuimaytøwei ørin gøn cha. Ñinguen ashke cha, ke kwanrraingatig maramdiibe chigucha chi kaig mariibe kaagøn cha. ¹⁶Trekkurri nun ichaguchabe, elatchab—chibig køn.

¹⁷Fiesta gwalømmerawane Pilatobe kan merrarrawa keerig pasrabigwan inrrai elatsamig nebubig køn. ¹⁸Inchen mayeeløba trenchib trashib mendabelø gøn:

—iØigwane patsøgay! cha. iBarrabásuan inrrai elachi!— chib.

¹⁹Pøs, tru Barrabásbe tru kailan keerinug pasrappe, tru Jerusalén ciudayu misaameran pera kaig marøb kurrikkurrimba, katø kweetsikkurrimba merrarrawa keerig pasrabig købig køn. ²⁰Incha Pilatobe Jesúsuan elatchab isua, katøyug nømun waminchen, ²¹nømbe mas mur trashibelø gøn:

—iKurusyu mesrø! iKurusyu mesrø!— chib.

²²Inchen pønmayyu Pilatobe gatø trenchibig køn:

—¿Chindimba øyeeg martrainchigue cha? ¿I møøbe chi galø mara basra? cha. Kwamnegatig maramdiibe nuinuube chigucha chi kaig mariibe nabe wetørramur cha. Ichaguchabe, inrrai lelatchab—chibig køn.

²³Inchen nømbe:

—iKurusyu mesrø, mesrø!— chib, mur trashib miab gøptø, nøm maig marøg kui indigwan treeg martrab uta bønrramisrøbelø gøn. ²⁴Inchen Pilatobe tru nøm miaigwane treeg kønrrai kørømarøbig køn. ²⁵Incha tru misaameran pera kaig marøb kurrikkurrimba, katø kweetsikkurrimba tru kailan keeri yau pasrab mowan nøm elatchai miaigwan, trunun inrrai elacha, Jesúswane nømun maig marøg køben martrai tranøbig køn.

Jesúswan kurusyu mesramsromay srúa ambub

(Mt 27.32-44; Mc 15.21-32; Jn 19.17-27)

²⁶Yandø Jesúswan kurusyu mesrønrrab srúa amba, kan Cirenesrø møg, Simón daig, nørørsrøngurri arruben, nun kemørabe, kuruswan mutøsra, Jesúswei wendautø merranøbelø gøn.

²⁷Inchen misaamera truba nu mendig amben, truba yam ishumburmera nun isua wamamøra kishib, isuilø trashib amrruben, ²⁸Jesúsbe nømun ashabe, trenchibig køn:

—Jerusalén ishumburmera, nan isua guishmøtø, ñimuyasiiba, ñimui uregweyasiiba isua kisay cha. ²⁹Kaguende kwalømmerra attrun cha, øyah tamig: “Ureg tøgagønrrab gaimabelø, mana patsø gwanrriig komeelø gøbelø, mana urekkar gua mutsørøb nørøranmeelaimbe mayanguen tab gúilø gøn” dailø gømig. ³⁰Katø misaamerabe nørø tunmeran: “Namuim bala itøgørrørray” chib, shush tunmerane: “Namun itøgasrørray” chib mendønrrun cha. ³¹Kaguen ÷tsøg tusrwanguen øyeeg marøbeløbe, mas mulwane chitø martterah?— chibig køn.

³²Katø pagatø kaig marøbelangucha Jesúsba guegøtø kwetchab srúa ambubelø gøn.

Jesúswan kurusyu mesrøb

³³Incha kanbalø Calavera tainug puabe, truyu Jesúswane kurusyu mesrøbelø gøn, tru pagatø nileelangucha, kanun kusrmay, kanun atsimaygatø. ³⁴Inchen Jesúsbe trenchibig køn:

—Nai Møskai, nømun ulø baymø, pesannanrrig cha. Kaguende nømbe chi marermabguen isumøn— cha.

Inchen suldaumerabe Jesús kewagúilan suerte gucha, pirishibelø gøn. ³⁵Inchen misaamera truyu ashib gøben, tru

ashib karubelø gøbenguen Jesúswan indzatø ashib trenchibelø gøn:

—Kanelanma kaigyugurri wesrabiibe nøasiitøwei pinaarrubash cha, nø tru Cristo, Tius Lawa Wesruig kuabe.—

³⁶Inchen suldaumeragucha indza ashib, køchiibiwan mutchai yuuløb kemallabe, ³⁷trenchibelø gøn:

—iÑi tru judíosmerai rey guabe, kwamønrrab ñitøwei chigøben mar!— chib.

³⁸Inchen Jesús megaim balagucha kan pørig mesraig megabig køn, griegomay gøben, latínmay gøben, hebreomay gøbengue:

IIBE JUDIOSMERAI TRU REY GØN

chibig.

Jesúsba, tru pailø kailøba

³⁹Inchen truyu melsraig melabeløgucha kane trenchib tsalø wamabig køn:

—¿Ñibe tru Cristo gømøtirru? cha. iKwamønrrab ñitøwei chigøben mara, namungucha treetøwei martra!— cha.

⁴⁰Inchen kane tru katøganun namig trenchibig køn:

—Ñigucha treegutøwei mesraig megabendø, ññungan Tiuswan kørig kòmuitarru? cha. ⁴¹Kaguende nambe øyeeg marig melappe melsrambuawei melsrai meler cha. Kaguende nambe kaig marimburø øyeeg melambuawei møra meløben, trune i møøbe chigucha chi kaig marig kømøn— chib.

⁴²Inchabe Jesúswan trenchibig køn:

—Jesús, ñi ashib karub wamigwan ñi ashib karub pølbasrabe, nan isurrunrig— cha.

⁴³Inchen Jesúsbe trencha løtabig køn:

—Nabe ñun cierton trendamønrrun cha: Møindøweinguen naba purø tabzhiisrø wanrrabguen— cha.

Jesús kwaig

(Mt 27.45-56; Mc 15.33-41; Jn 19.28-30)

⁴⁴Inchen yandø kwaløm døbøtag køsrøn gøben, tre uraskurri maaben las treskatig pirau ørøba løstiig kørrømisren, ⁴⁵pørrbe løtsøraben, Tiuswei yau tru purø tab llensuzhig kelarrab sötø mesraig megabiibe tøbøtakkørrab kølsrøbig køn. ⁴⁶Inchen Jesúsbe mur trashib trenchibig køn:



San Lucas 23.45

—Nai Møskai, nai espíritun ñui tasku tranar— chib.
Trenchabe yandø isrømuptinchibig køn.

47Inchen tru Roma suldaу cienelan nø garubiibe øyeeg purayaigwan ashabe, Tiuswan trenchib truba tabig waminchibig køn:

—I møøbe, isa gøмø, sølgandø tabig uñibig kuin gøn— chib.

48Inchen maya misaamera øyeeg purayailan truyu ashib pønrrabeløbe, truba isub nømui pechondø kurramørøb truyugurri ambubelø gøn. 49Inchen mayeelø Jesúswei asiiløba, ishumburmera Galileasrøngurri nui mendig amrrubeløbabe yabsrøngurrindø ashib pønrrabelø gøn truyu treeg puraiben.

Jesúswan sörig

(Mt 27.57-61; Mc 15.42-47; Jn 19.38-42)

50Kan mөг José taig Judea birau Arimatea puebløriig købig køn, truibе tru Setenteelø maig maramigwan asha marøbelai utuig truba tabig, katø sølgandø uñibig. 51Katø tru Josébe Tius nø ashib karub wainuguigwan muniirabigwein guabe, tru Setenteelø maig

maramigwan asha marøbelø ‘øyeelø martrab’ chib kørromara pønsraigwanba, nøm chi mariilanbabe chi tab gømui asig køn.

⁵²Incha nøbe Pilaton ashchab ya, Jesúswei asrwan miawa,

⁵³kurusyugurri pinøsrabwe, kan lino llensutøga kirra, peñayu søramig trab lalig munguen soriimíig pasrabigu sørabig køn.

⁵⁴Katø judíosmerai isram gwaløm tru sabadoweyasig tamaram gwaløm maaben gøbene, yandø tru sabado gwaløm pumibe ke pølbasramitø balabig køn.

⁵⁵Inchen ishumburmera Jesúswan Galileasrøngurri mendig amrrubeløbe nømgucha mendig amba, sorigwan ashib, Jesúswei asrwan mandø wayigwan ashib inchibelø gøn. ⁵⁶Incha nømbe katøle ambabe, may irrabzheeløba, srølameløba tamarabe, tru maig maramigwan martrai Moisés maig karuig køben, tru sábadø gwalømbe israbelø gøn.

Jesús øsiiraig

(Mt 28.1-10; Mc 16.1-8; Jn 20.1-10)

24 ¹Srø rrune pølbasrøb gwaløm tru ishumburmerabe ullarbatø løtsøzhig soriinuumay amrrubelø gøn, nømui may irrabzheelø nøm tamariilan srua. Inchen nømbe katøgan ishumburmeragucha amrrubelø gøn. ²Incha nøm truyu pua, ashene, tru sörinug kasraig sruube yandø truyu gømø, malsrain tsuptinchen, ³nømbe kebambabe, Señor Jesúswei asrwane kalaptinchibelø gøn. ⁴Inchen, treeg køben, kwaariilø chinchabguen gaima bønrrøbene, møimbe pailø møguelø, tør bilabelø kewar, nømuim bulu pønrraptinchen, ⁵nømbe korig køptø malømeran pirausrøngatig kebachen, tru møgueløbe trenchibelø gøn:

—¿Ñimbe øsiguigwane kwailai utube chindimba lague? cha.

⁶Yube mu gaagøn cha. Katø øsiiraig køn cha. Nø Galileasrø uñib urassrøwei ñimun maig wamindiilan isuy chibelø gøn, ⁷tru nø øyee g taigwan: “Na, Møg Misra Arrubigwane kaig marøbelai tasku tranig kømig nebuben, kurusyu mesrøben, pøn gwalømyube katø øsiiranrrun” daigwan.—

⁸Inchen ishumburmerabe Jesús chi wamindiilan isua, ⁹sörinukkurri katøle amrrua, tru onceelanba, katø mayeealanba maig purayaigwan kerrigu eshkabelø gøn. ¹⁰Inchen tru chi purayaigwan tru Jesús nøashib karua øriilan eshkab ishumburmerabe iilø gøbelø gøn, María Magdalenaba, Joanaba,

Jacoboï usri Maríaba, katøgan ishumburmeraba. ¹¹Inchen nòmune tru ishumburmera wamindiibe ke ka indzøkken gønraptiig mørøraben, nømbe køremeelø gøn.

¹²Inchendøgucha Pedrobe søriisrømay ashchab luløb ya, sørinug trarraashene, tru kirra sørig llensumeratø waraptinchen, treeg purayaigwan ashabe, ‘kan øyeebe maig kermab’ truba kwaarig, yamay ibig køn.

Jesús Emaússrømay ambi mayu arrub

(Mc 16.12-13)

¹³Inchen tru gwalømdøwei pailø Jesúswan lincha amøñibelø gøbeløbe Emaús taig pueblosrømay ambubelø gøn, Jerusaléngurri once kilómetrosburab ambiisrø, ¹⁴tru purayailan nømdø kerriguh waminchib. ¹⁵Inchen nøm waminchib payiyab ambub pønrramnetø, Jesúsbe nøashib kemalla, nømbe ib mendøben, ¹⁶nømbe nømui kabmerabe kasrailø latailø gua, nune mu gúinguen nebua ashmeelø gøn. ¹⁷Inchene Jesúsbe trencha payibig køn:

—¿Ambub pønrrappe, ñimbe chiwan waminchibrre amgue?— cha.

Inchen nømbe pønrramisrøppe, isubiitø ke maløguen mindiilø gøbig køn. ¹⁸Inchen møikkørørø, Cleofas taibe, nune trenchibig køn:

—Møin gwalømmerawan Jerusalén chi purayaigwan mayeeløba wammøra gøben, ¿ke ñitøgan wammørmíig truyu arruatiig pua tsutirru?— cha.

¹⁹Inchen Jesúsbe:

—¿Chi burayah?— cha payen, nømbe trenchibelø gøn:

—Nazaretsrø Jesúsweimburab waminder cha. Truibe Tius maig karuigwan kan eshkabig, nui mariiløyu, nui wamindiiløyu maramburab marøbig købig køn cha, Tiuswei merrab lata, katø maya misagwei merrab lata. ²⁰Inchen truigwane sacerdotesmeran karubeløba, namun ashib karub purrabeløba kurusu mesra, kweetsig kønrrai tranan cha. ²¹Nam isuppe, Israel maya misagwan kaigyugurri wesranrrabiibe nøwein gønrraitamab isua muniiraig købig køn cha. Møimbe yandø kweetsig pøn gwalømguen burayan cha. ²²Inchagucha namui utu ishumburmerabe namune kwaarøsrøtan cha, tru ullarbatø søriisrø ashchab ambubeløbe. ²³Incha nui asrwan wetørramuig

kuig kōppe, namune trenchib amrrubelø gōn cha, nōmune:
 “Angelesmera kenamisra: ‘Jesúsbe øsig unan’ chitan” chib.

²⁴Inchen mōiløgōsrōn namui lincha amōñibelø sōriinumay
 amba, ishumburmera maig eshkaig treeg wetōrrabwei inchendø,
 Jesúswane ashmuin gōn— chibelø gōn.

²⁵Inchene Jesúsbe trenchibig kōn:

—iÑim gúi, chugúinguen mōrmeelø! cha. iTius maig karuigwan
 eshkabelø chi wamindiilan kōrenrraptøgucha ke yaandø, yaandø
 amōñibelø gōn! cha. ²⁶¿Nui tōrguegwalmabigu nō wamnug
 kebimōwatø, Cristogan øyeeløyumerrig trōmbøig marinab
 purayamig palømuig kuitarru?— cha.

²⁷Incha nōbe tru Moisés pōriiløygurri pōlbasra Tius maig
 karuigwan eshkabelø pōriiløyu chishtë eshkaib pureb ya, Tiuswei
 wamyu nuimbura waminchibig pōrig pōnrrabelan kerriguba
 øyeeg kōn cha nōmun eshkabig kōn.

²⁸Incha tru Emaús pueblorø pub ambabe, Jesúsbe nui maywan
 ke merrabmisra, ib inrrab lataig inchen, ²⁹nōmbe ke kōrrōmisri
 ashchab inchibelø gōn. Inchabe trenchibelø gōn:

—Namba kōrrōmisr cha. Kaguen yandø maaben gōben, yandø
 pilliranrraindan— cha.

Inchen Jesúsbe nōmba kōrrōmisrtrab kebya, ³⁰nōmba
 mishatsigu wawabe, pirriwan muta, Tius Mōskawan
 ‘mayanguen pay’ cha, pirishabe, nōmun srōrrøbig kōn. ³¹Inchen
 nōmbe Jesús kui nebua ashiptindinaben, Jesúsbe waitø
 kenamuptinchibig kōn. ³²Inchen nōmbe kangurrin gangurri
 trenchibelø gōn:

—Au yamba, nō namun maysrø Tiuswei wam pōrig pōnrrabelan
 øyeeg kōn chib eshkaib arrubene, namune namui manrraube ke nōs,
 nōs indig kōmøh— cha.

³³Inchen nōmbe tru urastø Jerusalénmay katø amba, trusrōmbe
 tru once Jesús kusrenanøb pera uniiløba, truyu nōmba lincha
 purrabeløba tulaamba purrabyuh pubelø gōn. Inchen truyu
 purrabeløbe trenchibelø gōn:

³⁴—Isa gōmø, Señorbe katø øsiirain gōn cha. Incha Simónwan
 kenamisrin gōn— cha.

³⁵Inchen tru pailø pubeløbe maysrø maig purayaigwan kerrigu
 eshkabelø gōn, katø Jesús pirriwan pirishiben, yandø nō gúi nebua
 ashiptindigwanba.

Jesús nui kusrenanøb pera uniilan kenamisrøb

(Mt 28.16-20; Mc 16.14-18; Jn 20.19-23)

³⁶Inchen nøm tru waminchib purramnetø, Jesúsbe nømuin døbøtag pasramisrøb:

—Ñimun chi isumgaig, tab gøn— chibig køn.

³⁷Inchen nømbe kwariilø truba kørig kuilø kan møsigwan asermab isubelø gøn. ³⁸Inchen Jesúsbe trenchibig køn:

—¿Chindimbarre kørig kui inchigue? cha. ¿Ñimui manrraube chindimbarre na gømutamab isugue? cha. ³⁹Nai tasiimeranba, srøbmeranba asay cha. Peg kømø, natøwein gur cha. Nan katørab ashib inday chibig køn. Kan mõiibe yaungawei, ni tsutsikkawayig køn cha, ñim nan asi lataig kømø.—

⁴⁰Incha iigwan chab rrenchabe, tasiimeran srøbmeran eshka kenamaren, ⁴¹nømbe kasrag købiibah kan øyeebe maikkermab kwaarøbiibatø, katøgucha køremø srø bønrrøben, Jesúsbe trenchibig køn:

—¿Ñimbe yu chigøben mamig tøgagømøgueh?— cha.

⁴²Inchen nømbe nun peskau bitì tsirigwan srørrøn, ⁴³nøbe uta, nømui malau mabig køn. ⁴⁴Inchabe trenchibig køn:

—Na ñimba uñippatøwei nabe ñimun iilan wamindig køn cha, tru maig maramigwan martrai Moisés pøriiløyu lata, Tius maig karuigwan eshkabelø pøriiløyu lata, Salmosyu lata naimburab waminchibig pønrrabiibe truyu maig taig kerriguh treeg nebunrrabig køn— chib.

⁴⁵Incha nømune Tiuswei wamwan pørigwan tøgandø øyee kuitamab isunrrai nømui isubigwan kura, ⁴⁶nømune trenchibig køn:

—Øyah chibig pørig pasran cha, Cristobe trømbøig marinab megamig nebuben, pøn gwalømyube kwailai utugurri katø øsiiraben, ⁴⁷mas kaig marmønrrab isua møramigwanba, nømui kaig mariilan ulø baymø pesannailø gømigwanba nui munchiyu eshka kusrenanamig kønrrai Jerusalénsrøngurri pølbasa, chu birausreelandøgucha kerriguba. ⁴⁸Inchen mõi øyee purayaigwan ashibeløbe ñim gøn chibig køn. ⁴⁹Au, nai Møskai tranrrab misra kørørmisrigwane nabe øramønrrun cha, ñimuim bala. Inchendø ñimbe yu Jerusalén ciudayutø ka gørrømisray cha, maramburab marøbig srømbalasrøngurri arrua, ñimun pinøbulamnegatig.—

Jesús srømbalasrømay nebib*(Mc 16.19-20)*

⁵⁰Incha Jesúsbe ciudayugurri wambig Betaniasrøngatig nui kusrenanøb pera uniilan pera ya, tasiimeran kusruabe, nømuimburab ‘mayanguen tabig kønrrain’ chibig køn. ⁵¹Incha trenchib pasraimaytø nømuim bulugurri tarømisren, nune srømbalasrømay srúa yaig køn. ⁵²Inchen nømbe Señorweimburab truba tabig wamincha, Jerusalénmay katø truba rruba kasrag amba, ⁵³nømbe chu uragucha Tiuswei yau Tiuswan tabzhig waminchib gøbelø gøn.

San Juan

Wambe kan mөг misrig

1 ¹Chigucha gaabenbatø tru Wambe manawei pasrabguen inchibig køn. Tru Wambe Tiusba basrøben, katø tru Wambe Tius købig køn. ²Tru Wambe srøsrøgurri Tiusba basrabig købig køn. ³Tiusbe chiwandøgucha marøppe, tru Wamgurriwei marig køn. Inchen chitøgucha Tius mariilø pønrrabiibe, tru Wamgurrin gømíibe chigucha mariilø kaagøn. ⁴Øsig kømibe nuinug basrøben, tru øsig kømig pasrabiibe mayeelayasig tør gøbig køn. ⁵Inchen tru tørbe løstøyu piløben, tru tørwane løstiibe chinchaguen kasrønrrab gaimaig køn.

⁶Kan mөг købig køn, Tius karua ørig, truiibe Juan daig, ⁷tru maig kuigwan waminchabig. Nøbe tru tørweimburab maig kuigwan waminchen, nøgurri mayeeløba kørenrrai. ⁸Juanbe nøashib tru tør gømøtø, tru tørweimburab maig kuigwan ka waminchaptø arrig købig køn. ⁹Tru tør ciertonig maya misagwan pilabiibe yu pirau kebarrub arrubig køn.

¹⁰Inchen truiibe yu pirau pasrøben, katø Tiusbe pirøwan truikkurri marig kuindøgucha, pirau misaamerabe nune mu gúinguen ashmuig købig køn. ¹¹Trendø nuinumay nøbe arrubendø, nui misaamerabe utømøtø, kaasig køn. ¹²Trune mutøgucha nun kashmø, utab, nui munchiyu kørebelane Tiuswei ureg misra pønrramig kønrrai tranig køn. ¹³Truiløbe yu pirau maig kal-labelø gøben treeg kal-lawar gømøwei, ureg tøgagug køben tøgagúig ureg latailø gømøwei, katø møwei isuig maig køben, trumay gømøtø, Tiusweinug kal-lawar gøn.

¹⁴Tru Wambe kan mөг misra, namui utu unig købig køn. Inchen nambe tru nui törguegwalmabigwan tab asig købig køn, tru

Møskaweinukkurri arrubig Kandø Nusrkawei ka yandø tab indiiba, ciertoniibatø netsigwan. ¹⁵Juan truigweimburab maig kuigwan eshkappe, trenchib waminchibig køn:

—Iig køn cha, tru na øyah taig købiibe, nai wendau arrubiibe, na lataguen gømø, nøbe purø nuig køn cha, kaguende nagueen kømøwatø, nømerrig købig kua.—

¹⁶Kaguende tru chigucha palømfig nui tab indigugurri nambe mayeeløba tru ka tab indigwane srøig, srøig itø uter. ¹⁷Tru maig maramigwan martrai pørigwane Moiséskurri tranig købig køn. Inchen tru ka yandø tab indiiba, newan ciertoniibabe Jesucristogurri arrig køn. ¹⁸Tiuswane mugucha managuen ashmuinrrun. Inchendø nui Kandø Nusrkai Tius, managucha Møskaweim bulu trag lincha basrabig, truig namun kenamaran, Tiuswan ashibelø gønrrai.

Juan Bautista Jesucristoimburab waminchib

(Mt 3.11-12; Mc 1.7-8; Lc 3.15-17)

¹⁹Iig køn, tru Jesúsweimburab maig kuigwan Judíosmeran Juan eshkaig. Judíosmerabe Jerusalénsrøngurri sacerdotesmeranba, levitasmeranba karua ørøbelø gøn, Juanwan: “¿Ñibe mu gugu?” cha payrrab. ²⁰Inchen Juanbe sørøømø, maig kuigwan eshkaig, masken maig kuigwan kelarrab eshkaig køn.

—Nabe Cristo gømur— chib.

²¹Inchen nømbe katøle payibelø gøn:

—Trube, ¿mu gugu? cha. ¿Kabe Tius maig karuigwan tru eshkabig Elíasteh?— cha.

Inchen Juanbe:

—Tru gømur— chibene, nømbe payibig bayibelø gøn:

—Trube ñigan, ¿Tius maig karuigwan tru eshkabig kōtirru?— cha.

Inchen nøbe:

—Kah— chibig køn.

²²Inchen:

—Trube, ¿mu gugu? chibelø gøn. Kaguende nambe tru namun karua ørøbelan eshkamig køn cha. Trube, ¿ñuimburappe, ñibe mu gur chinrragu?— cha.

²³Inchen nøbe trenchibig køn:

—Kan wam mu misag warab waraimønug trenchib trashibig, truig kur cha: “Señorwei maywan ølgandø kuray” chib, tru Tius maig karuigwan eshkabig Isaías maig taig, treekke.—

24Inchen tru Juanwan payrrai karua ørøbeløbe fariseosmera gøbelø gøn. 25Tru karua øriiløbe trenchib payibelø gøn:

—Trube, ¿misagwan chindimba piu umbu ulsrøbig kugu cha, Cristo gømøwei, Elías kømøwei, Tius maig karuigwan tru eshkabig kømøwein gøbendøbe?—

26Inchene Juanbe trencha løtabig køn:

—Nabe pitøga pi binøbulrrai ulsrøbig kur cha. Inchendø ñimui utube, ñim asiimíig, kan mugøsrøn pasran cha, 27tru nai wendau attrabig. Nabe trunune nui alpargatisyu tsiwanguen pichib pasramig truburab gømuinatan— cha.

28Øyeelø kerrigu pureppe, Betaniasrøn burayaig køn, Jordán bi ambøgatøsrø, tru Juan misagwan piu umbu ulsrøb uniisrø.

Jesús, tru Tiuswei Ubisha-unø

29Indiibe gatø gwaløm Juanbe Jesús nuim bulumay pub arri ashabe, trenchibig køn:

—Asay cha, iibe Tiuswei tru Ubisha-unø pirauelø kaig mariilan kerranrrabig køn cha. 30Iig køn, chibig køn, tru na øyah taig: “Nai wendau attrab møøbe na lataguen gømø, mas nuig køn cha. Kaguende nagueen kømøwatø, nøbe manawei købig kuig køn” cha. 31Natøweinguen nabe nune mu gúi ashmíig kuig køn cha. Inchendø Israel misaameran mu gúi nebua ashchai kenamartrab, misagwan piyu ulsrøb arrur— cha.

32Katø Juanbe maig kuigwan trenchib eshkabig køn:

—Nabe Espíritu Santon kan paloma lataig srømbalasrøngurri kørraarrua, nuim bala pasramisri ashar cha. 33Inchen nabe katøgucha nune mu gúi ashmuig køn cha. Inchen misaameran pitøga binøbulrrai piu ulsrønrrai nan Karua Ørøbiibe trendaig købig køn cha: “Tru ñi ashen Espíritu Santo nuim bala kørraarrua, pasramisrinabig, truig kønrrun cha, Espíritu Santotøga pinøbulrrabiibe.” 34Inchen nabe yandø trunun nai kaptøga asha, truibe Tiuswei Nusrkain gúi nabe eshkabig kur— chibig køn Juanbe.

Jesúswei kusrenanøb pera uniilø srøsreelø

35Katø gwaløm Juanbe tru nui mendig amøñibelø parba gatøle truyu pasrøwabe, 36Jesús pureb pasrai ashabe, Juanbe trenchibig køn:

—Au, asay cha, øibe Tiuswei tru Ubisha-unø gøn— cha.

³⁷Inchen tru Juanwei pailø mendig amønibeløbe tru trendaigwan mørabe, Jesúswei mendig ambubelø gøn. ³⁸Inchen Jesúsbe keesha asha, nui mendig amrrui ashabe, trenchibig køn:

—¿Chi lague?— cha.

Inchen nømbe trenchibelø gøn:

—¿Kusrennøbig, chu wabig kugu?— cha.

³⁹Inchene Jesúsbe trenchiptinchibig køn:

—Ashchab amrruy— cha.

Inchen nømbe amba, chu wabig kui ashabe, tru gwalømbe truyu nøba kørrømisrøbelø gøn, kaguende yandø las cuatro lutau gøben.

⁴⁰Tru pailø Juan wamindigwan mørøbelø Jesúswei mendig ambubeløbe, kane Simón Pedroi nuneg Andrés købig køn. ⁴¹Incha Andrésbe nuneg Simónwanmerrig lanrrab ya, wetørrawabe, trenchibig køn:

—Nambe si, Mesíaswan wetørrer— cha, (Mesías chippe, Cristo taig).

⁴²Incha Andrésbe Simónwan Jesúsweisrømay pera iben, Jesúsbe Simónwan ashabe, trenchibig køn:

—Ñibe Simón gøn cha, Juanwei nusrkai. Inchendø mømbe yandø Cefas taig kønrrun— cha, (trenchippe, Pedro cha wamig).

Felipenba, Natanaelwanba Jesús wamab

⁴³Katø gwaløm Jesúsbe Galilea birausrømay inrrab isua, Felipen wetørrawabe, trenchibig køn:

—Nai mendig attra— cha.

⁴⁴Tru Felipebe Betsaida pueblosriig købig køn, tru Andrésba, Pedroba waraisriig. ⁴⁵Inchen Felipebe Natanaelwan lanrrab yabe, trenchibig køn:

—Tru maig maramigwan martrai Moisés pøriguba, katø Tius maig karuigwan eshkabelø pøriguba, truiløyu nuimbura pørig pasrab møwan nambe wetørrer cha. Truibe Nazaret puebloyu Joséwei nusrkai, Jesús køn— cha.

⁴⁶Inchen Natanaelbe trenchibig køn:

—¿Nazaretkurringan chi tappaig webatraitarru?— cha.

Inchen Felipebe trenchibig køn:

—Trube, ashchab amø bøs— cha.

⁴⁷Inchen Jesúsbe Natanael kemallib arri ashabe, trenchibig køn:

—Øibe si, isa gømmø, israelita gúi asamdiig køn cha. Nuinuube treeg kønmab ashchaindø indiibe chigaig køn— cha.

⁴⁸Inchene Natanaelbe trencha payibig køn:

—¿Nane treeg kuimbe mandø incha ashku?— cha.

Inchene Jesúsbe trenchibig køn:

—Felipeguen ñun wamømmøwatø, ñi higuera tusr umbusrø wabenwei nabe ñun asig køn— cha.

⁴⁹Inchen Natanaelbe trenchibig køn:

—Kusrennøbig, ñibe Tiuswei Nusrkai, Israel misagwei Rey gøn— cha.

⁵⁰Inchene Jesúsbe trenchibig køn:

—¿Na ñun: “Higuera tusr umbusrø waben ashar” cha, na trendaimba, ñigan nan køretirru? cha. Øyeetø gømmø, purø nørreeløguen ñibe ashchabguen— cha.

⁵¹Incha katø Jesúsbe trenchibig køn:

—Pøs nabe ñimun isa gømmø, cierton trendamønrrun cha: Srømbalabe kurim basrøben, Tiuswei ángelesmerabe Møg Misra Arrubigweinukkurri nebambub, katø nuimay kørrørrub, inchib gøben ñimbe ashchabguen— cha.

Caná pueblosørø kasharab

2 ¹Pøn gwalømyu Galilea birau Caná puebloyu kasharab gøben, Jesúswei usrimbe truyu wabig køn. ²Inchen Jesúswanba, nui kusrenanøb pera uniilanba, truulangucha kasharab yaumay linchab amrrunrrai eshkaig købig køn. ³Inchen vinobe patsaptinchen, Jesúswei usrimbe trenchibig køn:

—Vinone chab patsøgain gøn— cha.

⁴Inchen Jesúsbe løtappe trenchibig køn:

—Ishug, ¿nane chindimba iigwan maringarunrrab inchigu? cha. Kaguende na treeg maramig urabe pumø srø gøn— cha.

⁵Inchen usrimbe truyu mendig melabelan trenchibig køn:

—Nø maig chiben, trunun treeg maray— cha.

⁶Truyube srug køtsømera seis pønrrabig køn, judíosmera tru nøm kaig marigwan chish misramigweyasig pi usrøb tøgagúilø. Tru køtsømerabe setenta, kabe cincuenta litros kebelø gøbig køn.

⁷Inchen Jesúsbe tru pirishibelan trenchibig køn:

—I køtsømeran pi netsøganay— cha.

Inchen netsøzheelø netsøganen, ⁸Jesúsbe trenchiptinchibig køn:



San Juan 2.7

—Møimbe lamø truyugurri wesrawa, tru novios yau chi maramigwan ashib pasrabigwan srua amba, tranay— cha.

Inchen nømbe treeg marøbelø gøn. ⁹Inchen tru ashib pasrabiibe tru pibe vino misrigwan mucha mørendø, chugurri srua amrruimbe ashmfig køn. Truyu purugub pønrrabelø truiløbe asha gøbig køn, piwane nøm wesraig kua. Inchen truyu ashib pasrabiibe tru novion wama, ¹⁰trenchibig køn:

—Mutøgucha srøsrøbe tab vinon sørøbelø gøn cha. Inchen yandø tru linchai eshkailø lincha purrabelø tsabø muchene, tab vino gømfigwan ka srørrøbelø gøn cha. Trune ñibe tab vinon møingatig esegain gøn— cha.

¹¹Iig, tru srøsrøzhiitø Tius nøba pasrain gúi asha gønrrai Jesús pølbasa mariibe Galilea birau Caná puebløsrø marig kuig køn. Tru

treeg mariitøga nui torguegwalmabigwan ashchai kenamaren, nui kusrenanøb pera uniiløbe nun kørebelø gøn.

¹²Inchen øyeelø chab puraiben, Capernaum pueblorømay ambubelø gøn, Jesúsbe nui usrimba, nui nuneløba, nui kusrenanøb pera uniiløba. Incha truyu mam gwalømdø warabelø gøn.

Tiuswei yawan Jesús chish marøb
(Mt 21.12-13; Mc 11.15-18; Lc 19.45-46)

¹³Yandø tru judíosmerai Pascua Fiestan maramig pub lutau gøben, Jesúsbe Jerusalén ciudasrømay ibig køn. ¹⁴Inchen Tiuswei yaube mømibe waaramera gøben, ubishamera gøben, palomamera gøben yanøbelø purrai ashib, katø misagwan an yunømarøbelø gøben purrai ashibig køn. ¹⁵Incha trunun ashippe, Jesúsbe ichabetamig kan latigo mara, mayeelanba tru Tiuswei yaugurri webetabig køn, tru nømui ubishameranba waarameranbañau. Incha tru an yunømarøbelai anwane pirau wiita, mishatsiimeran utsøbetabig køn. ¹⁶Incha tru paloma yanøbelane trenchibig køn: —Iilane yugurri wesruiy cha. Nai Møskawei yawane kan penab, yanøb indi ya maramig kømøn— cha.

¹⁷Inchene nui kusrenanøb pera uniiløbe Tiuswei wamwan pørigu trenchibigwan isuptinchibelø gøn: “Ñui yabe ñuindø gønrraimab isuptø, nane ke chindamdø gøtan” chibigwan.

¹⁸Inchen judíosmerabe trencha payibelø gøn: —¿Ñi øyeema mariibe, Tius ñiba pasrain gúi asamibe namun chi guenamartrunrragu?— cha.

¹⁹Inchene Jesúsbe kusrub løtappe trenchibig køn: —I Tiuswei yawan pøtiitsay cha. Inchen nabe pøn gwalømyutø katøyug mara pasramønrrun— cha.

²⁰Inchene judíosmerabe trenchibelø gøn: —Tiuswei yawane marøb meløwa cuarenta y seis añosyu chab marig købig køn cha. ¿Ñigan pøn gwalømyutø kusranrrurmab isutirru?— cha.

²¹Jesúsbe tru Tiuswei yawan waminchippe, nui asrwan wamindig kuig køn. ²²Inchawei Jesús katøyug øsiirabene, nui kusrenanøb pera uniiløbe tru nø trendaigwan isua, Tiuswei wamwan pørigwanba, Jesús nø maig wamindigwanba kørebelø gøn.

Jesús mayeelan newan ashibig

²³Jesús Jerusalén ciudatrø Pascua Fiestayu wabene, møiløgøben, truba nu, nui munchiyu kørebelø gøn, Tius nøba pasrain gúi asamig nørreelø nø mariilan ashabe. ²⁴Inchendø Jesúsbe ka isatø inchib pønrrai asha køremíig køn, kaguende nøbe mayeelan mailø gúigwan asha basrøwa. ²⁵Katø misagweimburab øyeelø gøn cha, mu eshkam balaim basrømíig køn, kaguende nøbe nøashib misaamera maig isubelø gúigwan torguelarrab asha basraig kua.

Jesús Nicodemoba waminchib

3 ¹Kan fariseo Nicodemo taig købig køn, judíosmerai utu nø garub møg. ²Truibe Jesúsweimay yem ashchab arruabe, trenchibig køn:

—Kusrennøbig, ñibe kusrenanøbig Tiusweinukkurri arruaig kui asha guer cha. Kaguende mugucha Tius maramburab mariilan asha gønrrai martrab gaiman cha, ñi mari lataibe, Tius nøba basrømubene.—

³Inchene Jesúsbe lötappe trenchibig køn:

—Nabe ñun isa gømø, cierton trendamønrrun cha: Katøyug srøig kal-lamíibe Tius nø ashib karub waisriigwan ashchab gaimanrrun— cha.

⁴Inchen Nicodemobe payibig køn:

—¿Kan møg yandø kølig misra, katøyuube mandø incha kal-layasamø? cha. ¿Kabe katøyug usrai patsau kebinrrautah cha, katøyug kal-lanrrab?—

⁵Inchene Jesúsbe trenchibig køn:

—Nabe ñun isa gømø, cierton trendamønrrun cha: Pigurrimba, Espíritu Santogurrimba kal-lamíibe Tius nø ashib karub wainug kebinrrab gaimanrrun cha. ⁶Møskaløgurrin gal-labiibe, misag maig køben treetøwein gøn cha. Inchen Espíritu Santogurrin gal-labiibe, espíritu maig køben treetøwein gøn cha. ⁷“Mayeelø katøyug srøig kal-lamig køn” cha, na trendaigwan, kan treebe maig kermab isub kwaara ashmøta chibig køn. ⁸Isig ichibiima muba gøben itsan cha, wanrrimbe mørendø, chugurri arri mormuwei, ni muba yai mormuwei indan cha. Øyeetøwein gøn chibig køn, mayeeløba Espíritu Santogurrin gal-labeløbe.—

⁹Inchene Nicodemobe katøyug payibig køn:

—¿Treebe maig kōnrrab gøh?— cha.

¹⁰Inchene Jesúsbe trenchibig kōn:

—¿Ñi Israel misaamerai utu kusrennøb møg købendø, ñigan øyeelan chigúi mormíig kōtirru? cha. ¹¹Nabe ñune isa gømø, cierton trendamōnrrun cha: Nambe maig kui asha waminchib, katø namashib namui kaptøga asigwan waminchen, nam eshkaigwan ñim utømøn cha. ¹²Na yu pirau chine pōnrrabelan waminchen, ñim trununguen køremuibe, trube ¿srømbalasrøn bōnrrabelan waminchene, chinchā kørenrrague? cha.

¹³Srømbalasrømaybe mugucha nebmuben, tru srømbalasrøngurri kōrraarrubig, tru Møg Misra Arrubiitøwei nebyan cha.

¹⁴Moisésma mu misag warab waraimønug tsandzøn ulwan tsigu mesra kusruibe, øyeetøwei tru Møg Misra Arrubigwangucha mesra kusraig kōmig palōnrrab gøn cha. ¹⁵Mutøgucha nun kørebiibe tru managatig øsig kōmigwan tøgagōnrrai.



San Juan 3.14

Tiuswei undag købig maya misagweyasig

16'Tiusbe yu pirau misagwan truba rruba isua undag køptø, nui kandø Nusrkawanguen tranig køn cha, møikkøben nun kørebiibe kaigyu kebeña pinab pinømøtø, masken managatig øsig kømigwan tøgagønrrain cha. 17Kaguende Tiusbe nui Nusrkawan yu piraumay ørøppe, yu pirau misagwan kaigyu pønrrønrrai pønrrønrrab gømøtø, masken nøgurri yu pirau misaameran kaigyugurri wesranrrai ørig køn cha.

18'Tiuswei Nusrkawan kørebigwane kaigyu pasrønrrai pasrimíig køben, trune nui Nusrkawan køremíigwane manaweinguen kaigyu pasrønrrai pasrikken gøn cha, kaguende Tiuswei kandø Nusrkawei munchiwan køremuikkurri. 19Inchen tru kaigyu pønrrønrrai pønrrøppe, treekkurri gøn cha: tru tørbe piraumay arruben, misaamerabe tørwan gømø, løstiigwangøba undaarabelø gøn cha, kaguen nømui mariiløbe tabig kømø, kailø gúikkurri. 20Mutøgucha kaig marøbiibe tørwane ashig kømub, tsalø gúinchib, toryumaybe kemallmøn cha, nømui kaig mariilø kenamisrtraitamab kørig køptø. 21Inchen møikkøben tru ciertonig maig køben, treeg uñibiibe toryumay kemalan cha, nui mariiløbe Tius maig kønrrain gøben treeg mariilø gúin gúi torgandø kenamisrtrai.—

Juan Bautista katøyug Jesúsweimburab waminchib

22Tru øyeelø chab puraiben, Jesúsbe nui kusrenanøb pera uniiløba Judea birausrømay ya, truyu maya yana gøsrøn nomba misagwan piu umbu ulsrøb uñibig køn. 23Inchen Juangucha treetøwei marøb uñibig køn, Enon daisrø, Salim bulu, kaguende truyube truba pi gøben. Misaamerabe nørrø amrrua, piu umbu ulsrailø gøbig køn. 24Øyeeg pureppe, Juanwan kailan keeri yau pasrmøwatø gúig køn.

25Inchen møiløgøsrøn Juanwei mendig amøñibeløbe kan judíoba payiyab aleguiab mendabelø gøn, tru kaig marigwan chish maramig køn daigweimburab. 26Inchabe Juanweimay amrruabe, trenchibelø gøn:

—Kusrennøbig, tru møg Jordán bi ambøgatømayrø ñiba uñibig, tru ñi namun wamindi møøbe, møimbe misaameran piu umbu ulsrøb uñen, mayeeløba nuimaygøba amban— cha.

27Inchene Juanbe trenchibig køn:

—Mugucha chi utønrrab gaimanrrun cha, srømbalasrøngurri tranmubene. ²⁸Na øyee taigwane pøs nīmdøweinguen mōrar gøn: “Nabe Cristo gømøtø, nui merrab attrai karua ørig kur” taigwan. ²⁹Tru srai misrtrabigwan pera basrabiibe keg misrtrabig truig bera basran cha. Inchen tru keg misrtrabigwei trendø trag linchibiibe truyu mōrøb pasrøwa, nui wamwan mōrabe, truba rruba kasraaran cha. Pøs øyeetøwei, nai kasrag købiibe mōimbe neig køn cha. ³⁰Nøbe purø nuig misrøb yamigwein gøben, trune nabe chigucha gømīg misrøb yamig køn— cha.

Palagurri arrubiibe mayeelaim bala basran

³¹Palagurri arrubiibe kerrigu mayeelaim bala basran. Inchen piraugurri arrubiibe, piraui kua, waminchippe, piraui gwan wamindan. Inchen srømbalasrøngurri arrubiibe kerrigu mayeelaim bala basran. ³²Incha nøbe tru maig asigwan, maig mōrigwan treeg køn chib waminchene, tru nø treeg køn daigwane mugucha utag kømui indan. ³³Inchen mōikkøben tru nø trendaigwan utabiibe, Tiusbe ciertonig køn cha, treeg kørromara basran. ³⁴Kaguende Tius karua øriibe Tiuswei wamwan wamindan, pøs Tiusbe nui Espiritun tøgagømburab tøgagønrrai tranøbig kua. ³⁵Møskaimbe Nusrkawane undaguig kua, chiwandøgucha nø ashchai nui tasku pønsraig køn. ³⁶Nusrkawan kørebiibe, managatig øsig kømigwan tøgagønrrun. Trune Nusrkawan kaashibiibe srøig øsig kømigwan ashmønrrun. Inchen Tiuswei purø rrømbøig namig købiibe nuim bala basran.

Jesús Samariasrø ishuuba waminchib

4 ¹Fariseosmerabe wammørin gøbig køn Jesúsbe Juan lataguen gømø, mendig amønibelø mas tøgagømba, piu umbu ulsrailø mas tøgagømba indin gúi. ²(Inchendø piu umbu ulsrøppe, Jesús nøashib gømøtø, nui kusrenanøb pera uniilø marøbelø gøn.) ³Treeg wammøra gúin gúi Jesúsbe trunun wammøra, Judea biraugurri webibig køn, katø Galilea birausrømay inrrab.

⁴Incha nø pureb yamibe Samaria birauiwan pureb yamig nebunrrab gøbig køn. ⁵Treekkurri Samariasrø kan Sicar taig puebloyu pubig køn, merrabsrø Jacob nui nusrkai Joséwan tranig pirø bulu. ⁶Truyube kan pisu, “Jacobwein gøn” daig waben, Jesúsbe muraaraig arrua, tru pisu bulu wamisrøbig køn, yandø kwaløm døbøtag misrøb gøben.

⁷Inchen kan ishug samariasriibe pi wesrunrrab arruben, Jesúsbe trenchiptinchibig køn:

—Nan pi srøttra— cha.

⁸(Pøs nui kusrenanøb pera uniiløbe mamig benønrrab pueblosrømay ambin gøben.) ⁹Inchene tru ishug samariasriig løtappe, trenchibig køn:

—Ñibe judío gøbendø, na ya samariasriigwan: “Pi srøttra” taibe— cha.

(Kaguende judíosmerabe samaritanosmerababe linchimeelø gøbig køn.) ¹⁰Inchene Jesúsbe trenchibig køn:

—Tius tranamigwan ñi nebua ashib, katø tru: “Pi srøttra” chibigwan ñi mu gúi ashib indimbe, ñibe nun miabsruinrrun cha. Inchen managuen kølømø biwan srørrøbsruinrrun— cha.

¹¹Inchene ishuube trenchibig køn:

—Au, kasuku, ñibe piwan chitøga wesramig chigaig wan cha. Katø pisube purø umbu wan cha. ¿Trube, ñibe tru kølømø biwane chugurri wesranrragu? cha. ¹²¿Tru merrabsrø namui kølli misag Jacob, nø muchib, nui ureemera muchib, nui animalmera muchib indim biwan namun keta kørrømarøbig lataguen gømø, kabe ñigan mas nuig køtirru?— cha.

¹³Inchene Jesúsbe trencha løtabig køn:

—Møikkøben i piwan muchibiibe katøyug pimulgwai inchun cha. ¹⁴Trune tru na tranim biwan muchibiibe managuen pimulgwai inchimønrrun cha. Kaguende tru na tranim bibe nuinuube kan pigab pørssrab weguchib lataig kønrrun cha, tru managatig øsig kømigweyasig.—

¹⁵Inchene ishuube trenchibig køn:

—Trube, kasuku, tru biwan srøttra cha, nagucha pimulgwai mormøwei, katø mas yusrø wesranrrab arrumøwei inchab— cha.

¹⁶Inchene Jesúsbe trenchibig køn:

—Ñui kewan wamønrrab ya, katø amø— cha.

¹⁷Inchen ishuube trenchibig køn:

—Nabe kekkaig kur— cha.

Inchene Jesúsbe trenchiptinchibig køn:

—“Kekkaig kur” chippe, ñibe sølwein dan cha. ¹⁸Kaguende ñibe trattøgatø kelø tøgag købig køn cha. Inchen mõi ya tøgagúibe ñui keg kømøn cha. Isømø, ñibe sølwein dan— cha.

¹⁹Iigwan mørøppe, ishuube trenchibig køn:

—Au, kasuku, ñibe Tius maig karuigwan eshkabig treeg mөг көммөргө cha. ²⁰Namui merrabsreelө samaritanosmerabe i tunyu Tiuswan көриibala tabig waminchibelө гөбөн, trune ñim judíosmerabe Tiuswan Jerusalénsrө treeg martrab ambamig көн chibelө гөн— cha.

²¹Inchene Jesúsbe trencha lөtabig көн:

—Ñiguen ishug, iigwan көрerra cha. Mөskawan көриibala tabig waminchib maramig ura punrrab гúi, i tunyu amrrua гөмөwei, kabe Jerusalénsrө amba гөмөweingue. ²²Ñim samaritanomerabe chigúi ashmubendө көриibala tabig waminchibelө гөн cha. Inchen nambe көриibala tabig waminchippe, chigúi asha marөbelө guer cha. Kaguende kaigyugurri wesraig көмibe judíosmerai misagugurri arrubig көн cha. ²³Pөs treeg maram gwalөmbe punrrun cha; Inchen truibe mөiweinguen pubguen indan cha, tru cierton көриibala tabig waminchibelө Mөskawan көриibala tabig wamindamig espíritutөga, cierton isua. Pөs Mөskaimbe көриibala tabig waminchibelө öyamay marөbelan lan cha. ²⁴Tiusbe Espíritu гөбөн, көриibala tabig waminchibelөbe, espíritutөga, cierton isua wamindamig көн— cha.

²⁵Inchen ishuube trenchibig көн:

—Mesías attrab гúi, nabe asha gur cha (tru Cristo taig). Truig arruppe, namune maig kuigwan kerriguba törgandө eshkanrrun— cha.

²⁶Inchene Jesúsbe trenchiptinchibig көн:

—Truibe nawein gur cha, tru ñiba waminchib wabig.—

Jesús kusrenanөb pera uniilө katө nuimay amrrub

²⁷Inchen waminchib pasramnetө nui kusrenanөb pera uniilөbe katө amrruabe, truba kwaarөbelө гөн, Jesús kan ishuuba waminchib pasrain гúi ashippe. Inchendө нөмбе мөikkucha chigucha payrrab inchimeelө гөн: “¿Chi balai inchigu?” cha. Kabe: “¿Nөbabe chi waminchigu?” cha.

²⁸Inchene ishuube nui pi mutingөtsөн pasrөb, pueblosrөmay ya, misagwan trenchib eshkabig көн:

²⁹—Kan мөwan ashchab amrruy cha. Na maig mariilan kerriguh eshkatan cha. ¿Inchippa Cristo гөppeendi?— chib.

³⁰Inchen pueblöyuelөbe webamba, Jesúsweisrөmay ambubelө гөн. ³¹Trunetө nui kusrenanөb pera uniilөbe Jesúswan truba inchib trenchibelө гөн:

—Kusrennøbig, maytøguen manrraurren— cha.

³²Inchen nøbe trenchibig køn:

—Nabe mamig tøgagur cha, ñim asiimíig.—

³³Inchen nui kusrenanøb pera uniiløbe nòmasiitø trenchibelø gøn:

—¿Mugøben kabe mamig srúa amrrua srørra chindah?— cha.

³⁴Inchen Jesúsbe trenchibig køn:

—Nai mamibe, tru nan Karua Ørøbig maig kønrrain gøben, trunun marøb, katø nui maramigwan patsamnegatig marøb indamig, truig køn cha. ³⁵Ñimbe trenchibelø gømøtirru chibig køn: “Tirigun paramibe pib pøl balan” cha. Trune nabe ñimun trendamønrrun cha: iÑimguen kabwan larrøbicha tab asay cha, ellmarig warabelan! Kaguende yandø chab øskøraikken waran cha, paramdø balabelø. ³⁶Parøb, tulishib megabiibe tru parøb megaimburø pagaraig an uta, tru ellmarig misrigwane managatig øsig kømigweyasig tulisan cha, tru tsurøb ellmarøbig lata, parøb tulishibig lata kanguetøtø kasrag burramig kønrrai. ³⁷Kaguende misaamera øyan chippe, sölwein dan cha: “Kane tsurøb ellmaren, katøgane parøb tulisan” cha. ³⁸Nabe ñimune parøb tulishinrrai ørar cha, ñim chigucha chi mariimønug. Murig maramigwan marøb kwallibeløbe kanelø gøben, truilø kwaligwane ñim tulishinrrab pønrramisrin gøn— cha, trenchibig køn Jesúsbe.

³⁹Samaria puebloyu warabelø truba yamelø Jesúswan kørebelø gøn, maig kuigwan tru ishug eshkaikkurri: “Na maig marig købigwan kerriguh eshkatan” chib. ⁴⁰Inchen samariasreeløbe amrruabe, Jesúswan nomba kørrømisr chib truba rrugaben, truyu nøbe pa gwaløm nomba kørrømisrøbig køn. ⁴¹Inchen nø wamindigwan mørabe, masken yamelø kørebelø gøn. ⁴²Inchabe ishuwane trenchibelø gøn:

—Møimbe ñi trendaigwan trunun ka møratø kørewa bønrrømøtø, møimbe yandø nambe namashib nun møra, isa gømø, i møøbe yu pirau misagwan Kaigyugurri Wesrabig kuin gúi aser— cha.

Kan kusreb møwei nusrkawan Jesús kwanrrøwan tamarøb

(Mt 8.5-13; Lc 7.1-10)

⁴³Tru pa gwaløm buraiben Jesúsbe Samariagurri Galilea birausrømay ibig køn, ⁴⁴kaguende Jesús nõtøweinguen trendaig købig køn: “Tius maig karuigwan eshkab mowane nuim biraueløtøweimbe chi tab indimíig køn” cha. ⁴⁵Incha Galilea

pubene, truyueløbe truba tab utabelø gøn, kaguende Jerusalén Pascua Fiestayu nômngucha amønaig kua, Jesús tru chine mariilan nømbe ashagurri.

⁴⁶Incha Jesúsbe Galilea birau Canásrømay gatø arrubig køn, tru piwan vino gønrrai mariisrømay. Inchen truyube reyweyasig marøb wab møøbe nui nusrkawan kwanrrø rrrarra gøbig køn, Capernaumsrø. ⁴⁷Inchen tru møøbe Jesús Judeagurri Galileasrø pun daig wammørabe, nui nusrkawan tamartrab nui yamay ‘tiusmanda kørraarrubsrømugu’ chinrrab ashchab ibig køn, kaguende yandø ke patsønrraptiig tsuben. ⁴⁸Inchene Jesúsbe trenchibig køn:

—Chigøben Tius naba pasrain gúi asamig mari ashmøwei, katø puro nørreelø mariilø ashmøwei inchabe, ñimbe managuen kørenrraamøn— cha.

⁴⁹Inchen tru reyweyasig marøb wab møøbe trenchibig køn:

—Señor, petø amun cha, nai unø pinømøwatø.—

⁵⁰Inchen Jesúsbe trenchibig køn:

—Inrrø cha, ñui nusrkaimbe kwanrraamøn— cha.

Inchen tru møøbe Jesús trendaigwan kørewa ib menda, ⁵¹nui yausrø pub ibene, nui karuindiig melabeløbe katønrrab werruabe, trenchiptinchibelø gøn:

—Ñui nusrkaimbe ka øsig tsun— cha.

⁵²Inchen møøbe nømun payibig køn:

—¿Chu uraskurri tammisrøb ya?— cha. Inchene nømbe trenchibelø gøn:

—Pachiibe marig kwaløm la una weetan— cha.

⁵³Inchene møskaimbe tre uraswei Jesús øyah taig kømømab isubig køn, tru: “Ñui nusrkaimbe kwanrraamøn” daigwan. Incha nøba, nui yaelø kerrigueløba Jesúsban kørebelø gøn.

⁵⁴Iig køn, tru srøsrø marigwei wendau katøgan Tius nøba pasrain gúi asamig kønrrai mara eshkaig Jesús Judeagurri Galileasrømay arrua.

Betesdasrø kan kwanrriigwan Jesús tamarøb

5 ¹Yandø øyeelø chab puraiben, Jesúsbe Jerusalénsrømay nebibig køn judíosmerai fiestayumay. ²Inchen Jerusalén ciudayu tru Ubishamerai Yaskab cha, wamim bulube, kan pisu wabig køn, pøtøgatan ya-ureezheelø trattrøgatø wambiiteelø tøgagig, hebreomaybe Betesda taig. ³Truiløyube kwanrreelø truba

nu warabig kòn, kabgar gøben, cojosmera gøben, kònønrrab gaimabelø gøbengue piwan kònøgamne munig. ⁴Kaguende kanmay ganmay kan ángel pisuyu kørraarrua, piwan kònøgøben, mòiikkøben nòmerrig tru piyu kebibiibe chi gwanrrø tøgaitøgucha tammisrig kòrrømisrøbig kòn. ⁵Inchen kan møg treinta y ocho años ørøba kwanrrø megabig, truyu pirau tsubig kòn. ⁶Inchen Jesúsbe truyu tsui ashabe, øyeetø truba yana kwanrrø tsubig kuin gúi ashabe, trenchibig kòn:

—¿Tammisrøg køtah?— cha.

⁷Inchene tru kwanrriibe trenchibig kòn:

—Kasuku, nane muguen srua ya, pisuyu kertrabig kaatan cha, tru piwan kònøgøben. Na kebinrrainchib megamne, katøganguen kebipø guebibig kòn— cha.

⁸Inchene Jesúsbe trenchibig kòn:

—iKurrø! cha. iÑui tsgalwan mutab, punab inrrø!— cha.

⁹Inchen tru urastø tru møøbe tabig kòrrømisra, nui tsgalwan muta, punab ib mendabig kòn. Inchen tru gwalømbe isrin gwaløm gøbig kòn. ¹⁰Trekkurri judíosmerabe tru tamarinabigwane trenchibelø gøn:

—Møin gwalømbe isrin gwaløm gøben, tru maig maramigwan martrai Moisés pøriibe ñui kaya tsuigwan muta inrrain gømø merabig kòn— cha.

¹¹Inchene tru møøbe trenchibig kòn:

—Tru nan tamarøbiitøwei trenchitan cha: “Ñui kaya tsuigwan kusrua muta, inrrø”— cha.

¹²Inchene nømbe:

—“Ñui kayigwan tulisha, muta, inrrø” chippe, ñune ¿mu møg rrenchita?— chibelø gøn.

¹³Inchen tru tamarinab møøbe mu gúinguen mørmíig kòn, kaguende Jesúsbe truyugurri tarømisrin gøben, katø truyube purø nu misag basrøben.

¹⁴Inchen yanayu Jesúsbe tru tamarig møwan Tiuswei yau ashabe, trenchibig kòn:

—Au, ñi møi yandø tabig kòrrømisrabe, møingurrimbe katø mas kaig martrab gømø cha, katøbe ñun masken rrømbøig nebumønrraimbe.—

¹⁵Inchene tru møøbe ya, judíosmeran eshkaig kòn:

—Tru nan tamarøbiibe Jesús kuin gøn— cha.

¹⁶Incha treekkurri judíosmerabe Jesúswan kaig martrab wendautø lliirab mendabelø gøn, kaguende øyeelan isrin gwaløm maren. ¹⁷Inchen Jesúsbe trenchibig køn:

—Nai Møskaima chu uraskucha nui maramigwane moin gwalømgatig marøb wabig køben, nagucha marøbig kur— cha.

¹⁸Trenchibene, judíosmerabe masken inchibelø gøn Jesúswan kwetchab, kaguende isrin gwalømbe chi maramig kømøn cha, mera basrigwandø kalø marmøtø, Tiuswangucha: “Nai trag Møskain gøn” chib, Tiusba lataig misren.

Jesús nun mu chi tamgaig martrai tranigwan waminchib

¹⁹Inchen Jesúsbe nømun lötappe, trenchibig køn:

—Nabe ñimun isa gømø, cierton trendamønrrun cha: Tiuswei Nusrkaimbe ka nuimburaptøbe chigucha marmøn cha. Møskai chi mari asha, trunundø maran cha. Møskai chi marin gúindø Nusrkaingucha treetøwei maran cha. ²⁰Kaguende Møskaimbe Nusrkawan undaguig kua, nø chi mariilan kerrigu kenamaran cha. Incha treetø gømøtø, mas purø nørreelø marig kenamartrun cha, ñim kwaara asha gørrømisramnegatig. ²¹Kaguende Møskaima kwailan øsiirana øsig kømigwan traniibe, treetøwei Nusrkaingucha tru øsig kømigwan møilan tranamdiig asønaben, tranan cha.

²²Katø Møskaimbe maig maramigwan mungucha nø asha marøb wamøtø, tru maig maramigwane Nusrkai nø asha martrai tranig køn cha, ²³mayeeløba Nusrkawangucha purø tab inchai Møskawan purø tab inchib lataitøwei. Nusrkawan tab inchimíbe, Møskai karua ørøbigwangucha chi tabig inchimøn cha.

²⁴Nabe ñimun isa gømø, cierton trendamønrrun: Møikkøben na wamindigwan mørøb, nan Karua Ørøbigwan køreb inchibiibe managatig øsig kømigwan tøgagønrrun cha. Incha truigwane kaigyu pasrønrrai pasrig kømønrrun cha, kaguende kwamigugurri øsig kømigumay yandø puraya basramisrikkurri. ²⁵Nabe ñimun isa gømø, cierton trendamønrrun: Treeg maramig urabe punrrun cha. Inchen truiibe møindøweinguen pubguen indan cha, tru kwabelø Tiuswei Nusrkawei wamwan møramig. Inchen tru mørøbeløbe øsig kønrrun cha. ²⁶Kaguende Møskaimbe nøashib øsig kømigwan tøgag kua, Nusrkawangucha treetøwei nøashib øsig kømigwan tøgagønrrai tranan cha. ²⁷Katø Møskaimbe Nusrkawan maig kørømisrtrabigwan mu mandamgaig maramigwangucha

tranan cha, kaguende nõbe Møg Misra Arrubig kuimba. ²⁸Ig na trendaigwan maig kõnrrermab isub kwarmõtay cha, kaguende treeg kõmig urabe punrrun cha, mayan gwabelø søriilø purrabelø nui wamwan mōra, ²⁹truyugurri webambamig. Inchen tru tabig marøbeløbe katøyug øsiirawa kurrappe, srøig øsig kõmigwan tøgagønrrab gurrøbene, trune kaig marøbeløbe katøyug øsiirawa kurrappe, kaigyu põnrrønrrai põnsrailø gønrrab gurrønrrun cha.

Jesúsweingatø waminchib

³⁰Nabe ka naimburaptøbe chigucha chi marmfíg kur cha. Nabe maig kõnrrabigwan na asha marøppe, tru nai Møskai maig taig mōrigwandø asha maren, tru maig kõnrrabigwan na asha mariibe sølgandø marig køn cha. Kaguende nan treeg marøg kuimba treeg marmõtø, nan karua ørøbig maig martrain gøben, trunun marar cha. ³¹Na naasiitø maig kuigwan ka naimburaptø wamindiibe, trube, tru na wamindiibe ka wamindiitø gøbsruinrrun cha. ³²Inchen naimburab maig kuigwan eshkabiibe katøgan gøn cha. Inchen nõ tru naimburab eshkab wamindiibe isa gømø, maig kuigwan wamindig kui nabe asha gur cha. ³³Ñimbe Juanweisrø payrrai øren, nõbe tru newan cierton maig kuigwan eshkabwei indig køn cha. ³⁴Pøs nabe kan møg naimburab 'øyeeg køn' cha wamindiitøga basrømfig kur cha. Inchendø nõ trendaigwan na trenchippe, ñim kaigyugurri wesrailø gønrrain renchar cha.

³⁵Juanbe kan lámpara naarab pilabig lataig kuig køn cha. Inchen kan maya yanatø ñimbe tru nui toryu kasraaramig tab gúi mōrig købig køn cha. ³⁶Inchendø naimburab Juan wamindi lataitøguen gømø, mas nuig tøgagur cha. Kaguende nai Møskai nan martrai traniilø, truiløtøwei naimburab na maig kuigwan eshkan cha, nane nai Møskai karua ørig kuin gúi. ³⁷Katø nai Møskai nan karua ørøbikkucha naimburab na maig kuigwan eshkan cha. Ñimbe managuen nui wamwan mormøwei, nui maløwan ashmøwei indan cha. ³⁸Katø ñimbe nui wamindigwan ñimui manrrau chigar gøn cha, kaguende nõ karua ørigwan ñim køremuikkurri. ³⁹Ñimbe Tiuswei wamwan pørigwan ashippe, maig kōtashchab truba tab ashib labelø gøn cha, kaguende managatig øsig kõmigwan truyu wetørranrrab isubelø gua. Inchen tru pøriiløbe nan mu gúi ashchai naimburab waminchibelø gøn cha. ⁴⁰Inchendø ñimbe naimay amrrug kōmuindan cha, tru srøig øsig kõmigwan tøgagønrrab.

41 'Nabe misaamera nan maya nuguen tab inchib taiwane utømíig kur cha. 42 Inchagucha nabe ñimune mailø gúi ashíib, Tiuswei undag købigwan ñimuínug chigar gúi ashar cha. 43 Nabe nai Mòskawei munchiyu ørig arruben, ñimbe nane utømøtan cha. Inchen katøgan ka nuimburaab nui munchiyutø arrubigwane si, trube, ñimbe utønrrun cha. 44 ¿Ñim mandø incha nan kørenrrague? cha, kangurrin gangurri maya nuguen tab indig kømigwangøba ñim labeløbe, Tius kandø wabigweinukkurri maya nuguen tab indig arrubigwan lamøtø. 45 Nai Mòskawei merrab na ñimun 'øyeeg kailø gúiig køn' chinrraitamab isumøtay. Moisés, ñim ke trunundø isua melaig, nui pøriiløtøgatøwei ñimune 'øyeeg kaig marøbelø gømøtirru' chinrrun. 46 Kaguende Moisés maig taigwan ñim køreig kuimbe, nan kørebsruig kuinrrun cha. Kaguende Moisésbe naimburabweim børig køn cha. 47 Tru nø pørigwanma ñim køremeeløbe, na wamindigwangucha chinchin kørenrrague— cha, trenchibig køn Jesúsbe.

Jesús trattø mil møguelan manrrai mamig tranøb

(Mt 14.13-21; Mc 6.30-44; Lc 9.10-17)

6 1 Incha Jesúsbe Galilea pisu ambøgatøsrømay ibig køn, tru Tiberias pisu taisrømay. 2 Inchen truba nu misag Jesúswan mendig ambubelø gøn, kaguende Tius nøba pasrain gúi asamig kønrrai kwanrreelan tamaren asha gua. 3 Inchen Jesúsbe kan tun balasrø nebya, nui kusrenanøb pera uniiløba truyu wamisrøbig køn. 4 Inchen yandø judíosmerai Pascua Fiestabe lutau gøbig køn. 5 Incha Jesúsbe kurraasha, truba nu misag mendig amrruin gúi ashabe, Felipene trenchibig køn:

—¿Yeeg nu misagweimbe nambe mamig pirrimbe chu benønrrab?— cha.

6 Trenchippe, Felipe ka manchitamørtraptø rrenchibig køn, Jesúsbe maig maramigwan asha gøbendø. 7 Inchene Felipebe trenchibig køn:

—Ni kan møg doscientos días ørøba marøb megawa an bagaraig utiitøga pirrim bena, piti biti srørramikken nebunrraamøn— cha.

8 Inchen kusrenanøb pera uniilai utuig Andrés, Simón Pedroi nunebe trenchibig køn:

9—Yube kan matsinø-unø trattøgatø cebada birrimbah pagatø peskaubatø sruaig pasran cha. Inchendø kan yandiibe ya nu misagweimbe mayanguen gømøn— cha.

¹⁰Inchen Jesúsbe trenchiptinchibig køn:

—Mayeelanba purramisringaruy— cha.

Truyube pu truba tsitsig køben, møguelø trattrø milburab purramisrøbelø gøn. ¹¹Inchen Jesúsbe tru pirrimeran muta, Tiuswan ‘mayanguen pay’ chabe, maya misag truyu purrabelan pirishabe, katø treetøwei peskaumerangucha maya mag kui inchen srørrøbig køn. ¹²Inchen yandø øska maben, Jesúsbe nui kusrenanøb pera uniilan trenchibig køn:

—Pitis unchibelane pirau ka petig warømønrrai, pitiswane tulisay— cha.

¹³Inchen tru trattrøgatø cebada birri pirisaigwan maben, yandø tru undailan tulishiben, tasinmera doce netsabig køn. ¹⁴Inchen misaamerabe Tius maramburab marigwan Jesús mari ashabe, trenchibelø gøn:

—Tru Tius maig karuigwan eshkab møg tru yu piraumay attrabig køn daibe, isa gømø, iigwein gøn— cha.

¹⁵Inchen Jesúsbe misaamera nun rey martrab ke merrarrawa sruamrrab amrrunrrab gúi wetøbeñippe, nøbe katøyug tunbalasrømay inrrab nõtø tarømisrøptinchibig køn.

Jesús pisu balawan ib
(Mt 14.22-27; Mc 6.45-52)

¹⁶Yandø pillirab arruben Jesúswei kusrenanøb pera uniiløbe pisuyu kørrørruabe, ¹⁷kan barcoyu kebamba, Capernaumsrø larramrrab ambub mendabelø gøn. Inchen yandø chab pilliraben, Jesúsbe katøgucha nømuimay arrumø srø gøben, ¹⁸yandø truba mur isig ichibig webarruben, pi welarmera kurrab mendabig køn. ¹⁹Incha yandø kan trattrø kilómetros, kabe kan seis køsrøn remab ambabe, Jesúswane barco bulusrømay pi balawan arri ashiptinchibelø gøn. Inchabe truba korig kui inchen, Jesúsbe:

²⁰—iNa gur cha. Kørmøtay!— chibig køn.

²¹Inchen nømbe barcoyu Jesúswan truba tab gúi wamab uta, petøzhiitø tru pum birausrø pubguen inchibelø gøn.

²²Katø gwaløm tru nu misag sötø tru pisu igatømay kørrømisrøbeløbe truyu barco kandøzhiitø pasrabigu Jesúswei kusrenanøb pera uniiløbe tru barcoyu amben, Jesúsbe nømbe tøgä imuin gúi ashibelø gøn. ²³Inchendøgucha Tiberias

ciudasrøngurrimbe katøgan barcomera pua pønrrabelø gøn, Señor pirriwan ‘mayanguen pay’ chiben, tru maim bulusrø. ²⁴Incha tru nu misaabe Jesús truyu mu gawei, nui kusrenanøb pera uniilø mu gawein gúi ashippe, tru barcomerayu kebamba, Capernaumsrø Jesúswan lanrrab chab ambubelø gøn.

Jesús tru øsig kømigwan tranøb pirri

²⁵Incha pisu ambøgatøsrø chab pua, Jesúswan wetørrawabe, trenchibelø gøn:

—Kusrennøbig, ¿yusrømbe ñibe mana bugu?— cha.

²⁶Inchene Jesúsbe trenchiptinchibig køn:

—Nabe ñimun isa gømø, cierton trendamønrrun cha: Ñimbe nane lappe, Tius naba pasrain gúi asha gønrrai mariilan asha gømøtø, tru pirrimeraan øska mamne maig kua, trugurrinre lan cha. ²⁷Ñim marøppe, mamig ka petø patsønrrabigwandø isua marmøtø, managatig øsig køm mamigwan isua maray chibig køn. Truigwane tru Møg Misra Arrubig ñimun tranrrun cha. Kaguende treeg maramigwan tranig kui asig kønrrai Tius Møskaimbe nui sellon nuinug pasrig køn— cha.

²⁸Inchene nømbe trenchibelø gøn:

—¿Tiuswei maramelan marøb pølbasttrappe, nambe chi maramig balerah?— cha.

²⁹Inchene Jesúsbe trenchibig køn:

—Tiuswei maramibe iig køn cha, Tius tru nø karua ørigwan køremig.—

³⁰Inchene nømbe trencha payibelø gøn:

—¿Tius ñiba pasrain gúi nam ashib, ñun køreb inchaimbe, chi martragu? cha. Trube, ¿chi marøbig kugu? cha. ³¹Namui merrabsrø kølli misaamerabe mu misag warab waraimønug maná taigwan maig købig køn cha, Tiuswei wam maig pørigu trendaim bala: “Nøbe nømune srømbalasrø pirriwan manrrai tranig køn”— cha.

³²Inchene Jesúsbe trenchibig køn:

—Nabe ñimun isa gømø, cierton trendamønrrun cha: Srømbalasrøngurri arrub pirri ciertonigwan nømun tranøbiibe, Moisés kømug køn cha. Treeg kømøtø, tru cierton birri srømbalagurri arrubigwan ñimun tranøppe, nai Møskai, nø rranig køn cha. ³³Kaguende Tiuswei pirrimbe tru srømbalasrøngurri

yu piraumay kørraarrua, katø misaameran srøig øsig kømigwan tøgagønrrai tranøbig, truig køn— cha.

³⁴Inchene nømbe trenchibelø gøn:

—Señor, chu uragucha tru birriwan srøttra— cha.

³⁵Inchene Jesúsbe trenchibig køn:

—Tru øsig køm birrimbe na gur cha. Naimay arrubiibe managuen parøgwai mormøwei, katø nan kørebiibe managucha pimulgwai mormøwei inchun cha. ³⁶Inchendø na ñimun trendaim bala ñimbe nan ashippe, ashendø, nane køremøn cha. ³⁷Møitøgucha Møskai nan traniibe naimay attrun cha. Inchen naimay arrubigwane nabe managuen wambig weguchimumønrrun cha. ³⁸Pøs, nabe srømbalasrøngurri kørraarruppe, nan maig maramdiig køben treeg martrab arrumøtø, nai Møskai nan karua ørøbig na maig martrain gøben, treeg martrab kørraarrig køn cha. ³⁹Inchen nan karua ørøbig martrai isuike iig køn cha: Nø nan traniilane ni kanguen trubishimø, srabe gwaløm katøyug na nømun øsiirangarunrrain gøn cha. ⁴⁰Nai Møskai martrai isuike øyeeg køn cha: mutøgucha Nusrkawan nebua asha, nun kørebiibe managatig øsig kømigwan tøgagønrrain gøn cha. Inchen nabe srabe gwaløm nun katøyug øsiirangarunrrain gøn— cha.

⁴¹Inchen judíosmerabe namig nømdø nilø chigøben chib mullib mendabelø gøn, tru: “Pirri srømbalasrøngurri kørraarrubiibe na gur” taikkurri. ⁴²Incha trenchibelø gøn:

—¿Øibe tru Jesús Joséwei nusrkain gømuitarru? cha. Nambe usri møskawan ashibelø guer cha. ¿Møimbe mandøgurri nøbe øyeeg tah cha: “Nabe srømbalasrøngurri kørraarrig køn” cha, trenchippe?—

⁴³Inchene Jesúsbe trenchibig køn:

—Ñimguen ñimdø mas namig mulla mormøtay cha. ⁴⁴Mugucha naimaybe attraamøn cha, Møskai nan karua ørøbig naimay attrai inchimubene. Inchen naimay arrubigwane nabe srabe gwaløm gatø øsiirangarumønrrun cha. ⁴⁵Tru Tius maig karuigwan eshkabelø pørigube treeg chibig pørig basran cha: “Mayeelanba Tius nø gusrenaniilø gønrrun” chibig. Inchawei mayeeløba Møskawan mørøb, nuiwan kusreb inchibeløbe naimay amrrunrrun cha.

⁴⁶Pøs Møskawane mugucha asiibe kaagøn cha. Tiusweinukkurri arrubig, truitøwei Møskawan ashibwei indan cha. ⁴⁷Nabe ñimun isa gømø, cierton trendamønrrun cha: Nan kørebiibe managatig

øsig kømigwan tøgagøn cha. ⁴⁸Tru øsig køm birrimbe na gur cha. ⁴⁹Ñimui merrabsrø kølli misaamerabe mu misag warab waraimønug tru maná taigwan mabendø, kwaig købig køn cha. ⁵⁰Trune tru srømbalasrøngurri kørraarrub pirrimbe yu pasran cha, møikkøben tru birriwan mabiibe, kwamønrrai. ⁵¹Tru srømbalasrøngurri øsig køm birrimbe na gur cha. Møikkøben i birriwan mabiibe managatig øsig wanrrun cha. Inchen yu pirau tru maya misagwan srøig øsig kønrrai tru na tranam birrimbe nai asrtøwein gøn— chibig køn, Jesúsbe.

⁵²Inchene judíosmerabe nòmasiyaitø namig trenchib mendabelø gøn:

—¿I møøbe nui asrwandøwei manrraimbe namune mandø rrannrrab indah?— cha.

⁵³Inchene Jesúsbe trenchibig køn:

—Nabe ñimun isa gømø, cierton trendamønrrun cha: Tru Møg Misra Arrubigwei asrwan mab, katø nui aniwan muchib inchimeeløbe srøig øsig kømigwan ñimuinug tøgagønrraamøn cha. ⁵⁴Møikkøben nai asrwan mab, nai aniwan muchib inchibiibe managatig øsig kømigwan tøgagøben, nabe srabe gwaløm nune gatø øsiirangarumønrrun cha. ⁵⁵Kaguende nai asrbe si, cierton mamig køben, katø nai animbe si, mutsamig ciertonig køn cha. ⁵⁶Nai asrwan mab, nai aniwan muchib inchibiibe nainug pasrabig basrøben, katø nagurringucha nuinug pasramønrrun cha. ⁵⁷Nan karua ørøbig Øsig Wab Møskaingurri tru øsig kømigwan na tøgagøb lataitøwei, nagurri nøgucha tru øsig kømigwan tøgagønrrun cha tru nai asrwan mabiibe. ⁵⁸Iibeguende tru srømbalasrøngurri kørraarrub pirrin gøn cha, tru ñimui merrabsrø kølli misamera maig lataig kømøtø, nømbe mappe, mabendø, kwaig købig køn cha. Trune i srømbalasrøngurrim birriwan mabiibe managatig øsig kønrrun— chibig køn.

⁵⁹Jesús øyeelan kusrenanøppe, judíosmera tulundzuni yau Capernaumsrø kusrenanig køn.

Møiløgøben Jesúswei mendig amba katøyug llirab

⁶⁰Møiløgøben Jesúswei mendig amønibelø i kusrenanigwan mørabe, trenchibelø gøn:

—Nø øyeeg kusrenaniibe maramga menrra murig køn cha. ¿Mu gúi møriasamø?— cha.

⁶¹Inchen Jesúsbe nõmdø chigøben chib mullib gúi ashabe, trenchibig køn:

—¿Ñimun øyeeg chibene pusrkwatah? cha. ⁶²Tru Møg Misra Arrubig tru nõ srøsrø waisrøndøwei katøle nebiben asimbe, trube, ¿maig købsruerah? cha. ⁶³Øsig kømigwan tranøbiibe Espíritu gøben, asrbe truburappe chigucha chi purugumíig køn cha. Na ñimun wamindiibe Espíritu gøb, øsig kømig køb gøn cha. ⁶⁴Inchendø gatøgucha ñimui utu mõiløbe køremeelø køn— cha, trenchibig køn.

Kaguende Jesúsbe manawei srøsrøgurri asig købig køn, mumeratø nun køremeelø gúigwan, katø tru nun ashig kømui inchibelan tranrrabiibe mõig kuigwan. ⁶⁵Incha katø Jesúsbe trenchibig køn:

—Inchawei treekkurri nabe ñimune trenchar cha: Mugucha naimaybe amrrunraamøn cha, nai Møskai amrrunrai inchimubene.—

⁶⁶Inchen yandø trugurrimbe mõiløgøben nui mendig amøñibeløbe chab lllirawa, yandø Jesúsba amøñimeelø gøn.

⁶⁷Inchen Jesúsbe nui doceelan trenchibig køn:

—¿Kabe ñimgucha treetøwei lllirawa ambug køtah?— cha.

⁶⁸Inchen Simón Pedrobe trencha løtabig køn:

—¿Señor, nambe muimay gúi ambamø? cha. Tru managatig øsig køm wamwane ñitøwein døgaig køben, ⁶⁹nambe ñun køreb, katø tru Tiuswei Newan Tabiibe ñi gúi ashib inder— cha.

⁷⁰Inchene Jesúsbe trenchibig køn:

—¿Yamba, na ñimun doce lawa wesrab mørgøppeh? cha. Treeg kuindøgucha ñimui utu kane kwaimandzig køn— cha.

⁷¹Øyah chippe, Simón Iscariotei nusrkai, Judaswan waminchibig køn. Kaguende tru doceelai utuig kuatøgucha, tru Jesúsban ashig kømui inchibelan nõ tranrrab pasrøben.

Jesúswei nunelø nun køremub

7 ¹Yandø øyeelø chab purayaig wendø, Jesúsbe Galilea birausrø uñibig køn, Judea biraui lllirab uñmønrrab, kaguende judíosmera tuyube kwetchab lab gøben. ²Tru judíosmerai Ya-ureg Maram Fiesta yandø pub gøben, ³Jesúswei nuneløbe nun trenchibelø gøn:

—Yugurri Judea birausrømay inrrø cha. Ñui mendig amøñibelø ñi chi mariilan ashchain cha. ⁴Pøs kan mõikkøbenma misaamera mu gúi nebua asig kønrrappe, chiwandøgucha søratø marmøn

cha. Tru ñi øyeelø marøbiibe, trube, maya misaamera ashchai martraurren— cha.

⁵Pøs Jesúswei nuneløtøweinguen nune køremeelø gøn. ⁶Inchene Jesúsbe nòmune trenchibig køn:

—Na treeg maramibe pumø srø gøn cha. Trune ñimuimbe chu ura marøg køben maramig chi gømøn cha. ⁷Yu piraueløbe ñimune chi tsalinchab gaimanrrun cha. Trune nane tsalinndan chibig køn; kaguende nøm marøb gúigwan kaig køn cha, na eshkaben. ⁸Ñimbe fiestayumay ambay chibig køn. Nabe gatøgucha tru fiestayumaybe nebarrumumønrrun cha, kaguende na treeg maramibe pumø srø gøben.—

⁹Incha trenchabe, Galileasrø kørørmisrøbig køn.

Jesús Ya-ureg Maram Fiestasrø

¹⁰Inchen yandø nunelø fiestayumay chab amben, Jesúskucha ippe, ibendø, mayeelø ashchain gømøtø, ibig køn. ¹¹Inchen judíosmerabe fiestayu nun lab gua, trenchibelø gøn:

—Tru møøbe ¿chu unerah?— cha.

¹²Inchen misag utube Jesúsweimburab mutøgucha niløzhiitø truba waminchib gøbelø gøn, kaneløbe: “Tru møøbe truba tabig køn” chiben, kaneløbe: “Tabig kømøn cha. Misagwan may wamincha, ka isaptiig køn” chibelø gøn.

¹³Inchendø møitøgucha nuimburab waminchippe, waminchendø, ke mayeelø mørtrain gømøtø waminchibelø gøn, judíosmeran kørig køptø.

¹⁴Yandø fiestabe tøbøtakken pureb iben, Jesúsbe tru Tiuswei yau kebya, kusrenanøb mendaptinchibig køn. ¹⁵Inchen judíosmerabe truba kwaarøb trenchibelø gøn:

—¿I møøbe kan øyeebe chincharre kusrebig køh cha, chu kusreweig kømubendø?— chib.

¹⁶Inchene Jesúsbe trencha løtabig køn:

—Na kusrenaniibe nain gømø, nan karua ørøbigwein gøn cha. ¹⁷Møikkøben Tius maig martrain gøben trunun marøg kui inchibiibe na kusrenaniilane Tiusweinukkurri arrubig kuin gúi, kabe naimburaptø kusrenanøbig kuin gúi nebua ashchun cha. ¹⁸Møikkøben nuimburaptø waminchibiibe, misaamera ka nun maya nuguen tab inchaindø lan cha. Inchen møikkøben tru karua ørøbigwan maya nuguen tab indig kønrrai labiibe, truiibe si,

cierton waminchibig, nuinuube chigucha kalø marig chigaig køn cha.

¹⁹¿Tru maig maramigwan martrai pørigwane ñimune Moisés nøwein rranig kømuitarru? cha. Inchen ñimbe møikkucha tru martrai pørigwane møra marmøn cha. ¿Nane chindimba kwetchab lague?— chibig køn.

²⁰Inchene misaamera nu basrabiibe trencha løtabelø gøn:

—Ñibe kwaimandzig tøgäig køn cha. ¿Ñune mu gwetchab lab gø?— cha.

²¹Inchene Jesúsbe trencha løtabig køn:

—Isrin gwaløm kan mana asiimíig asha gønrrai marigwandø ñimbe mayeeløba kwaara asha gøn cha. ²²Pøs inchawei Moisésbe circuncidanrrai ñimune karua pasrig køn cha, (truibe Moisésweinukkurri arrubig kømøtø, ñimui merrabsrø kølli misaamerainukkurri pølbasra arrubigwan). Inchen ñimbe isrin gwaløm gúindøgucha kan møg-unan circuncidabelø gøn cha.

²³Inchawei tru maig maramigwan martrai Moisés pøriilan maig taigwan kalø mara gørrøarmønrraptø, kan mowan isrin gwaløm gúindøgucha ñimma circuncidabelø gøbendø, na isrin gwaløm kan mowan kwanrrøwan kerrigu newan tamarene, trube, ¿ñimbe nane chindimba namøgue cha? ²⁴Ñimuin gabyu maig misag asønaben ke trunundø asha marøb pønrrømøtø, marøppe, maig kønrrabigwan sølgandø asha maramig køn— cha, trenchibig køn Jesúsbe.

¿Jesús tru attrabig Cristo gø chinderah?

²⁵Inchen møiløgøben jerusalénsreeløbe trenchibelø gøn:

—¿Øigwanweinrre kwetchab lab amønñimuitarru? cha. ²⁶Au, ya mayelai malau waminchib pasrøben, mugucha chi chimøn cha. ¿Kabe tru ashib karubeløbe øibe Cristo gúi asha treeg mara tøgagø chinderah? cha. ²⁷Inchendø nambe ø møøbe chugurri arrig kui asha guer cha. Trune Cristo arrubene, chugurri arrin gúi mugucha ashchaamøn— chibelø gøn.

²⁸Inchen Jesúsbe Tiuswei yau kusrenanøb pasrøwa, truba mur waminchib trenchibig køn:

—Ñimbe nane mu gúi ashib, katø nabe chugurri arrig kui ashawein gøn cha. Nabe arrua pasrappe, naimburaptø arrua basrømøtø, tru ciertonig nø garua ørig basrar cha, tru ñim mu

gúi nebua asiimíig. ²⁹Inchen nabe nune mu gúi ashibig kur cha, kaguende nabe nuinukkurri arrub, katø nø nan karua ørig kua.—

³⁰Inchen nun merrarrowa, sruamrrab inchendø, mugucha merrarrameelø gøn, kaguende nun treeg maramig ura pumø srø gøben. ³¹Inchen puebloyu misaamera truba nu nun kørewabe, trenchibelø gøn: —Cristo arruppe, ¿Tius nøba pasrain gúi asha gømig mariilø i møg lataig maskucha mana martrab gø?— cha.

Fariseosmera Jesúswan merrarranrrab inchib

³²Fariseosmerabe misag truba nørrø Jesúsweimburab niløtø truba waminchamørøb gúi mørabe, nømbe judíos sacerdotesmeran karubeløba misra, Tiuswei yau ashib pønrrabelan ørøbelø gøn Jesúswan merrarranrrai. ³³Inchene Jesúsbe trenchibig køn:

—Yu ñimbabe gatøgucha kan maya yanatø uñchab gur cha. Trugurrimbe nan karua ørøbigweisrømay gatø inrrab gur cha.

³⁴Inchen na ibene, ñimbe labendø, nane wetørranrrab gaimanrrun cha. Katø tru na wanrrab yaisrømbe ñimbe amrrab gaimanrrun— cha.

³⁵Inchene judíosmerabe nømasiyaitø trenchib payibelø gøn:

—Ø møøbe ¿chumay inrraindah? cha, nam wetørramgaibe. Kabe ¿tru judíosmera griegosmerai utusrø amba warabelaisrømay ya, tru griegosmeran kusrenanrrab inrrab inda, chindah cha? ³⁶¿Øyeebe mandø tah? cha, tru: “Nan lappe, labendø, nane kalanrrun” chib. Katø: “Na waisrømbe ñimbe amrrunrrab gaimanrrun” chippe.—

Øsig kømigwan tranøb pi

³⁷Incha tru srabe gwaløm, fiesta purø tabig purayam gwaløm Jesúsbe pasramisra, mur waminchib trenchibig køn:

—Møikkøben pimulgwaibe naimay arrua, muchi cha. ³⁸Tiuswei wamwan pørigu maig taig, møikkøben nan kørebiibe nui manrraugurrimbe managuen kølømø bimera lulrrun— cha.

³⁹Øyee chippe, Jesúsbe tru nun kørebeløbe Espíritu Santon utønrrab gøn cha, truigweimburab trendaig køn. Pøs katøgucha Espíritun tranimíig srø gøben, kaguende Jesúsbe purø nuig purø tabig tørigwan utømø srø gua.

Misaamera nøørøtø misrøb

⁴⁰Inchen møiløgøsrøn tru nu misag sötøyuelø nø wamindiilan mørabe, trenchibelø gøn:

—Iibeguende, Tius maig karuigwan eshkabig, tru mөг kөн— cha.

⁴¹Inchen kaneløbe trenchibelø gөн:

—Iibe Cristo gөн— cha.

Inchen katøganeløbe trenchibelø gөн:

—¿Cristogan Galileagurri attraitarru? cha. ⁴²Cristobe Davidwei misagugurri arrub, katø tru David tsui pueblo, Beléngurri attrabig kөн cha. ¿Tiuswei wamwan pørigube yamba trenchibig kømuitarru?— cha.

⁴³Incha misaabe Jesúskurrindø nөmdø ke nөrөtø misrøb chab tarөmisra, ⁴⁴mөiløbe kemөrtrab inchendø, mөikkucha chinchimeelø gөн.

Judíosmeran karubelø Jesúswan kөremub

⁴⁵Incha tru Tiuswei yau chigøben puraimөнrrai ashib pөнrrabeløbe tru sacerdotsmeran karubeløba, fariseosmeraba purraisrø gatø pubene, truiløbe nөmune trenchibelø gөн:

—¿Jesúswane chindimba sruamrrumөгue?— cha.

⁴⁶Inchen tru ashib pөнrrabeløbe trencha lөtabelø gөн:

—iKan managuen ø mөг lataibe muguen wamindig kaagөн!— cha.

⁴⁷Inchene fariseosmerabe trenchibelø gөн:

—Kabe ¿may waminchen ñimgucha tabig chitanmab tru gúindø kөrewa bөнrrappeendi? cha. ⁴⁸Kabe ¿namui ashib karubelø gúi, fariseosmera gúi mөikkøben truiløma nun kөreitarru? cha. ⁴⁹Pøs i misag sөtø tru maig maramigwan martrai Moisés pørigwan ashmeeløbe larrø kaig nebuim bөнrrөнrrai pөnsrailø gөн— cha.

⁵⁰Inchen Nicodemo, tru srөtөzhiiтө Jesúswan yem ashchab ibig, tru fariseosmerai utuibe trenchiptinchibig kөн:

⁵¹—¿Tru maig maramigwan martrai namui pөrikkan kan mөwan chi marig kuitashchab ashchab, nө wamindigwan mөрөbmerrig mөрmubendogan kaigyu pasrөнrrai pasrөbig kuitarru?— cha.

⁵²Inchene nөmbe trencha lөtabelø gөн:

—¿Kabe ñigucha galileasriitөwein gөtirru? cha. Tiuswei wamwan pørigwan maig chibig kөtashchab ñiguen tab ashchig chibelø gөн, Tius maig karuigwan eshkab mөг Galileagurrimbe muguen kurrөmuig kuin gúi, ñiguen ashchabguen— cha.

⁵³Inchabe yandø mөitөгucha yamay chab ambubelø gөн.

**Ishug keebaig købendø, katøganba kaig
marøb tsuben merrarrainabig**

8 ¹Inchen Jesúsbe Olivos Tunsrømay ya, ²katø gwaløm tør-raben, katø Tiuswei yaumay arrubene, maya misaabe nun kemallen, nøbe wamisra, kusrenanøb mendabig køn.

³Inchen tru Moisés pørigwan kusrenanøbeløba, fariseosmerababe kan kasharawa ishug kaig marøb tsuin gøben merrarrawa, Jesúsweimay srua amrrua, truyu purrabelai tøbøtag pasrabe, ⁴Jesúsban trenchibelø gøn:

—Kusrennøbig, i ishuwane kaig marøb tsuben ke truyu merrarraig køn cha. ⁵Trube, tru maig maramigwan martrai Moisés pøriibe øyeeg ishumburmerane sruutøga peta, kweetsingarubig køn cha. Treeg købene, trube, ðñibe manchinrragu?— cha.

⁶Nømbe øyamay payippe, mandø inchibig køtasha, chigøben chi køptørre trencha mørøbelø gøn. Inchine Jesúsbe utsøbasra, tasig-unøtøga pirau pørøb mendabig køn. ⁷Inchen ke payibig bayen, katø kurraashabe, nømune trenchibig køn:

—Ñim møikkøben kaig marig chigaibe, truimerrig pølbasra sruutøga nun petø bøs— cha.

⁸Incha gatø Jesúsbe utsøbasra, pirau pørøbig, børøbig køn. ⁹Inchen nømbe tru nø trendaigwan mørabe, mas kølleelømerriig kan gan pera pølbasra, webamba ambub mendabelø gøn, Jesúsba tru ishug truyu pasrabiibatø gørrømisram. ¹⁰Inchen Jesúsbe kurraashabe, trenchibig køn:

—Au, ishug ðkaneløbe chu ambah? cha. ðMugucha ñune møra meganrrai chi marmuitarru?— cha.

¹¹Inchine nøbe trenchibig køn:

—Kasuku, mugucha nane treeg marmøtan— cha.

Inchine Jesúsbe trenchibig køn:

—Katø nagucha ñune chi marmumønrrun cha. Innrø, chibig køn. Møingurrimbe katø kaig martra gømmø— cha.

Jesús yu pirau maya misagwei tør

¹²Jesúsbe katø fariseosmeran trenchib waminchibig køn:

—Nabe yu pirau misagwei tør gur cha. Inchen nai mendig uñibiibe managuen løstøyu uñmøtø, tru øsig kømig tørwan tøgagønrrun— cha.

13Inchene fariseosmerabe trenchibelø gøn:

—Ñibe maig kuigwan eshkab waminchippe, ka ñuimburaптø wamindan cha. Treekkurri ñui wamindiibe ka isatø gøn— cha.

14Inchene Jesúsbe trencha løtabig køn:

—Maig kuigwan na naimburaptø wamindinguen, na wamindiibe isa wamindig kømøn cha. Kaguende nabe na chugurri arrigwan ashib, katø chumay yamigwan ashib inchar cha. Trune ñimbe na chugurri arrigwan ashmøwei, ni chumay yainguen ashmøwei indan cha. 15Ñimbe maig maramigwan asha marøppe, møguelø maig isua marøbelø gøben, ñimbe treeg isua marøbelø gøn cha. Trune nabe mungucha maig maramigwan treeg mara ashmíg kur cha. 16Inchen tru maig maramigwan na asha maringuen, truike maig maramigwan sølgandø asha marig isa gømø, treeg køn cha. Kaguende nabe natø gømøтø, nai Møskai nan karua ørøbiiba misra marar cha. 17Maig maramigwan martrai ñimui pøriiøyuma, trenchibig pørig pasran cha, maig kuigwan ashibelø møguelø pailø treetøweih eshkaikkurrimbe, isa gømøn chibig. 18Pøs naimburabigwan maig kuigwan eshkabiibe natøwein gøben, katø nai Møskai nan karua ørøbikkucha naimburabigwan maig kuigwan eshkan— cha, trenchibig køn Jesúsbe.

19Inchene nømbe trencha payibelø gøn:

—Ñui møskaimbe ¿chu basra?— cha.

Inchene Jesúsbe trencha løtabig køn:

—Ñimbe nan ashmøwei, nai Møskawan ashmøwei indan cha. Nan ashibelø gúimbe, nai Møskawangucha ashibelø gøbsruinrrun— cha.

20Iilan waminchib pasrappe, Jesúsbe tru Tiuswei yau Tiusweyasig an busrim bulu kusrenanøb pasrøwa, trendaig køn. Inchen mugucha kemørtrab inchimeelø gøn, kaguende nun treeg maramig pumø srø gøben.

“Na yamsrømbe ñimbe amrrunrraamøn”

21Incha Jesúsbe katø trenchibig køn:

—Nabe inrrainchar cha. Inchen ñimbe nane lappe, labendø, ñimbe ñimui kaig marøb amønainuutø kwanrrun cha. Pøs na yamsrømbe ñimbe amrrunrrab gaimanrrun— cha.

22Inchene judíosmerabe nømdø trenchibelø gøn:

—¿Kabe nøasiitø kwanrrainchippeendi? cha: “Na yamsrømay iben, ñimbe amrrunrrab gaimanrrun” chinrrappe.—

23Inchene Jesúsbe nòmune trenchibig kòn:

—Ñimbe yuelø gøben, nabe palasriig kur cha. Ñimbe yu piraelø gøben, trune nabe yu pirauig kòmur cha. 24Inchawei treekkurri nabe ñimun trendaig kòn cha: “Ñimbe kaig marøb amønailøyutø kwanrrun” cha. Kaguende ñim nan na gúitamab isua køreimuikkurrimbe, ñimui kaig marøb amønailøyutø ñimbe kwanrrun— cha.

25Inchene nun trencha payibelø gøn:

—Trube, ¿ñibe mu gugu?— cha.

Inchene Jesúsbe trencha løtabig kòn:

—Srøsrøgurri na ñimun maig eshkaab arrig, truig kòn cha.

26Nabe ñimun chigøben wamindamig truba tøgagur cha, ñimbe øyeelø gøn damig. Inchen nan karua ørøbiibe isa gømø, cierton waminchibig kòn cha. Inchen na yu piraelan wamindiibe na nun wamindi mørigwan, trunun waminchar— cha.

27Inchen Jesúsbe nui Møskawan waminchen, nømbe ni chiwan wamindinguen wetøgørrømeelø gøn. 28Treekkurri Jesúsbe nòmune trenchibig kòn:

—Ñimbe tru Møg Misra Arrubigwan mesra pala kusrabene si, nabe na gúi ñimbe nebua ashib, katø chiwandøgucha marøppe, ka naimburaptø marmøtø, iilan waminchippe, nai Møskai maig kusrenanigwan waminchibig kuin gúi nebua ashib inchun cha.

29Kaguende nan karua ørøbiibe naba basrab, katø nøbe nandø elachimøwei indig kòn cha. Pøs nabe managucha marøppe, nø tab gúi wanrrai treegwandø marøbig kur— cha, trenchibig kòn.

30Jesús iigwan waminchene, truba yamelø nun kørebelø gøn.

Tiuswei ureemeraba, kaig marøptø amønibeløba

31Incha tru judíosmera nun kørebelane Jesúsbe trenchibig kòn:

—Na maig wamindiilan ñim trunun møra marøb pønrrøwabe, isa gømø, nai mendig amønibelø gønrrabguen cha. 32Incha ñimbe tru newan ciertonigwan nebua ashene, tru ciertoniibe ñimune iløsrkøbeløygurri elatsiilø gønrrai martrun— cha.

33Inchen nømbe trencha løtabelø gøn:

—Nambe Abrahamweinukkurri amrrub misaamera guer cha. Nambe managuen mu karua srúa gúindiig melømø misaamera guer cha. Ñibe øyeebe ¿mandø chigu? cha, ‘namun elatsiilø gønrrun’ chinrrappe.—

34Inchene Jesúsbe trenchibig kòn:

—Nabe ñimun isa gømmø, cierton trendamønrrun cha: Mutøgucha kaigwan marøb pasrabiibe, tru kaig marøb pasraig, truitø kanawa srua yaig basran cha. ³⁵Kan karuindiig megabiima yaube managatig kørørmismuben, trune kan nusrkaimbe si, managatig truyu kørørmisran cha. ³⁶Inchawei Tiuswei Nusrkai ñimun kaig marøb melaigugurri elachene, ñimbe isa gømmø, newan elatsiilø gønrrabguen cha. ³⁷Ñimbe Abrahamweinukkurri amrrub misaamera gúi nabe ashaweim basrar cha. Inchendø ñimbe nane kwetchab inndan cha. Kaguende na wamindiibe ñimuinuube kørørmismøn cha. ³⁸Nabe nai Møskaimba pasrøwa asigwan, truigwan waminchen, ñimbe ñimui møskawan mørigwan trunun maran— cha.

³⁹Inchen nømbe trencha løtabelø gøn:

—Namui møskaimbe Abraham gøn— cha.

Inchen Jesúsbe trenchibig køn:

—Ñim Abrahamwei nusrkalø gúimbe, trube ñimgucha, Abraham mari lataigwei marøbsruinrrun cha. ⁴⁰Inchendø ñimbe møimbe nane kwetchab inndan cha, Tius mandø taig mørigwan na tru newan cierton waminchib mowane. ¡Abrahambe managuen øyeebe marmuig købig køn cha! ⁴¹Ñimbe ñimui møskai mariilan marøbelø gøn— cha, trenchiben, nømbe trencha løtabelø gøn:

—Nambe mu mendaigwei tøgamisri ureemeragucha gømer cha. Nambe møskaimbe kandø tøgar guer cha, truike Tius.—

⁴²Inchene Jesúsbe trenchibig køn:

—Ñimui møskai Tius kuimbe, trube, ñimbe nane undaarabsruinrrun cha. Kaguende nabe Tiusweinukkurri arrua, yu pasrar cha. Nabe ka naimburaptø arrig kømøtø, nane Tius ørig køn cha. ⁴³Ñimbe na wamindigwane ¿chindimbarre chugúinguen mørmeelø gøh cha? Na wamindigwan ñimbe mørmeelø guarre treendan cha. ⁴⁴Ñimbe ñimui møskai nugwaimandzigwei ureg kua, ñimui møskai maig palain gøben, ñimbe trunun marøb pønrran cha. Nugwaimandziibe srøsrøgurri kweechiptiig kua, managuen tru newan ciertonigube pasramisra marmíig køn cha, kaguende nuinuube ciertoniibe chigaa gua. Inchawei nø chigøben isa waminchippe, nø maig kua, treeg wamindan cha. Kaguende nøbe purø isaptiig køn cha. Incha nøbe isa wamindigwei møskain gøn cha. ⁴⁵Trune nabe ñimun tru newan cierton waminchene, ñimbe nane køremøn cha. ⁴⁶¿Ñim møikkøben na chigøben kaig mara

basrai ashkeh? cha. Trube na isa gømø cierton waminchene, ñimbe nane ÷chindimba gøremøgue? cha. ⁴⁷Kaguende Tiuswei unøbe, Tius wamindiilan mōran cha. Trune ñimbe Tiusweyelø gømōwa, treekkurri Tius wamindigwane mōrmeelø gøn— cha.

Abrahamguen kømōwatø Cristobe manawei købig

⁴⁸Inchene judíosmerabe Jesúswan trenchibelø gøn:

—Ñibe samaritano kan kwaimandzig tōgaig køn chippe, nabe sölwein chibrain gøn— cha.

⁴⁹Inchene Jesúsbe trenchibig køn:

—Nabe kwaimandzig tōgaig kømur cha. Treeg kømøtø, nabe marøppe, nai Møskawan tab indig kønrrai marar cha. Trune ñimbe nane maig købash inndan cha. ⁵⁰Nabe nan maya nuguen tab inchaindø lamur cha. Inchendø kan køn cha, naimburab nan tab inchai lab, katø maig maramigwan asha marøb inchibig. ⁵¹Nabe ñimun isa gømø, cierton trendamønrrun cha: Na maig taigwan mōra marøbiibe managuen kwamigwan ashchaamøn— cha.

⁵²Inchene judíosmerabe trencha løtabelø gøn:

—Møimbe si, aser cha, ñibe kan kwaimandzig tōgaig kui. Abraham lata, Tius maig karuigwan eshkabelø lata chab gwaben, trune ñibe: “Na maig taigwan mōra marøbiibe managuen kwanrraamøn” dan cha. ⁵³÷Kabe ñigan namui mōskai Abraham lataguen gømø, mas nuig køtirru? cha. Trube kwaben, katø tru Tius maig karuigwan eshkabelø lata chab gwaig køn cha. ÷Ñibe mu gurmab isugu?— cha.

⁵⁴Inchen Jesúsbe trencha løtabig køn:

—Na naasiitøwei maya nuguen tab inchib pasraibe, trembe chi marmuinguenig køn cha. Nan maya nuguen tab gønrrai marøbiibe nai Møskain gøn cha, tru ñim ñimui Tius køn daig, truig. ⁵⁵Inchendø ñimbe nune ashmeelø gøn cha. Trune nabe si, ashibig kur cha. Na ‘nun ashmiig kur’ taimbe, trube, ñim latawei isaptiig købsrubrainrrun cha. Pøs nabe nun ashib, katø nø maig taigwan mōra marøb inchibig kur cha. ⁵⁶Merrabsrø ñimui mōskai Abrahambe nain gwaløm punrrabigwan asha, truba kasraaraig køn cha. Incha ashabe, truba kasrag kui indig køn— cha.

⁵⁷Inchene judíosmerabe Jesúswan trenchibelø gøn:

—Ni cincuenta añosikken gømubendø, ÷ñigan: “Abrahamwan nebua ashibig kur” chitirru?— cha.

58Inchene Jesúsbe lötappe trenchiptinchibig køn:

—Nabe ñimun isa gømø, cierton trendamønrrun cha:

Abrahamguen kømøwatø, Na Gur— cha.

59Treekkurri nømbe Jesúswan sruutøga petønrrab srug kusruben, nømbe trubabig køn. Incha Tiuswei yaugurri webya, ibig køn.

Kan møg kerrigu ashmíigwan Jesús tamarøb

9 ¹Jesús kanbalø pureb pasrøwabe, kan møg srøsrøgurri kerrigu ashmíig kal-laweigwan ashibig køn. ²Inchen nui kusrenanøb pera uniiløbe trenchibelø gøn:

—Kusrennøbig, ìø møg ashchab gaimabig kal-lanrraimbe, møig kaig marig kerah? cha. ìMøskalø kaig marikkurrin gøh? Kabe: ìnøasiitøwei kaig marikkurrin gø, chinderah?— cha.

³Inchene Jesúsbe trencha løtabig køn:

—Nø kaig marikkurrin gømøwei, kabe møskalø kaig marikkurrin gømøwein gøn cha. Treeg kømøtø, Tiusbe nui maramburab mariilø tru ashmíigweinug kenamisrtrain gúig køn cha. ⁴Kwaløm gøbenbatø nan karua ørøbigwei maramigwan nambe marmø gømø, maramigwein gøn cha; kaguende yembe attrun cha, mugucha maramgaikke. ⁵Na yu pirau uñippe, piraelai tør gur— cha.

⁶Incha Jesúsbe øyah chib pasrøwabe, pirau illimbi tucha, tru illimbitøga kaizhig chillig marabe, trutøga ashmíigwein gabyu srøløbig køn. ⁷Inchabe trenchibig køn:

—Siloé pisusrø maløwan kwallchab inrrø— cha. (“Siloé” chippe, “karua ørig” chib.)

Inchen tru ashmíibe ya, maløwan kwalla, katø arruppe, ashibig arruptinchibig køn. ⁸Inchen nui ya bulueløba, katø tru ‘chigøben kettra’ cha, miab wabigwan ashibelø gøbeløbabe trenchibelø gøn:

—ìTru ‘chigøben kettra’ chib, miab wabiibe øigwein gømuitarru?— cha.

⁹Inchen kaneløbe trenchibelø gøn:

—Nøwein gøn— cha.

Inchen katøganeløbe trenchibelø gøn:

—Truig lataig asønabendø, nø gømøn— cha.

Inchen nømbe nøashib trenchiptinchibig køn:

—Nawein gur— cha.

¹⁰Inchene nømbe trenchib payibelø gøn:

—ìChincha ashibig misrku?— cha.

¹¹Inchene nòbe trenchibig kòn:

—Kan møg, munchibe Jesús taig, chillig mara, nan kabmerayu sròlabe, trenchitan cha: “Siloé pisusrømay ya, maløwan kwallchig” cha. Inchen nabe ya, maløwan kwallene, nai kabmerabe ashibig misrøptinndan— cha.

¹²Inchen nune trencha payibelø gòn:

—¿Tru møøbe chu yah?— cha.

Inchen nòbe:

—Chindindø— chibig kòn.

Fariseosmera tru ashmíig købigwan truba payib srua gøb

¹³Incha tru kerrigu ashmíig købigwan fariseosmerai merrab pera ambubelø gòn. ¹⁴Kaguende tru Jesús chillig mara, ashmíigwan tamarin gwalømbe isrin gwaløm gøbig kòn. ¹⁵Incha fariseosmeragucha tru møwan katøyug payibelø gòn:

—¿Mandø incha, ashibig misrku?— cha.

Inchene nòbe trenchibig kòn:

—Kappala nane chillig srøldan cha. Inchen nabe maløwan kwaliitø, ashibig misrinatan— cha.

¹⁶Inchen møiløgøben fariseosmerabe trenchibelø gòn:

—Kan øyeeg marøb møøbe Tiuswein gømuinrrun cha. Kaguende isrin gwalømwan ke isrin gwaløm gømui lataig marøbig kòn— cha.

Trune katøganeløbe trenchibelø gòn:

—¿Kan kaig marøb møøbe øyeeg Tius nøba pasrain gúi asha gømig mariilø mana martrab gø?— cha.

Incha yandø nømdø ke nøørøtø misrøbelø gòn. ¹⁷Inchawei tru ashmíig købigwane katøle payibelø gòn:

—Ñibe, ¿tru møweimburab manchinrragu cha, tru ñui kabmeran tamarig købene?—

Inchen nòbe lètappe trenchibig kòn:

—Nabe Tius maig karuigwan kan eshkab møg kòn damønrrun— cha.

¹⁸Inchen gatøgucha judíosmerabe kørenrrab inchimeelø gòn ke ashmíig købig kua, katøle ashibig misritamappe. Incha tru tamarinabigwei møskalanguen amrrunrrai wama, ¹⁹nømunne trenchib payibelø gòn:

—¿Ilig tru ñimui nusrkain gúitarru cha, tru ñim kerrigu ashmíig kal-lan? daig. ¿Trube, møimbe mandø incha ashibig misrah?— cha.

20Inchene mōskaløbe trenchibelø gøn:

—Namui nusrkaiwein gøn cha, tru kerrigu ashmíig kal-labig.

21Inchendø ashibig misrtrappe, mandø indigwane nambe trunune ashmer cha. Katø ya ashibig misrtraimbe kabmerane mu tamarin gúi namgucha ashmer cha. Ñimbe nunashib payay chibelø gøn, yandø kølig køn cha, nōashib maig kuigwan eshkanrrun— cha.

22Mōskalø øyeeg chippe, judíosmeran korig køptørre øyeeg chibelø gøn, kaguende judíosmerabe mōikkøben: “Jesúsuan Cristo gøn” chibigwane nōmui tulundzuni yaugurri wegutchab waminchaguen gøben. 23Incha treekkurri mōskaløbe trendaig købig køn:

—Nunashib payay cha, yandø kølig køn— cha.

24Incha judíosmerabe tru ashmíig køb mōwane katøle wama, trenchibelø gøn:

—Tiuswane maya nuguen tabig waminchi cha. Nambe tru mōøbe kaig marøbig kui asha guer— cha.

25Inchene nōbe trenchibig køn:

—¿Kaig marøbig køh? Kabe: ¿Kaig marmíig kø, chindi? Nabe trunune ashmur cha. Nabe kerrigu ashmíig købig kuig, mōimbe yandø na ashibig misrigwan nabe trunune isua basrar— cha.

26Inchen katøyug bayibelø gøn:

—¿Chi marta? cha. ¿Ashibig misrtraimbe mandinda?— cha.

27Inchene nōbe lōtappe, trenchibig køn:

—Yamba chab eshkaben, ¿mørmeelø gø chindah? cha.

¿Chindimbarre katøyug mōramig balaingøgue? cha. ¿Ñimgucha kabe nui mendig amōñibelø misrøg køtah?— cha.

28Inchene nōmbe nun trōmbøig tsalø wamabe, trenchibelø gøn:

—Ñibeguende tru mōwei mendig pasran cha. Trune namuimburappe, nambe Moisés maig chiben treegwan bōnrrabelø guer cha. 29Moiséswane Tius wamindig kui nambe ashibelø guer cha. Trune tru mōwane chuig kuinguen nambe ashmeelø guer— cha.

30Inchen tru mōøbe trencha lōtabig køn:

—Pøs, kan øyeegweinrre mandø gúinguen mōramgaig, ke kwaara asamdiig tabig køn cha. Ñimbe chugurri arringuen ashmuben, trune nane kabmeran ashibig martan cha. 31Nambe trendø ashibelø guer cha, kaig marøbelane Tiusbe mōrmíig kuin gúi, trune mōikkøben nun kōriibala tabig waminchibigwane nōbe mōrøbig kui. 32Managuen kan

kal-lainukkurri ashmíig kal-labigwan mu tamaran daig manasrøngurri mugucha wammøra gømøn cha. ³³Tru møg Tiusweinukkurri arrubig kømuimbe, chigucha martrab gaimain gømbala— chibig køn.

³⁴Inchene nømbe trenchibelø gøn:

—Ñi, yeeg kaig mariitø netsaig kal-lawaiig købendø ñnamungan ñibe kusrenanrrab indirru?— cha.

Incha nømbe nune judíosmera tulundzuni yaugurri weguchibelø gøn.

Tiusweiwan ashibelø guer chibendø, ashmeelø

³⁵Inchen Jesúsbe tru ashmíig købigwan judíosmera tulundzuni yaugurri wegutsin gøn daig wammøra, nun katabe, trenchibig køn: —¿Ñigan tru Møg Misra Arrubigwan køretirru?— cha.

³⁶Inchene tru møøbe trencha løtabig køn:

—Au, Kasuku, ¿truibe mu gøh? cha, na nun kørenrrab— cha.

³⁷Inchene Jesúsbe trenchiptinchibig køn:

—Ñibe ashibguen indan cha. Ñiba waminchib pasrabig, nabe truig kur— cha.

³⁸Inchene tru møøbe trenchibig køn:

—¡Señor, nabe ñun kører!— cha.

Incha nun køriibala tabig waminchibig køn. ³⁹Inchen Jesúsbe trenchibig køn:

—Nabe yu piraumay arruppe, maig kønrrabigwan asha martrab arrig køn cha, ashmeeløbe ashibelø misrtrai; Inchen ashibeløbe ashmeelø misrtrain— cha.

⁴⁰Inchen møiløgøsrøn fariseosmera Jesúsba pønrrabelø tru trendaigwan mørabe, trenchibelø gøn:

—¿Kabe namgucha kabgar ashmeelø gøbra chindah?— cha.

⁴¹Inchene Jesúsbe løtappe trenchiptinchibig køn:

—Ñim ashmeelø gúig kuimbe, ñim kaig marig chigar gøbsruinrrun cha. Inchendø mømibe ñim ‘ashibelø guer’ chib pønrraikkurri ñimui kaig mariiløbe ñimuinug pasrabwei indan cha.

Ubishameran tulisha kanbalatø keerigwan kemesra waminchib

10 ¹Nabe ñimun isa gømø, cierton trendamønrrun cha: Ubishameran tulisha kanbalatø keerinug tru yaskabwan guebimøtø, nøørø pegwan guebibiibe, truibe niliig, katø maig købash marøb wesrabig, treeg køn cha. ²Trune tru yaskabmay

guebibiibe si, tru ubisha ashibig kòn cha. ³Yaskab gurøb pasrabiibe nõ kebinrrai yaskabwan kuren, ubishamerabe tru ubisha ashibigwei wamwan mørøbelø gòn cha. Incha nõbe nui ubishameran nõmui munchiwan, nõmui munchiwan wama, tru keerinukkurri wambig wesrun cha. ⁴Yandø kerrigu nuielan chab wesrawabe, nõbe ubishamerai merrab iben, ubishamerabe wendautø ambubelø gòn cha, kaguende nui wamwandø tsabø mørøbelø gua. ⁵Trune kan asiimíig pegwane managuen wendautø amrraamøn cha. Nuinukkurrimbe luløptinchun cha, kaguende asiimeelai wamwane mu gúi mørmeelø gua.—

⁶Jesúsbe iigwan ‘øyeeg lataitøwein gòn’ cha, kemesra waminchene, øyeeg chippe, chiwan wamindinguen mørmeelø gòn.

Jesús, tru Ubisha Ashibig Tabig

⁷Incha Jesúsbe katø nõmun trenchibig kòn:

—Nabe ñimun isa gømø, cierton trendamønrrun cha: Ubishamera kebambig yaskappe na gur cha. ⁸Mayeeløba na arrumøwatø amrrubeløbe nileelø, maig købash marøb nila wesrabelø gøben, ubishamerabe nõmune mørmuig kòn cha. ⁹Nabe yaskab gur cha. Møikkøben nai yaskabwan kebarrubiibe kaigyugurri wesraig kònrrun cha. Truibe kebib, webarrub llirab uña, pumera mamelø wetørranrrun cha.

¹⁰Kan niliibe nilønrrappah, kwetchappah, ka pinishinrrappatø arruben, trune nabe arruppe, srøig øsig kømigwan tøgagønrrai arrur cha, trurrigu tøgagømburab tøgagønrrai. ¹¹Nabe ubishameran tru purø tab ashibig truig kur cha. Tru ubishameran tab ashibiibe nui øsig kuigwan ubishamerayasig purøbasran cha. ¹²Trune tru ka anweindø ashibiibe ubisha mabig lobo arri ashippe, ubishamerane chinchaindø luløptinchun cha, kaguende tru ubisha ashibig kømøwei, katø ubishameragucha nuielø gømøwein gúimba. Inchen lobobe ubisha sötøyu kelula, merrarraben, yandø tru ubishamerabe nõørøtø misran cha. ¹³Tru anweindø ashibe luløptindan cha, kaguende anwandø isubig kua, ubishamerane nõm gusrenrraindø.

¹⁴⁻¹⁵’Nabe ubishameran tru purø tab ashibig truig kur cha. Nai Møskaimbe nan tab ashen, nagucha nai Møskawan tab ashar cha. Øyeetøwei nabe nai ubishameran ashen, nõmgurringucha nane ashibelø gòn cha. Incha nabe nai øsig kuigwan ubishamerayasig

purøbasrar cha. ¹⁶Nabe katøgan ubishamera tøgagur cha, i tulyuig komeelø. Truilangucha nane pera arrumig palønrrautan cha. Truiløbe nai wamwan mørtrun cha. Trumaybe ubisha sötømera kandø misren, ubishameran ashibikkucha kandø gønrrun cha.

¹⁷Inchawei nai Møskaimbe nan undaguig køn cha, kaguende katøle utønrraptø, nabe natøwei nai øsig kømigwan tranig kuimba. ¹⁸Nane nai øsig kuigwan mugucha kerranrraamøtan cha. Treeg kømøtø, na naashib tranar cha. Nabe øsig kuigwan mu mandamgaig tranamig tøgagøb, katø mu mandamgaig katøle na utamig tøgagig kur cha. Øyeeg maramigwane nabe nai Møskawan utig køn— cha, trenchibig køn Jesúsbe.

¹⁹Inchen øyeeg wamindigwan judíosmera mørabe, katøguen nørøtø misrøbelø gøn. ²⁰Incha møløgøben trenchibelø gøn:
—Kwaimandzig tøgagig kua, chugúinguen mormíig basran cha. ¿Chinchabrre mörgue?— cha.

²¹Trune kaneløbe trenchibelø gøn:
—¿Mu kan kwaimandzig tøgaiikkan øyeeg waminchaitarru? cha. ¿Kabe kan kwaimandzikkan ashmeelan tamartraitama chindah?— cha.

Judíosmera Jesúswan kaashib

²²Inchen Jerusalénsrømbe fiesta marøb gøbig køn, tru merrabsrø Tiuswei yawan Tiusweindø gønrrain cha tranøb marigwan katøle trunun isunrrab. Inchen larrø bishim bølmera gøbig køn. ²³Inchen Jesúsbe tru Tiuswei yau tru yaguetawan, Salomónwei yaskab tainug llirab uñene, ²⁴truyu judíosmera tulsruabe, trencha payibelø gøn:

—¿Nam mu gúinguen mormíig melønrrai managatiirre øyeetø, øyeetø namun tøgagønrragu? cha. Isa gømø, ñi Cristo guabe, trube, kanmaytø kelarrab eshkau bøs— cha.

²⁵Inchene Jesúsbe trencha løtabig køn:
—Yamba ñimun eshkaben, ñimbe na Cristo gúitamab køremøn cha. Na nai Møskawei munchiyu na chigøben mariilø, truiløbe naimburab treegwein gøn chib eshkan cha. ²⁶Inchendø ñimbe nai ubisha utuelø gømøwa, nane køremøn cha. ²⁷Nai ubishamerabe nai wamwan mørøbelø gøben, nagucha nømun ashibig kur cha. Incha nømbe nai mendig amrrubelø gøn cha. ²⁸Nabe nømune managatig øsig kømigwan tranen, managuen pinønrrabelø gømøwei, katø nai taskugurrimbe mugucha kerranrraamøn cha. ²⁹Nai Møskai

nan truilan tranøbiibe mayeelan purab nuig køben, Møskawei taskugurrimbe mugucha kerranrrab gaimanrrun chibig køn.

³⁰Naba, nai Møskaimbabe kandø guer— chibig køn.

³¹Inchene judíosmerabe kwetchab srug muta petønrrab katøguen srug kusruben, ³²Jesúsbe trenchibig køn:

—Nabe nai Møskaweimbubabelan ñimui merrab chigøben purø nørreelø marøb kenamarig køn cha. ¿Tru na treeg tabig mariiløyu, møig kalø gúindørre nane sruutøga betønrrainchigue?— cha.

³³Inchene tru judíosmerabe trenchibelø gøn:

—Nam sruutøga petappe, ñi tabig marikkurrin gømtø, ñi Tiusweimbubab purø rrømbøig wamab, tru ñibe ka møøtø gøbendø: “Tius kur” chib pasraikkurrindø nambe petønrrab inder— cha.

³⁴Inchene Jesúsbe nømune trenchibig køn:

—¿Tru maig maramigwan martrai ñimui pørigube øyeeg chibig pørig pasrømuittarru cha: “Ñimbe tiusmera gøn” cha, Tiusbe trendan taig. ³⁵Tru Tiuswei wam pørigwan wamindinabelandøguen: “Tiusmera gøn” cha wamig købene, (katø tru Tiuswei wamwan pørigwane ka treeg kønmab ashatø tarømarøptindamig kømøn cha,) ³⁶trube, Møskai nuyasiitø tarømara, yu piraumay karua ørig: “Na Tiuswei Nusrkain gur” chibene: “Ñibe purø rrømbøig wamab pasran” cha, ñimgan trenchib gøtirru? cha. ³⁷Nai Møskai mariilan na marmubene, trube, køremørrunrigay cha. ³⁸Inchen nai Møskai mariilan na marene, trube, nan nui Nusrkain gúitamab køremuindøgucha, tru na mariilandøguen kørey chibig køn. Nai Møskaimbe nainug basrøben, katø nabe nai Møskaweinug basrabig kuin gúi nebua ashib, chigúi mørøb inchappe.—

³⁹Inchen nømbe katøguen Jesúsban merrarrawa, sruamrrab inchen, nøbe nømui utugurri iptinchibig køn.

⁴⁰Incha Jesúsbe tru Jordán pi ambøgatøsrømay katø ya, truyu kørrømisrøbig køn, Juan tru srøtøzhiitø misaameran pi umbu ulsrøb uniisrø. ⁴¹Inchen misaamerabe Jesúsweimay truba nu ambabe, nømdø trenchibelø gøn:

—Juanbe Tius nøba pasrain gúi asha gønrrai mariilø marøppe, marmuindøgucha, ø møweimbubab ø chi wamindiiløbe kerriguba isa gømbwei indin gøn— cha.

⁴²Incha misaamerabe Jesúswan truba nu kørebelø gøn, truyube.

Lázaro kwaig

11 ¹Kan møg Lázaro taig Betania pueblosriig tru Maríaimba, Martaimba nuchaabe kwanrrø tsubig køn. ²Tru Maríabe, Señorwei srøb pala tru purø may irrabzhigwan lusha, nui srøbwan pusruutøga pinømørøbig købig, truig køben, tru Lázaro kwanrrø tsubiibe nui nuchag købig køn. ³Inchen tru nui pa nuchaløbe Jesúsweisrømay karua ørøbelø gøn:

—Señor, ñi undaaraibe kwanrrø tsun— cha, eshkanrrai.

⁴Inchen Jesúsbe trunun mørabe, trenchibig køn:

—Tru kwanrrøbe kwam gwanrrø gømøtø gøn cha. Treeg kømøtø, Tiuswei maya nuguen tabigwan kenamaramigweyasig køn cha, treeg mariitøga Tiuswei Nusrkawan maya nuguen tabig marig kønrrai.—

⁵Jesúsbe Martanba, numøsrawanba, nuchawanba truba undaguig kwagucha, ⁶tru Lázarobe kwanrrø tsun daingucha, tru nø tsuinug katøgucha Jesúsbe pa gwaløm srarrabig køn. ⁷Incha nøbe nui kusrenanøb pera uniilan trenchibig køn:

—Judeasrømay katø amun— cha.

⁸Inchene nømbe trenchiptinchibelø gøn:

—Kusrennøbig, judíosmera trusrø yamba ñun srug muta, peta ñun kwetchab inchib gúig yandø yanatø gøben, ¿trusrømay katø inrrapteh?— cha.

⁹Inchene Jesúsbe trenchibig køn:

—¿Kan mawabe doce uras tøgag kømuitarru? cha. Pøs, kan kwaløm uñibiibe srurrengwamøn cha, kaguende yu pirau tør pilimba. ¹⁰Trune kan yem uñibiibe srurrengwanrrun cha, kaguende yembe tør chigaig løstiig kua.—

¹¹Inchabe gatø Jesúsbe trenchibig køn:

—Lázaro namui trendø asiibe kiain gøn cha. Inchendø nabe nun kasrønanrrab inrrab— cha.

¹²Inchene nui kusrenanøb pera uniiløbe trenchibelø gøn:

—Señor, trube, kiptø tsuibe, treebe tammisrtrab gúinrrun— cha.

¹³Jesúsbe Lázaro kwain gøn cha waminchib pasrøben, trune nui kusrenanøb pera uniiløbe: “Ka kib tsun” chitanmab isua bønrrabelø gøn. ¹⁴Inchabe Jesúsbe törgandø trenchibig køn:

—Lázarobe kwabguen indan cha. ¹⁵Nane ñimuimburappe tabguen gøtan chibig køn, truyu na mu gaagúikkurri, kaguende trumaybe ñim nan kørenrrain cha. Trube, nun ashchab amun— chibig køn.

¹⁶Inchene Tomás, tru Gemelo taibe, tru katøgan kusrenanøb pera uniilan trenchibig køn:

—Namgucha, trube, amun cha, nøba kegøtø kwanrrab.—

Jesúsbe kwabelanguen øsiiranøbig

¹⁷Incha Jesús puabe, Lázarone sørig chabguen pib gwalømguen purayain gúin gúi ashibig køn. ¹⁸Betaniabe Jerusalén bulutø gøbig køn, truyugurri kan pøn kilómetro gøsrønsrø. ¹⁹Inchen judíosmerabe Martanba, Maríanba nuchag kwain gøben menrra isui inchimønrrai, lincha burrønrrab truba yam amrruin gøbig gøn. ²⁰Inchen Martabe Jesús pub arrun daig mørøppe, katønrrab webiben, trune Maríabe yau ka gørrømisrøbig køn. ²¹Inchabe Martabe Jesúswan trenchibig køn:

—Señor, ñi yu tsuig kuinguen nai nuchag kwamumba cha.

²²Inchendø møingucha Tiuswan ñi chi miabendø, tranrrab gúi ashar— cha.

²³Inchene Jesúsbe Martane trenchibig køn:

—Ñui nuchaabe katøle øsiiranrrun— cha.

²⁴Inchen Martabe trenchibig køn:

—Nabe ashaweim basrar cha, tru kwabelø srabe gwaløm katøle øsiiraben, Lázarobe øsiirabwei inchab gúi.—

²⁵Inchene Jesúsbe nune trenchibig køn:

—Katøle øsiiramiba, øsig kømibabe na gur cha. Nan kørebiibe kwawagucha, øsig kønrrun cha. ²⁶Inchen mutøgucha øsig uñibig nan kørebiibe managucha kwanrraamøn chibig køn. ¿Iigwan køretirru?— chibig køn.

²⁷Inchene Martabe trenchibig køn:

—Nai Señor, øø, cha. Ñibe tru Cristowein gúin gúi kørewa basrar cha, tru Tiuswei Nusrkai yu piraumay attrabig købig.—

Jesús kishib

²⁸Truigwan chab rrenchabe, Martabe numøsrar Marían wamønrrab ya, nundø nilø trenchibig køn:

—Kusrennøbiibe yu pua, ñun waman— cha.

²⁹Inchen Maríabe møra mallatø kurra, Jesúswan ashchab ibig køn. ³⁰Inchen Jesúsbe katøgucha puebloyu pumø, tru Marta

katinuutø srø basrabig køn. ³¹Inchen María truba mallatø kurra, webyai ashippe, judíosmera tru yau nun menrra isui inchimønrrai lincha purrabeløbe wendautø ambubelø gøn, sörin dulsrø kishchab yaitamab isua.

³²Inchen Mariábe Jesús pasrainug puabe, nui merrab trenchib tømboñsrøbig køn:

—Señor, ñi yu tsuig kuimbe, nai nuchag kwamumba— chib.

³³Inchen Jesúsbe Mariába, katø tru lincha amrrubelø judíosmeragucha kisi ashabe, nuinetø truba rruba isui inchibig, kan mandøguen gømui inchib køn. ³⁴Incha nømun trencha payibig køn:

—¿Chu sörøgue?— cha.

Inchene nømbe:

—Señor ashchab amø— chiben,

³⁵Jesúsbe kishibig køn. ³⁶Inchen judíosmerabe trenchibelø gøn:

—Au, truba undaguig kwaasøna— cha.

³⁷Inchen mõiløgøsrønbe nømdø trenchibelø gøn:

—I møg tru kab ashmíigwanma tamarøbiibe, ¿Lázarongucha kwamønrrai inchibsrømøsha?— cha.

Lázaro katø øsiirab

³⁸Inchen Jesúsbe katøle nuinetø truba rruba isuim basrøwa, tru sörinug kemallibig køn. Truibe kan nu rrab gøbig køn, kebambinuube kan nu sruutøga kasraikke. ³⁹Inchene Jesúsbe trenchibig køn:

—Srugwan kusruy— cha.

Inchen Marta tru kwabigwei nuchaabe trenchibig køn:

—Señor, yandø irrøraig kuinrrun cha. Kaguende kwaibe chabguen pib gwalømguen gøn— cha.

⁴⁰Inchen Jesúsbe nun trenchibig køn:

—¿Yamba na ñun trenchib mørgøppeh cha, ñi nan kørewabe, Tiuswei tørguegwalmabigwan ashchabguen?— cha.

⁴¹Inchen yandø srugwan mendamaren, Jesúsbe srømbalaneb neeshabe trenchibig køn:

—Nai Møskai, mayanguen ungwa, ungwa cha, kaguen nan mørtan cha. ⁴²Ñibe chu uraskucha nane mørøbig køn cha. Inchendø nabe øyeeg chippe, misaamera yu pøtøgatan pønrraikkurri trenchar cha, nane ñi garua ørig kui kørenrrai.—



San Juan 11.41

⁴³Incha iigwan chab rrenchabe, truba mur wamabig kòn:
—¡Lázaro, webamø!— cha.

⁴⁴Inchene tru kwabiibe tasiimeran srømmeran llensumeratøga kirrig, maløwane llensutøga pinappulig webarruptinchibig køn. Inchene Jesúsbe nòmun trenchibig køn:

—Picha, ibasay— cha.

Jesúsuan kemørtrab waminchib

(Mt 26.1-5; Mc 14.1-2; Lc 22.1-2)

⁴⁵Inchen judíosmera truba nu tru Marían ashchab amrrubeløbe, Jesús treeg marigwan asha, Jesúsuan kørebelø gøn. ⁴⁶Inchen truyu mōiløgøsrøn fariseosmeraisrømay ambabe Jesús chi marigwan nòmun waminchen, ⁴⁷sacerdotesmeran karubeløba, fariseosmeraba misra, tru maig maramigwan asha marøbelø Setenteelan wama, tulundzunabe, trenchibelø gøn:

—¿Nambe mandø inchab? cha. Kaguende tru møøbe Tius nøba pasrain gúi asamig truba rruba mariilø kenamaran cha.

⁴⁸Øyeetø martrai nam elachene, mayeeløba nun køreben, Romasrø karubeløbe amrrua, namui Tiuswei yawanba, namui maya misagwanba chab pinishinrrun— cha.

⁴⁹Inchen mōikkøsrøn nòmui utuig, Caifás taig, tru bilawan maya sacerdotesmeran nø garub sacerdotebe trenchibig køn:

—Kan ñimbe ni chigúinguen mormøwa gøn cha. ⁵⁰Maya misagwan ørøba pinisailø gøbgunrriibe, nam maya misagweyasig kan møøtø kwamikken søl gúi, treegwandøguen ashmeelø gø chindah— cha.

⁵¹Incha Caifásbe trenchippe, ka nø trenchig køptø trenchimuig køn. Kaguende tru bilawan nøbe tru maya sacerdotesmeran nø garub sacerdote kuig køppe, Tius trenchinrrai isungaruben trendaig køn, maya judíosmerayasig Jesúsbe kwanrrab gøn cha. ⁵²Katø tru i maya misagweindø gømøtø, mayeelø Tiuswei ureemera truørø amba warabelan kanbalatø tulundzunamig kønrrai, treegweyasiiba gøn cha. ⁵³Tru gwalømgurri judíosmeran karubeløbe Jesúswane kwetchab cha waminchibelø gøn.

⁵⁴Treekkurri yandø Jesúsbe judíosmerai utube mayeelø ashchai uñmíig køn. Incha Judea biraugurri webya, kanbalø mu misag warab waraimønug tru buluwansrø, Efraín daig pueblosrømay ibig køn. Incha trusrø nui kusrenanøb pera uniiløba kørrømisrøbig køn.

⁵⁵Inchen tru judíosmerai Pascua Fiesta pumig yandø lamø baløben, wambig nørørørøngurri misaamerabe Jerusalénsrømay truba nebambubelø gøn, kaig marigwan chish misrtrab, tru Pascua Fiesta pumøwatø. ⁵⁶Jesúsuan lab amøña, Tiuswei yau purrøwabe, nømdø kangurrin gangurri trenchib payiyabelø gøn:

—¿Ñimbe maig isugue? chib ¿fiestayumaybe ni arrubguen inchimuisruandø?— chib.

⁵⁷Inchen sacerdotesmeran karubeløba, fariseosmerababe karuin gøbig køn, møikkøben Jesúsuan chu wai ashibiibe, eshkanrrain cha, Jesúsuan kemørtrab.

Kan ishug purø may irrabzhigwan Jesúsuan itølushib

(Mt 26.6-13; Mr 14.3-9)

12 ¹Pascua Fiesta maramig trunewei pa gwaløm baløbenba Jesúsbe Betaniasrømay ibig køn, tru kwabelai utugurri nø øsirangaruig møg, Lázaro tsuisrømay. ²Truyube Jesúsuan tab inchab kan mamig tamara nena, Martabe pirishiben, Jesúsba mishatsigu purrabelai utu Lázarogucha wabig køn. ³Inchene Maríabe purø may irrabzhig nardotøzhig marig libraburab srua arrubig køn, truiibe truba nuweyig. Incha nøbe Jesúswei katsig tambalyu itølushabe, nui pusruutøga pinømørøbig køn. Inchen tru may irrabzhiitø ya ørø kebig køn. ⁴Inchen Judas Iscariote, Jesús kusrenanøb pera uniilai utuig, tru Jesúsuan wendø nun ashig kømui inchibelan tranrrabiibe trenchibig køn:

⁵—¿Waachameran purugumig i may irrabzhigwan kan trescientos denarioswei yanamdiig kømø, chindah?— cha.

⁶Inchendø Judasbe waachameran isubig kua gømøtø, niliig kua, trendaig køn. Katøgucha nømui anwane nø esegab srua uñibig kua, truyu pusrigwan wesrubre inchibig køn. ⁷Inchene Jesúsbe trenchibig køn:

—Ka marbash cha. Nan søram gwalømwei esegawa tøgagúin gøn cha. ⁸Waachamerane chu uragucha ñimui utube tøgagønrrun cha. Trune nane ñimui utube ñimbe chu uragucha tøgagønrraamøn— cha.

Lázaron kwetchab inchib

⁹Truba nu sötø judíosmera Jesús Betaniasrø unan daig wammørøppe, trusrømay ambubelø gøn, nun ashchab isuatø

gømøtø, tru kwailai utugurri nø øsiiranig Lázaron ashchappa. ¹⁰Inchene sacerdotesmeran karubeløbe Lázarongucha kwetchab wamincha gørrømisrøbelø gøn, ¹¹kaguende Lázarogurrindø judíosmerabe truba nu tarømisra, Jesúsuan køreben.

Jesús Jerusalénsrø kebib

(Mt 21.1-11; Mc 11.1-11; Lc 19.28-40)

¹²Indiibe gatø gwaløm Jesús Jerusalénmay attrab gøn daig wammørøppe, misaamera tru fiestayumay purø nu sötø amrrua pasrabiibe, ¹³palma ishiimeran muta, Jesúsuan trenchib trashib katønrrab webambubelø gøn:

“iHosanna! chib.

iSeñor Tiuswei munchiyu nø ørig arrubiibe,
tru Israel misagwei Rey, mayanguen tab gúig køn!” chib.

¹⁴Jesúsbe kan burro-unøzhig pasrain gøben, trunun itøguana ibig køn, Tiuswei wamyu maig pørig køben treekke:

¹⁵“Jerusalén, kørig kui inchimøta cha.

Asay cha, ñimui Reybe kan burra llug burro-unøyu
itøguana attrun” daig.

¹⁶Srøbatøbe Jesúswei kusrenanøb pera uniiløbe øyeeg mariilane chi chibig kuinguen ashmeelø gøn. Inchen yandø Jesúsuan purø nuig, purø tabig mara kusruben, truyu wetøgørrabelø gøn, tru øyeeg pørig pønrrabiibe, nuimbura pørig pønrrøwa, nun tru øyeeg mariilan eshkabig kuin gúi.

¹⁷Tru Lázaro kwaben sørig truyu waben, tru misaamera Jesúsba pønrrabelø gøbeløbe nøm maig asigwan eshka waminchibelø gøn. ¹⁸Inchagurri tru nu misag sötøgucha Tius nøba pasrain gúi asamig i tru marigwan wammørabe, Jesúsuan katønrrab webambubelø gøn. ¹⁹Inchene fariseosmerabe kangurri gangurri trenchibelø gøn:

—Au, chiguen maramgaig køn cha. Ñimuen asay cha. Maya misaabe kerriguba nui wendautø chab amban— cha.

Møiløgøsrøn griegosmera Jesúsuan lab

²⁰Misaamera Jerusalén fiestasrø Tiusuan køriibala tabig waminchab nebambubelai utu truyu møiløgøsrøn griegosmeragucha tøgagøbig køn. ²¹Incha truiløbe tru Felipe Galilea birau betsaidasriigwan kemallabe, trenchibelø gøn:



San Juan 12.14

—Kasuku, namune Jesúswan ke asinrrabna gøtan— cha.

²²Inchen Felipebe ya, Andréswan eshkaben, nømbe pailøba Jesúswan eshkanrrab ambene, ²³Jesúsbe trenchibig køn:

—Møg Misra Arrubigweyasig purø nuig, purø tabigwan kenamaramig yandø uta pun cha. ²⁴Nabe ñimun isa gømø, cierton trendamønrrun cha: Kan tirigu rrulma pirau peña kwamøwabe, chu uragucha kan rruldø gønrrun cha. Trune pirau peña kwawabe si, truba nu larrøbichib misran cha. ²⁵Møikkøben nui øsig kømigwan undaguibe yandø pinab pinamig nebunrrun cha. Trune møikkøben yu pirau nui øsig kømigwan tsalø inchibiibe, managatig øsig kømigweyasig esegawa tøgagønrrun cha. ²⁶Inchen møikkøben naiwan marøb megabiibe, nai mendig arrumig køn cha. Incha na chu basrøben, nai mendig megabikkucha truyutøwei pasrønrrun cha. Møikkøben naiwan marøb megabigwane nai Møskaimbe nune truba tab inchun chibig køn.

Jesús nui kwamigwan eshkab

²⁷Møimbe nane manrrau isubiitø purø rrømbøig køtan chibig køn. ¿Nabe mandø chinrrab gøh? cha: “¿Nai Møskai, nan øyeeg trømbøig mõi pumønrrai purømisrtra” chinrrab gø, chindah? cha. Treeg kømøtø, nabe øyeeg punrrabigu pasrønrrabwei arrur cha. ²⁸Nai Møskai, ñui munchiwan maya nuguen tabig kønrrai mar— cha, trenchibig køn.

Inchene srømbalasrøngurri kan wam mørø, trenchibig køn:

—Nabe nai munchiwan yandø maya nuguen tabig kønrrai marar cha. Katøyukken maya nuguen tabig kønrrai maramønrrun— cha.

²⁹Inchen misag truyu mørøb purrabeløbe trenchibelø gøn:

—Kan palaig trashitan— cha.

Inchen kaneløbe trenchibelø gøn:

—Nune kan ángel wamindinrrun— cha.

³⁰Inchen Jesúsbe trenchibig køn:

—I wam mørø wamindiibe, nayasig kømøtø, ñimuyasig køn cha. ³¹Møin gøn chibig køn, yu pirau maig kønrrabigwan asha maramig. Katø møin gøn, chibig køn, yu pirau nø garub pasrabig, Satanáswan wambig wegutsamig. ³²Incha nabe piraugurri kusruig kua, mayeelø naimay amrrug kui inchai maramønrrun— chibig køn.

³³Øyamay Jesúsbe mandø kwamigwan eshkabig køn. ³⁴Inchen misaabe nune trenchibelø gøn:

—Tru maig maramigwan martrai pøriiløyube trenchibig køn daig nambe mørøbelø guer cha: “Cristobe managatig wanrrabig køn” cha. Inchen ãñibe mandø chigu cha: “Tru Møg Misra Arrubiibe kusruig kømig nebunrrun” chippe? ¿Tru Møg Misra Arrubiibe mu gøh?— cha.

³⁵Inchene Jesúsbe nømun trenchibig køn:

—Katøgucha kan maya yanatø tørbe ñimui utu pasrønrrun cha. Tør tøgagøppatø toryu amønay cha, løstiig ñimun ke ka inchib latatø merrarramønrraimbe, kaguende løstøyu uñibiibe chumay ib pasrarmabguen ashmøn cha. ³⁶Ñim tru tørwan tøgagøppatø, tørwan kørey, chibig køn, tørwei ureemera gønrrappe.—

Øyeelan chab rrenchabe, Jesúsbe tarømisra, nømuinukkurri trubabig køn.

Judíosmera Jesúswan tru Cristo gømutamab køremub

³⁷Yeeg nørreelø chigøben Tius nøba pasrain gúi asha gømig mariilø nømui merrab Jesúsbe kenamaringucha, nune køremeelø gøn. ³⁸Kaguende Isaías, tru Tius maig karuigwan eshkab møg øyah chib pørig nebunrrain gúig køn:

“Señor Tius, ¿namui eshkaigwane mu køreitarru? cha.

¿Señor Tiusbe nui maramburab maramigwan mun guenamarah?” cha.

³⁹Inchawei nømbe treeg kuitamappe køremeelø gøn. Kaguende Isaíasbe trencha børig købig køn:

⁴⁰“Tiusbe nømun kabmeran ashmeelø gønrrai marøb, katø nømui manrrømeran murelø gønrrai marøb indig køn cha,

kaptøga chigúi ashmøwei,

nømui manrrøtøga chigúinguen mørmøwei inchain cha,

nøm nuimay llirawa amrruben, tamariilø gømønrrain” chib.

⁴¹Isaías øyah chippe, Jesúswei tørguegwalmabigwan nøbe asha gua, nuimbura treeg wamindig købig køn.

⁴²Treeg kuingucha tru utu ashib karubeløguen nun truba nu kørebelø gøn. Inchendø nømbe fariseosmeran kørig køptø nøm kørewa bønrrain gúi ashchai mayelai merrappe chi kenamarmeelø gøn, tru judíosmera tulundzuni yaugurri webusriilø gømønrrab.

⁴³Kaguende nømbe misaamera maya nuguen tab indiilø gømigwan chullelø gøbig køn, Tius maya nuguen tab indig kømigwan gømøtø.

**Jesús wamindiibe misagwan maig
kõnrrabigwan asha mara kõrrõmarõb**

⁴⁴Inchen Jesúsbe truba mur waminchib trenchibig kõn:
—Møikkõben nan kõrebiibe nan gøremõtø, nai Møskai nan karua ørøbigwan gøren cha. ⁴⁵Inchen nan ashibiibe, nan karua ørøbigwan asan cha. ⁴⁶Nabe arruppe, yu piraumay kan tør lataig arrig kõn chibig kõn, mutøgucha nan kõrebiibe lõstøyu kõrrõmisra pasrømõnrrai. ⁴⁷Inchen mõikkõben nai wamwan mørendø, maig taigwan møra marmigwane, nun maig maramigwane na asha marmur cha. Kaguende nabe yu pirauelan maig maramigwan na asha mara gørrõmartrab arrumõtø, misagwan kaigyugurri wesranrrab arrig kõn cha. ⁴⁸Inchen mõikkõben nan kaashib, na wamindigwan mormub inchibiibe, maig kõnrrabigwan asha kõrrõmartrabig chabguen nõbe tøgaguen basran cha. Tru na nun wamindi wamdøwei tru srabe gwalømbe nun maig kõnrrabigwan asha mara kõrrõmartrun cha. ⁴⁹Kaguende nabe waminchippe, naimburaptø waminchimõtø, Møskai nan karua ørøbig chi tamigwan chiwan wamindamigwan nane nø garuig kõn cha. ⁵⁰Incha tru nø martrai karua pasriibe managatig øsig kõmig, treeg kui, nabe ashar cha. Inchawei na waminchippe, nai Møskai nan maig wamindingaruigwan nabe treeg waminchar— cha, trenchibig kõn Jesúsbe.

Jesús nui kusrenanøb pera uniilan srøbwan kwallib

13 ¹Yandø tru Pascua Fiesta pumig kan gwalømdø baløben, yandø yu piraugurri Møskawesrømay yamig puin gúi Jesúsbe ashibig kõn. Yu pirau amøñibelan nuielane chu uragucha nõbe undaarabig kua, mõimbe øyeeg newan srabegatig undaaraig kõn. ²Inchen mab purramnetø nugwaimandziibe Simónwei nusrkai, Judas Iscariotei manrraube, Jesúswan ashig kõmui inchibelan tranrrai isungarubig kõn. ³Inchen Jesúsbe chiwandøgucha nø asha martrai Møskaimbe nui tasku pønsrain gúi ashib, katø nõbe Tiusweinukkurri webarrua arrua, katø Tiusweimaytøwei yamig kui ashib inchibig kõn. ⁴Incha Jesúsbe mab wainukkurri kurra basramisrøb, pala kewa basraigwan wesrawa, kan toallan nemøra, pørønawa, ⁵trugurrimbe kan paila-unøyu pi usrøb, nui kusrenanøb pera uniilan srømmeran kwalla, nui pørønawa pasraig toallatøga pinømørøbig kõn.

⁶Incha tru Simón Pedron srøbwān kwallchab inchene, nøbe trenchibig køn:

—¿Señor, ñigan nan nai srømmeran kwallchaindirru?— cha.

⁷Inchene Jesúsbe trencha løtabig køn:

—Na mõi marøb waigwane ñibe chigúinguen ashmøn cha.

Inchendø tsøndasrømbe chigúi ashchun— cha.

⁸Inchen Pedrobe trenchibig køn:

—Nan gúimbe, managuen ñibe nai srømmerane kwallchaamøn— cha.

Inchene Jesúsbe trenchibig køn:

—Na ñui srømmeran kwallmubene, ñibe nainuube chi asamig tøgagømønrrabguen— cha.

⁹Inchen Simón Pedrobe trenchibig køn:

—Señor, trube, treeg købene, srøbwandø gwallmøtø, tasigwan kinøsrøb, turwan chishtø birtra— cha.

¹⁰Inchene Jesúsbe trenchibig køn:

—Chab piraibe srøbwandøwein gwalamig balan cha. Kaguende asr ørøba chishtø gøn cha. Ñimbe yandø chishelø gøn cha, søteeløbabe treetø gømuingucha.—

¹¹Nun tru ashig kømui inchibelan tranrrabiibe nøbe manawei mu gúi asha gua: “Søteeløbabe chishelø gømøn” cha trendaig køn.

¹²Yandø Jesúsbe nømui srømmeran chab gwalla, nui pala kewagúigwan katøle kewa, mishatsigu wamisrabe, trenchibig køn:

—¿Na ñimun øyeeg marigwan ñimbe chigúi mørgueh? cha. ¹³Ñimbe nane: “Kusrennøbig” cha wamamba, katø: “Señor” cha wamamba indan cha, trumaybe sølwein dan cha. Kaguene nabe treegwein gur cha. ¹⁴Pøs na Señor, na Kusrennøbikken ñimui srømmeran kwallene, ñimgucha kangurrin gangurri srømmeran kwalamig køn cha. ¹⁵Nabe ñim asha kusrenrai mara basrar cha, na mari lataitøwei ñimgucha martrai. ¹⁶Pøs nabe ñimun isa gømø, cierton trendamønrrun cha: Kan mendig megabiibe nun martrai karubigwan purab nuig kømøn cha. Katø kan karua øriinabiibe tru karua ørøbigwan purab nuig kømøn cha. ¹⁷Ñim iilan chigúi asha, treegwan marabe, mayanguen tab gúilø gøn cha.

¹⁸Nabe ñimun øyeeg waminchippe, søteelanbabe øyeeg chimur cha. Kaguende møilan na lawa wesruilø gúi nabe asha basrar cha. Inchendø, Tiuswei wamwan pørigu øyeeg pasrabig nebunrrain gøn cha: “Tru naba lincha mab wabiibe nan srøb gusrawa eshkan” daig. ¹⁹Inchawei nabe møingurri nabe ñimun eshkar cha, øyeeg

puraimøwatø, øyeeg purai bene, tru Nabe Na gúin gúi kørenrrai.
 20Pøs nabe ñimun isa gømø, cierton trendamønrrun: Na karua
 ørigwan tab wamab utabiibe nan utan cha. Inchen nan utabiibe
 nan karua ørøbigwan utan— chibig køn Jesúsbe.

**Judas ashig kømui inchibelaingatø pasramisrtrab gøn cha,
 Jesús eshka**

(Mt 26.20-25; Mc 14.17-21; Lc 22.21-23)

21Jesúsbe iilan chab rrenchabe, nune chindamguengaig isuben,
 maig kuigwan kelarrab eshka trenchibig køn:

—Nabe ñimun isa gømø, cierton trendamønrrun cha: Ñim møikkøsrøn
 nan ashig kømui inchibelaingatø misra, nan tranrrab gøn— cha.

22Inchen nui kusrenanøb pera uniiløbe mun waminchib waig
 mormøwa, nømbe kangurri gangurri malau asiyabelø gøn.

23Inchen møikkøsrøn nui kusrenanøb pera unig mas undaaraibe
 Jesúsweim bulu mab wabene, 24Simón Pedrobe mun waminchib
 wain gúi pay chib, señas marøbig køn. 25Inchen tru pulu wabiibe
 pechoyu kemenda, Jesúswan payibig køn:

—Señor, ¿møig kerah?— cha.

26Inchene Jesúsbe trenchibig køn:

—Na pirrim bitin kebisha, møigwan rranen, truig kønrrun— cha.

Incha pirrim bitin kebisha, Simón Iscariotei nuskaí Judaswan
 rranøbig køn. 27Inchen Judas pirriwan utøben latatø, Satanásbe
 nui manrrau kebiben, Jesúsbe trenchiptinchibig køn:

—Tru ñi marøb pasraigwane petø mar— cha.

28Inchen mishatsigu mab purrabeløbe chindimba rrendermab
 møikkucha chi tainguen mormeelø gøn. 29Katøgucha Judasbe
 anwan nø esegawa sruaig købene, møiløbe treeg isubelø gøn:
 “Jesúsbe fiestayuweí chi palabigwan penøtah, kabe waachameran
 maitøguen tranø” ta, chindermab.

30Inchen yandø Judasbe pirriwan utaptø webiben, yandø yem
 gøbig køn.

Kan srøig martrai karua pasrig

31Inchen yandø Judas webiben, Jesúsbe trenchibig køn:

—Mømbe tru Møg Misra Arrubiibe maya nuguen tabig indig
 kønrrai maren, Tiusbe nuinug maya nuguen tabig indig kønrrai
 maran cha. 32Tiusma Cristoinug maya nuguen tabig marig kuig

køppe, Tius nøgurringucha Nusrkawane nuinuutøwei maya nuguen tabig martrun cha. Tru purø nuig tabig kønrrai maramigwane petø martrun chibig køn. ³³Nai ureezheelø, yandø ñimbabe maya yanatø unamønrrun cha. Ñimbe nane lanrrun cha. Inchendø na judíosmeran trendaig købigwandøwei møyimbe ñimun rrendamønrrun cha: “Na yamsrømay ibene, ñimbe amrrunrrab gaimanrrun” cha. ³⁴Nabe ñimune kan srøig martrai karua pasarar cha: kangurrin gangurri undaarayamig. Na ñimunma mandø undaaraibe, treetøwei ñimgucha kangurrin gangurri undaaramig køn cha. ³⁵Ñim kangurrin gangurri undaguelø gøbene, maya misaamera ñimune nai kusrenanøb pera uniilø gúi ashchun—chibig køn.

Pedron Jesúsbe nan ashmfig kur chinrrautan chib

(Mt 26.31-35; Mc 14.27-31; Lc 22.31-34)

³⁶Inchen Simón Pedrobe Jesúsban trencha payibig køn:

—Señor, ¿Chumay inrrainchigu?— cha.

Inchene Jesúsbe trenchibig køn:

—Na yamsrømay ibene, ñibe nai mendig attraamøn cha møyimbe. Inchendø tsøndatøsrømbe si, attrabguen— cha.

³⁷Inchene Pedrobe trencha løtabig køn:

—Señor, ¿møyimbe nabe chindimba arrumønrrain gøh? cha. Nabe ñuimburaib nai øsig kuigwan tranrraptøweim basrar— cha.

³⁸Inchene Jesúsbe trenchiptinchibig køn:

—¿Ñigan isa gømø, naimburab ke kwanrraptø basrar chitirru? cha. Pøs nabe isa gømø, cierton trendamønrrun cha: Kallu wamømøwatø, ñibe pønmayguen nan ‘ashmfig kur’ chinrrautan cha.

Jesúsbe Møskaweinug pumig may gøn

14 ¹Ñimbe ñimui manrrau ke kan mandø gúinguen gømui lataig isui inchimøtay cha. Tiuswan køreb, katø nangucha kørey chibig køn. ²Nai Møskawei yaube purramig truba rruba pønrran cha. Treeg pønrrømuimbe, trube, kanmaytø eshkabsrubrainrrun cha. Nabe ñimuyasig purramig trusrø tamartrab yar chibig køn. ³Incha nabe ya, tru purramigwan chab tamarabe, katøle nabe natøwei ñimune pera inrrab arrumønrrun cha, na chu waben, ñimgucha truyutøwei purrønrrai. ⁴Ñimbe tru

na chumay yamigwan ashíb, katø maywan ashíb inchibelø gøn—chibíg køn.

⁵Inchene Tomásbe Jesúsban trenchibíg køn:

—Señor, ñibe chumay inrrab gúinguen mormer cha. ¿Mas maywane nambe mandø incha asig kwaasamørø?— cha.

⁶Inchene Jesúsbe trenchibíg køn:

—Nabe may gøb; tru newan ciertonig køb; katø øsig kømig køb gur cha. Inchawei Møskaweimaybe nagurrin gømíbe mugucha attraamøn cha. ⁷Ñim nan isa gømø nebua ashibelø gúig kuimbe, nai Møskawangucha nebua ashibelø gøbsruig kuinrrun cha. Møingurrimbe Møskawan nebua asan cha. Mømbe yandø ñimbe kaptøga asin gøn— cha.

⁸Inchene Felipebe trenchibíg køn:

—Señor, Møskawan namun asingarurra cha. Trutøgabe tsabø gønrrautan— cha.

⁹Inchene Jesúsbe trenchibíg køn:

—Felipe, ¿katøgucha nane mu gúi ashmøtirru? cha, na ñimui utu ya yana uñen. Nan ashibiibe, Møskawangucha asan cha. Treebe ¿ñibe mandø chigu cha: “Møskawan asingarurra” chippe? ¹⁰¿Nabe nai Møskaweinug basrøben, nai Møskaimbe nainug basrain gúi ñigan køremøtirru? cha. Na ñimun wamindiiløbe ka naimburaptø wamindiilø gømøn cha. Treeg kømøtø, Møskai nainug pasrabig nui maramelan marøbig køn cha. ¹¹Nabe nai Møskaweinug basrøben, nai Møskaimbe nainug basrabig kuin gúi kørerray cha. Trengømuppe, na mariilandøguen isua asha, kørey chibíg køn. ¹²Pøs nabe ñimun isa gømø, cierton trendamønrrun cha: Nan kørebiibe nøgucha na mariilan martrun cha. Incha treetøguen gømø, mas nørreeløguen martrun cha. Kaguende nabe Møskawesrømay inrrainchar cha. ¹³Chiwandøgucha nai munchiyu miabene, trunune nabe maramønrrun cha, Nusrkai Møskawan maya nuguen tabig kønrrai martrab. ¹⁴Chiwán gøben ñim nai munchiyu miabene, nabe maramønrrun, chibíg køn Jesúsbe.

Jesús Espíritu Santon ørtrab misrøb

¹⁵Ñim nan undaguelø guabe, na maig maramigwan martrai põnsrailan møra martrun cha. ¹⁶Inchen nabe Møskawan miamønrrun cha. Inchen nøbe katøgan chi isumønrrai Puømisrøb Lincha Basrønrrabig ñimun tranrrun cha, managucha ñimba lincha basrønrrai, ¹⁷tru Espíritu newan ciertonigwan. Truigwane

tru Tiuswan ashmø misaamerabe utønrrab gaiman cha, kaguende nune ashmøwei, mu gúi mormøwei inchibelø gua. Trune ñimbe nun ashibelø gøn cha. Kaguende nøbe ñimba basrab, katø ñimuinug pasrabig basrønrrab gøn cha.

18'Nabe ñimundø peta korrøarmøtø, nabe katøle ñimuimay arrumønrrun cha. 19Kan maya yanayutø nane yu pirau misaamerabe nane mas ashmuben, trune ñimbe nan ashchun cha. Na øsig waikkurri, ñimgucha øsiguelø gønrrun cha. 20Inchen ñimbe tru gwalømbe nai Møskaweinug nabe pasrabig kui ashib, katø ñimbe nainug bønrrøben, nagurrimbe ñimuinug basrabig kui ashib inchun chibig køn. 21Møikkøben na maig maramigwan martrai karuilan uta tøgagua, trunun møra marøbiibe, truiibe nan undaguig køn cha. Inchen nan undaguigwane nai Møskai undaaraig kønrrun cha. Inchen nagurringucha nun undaarawa, na maig kuigwan nuinug kenamistrtrai maramønrrun— cha.

22Inchen Judas (tru Iscariote gømø, katøgan Judasbe) trenchibig køn:

—¿Señor, pirau misaamerane ñi maig kuigwan kenamarmubendø, namune ñi maig kuigwan mandøgurri kenamartrab inchigu?— cha

23Inchene Jesúsbe trenchibig køn:

—Møikkøben nan undaguibe na maig taigwan møra martrun cha. Inchen nai Møskaimbe nun undaaranrrun cha. Incha naba, nai Møskaimba nuinumay amrrua, nambe nuinug purramønrrun cha. 24Nan undaguig kømíibe na maig taigwan mormíig køn cha. Na eshkab wamindigwan ñim mörøb gúibe nain gømøtø, nai Møskai nan karua ørøbigwein gøn cha.

25'Øyeelan nabe ñimun kerriguh trenchar cha, na ñimba pasrappatø. 26Inchendø tru Espíritu Santo, tru chi isumønrrai Purømisrøb Lincha Basrønrrabig, Møskai nai munchiyu øramig, truiibe ñimun chiwandøgucha kusrenanøb, na chi tailane kerriguh katøle isunanøb pasrønrrun cha.

27'Nabe ippe, ambumay imay chi isumgaig purø tab gøbigwan ñimun korrømarøb, katø nai chi isumgaig purø tab gøbigwan ñimun tranøb inchar cha. Tru ambumay imay tab gøbigwan na traniibe, yu piraelø rranig lataig kømøtø gøn cha. Ñimui manrrau ke mandø gúinguen gømui lataig isui inchimøwei, korig kui inchimøwei inday cha. 28Na ñimun øyeeg taigwan ñimbe mörig køn cha: “Nabe ya, katøle ñimuimay arrumønrrun” cha

trendaigwan, ñim nan, undaguelø gúimbe: “Mòskaweimay inrrainchar” taig mörøppe, ñimbe kasraarabsruinrrun cha. Kaguende nai Mòskaimbe na lataitøguen gømø, mas nuig køn cha. ²⁹Øyeeg puraimøwatø, nabe ñimune kanmaytø iigwan eshkar cha, treeg puraibene, nan kørenrrai.

³⁰Mòimbe yandø ñimbabe menrra waminchimumønrrun cha. Kaguende Satanás, yu pirau ke nø garub pasrabiibe yandø arrun cha. Truibe nababe chigucha chi asamig chigaig køn cha. ³¹Inchendø pirau misaamerabe asam gusremig køn cha, nabe nai Mòskawan undaguig køb, trurrigu nabe Mòskai maig martrai karuigwan treeg marøbig kuin gúi. 'Kurray, chibig køn, yugurri amrrab— cha.

Uvas tusrba, nui srarmeraba

15 ¹Jesúsbe katø trenchib waminchibig køn: —Tru uvas tusr ciertoniibe na gøben, nai Mòskaimbe tru ellmarøb kwallibig køn cha. ²Nøbe nainug srarmera uvas niimeelane lutiicha, petappe, trune tru uvas nigabelane katøguchingen may niirrai tamara parøb chishmarøbig køn cha. ³Ñimbe yandø chishelø gøn cha, tru na ñimun wamindig tru wamgurri. ⁴Ñimbe naba kanbalatø pønrrabig pønrray cha. Inchen nabe ñimba kanbalatø pasrabig pasramønrrun cha. Kan srarma nòasiitøbe chigucha mamig niimøn cha, tusryugue pasrømøwabe. Ñimgucha treetøwei chigucha martrab gaimanrrun cha, naba kanbalatø pønrrabig pønrrømøwabe.

⁵Nabe uvas tusr køben, ñimbe truyu srarmera gøn cha. Møikkøben naba kanbalatø pasrabig basrøben, na nuinug pasrøbene, truibe truba rruba mamig nigan cha. Inchen nainukkurri ñim nørøtø pønrraisruandøbe, ñimbe chigucha martrab gaimanrrun cha. ⁶Nainug naba kanbalatø pasrabig pasrømígwane srarwan latawei wambig weguchen, mul-lan cha. Incha treeg srarmerane tulisha, nagu parriilø gøn cha.

⁷Ñimbe naba kanbalatø pønrrabig pønrrøben, katø na wamindiilø ñimuinug pønrrabig pønrrøbene, ñimun chi miag købendø, miay chibig køn, ñimune tranig kønrrun cha. ⁸Ñim øyeeg maren, nai Mòskaimbe maya nuguen tab indig utønrrun chibig køn, ñim truba rruba mamig misrig nigab, øyamay isa gømø nai mendig amønibelø gúi kenamaren. ⁹Nai Mòskai nan

undaguig køb lataitøwei, nagucha ñimun undaaraig køn cha, nai undag købig tøgagúigu truyu pønrrabig pønrray cha. ¹⁰Na ñimun maig maramigwan martrai pønrrailan mōra marabe, nai undag købigu pønrrabig pønrrōnrrun cha. Nai Mōskai martrai nan karua pønrrailan na mōra mara, nui undag købigu pasrabig pasrab lataitøweingue.

¹¹Nabe øyeelan ñimun waminchippe, nai kasrag købiibe ñimuinug pasrøben, tru ñimui kasrag købiibe ka palabinøtiig kōmō, newanig kōnrrai inchar cha. ¹²Inchen na maig maramigwan martrai pasriibe iig køn cha, ñim kangurrin gangurri undaguelø gōnrrai, na ñimun undaarab lataitøwei. ¹³Kan muguen undag købig iigwan purab nuibe tøgagōmuinrrun cha, nui øsig kuigwan nui trendø tab lincha amōñibelayasig purøbasra kwamig. ¹⁴Martrai tru na karua bōnsrailan marabe, ñimbe nai trendø tab lincha amōñibelø gōn cha. ¹⁵Nabe ñimune yandø ka karuindiig melabelø cha wamømur cha. Kaguende kan karuindiig megabiibe nui karub pera wabiibe ni chi marøb uninguen mōrmøn cha. Treeg kōmōtø, nabe ñimune masken nai trendø tab lincha amōñibelø cha wamar chibig køn, kaguende nabe nai Mōskawan na chi mōriilane ñimune kerriguh eshkab kenamarikkurri. ¹⁶Nane ñim lawa wesrumōtø, nabe ñimunguen lawa wesrua, ñimune amrrai wesrua pōnsraig køn cha, truba rruba mamig niirrai. Trurrigu tru mamig misriibe pinōmō, misrøbig misrtrain cha. Treekkurri ñim chiwandøgucha nai Mōskawan nai munchiyu miabene, nōbe ñimune tranrrun cha. ¹⁷Nabe ñimun martrai karua basrøppe, iigwan karua basrar cha: kangurrin gangurri undaarayanrrai.

**Tiuswan ashmø misaamera Jesúswanba,
nuielanba ashig kōmui inchib**

¹⁸Ñimun yu piraelø tsaliinchene, nanmerrig tsalø indig købigwan isunrrigay cha. ¹⁹Ñim yu piraelø gúimbe, yu pirau misaamerabe ñimune undaarabsruinrrun cha, nōmuielan undaarab lataitøwei. Inchendø nabe ñimune yu piraelai utugurri lawa, wesruig køn cha. Treekkurri yu piraeløbe ñimune ashig kōmui indan cha, kaguende yandø ñimbe i birauelø gōmuben. ²⁰Na ñimun øyah taig købigwan isua gúi chibig køn: “Kan

mendig megabiibe nui karubigwan purab nuig kòmøn” cha, trendaigwan. Inchawei nanguen kaig martrabgøba, kaig martrabgøba indiibe ñimungucha treetøwei kaig martrabgøba inchun cha. Na wamindiilan ñim møra marøbelø gúisruandøbe, ñim wamindiilangucha møra martrun cha. ²¹Pøs chine ñimun øyeelø marøppe, nagurri øyeeg martrun cha, kaguende nan karua ørøbigwan ashmeelø gua.

²²Na arrumøwei, katø na nòmun waminchimøwei indig kuimbe, chi kaig mara bønrrømubsruinrrun cha. Inchendø mømimbe nømui kaig marøb pønrraigwane chigøben guemesratø, øyeekkurin gøn chib puraambamig kaanrrun cha. ²³Nan tsalø inchibiibe nai Møskawangucha tsalø indan cha. ²⁴Katøgan mu møkken øyeelø mariimeelan na nømui utu marmuig kuimbe, nømbe chigucha chi kaig marar bønrrømubsruinrrun cha. Inchendø na mana asiimeelø mariilan mømimbe asha bønrrøbendø, nan ashig kømui indamba, nai Møskawan ashig kømui indamba indan cha. ²⁵Pøs øyeeg pureppe, tru maig maramigwan martrai nømui pøriiløyu maig pørig pasrabig treeg nebunrrain gúig køn cha: “Chigucha gømubendø, nan ka tsalø indan” daig.

²⁶Inchendø tru chi isumønrrai Purømisrøb Lincha Basrønrrabig, tru Møskaweinukkurri na ñimuimay øramig, tru Espíritu newan ciertonig, truike Møskaweinukkurri arrubiibe, naimburab maig kuigwan waminchun cha. ²⁷Inchen ñimgucha naimburab maig købigwan waminchun chibig køn, kaguende ñimbe srøsrøgurri naba amøñibelø gúikkurri.

16 ¹Nabe ñimun iilan waminchippe, ñimui isubigwan nainuutø pasra bønrraigwan ni chindinguen mormøwa bønrrømønrrai waminchar cha. ²Ñimune judíosmera tulundzuni yamerayugurri webetab inchun cha. Inchen møikkøben ñimun kweechabe, truike ‘Tiusweyasig tabig mararmab’ inchib pasramig, treekkatikken punrrab gøn cha. ³Ñimun øyeeg marøppe, Møskawan lata, nan lata ashmeelø guarre, treeg martrun cha. ⁴Na ñimun iilan eshkappe, yandø tru øyeelø pubene, ñimbe manawei na tru eshkaigwane isua bønrrønrrai eshkar chibig køn, Jesúsbe.

Espíritu Santoi chigøben maramelø

’Inchendø øyeelane nabe ñimun srøsrøgurri eshkamuig købig køn cha, kaguende nabe ñimba unig kua. ⁵Incha mømimbe

nan karua ørøbigweisrømay na inrraindingucha, ñimbe mōikkucha nane paymøtan cha: “¿Chumay inrrainchigu?” cha. ⁶Na iilan ñimun trenchib eshkabene, ñimui manrrøbe purø isui indan cha. ⁷Inchendø nabe ñimun isa gømø, cierton trendamønrrun cha: Na yamibe ñimuimbe mas tabguen gøn cha. Kaguende na imubene, tru chi isumønrrai Purømisrøb Lincha Basrønrrabiibe ñimba pasrønrrab arrumønrrun cha. Inchen na yabe, ñimuyasig nun øramønrrun cha. ⁸Inchen nø arruppe, yu pirau misaamerane tru kaig mariibe chi gøbig kuin gúi ashchai tøgandø kenamarøb, misagwan Tiusba sølgandø mandø pønrramigwan kenamarøb, natøwei kaig mara basraibe chu basrig kømigwan kenamarøb inchun chibig køn: ⁹Tru kaig marigwan kenamarøppe, nan køremuikkurrin gøben, ¹⁰misagwan Tiusba sølgandø mandø pønrramigwan kenamarøppe, nabe Møskaweisrømay iben, ñimbe nan mas ashmønrrab guikkurrin gøben, ¹¹natøwei kaig mara basraigwan tru chu basrig kømigwan kenamariibe, tru Satanás, yu pirau nø garubigwan, nune chu basramigwan pasrønrrai kørømara pasrabguen indikkurrin gøn cha.

¹²Nabe ñimune chigøben eshkamig katøgucha truba rrua tøgagøbendø, ñimbe mōimbatøbe trengatig nebua chigúi mørtrab gaimanrrun cha. ¹³Inchen tru Espíritu newan ciertonig arruppe, truike kerriguwan ciertonigumay ñimune pera inrrun cha. Kaguende nøbe ka nuimburaþtø waminchimøtø, nø maig mørigwan kerrigu waminchib, katø chigøben maig pub attrabigwan ñimune eshkanrrun cha. ¹⁴Nøbe nane maya nuguen tabig kønrrai martrun cha. Kaguende nøbe naiwan uta, ñimun maig kuigwan asha gønrrai kenamartrun cha. ¹⁵Chitøgucha nai Møskai tøgagúibe nain gøn cha. Inchawei nabe trendaig køn, Espíritube naimburabigwan uta, ñimun maig kuigwan asha gønrrai kenamartrun cha.

Isuig melaibe katølebe kasrag købig misrtrun

¹⁶Maya yanayutø ñimbe nane yandø ashchaamøn cha. Inchendø katø yana gømøwatø ñimbe nane gatø ashchun cha. Kaguende nabe nai Møskai waisrømay inrrainchar— cha.

¹⁷Inchen mōiløgøsrøn nui kusrenanøb pera uniiløbe nōmdø kangurrin gangurri payibelø gøn:

—¿Øyeeg chippe, mandø terah? cha: “Maya yanayutø ñimbe nane yandø ashmønrrun chib; katø yana gømøwatø ñimbe nane gatø ashchun chib. Kaguende nabe nai Møskai waisrømay inrrainchar” chib. ¹⁸“Maya yanayutø” chippe, ¿mandø chibrrendah? cha. Nøbe ni chi waminchib pasrainguen mørmer—chibelø gøn.

¹⁹Inchene Jesúsbe trunun payig køb inchib gúi mørabe, trenchibig køn:

—¿Ñimgan na ñimun øyeeg taigwanrre payib gøtirru? cha, tru: “Maya yanayutø ñimbe nane ashchaamøn” daigwan: “Yana gømøwatø ñimbe nane gatø ashchun” daigwan. ²⁰Pøs nabe ñimun isa gømø, cierton trendamønrrun cha: Ñimbe isuig wamamøra kishib gømnebe, yu piraeløbe kasraaranrrun cha. Ñimbe truba isuig kullaaraig melønrrun cha. Inchendø tru isuig kullaaraig melaibe katølebe kasrag købig misrtrun cha. ²¹Kan ishuuma tammisrtrappe, truba pusrkwai inchib kullaaran cha, kaguende yandø tru tammisramig ura buben. Inchen yandø unø kal-labene, kasrag købiitø tru treeg pusrkwaigwane isubguen inchimøn cha, kaguende kan srø misaazhig yu pirau kal-laben. ²²Inchawei ñimgucha mømbe øyeetøwei isub kullaaran cha. Inchendø katøle na ñimun ashene, ñimui manrrøbe truba rruba kasraaranrrun cha, kasrag købigwan kan muguen kerramgaikke.

²³Tru gwalømbe ñimbe nane yandø chigucha paymønrrun cha. Nabe ñimun isa gømø, cierton trendamønrrun cha: Ñim chiwandøgucha nai Møskawan miappe, nai munchiyu miabene, nøbe ñimune tranrrun cha. ²⁴Møingatig ñimbe nai Møskawan nai munchiyube chigucha miamuig køn cha. Miay, chibig køn, utønrrabguen cha, ñimui kasrag købigwan chigucha palømíig newanig kønrraimbe.

**Jesucristobe yu pirau kaig puingucha,
treegu puraya pasramisrøb**

²⁵Nabe ñimun iilan waminchippe, iibe øyeelø latailø gøn chib, kemesratø wamindig køn cha. Inchendø øyeelø latailø gøn chib kemesra waminchimumig punrrun cha, nai Møskaweimburabigwan törgandø kelarrab wamindamig. ²⁶Tru gwalømbe ñimbe nai munchiyu Tiuswan mianrrigay cha, pøs nabe ñimuyasig Møskawan miamønrrun chimur. ²⁷Pøs Møskai nøashib

ñimune undaaran cha, kaguende ñimbe nan undaarab, katø nabe Møskaweinukkurri webarrua arrig kui køreb indikkurrimba.

²⁸Nabe nai Møskaweinukkurri webarrua, yu piraumay arrig køn cha. Incha mømimbe katøle yu piraugurri, nai Møskaweimay yamønrrun— chibig køn.

²⁹Inchen nui kusrenanøb pera uniiløbe trenchibelø gøn:

—Møimbeguende ñibe chigøben ‘iibe øyeeg latailø gøn’ chib, ka kemesratø waminchimøtø, tørgandø kelarrab wamindan cha.

³⁰Ñibe chiwandøgucha newan ashibig kuin gúi mømibeguende nambe aser cha. Mugøben ñune chi paya ashib pønrramikken palømøn cha. Øyeekkurriwei, ñibe Tiusweinukkurri arrubig kuin gúi kørewa bønrrer— chibelø gøn.

³¹Inchene Jesúsbe trencha løtabig køn:

—¿Mømibesi køregueh? cha. ³²Pøs øyeeg punrrab gúig yandø mõiwei pubguen indan cha, ñimbe nørøtø, kan gan chab tarømisra, nane yandø nandø kørømara ambamig. Inchendø nabe natø basømur cha, kaguende nai Møskaimbe naba basøben. ³³Øyeelan nabe ñimun waminchar cha, naba kanbalatø pønrrøwabe, chi isumø purø tab pønrramigwan tøgagønrai. Yu piraube chigøben isumdiig puig melønrrabguen cha. Treeg kuindøgucha kullaaramø, mur isua bønrrønrrigay cha. Nama yu pirau chine kaigwan kanawa basrar— cha, trenchibig køn Jesúsbe.

Jesús nui kusrenanøb pera uniilayasig Møskaimba waminchib

17 ¹Yandø iilan chab rrenchabe, Jesúsbe srømbalaneb neesha trenchibig køn:

—Nai Møskai, yandø treeg maramig pun cha. Ñui Nusrkawan maya nuguen tabig indig kønrrai mar cha, ñui Nusrkaingucha ñun maya nuguen tabig indig kønrrai martrai. ²Tru maya misagweim bala nø garub pasrønrrai ñi trana, tru mayeelan ñi nun traniilane managatig øsig kømigwan tranrraima tranig kuig køppe. ³Inchen tru managatig øsig kømibe iig køn: ñi Tius ciertonig kandø wabigwan mu gúi nebua ashib, katø Jesucriston tru ñi karua ørigwan mu gúi nebua ashib indamig.

⁴Nabe yu pirau ñune maya nuguen tabig kønrrai marar cha, tru ñi nan martrai karua pasrigwan na chab patsøgøb. ⁵Trube mømimbe, nai Møskai, ñui merrab nan tørguegwalmabig kønrrai martra cha, tru chigurrimbunø købigwan marig kaabenbatø

manasrøwei ñui merrab tru törguegwalmabigwan na tōga waig købiitōgatōwei.

6^oYu piraelai utu ñi nan trannrrab lawa wesruilane ñun mu gúi ashchai nabe asingarur cha. Truiløbe ñuielø gøben, ñibe nan tranen, nømbe ñi maig wamindigwan mōra, maran cha. 7^oMøimbe nømbe ashibelø gøn chibig køn, chigurrimbunø ñi nan traniibe ñuinukkurri arrubig kuin gúi. 8^oKaguende nabe ñi nan eshkaigwan nōmun eshkaben, nømbe mōrig køn cha. Incha isa gømøtø, nabe ñuinukkurri webarrua arrig kui nebua ashib, katø nane ñi garua ørig kuin gúi nømbe køreb indig køn cha.

9^oNabe nōmuyasig ñun miar chibig køn. Nabe yu piraelaimburab miamøtø, ñi nan traniilayasig miar chibig køn, kaguende ñuielø gúimba. 10^oKerriguba naimbe ñuin gøben, katø kerriguba ñuimbe nain gøn cha. Incha nōmgurri maya nuguen tab indig pasrar cha.

11^oYandø nabe naimburappe yu pirau uñmuben, trune nømbe yu pirau amøñibig amøñinrrun cha, nabe ñuimay arruben. Nai Mōskai Newan Tabig, ñi nan traniilane ñui munchi maramburab marøbiitōga chi nebumønrrai ashib tōgagørra cha, naba, ñiba kanbalatø pønrrab lataitøwei nōmgucha mayamba kanbalatø pønrrønrrain cha. 12^oNa yu pirau nōmba uñib urasma, ñi nan traniilane ñui munchiyu nōmune chigøben nebumønrrai, nabe ashib tōgagúig køn cha. Na tab ashib tōgagøben, mōikkucha nømbe tarømisra, pinømuig køn cha. Tarømisra pinappe, tru manawei treeg pinønrrab pasrabig truitøwei pinig køn cha, tru Tiuswei wamwan pørigu maig taig, truig nebunrrai.

13^oIncha mōimbe yandø nabe ñi waisrømay katø attrainchar cha. Incha na yu pirau pasrappatø iilan waminchar cha, nai kasrag købigwan nōmgucha nōmuinug newan tōgagønrrai. 14^oNabe ñui wamwan nōmun eshkab waminchen, piraeløbe nōmune tsalø gúindan cha, kaguende na i pirauig kōmub latawei, nōmgucha yu piraelø gømuimba. 15^oNabe ñun miappe, yu piraugurri nōmun wesrunrrai miamøtø, Satanás, tru larrø gaig, nōmun chinchimønrrai, treegwan miar cha. 16^oNa i pirauig kōmub latawei, nōmgucha i piraelø gømøn cha. 17^oTru newan ciertoniitōga ñuyasiitø tarømariilø gønrrai martra chibig køn. Ñui wambe tru newan ciertonig køn cha. 18^oÑi nan piraelai karua ørøb lataitøwei, nagucha nōmun piraelai karua ørar cha.

¹⁹Incha nabe naasiitø nòmuyasig ñuindø gønrrab pasramisrar cha, nømgucha treetøwei tru newan ciertonigu ñuindø gønrrab pønrramisrtrain cha.

²⁰Inchendø nabe nòmuyasiitø miamøtø, katø wendøsrø nøm wamindigwan møra, nan kørenrrabelayasikkucha tøgä miar chibig køn, ²¹mayeeløba nømgucha kandø lataig kønrrai, ñi nai Møskai, naba, ñiba kandø gøb lataitøweingue. Katø nømgucha namuinug kanbalatø pønrrønrrai miar cha, pirau misaabe nane ñi garua ørøbwei indig kui kørenrrai. ²²Ñi nan tørguegwalmabig tranigwane nabe nømun tranar cha, nømgucha mayamba kandø lataig kønrrai, naba, ñiba kandø gøb lataitøweingue. ²³Nabe nømuinug basrøben, ñibe nainug basrøben, trumaybe newan ke kanbalatø pønrramigwan nebua tøgagønrrain cha. Pirau misaabe ñi nan karua ørig købig kuin gúi ashib, katø ñibe nan undaarab lataitøwei nømungucha undaguig kuin gúi ashib inchai.

²⁴Nai Møskai, ñi nan traniiløbe, na chu waben nømgucha truyutøwei naba purrønrrai inchar cha, tru tørguegwalmabig ñi nan tranig købigwan nøm ashchain cha, tru chiwanguen marmøwatøsrøwei ñi nan undaguig kua, tranigwan. ²⁵Nai Møskai sølgandø tabig, yu piraueeløbe ñune mu gúi ashmuindøgucha, nabe, ñun ashibig kur cha. Inchen iiløgucha yandø nane ñi garua ørig kuin gúi ashibelø gøn cha. ²⁶Nabe nømune ñui munchiwan mu gúi nebua asingarur cha. Katøgucha nabe asingarubig asingarumønrrun cha, tru ñui undag købig ñi nayasig tøgagúigwan nømgucha lata tøgagønrrai. Inchen nabe nømuinug pasramønrrun— cha, trenchibig køn Jesúsbe.

Jesúswan merrarrawa srúa ambub

(Mt 26.47-56; Mc 14.43-50; Lc 22.47-53)

18 ¹Jesús iilan Tiusba chab waminchabe, nui kusrenanøb pera uniiløba webya ibig køn, Cedrón bi ambøgatøsrø larramrrab. Tru pi ambøgatømayrømbe kan olivos tul basrøben, Jesúsbe nømba truyu kebibig køn. ²Inchen tru Judas Jesúswan ashig kømui inchibelaingatø pasramisrøbiibe nøgucha tru tulwan ashibig købig køn, kaguende Jesúsbe katø gatø nui kusrenanøb pera uniiløba truyu tulundzunabig købig køben. ³Incha Judasbe kan sötø Roma misaamerai suldaumeraba, policíameraba pubig køn, sacerdotesmeran karubeløba, fariseosmeraba misra karua

øriilø, espadamera gøben, lámparamera gøben sruar, nag biløga mutar. ⁴Inchene Jesúsbe kerrigu nun øyeeg purainrrabigwan ashaguen gua, nømerrig webippa, payibig køn:

—¿Mun lague?— cha.

⁵Inchene nømbe trencha løtabelø gøn:

—Nazaretsrø Jesúsban ler— cha.

Inchene Jesúsbe trenchibig køn:

—Truibe na gur— cha.

Inchen Judas, tru Jesúsban ashig kømui inchibelaingatø pasramisrøbiibe, truyu nømbe pasrabig køn. ⁶Inchene Jesúsbe: “Truibe na gur” chiptinchene, nømbe wendømay amba, pirausrøn gørrabelø gøn. ⁷Inchene katøle nøbe payibig køn:

—¿Mun lague?— cha.

Inchene nømbe:

—Nazaretsrø Jesúsban ler— cha, trenchiben,

⁸Jesúsbe katøle trenchibig køn:

—Yamba nabe, truibe na gur, chimmørgøppeh cha. Nan lab amrruabe, trube iilane ambasay— cha.

⁹Øyeeg buppe, Jesús nøtøwei øyah taig truig nebunrrain gúig køn: “Nai Møskai, ñi nan tranielane møigwangucha kanguen trubishimur” taig. ¹⁰Inchene Simón Pedrobe espada srua gua, wesrawa, tru maya sacerdotesmeran nø garub sacerdotei karuindiig megabig, Malco taigwan, kusrmay galuwan kelarrab lutiichtinchibig køn. ¹¹Inchen Jesúsbe Pedron trenchibig køn:

—¡Espadane painayu way! cha. Tru purø rrømbøig punrrabig nai Møskai mutchai tranin copan, ¿nagan muchimumuitarru?— cha.

Jesús Anáswei merrab

(Mt 26.57-58; Mc 14.53-54; Lc 22.54)

¹²Inchen tru Roma suldaus sötømeraba, nømun nø garub pera basrabiiba, katø Tiuswei yau pønrrabelø judío policíameraba Jesúsban merrarrawa, lusrøbelø gøn. ¹³Incha tru Anásweisrømaymerrig srua ambubelø gøn. Anásbe Caifáswei sueeru gøben. Katø tru Caifásbe tru bilawan maya sacerdotesmeran nø garub sacerdote gøbig køn. ¹⁴I Caifás nø gøbig køn, øyeeg marene tab gønrrun cha, judíosmeran waminchibig: “Maya misagweyasig kan møøtø gwamikken søl gønrrun” chib.

Pedrobe Jesúswan ‘ashmíig kur’ chib

(Mt 26.69-70; Mc 14.66-68; Lc 22.55-57)

¹⁵Simón Pedroba, katogan Jesús kusrenanøb pera uniiba Jesúswei wendautø ambubelø gøn. Tru kane maya sacerdotesmeran nø garub sacerdotei asig kuig køppe, Jesúsba truigwei ya wambiisrøngatig kebiben, ¹⁶trune Pedrobe wambig yaskabutø kørømisrøbig køn. Inchen Jesús kusrenanøb pera unig kane tru maya sacerdotesmeran nø garub sacerdotei nøbe trendø asig kua, katøle webarrua puramrrai, tru yaskab gurøb pasrab srusran wamincha, Pedron umbu pera guebibig køn. ¹⁷Inchene tru srusrøbe Pedron trencha payibig køn:

—¿Ñigucha tru ø møwei mendig uñibig kømmørgøppeh?— cha.

Inchene Pedrobe trenchibig køn:

—Kah, nabe tru gømur— cha.

¹⁸Inchen karuindiig melabeløba, tru Tiuswei yau pønrrabelø policíamerababe nag urra gua, pishi yem gøben, pønrramisratø pachiirab gøben, Pedrogucha truyu nømba nag bulu pachiirab pasrabig køn.

Maya sacerdotesmeran nø garub sacerdote Jesúswan maig kuitashchab payib

(Mt 26.59-66; Mc 14.55-64; Lc 22.66-71)

¹⁹Inchen maya sacerdotesmeran nø garub sacerdotebe Jesúswan payibig køn tru nui mendig amønibelaimburab maitø guíigwanba, kusrenanøppe, chitø gusrenaniilanba, truilan. ²⁰Inchene Jesúsbe trencha løtabig køn:

—Nabe maya misaamerai malau wamindig køn cha. Judíosmeran tulundzuni yamerayuba, Tiuswei yau judíosmera tulundzuninuuba chu uraskucha kusrenanøbig kur cha. Inchawei chigucha na søratø wamindiibe kaagøn cha. ²¹¿Nane chindimba paygu? cha. Tru na maig tailan wamindi mørøbelan bay, chibig køn. Truiløbe na maig tailan ashibelø gøn— cha.

²²Jesús iigwan trenchibene, kan policía truyu pulu pasrabiibe Jesúswane maløbøtø pashabe, trenchibig køn:

—¿Maya sacerdotesmeran nø garub sacerdotengan øyeeg løtamig kuitarru?— cha.

²³Inchene Jesúsbe trenchibig køn:

—Trube, na chigøben kaig taig købene, chiyu galø tain gúi eshkau bøs cha. Inchen tru na trendaig chi kalø gømubene, trube, nane ÷chindimba bashku?— cha.

²⁴Inchen Anásbe Jesúsban lusrimbatiig tru maya sacerdotesmeran nø garub sacerdote Caifásweisrømay ørøbig køn.

Pedro katøle Jesúsban ‘ashmíig kur’ chib

(Mt 26.71-75; Mc 14.69-72; Lc 22.58-62)

²⁵Trune Pedrobe tru nag bulu pasramisra, pachiirab pasrøben, trenchibelø gøn:

—÷Nígucha tru møwei mendig uñibig kømmørgøppeh?— cha.

Inchen Pedrobe trenchibig køn:

—Kah, nabe tru gømur— cha.

²⁶Inchene tru maya sacerdotesmeran nø garub sacerdotei kan karuindiig megabig, tru Pedro kaluwan lutiitsinab møwei nømmissaabe, Pedrone trenchiptinchibig køn:

—÷Nabe ñune tru olivos ellguain dulyu Jesúsba pasrøben ashib mørgøppeh?— cha.

²⁷Inchene Pedrobe katøyug ‘ashmíig kur’ cha isøben, mømbe tru urastø kan kallu wamaptinchibig køn.

Jesús Pilatoi merrab

(Mt 27.1-2, 11-14; Mc 15.1-5; Lc 23.1-5)

²⁸Inchen yandø tør-rram lutauguen gøben Caifáswei yaugurrimbe tru Pilato waig palaciosrømay Jesúsban srua ambubelø gøn. Inchendø judíosmerabe tru yaube kebammeelø gøn, trømbøig marig chillig indi lataig kørrømisrønrrab, nøm kebammuikkurrimbe tru pascua mamigwan chi gømø ka mamig kønrrai. ²⁹Inchene Pilatobe nømun payrrab webya trenchibig køn:

—÷I møwane ñimbe chitø galø maran chibrrø inchiguh?— cha.

³⁰Inchene nømbe trencha løtabelø gøn:

—Larrø gaig kømuimbe, ñui merrab nam mana srua amrrubsru— cha.

³¹Inchene Pilatobe trenchibig køn:

—Ñim srua ambay cha. Tru maig maramigwan martrai ñimui pørig maig chibig køben, treeg asha maray— cha.

Inchene nømbe trenchibelø gøn:

—Nam judíosmerane ka namuimburaптøbe mungucha kweechib pønrrømønrrai merig køn— cha.

³²Inchen øyeeg buppe, Jesús tru nui kwamig chiyu bunrrab pasrabigwan, tru nø maig wamindig treeg nebunrrain gúig køn.

³³Inchen Pilatobe katøyug tru palacioyu kebya, Jesúswan wamabe, payibig køn:

—¿Ñigan tru judíosmerai rey gøtirru?— cha.

³⁴Inchene Jesúsbe trenchibig køn:

—¿Iigwangan ka ñiasiitø rrenchitirru? Kabe ¿katøganelø naimburab ñun mu trendaimba rrenchitirru?— cha.

³⁵Inchene Pilatobe trenchibig køn:

—¿Kabe nagan judío gúitarru? cha. Ñui biraueløba, katø tru sacerdotessmeran karubeløba naimay ñune sruamrruig køn cha. ¿Chi galø mara basrøgu?— chibig køn.

³⁶Inchene Jesúsbe trencha løtabig køn:

—Na ashib karub tøgagúig naimbe yu pirauig kømøn cha. Tru na ashib karub tøgagúig yu pirauig kuimbe, trube, nai mendig melabeløbe nan judíosmerai tasku tranig kømønrrai kwayabsruinrrun cha. Pøs na karumburab ashib karub tøgagúig naimbe yu pirauig kømøn— chibig køn.

³⁷Inchene Pilatobe trenchibig køn:

—Trugan, ¿ñibe rey gøtirru?— cha.

Inchene Jesúsbe trenchibig køn:

—Ñibe nane rey gøn cha, trendan cha. Nabe truweiwei kal-lab, yu piraumay arruppe, truweiwei arrig køn cha, tru newan ciertonigwan eshkanrrab. Mutøgucha tru ciertonigweingatø basrabiibe, nai wamwan møran— cha, trenchibig køn Jesúsbe.

³⁸Inchene Pilatobe trenchibig køn:

—¿Tru newan ciertoniibe, chi gøh?— cha.

Jesúswan kwanrrai pasrøb

(Mt 27.15-31; Mc 15.6-20; Lc 23.13-25)

Iigwan chab rrenchabe, Pilatobe katøle webya, judíosmeran trenchibig køn:

—Nabe tru møweinuube chigucha chi kalø mariibe wetørramur cha. ³⁹Inchendø ñimbe trendø treeg maramig tøgar gøn cha, Pascua Fiesta gwalømbe kan kailan keeri yau pasrabigwan na elacha wertraí. ¿Trube, tru judíosmerai reywan na elatsamig balain gøgue?— cha, trenchibig køn.

⁴⁰Inchene nømbe mayeeløba katø trenchib trashibelø gøn:

—iØigwan gømtø, Barrabáswan elachi!— chib.

Tru Barrabásbe niliig købig køn.

19 ¹Inchene Pilatobe Jesúswan merrarrawa, itsingarubig køn. ²Inchen suldaumerabe kaldiigwan corona mara, Jesúswei turyu petsøsa, katø asru kan keeg kørrabig yalø biguiig itøguenanøbelø gøn. ³Inchabe nuim bulu kemallabe, trenchibelø gøn:

—iJudíosmerai rey, viva!— chib.

Incha maløbøtø pashagutsamba inchibelø gøn.

⁴Inchene Pilatobe katøyug webya, misaamerane trenchibig køn:

—iAu! Nun wambiisrø pera arrumønrrun cha, nuinuube chigucha chi kalø marig nabe wetørramuin gúi ñim ashchai.—

⁵Inchen Jesúsbe, tru corona kaldiigwan marigwan petsaig, tru yalø biguiigwan keweig webibig køn. Inchen Pilatobe trenchibig køn:

—iAsay! cha, i møøbe yu pasran— cha.

⁶Inchen tru sacerdotsmeran karubeløba, tru policíameraba Jesúswan ashippe, trashibelø gøn:



San Juan 19.5

—iKurusyu mesrø! iKurusyu mesrø!— chib.

Inchen Pilatobe trenchibig kòn:

—Treeg købene, trube, ñimdøwei srua amba, kurusyu mesray cha. Pøs, nabe naimburappe, nuinuube chigucha chi kalø mariibe wetørramur— cha.

⁷Inchen judíosmerabe nune trenchibelø gòn:

—Nambe maig maramigwan martrai pørig tøgær guer cha. Inchawei truyu maig chibig køben, nøbe kwamitøwein gòn cha, kaguende nøbe nøasiitø: “Tiuswei Nusrkain gur” chib pasraikkurri.—

⁸Inchen Pilatobe tru trendaigwan mørabe, mas kørig kui inchibig kòn. ⁹Incha katøle palacioyu kebya, Jesúswan payibig kòn:

—¿Ñibe chuig kugu?— cha.

Inchen Jesúsbe niløtø basrøben, ¹⁰Pilatobe trenchibig kòn:

—¿Nanguen løtømønrrapteh? cha. Nabe ñun elatsamdiig købene, elachib, kurusyu mesramdiig købene, mesrøb indamig mu mandamgaig maramigwane na asha marøbig kui ¿ashmøtirru?— cha.

¹¹Inchene Jesúsbe trencha løtabig kòn:

—Nan øyeeg punrrai ñi marøb wamigwane chigaig købsruinrrun cha, ñun srømbalasrøngurri treeg marøb wanrrai tranmuig kuimbe. Inchawei tru nan ñui tasku tranøbiibe purab gaikken mara basran— cha.

¹²Trugurrimbe Pilatobe Jesúswan mandø incha elatsamdiig køtashchab labig kòn. Trune judíosmerabe trenchib trashibelø gòn:

—Ñi nun elachabe, Roma maya misagwan karub wabig Césarweingatiig kømøn kòn chib. Kaguende møikkøben: “Rey gur” chib pasrabiibe Roma maya misagwan karub wabig Césarweingatiig kømøn— chib.

¹³Inchene Pilatobe trunun mørøppe, Jesúswan wambig wesrungarua, maig kønrrabigwan asha martrab wamisrinug wamisrøbig kòn, tru “Sruutøga Kayig” tainug, hebreomaybe Gabata cha waminug. ¹⁴Pascua Fiesta maramig kan gwalømdø baløben, kwaløm døbøtag køsrøn gøbig kòn. Inchen Pilatobe judíosmeran trenchibig kòn:

—iAu, ñimui rey yu pasran!— cha.

¹⁵Inchene nømbe trashibelø gòn:

—iKwabash! iKwabash! chib. iKurusyu mesrø!— chib.

Inchen Pilatobe trenchibig kòn:

—¿Nagan ñimui reywan kurusyu mesrønrrab waitarru?— cha.

Inchen sacerdotesmeran karubeløbe trencha lètabelø gòn:

—Nambe katøgan rey tøgar gønrrab gømøtø, Roma maya misagwan karub wabig Césarwandø rey wannar guer— cha.

¹⁶Inchen yandø Pilatobe Jesúswan kurusyu mesrønrrai nòmun tranøbig kòn.

Jesúswan kurusyu mesraig

(Mt 27.32-44; Mc 15.21-32; Lc 23.26-43)

Inchen nømbe Jesúswan kemøra, srua amben, ¹⁷Jesúsbe nui kuruswan muta, tru Calavera cha wamiisrømay webibig kòn, hebreomaybe Gólgota taig. ¹⁸Incha truyu kurusyu mesrøbelø gòn, katø pailan pinrrømenda kan gan, Jesúswane tru tøbøtakke. ¹⁹Incha Pilatobe kurusyu kan pørig mesrønrrai karubig kòn:

JESUS NAZARETSRIIG, JUDIOSMERAI TRU REY GØN chibig. ²⁰Inchen tru pøra mesraigwane judíosmera mugøben truba yamelø lebelø gòn, kaguende tru Jesúswan kurusyu mesraibe ciuda bulu gøben. Inchagucha tru pørig megabiibe hebreomay gøben, latínmay gøben, griegomay gøben pørig købig kòn. ²¹Incha treekkurri judío sacerdotesmeran karubeløbe Pilatone trenchibelø gòn:

—“Judíosmerai rey gòn” cha pøra mesrømøta cha. Treeg kømøtø: “‘Nabe judíosmerai rey gur’ cha, nø trendaig kòn” chibig, treeg pør— cha.

²²Inchen Pilatobe trencha lètabig kòn:

—Na pøriibe, børig megabasay— cha.

²³Incha suldaumerabe Jesúswan kurusyu chab mesrabe, nui kewagúigwan kusrawa, pippalø pirishibelø gòn, kanui kan gangue. Incha trugurrimbe tru pala kewagúigwangucha kusrabelø gòn. Inchen truike kemesra tsusaimíig kørappa kandiig basrig købig kòn. ²⁴Suldaumerabe kangurrin gangurri trenchibelø gòn:

—Kølsrømun cha. Trembe tru kewagúigwan muin gørrømisrtashchab suerte gucha ashkun— cha.

Øyeeg maren, Tiuswei wamwan pørigu øyah chibig truig nebuig kòn:

“Nai kewagúilan nømdø pirisha,

tru nai pala itøgueigwane muin gørrømisrtashchab suerte gucha asan” daig.

Suldaumerabe øyeeg marig købig køn.

²⁵Jesúswei kurus bulube nui usrin gøben, nui usrai numøsrain gøben, Cleofaswei srai María gøben, katø María Magdalena gøben bønrrabelø gøn. ²⁶Inchen Jesúsbe nui usran ashib, katø nui undaaraig kusrenanøb pera uniibe nui usraim bulu pasrai ashib inchabe, usrane trenchibig køn:

—Au, ñui nusrkai lataigwan uyu ñi pera basran— cha.

²⁷Inchabe katø tru nui kusrenanøb pera unigwan trenchibig køn:

—Ñui usri lataigwane uyu ñibe pera basran— cha.

Indig tru uraskurrimbunø tru kusrenanøb pera unig købiibe nui yau pera gørrømisrøbig køn.

Jesús kwaig

(Mt 27.45-56; Mc 15.33-41; Lc 23.44-49)

²⁸Yandø øyeeg chab puraiben, Jesúsbe kerrigu treeg chab nebui ashabe, Tiuswei wamwan pørigu øyah taig nebunrrai trenchibig køn:

—Pimulgwatan— cha.

²⁹Inchen truyu kan køtsøyu køchiibi netsiig tøgäig pasrøben, kan ñab espunjan tru piyu kebisha, kan hisopo srarchigu pucha, mutchai Jesúswei triisrø yuuløbelø gøn. ³⁰Inchen Jesúsbe tru vinon yuulen, chab webishabe, trenchibig køn:

—Yandø chab marig kørrømisran— cha.

Incha turwan utsøbasra, yandø nui espíritun tranøbig køn.

Kan suldau lanzatøga Jesúswan tømbylu larrab gwanøb

³¹Inchen yandø Pascua Fiesta punrrabigweyasig tru tamarøb gúin gwaløm gøben, judíosmerabe tru asrmeran isrin gwalømbe kurusu melsraig melømønrrai inchibelø gøn, kaguende tru gwalømbe, tru isrin gwaløm, purø nu gwaløm gønrrab gøben. Treekkurri Pilatone, melabelai srømmeran landiitsingarunrrai rrugabelø gøn, asrmeran kurusyugurri pinøsrümig kønrrai.

³²Inchen suldaumerabe amba, kanunmerrig srømmeran landiicha, trugurrimbe Jesúsba kurusu mesraig megabigwan kanungucha landiichibelø gøn. ³³Incha Jesúswan kemalla ashene, yandø kwainguen megaptinchen, treekkurri nune srømmeran landiichimeelø gøn.

³⁴Inchendøgucha kan suldaube Jesúswane tømbulyu lanzatøga larrab gwanen latatø, animba, piba weguchibig køn. ³⁵Inchen nui kaptøga ashibiibe maig kuigwan wamindan. Inchen maig kuigwan tru nø wamindiibe cierton wamindig køn. Nøbe ka isatø waminchib pasrømurmb isua basran, ñimgucha Jesúswan kørenrai. ³⁶Kaguende øyeelø pureppe, Tiuswei wamwan pørigu øyah taig nebunrrain trenchibig køn: “Nui tsutsigwane kanguen landig kømønrrun” daig. ³⁷Katøganbaløsrø Tiuswei wamwan pørigugucha gatø trenchibig køn: “Misaamerabe tru lanzatøga kwaninabigwan ashchun” cha.

Jesúswan sörab

(Mt 27.57-61; Mc 15.42-47; Lc 23.50-56)

³⁸Øyeeg chab puraiben, José Arimatea pueblosriibe Jesúswei asrwan srúa inrrab cha, Pilaton miabig køn, tru Josébe judíosmeran korig køb Jesúswan nui isuigutø uñibig kuagucha. Inchen Pilatobe ka srúa ibashen, Josébe asrwan srúa ibig køn. ³⁹Inchen tru Nicodemo, tru merrabsrø Jesúswan yem waminchab ibikkucha, kan treinta kilosburab may irrabzhig mirraba, áloesba lindisaig srúa arrubig køn. ⁴⁰Incha Joséba, Nicodemoba Jesúswei asrwan srúa amba, llensutøga kirrøbelø gøn. Tru may irrabzheelantøga, judíosmera sörønrrab maig marøbelø gøben, treeg tamara sörabelø gøn. ⁴¹Inchen Jesúswan kurussyu mesraim bulube kan tul ellmarig pasrabig køn. Tru tulyube söramig kan trab srøig mungucha wayiimíig, ka basrabig køn. ⁴²Kaguende yandø judíosmerai isrin gwaløm pølbasmig lutau gøben, katø tru söramikkkucha pulutø gøben, truyu Jesúswei asrwan wayibelø gøn.

Jesús øsiirab

(Mt 28.1-10; Mc 16.1-8; Lc 24.1-12)

20 ¹Incha tru srø rrune pølbasrøb gwaløm María Magdalenabe løtsøzhig söríisrømay ullarbatø ibene, tru sörin rrabyu nu srug kasraibe kusruim basraptindi ashibig køn. ²Inchen nøbe luløb ibig køn tru Simón Pedroba, katøgan kusrenanøb pera unig, tru Jesús undaaraig købiiba, truilø purrainuumay. Inchabe Maríabe trenchiptinchibig køn:

—Sörinukkurri Señorwei asrwane srúa ambin gøn cha. Nambe chu srúa amba wayig mörmer— cha.

³Inchene Pedroba, tru katøgan kusrenanøb pera uniibabe webamba, søriisrømay ambubelø gøn. ⁴Pailøba kegøtø luløb ambendø, kane Pedro lataguen gømø, katøguchinguen mur lula, tru søriisrø nømerrig luløb pubig køn. ⁵Incha trusrø trarraasha ashene, tru llensu guirriiløbe truyu warai ashibig køn. Inchendø kebimíig køn. ⁶Inchen nui wendautø Simón Pedrobe pua, sørin rrabyu kebyabe, tru llensumerane truyu warai ashibig køn. ⁷Inchagucha tru Jesúswei turwan pinøbulig llensugucha, tru kirri llensumeraba trubalatø gømø, nørøø kurisaig trarrig tsubig køn. ⁸Inchen tru kusrenanøb pera unig tru sørinug nømerrig merrab pubikkucha, yandø umbøsrøngatig kebya, ashabe, kørebig køn. ⁹Pøs katøgucha nømbe tru Tiuswei wamwan pørigu Jesúsbe kwabelai utugurri katøle øsiiramig palønrrab gøn daigwane chigúi mormuin gøbig køn. ¹⁰Incha tru kusrenanøb pera uniiløbe nømui yamay katø ambubelø gøn.

Jesús María Magdalenan kenamisrøb

(Mc 16.9-11)

¹¹Inchen Maríabe sørim bulu wambig kishib pasramisrabe, kishib sørin rrabyu trarraasha ashene, ¹²pagatø ángelesmera puliig kørrabig kewar, tru Jesúswei asrwan wayig købigube kane turgabøryu, kane katsigu purrai ashiptinchibig køn. ¹³Inchen ángelesmerabe payibelø gøn:

—Ishug, ¿chindimba guishku?— cha.

Inchene nøbe trenchibig køn:

—Pøs nai Señorwan srúa ambin gøn cha. Incha chu wayig mormur— cha.

¹⁴Iigwan chab rrencha, nø keesha ashene, truyu Jesúsbe pasraptinchibig køn. Inchendø, nøbe Jesús kuitamappe isumíig køn. ¹⁵Inchene Jesúsbe payibig køn:

—Ishug, ¿chindimba guishku? cha. ¿Mun lagu?— cha.

Inchene nøbe tru tulyu ellmarig ashibig kuitamab isua, trenchibig køn:

—Au, kasuku, inchippa ñi srúa yabe, trube, chu wayigwan eshkarra cha. Na srúa inrrab— cha.

¹⁶Inchene Jesúsbe trenchiptinchibig køn:

—¡María!— cha.

Inchene nøbe keesha ashabe, hebreomay:

—¡Rabuni!— chibig køn, (trenchippe, “Kusrennøbig” chib).

¹⁷Inchene Jesúsbe trenchibig køn:

—iElatcha! cha. Kaguende nabe nai Møskai waisrø nevimø srø basrar cha. Inchendø ñibe ya, nai nunelan trenchinrrig cha: “Naimba, ñimuimba Møskaweisrømay, naimba, ñimuimba Tiusweisrømay nabe inrrab gur tan” cha, eshkanrrab.—

¹⁸Inchen María Magdalenabe yabe, tru kusrenanøb pera uniilan:

—iNabe Señorwan ashar!— chibig køn.

Incha Señor nun maig tailangucha nømun eshkabig køn.

Jesús nui kusrenanøb pera uniilan kenamisrøb

(Mt 28.16-20; Mc 16.14-18; Lc 24.36-49)

¹⁹Tru truaalømdøwei yandø yem misren, Jesúswei kusrenanøb pera uniiløbe tulundzuna purrabelø gøn, yaskabmerane mu kurtraingaig kasra bønsra, judíosmeran kørig køb. Inchene Jesúsbe truyu kebib, nømuin døbøtag pasramisrøb, trenchibig køn:

—iChi isumgaig tab gøbiibe ñimba gønrrain!— cha.

²⁰Incha chab rrenchabe tasiimeranba, nui tømbulwanba kenamarene, nui kusrenanøb pera uniiløbe Señorwan ashippe, truba ruba kasraarabelø gøn. ²¹Inchen Jesúsbe katøle trenchibig køn:

—iChi isumgaig tab gøbiibe ñimba gønrrain! cha. Nabe ñimun karua ørar cha, nai Møskai nan karua ørøb lataitøwei.—

²²Incha iigwan chab rrenchabe, Jesúsbe nømuim bala urra, trenchibig køn:

—Espíritu Santon utay cha. ²³Ñim møilan gøben nømui kaig mariilan ulø baymø kagøbashene, truilai kaig mariiløbe ulø bayamig kømíig kørørmisran cha. Inchen ñim truilai kaig mariilan pesannamø ulø bayene, nømune pesannamø ulø bayamig kønrrun— chibig køn.

Jesúsba, Tomásba

²⁴Inchen Tomás, Gemelo taig, tru doce kusrenanøb pera uniilai utuig, trube tru Jesús arrubene, nømba wamuig kuig køn.

²⁵Inchen tru kusrenanøb pera uniilø kaneløbe trenchibelø gøn:

—Nambe Señorwan aser— cha.

Inchene Tomásbe trenchibig køn:

—Nabe nui tasku kølabus larrøøriilan ashmøwei, katø tru kølabus larrøøriiløyu tasig-unan kegwanmøwei, katø tru nui tømbulyu nai tasigwan kegwanmøwei inchimuppe, nabe køremumønrrun— cha.

²⁶Indig trune wendau tru kusrenanøb pera uniiløbe katøle umbu tulundzuna burrøben, Tomás kucha nomba wabig køn. Inchene yaskabmerabe mu kurtraingaig kasrailø bønrraingucha, Jesúsbe kebya, nòmuin døbøtag pasramisrøb, trenchibig køn:

—iChi isumgaig tab gøbiibe ñimba gønrrain!— cha.

²⁷Inchabe Tomáswane trenchiptinchibig køn:

—Ñui tasig-unan yu kegwanøb, nai tasiimeran ash cha. Incha ñui kwalwan larrøbicha, yu nai tømbulyu tasigwan kegwan cha. Ke truig kòmuitamaptø isub uñmøtø, ñiguen kørebig ku— cha.

²⁸Inchene Tomásbe trencha løtabig køn:

—iNai Señor! iNai Tius!— cha.

²⁹Inchene Jesúsbe trenchibig køn:



San Juan 20.26

—Tomás ïmøi ke nan ashagan køretirru? cha. Mayanguen tab guílø gøn cha, ashmøwagucha, kørebeløbe.—

Mandøgurri i kilgameran pørig

³⁰Jesúsbe truiløtø gømtø, katøgan Tius nøba pasrain gúi asha gømig mariilø truba kenamarøbig køn nui kusrenanøb pera uniilai merrab. Truiløbe i kilgamerayube pørig kaagøn. ³¹Inchendø iilan pøriilø gøppe, Jesúsbe tru Cristo Tiuswei Nusrkain gúin gúi kørenrrain børig køn. Incha tru treeg køreitøgabe srøig øsig kømigwan nøgurri tøgagønrrai indig køn.

Nui kusrenanøb pera uniilan Jesús Galileasrø kenamisrøb

21 ¹Inchen treeg chab puraiben, Jesúsbe nui kusrenanøb pera uniilan katøle kenamisrøbig køn Tiberias nu bisu menda. Nøbe øyamay kenamisrig køn: ²Simón Pedro gøben, Tomás tru Gemelo taig køben, Natanael tru Galilea birau canásriig køben, Zebedeawei nusrkalø gøben, katøgan pailø Jesúswei kusrenanøb pera uniiløba, trubalatø lincha warøben. ³Incha Pedrobe trenchibig køn:

—Nabe peskanrrab inrrainchar— cha.

Inchene nømbe trenchibelø gøn:

—Namgucha ñiba amrrunrrab— cha.

Incha ambabe, kan barcoyu nebamba, tru yembe chigucha wesrunrrab gaimabelø gøn. ⁴Inchen yandø tør-rrab arruben, Jesúsbe pi menda nømun kenamisren, tru kusrenanøb pera uniiløbe nune mu gúi ashmeelø gøn. ⁵Inchene Jesúsbe trenchibig køn:

—Au, nai ureezheelø, ïchigucha chi peskau kemørtrab gaimatirru?— cha.

Inchene nømbe:

—Kah— chibelø gøn.

⁶Inchene Jesúsbe trenchiptinchibig køn:

—Atarrayan barcoyu kusrmaygatømay kegutsay cha. Treenchabe ñimbe wesranrrabguen— cha.

Inchen nømbe atarrayan keguchibelø gøn. Inchabe piyugurri atarrayan wesranrrab gaimaptinchibelø gøn, peskau nu gøptø.

⁷Inchene tru kusrenanøb pera unig Jesúswei undaaraibe Pedrone trenchibig køn:

—iAu, Señor gøn!— cha.

Inchene Pedrobe: “Señor gøn” daig mørøppe, nui pala itøgueigwan wesrawa tsuig kōppe, truigwan kewa, pørønab, piyu pørsraptinchibig køn. ⁸Inchen tru kusrenanøb pera uniilø kaneløbe barcon srua bubelø gøn, atarrayan peskautø netsiig keetab sruar. Kaguende nømbe pi mendagurri cien metros kōsrøndø waraig kōbig køn. ⁹Incha nømbe pirau pinaambabe, kan trøsr nag pasrai ashibelø gøn, tru balabe peskauba, pirrimba warig. ¹⁰Inchen Jesúsbe trenchibig køn:

—Mamdø tru ñim mõi wesruim beskaumeran srua amrruy— cha.

¹¹Inchen Simón Pedrobe barcoyu nebya, atarrayan nørøø peskaumeratø ciento cincuenta y tres netsiig tōgaigwan pi mendagatig keetab srua ibig køn. Inchen maya nu gúingucha, atarrayabe kōlsrømíig køn. ¹²Inchene Jesúsbe nōmun trenchibig køn:

—Manrrab amrruy— cha.

Inchen mōikkucha kusrenanøb pera uniiløbe: “¿Ñibe mu gugu?” cha payamig kōrig kui inchibelø gøn, kaguende nømbe Señor gúi asha gua. ¹³Inchene Jesúsbe kemalla, pirriwan nui tasku srua basramisrabe, nōmun srørrøbig køn, katø peskauwan chigucha.

¹⁴Iibabe chabguen pōnmay gōbig køn, Jesús kwaitai utugurri katøle øsiirawa kurra, nui kusrenanøb pera uniilan nō gúi ashchai kenamisrig.

Jesús Simón Pedroba waminchib

¹⁵Yandø chab mabe, Jesúsbe Simón Pedron payibig køn:

—Simón, Juanwei nusrkai, ¿iilø lataguen gømø, nan mas undaguig kuguh?— cha.

Inchen Pedrobe trenchibig køn:

—Øø, Señor, nabe ñun undaguig kui ñibe ashibig køn— cha.

Inchene Jesúsbe trenchibig køn:

—Nai ubisha-ureemeran mannøb ashib tōgagørrunrrig— cha.

¹⁶Katøle Jesúsbe payibig køn:

—Simón, Juanwei nusrkai, ¿nan undaguig kuguh?— cha.

Inchen Pedrobe trenchibig køn:

—Øø, Señor, nabe ñun undaguig kui ñibe ashibig køn— cha.

Inchene Jesúsbe trenchibig køn:

—Trube, nai ubishameran tab ashib tōgagørrunrrig— cha.

¹⁷Pønmay gønrabyu katøle payibig kòn:

—Simón, Juanwei nusrkai, ¿nan undaguig kuguh?— cha.

Inchen Pedrobe kullaarab isui inchibig kòn, kaguende chabguen pønmayguen: “¿Nan undaguig kuguh?” chib payen. Inchen nøbe trenchibig kòn:

—Señor, ñibe chiwandøgucha kerrigu ashibig kòn cha. Nabe ñun undaguig kui ñibe ashibig kòn— cha.

Inchene Jesúsbe trenchibig kòn:

—Nai ubishameran mannøb ashib tøgagørrunrrig cha. ¹⁸Nabe ñun isa gømø, cierton trendamønrrun cha: Ñibe matsinøtiig køb urasbe, ñui pørønaigwan ñiasiitø pørønawa, ñun chuikkøben ibig kuig kòn cha. Inchendø yandø ñi køllig misrene, ñui kwalmeran ñi larrøbichen, katøgan mendaig ñune pørønana, ñi ig kømui indiisrømay srua inrrun— cha.

¹⁹Øyan chippe, Pedro nø mandø kwamig nebuben, treeg kwaitøga Tiuswan maya nuguen tabig indig kønrrai martrab gøn cha, trendaig kòn Jesúsbe. Inchabe Pedrone trenchibig kòn:

—Nai mendig amø— cha.

Jesús kusrenanøb pera unig tru undaaraig

²⁰Inchen Pedrobe keesha ashene, Jesús tru kusrenanøb pera unig undaaraibe nui wendau arri ashibig kòn. (Truibe tru mab purrab uras Jesúswan pechoyu ne tsumisra: “Señor, ¿ñun ashig kømui inchibelan trannrrabiibe mu gøh?” cha, payibig, truig købig kòn.) ²¹Inchen Pedrobe truigwan ashabe, Jesúswan payibig kòn:

—Señor ¿inchen øigwane ñibe mandø inchainchigu?— cha.

²²Inchene Jesúsbe trencha løtabig kòn:

—¿Na arrumnegatig nune ka uñchai indingucha, ñuimburappe treegwane chi asamig kaagøn cha? Ñibe nai mendig amø— chibig kòn.

²³Indiibe tru trendaigwane nunelai utube treeg wam larrøbitsig købig kòn, tru kusrenanøb pera unig, truibe kwamønrrab gøn dan cha. Inchen Jesús trenchippe: “Truibe kwamønrrab”, gøn cha gømøtø, trenchippe, ka: “Na arrumnegatig nune ka uñchai indingucha, ñuimburappe treegwane ñibe chi asamig kaagøn” cha, treebe taig købig kòn.

²⁴Tru kusrenanøb pera unig trendainabig nøtøwei iilane maig kuigwan eshkaab wamincha, katø nøtøwei pørøb indig kòn. Incha

maig kuigwan nø eshkab wamindiibe isatø gømmø, cierton gúi asha bønrrer.

²⁵Katø chigøben Jesúsbe truba rruba marig købig køn.
Lutøgurrih trumørig pørimbe, tru pørig kilgamerabe yu pirau ørøbaguen kemubsruitamab isur.

Los Hechos

Jesucristo Espíritu Santon trannrrab misrig

1 ¹Nai Teófilo, nai srøsrø børigube maig purayaigwan eshkab pørig kuig køn, Jesús tru chigurrimbunø marøb pølbasiilanba kusrenaniilanba. ²Katø nøashib karua øramelø lawa wesruilan Espíritu Santogurri chitø maramelan martrai karua bønsra, srømbaløsrømay srua yain gwalømgatig købigwan pørig køn. ³Incha nøbe kwaig tsua, øsiirawa, nømune øsiguig kenamisrøbig køn, nø gúin gúi asamdiig kønrrai chine marøb. Incha nøbe kwalømmerra cuarenta nemisramne nømun kenamisrøb uña, Tius nø karub waigweimburabigwan waminchibig køn.

⁴Incha Jesúsbe nømba trubalatø purrøwabe:

—Jerusalénsrømaybe ammnørrigay cha garubig køn, nai Møskai trannrrab misra kørrømisrigwan treeg pumnegatig munugunrrain cha, ⁵tru ñim nan øyah taig mørig købigwan. Pøs Juanbe isa gømøtø, pitøga pinøbuliilø gønrrai ulsrain gøn cha. Trune ñimbe mam gwalømyutø Espíritu Santotøga pinøbuliilø gønrrun— chibig køn.

Jesús srømbalasrømay ib

⁶Jesúsba truyu tulaamba purrøwabe, trencha payibelø gøn: —¿Señor, Israel misaamera merrabsrø nøm ashib karub tøgagúig købigwan katøle treetøwei nøm karub tøgagømig punrrai møi yan damara basrtraindirru?— cha.

⁷Inchene Jesúsbe trencha løtabig køn:

—Treeg maramibe mana bunrrabigwanba, Møskai nøashib nui maram burab mariitøgatøwei chi gwaløm treeg punrrai mara

kørrø maramigwanbabe, ñimbe wammøra gømig chi palømøn cha. ⁸Inchendø Espíritu Santo yandø ñimuim bala arrubeneguende maramburab maramigwan ñim uta, Jerusalénsrø, Judea biraui kerrigu, Samaria birausrø, pirø muba kuimburab purø yabsrønguen naimburab maig kuigwan waminchab webamrrun—chibig køn.

⁹Incha yandø iigwan chab waminchene, nøm ashib pønrramne, Jesús wane pala kusruben, kan wañi arrua, nun pinøbulen, yandø mas ashchab gaimabelø gøn. ¹⁰Inchen Jesús iben, nøm srømbalaneb neeshib pønrramnetø, møimbe pagatø møguelø puløzheelø kewar nømuim bulu kenamisrabe, ¹¹trenchibelø gøn:

—¿Galileasrø møguelø, chindimba srømbalaneb neeshib kørrø misrke? cha. I Jesústøwei ñimui utugurri srømbalasrømay srua yainabiibe, ñim maig yai asig katø nøbe treetøweih attrun—chibelø gøn.

Judasweimburø purøbasramig Matíaswan lawa wesrab

¹²Inchen tru nøashib karua øriiløbe tru Olivos taig tunsrøngurri Jerusaléngatig katø ambubelø gøn, tru maig maramigwan martrai Moisés pørigu isrin gwalømbe maya yabgatig amrrain chibig køben, treezhiitø. ¹³Jerusalén ciudayu puabe, tru nøm pui yau, pala pisusrø nebambubelø gøn, truyube Pedro gøben, Juan gøben, Jacobo gøben, Andrés køben, Felipe gøben, Tomás køben, Bartolomé gøben, Mateo gøben, Alfeowei nusrkai Jacobo gøben, Simón Zelote gøben, Jacoboi nusrkai Judas køben, tru iilø ya beba warainug. ¹⁴Truiløbe Tiusba wamindamigwane sötøba kandø isua, maikken elachimø marøbelø gøbig køn, Jesúswei usri María gøben, nui nunelø gøben, katøgan ishumburmera gøben kanbalatø misra.

¹⁵Inchen tru gwalømmerawan Jesucristo kusrenanigwan marøbelø kan ciento veinte gøsrøn tulundzuna gøben, Pedrobe truilai utu pasramisra trenchibig køn:

¹⁶—Nai nunelø, Tiuswei wamwan pørigu maig taig, truiibe nebumig palaig kuig køn cha. Tru pørigube Espíritu Santobe David wamindigu kanmaytø Judasweimburab treeg nebunrrun cha wamindig kuig køn. Jesús wane kemøra, sruamrrabelan mandø indamigwan eshkaib pasrabigwan. ¹⁷Pøs Judasbe namui utuitøwei, katø namui marameløyu maramig tøgag købig køn cha. ¹⁸(Indiibe tru nø kaig marimburø an utiitøga kan tul penig køn cha. Inchabe ippa, turmay peñippe, patsøwan srurram beñen, pøitsimerabe

*Los Hechos 1.9*

kerrigu webølabig køn cha. ¹⁹Inchen Jerusalén mayeelø warabelø wammørabe, tru pirøwane, “Acéldama” cha wamabelø gøn,

nømuin rrikkabe, “Ani Lusin Dul” chibig.) ²⁰Kaguende Salmosyube trenchibig pørig basran:

“Nui yabe mugucha waraimíig kutsi ya gørrømisren,
katø truyube muguen tsunrrabig kaanrrain” cha.

Katø:

“Nø chi marøb pasraig købigwane katøgan peg utønrrain”
cha.

²¹Inchawei øyeeg købene, tru namui utu Jesús trendø namba lincha lllirab uñen, ²²tru Juan Jesúsuan piu umbu nun ulsraikkurrimbunø, katø nun namuinukkurri kusraben, nun srømbalasrø utig kømnegatig namba managucha tin lincha amøñibelø yu møguelø køn cha. Incha kan treeg lincha uñibigwan, tru Jesús kwawa, katøle øsiiraigwan treeg køn chib waminchib, namba tøgatø pasrønrrai maramibe ke søldøwein køn— chibig køn.

²³Incha pailan wesrawa pønsrcøbelø gøn: Matíaswanba, Josèwandøwei Barsabás cha wamab (katø Justo cha wamab indi) møwanba. ²⁴Inchabe øyeeg chib Tiusba waminchibelø gøn:

—Señor, ñibe mayeelai manrrømeran ashibiibe, i pailan ñi mønun lawa wesrua tøgga basraigwan eshkarra chib, ²⁵Cristo nøashib karua ørigwei maramigwan uta basramisra martrabiibe mu gúin gúi. Kaguende Judasbe nui yamsrømay inrrab, tru maramigugurrimbe tarømisra pella, peg maywan yaig køn— cha.

²⁶Inchawei møjgweim bala bendashchab suerte kuchene, Matíasweim bala beñen, truike yandø tru Cristo once nøashib karua øriilai utuig kørrømisrig køn.

Espíritu Santo arrigwan waminchibig køn

2 ¹Judíosmerai Pentecostés taig tru gwaløm yandø puben, nømbe mayeeløba kanbalatø tulundzuna gøbene, ²møimbe igatø! srømbalasrøngurrimbe wanrrabig kan truba mur isig ichibig lataig arrubig køn, tru purrainuube igatø! ya ørø tru wanrabiitø kasramgue. ³Inchene nømun kanun ganun traniilø kan nagurømera latailø kenamisra, nømun kanuim bala, kanuim bala pønrramisrøbelø gøn. ⁴Inchene nømbe mayeeløba Espíritu Santotø netsailø gørrømisra, peg, peg wammera waminchib mendabelø gøn, Espíritu nømun maig wamindingaruben.



Los Hechos 2.4

⁵Inchen Jerusalénsrømbe judíos misaamera warabelø gøn, Tiusweimburabelan maizhikken elachimø marøbelø, chu birausrøngurringuen palømfikke. ⁶Inchen tru misag sətøbe tru wanrrabigwan mørabe, tulundzunabelø gøn. Inchabe ipaare! kan øyeebe chi mandø guermab isubelø gøn, kaguende nøm mørenne, tru Jesucriston kørebeløbe møitøgucha peg wam peg wam tru nøm mørøb pønrrabelai wamwan, trunun, runun waminchiptinchene. ⁷Inchen nømbe truba kørø kwaariilø, kangurrin gangurri ipaare! kan mandø guermab isub, trenchibelø gøn:

—¿I mayamba waminchib pønrrabeløbe Galileasrø misaamera gømutarru? chib. ⁸Pøs kan namuin rriimay, namuin rriimay nam wamindi mørtrappe ¿mandø guerah? cha. ⁹Yube Parto birausreelø gøben, medosmera gøben, elamsreelø gøben, mesopotamiasreelø gøben, judeasreelø gøben, capadociasreelø gøben, pontosreelø gøben, Asia birausreelø gøben, ¹⁰frigiasreelø gøben, panfiliasreelø gøben, egiptosreelø gøben, tru Cirene birø bulu Libia birausreelø

gøben, katø Romasrøngurri amrrubelø ka petø amrruarteelø
judíosmera gøben, judíos komeelø Tiusweiwan judíosmera
marigu pønrrønrrab purørruwarmera gøben, ¹¹katø cretasreelø
gøben, arabiasreelø gøben, treeg yam baløsreelø gøbendø, nambe
mayeeløba Tius truba nørreelø mariilan namuin rriimay, namuin
rriimay wamindi mører— chibelø gøn.

¹²Incha mayeeløba nømbe kwariilø ikan paare! øyeebe mandø
guermab isub kangurri, gangurri trenchibelø gøn:

—¿Kan øyeebe chi guerah?— chib.

¹³Trune kaneløbe indzatø ashib trenchibelø gøn:

—Mutsiguelørre inchib waran— cha.

**Espíritu Santo kørraarruben, Pedro misagwan
maig kønrrabigwan waminchib**

¹⁴Inchen Pedrobe Cristo tru once karua øriiløba kurra
basramisra, nømbe mur waminchib trenchibig køn:

—Judea møguelø gøben, katø mayeelø yu Jerusalén warab
misaamera gøben, iigwan ñim chigúi nebua ashchain gøn cha. Na
wamindamigwan tab mørtraí chibig køn. ¹⁵Ya løtsø las nueveto
gøben, i møguelan ñimbe mutsiguelø gønmab isuinrrun cha,
¹⁶treeg kømøtø, Tius maig karuigwan eshkabig Joelgurri Tius tru
øyeeg taig købig, iibe tru gøn cha:

¹⁷“Srabe gwalømmerawane treeg pub attrun cha,
Tiusbe trendan chib,

mu misagweim balatøgucha nai Espíritun uncha tøgagønrrai
øramønrrun cha.

Ñimui nusrkalø, ñimui nimbasrmerabe

Tius nømun chi eshkaigwan eshkaben,

ñimui matsøreløbe kan piab lataigu chigøben ashen,

ñimui kølleeløbe piailø tøgagønrrun cha.

¹⁸Tru gwalømmerawane katø ishumbur lata, møguelø lata,
nai karuindiig melabelaim bala

nai Espíritun uncha tøgagønrrai tranen,

nømbe na nømun chi eshkaigwan eshkanrrun cha.

¹⁹Inchen srømbalasrømbe nabe kwaara asha gønrrai mariilø
marøb,

katø yu piraube na maramburab mariilan asha gømig
kenamaramønrrun cha,

anin gøben, nag køben, naguish kurrabig købengue.

20 Nøsiibe larrø løstiig misren,

pølbe ani lataig misrtrun cha.

Señor arrum gwaløm truba nuig purø tab gwaløm

pumøwatø, treeg kønrrun cha.

21 Inchen Señor Tiuswei munchiwan wamab, purugurra chib

miab pasrabiibe, kaigyugurri wesraig kønrrun” cha,

trendaig.

Iibe tru gøn, chibig køn.

22 Ñim Israel misaamera, na wamindigwan møray chibig køn: Nazaretsrø Jesúsbe Tius nø garua øri møg kui ashchai, nø treeg trani møg købig køn cha, nøgurri ñimui merrab maramburab mariitøgaba, kwaara asha gønrrai mariitøgaba, Tius nøba pasrain gúi asha gømig mariiløtøgaba. Pøs ñimdøweinguen ashibelø gøn cha. 23 I mowandøwei Tiusbe merrabsrøngurri manawei nø maig martrab isuilane tøgaguen gua, ñimun tranen, ñimbe nune kurussyu mesra, ñim kweetsig køn cha, tru larrø gailai tasku purøra. 24 Inchen nune kwailai utugurri Tiusbe kusraig køn cha, øyeeg purø rrømbøig indinawa kwaig tsuigugurri. Kaguende tru kwab gwanrrai marøb pasrabiibe nune chinchagucha nø merrarrawa tøgagønrrab gaimaig køn cha. 25 Pøs merrabsrø rey Davidbe Jesúsweimbura waminchippe, trendaig købig køn cha:

“Nabe Señorwane chu uragucha nai merrab wai ashibig kur cha.

Kaguende nøbe nai kusrmay basran cha,

nan amburab, iburab sruagutsig mandøguen gømui pasramig chigaanrrai.

26 Treekkurri nai manrrøbe truba kasraaraben,

nai niløbe truba rruba tabig waminchib kasraaran cha.

Inchen nai asrken, chi isumø muniiramigwan muniirab isrønrrun cha.

27 Kaguende ñi, Tiusbe, nan kwabelø pønrrainug pasrønrrain gønrrain gømøwei,

katø ñui Newan Tabigwan trerab tsunrrain gønrrain gømøwei inchun cha.

28 Ñibe nan øsig køm maymeran nebua asingarua,

ñi naba waikkurri nane truba rruba kasraarangarunrrautan” daig køn cha, trenchibig køn.

29^o Nai misaamera, nabe maig kuigwan torgandø kelarrab ñimun trendamønrrun: Merrabsrø namui kōlli misag Davidbe kwaben, sorig kōn cha. Inchen tru nui sōriibe mōin gwalōmgatig namui utu pasran cha. 30^o Inchendø Davidbe, Tius maig karuigwan eshkabig kōbig kua, tru kan nuinukkurri kurrab misagwan David nō wamisra karub wainug wanrrai wannamigwan, Tiusbe: “iGatø! treeg marmø gōmø, treeg kōnrrai maramønrrun” cha, trendaigwan ashibig kuig kōppe, 31^o Davidbe manawei Cristo øsiiramigwane chab asha gua, tru Cristo gatøle øsiiramigwan trencha wamindig kōbig kōn cha ‘kwabelø pōnrrainug truyutø pasrōnrrai kōrrōmarig kōmōwei, katø nui asrbe treraig kōmōwein gōnrrai indig kōnrrun’ cha. 32^o Inchawei Tiusbe tru Jesús wandøwei katø øsiirangaruben, nambe mayeelōba tru øyeeg purayaigwane namashib asha bōnrrer chibig kōn. 33^o Incha nune Tiusweim bulu kusrmay wanrrab attrai kusraben, Mōskai tranrrab misra kōrrōmisrig tru Espiritu Santon uta, uncha tōgagōnrrai trunun tranan chibig kōn. Inchen ñim mōi ashib, mōrøb inchib gūibe, tru gōn cha. 34-35^o Kaguende Davidbe srōmbalasrōmaybe nebimuig kōn cha. Inchendø Davidbe trendaig kōn cha:

“Señor Tiusbe nai Señorwane trendan cha:

‘Nai kusrmaygatø wamisr cha,

ñun ashig kōmui inchib tsalø inchibelan

ñi ñui srōbmeran truilaime bala nebuna wamig kōnrrai na pōnsramnegatig.”

36^o Israel misaamera mayeelōba treeg kōmuitamab asha bōnrray cha, tru Jesús ñim kurusyu mesraigwandøwei Tiusbe nune Mayeelaime Bala Pasrabig kōnrrai maramba, Cristo gōnrrai maramba indin gōn— chibig kōn, Pedrobe.

37^o Incha øyeeg tailan mōrōppe, truba kullaarab isui inchibelø gōn nōmui manrrau kebachen. Inchabe Pedronba, trugurri Cristo nōashib karua ørig katōganelanba payibelø gōn:

—Ñim nai misaamera, ¿nambe chi maramig kōnrrerah?— cha.

38^o Inchen Pedrobe trenchibig kōn:

—Ñim mōitōgucha nimui kaig mariilan isua mōray cha. Incha Tiusweimay llirawa, Jesucristoi munchiyu piu umbu ulsrailø guy chibig kōn, ñimui kaig mariilan ulø bayamig kōmīg, pesannaig kōrrōmisrtraimbe. Inchen Tiusbe ñimune Espiritu Santon tranrrun cha. 39^o Kaguende i tranamigwan nō tranrrab misra kōrrōmisriibe,

ñimuyasig køb, ñimui ureemerayasig køb, katø mayeelø chu uras tsøndatøsrø kønrrabelayasig køb, katø mayeelø namui Tius nun mun wamag køben wamamelai, truilayasig køb gøn— chibig køn.

⁴⁰Incha Pedrobe øyeelø wamindig kømnetø, katø srøitø waminchib, øyamay melamig køn chib trenchibig køn:

—Yeeg larrø gaig marøb misaamerainukkurrimbe wemallib ambay— cha.

⁴¹Inchen tru nø wamindigwan mōra utabelane piu umbu ulsrailø kōrrømisren, tru gwalømbe Jesucriston kōrewa pōnrramisrøbeløbe kan pøn mil gōsrøn nemisrig købig køn. ⁴²Incha nømbe mayeeløba Cristo nōashib karua øriilø kusrenanigwane tindøga marøb pōnrrabelø gøn, kanbalatø lincha gømigü lata, mamig birisha kanbalatø mab gømigü lata, katø kanbalatø misra Tiusba waminchib gømigü lata.

Jesucriston kōrebelø srøsreelø mandø waraig

⁴³Inchen nømune mōnundøgucha ka nōs nōstø gøbig køn, tru Cristo nōashib karua øriiløgurri kwaara asha gōnrrai marøb, katø Tius nōmba pasrain gūi asha gōnrrai truba rruba marøb inchen. ⁴⁴Inchen mayeeløba Criston kōrebeløbe kanbalatø lincha tulundzunab, katø chimerandøgucha ke kanguelarrøtø tøgagøb inchibelø gøn. ⁴⁵Incha nømui pirømeran, yameran, katø chi tøgagūilan gøben yana, sōteelan pirishibelø gøn, mōitøgucha maig palain gøben, treetø. ⁴⁶Incha kwalømmørig, kwalømmørig Tiuswei yau sōteeløba tulundzunabelø gøn. Incha mamigwan nømui yamørig truba rruba kasrag, kanbalatø lata pirisha mabelø gøn, tabig isua, ka treeg maranmab ashchaindø gømø, ⁴⁷manrraugurri tabig isub Tiuswan truba tabig waminchib, katø nømbe maya misamera truba tabig wamindinabelø gøn. Inchen Señorbe kaigyugurri wesraig kønrrabelan wesrawa, kwalømmørig nōmuinuube srøitø, srøitø nemarøbig køn.

Kan uñchab gaimabigwan tamarøb

3 ¹Kan gwaløm Pedroba, Juanba, maaben las tres pailøba kegøtø Tiuswei yaumay nebambubelø gøn, Tiusba wamindam uras købene. ²Inchene truyube kan mōg tru kal-lainukkurri uñchab gaimabig wabig køn. Truigwane Tiuswei yau tru “Tab Yaskabzhig køn” cha waminug kebambubelan ‘an guettra’ cha miab

wanrrai, kwalømmørig srua amba wannig wabig køn. ³Inchen tru uñchab gaimabiibe Pedronba, Juanwanba Tiuswei yau kebamrrab inchen ashabe ‘an guettra’ cha miaben, ⁴nømbe nun ashabe, Pedrobe trenchibig køn:

—Namun ash— cha.

⁵Inchen tru uñchab gaimabiibe chi rrannrrab indermab isua, truba tab ashene, ⁶Pedrobe trenchibig køn:

—Angawei, orogawein gur cha. Inchendø na tøgagúigwaneguende tranrrumøn cha. Nazaretsrø Jesucristoi munchiyu kurrab, inrrø— chibig køn.

⁷Incha Pedrobe kusrmay tasigu kemøra kusrabene, tru urastø nui srøbmeraba, nui yetølømeraba mur misren, ⁸tru uñchab gaimabiibe igatø! kan børsrappe pasrambua, ib menda, Tiuswan ‘Tabiibe ñitø gøn’ chib, trashib, pørsrab Tiuswei yau Pedroma, Juanba kebibig køn. ⁹Inchen maya misaamerabe nune uñibig misrin gúi ashib, katø Tiuswan ‘Tabiibe ñitø gøn’ chib, truba tabig wamindi ashib inchibelø gøn. ¹⁰Incha tru Tiuswei yau tru “Tab Yaskabzhig” cha waminug tru ‘an guettra’ cha, miab wabigwan truig kui ashabe, truba kwaarøbelø gøn, ikan paare! øyeebe mandø guermab isub tru treeg purayain gøben.

Pedro maig pub arrigwan Tiuswei yau waminchib

¹¹Inchen tru uñchab gaimabig købiibe Pedronba, Juanwanba kemøra basramnebe, misaabe mayamba kwariilø luløbelø gøn Pedromeraimay, tru Tiuswei yau Salomónwei Yaskabumay.

¹²Inchen Pedro iigwan ashabe, misagwan trenchibig køn:

—Namui Israel misaamera ðøyeegwan asha ñimbe chindimbarre kwargue? cha. Kabe tru maramburab maramigwan nam namashib tøgar gua, kabe nam Tiuswei merrab purø tabelø gúikkurri i mōwan uñibig kønrrai nam mari lata ðchindimbarre namungøba ashke? cha. ¹³Treeg kømøtø, Abrahamwei, Isaacwei, Jacobwei Tius namui merrabsrø kølli misaamerai Tiusbe tru nui marøb megabig Jesúswane törguegwalmabig kønrrai maran cha. Truigwane tru misagwan ashib karub purrabelan ñimbe kemøra, tranøb, katø Pilatobe nune elatchab inchen, ñimbe elachibashmub indig købig køn cha. ¹⁴Tru Newan Tabig katø Kerriguwan Sølgandiigwane ñimbe kaasha, tru kweechiptiigwane, trube, kelachai miaig køn cha. ¹⁵Incha tru øsig kømigwan nø tøga basrabigwane ñimbe

kweechen, truigwan Tiusbe kwailai utugurri gatøle øsiirangaruben, nambe tru treeg purayaigwane namashib ashibelø guer chibig køn. ¹⁶Pøs Jesúswei munchibe tru ñim trendø asi møg ñim mõi ashib pønrraigwan øyah chishig kønrrai tamaran cha, nui isubigwan tru munchiyu pasrikkurri. Tru isubigwan Jesús tøgagønrrai marig, truike nune newan tamaran cha, pøs ñim mayeelø asiinrrabguen chibig køn.

¹⁷Pøs, trube, mømbe ñim nai misaamera, ñimbe chugúi mormøwa, øyeeg marøb pønrrain gúin gúi ashar chibig køn, katø ñimun ashib karub purrabelø chigucha. ¹⁸Inchendø mayeelø Tius maig karuigwan eshkabelø wamindiitøga nui Cristobe kwamnegatig purø rrømbøig indinab meganrrun cha, manawei Tius eshkawa pasrig købigwan treeg nebunrrai marig køn cha. ¹⁹Inchawei treeg købene, nimui kaig mariilan isua møra, Tiusweimay llliray chibig køn, ñimui tru kaig mariilan chi kaig mariimfig lataig kørrømisrtraimbe. Trumaybe Señorbe chi isumø, tabig pishindø waram gwalømmerna ørøb, ²⁰katø tru muniirab gúi Criston, tru Jesúswan, ñimuyasig manawei nø tarømara wesrua pasrigwan trunungucha ørtrun cha. ²¹Inchendø nøbe mømibatøbe srømbalasrø ka wamig køn cha, Tius tru chiwandøgucha lutøgurri tamara pønssramnegatig, tru Tius nuindø tarømariilø nø maig karuigwan eshkabeløgurri nø manasrøwei maig taig, treeg. ²²Inchawei Moisésma trendaig købig køn: “Señor ñimui Tiusbe ñimui misag utugurrindøwei Tius maig karuigwan kan eshkabig na lataitøwei katøgan kusranrrab gøn cha. Inchawei nø maig wamindiilane chiyutøgucha møramig køn cha trendaig købig køn. ²³Kaguende møikkøben Tius maig karuigwan tru eshkabigwan mormfigwane, Israel misaamerainukkurri kanguen gaagøm, binisaig kønrrun” daig køn cha.

²⁴Inchawei Samuel tsub uraskurrimbunø mayeeløba Tius maig karuigwan eshkabelø truilø chigucha møin gwalømmerna øyeeg punrrabigwan wamindig købig køn cha. ²⁵Pøs ñimbe tru merrabsrø Tius maig karuigwan eshkabelai ureemera gøb, katø tru namui kølli misaameran tru nuinukkurri acuerdo marigwan tøgagøb indan cha. Abrahamwan tru trenchib uras: “Ñigurri karrab larrøbichib misaamerabe pirau maya misaaba mayanguen tab indiilø gønrrun” chib. ²⁶Inchawei Tius nui Marøb Megabigwan kusrua, trugurri Tiusbe ñimuimaymerrig ørig købig køn, ñim

møitøgucha tru kaigwan marmønrrab llirawa bønrramisren, mayanguen tab indiilø gønrrain— chibig køn, Pedrobe.

**Pedroba, Juanba tru Setenteelø maig
maramigwan asha marøbelai merrab**

4 ¹Pedroba, Juanba misagwan waminchib sʀø bønrramne, judíosmerai sacerdotesmera gøben, Tiuswei yau policíamera ashib pønrrabelan nø garub pasrabig køben, saduceosmera gøben truba namikkøleelø pubelø gøn, ²kaguende Pedroba, Juanba misaameran kusrenanøb, katø tru kwabeløbe katøyug kwailai utugurri øsiiramibe Jesucristoinug køn chib, eshka kusrennimba. ³Incha tru karubeløbe Pedronba, Juanwanba kemøra, yandø maaben gøbene, katø gwalømgatig kailan keeri yau keerøbelø gøn. ⁴Inchendø møiløgøben Tiuswei wamwan wamindi mørøbeløbe Criston køreben, møguelandø munchen trattʀø milburab nemisrig købig køn.

⁵Incha gatø gwalømbe tru nømun ashib karub purrabelø gøben, misagwan karubelø kølli misaamera gøben, tru Moisés pørigwan kusrenanøbelø gøben, Jerusalén tulundzunabelø gøn. ⁶Truyube maya sacerdotesmeran nø garub sacerdote tru Anás køben, Caifás køben, Juan gøben, Alejandro gøben, maya sacerdotesmeran karubigwei yaelø gøben mayamba, truyu purrabelø gøn. ⁷Incha Juanwanba, Pedronba nømuin døbøtag pønʀabe payibelø gøn:
—¿Ñimbe iigwane maramburab marig muindøgarre margue? cha. ¿Ililane mui munchiyurre margue?— cha.

⁸Inchen Espíritu Santotø netsaig Pedrobe trenchibig køn:
—Misaameran ashib karub purrabelø, katø ñim misagwan karubelø kølli misaamera, ⁹kan møg kwanrriigwan nam tabig marigwan chi wetøgørramdiig kətashchappa, i mōwan mandø incha tamarig kuitashchappa, ñim namun payib srua gúig købene, ¹⁰trube, ñim mayeeløba, katø Israel maya misaameraba nebua asig kønrrai eshkanrrab cha. Tru i møg ñim mayelai merrab pasrabiibe tru Nazaretsʀø Jesucristoi munchiyu tabig tammisrig kuig køn cha, tru ñim kurussyu mesra kweechen, Tiusbe katø øsiirangaruig, truigweinug. ¹¹Jesúsbe ñim
“ya marøbelø tru kaasig srug køn cha.

Inchendø tru katsiisrømbe pølbasa wayig mas purø tab srukken misrin gøn” cha.

12^o Pøs nam kaigyugurri wesrailø gømibe mu gatøgan pegwei munchiyube chi gaagøn cha; kaguende kaigyugurri wesramigwane yu piraube mungucha treeg martrai tranig kaagøn— chibig køn.

13^o Inchen tru payibeløbe Pedronba, Juanwanbabe chigucha chi korig kuin gømø, løtab pønrrai ashib, katø mana chu kusreb purrømeelø, chigucha gømeeelø gúin gúi ashib inchabe, truba kwaara asha, nømune Jesúswei mendig amønibelø gúin gúi nebua ashibelø gøn. 14^o Inchagucha tru tamari møøbe nømuim bulu kurra basrabwei indi ashabe, treekkurri Pedronba, Juanwanbabe chigucha chi tamgaig købig køn. 15^o Incha nømune tru Setenteelø maig maramigwan asha marøbelø purrainukkurri webambingarua, nømdø kangurrin gangurri payiyab waminchib gørrømisrabe, 16^o trenchibelø gøn:

—¿Møguelane nambe chi martrab? cha. Kaguende Jerusalén mayeelø warab misaameraimbe Tius nømbe pasrain gúi asamig marig kan truba nuig kenagøn cha, nømgurri marig. Inchawei nambe chinchagucha chi treeg kømøn dambegaig køn cha. 17^o Inchendø tru treeg marigwan misag utu mas mas wam larrøbichimønrraimbe, møingurrimbunøbe mungucha Jesúswei munchiyube waminchimønrrai ‘chigøben ñimune maramønrrun’ chinrrab— cha, nømbe trenchibelø gøn.



Los Hechos 4.17

¹⁸Incha Pedronba, Juanwanba katø wamabe, chiweingucha Jesúswei munchiyube waminchimøwei, kusrenanmøwei inchai, igatø! kandø mera basrøbelø gøn.

¹⁹Trune Pedroba, Juanbabe trencha løtabelø gøn:

—Ñimguen tab isuy cha, Tiuswei merrab søl gøbig kuitashchab nun mormøtø, ñimun mørøb pønrramig. ²⁰Kaguende nam ashib, nam mørøb indigwane nambe elachimø, wamindamønrrun— chibelø gøn.

²¹Inchen tru karubeløbe:

—Ñim namun mormøwabe, mømimbe chi maramigwane nam asamønrrun— chatø, elachibelø gøn, tru maya misaameragurri chinchaguen ichabetønrrab gaima. Kaguende truiløbe tru treeg purayaigwan asha, Tiuswan truba tabig waminchib gøbelø gøn. ²²Pøs tru purø nuig tabig marøb, tamarinab møøbe cuarenta años menrra tøgäig købig køn.

**Tiuswei ureemera nundø kemenda kormø
pønrrønrrab Tiuswan miab**

²³Pedroba, Juanba yandø ka elatsiilø gua nømui lincha amønibelaisrømay ambabe, tru sacerdotesmeran karubeløba, misagwan karubelø kølli misaameraba nømun maig taigwan kerrigu eshkaben, ²⁴tru lincha amønibelø nøm iigwan mørabe, søteeløba ke kandø isua bønrramisra, Tiusba trenchib waminchibelø gøn:

—Ñi mayeelaim bala ñi ashib pasrabig srømbalawan lata, pirøwan lata, marwan lata, chigurrimbunø truyu chi purrabelan chigucha marøbig, ²⁵Espíritu Santogurri namui merrabsrø David, ñi karuigwan marøb megabigwan ñi øyeeg chib wamindingaruig købig køn cha:

“¿Judíos komeelø truba rruba namig kurramba,
katø chi misaamera gøben ke ka yandø chi
marmuinguenig martrab gurramba inchippe,
chindimbarre indah? cha.

²⁶Pirau reymerabe yandø kwayanrrab lutømaytø pønrramisren,
katø tru ashib karubeløgucha wamincha kanbalatø misra,
Señor Tiuswanba, nui Cristonba
kaig martrab namig kurran” cha.

²⁷Kaguende isa gømøtø, Herodesba, Poncio Pilatoba, judíos kømø misaameraba, katø maya israelitasmeraba ñui newan

tabig marøb megabig, Jesúsuan, tru ñi aceitetøga itølusig lawa wesraigwan tsalø gøb, chigøben martrab isub i ciudayu tulundzunig kuig køn cha, ²⁸ñi Tius manasrøwei øyeelø purainrrai maig martrab isua tøgagúilan treeg nebunrrai, martrab. ²⁹Señor mømibe tru nøm namun chigøben øyeelø martrumøn cha trencha pønsrailan ashib, katø nam ñuiwan marøb melabelan maikkucha kullaaramø ñui wamwan kørmø waminchib pønrramig kønrrai tranrra chib. ³⁰Ñui tasigwan larrøbichi cha, tru ñui newan tabig marøb megabig, Jesúswei munchiyu kwanreelan tamarøb, ñi namba pasrain gúi ashchai mara gørrømarøb, katø kwaara asha kørrømistrai marøb inchi—cha, trenchibelø gøn.

³¹Incha Tiusba chab waminchene, tru nøm tulaamba purrainuube mur gønøben, mayeeløba Espiritu Santotø netsailø gørrømisra, Tiuswei wamwan maikkucha kullaaramø nømbe waminchibelø gøn.

Kanguelarrøtø tøgagøb

³²Incha tru nu misag sètømera mayeeløba tru Jesúsuan kørebeløbe møitøgucha lata kan manrrøtø lataig lincha bønrrab, kandø isubelø gøn. Møitøgucha nømui chi tøgagúigwane ‘nain gøn’ chimøtø, chi købigwane kanguelarrøtø tøgagøbelø gøn.

³³Inchen Cristo tru nøashib karua øriiløbe Señor Jesús øsiirawa kurrigweimburab maig kuigwan waminchippe igatø! muguen chindamgaig waminchibelø gøn. Incha nømbe warappe, kan møitøgucha tab gøbigwan tøgagømburab tøgagønrrai traniilø purø tab warabelø gøn. ³⁴Inchawei nømui utube chigøben palai inchibiibe muguen kaabig køn. Kaguende møiløgøben pirømera, yamera tøgarbe yana, maig yanigwan anwane srua amrrua, ³⁵Cristo tru nøashib karua øriilø nøm ashchai tranøbelø gøn. Inchen nømbe trunune nømun maig palain gøben kanun ganun treeg pirishibelø gøn. ³⁶Inchen kan levita José taig pi tøbøtag pirø basrabig Chipre birausriig, Cristo tru nøashib karua øriiløbe truigwane Bernabé cha wamig (trenchippe, “Isui meløben, isui inchimønrrai tabig waminchib nusrkain gøn” daig). ³⁷Tru møøma kan pirø tøgagua trunun yanabe, anwane srua arrua Cristo tru nøashib karua øriilø nøm asha martrai tranøbig køn.

Ananíasba, Safiraba isønrrab indigwan waminchib

5 ¹Inchen kan mөг Ananías taiba, srai Safiraba kan pirø tögagúigwan yanøbelø gøn. ²Inchabe i mөөbe nui sraimba misra, tru anwane tøbøtø rrannrrab cha, wamincha, tøbøwane kørømarara, Cristo tru nøashib karua øriilaimay tøbøwandø nøm ashchai tranrrab srua ibig køn. ³Inchen Pedrobe trenchibig køn:

—Ananías, ¿Satanás ñui manrrau nø guebya pasramisra, ñigan øyeekkatig martramab pasrøtirru? cha, ñi Espíritu Santon isab pasramig kønrrai, tru pirø yani anwan kerriguwan rranmøtø kørømarara tranrrappe. ⁴¿Pirøbe ñuiwein gømuitarru? cha. ¿Katø yanen, tru angucha ñi asamig kømuitarru? cha ¿Ñui manrrau chindimba øyeeg martrab isua basramisrku? cha. Ñibe mөгuelan isab pasrømøtø, Tiuswan isan— chibig køn.

⁵Inchen Ananíasbe iig trendaigwan mørabe, kwain beñiptinchibig køn. Inchen mayeeløba trunun wammørøbeløbe truba rruba kørig kui inchibelø gøn. ⁶Inchen matsøreløbe amrrua, asrwan tamara pula, sørønrrab srua ambubelø gøn.

⁷Indiibe pøn ura wendau gøsrønyu Ananíaswei srai tru treeg purayaigwan chi wammørmø, kebarrubenba, ⁸Pedrobe payibig køn:

—Eshkarra cha, tru ¿ñim pirøwan øyawei yaner cha trendaigwan trewei yangueh?— cha.

Inchen nøbe trenchibig køn:

—Øø, treweiwei yanøbwei indig køn— cha.

⁹Inchene Pedrobe trenchiptinchibig køn:

—¿Ñim pailømisra chindimbarre treeg martrab isua bønrramisrke? cha, Señorwei Espíritun ke maig inchibig køtashchab ashchab inchib. ¡Ñiguen mør! cha, ñui kewan sørønrrab srua ambubeløbe chabguen yaskabyuguen amrrutan cha, mөimbe ñungucha sørønrrab srua amrrun— cha.

¹⁰Inchen tru urastø Pedroi srøb pulu Zafiragucha kwain beñiptinchibig køn. Inchen tru matsørelø kerruabe kwaikken wetørrawa, srua amba, keweim bulu sørabelø gøn. ¹¹Inchen tru iglesian kerriguelanba, katø mayeelø tru treeg purayaigwan wammørøbelanbabe purø rrømbøig kørig kui indamig arrubig gøn.

Cristo nõashib karua øriilø chine asha gønrrai marøbelø

¹²Cristo nõashib karua øriiløbe misaamerai utu chine Tius nõmba pasrain gúi ashchai mariilan maramba, kwaara asha gønrrai maramba inchibelø gøn. Inchen Tiuswei ureemerabe Salomónwei Yaskabyu mayeeløba maig isuppe, treeg kandø isua tulundzunabelø gøn. ¹³Inchendø gatøganeløbe nõmbabe linchab inchimeelø gøn, tru maya misaamerabe nõmune truba rruba tab inchib tøgagúingucha. ¹⁴Inchen misaamera Señorwan kørebeløbe møguelø lata, ishumbur lata katøguchinguen gatøguchinguen nemisrøb ambubelø gøn. ¹⁵Incha kwanrreelanguen tru puraambub lliraig calleswan camamerayu, tsigalmerayu srua amrrua põnsrøbelø gøn, Pedro purai ben, nui põrr mõiitøguen møigwan gøben kwanrreelaim bala kasrønrrai. ¹⁶Inchen Jerusalén ciuda buluwansreelø misag truba nõrrø amrrubelø gøn, kwanrreelø gøben, trømbøig maringarub kwaimandziimera tøgar kan mandøguen gømui inchibelø, treelø gøben sruar. Inchen mayeeløba tamariilø gøbelø gøn.

Pedroba, Juanba kaig indiilø

¹⁷Inchen maya sacerdotesmeran nõ garub sacerdoteba, saduceosmeraingateelø truyu nõba purrabeløba purø busrkwai ashiptø namig kurra, ¹⁸Cristo nõ ashib karua øriilane merrarrawa tru kailan keeri yau keerøbelø gøn. ¹⁹Inchen kan Señorwei ángel tru keeri yau yaskabmeran yem kura, wambiisrø wesrawabe, trenchibig køn:

²⁰—Amba, Tiuswei yau põnrramisra, i srøig øsig kømigweimburab wamwan misaameran trunun kerrigu eshka b waminday— cha. ²¹Inchen nõmbe iigwan mørabe, yandø tørrabene, Tiuswei yau kebamba, kusrenanøb mendabelø gøn.

Tru inchib gømnetø tru maya sacerdotesmeran nõ garub sacerdoteba, truyu nõba purrabelø gatøganeløba amba, tru Setenteelø maig maramigwan asha marøbelan tulundzuningarubelø gøn, katø tru maig maramigwan ashibelø israelitasmerai kølli misaameran mayamba. Inchabe tru kailan keeri yau purrabelan nõmuimay merrana, amrrunrrabelø ørøbelø gøn. ²²Inchen policíamerabe amba, tru kailan keeri yausrømbe muganug bua, katøle amrruppe, treeg wam srua amrrubelø gøn:

23—Truyube mugucha chindamgaig kasraig pasrøben, wegørrømønrrai, ashibeløgucha yaskabmerayu pønrrøbendø, yaskabmeran nam kurene, umbusrømbe mugucha gaagøptindig køn— cha.

24Inchen iigwan mørabe, tru Tiuswei yau policíameran ashib pera basrabiiba, sacerdotesmeran karubeløba, ikan paare! øyeebe mandø guermab isubelø gøn, kan øyeebe chugatig bunrrai indamab isubgue. 25Trunetø møikkøsrøn trenchib puptinchibig køn:

—Ñim tru merrarrowa keerig møgueløbe Tiuswei yau misagwan kusrenanøb purran— cha.

26Inchene Tiuswei yau policíameran ashib pera basrabiibe, nui policíameraba ya, Pedronba, Juanwanba katø merrana ambendø, maig købash tsag inchimøtø merranøbelø gøn, kaguen misaamera nømun srug muta petamigwan køriimata. 27Incha merrana amrruabe, tru Setenteelø maig maramigwan asha marøbelai merrab pønsrøben, maya sacerdotesmeran nø garub sacerdotebe, trenchib payibig køn:

28—Yamba nambe ñimune Jesúswei munchiyube kusrenanmønrrai, ¿kandø mera basrøb mørgøppeh? cha. ¿Ñimbe chi margue? cha. Ñimbe Jerusalén ørøba ñimui kusrenanigwan larrøbitsingarua, tru mowan kweecha ani lusigwane namungøba, namungøba guemesrøtan— cha.

29Inchen Pedroba, katøgan Cristo nøashib karua øriiløba løtappe trenchibelø gøn:

—Namuimbe Tiuswanmerrig møramig køn cha, møguelø taigwan gømøtø. 30Ñim kurusu mesra kweetsig tru Jesúswandøwei namui merrabsrø kølli misaamerai Tiusbe katø øsiirangaruig køn cha. 31Incha Tiusbe nune purø nuig kønrrai marøb nui kusmay wangerua, Kerrigu Nø Merrab Pasrabig, Kaigyugurri Wesrabig kønrrai marig køn cha, Israel misaameran nømui kaig mariilan isua møra, Tiusweimay lliranrrai marøb, katø nømui kaig mariilan ulø bayamig kømønrrai marøb inchaimba, treeg marig køn chibelø gøn. 32Nambe øyeeg purayaigwane namashib asha bønrrer cha. Inchen nun tru mørøbelan Tius tranig Espíritu Santo chigucha asha basrainrrun— cha.

33Inchen iigwan mørøbeløbe, truba trømbøig nama, kwetchab inchibelø gøn. 34Inchen kan møg tru Setenteelai utuig kan fariseo

Gamaliel daig, tru maig maramigwan martrai Moisés pørigwan kusrennøbig, maya misag nune mu chi taimfig, kurra basramisra, tru Cristo nøashib karua øriilan kan petøzhiitø wambig wesrangaruabe, ³⁵nømun trenchibig køn:

—Namui Israel møguelø, purø ashiptø maray cha, i møguelan ñim chi martrappe. ³⁶Ñimguen isuy cha, mana gøsrøn kan Teudas taig ‘kan truba nu gusreb møg kur’ chibig kurrøben, truigwanma møguelø cuatrocientos mendig amønaig køn cha. Inchendø nune kweechen, mayeeløba mendig amøñibeløbe chab tarømisren, chab pinig køn cha. ³⁷Katø wendøsrø misag mayan gøtashchab munchi tulishib gwalømmerawan galileasriig Judas kurra, misag nui mendig amøñinrrabelø truba nu pera kurrig købig køn cha. Indig truig chigucha kwaben, mayeeløba mendig amøñibeløbe nøørøtø chab tarømisrig købig køn cha. ³⁸Inchawei mõi øyeeg puim basrøbene, nabe ñimun trendamønrrun cha: Tru møguelane kagøbashippa, ñimguen ka ambasay cha. Kaguende tru nøm chi martrab isua tøgagúig nøm chi marøb amønaibe, ka møguelaindø gúisruandøbe, patsønrrun cha. ³⁹Inchen Tiuswein gúisruandøbe, ñimbe pinishinrrab gaimanrrun cha. Inchippa ñimbe Tiusba kwayanrrab inchib pønrrabgun— chibig køn.

⁴⁰Gamaliel wamindiibe treegwein gúitamab isua, Cristo nøashib karua øriilan wama, ichabetabe, Jesúswei munchiyube mas waminchimønrrai mera, yandø elachibelø gøn.

⁴¹Inchen nømbe tru Setenteelø maig maramigwan asha marøbelai merrabgurri, truba kasrag webamba ambubelø gøn, Jesúswei munchigurri øyeeg kaig indinab pønrrambuawei pønrrønrrai Tius i nømun treeg pønsraig kuitamab isua. ⁴²Incha nømbe kwalømmørig, kwalømmørig Tiuswei yau kusrenanøb, katø yamørig kusrenanøbelø gøn, tru tabig srø wambe, Jesúsbe tru Cristo gøn chib, maikken elachimøgue.

**Tiuswei ureemeran chi palabigwan ashchabelø
sieteelø wesrawa pønrrailø**

6 ¹Inchen tru gwalømmerawan Jesucristoi kusrenanigwan marøb melabeløbe nørrø nemisrøb iben, judíosmera griegosmerai wamwan waminchibeløbe mørønratø waminchib namig kurrabelø gøn tru judíosmerai wamwan waminchibelane. Tru kelø peta gwailø nømui utueløbe, kwalømmørig mamig

birishibyu chi lata asiimeelø gøn chib. ²Inchen Cristo nøashib karua øriilø tru doceeløbe, tru nu misag Jesucristoi kusrenanigwan marøb melabelan tulundzuningarua trenchibelø gøn:

—Nam Tiuswei wamwan eshkab kusrenanamigwan elacha, mishatsigu tru mamig birisamigu ashib pønrramibe söl gømøn cha. ³Inchawei, namui nunelø, ñimui utu siete møguelø lawa wesruiy cha. Mugucha øyeelø gøn dainab pønrrømeelø, Espíritu Santotø netsailan, maig kønrrabigwan asha maram gusrebelan. Incha truilan i maramigwan trana bønssønrrab cha. ⁴Inchen nambe namuimburaeppe Tiusba wamindamigwan elachimø marøb, katø Tiuswei wamwan eshkab kusrenanøb amønñibig amønñinrrab— cha trenchibelø gøn.

⁵Øyeeg chibene, tru misag sötø nu basrabigwane truba tabig mørøraben, Esteban tru nui isubigwan Tiusweinuutø newan tøgä basrabig Espíritu Santotø netsaig mowan lawa wesrabelø gøn. Trugurri Felipen gøben, Procoron gøben, Nicanorwan gøben, Timónwan gøben, Parmenaswan gøben, kan møg antioquíasriig tru Tiusweiwan judíosmera marøb pønrraigu puraarruaig Nicoláswan gøbengue. ⁶Incha yandø tru Cristo nøashib karua øriilø docelaimay pera amrruben, nømbe Tiusba wamincha, nømui tasiimeran truilaime bala nømun tabig kønrrai estsarøbelø gøn.

⁷Inchen Tiuswei wambe mas mas larrøbichib iben, Jesucristoi kusrenanigwan marøb melabeløbe Jerusalénsrø nørrø nemisrøb arruben, sacerdotesmeraguen truba yam nømui isubigwan Tiusweinug pasra tøgagønrrab pønrramisrøbelø gøn.

Estebanwan kailan keeri yau pasrtrab srua ambub

⁸Inchen Esteban Tiuswei tru ka yandø tab indigwanba, katø maramburab maramigwanba newan tøgäig, truike kwaara asha gønrrai maramba, Tius nøba pasrain gúi ashchai purø nørrøelø mariilø maramba inchibig køn, tru misaamerai utu. ⁹Inchen mõiløgøsrøn mu karuimíig “Elatiilø” cha wamiilai tulundzuni yaugurrielø namig kurrabelø gøn, sirenesreelø gøben, alejandriasreelø gøben, ciliciasreelø gøben, Asia birausreelø gøben misra, Estebanwan ‘¿Maig kø?’ chib, payiyab. ¹⁰Inchendø Esteban kusremburab kusrebig kuigwanba, Espíritu nun wamindingaruitøgä wamindigwanbabe, muguen kanab waminchab gaimabelø gøn. ¹¹Inchabe kan mu møguelan gøsrøn

an gueta tranøbelø gøn nømuingatø misra, øyeeg chinrrai: “Nambe Moiséswan purø rrømbøig wami mørøb, Tiuswan purø rrømbøig wami mørøb inder” chinrrai, tru Estebanbe. ¹²Inchabe truiløbe misaameran gøben, katø misagwan karubelø kølli misaameran gøben, tru Moisés pørigwan kusrebelan gøben, ke nøm isuigwan marøb gønrrai inchen, truiløbe namig amrrua, kemøra, tru Setenteelø maig maramigwan asha marøbelaimay srua ambubelø gøn. ¹³Katø trugurrimbe nømui kaptøga maig kui ashmubendø, isa waminchabelø øyeeg chibelø pera amrrubelø gøn:

—I møøbe chu uragucha i Tiusweyasiitø tarømarig tab yawanba, katø tru maig maramigwan Moisés pøriilanba, trømbøig tsalø wami mører chib. ¹⁴Kaguende nambe trendai mører chib: “Tru Nazaretsrø Jesúsbe i Tiuswei yawane pinishib, Moisés namun maig martrai karua gørrømariilane chishtø yunømarøb inchun” tan mørøb inder— chibelø gøn.

¹⁵Inchen mayeelø tru Setenteelø maig maramigwan asha marøb purrabelø Estebanwan ashene, møimbe nui maløbe kan ángelwei malø lataig kui ashibelø gøn.

Esteban nø ‘treeg mara basrømur’ chib waminchib

7 ¹Inchen tru maya sacerdotesmeran nø garub sacerdotebe Estebanwan trencha payibig køn:

—¿Isa gømmø, nøm trenchib gúibe treeg kuitarru?— cha.

²Inchen nøbe trencha løtabig køn:

—Nai misaamera, nai kølli misaamera, nan mørtray cha: Tius torguegwalmabiibe namui kølli misag Abrahamwan Harán birausrø tsunrrab imøwatø, Mesopotamia biraui kenamisrig køn cha. ³Inchabe trendaig købig køn cha: “Ñui pirowan elachib, ñui yuelan elachib, na eshkam birøsrømay inrrø” cha. ⁴Inchen Abrahambe Caldea misaameraim biraugurri webya, Haramsrø tsunrrab iben, yandø møskai kwabene, Tiusbe Abrahamwan mõi ñim waraim birausrø tsunrrai ørig købig køn cha. ⁵Inchendø nune i pirowan nui srøb rrarramikken, nuyasiibe keta tranmuig køn cha. Inchendø nune ‘i pirowane tranrrumøn’ cha gørrømisrig købig køn cha, katø nuinukkurri karrab misaameraimba. Tru urasbe Abrahambe nuskainguen chigaig købenbatøsrøwein gøbig køn. ⁶Incha Tiusbe trendaig købig køn cha: “Ñuinukkurri karrab misaamerabe peg birausrø ka ambatø warøben, nømune

ka karua srua gúindiig melabelø gømig kønrrun cha, larrø kaig indinab cuatrocientos años ørøba.” 7Inchendø Tiusbe: “Tru nømun karua srua gúindiig melønrrai marøb misaameran nømun maig kønrrabigwan asha maramønrrun cha. Inchen trugurrimbe yandø tru birausrøngurri webamba, nømbe i birautøwei nane køriibala tabig waminchib gønrrun” cha. 8Incha Tiusbe Abrahamwan tru circuncision maram acuerdon tranig køn cha. Treekkurri nui nusrkai Isaac kal-labene, Abrahambe Isaacwan trune gwalømyube asru circuncidabig køn cha. Inchen Isaackucha nui nusrkai Jacobwan treetøwei maren, Jacobgucha nui nusrkalan treetøwei marig købig køn cha, tru doce nusrkalo Israelweinukkurri karrab misaamerai møskalan.

9”Tru Jacobwei nusrkalo namui merrabsreeløbe nømui nuneg Joséwan pusrkwai ashib tsalø gøptø, Egipto birausrømay srua amrrai yanøbelø gøn. Inchendø Tiusbe Joséba basrøwa, 10nune chine puben isuig megainukkurri treetø megamønrrai wesrawa, Egiptosrø rey Faraónwei merrab nøbe tab indamdiig kui asig kønrraimba, katø larrø gusrebig kønrraimba Tiusbe tranen, Faraónbe Joséwane Egipto birau maya misagwan ashib karub wanrrai neera wannig køn cha, katø nui purø nuig purø tab yawan chigucha kerriguwan nø ashchai.

11Inchen tru urassrø parø arrubig køn, purø rrømbøig isuig melamig Egipto birau ørøba, katø Canaan birausrøn chigucha. Inchen namui kølli misaamerabe chigucha mamig kalawa gøbelø gøn. 12Inchen Jacobpe Egiptosrømbe tirigu bønrran dai wammørabe, nui nusrkalo, tru namui kølli misaameran ke srøsrøzhiitø ørøbig køn. 13Incha gatø wendø ambene, Josébe nui nunelane nøbe tru nømui nuneg kuin gúi asingaruben, øyamay tru Egipto rey Faraónbe Joséwei misagwane mumera gúi nebua asig købig køn cha. 14Incha Josébe nui møskai Jacobwanba, nui yuelan mayamba Egiptomay amrrunrrai pertrab ørig købig køn cha, kerrigu yaelø setenta i cincoelan. 15Pøs øyamay Jacobpe Egiptomay yaig købig køn cha, tru nø lata namui merrabsrø kølli misaamera lata chab gwaisrømay. 16Inchen nømui asrmerane Siquemsrømay srua ambig købig køn cha, tru merrabsrø Abraham Hamorwei nusrkalan søramig anwei penig basrabigu, Siquem birausrø sørønrrab.

17Inchen yandø, Tius Abrahamwan nø treeg tranrrab cha gørrømisriibe pumig yandø lutaurab gøben, Israel misaamerabe

Egipto birau nørro larrøbichib nurab yaig købig køn cha. ¹⁸Inchen Egiptosrømbe kan rey Joséwan ashmíig ashib karunrrab pølbasra, ¹⁹tru reybe sørato purø møg isua, namui misaameratøga møg inchib pasrøwa, namui kølli misaamerane maig købash indig købig køn cha, tru nømui srø gal-laig møg-ureezheelan kweetsingarub. ²⁰Inchen tru gwalømmerawan Moisés kal-labig køn cha, tru unøbe Tiuswein gabyu larrø tab unøzhig. Inchen møskaløbe nømui yau pøn bølgatig nurana, ²¹yandø kwanrrai elatsamig nebuben, Egipto reywei nimbaser tru unan wetørrawa, nui nusrkawan lataitøwei nuranig købig køn cha. ²²Inchen Moisésbe tru Egipto misaamera maig kusrebelø gøben, treeg kusrenanig kusreweig købig køn cha, trurrigu wamindiiløyu lata nui chi mariiløyu lata purø nuikke.

²³Incha yandø cuarenta años tøgag misra, Moisésbe nui manrraube nui misag israelitasmeran ashchab inrrab isuig købig køn cha. ²⁴Inchen truyu kan egipcio israelitan truba kaig inchen ashabe, purømisra, Moisésbe truburø ulø bayib tru egipcione kweetsig købig køn cha. ²⁵Øyeeg kaig indinab melainukkurri Moisés nømun pera webinrrai Tius pasrigwan nui misaamera truigwan nebua ashchaitamab isua inchene, nømbe treeg kønrrabig kuitamappe isubguen inchimeelø gøn cha. ²⁶Inchen gatø gwalømbe pailø israelitasmera kwayab gúin gøben, Moisésbe tammay kørrømartrab isua, trenchibig køn: “iAu ñimbe! ¿Mu peguelø gømøtø, ñimmisaatøwein gøn cha, kangurriin gangurri chindimbarre øyeeg kaig inchib gøgue?” cha. ²⁷Inchene tru kanun kaig marøbiibe Moiséswane trawagucha trenchibig køn: “¿Ñi namun ke ñi asha garubig kønrraimba, katø maig kønrrabigwan ñi asha marøbig kønrraimbabe ñune treebe mu basrta? cha. ²⁸¿Kabe nangucha marig kwaløm egipcion latawei ñune kweechig køtah?” cha. ²⁹Inchen Moisés trunun mørabe, Madian birausrømay trubab ya, trusrømbe kan peg birausrøig lataig tsubig køn. Incha trusrø pagatø nusrkalo tøgagúig købig køn.

³⁰Indig truig yandø cuarenta años puraiben, Sinaí Tun bulu mu misag warab waraimønug Moiséswan kan ángel kaldusr naarabigyu kenamisrig køn cha. ³¹Inchen Moisésbe tru treeg kenamisrigwan ashabe, truba kwaara, ashchab gatøguchi kemallene, Señorwei wam trenchib mørø waminchibig køn cha: ³²“Nabe ñimui merrabsrø møskalai Tius kur cha, Abrahamwei, Isaacwei, Jacobwei Tius”. Inchene Moisésbe kørig køb itønab

menda, kurrashmíig kòn cha. ³³Inchene Señorbe trendaig købig kòn cha: “Ñui srøbyu alpargatiswan wesru cha. Kaguende ñi pasraig pirøbe Tiusweindø tarømarig kòn cha. ³⁴Nabe nai misag Egiptosrø yeeg isuig kullaarailø melaigwan tab ashib, katø purø murig nebuptø ke mulliptøø rranrrab melailan mørøb incha, wesranrrab kørraarrur cha. Møimbe iamø! taig købig kòn, ñune Egiptomay ørtrumøn” cha.

³⁵“¿Ñi asha garubig kørnraimba, katø maig kørnrrabigwan ñi asha marøbig kørnraimbabe ñune treebe mu basrta?” chib, nøm trenchib kaashib gúig Moiséswandøwei, Tiusbe nømun nø asha garubig kørnraimba, katø treeg kaigyugurri pera webattraimba ørig kòn cha, tru kaldusr naarabigu ángel kenamisrøbikkurri. ³⁶Inchen nøbe Tius nømba pasrain gúi ashchai maramburab mariilan marøb Egiptosrøngurri wesruig købig kòn cha, mar Rojoyu lata, mu misag warab waraimønug lata cuarenta años ørøba treeg marøb. ³⁷Mu peg kømøtø, iibe tru Moiséstøwein gøn cha israelitasmeran øyah chibig: “Tius maig karuigwan kan eshkabig nan gusrub lataitøwei, Tiusbe ñimui misag utugurrindøwei kusrunrrun” cha trenchibig. ³⁸Moisés nøtøwein gúig kòn cha, mu misag warab waraimønug, tru israelitasmera kanbalatø amrrub gøbeløba pasrab, katø Sinai Tunyu ángelba waminchib, katø nømui merrabsrø kølli misaameraba pasrab inchibiibe. Incha nøbe tru øsig køm wammeran utig købig kòn cha, tru namun tranrrab.

³⁹Inchen namui kølli misaamerabe mørøg kømui inchib, kaasha, nømui manrrøwane ke Egiptosrøndø basra gøbelø gøbig kòn cha. ⁴⁰Incha Aarónwane trenchibelø gøn cha: “Namui merrab amrrabelø namuyasig tiusmera mar cha. Kaguende Egipto biraugurri namun wesrabig Moiséswane chindinguen mørmer” cha. ⁴¹Inchabe tru gwalømmerawan kan toro-unø mara basra, truigweyasig animalmera kweecha, tranig købig kòn cha. Inchabe tru nømui tasiitøga mari tiuswane truba kasraarab tøgagøbelø gøn cha. ⁴²Treeg inchen, Tiusbe nømuinukkurri tarømisrøppa, chigøben srømbalasrø chigurrimbunø pønrrabelan tius kui lataig køriibala tabig waminchib warønrraindø elachiptindig kòn cha, Tiusbe. Inchawei Tius maig karuigwan eshkabelai pøriiløyu maig taigbe treeg kòn cha:

“Israel misaamera ¿ñim mu misag warab waraimønug
cuarenta años ørøba ambub gua,



Los Hechos 7.41

animal gweetsiilan tranøb,

katø chigøben nayasig kabe nan rranig kø chindah? taig.

43 Nan rrani urasbe tru tius Moloc pasraig carpa yawan muta ambub,

tius Refánwei estrellan muta ambub inchibelø gømøgue taig,
køriibala tabig waminchib gønrrab,
ñimashib ñimui taska mariilan.

Trekkurri Babiloniatøguen gømø,

purø yabsrø warønrrai webetamønrrun” cha.

Tius trendaig købig køn cha.

44’Merrabsrø namui kølli misaamerabe mu misag warab waraimøsrø amønñib uras, Tius nø pasrai carpa ya tabzhigwan tøgargøbig køn cha, Tius tru Moiséswan maig karuig køben treekke, Moisés maig asigwan tru treezhigwei maringaruigwan. 45Inchen merrabsrø namui kølli misaamerabe tru yawan nømun ketig uta, Josué tru nø garubig køben, tru judíos kømø misaamera waraisrø muta guebambig køn cha, Tius tru namui kølli misaamerai merrabgurri tru judíos kømø misaameran nømuim biraugurri webetiisrø. Inchen tru carpa yabe David tsub gwalømmerawangatig trusrø pasraig købig køn. 46Tiuswein gabyu Davidbe tabig kui asig

kua, nõbe Jacobwei Tius truyu pasrønrrai kan ya tranøbsrumugu cha, miaig købig køn cha. ⁴⁷Inchendø Tiuswei yawan marøppe, Salomón marig købig køn cha. ⁴⁸Inchen gøben Tius Mayeelaim Bala Pasrabiibe, mu møguelø taska mari yamerayu pasrømfig køn cha. Tius maig karuigwan eshkabig øyah taimbala:

⁴⁹“Srømbalabe na wamisra waig købene,
pirøbe na itøbuna waig køn cha.

¿Nayasiibe maig ya martrab inchigue? cha.

¿Na israb wamibe chu gøh? cha, Señorbe.

⁵⁰¿Kerrigu iilane nai tasiitøga marig kømuitarru?” cha trendaig.

⁵¹’Incha waminchibig wamincha Estebanbe trenchibig køn: Ñim gúi ke purab, purab pønrramisrøb misaamera gøn cha, manrraube nõsken guebati mørmeelø, møramig kalugailø latailø. Incha chu uragucha Espíritu Santone mørøg kømub purø mur pønrrabelø gøn cha. Ñimui kølli misaamera mailø gøbig køben, ñim rreeløtøwein gøn cha. ⁵²¿Ñimui kølli misaamerama Tius maig karuigwan eshkabelan kabe kanundøguen chi kaig marmeelø tabelø gøbig kuitarru? cha. Tru Kerriguwan Sølgandiig attrabigweimburab manawei eshkab amrrubelane nõmbe kweetsig købig køn cha. Inchen mõi truig arrubene, ñimbe kailø gøptø tsaleelaingatø pønrramisra, kweetsan cha. ⁵³Tru maig maramigwan martrai Moisés pøriilan ñimbe ángelesmeragurri uta tøgar gøbendø, truigwane chiweinguen møra marmeelø gøn— cha, trenchibig køn Estebanbe.

Esteban kwaigwan waminchib

⁵⁴Inchen øyeeg tailan mørøppe, nõmui manrraube ke kan chinchibmørø inchib purø rrømbøig namig kuilø, ke trugulwandø tsacha mørøbelø gøn, Estebanwan namig købiitø. ⁵⁵Trune Estebanbe Espíritu Santotø netsaig srømbalaneb neeshabe, Tiuswei tørguegwalmabigwan ashib, katø Jesúswane Tiuswei kusrmaygatø pasramisra pasrai ashib inchibig køn. ⁵⁶Inchabe trenchibig køn:

—iAsay! cha. iSrømbalamerabe kurin bønrrøben, Møg Misra Arrubiibe Tiuswei kusrmay pasrai ashar!— cha.

⁵⁷Inchen nõmbe nõmui kalumeran kasrøb truba mur trashib, igatø! mayamba Estebanweim balatø itø ambubelø gøn. ⁵⁸Incha ciudayugurri wegucha, sruutøga petabelø gøn. Inchen tru øyeeg

punrrai waminchib gurrabeløbe nømui kewagúilan wesrua, kan matsinø Saulo taigweim bulu warøbelø gøn.

⁵⁹Inchen tru nøm sruutøga petab gømne, Estebanbe Tiuswan trenchib wamab miabig køn:

—Señor Jesús, nai espíritun utørra— chib. ⁶⁰Incha yandø tømboñsra mur trashib wamab trenchibig køn:

—¡Señor, nøm øyeeg kaig marigwan chi treeg marmuig kui lataig kørrømar!— cha.

Yandø chab rrenchabe, kwaptinchibig køn.

Saulo Jesucriston kørebelan kaig martrab pasraarøb

8 ¹Inchen Saulobe Estebanwan kweechen, kan øyeeg maramigweim balaig kuig kømømab isub pasrabig køn.

Inchen tru gwalømdøwei Jerusalénsrømbe iglesiayuelan purø rrømbøig martrab yandø kønab gurrab mendøben mayeeløba Judea birausrømay gøben, Samaria birausrømay gøben, ke kan ørøtø chab ambubelø gøn, Cristo nøashib karua øriiløtøh ammø Jerusalén ka gørrømisrøbelø gøn. ²Inchen mø møguelø gøsrøn Tiusweimburabelan maizhikken elachimø marøbelø Estebanwan isub truba kishib sørabelø gøn. ³Inchen Saulobe iglesiayuelan purø rrømbøig inchib, pinishinrrab inchib, yamørig kebya, ishumburwan lata, møguelan lata kemøra, unchib warambatø srua webya, kailan keeri yausrø pønsrøbig køn.

Tiuswei wam Samariasrø larrøbitsig

⁴Inchen tru Jerusaléngurri webamba ke kan ørøtø chab ambubeløbe chu ambatøgucha Tiuswei tabig srø wamwan eshka kusrenanøbelø gøn. ⁵Inchen tru utuig Felipe Samaria ciudasmømay ya, trusrø Cristoimburabigwan eshka kusrennøbig køn. ⁶Inchen misaamerabe tulundzuna, Felipe maig wamindigwan mørøb, Tius nøba pasrain gúi ashchai Felipe tru mariilan ashib, mørøb inchabe, mayeeløba ke kandø isub, Felipe wamindigwane truba rruba tab mørøbelø gøn. ⁷Kaguende truba yam misaamerainukkurri trømbøig maringarub kwaimandziimera purø rrømbøig trashib webamben, katø truba yam kønønrab gaima warabelø gøben, cojosmera gøben, tamariilø gøbig køn. ⁸Trugurri misaabe tru ciudayube truba rruba kasraarabelø køn.

⁹Inchen manasrøngurri kan møg Simón daig tru ciudayube tsubig køn, kaig libron gusrewa, kwaimandzigweimburabigwan marøbig. Samaria misaameran chine mariiløtøga chull asøskøb, nøbe purø nuig misrøb tsubig køn. ¹⁰Inchen nune mu amrrubiitøgucha, kusrebelø lata, chi treeg komeelø lata nø chi martashchab ke nundø ashibelø gua, trenchibelø gøn:

—I møøbeguende Tiuswei tru maramburab marig truig køn cha, tru “Purø Nuig”, kui asig.—

¹¹Incha nune ke chi martashchab ashib melabelø gøn, kaguende tru nø magia gusrewa mariiløtøga manasrøngurri nòmune keerøba, kwaara ashib gønrrai mara srua gøben. ¹²Inchen Tius nø ashib garub wainuguig tru tabig srø wamwanba, Jesucristoi munchiwanba Felipebe eshkab kusrennen, trunun kørewabe, ishumbur lata, møguelø lata piu umbu ulsrøbelø gøn. ¹³Inchen tru Simóndøweinguen trunun køreb, piu umbu ulsraig køb incha, Felipeba lincha, uñibig køn. Tius nøba pasrain gúi ashchai Felipe mariilanba, katø nø maramburab truba nørreelø mariilanba ashabe, Simónbe truba kwaarøb uñibig køn.

¹⁴Inchen Cristo nøashib karua øriilø Jerusalénsrø warabelø tru samariasreelø Tiuswei wamwan uta bønrramisrin gøn dai wammørabe, Juanwanba, Pedronba trusrømay ørøbelø gøn.

¹⁵Inchen nømbe trusrø puabe, tru kørebelø Espíritu Santon utønrrai, Tiusba waminchibelø gøn. ¹⁶Kaguende møigwandøgucha nømuim balabe Espíritu Santo kørraarrumø srø gøben, Señor Jesúswei munchiyutø piu umbu ulsrailø gøbig køn. ¹⁷Incha Pedroba, Juanba truilaim bala tasigwan estsaren, Espíritu Santon utabelø gøn.

¹⁸Inchen Cristo nøashib karua øriilø tasigwan truilaim bala estsara, Espíritu Santon kanelan trani ashabe, Simónbe ‘an bagararruah’ chibig køn:

¹⁹—Nangucha øyeeg maramburab maramigwan tranrra cha, nagucha møigweim bala gøben nai tasigwan estsarene, truike Espíritu Santon utønrrain— chib.

²⁰Inchene Pedrobe trenchibig køn:

—Ñui anbe ñiba tøgatø pinøbash cha. Kaguende Tius keta tranigwane ñibe andøga pena tøgagømdiig kuitamab indan cha.

²¹Ñibe namui utube chi asamig kawei, chi marøb unamig kawein gøn cha. Kaguende ñui manrrøbe Tiuswein gabyube chi sølgandø

tabig kòmòn cha. ²²Inchawei iig øyeeg trømbøig isuigwan isua mōra, Tiusweimay llirau cha. Incha ñui manrrau øyeeg isuigwan Tius ñun ulø bayiimíig kōnrrai treeg mara kōrrōmartashchab Tiuswan miau chibig kōn. ²³Kaguende ñibe purø rrømbøig kan kōndzø srurri lataig mōbgōliitø netsaig kui ashib, katø kaig maramigugurrimbe webinrraingaig pasrig kui ashib inchar— cha.

²⁴Inchene Simónbe trencha løtabig kōn:

—Señorwan nayasig ñim miarray cha. Ñi mōi øyeeg chib pasrailøbe mōikken nan treeg nebumōnrrain— cha.

²⁵Incha nōmbe maig kōbigwan eshkaab, katø Tiuswei wamwan eshkaab waminchib guabe, Jerusalénmay katø amrrubelø gōn tru Cristo nōashib karua øriiløbe. Incha Samariasrø truba yambalø misaamera tsitsø warabsrø, tru tabig srø wamwan eshkaab kusrenanøbelø gōn.

Felipeba, kan Etiopíasrø mōøba

²⁶Inchen Felipeimburappe kan Señorwei ángel Felipene trenchib waminchibig kōn:

—Kurra, Jerusaléngurri Gazamay gōrreb maywan tru pōrr bineppurab inrrø— cha. Truibe tru mu misag warab waraimø



Los Hechos 8.31

may gòn. ²⁷Inchene Felipebe kurrab ibene, mayube kan Etiopía birausrø kan møg eunuco katabig kòn. Truibe, Etiopíasrø reina Candacei kan møg karubig nui reinai anwan kerriguba nò esegabig købig kòn. Nøbe Jerusalénsrø Tiuswan køriibala tabig waminchab ya, ²⁸trusrøngurri gatøle arrub pasrappe, kaullimera sruin carruyu Tius maig karuigwan eshkabig Isafaswei pørigwan leb arrub pasrabig kòn.

²⁹Inchen Espíritu Santobe Felipene trenchibig kòn:

—Wetøga ø carroyu kemalla linchi— cha. ³⁰Inchen Felipebe luløb ya, wetøgabe, Tius maig karuigwan eshkabig Isafas pørigwan leb arri mørøbig kòn. Inchabe Felipebe trenchibig kòn

—¿Ñi leb arrigwan chi taig mørtirru?— cha.

³¹Inchene nøbe trenchibig kòn:

—¿Kan nan mu ‘øyeeg kòn’ cha eshkamubene, nabe mandø gúi møramø?— cha.

Incha nøbe Felipen:

—Tiusmanda naim bulu wanrrab nebamø— chibig kòn. ³²Tru Tiuswei wam pørigwan nò leb arriibe iig købig kòn:

“Kan ubishawan latawei kwetchab srua ambig kòn cha.

Inchen isig barøb gømne,
kan ubisha-unø niløtø tsub lataitøwei,
nøgucha manchibgucha inchimuig kòn cha.

³³Incha nømui merrab israbig luchimubashtø niløtø megaben,
tru sølgandø tabigwan nune treeg asha martrab inchimøtø,
kagøbashiptindig kòn cha.

Nuinukkurri katø srøig misag karrab kurrønrrun damibe
kaanrrun cha.

Kaguende nui øsig kuigwane yu piraube kerraig købig kòn”
daigwan.

³⁴Incha tru eunucobe Felipen payibig kòn:

—Tiusmanda eshkarra cha, ¿Tius maig karuigwan eshkabig nòasiitøwein rrenda chindah, kabe mu gatøganun rrenda chindah?— cha.

³⁵Inchen Felipebe tru nò Tiuswei wam pørigwan leb yaigwan truyugurri pølbasa, Jesúswei tabig srø wamwan eshkab kusrenanøbig kòn. ³⁶Incha maywan ambub gua kan pi wabnug puabe, tru møøbe trenchibig kòn:

—Yube pi wan cha. ¿Na piu umbu ulsraig købsrutah?— cha.

³⁷Inchen Felipebe trenchibig køn:

—Ñi ñui manrrau newan kørebene, treeg marig kønrrun— cha:

—Inchen mөөbe trenchibig køn Jesucristobe Tiuswei Nusrkain gúi isua basrar— cha.

³⁸Incha nòm ambub gúin carron Felipebe tru mөwan pasramisringaru chibig køn. Incha pailөba piumay pinaamba, Felipebe nun piu umbu ulsrөbig køn. ³⁹Incha piugurri webambene, Señorwei Espíritube mөi mөi Felipen kusrua, srua iben, tru mөөbe Felipen mas ashippe ashmubendө, nui maywan kasrag inrraibig køn. ⁴⁰Incha Felipebe Azoto ciudasrө pasraptindinaben, trusrө Jesucristoi tabig srө wamwan ciudamөrig eshkaб kusrenanөb pureb ya, Cesarea ciudasrө pubig køn.

Saulon Tiusbe peemayig kønrrai yunөmarig

(Hch 22.6-16; 26.12-18)

9 ¹Trune Saulobe tru Jesucristoi kusrenanigwan marөb melabelane kaig maramigwanba, kweecha betamigwanbabe namig købiitө ke chinchibmөрө inchib uña, treekkurri maya sacerdotesmeran nө garub sacerdoten ashchab yaig køn. ²Incha Damascosrө tru judíosmera tulundzuni yamerasrө treeg marөb kebyamig kilgamera pөriilө tru sacerdotesmeran karubigwan miabig køn, tru srө maywan amrrab pөnrramisra pөnrrabelane ishumbur gúi lata mөгuelө gúi lata, Jerusalénsrө kailan keeri yau pөnsrөnrrab srua yamig kønrrai. ³Incha ib menda yandө Damasco pub lutausrө ibene, igatө! mөi mөi nuingatanye srөmbalasrөngurrimbe kan tөrgwalmabig arrua, nuin bөtөгatan pilөben, ⁴Saulobe pirau peña tsua, kan wam trendaig mөрөbig køn: —¿Saulo, Saulo chindimbarre nane kaig marөb lliragu?— cha trenchibig.

⁵Inchene Saulobe trenchibig køn:

—¿Señor, ñibe mu gugu?— cha. Inchene nөbe trenchibig køn:

—Nabe Jesús tru ñi nan kaig marөb unig, truig kur cha.

⁶Kurrab, Damasco ciudayu kebinrrө chibig køn. Truyube ñi chi maramigwan ñune eshkanrrun— cha.

⁷Inchen mөгuelө Sauloba ambubelөbe tuyutө pөnrrambua, igatө! wamguen biniilө bөnrrabelө gөn, mungucha ashmubendө, wamindigwan mөra. ⁸Inchen yandө Saulone piraugurri kusraben, kabwane kurendө, chigucha ashchab gaimabig køn. Inchen kwalyu

kemøra, srua Damascosrømay ambubelø gøn. ⁹Truyube pøn gwaløm ørøba ashchab gaimabwei, manrrab gaimabwei mutchab gaimabwei inchibig køn.

¹⁰Damasco ciudadyube kan Jesucristoi kusrenanigwan marøb megabig Ananías taig tsubig køn. Inchen truigwane Señorbe kan piab lataigu kenamisra, trenchibig køn:

—iAnanías!— cha. Inchene nøbe lötappe:

—Señor, yu war— cha trenchiben,

¹¹Señorbe nune trenchibig køn:

—Kurra, “Ølgandø” cha wamin callewan pureb inrrø cha. Incha Judaswei yau puabe: ¿Kan møg tarsosriig Saulo taig wah? cha, payrrig chibig køn, truike Tiusba waminchib wan cha. ¹²Tru møøbe kan piab lataigu asin gøn cha, kan møg Ananías taig kebarruabe, nui kabmeran gatøle pilønrrai, nuim bala tasigwan estsarøbig.—

¹³Inchene Ananías iigwan mørøppe trenchibig køn:

—Señor, i møweimburappe, mugøben wamindi wammøra gur cha, ñui misaameran Jerusalénsrø chitø, chitø kaig marøb uniilan.

¹⁴Møima yusrønguen mayeelø, ñui munchiwan wamab tōga bønrrabelane merrarranrrab sacerdotesmeran karubelø nun treeg martrai ørig arrin gøn— cha.

¹⁵Inchene Señorbe trenchibig køn:

—Inrrø cha. Kaguende i møøbe na øyeeg marøb tøgagønrrab na lawa wesruig møg køn cha, judíos kømø misaameran gøben, reymeran gøben, Israelwei misaameran gøben nai munchiwan asingarunrrabig. ¹⁶Kaguende nabe nun kenamaramønrrun cha, nai munchigurri chugatig kaig nebuig megamigwan.—

¹⁷Inchene Ananíasbe tru Saulo tsui yamay yabe, kebya, tasigwan nuim bala estsarabe, trenchibig køn:

—Cristogurri nai nuneg Saulo, Señor Jesús mayu arrub pasrøben kenamisrøbiibe ñi gatøle ashibig misrøb, katø Espíritu Santotø netsaig kørørmisrøb inchaimba nan ørtan— cha.

¹⁸Inchen tru urastø Sauloi kabmerayugurrimbe kalus bitis latailø kørørbøben, katø ashibig misrig køn. Incha kurrøben, Saulone piu umbu ulsraig køn. ¹⁹Incha Saulobe maben, katøle nui asrbe tammisrøbig køn. Incha Damascosrø Jesucristoi kusrenanigwan marøb melabeløba mam gwaløm gøsrøn tsubig køn.

Saulo Damascosrø Tiuswei wamwan eshkaab kusrenanøb

²⁰Incha tru urastø Saulobe judíosmera tulundzuni yamerayu Jesúsweimburab eshkaab waminchib pølbasrøbig køn: “I Jesúsbe Tiuswei Nusrkain gøn” chib. ²¹Inchen mayeeløba mørøbeløbe truba rruba kwaariilø trenchibelø gøn:

—¿I møg kømmørgøppeh cha, tru Jerusalénsrø purø rrømbø inchib pinishinrrab inchibig, i munchiwan wamab tøga bønrrabelane? ¿Yusrømaybe tru inchaabwei arrub mørgøppeh? cha, judíos sacerdotesmeran karubelaimay merrarrawa nømun srua inrrab— chib.

²²Inchen Saulobe kusrenanøb eshkaimørig katøguchinguen gatøguchinguen mur basramisrøb ya, judíosmera Damascosrø warabelane, ikan paare! øyeebe mandø gúinguen mormøwa gønrrai marøbig køn, Jesúsbe tru Cristo muniirab gúig, tru gøn chib kenamarøb.

Saulo judíosmeran chinchamamub

²³Inchen yandø yam gwalømyu judíosmera Saulon kwetchab wamincha gøben, ²⁴Saulobe wammørin gøbig køn. Incha nømbe yem, gwaløm ciudayu yaskabmerayubaguen larab, kwetchab muniirabelø gøn. ²⁵Inchen nui kusrenanigwan marøb melabeløbe Saulone yem pera amrrua, tru ciuda bötøgatan sruubirøbanrrig palaig marinug kan nu tasinyu waya, kørøørøbelø gøn.

Sauloba, Señorgurri nuneløba Jerusalénsrø

²⁶Incha Saulobe Jerusalénsrø puabe, Jesucristoi kusrenanigwan marøb melabeløba linchab inchen, mayeeløba kørig kui inchibelø gøn. Kaguende nømbe køremeelø gøn Saulobe Jesucriston kørewa unitamappe. ²⁷Trune Bernabébe nune kashmø uta Cristo nøashib karua øriilaimay pera ya, Saulobe Señorwan maysrø mandø nebua asigwan, Señor nun mandø wamindigwan, Jesúswei munchiyu Damascosrø chigucha kørmø eshkaab kusrenanigwan nømun eshkaabig køn. ²⁸Øyamay Saulobe nømbe Jerusalénsrø kebib, katø webarrub llirab uñibig køn. ²⁹Inchen Señorwei munchiyu chigucha kørmø, Tiuswei wamwan eshkaab kusrenanøb, katø judíosmera griegosmerai wamwan waminchibeløba waminchib, øyeebe maig kø chib payib inchen, trune nømbe nune kwetchabgøba larabelø

gòn. ³⁰Inchen nunelø trunun wammørabe, Saulon Cesareasrøngatig lincha amba, truyugurrimbe Tarsosrømay ørøbelø gòn.

³¹Inchen Judea birau kerrigu, katø Galilea birausrø, Samaria birausrø kerrigu iglesiabe ambumay imay tab gøbigwan tøgagøbelø gòn. Incha nømbe Tiusweimburabeløyu nørrørab, Señorwei merrab køriibala amønib inchibelø gòn. Inchen Espíritu Santo purugub waminchib pasraitøgabe purø nørrø nemisrøb ibig køn.

Pedro Eneaswei kwanrrøwan tamarøb

³²Pedrobe truørø llirab uñabe, katø Tiuswei misaameran Lidasrø warabelangucha ashchab ibig køn. ³³Inchen trusrømbe kan møg Eneas taig kønørrab gaimabig kua, ocho años ørøba camayu kwanrrø tsuben, Pedrobe pubig køn. ³⁴Incha Pedrobe trenchibig køn:

—Eneas iJesucristobe ñune tamaran! cha. Kurrab, ñui tsuigwan kusru— cha.

Inchen Eneasbe tru urastø kurrøben, ³⁵mayeelø Lida birausrømbe, Sarón birausrømbe warabeløbe trunun asha, Señorweimay llirawa, bønrramisrøbelø gòn.

Dorcas øsiiraigwan waminchib

³⁶Tru urassrø Jupe ciudayu kan ishug Jesucristoi kusrenanigwan marøb megabig Tabita taig, griegomaybe Dorcas cha wamig, tsubig køn. Tru ishuube chigøben tabig maramelangøba marøb, katø chugurrin gømui melabelane purugub inchibig købig køn.

³⁷Indiibe tru gwalømmerawan Dorcasbe kwanrrø beñippa, kwaptinchen, yandø asrwan chab pirabe, pala katøgan pisorø kan salayu trarrøbelø gòn. ³⁸Inchen tru Lida ciudadbe, Jope bulutø gøbene, Pedrobe Lidasrø unan dai wammørabe, tru Jesucristoi kusrenanigwan marøb melabeløbe pailø møguelan trenchinrai ørøbelø gòn:

—Ke tiusmanda yu nam warainukkatig peba attra tan— chinrai.

³⁹Inchen Pedrobe truiløba kurrab ya, trusrø pubene, tru kwabig tsuisrømay pera amben, mayeelø kelø peta gwailøbe Pedroim bulu tulundzuna, tru Dorcas øsig uña, kewa amønamelø gøben, katø pala itøgueelø gøben mariilan eshkab truba rruba kishibelø gòn. ⁴⁰Inchen Pedrobe mayeelan wambig webambingarua, tømboñsra, Tiusba wamincha, tru kwaig tsubigwan keesha ashabe, trenchibig køn:

—Tabita iKurrø!— cha.

Inchen nøbe larraashippa, Pedron ashabe, kurra, wamisrøptinchibig køn. ⁴¹Inchen Pedrobe tasigu kemøra, kusrua, Tiuswei misaameranba, tru kelø peta gwailanba wama, øsiguig nømun kenamarøbig køn. ⁴²Inchen øyeeg marigwane Jope ciuda ørøba wammøra, møiløgøben Señorwan truba nu gørebelø gøn. ⁴³Inchen Pedrobe yam gwaløm tru Jope ciudayu kørørmisrøbig køn, kan møg Simón daig tru kalusmeran kullaarana, tabzhig tamarøbigwei yausrø.

Cornelio kan piab lataig asigwan waminchibig

10 ¹Cesarea ciudayu kan møg Cornelio taig tsubig køn, suldau “Søtøwan Italiano” cha wamig søtøyu, tru suldau cienelan nø garub pera basrabig. ²Truibe Tiuswan truba isua basrabig Tiuswan køriibala marøb megabig købig køn, mayeelø nui yaueløba kerrigu. Katø misaameran chugurrin gømuielan isua asha purugub tabig marøb, katø managucha Tiusba wamindamigwane pesannamø, marøb megabig købig køn. ³Indiibe kan maaben las tres køsrøn kan piab lataigu Tiuswei ángel tøgandø kenamisri ashibig køn, nø wainug kebarrua trenchibig:

—iCornelio!— cha. ⁴Inchen Corneliobe ángelwan ke tab ashabe, truba kwaarig trenchibig køn:

—¿Señor, chinda?— cha.

Inchen ángelbe trenchibig køn:

—Tiusbe ñi nøba wamindiilan mørøb, katø tru chugurrin gømuielan ñi isua asha purugub tabig mariilan pesannawa, wamøwei indan cha. ⁵Møimbe Jope ciudasrømay møguelø ør cha, Simón daigwan wamønrrab, katø nøbe Pedrogucha munchi gøn cha. ⁶Truibe gatøgan Simónwei yau, ya beba tsun cha, Simónbe tru kalusmeran kullaarana tabzhig tamarøbig mar bulu ya basraig køn— cha.

⁷Inchen tru ángel nun waminchibig iben latatø, Corneliobe pagatø nui karuindiig melabelanba, katø kan suldau nui trendø trag melabelai utuig Tiuswan truba isua pasrabigwanba wamabig køn. ⁸Incha maig kuigwan nømun kerrigu eshkawabe, Jopemay amrrai ørøbig køn.

⁹Indiibe katø gwaløm Cornelio øriilø maywan ambub gua, yandø Jopesrø pub ambub gøben, Pedrobe kwaløm døbøtag lutau

gøsrøn wambig yabala Tiusba waminchab nebibig køn. ¹⁰Inchen nune truba mag isub parøgwaben, nuyasig mamig nenøb gømne, kan piab lataig tøgagøbig køn. ¹¹Srømbalabe kurim basrøben, kan nu llensu lataig pib tsømmerayu litsig piraumay kørkaarri ashibig køn. ¹²Inchen tru llensuyube chi animalgurrimbunø tøgag købig køn, pib srøppar gøben, pirau srala amøñibelø gøben, pala amøñib illimera gøben gue. ¹³Inchen kan wam trendai mørøbig køn:

—iPedro kurrab, kweecha, ma!— cha.

¹⁴Inchene Pedrobe trenchibig køn:

—iSeñor, paare, kan treekkucha mana maramø! cha. Kan nabe managuen maimiig mamønrrai merigwan ma gømøwei, chish mariimíigwan ma gømøwein gur— cha. ¹⁵Inchen tru wambe katøyug waminchippe trenchibig køn:

—Tius tabig chishig mara kørromarigwane, ñibe mamgaig trømbøig kønmab asha tøgagømøta— cha.

¹⁶Treetø rreetø pønmay guenamisren, tru llensune igatø! mòi mòi srømbalasrømay kusruptindig købig køn. ¹⁷Inchen Pedrobe tru nø piab lataig asiibe chi chibig kønrrabgømab isub, nuinetø mumayguen gømui wamnetø, Cornelio ørig møgueløbe Simónwei ya chugúin gúi paya, yaskabu chabguen pubguen inchibelø gøn. ¹⁸Inchabe:

—Kuaje chabe, payibelø gøn: ¿Kan Simón, katø nundøwei Pedrogucha taig, yu ya beba tsuita?— cha.

¹⁹Inchen Pedrobe tru nø piab lataig asigwan maig kermab isubsrø wamnetø, Espíritu Santobe nun trenchibig køn:

—iAu! ñune pøngatø møguelø lab gøn cha. ²⁰Kurrab, yugurri kørroya, kan mandø inchab gømab isuptø basrømøtø, nømbe inrrø cha. Kaguende nømune na ørar— cha.

²¹Inchen Pedrobe tru Cornelio øri møguelan wamønrrab ashchab kørkaarruabe, trenchibig køn:

—Tru ñim lab gúiibe, na gur cha. ¿Kan chindamig lataig balai amrrugue?— cha.

²²Inchen nømbe trenchibelø gøn:

—Nambe Cornelio ørig amrruer cha. Truibe suldau sötø cienwan nø garub pera basrabig, katø sølgandø tabig, Tiuswan køriibala basrabig, katø truigwane maya judíosmera truba tabig køn chib wamindinab møg køn cha. Truigwane kan Tiusweindø tarømari ángelgurri maig indamigwan kenamarin gøn cha, ñun nui yamay arringarua, tru ñi wamindigwan nø mørtraí.—

²³Inchen Pedrobe kebera, ya beba gørrømara, katø gwalømbe nøbe truiløba kurra iben, nunelø tru Jopesrø warabeløgucha Pedron lincha ambubelø gøn.

²⁴Incha gatø gwalømbe Cesareasrø pubelø gøn, Cornelio nui nammisaameran gøben, nui ke trendø linchibelan gøben lincha cha pera munig waben. ²⁵Inchen Pedro yau pubene, Corneliobe wamønrrab webarrua, nui merrab tømønrsrøb, køriibala tabig waminchen, ²⁶trune Pedrobe nun trenchib kusrabig køn:

—iKurra, pasramisr! cha. Nagucha ñi lataitøwei ka møøtø gur— cha.

²⁷Incha Pedrobe Cornelioba waminchib, waminchib kebyabe, truba nu misag tulundzuna pasrain gúi ashibig køn. ²⁸Inchabe Pedrobe trenchibig køn:

—Ñimbe ashibelø gøn cha, kan judíobe judío gømeeløbabe linchømønrrai, merig kui. Inchendø nane Tiusbe kenamartan cha, mu misagwandøgucha chigucha gømfíg kui lataig mara wamømøwei, køsgønrrapteelø gøn damig kømøwein gøn cha. ²⁹Inchawei treekkurri nan wamøben latatø, chi chib pasrømøtø, arrur cha. Inchawei ñimun payrrab inchar chibig køn. ¿Chigurri nan wama ørig kuin gúi?—

³⁰Inchene Corneliobe løtappe trenchibig køn:

—Pib gwaløm gøn cha, øya uras lata, tru las tres Tiusba wamindam ura gøbig købene, nai yau treuras na Tiusba waminchib wabene, mømibe kan møg tørgwalmabig keweig nai merrab pasramisra, ³¹trenchitan cha: “Cornelio, Tiusbe ñi nun wamindiilan mørøb, katø chigøben palai melabelan isua ashib purugub indiilan chigucha, Tiusbe pesannamø, isua gøn cha. ³²Inchawei Jope ciudasrømay karua ør chibig køn, Simónwan wamønrrab, katøgan munchibe truigwane Pedrogucha taig. Truibe tru Simón kalusmeran tabzhig kullaarana tamarøbig mar bulu ya basraigweinug ya beba tsun” cha. ³³Inchen nabe tru urastø ñuimay øriibe, manguen arrin gøn cha. Mømibe mayeeløba nambe Tiuswei merrab purrer chibig køn, Señor ñun chitø wamindingaruigwan nam kerrigu mørtrab.—

Pedro Cornelioi yau waminchib

³⁴Inchen Pedrobe waminchib pølbasa, trenchibig køn:

—Mømibe ciertonwei wetøbeñar cha, Tiusbe møilane ørømara gatøganelandø tab inchimøtø lata isubig kuin gúi. ³⁵Misaamera

nørrø pønrrabig chu birausreeløtøgucha nun køriibala marøb, sølgandø tabig marøbigwane Tiusbe kashmíig køn cha. ³⁶Tiusbe Israelweinukkurri amrrub misaameran chi isumø tab amønamiig kønrrai marøbig tabig srø wamwan Jesucristogurri eshkab kusrenananig køn cha. Nøbe Mayeelaim Bala Nø Garub Nø Ashib Pasrabig køn cha. ³⁷Pøs ñimbe ashibelø gøn cha, tru srø wamwane Galileasrø pølbasa, Judea birau kerriguba wammøra gønrrai marig køn cha, tru piu umbu ulsramigweimburabigwan Juan eshkab kusrenanikkurrimbunø. ³⁸Nabe tru Nazaretsrø Jesúsweimburab truigwan waminchar cha, Tiusbe nune Espíritu Santotøgaba, nui maramburab mariitøgaba itølushen, nøbe tabig marøb, nugwaimandzig mandøguen gømui melønrrai srua gúilan tamarøb unig købig køn cha, Tius nøba basraikkurri. ³⁹Inchen nambe Judea birausrø lata, Jerusalénsrø lata, Jesús chitø mariilane nambe namashib chishtø ashibelø guer cha. Katø nune kurusu mesra, kweetsig købig køn cha. ⁴⁰Inchendø Tiusbe pøn gwalømyube gatøle kusrua, nune kenamisringaruig køn cha. ⁴¹Ke maya misagwangucha kenamismøtø, tru maig kuigwan nømashib ashib pønrrabelan Tius tru manasrøwei nø lawa wesruilandø kenamisrig køn cha, Jesús tru kwaig tsua, katøle kwailai utugurri kurra, tru namba lincha nøba mab muchibelan. ⁴²Incha Tiusbe namune misaameran eshkab kusrenanrrai karuig køn cha, tru øsiguelan lata, kwabelan lata maig kønrrabigwan asha martrai Tius pasriibe nø gøn chib, nam waminchib eshkanrrai. ⁴³Katø mayeeløba Tius maig karuigwan eshkabelø Jesúsweimburab waminchippe, tru mayeeløba nun kørebeløbe Jesúswei munchiyu kaig mariilan ulø bayamiig kømíig pesannaig kørørmisrtrun daig køn— cha.

Judíos komeelø Espíritu Santon utab

⁴⁴Inchen Pedro øyeeg waminchib pasramnetø, Espíritu Santobe kørraarrubig køn, tru mayeelø Tiuswei wamwan wamindi mørøb pønrrabelaim bala. ⁴⁵Inchen Pedroba amrrubelø tru circuncidawar kørewarmerabe, truba kwaariilø gørrømisrøbelø gøn, judíos kømø misaamerangucha Espíritu Santon keta nømuim bala itølushib uncha tøgagønrrai trana gørrømarenen. ⁴⁶Kaguende nømbe møriimíig peg wam wamindi møramba, Tiuswan tabig wamindamba indi ashibelø gøn. ⁴⁷Inchene Pedrobe trenchibig køn:

—¿I misaameran piu umbu ulsrailø gømønrrai kabe mu gøbgan merønrraitarru? cha, nam latatøwei Espiritu Santon nøm utøben.—

⁴⁸Incha Pedrobe Jesucristoi munchiyu nømun piu umbu ulsrøngarubig køn. Inchen nømbe Pedron:

—Katøgan mam gwaløm gøsrøn tiusmanda namba kørørmisr—chibelø gøn.

Pedro Jerusalénsrø chitø burayaigwan eshkab

11 ¹Cristo nøashib karua øriiløba, nunelø Judeasrø warabeløba tru judíos kømø misaameragucha Tiuswei wamwan utin gúi wammørøbelø gøn. ²Incha Pedro Jerusalénsrø katø nebibene, tru asru circuncidawar kørewarbe nune øyeebe maig marøb pasrøgu chib, ³trenchibelø gøn:

—iKan ñibe judíos kømø misaamera tru circuncidameelai yau kebya, truiløba lincha main gøn!— cha.

⁴Inchen Pedrobe lutøgurri maig purayaigwan eshkab, trenchibig køn:

⁵—Na Jope ciudasrø tsua, na Tiusba waminchib wabene, kan piab lataigu na øyeeg kenamisri ashibig kur cha. Truyube kan nu llensu lataig pib tsømmerayu litsig srømbalasrøngurri kørørrarub arrua, naim bulugatig kørørrarubig køn cha. ⁶Inchen umbu chi tøgagig kõtashchab na tab ashene, animalmera pib srøb tøgailø gøben, namiguelø gøben, pirau srala ambubelø gøben, pala amøñib illimera gøben tøgagig asinabig køn cha. ⁷Katø kan wamgucha trendai mörinabig køn cha: “Pedro, kurrab kweecha, ma” cha. ⁸Inchene nabe trenchibig kur cha: “iSeñor, paare, kan treekkucha mana maramø! cha. Kan nabe managuen nai trigube mamønrrai merigwanba, chish mariimíigwanbabe mugabguen muga gømur” cha. ⁹Inchen srømbalasrøngurrimbe wambe nane gatøle lõtø trenchibig køn cha: “Tius tabig chishig mara kørørmarigwane ñibe mamgaig trømbøig kønmab asha tøgagømtø” cha. ¹⁰Truike pønmay treetø rreetø incha, katø kerriguba srømbalasrømay nebibig køn cha.

¹¹Inchen trunetø pøn møguelø Cesareasrøngurri nan lanrrab øriilø nam purrai yau puptinchibelø gøn cha. ¹²Inchen Espiritu Santobe nane: “Mandø inchab gømag isuptø basrømtø, nømbe inrrø” chiben, katø i seiselø nuneløgucha naba lincha amrruig købig køn cha. Incha nambe sötøba Cornelioi yausrø kebambubelø

guer cha. ¹³Inchen nøbe nui yau kan ángel pasramisra, tru nun øyah chib pasraig asigwan namun eshkabig køn cha: “Jopesrømay ør cha, Simónwan, trunundøwei katø Pedrogucha taigwan attrai wamønrrab. ¹⁴Truibe ñiba, ñui yauelanba kaigyugurri mandø incha ñimun wesrailø gøm wammeran waminchun” chitan, chibig køn.

¹⁵Inchen na pua, truyu waminchib mendøbene, tru srøsrøzhiitø Espíritu Santo namuim bala kørraarrub lataitøwei nømuim bala kørraarruptinchibig køn cha. ¹⁶Inchene nane Señor øyah taigwan isuptinchibig køn cha: “Juanbe piu ulsra pitøga pinøbulingaruben, trune ñimbe Espíritu Santotøga pinøbuliilø gønrrun” daigwan. ¹⁷Nam judíosmera Señor Jesucriston kørebelan Tius keta tranigwan nøm judíos kømeeolangucha trunundøwei keta tranene, ¿Tiuswan treeg marmøta chib pasrønrrappe, nabe mu gøbrai køh?—chibig køn.

¹⁸Inchen Tiuswei misaamera jerusalénsreelø iilan mørabe, yandø chi chimøtø, Tiuswan truba tabig waminchib trenchibelø gøn:

—Trube, Tiusbe judíos kømø misaamerangucha øsig kømigwan nebua tøgagønrrai kaig marigwan isua møra, nuimay lliranrrai marin gøn—chib.

Siria birau Antioquíasrø Tiuswei ureemera

¹⁹Inchen tru Estebanwan kweechen isumdiig kaig pub mendøben trugurri, ke kan ørøtømisra chab ambubeløbe, Feniciasrøn gøben, Chipresrøn gøben, Antioquíasrøn gøben øyasrøngatig ambig købig køn, mungucha mendailane Tiuswei wamwan waminchimøtø, judíosmerandø waminchib. ²⁰Inchendø nømui utuelø møiløgøsrøn, chipresreeløba, cirenesreeløba Antioquía ciudayu puabe, griegosmerangucha waminchibelø gøn, Señor Jesúsweimburab eshkab kusrenanøb. ²¹Inchen Señorwei tasiibe nømbe basrøben, misaabe truba nu kørewa, Señorweimay llirabelø gøn.

²²Inchen Jerusalénsrø iglesiayueløbe trunun wammøra, nømbe Bernabéwane Antioquíasrøngatig ørøbelø gøn. ²³Inchen Bernabé trusrø puabe, Tius ka yandø tab indin gua asha, nøbe truba kasraarawa, Señorwei mayu pønrrappe nømui manrrau tab isua mur bønrrønrrai mayeelan waminchibig køn. ²⁴Kaguende Bernabébe tabig, Espíritu Santoba, nui isubigwan Cristoinug pasriiba truitø netsaig købig køn. Inchen Señorweyasig misaabe nørrø nemisrig købig køn.

²⁵Incha yandø Bernabébe Saulon lanrrab Tarsosrømay ya, yandø wetørrawabe, Antioquíasrømay pera ibig kòn. ²⁶Incha nømbe trusrø pila ørøba iglesiayueløba tulundzunab gua, misagwan nørø kusrenanøbelø gòn. Tru Antioquíasrøn gúig kòn, tru Jesucristoi kusrenanigwan marøb melabelan ke srøsrøzhiitø pølbasa “Cristoielø” cha munchi basra wamig.

²⁷Inchen tru gwalømmerawan møiløgøsrøn Tius maig karuigwan eshkabelø Jerusaléngurri Antioquíamay kørørrubelø gòn. ²⁸Inchen kan tru ambubelai utuig Agabo taibe, Espíritu Santo nun maig tamigwan isunrrai inchen, trenchibig kòn:

—Pirau ørøba parø truba nuig attrab gòn— cha. Indiibe treeg kønrrun daibe Claudio karubig køben treeg purayaig købig kòn. ²⁹Inchawei Antioquíasrø Jesucristoi kusrenanigwan marøb melabeløbe nømun kanun ganun maig tranamdiig køben an treeg purugua trana, ørtrab chibelø gòn, nunelø tru Judeasrø warabelayasig. ³⁰Incha treeg mara, Judeasrø Tiusweimburabelan pera marøb pønrrabelan tranrrai, Bernabéwanba, Saulonba tru ketamig tulisaigwan trana ørøbelø gòn.

**Jacobo kwaigwanba, Pedron kailan keeri
yau keerigwanba waminchib**

12 ¹Inchen tru gwalømmerawan rey Herodesbe møilan gøsrøn iglesiayuelan kemørøbig kòn, kaig inchib srua gønrrab. ²Incha Juanwei nuneg Jacobone espadatøga kweetsingarubig kòn. ³Treeg marigwane judíosmerane truba tabig asønain gøben, Herodesbe Pedrongucha merrarrangarubig kòn. Truibe tru Pirri Levaduragaig Maig Fiesta gwalømmerawan burayaig kòn. ⁴Incha Pedron merrarrowabe, Herodesbe kailan keeri ya keerøbig kòn, suldaumera pib sötø ashib pønrrønrrai pønsra kan sötøyu pib suldaubatø. Herodesbe tru Pascua Fiesta puraiben, Pedrone misagwei merrab wesranrrab isua rreeg inchibig kòn. ⁵Inchawei Pedrobe kailan tru keeri yaugurri webimønrrai truba may ashib tøgagúig waben, iglesiabe nuyasig igatø! elachimø, Tiusba waminchib miab gøbelø gòn.

Pedron kailan keeri yaugurri Tius wesrab

⁶Herodes Pedron misagwei merrab løtsø wesramig køben tru gwalmab yem, Pedrobe pagatø suldaumerai tøbøtag pa cadenatøga

merrarraig, kib tsuben, katøgan suldaumerabe yaskabu tru kailan keeri yawan ashib pønrrabelø gøn. ⁷Inchen mõi mõi kan Señorwei ángel kenamisren, tru kailan keeri yaube kan tørguegwalmabig kebiløben, ángelbe Pedron tømbylu kønøga kasrønanabe, trenchibig køn:

—iMallatø kurrø!— cha. Inchen cadenasmerabe Pedroi taskugurri køraptinchibig køn. ⁸Inchabe ángelbe trenchibig køn: —Tamara pørønab, ñui alpargatiswan keetab inchi— cha.

Inchen Pedrobe treeg marene, ángelbe trenchibig køn:

—Pala itøguewagúigwan keb, nai mendig amø— cha.

⁹Inchen webyabe ángelwei wendautø ibendø, tru ángel øyeeg punrraig marigwane ka inditamaptø isub, nøbe tab chigúi nebua ashmíig køn, pøs øyeebe nune kan piaig lataitø gøben. ¹⁰Incha suldaumera ashib pønrrainug srøtiigu puraamba, trugurrimbe katøganbalø puraamba, trugurri yandø wambig callegatømaysrø tsandzøn yaskabyu pubene, tru yaskappe nøtø kurøptinchibig køn. Inchen webamba, kan yabgatig ambene, tru ángelbe nøtø inrrai tarømisrøptinchibig køn.

¹¹Inchen Pedrobe yandø chigúi møra trenchibig køn:

—Møimbeguende, Señor nui ángelwan øra, Herodeswei taskugurrimba, katø maya judíosmera nan maig martashchab ashig kui inchib pønrraigugurrimba wesratan— cha.

¹²Incha Pedrobe yandø iigwan maig kui ashabe, Maríai yamay ibig køn, tru Juanwan katø Marcuskucha taigwei usraimay. Inchen truyube truba yamelø tulundzuna, Tiusba waminchib gøbelø gøn.

¹³Incha Pedrobe yagueta pua, yaskabwan pinrrøgøbene, kan srusrø-unø truyu mendig mendabig, Rode taibe, mu gøtashchab arruabe, ¹⁴Pedroi wam gúi mørøppe, kasrag købiitø yaskabwanguen kurmøtø, katøle umbusrø kelula:

—iPedro yaskabu pasrøtan!— cha, eshkabig køn.

¹⁵Inchene nømbe trenchibelø gøn:

—iPaare! ñibe loca asøn— cha.

Inchen nøbe:

—iTruigwein gøtan!— chiben, nømbe trenchibelø gøn:

—Pedro gømtø, nui møsíg kuinrrun— cha.

¹⁶Trune Pedrobe katøgucha yaskabwan pinrrøgøbig, binrrøgøben, kura ashabe, truba kwaarøbelø gøn. ¹⁷Inchen nøbe ‘niløtø gønrray’ siñal mara, tru kailan keeri yaugurri Señor mandø wesraigwan eshkawabe, trenchibig køn:

—Jacobonba, nunelø katøganelanba iigwan wammørørskønrrigay— cha.

Incha webyabe, peesrømay ibig køn. ¹⁸Inchen yandø tør-rraben, suldaumerabe igatø! mamdøguen gømuilø truba rruba waminchib gøbig køn, Pedrone ni chindinguen mormøwa. ¹⁹Inchen Herodesbe langarua, wetørranrrab gaimappe, tru suldau ashib pønrrabelan maig purayaigwan nømun paya ashib srua guabe, kweetsingaruig købig køn. Incha Herodesbe Judeagurri webya, Cesareasrømay ya, trusrø tsubig køn.

Herodes kwaigwan waminchib

²⁰Herodesbe Tiroba, Sidónba warab misagwan larrø namig tsuben, trusreeløbe søteeløba maig maramigwan lata ke kandø isua bønrramisra, tru rey Herodeswei yau ke nøashib trag megabig Blasto taigwan nømuingatø misrtrai ubønanøb wamincha, truiukurri ambugurri, igurri lata tab warønrrab cha miabelø gøn. Kaguende Tiroba, Sidónbabe tru reyweim biraugurri mamig weerigwan purøsrubelø gøbig kua. ²¹Inchen Herodesbe kan gwaløm treeg martrab cha wesrua basra, tru gwalømbe Herodesbe tru keilø purø tabelan kewa, tru wamisra ashib karub wainug wamisra chull møramdiig purø may waminchibig køn. ²²Inchen misaamerabe trashib mendappe, trenchibelø gøn:

—iligwan waminchibiibe møg kømøtø, kan tius køn!— chib.

²³Inchen tru urastø Señorwei kan ángel Herodeswane kwanrrø benørskøbig køn, kaguende tru maya nuguen tab gønrrai indigwan Tiuswein gønrrain gømøtø, nuyasig kønrrai inchib wabenba. Incha nøbe pølømmera maig kwabig køn.

²⁴Trune Tiuswei wambe larrøbichib nurab ibig køn.

²⁵Inchen Bernabéba, Saulobabe tru ketamig tulisha trana øriilan chab peguchabe, Jerusalénsrøngurri Antioquíasrømay katø ambubelø gøn Juanwan pera, truitøwei Marcos taigwan.

Bernabéwanba, Saulonba lawa wesrub

13 ¹Antioquía iglesiyube Tius maig karuigwan eshkabelø gøben, kusrennøbelø gøben gøbig køn: Bernabé gøben, Simón (trunundøwei Níger taig) køben, cirenesriig Lucio gøben, Manaen gøben (tru misagwan ashib karubig Herodesba trubalatø nuraweig), Saulo gøbengue. ²Indiibe kan gwaløm Señorwan nøm

køriibala tabig waminchib, ayunab gøbene, Espíritu Santobe trenchibig køn:

—Bernabéwanba, Saulonba tarømartray cha, na nømun chi martrai wamigu marøb pønrrønrrain— cha.

³Inchen nømbe ayunab, Tiusba waminchib guabe, tab gønrrai tasiimeran nømuim bala estsara, yandø, ‘trube, ka amrrigay’ cha ørøbelø gøn.

Bernabéba, Sauloba Chipre birausrø

⁴Inchen Espíritu Santo øriilø Bernabéba, Sauloba Seleucíasrømay amba, truyugurrimbe barcoyu Chipre birausrømay ambubelø gøn. ⁵Incha Salaminasrø puabe, judíosmera tulundzuni yamelayu Tiuswei wamwan eshkab kusrenanøbelø gøn. Incha Juanwangucha nømun purugub uñchai pera amøñibelø gøn.

⁶Incha tru pi tøbøtag Chipre birø pasrabigu kandarømayrø Pafossrøngatig larraambabe, truyube kan judío Barjesús taig, kaig libron gusrewa, kwaimandzigweimburabigwan marøbig, ka isatø ‘Tius maig karuigwan eshkabig kur’ chibigwan wetørrabelø gøn. ⁷Tru møøbe Sergio Paulo kubenadur maig kømigwan purø tab isua marøbig treeg møøba, tsubig køn. Inchen tru Sergio ashib karubigwane Tiuswei wamwan nune mørøg køben, Bernabéwanba, Saulonba wamønrrab ørøbig køn. ⁸Inchen tru Barjesús, griegomaybe Elimas cha wamig, tru kaig libron kusrebig, truike tru karubig nui isubigwan Tiusweinug pasrmønrrai truba sötø luløb megabig køn. ⁹Inchen Saulo, katø Pablogucha taibe, Espíritu Santotø netsaig, tru Elimaswan malau ke tab ashabe, trenchibig køn:

¹⁰—iKan ñi gúi! iMisagwan kegørrørskamig, isatø indiibah, larrø gaig maramibatø netsaig møg, nugwaimandzigwei nusrkai! iChigurrimbunø sølgandø tabigwane larrø tsaliig ashig kømui inchib pasrabig køn! cha. ¿Ñibe Señorwei tab maymerane managatig mindishibig mindishinrragu? cha. ¹¹Møimbe Señorwei tasiibe ñun trømbøig nebunrrai martrun cha. Møimbe maya yanagatig kabgaig kørørmisra, pørrwan ashchab gaimanrrabguen—chibig køn.

Inchen mõi mõi nune kabyu wañim beñib løstiig misren, srølamøratø ibig misra, møikkøben tasku nun kemøra srúa amrrai labig køn. ¹²Inchen treeg purayaigwan ashabe, tru kubenadur

Señorweimburabelø kusrenaniilan ke kwaara asha, Señorwan kørebig køn.

Pablo Antioquía ciudassø tsuig

¹³Pabloba, nui linchibeløba Pafos ciudayugurri barcoyu nebamba amba, Panfilia birau Perge ciudassø puben, trune Juanbe truyu nòmun tarømisra, katø Jerusalénsrømay arrubig køn. ¹⁴Incha Pergegurrimbe nømbe Pisidia birau Antioquía ciudassømay amba, truyu sábadø isrin gwaløm judíosmera tulundzuni yau kebamba, purramisrøbelø gøn. ¹⁵Inchen tru maig maramigwan martrai Moisés pørigwanba, Tius maig karuigwan eshkabelai pøriilanba chab lebene, judíosmera tulundzuni yau chi maramigwan ashib karubeløbe møigwan gøsrøn øyeeg chinrrab, ‘inrrø’ chibelø gøn:

—Ñim, namui misaamera, mandø melamigwan øyeeg melønrrigay chib misagwan wamindamig tøgaguabe, waminday— chinrrai.

¹⁶Inchen Pablobe pasramisra, tasigwan kusrawabe, trenchibig køn:

—Ñim, Israelwei misaameraba, katø ñim Tiuswan køriibala tōga pønrrabeløba mørtray cha. ¹⁷Iig Israel misaamerai Tiusbe, namui merrabsrø kølli misaameran lawa wesrawa, tru misaamerane truba nørreelø gønrrai marig købig køn cha, nømbe Egipto birausrø ka ambateelø warøben. Incha tru Egipto birausrøngurri nui tasiitōga ashig kui ashchai marøb wesruig købig køn cha. ¹⁸Incha mu misag warab waraimønug Tiusbe cuarenta añosburab nømune ka awentab tøgagúig købig køn cha. ¹⁹Incha Tiusbe Canaan birausrø misaamera siete nørø sötø pønrrabigwan pinisha, truilaim birømera gøbelan nømui mara tøgagønrrai tranig købig køn cha, ²⁰kan cuatrocientos cincuenta añosburab.

¹Inchen trugurrimbe tru maig kønrrabigwan asha marøb purrønrrabelø ‘asha martrabelø’ cha wamiilø Tiusbe tranig købig køn cha, Tius tru maig karuigwan eshkbab Samuel gøb uraskatig. ²¹Inchen trugurrimbunøbe, israelitasmerabe nòmun ashib karub wanrrabig kan rey miaben, Tiusbe Benjaminweinukkurri karrab misagúig Quiswei nusrkai Saulwan cuarenta años ørøba karub wanrrai tranig købig køn cha. ²²Incha trugurrimbe Tiusbe rey Saulwan nø ashib karub waigwan kerrawa, Davidwan rey gønrrai kusruig købig køn cha. Incha trunune Tiusbe nuimburab

trendaig købig køn cha: “Isaíwei nusrkai Davidbe na maig isubig køben, treeg isub mōg kui asha gur cha. Truibe na chi martrai inchen, treeg martrun” cha. ²³Tru Davidweinukkurri srōig karrab misaameran nō maig martrab cha gōrrōmisrig købig maig køben, Israel misaamerayasig kan Kaigyugurri Wesranrrabig Jesúswan ørig købig køn cha. ²⁴Inchen Jesús nō arrumōwatōbe, mayeelō Israel misaameran Juanbe mas kaig marmōnrrab isua mōra, Tiusweimay lllirain gōnmab asamig piu umbu ulsrailō gōmigwan eshkab kusrenanōb arrig købig køn cha. ²⁵Incha Juanbe nui maramigwan yandō chab patsōgōb arruabe trendaig købig køn cha: “¿Nabe mu gūitamab isugue? cha, nabe tru ñim isub gūig truig kōmur cha. Inchendō nai wendaube katōgan attrun cha, trunune nabe nui alpargatiswan tsiwan pitsamikken truburab gōmuinatan” cha, Juanbe trendaig købig køn cha.

²⁶Ñim, nai misaamera, Abrahamweinukkurri srōig larrōbicha amrrubelōba, katō ñimui utu Tiuswan kōriibala marōb melabelōba: tru tabig srō wam kaigyugurri wesrabigwane yamba namuiwei ørig kuin gōn cha. ²⁷Kaguende Jerusalénsrō warab misaameraba, katō nōmun ashib karub purrabelōbabe, Jesúswane mu gūinguen nebua ashmōwei, katō tru isrin gwalōmmōrig Tius maig karuigwan eshkabelō wamindi wamwan leigwan chigucha, nōmbe truigwan chi mōrōg kōmuindiig kua, nōm Jesúswan øyeeg kwanrrai marōb pōnrrappe, tru pōrig maig taimbala nōmbe treeg nebunrrai marig købig køn cha. ²⁸Jesúswan chigurri kwanrrai maramdiig nuinuube chi kalō marig wetōrramubendō, Pilaton nōmbe kwetchai miaig købig køn cha. ²⁹Inchen nuimburab maig pōrig pōnrrabelō kerrigu treeg puraiben, kurusyugurri pinōsrua, sōrabelō gōn cha. ³⁰Inchendō Tiusbe gatō kwailai utugurri øsiirangarubig køn cha. ³¹Inchen Jesúsbe kwamōwatō, tru Galileasrōngurri Jerusalénsrōngatig nun lincha nerrubelane katō øsiirappe, nōmune truba yam gwalōmgatig kenamisrōb unig købig køn cha. Incha truilōbe mōimbe nōmashib maig asigwan misagwei merrab nuiwan waminchibelō, nōm gōn cha.

³²Inchawei namgucha tru merrabsrō namui kōlli misaameran Tius trannrrab misra kōrrōmisrig, tru tabig srō wamwan ñimun wammōrōsrkōb eshker cha. ³³Nam tru truilai ureemerane treeg martrab gōrrōmisrigwane maran cha, Jesúswan Tiusbe øsiirangarua. Inchen gatō Salmo dosyugucha øyeeg pōrig pasran cha:

“Ñibe nai Nusrkain gøn cha.

Møi nabe ñui Møskai misra basrar” cha.

³⁴Katøbe mana treranrrabig kømíig Tiusbe Jesúswane kwailai utugurri gatøle kusrua, tru treeg marigweimburappe Tiusbe trencha basrig købig køn cha:

“Tru newan tabig, ciertonig treeg martrab cha,

Davidwan tranrrab gørrømisriilane ñun tranrrumøn” cha.

³⁵Inchawei gatøganbaløsrøngucha trenchibig køn:

“Ñui Newan Tabigwei asrwane trerabashmønrrun” cha.

³⁶Pøs Davidbe Tius maig kønrrain gøben tru nø tsuin gwalømmerawan misaameran ashib purugub wawa, yandø kwawa, nui mōskaløba tsumisrene, nui asrbe treraig købig køn cha. ³⁷Trune Tius tru kwailai utugurri gatøle kusruigwei asrbe treramuig købig køn cha. ³⁸Inchawei ñim, nai misaamera, ñim nebua asig kønrrai inder cha, tru kaig mariilan ulø bayamig kømíig pesannaig kønrrun chib eshka kusrenniibe Jesúskurrin gúi. ³⁹Inchawei tru maig maramigwan martrai Moisés pøriiløtøga chi kaig kømíig lataig, tabig kørrømisra pønrrønrrab gaimaigwane, mutøgucha Jesucriston kørebeløbe nuinuubeguende chi kaig kømēelø lataig, tabig kørrømisrtrun cha. ⁴⁰Inchawei ashiptø guy chibig køn, Tius maig karuigwan eshkabelø øyeeg chib pøriibe ñimun nebuig warønrrab gømøtø:

⁴¹“Au, ñim chiwandøgucha ke ka indzatø mørøbelø,

igatø! ke kwaara ashib kenaguen gømø, pinay taig.

Kaguende nabe, ñim warain gwalømmerawan purø nuig maramønrrun daig,

ñimun mugøben treeg købig køn chib wamindingucha, treeg marig købig kuitamappe ke køremgaikke.”—

⁴²Incha Pabloba, nui lynchibeløba judíosmera tulundzuni yaugurri webambene:

—Wendø rruwan isrin gwalømgucha øyeelandøwei waminchurrunrigay— chibelø gøn. ⁴³Incha truyu misag tulundzuna basrabigwan yandø nømbe ‘ungwa’ cha ambene, mōiløgøben truba yam judíosmeraba, katø mōiløgøben judíosmera nøm Tiusweiwan marøb pønrraigu purørrua Tiuswan purø isua melabeløbabe, Pablonba, Bernabéwanba mendig amben, nømbe:

—Tiuswei tru ka yandø tab indigu maizhikkucha elachib pønrrønrrab gømøtø, melabig melønrrigay— chib waminchibelø gøn.

⁴⁴Inchen wendø rruwan isrin gwaløm tru ciudayu ke maya misag lutau Tiuswei wamwan mørtrab tulundzunøben, ⁴⁵judíosmerabe misag truba nørø tul yai ashabe, truba namig pusrkwai asha, Pablo tru trenchib wamindigwane ‘treeg kømøn’ chib, tsalø wamabelø gøn. ⁴⁶Inchen Pabloba, Bernabébabe chigucha kørømø trenchibelø gøn:

—Tiuswei wamwane ñim judíosmeranmerrigwei eshkamig kuig køn cha. Inchendø ñim yandø kaashib, managatig øsig kømigwan ñim tøgagømig trubørab gømui indig kuig købene, trube, nambe mømbe judíos kømeeaimay gatø amrrab chibelø gøn. ⁴⁷Kaguende Señorbe namun trencha karua basrig køn cha:

“Judíos kømø misaamerayasig kan tør lataig kønrrai ñune pasrar cha,
kaigyugurri wesrailø gømigwan eshka pirau munabatsø srua inrrai.”—

⁴⁸Inchen iigwan mørabe, judíos kømø misaamerabe truba kasraarawa, Señorwei wamwan truba tabig waminchibelø gøn. Incha tru managatig øsig kømigwan tøgagønrrai chabguen tarømariilø gøbeløbe møiløtøgucha Jesucriston kørebelø gøn. ⁴⁹Inchen Señorwei wambe tru birau kerrigu larrøbichibig køn. ⁵⁰Inchen judíosmerabe tru ciudayu møiløgøsrøn ishumburmera, Tiuswan purø isua melabelø trurrigu nøm mailø gúi asiilanba, katø ciudayu møguelø nørreelø ashib karubelanba kaig marøb gurrønrrai nømune ke treeg isumne incha, Pablonba, Bernabéwanba nømuim biraugurri webusrøbelø gøn. ⁵¹Inchen nømbe nømui srøbyu usrøwan pabørrgøbelø gøn, ñim øyeeløgurri uyube mømbe ñim gusrenrrigay chib eshka. Incha Iconio ciudasrømay ambubelø gøn. ⁵²Inchen tru Jesucristoi kusrenanigwan marøb melabeløbe kasrag købiibah, Espiritu Santobatø netsailø gøbig køn.

Pabloba, Bernabéba Iconio birausrø

14 ¹Iconiosrø Pabloba, Bernabéba judíosmera tulundzuni yau kegøtø kebamba, purø may waminchib kusrenanen, judíosmera gøben, griegosmera gøben truba nørø Jesucriston kørebelø gøn. ²Trune judíosmera Jesucriston køremeeløbe tru judíos kømeealane ke kaig isumne inchibelø gøn tru Pabloimburappa, Bernabéweimburappa. ³Inchen treeg kuingucha,

Pabloa, Bernabébabe truyu yana warøwa, Tiuswei wamwan chigucha chi korig kuin gømø waminchibelø gøn. Inchen nui wamwan tru ka yandø tab indigwan treegwein gúi ashchai, Señorbe nømui tasiimeratøga mariilø truba nørreelø marøb, kwaara asha gønrrai mariilø marøb inchai tranig køn. ⁴Inchen tru ciudayu misaamerabe kan utueløbe judíosmeraingatø gøben, møiløbe Cristo nøashib karua øriilaingatø gøbig køn. ⁵Inchen judíosmera gøben, judíos kømeeelø gøben, nømun ashib karub purrabeløba kandø misra, nømun trømbøig kaig inchib, sruutøga petønrrab gurrøben, ⁶Pabloa, Bernabébabe trunun wammøra Licaonia birau tru Listraba, Derbeba, pueblomerasrømayba, katø tru buluwan gatøganbalømerasrømayba trubab ambubelø gøn. ⁷Incha trusrø tru tabig srø wamwan eshka kusrenanøbelø gøn.

Listrasrø Pablon sruutøga petab

⁸Inchen Listrasrømbe kan møg kal-lainukkurri managuen uñchab gaimabig srøbmera tuluntsunig wabig køn. ⁹Inchabe tru møøbe Pablo waminchen mørøb wabig køn. Inchen Pablobe nun ke tab asha, ke tamarig kømuitamab isub wai ashabe, ¹⁰mur wamab trenchibig køn:

—iØlgandø kurra, pasramisr!— cha.

Inchene tru møøbe pørssappe, pasrambua, llibab mendabig køn. ¹¹Inchen misaamerabe Pablo chi marigwan ashippe, nømui Licaonia rriimay trenchib trashib mendabelø gøn:

—iMøguelø lataig, tiusmera namuinug kørørruin gøn!— chib.

¹²Incha Bernabéwane tius Zeus køn chippe, Pablone tius Hermes køn cha wamabelø gøn, kaguende Tiuswei wamwan waminchibiibe Pablo gøben. ¹³Inchen tru tius Zeuswei tab ya, tru ciudayu kebambinuutø pasrabigu ashib wab sacerdotēbe, toromera gøben, umerā purø tabzheelø tamariilø gøben, tru ciudayu kebambi yaskabmerasrø srua arrua, tru toromeran kweecha, misaamerabamisra, Pablonba, Bernabéwanba, nømune tiusmera gúi mara tranrrab mendabelø gøn. ¹⁴Inchen Cristo nøashib karua øriilø Bernabéba, Pabloa nømun reeg martrab indi mørabe, nømui kewagúilan kølsrøb, misag utusrø kegørø, ¹⁵trenchibelø gøn:

—iAu, yu mayeelø pønrrabelø! ¿Chindimba øyeeg martrab inchigue? cha. Nambe ñim latailøtøwei ka møgueløtø guer cha.

Ke ka treeg maranmab ashchaindø mariilan elacha, øsig wab Tius srømbalawan gøben, tru pirøwan gøben, marwan gøben, chigurrimbunø truyu pønrrabelan marøbigweimay lllirawa bønrramisrtrai, tru tabig srø wamwan nambe ñimun waminchab amrruer chib. ¹⁶Merrabsrø misag srøig, srøig kurrab amrrubelane misaamera nørø pønrrabelan chuelandøgucha kerriguelan, nømun maig amønig køben, treeg ka amønibasig køn cha. ¹⁷Inchen gøben managucha nuimbura bigwane maig kuigwan eshkab wamindig købig køn cha, tabig marøb. Srømbalasrøngurri srewan ørøb, ellmariilø misram bølmera pubene, tru gúindø, tru gúindø misringarunrrun cha, chi palømø unchaguen mamig tøgagønrrai tranøb, ñimui manrrømeran truba kasraaranøb.—

¹⁸Inchen nøm øyeeg chib waminchagucha, nømbe misaameran ke trendø merønrrab gaimabsrubelø gøn, tru nømun tiusmera gúi mara toromeran kweecha tranmønrrai.

¹⁹Inchen Antioquíagurrimba, Iconiogurrimba møiløgøsrøn judíosmera puabe, misag purø nu pasrabigwan ke kaig maramne inchai wamincha, Pablon kwetchab srug muta peta, ciudayugurri wambiisrømay ke paluunchib megam srua webambubelø gøn, yandø kwaig kønmab. ²⁰Trune Jesucristoi kusrenanigwan marøb melabeløbe nuin bötøgatan tulundzunøben, nøbe kurra, katø ciudayu kebibig køn. Incha gatø gwalømbe Pabloba, Bernabéba Derbesrømay ambubelø gøn.

²¹Incha Derbesrø Jesucristoi tabig srø wamwan eshkab kusrenana, Jesucristoi kusrenanigwan marøb melabelø nørø nemisrtrai mara, trugurrimbe Listramayba, Iconiomayba, Antioquíamayba katø amrruig købig køn. ²²Incha trusrømbe tru Jesucristoi kusrenanigwan marøb melabelan kullaaramø mur bønrrønrrai waminchib, isubigwan Tiusweinug pasragúigwane elachib pønrrømø, tindøga bønrrønrrai chib waminchibelø gøn. Incha nømune trenchibelø gøn: “Tius nø ashib karub waisrø kebambamibe chinetø chinetø murelø puben, truyu puraambub meløwawei kebambamig køn” cha. ²³Incha iglesiamørig nømbe Tiusweimbura belan pera marøb pønrrabelø wesrawa bønsra, Tiusba waminchib, ayunab guabe, nømune tru nøm kørewa bønrraig Señor nø ashchai pønørøbelø gøn.

Antioquía ciudasrømay katø ambub

²⁴Incha trugurrimbe Pabloba, Bernabébabe Pisidia birauwan puraambub amba, Panfilia birau pubelø gøn. ²⁵Incha Perge

ciudayu Tiuswei wamwan eshka kusrenana, trugurrimbe Ataliasrømay amrrubelø gøn. ²⁶Incha truyugurrimbe barcoyu nebamba, Siria birau Antioquíasrømay ambubelø gøn. Tru nøm mõi ya patsøga bønrraigwan martrab amrrai Tiuswei tru ka yandø tab indiitøga tabig ashib tøgagúilø gønrrigay chib, tru nømun pønsraig købiisrømay. ²⁷Incha trusrø puabe, iglesiayuelan tulundzuningarua, Tius nømbe chinetø, chinetø mariilanba, tru judíos kømø misaameragucha isubigwan Señorweinug pasra tøgagønrrai yaskabmeran mandø gurøb arrigwanba waminchibelø gøn. ²⁸Incha Pabloba, Bernabéba Jesucristoi kusrenanigwan marøb melabeløba truyu truba yana kørørmisra waraig købig gøn.

Jerusalén waminchab tulundzunab

15 ¹Inchen tru uras møiløgøsrøn Judeagurri Antioquíasrømay amba, nunelan treeg kusrenanin gøbig køn:

—Moisés kusrennig tru circuncision maramigwan marmøwabe, kaigyugurrimbe wesrailø gønrraamøn— chib. ²Inchen Pabloba, Bernabéba tru treeg kusrenanøbelan ‘øyeebe maramig kømøn’ chib, nømbe purø mur aleguiyabelø gøn. Treekkurri Pablonba, Bernabéwanba katø truyu nømui utuelø mõilan gøsrønbamara, Jerusalénsrømay ørtrab wesrawa bønstrøbelø gøn, tru øyee pub arrigwan Cristo nøashib karua øriiløba, Tiusweimburabelan pera marøb pønrrabeløba trusrø waminchai.

³Inchen tru iglesiayuelø tru amrrai karua øriiløbe Fenicia birøwanba, Samaria birøwanba puraambub ambubelø gøn, judíos kømø misaamera nømui trendø marøb gúilan elacha, Tiuswei maywan amøñinrrab nøm mandø pønrramisrigwan eshka. Treekkurri trusrø tru mayeelø nuneløbe truba kasraarabelø gøn.

⁴Incha Pabloba, Bernabéba, tru lincha ambubeløba Jerusalénsrø chab pubene, trusrø iglesiayueløba, Cristo nøashib karua øriiløba, katø truyu Tiusweimburabelan pera marøb pønrrabeløba nømune wamab utøben, nømbe Tius maig marigwan kerriguh waminchibelø gøn. ⁵Inchene møiløgøsrøn merrappe fariseosmeraingateelø gøbelø gua, mõimbe Jesucriston kørebeløbe trenchibelø gøn:

—Tru judíos kømø misaamera Jesucriston kørebelane tru circuncidamigwan maringarub, katø tru maig maramigwan martrai Moisés pøriilan maringarumig balan— cha.

⁶Inchen Cristo nõashib karua øriiløba, Tiusweimburabelan pera marøb pønrrabeløba tru øyeeg puigwan maig kõtashchab ashchab tulundzunabelø gøn. ⁷Inchen purø rrømbøig mur aleguiyab gømig puben, Pedrobe kurra basramisra, trenchibig køn:

—Nai nunelø, ñimbe srøsrø gwalømmerawangurri ashibelø gúinrrun cha, Tiusbe ñimui utugurri nan lawa wesruig køn cha, judíos kømø misaamera tru tabig srø wamwan na waminchen møra, kørenrrai. ⁸Tiusbe nõmui manrrømeran ashibig kuabe, nam judíosmeran rranøb lataitøwei Espíritu Santon nõmungucha tranøb, nõmuingatø pasrar chib kenamarig køn cha. ⁹Tiusbe nõmun nõørø mara namuingatøtø inchib pasrømuig køn cha, nõmui isubigwan Tiusweinug pasra tøgagúitøgatø nõmui manrrømeran chishmarig købig kua. ¹⁰iÑim gúi! ¿Ke Tiuswane chinchibig kõtashchab inchib pønrrøtirru? cha, tru nam lata, namui merrabsrø kølli misaamera lata, øyeeg maramigwan marøb gønrrab gaimaigwane tru Jesucristoi kusrenanigwan marøb melabelan, trunun nõm niga amrrai mõimbe nõmun neguanøb. ¹¹Treeg kømøtø, Señor Jesús tru ka yandø tab incha ketiitøgatø nambe kaigyugurri wesrailø guermab kørewa bønrrer cha, nõm lataitøwei.—

¹²Inchen truyu maya misag tulundzuna basrabiibe niløtø gørrømisra, mørøb purrabelø gøn, Bernabéba, Pabloba tru judíos kømø misaamerai utusrø, Tiusbe nõmba pasrain gúi ashchai nõmgurri mariilanba, kwaara asha gønrrai mariilanba waminchen. ¹³Inchen nõm chab waminchen, Jacobobe trenchibig køn:

—Nai nunelø, mørtray cha: ¹⁴Simónbe wamindan cha, judíos kømø misaameran srøtøgurri nõmungucha isua basranmab ashchai, truilai utugurri nui ureg sötømera gønrrai mara, nui munchin nõmuinug tøgagønrrai marigwan. ¹⁵Pøs mõi øyeeg publiibe, tru merrabsrø Tius maig karuigwan eshkabelø maig pøriiba ke kandø gøn cha. Tru øyeeg pørig pasraimbala:

¹⁶“Øyeeg purayaig wendøbe tru Davidwei ya penin tsuigwan katøle kusrua basramønrrun chib.

Chab pinabsruigwan katøle tamara gusrub,
srøig mara basramønrrun daig.

¹⁷Maya misaamera gatøganelø uncha bønrrabelø
Señorwan lanrrain cha,

mayeelø judíos kømø misaamerainug
nai munchiwan nõmuinug pasra wamig kønrrun cha.

18 Tru Señor iilan marøbig øyeeg tan daig,
tru manasrøngurri øyeeg martrab isua tøgaguen waig
købigwan.”

19 'Inchawei nabe, ke treeg maramne inchib pønrramgaig kui ashar cha, judíos kømø misaamera nømui merrabsrø marøb gúilan elacha, Tiusweinug pønrrønrrab llirawa amrrubelan. 20 Treeg kømøtø, taska mari tiusmera tøgagúilan pønsraig mamimeran mamøwei, katø møguelø lata ishumbur lata larrø rrømbøig marøb gømigwan marmøwei, kweetsig kømøtø, ka melamisratø kwaig animalmerai yauwan mamøwei, katø aniwan mamøwei indamig køn chibig, treegwan eshkawa, pøramitø balan cha. 21 Kaguende merrab manasrøngurri Moiséswei pøriilan ciudamørig judíosmera tulundzuni yamerayube eshkaab kusrenanøbelø tøgagøben, truiløbe isrin gwalømmørig tru maig maramigwan martrai pørigwane lebelø gøbig køn— cha.

Pabloa, Bernabéba Siria birau Antioquíasrømay katø ambub

22 Inchen Cristo nøashib karua øriiløba, Tiusweimburabelan pera marøb pønrrabeløba, katø iglesia mayeeløba tru nømui utugurri lawa wesrawa, øramig tabig asønai inchibelø gøn, Antioquíasrømay Pabloa, Bernabéba amrrai. Incha Judas, katø nundøwei Barsabás taigwanba, Silaswanba amrrai wesrubelø gøn, nunelai utu tru mas nørreelø gúi asi møguelan. 23 Incha nømune ørøppe, kan kilga øyeeg chibig pøra, trana ørøbelø gøn:

Nam Cristo nøashib karua øriiløba, Tiusweimburabelan pera marøb pønrrabelø, nam ñimui nunelø ñim judíos kømeeelø Antioquíasrømba, Siriasrømba, Ciliciasrømba warabelø nunelan 'ka amøñigueh' chinrrab inder.

24 Møiløgøsrøn yu namui utuelø amba, namma chigucha treebe marøb gønrrai karumubendø, chinetø cha, ñimune igatø! kan ørøba mandøgucha gømuielø melønrrai marin gøn. 25 Incha treekkurri nam mayeeløba kandø isua bønrramisra, namui utuelan mø møguelan gøsrøn lawa wesrua, namui undaaraig nunelø Bernabéba, Pabloa kegøtø nømun ñimuimay ørtrab inder. 26 Tru Pabloa, Bernabébabe Señor Jesucristoi munchigurri ke kwamig nebuinanrraptiikken inchib meløwar gøn. 27 Incha nambe Judaswanba, Silaswanba ñimuimay ører. Truiløbe nam pørigwan, nømashib

trunundøwei waminchun. ²⁸Espíritu Santon lata, namun lata tabig asønatan katøgan srøig, srøig maramelø ñimun negwanmøtø, iig tru maramig palønrrapteelandøh martrai karumig: ²⁹tru taska mari tiusmeran animal gweecha pønsrai yaumeran mamøwei, katø aniwan mamøwei, kweetsig kømøtø ka melamisratø kwaig animalmerai yauwan mamøwei, katø møguelø lata ishumbur lata larrø rrømbøig marmøwei indamigwan. Ñim øyeelan marøb pønrrømuikkurrimbe, søl marøb pønrrønrrabguen.

Trube, ungwa, mayanguen tab gúilø gønrrigay, chib pørig køn.

³⁰Incha yandø nømun, ‘trube, ka amrrigay’ cha øren, Siria birausrø Antioquíamay amba, tru asamigwan ashchab eshkailø tulundzunøben, tru kilga ørigwan nømbe tranøbelø gøn. ³¹Incha trunun nøm lewabe, truba kasraarabelø gøn øyeeg purugub wam tabig wamindigwan møra. ³²Inchen Judasba, Silasba nømgucha Tius maig karuigwan eshkabeløtøwein gua, tru tabig purugub wam nu wamincha guetiitøga trusrø nunelan kullaaramø ambub melamig kønrrai kørrømarøbelø gøn. ³³Incha truyu maya yana gøsrøn nømbe kørrømisra warøben, nuneløbe ‘chi isumgaig tab gúilø gønrrigay’ chib, nømun karua ørøbelaisrømay ‘ungwa’ cha, katøle ørøbelø gøn. ³⁴Inchen Silasbe trusrø nø kørrømisramig tab punrrab gúi isubig køn. ³⁵Inchen Pabloba, Bernabébabe Antioquíasrø kørrømisrøbelø gøn, trusreelø truba yameløba Señorwei wamwan kusrennøb, katø trunun wammørøsrøb.

Pablo nui martrab yamigwan gatøle marøb pølbaserøb

³⁶Yandø mam gwalømyu gøsrønbe Pablobe Bernabéwan trenchibig køn:

—Ciudamørig nam Señorwei wamwan eshkaab kusrenaniisrø nunelan maig inchib meløtashchab katø ashchab amun— cha.

³⁷Inchen Bernabébe Juanwan, katø nundøwei Marcos taigwan, pera inrrab inchen, ³⁸trune Pablobe pera ambamgaig kui ashibig køn, kaguende tru srøsrø ambenma Marcosbe Panfiliatø nømun tarømisra, nømbe tru maramigwan martrab imuinukkurri.

³⁹Inchen ke mumayguen gømíig peemaytø buptinchen, møikkurrindøgucha tarømisra, Bernabébe Marcoswan pera barcoyu Chipresrømay ibig køn. ⁴⁰Incha Pablobe nuimburaappe

Silaswan lawa wesrawa, tru nunelø: “Señorwei ka yandø tab indiitøga tabig ashib tøgagúilø gønnrigay” cha øriilø ambubelø gøn. ⁴¹Inchen Siria birauwanba, Cilicia birauwanba pureb ibig køn, Tiuswei ureemera tru iglesia truørø pønrrabelan kullaaramø, mur bønrrønrrai purugub waminchib.

Timoteo Pablonba, Silaswanba lincha ib

16 ¹Pablo Derbesrømba, Listrasrømba pueblomerayu pubene, truyube kan Jesucristoi kusrenanigwan marøb megabig Timoteo taig tsubig køn, truike Criston køreweig judía ishugwei nusrkai. Inchendø møskaimbe griego gøbig køn. ²Inchen Timoteobe tru Listrasrø, Iconiosrø nunelai utu, chigucha tamgaig tabig købig køn. ³Inchen Pablobe Timoteowan nøba lincha attrai incha, tru trusrø warabelø judíosmeragurri nune asru circuncidamigwan marøbig køn, kaguende mayeeløba møskaimbe griego gúi ashibelø gúimba. ⁴Incha nømbe tru pueblomerawan puraambub ambimørig, Cristo nøashib karua øriiløba, Tiusweimburabelan pera marøb pønrrabelø tru Jerusalénsrø purrabelø, maig marøb gønrrai karuilane isua mørøb gønrrai eshkab ambubelø gøn trusrø Tiuswei ureemeran. ⁵Inchen trusrø tru iglesiamera pønrrabeløbe nømui isubigwan Tiusweinug pasra bønrramigu, kullaaramø, mur bønrramisren, misaabe kwalømmørig nemisrøb ibig køn.

Kan møg macedoniasriig Pablon piab lataigu kenamisrøb

⁶Incha nømbe Frigia birøwanba, Galacia birøwanbabe ka purab ambubelø gøn, kaguende Asia birausrømbe Espíritu Santo Tiuswei wamwan waminchibashmuben. ⁷Incha Misia linderørø puabe, Bitinia birausrø kebamrrab inchen, Jesúswei Espíritube trusrø kebambashmuben, ⁸Misia birø buluwan yabwandø puraamba, Troassrø kørraambubelø gøn. ⁹Indig trusrø Pablobe yem kan piab lataig asig tøgagúig køn. Truyube kan møg Macedonia birausrriig pasramisra trenchib miab pasrai ashibig køn: “Macedoniasrømay larraamø cha, namun purugunrrab.” ¹⁰Inchawei Pablobe tru piab lataigu treeg asin gøben latatø, nambe Macedoniasrømay amrrab inchibelø guer, namun Tius nui tabig srø wamwan eshkab kusrenanrrai wamitamaptøwei isua.

¹¹Indiibe Troaskurri barcoyu nebamba, Samotraciasrømay kanmaytø ke purab amba, katø gwalømbe Neápolisrø pua,

¹²truyugurrimbe Filipossrø pubelø guer. Tru ciudadabe Macedonia birau mas nuig køb, katø kan søtø Roma misaamera truyube kebamba warab inchibelø gøn. Incha tru ciudayu nambe mam gwaløm gøsrøn kørørmisrøbelø guer. ¹³Inchen kan isrin gwaløm tru ciudayu nu yaskabu wambiisrø webambubelø guer kan pi mendasrømay, truyube judíosmera Tiusba waminchab tulundzuninug kuitamab isua. Incha nambe truyu purramisra, ishumburmera tulaamba purrabelan waminchibelø guer. ¹⁴Inchen tru utube kan ishug, Lidia taig mørig waben, Señorbe nui manrrøwan kurøbig køn Pablo chi chitamørtrab ke tab mørig wanrai. Truibe, Tiatira ciudasriig, yalø bigø llensumera purø tabig yanøbig, trurrigu Tiuswan kørriibala tabig waminchib megabig købig køn. ¹⁵Incha nøba, nui yaeløba piu umbu ulsrailø gørrømisra, ke tiusmanda chib namune trenchibig køn:

—Na, Señorwan cierton kørrein gúi ashabe, trube, ñim nai yamay amrrua, kørørmisrømay— cha.

Incha namune ke kørørmisramne inchibig køn.

¹⁶Nam Tiusba wamindinumay ambub gøbene, kan srusrø karuindiig megabig, kebasra rranøb gwaimandzig tøgäig namun katønrrab arrubig køn. Truibe tru nun karub pera gøbelane truba nørø an asingarubig købig køn, nø misagwan kebasra guetiiløtøga. ¹⁷Incha tru srusrøbe Pablonba, namunba wendautø trenchib trashib arrubig køn:

—iI møgueløbe Tius Mayeelaim Bala Pasrabigwei karuindiig melabelø, kaigyugurri wesrailø gøm maywan ñimun eshka kusrenanøbelø gøn!— chib.

¹⁸Inchen ke treetø rreetø purø yam gwaløm uñen, yandø Pablon ke pesriikken inchen, nøbe keesha, tru kwaimandzigwane trenchibig køn:

—Jesucristoi munchiyu i srusrainukkurri nabe webinrrø tamønrrun— cha.

Inchen tru urastø kwaimandziibe elachibig køn.

¹⁹Inchen tru karub pera gøbelø tru treeg an marøb pønrramibe yandø patsi asha, Pablonba, Silaswanba kemøra, misag tulundzuninumay ke paluunchib waram srua ambubelø gøn, tru misagwan ashib karubelaisrømay. ²⁰Incha merrab pønrsabe, trenchibelø gøn:

—iKan i møgueløbe ya judíosköleelø gøbendø, namui ciudawane ke chi maringuen asamgaig marøb amrrun! cha. ²¹Nøm

waminchib kusrenanøppe ke peemaytø mariilø nam uta tøgagømig kømøwei, katø treegwan marøb gømig kømøwei inchai namune meriilan kusrenanan cha, nam ya romanosmeran.—

²²Inchen misaabe mayamba kanbalatø misra namig kurrøben, maig kønrrabigwan asha marøb purrabeløbe, Pablomera kewagúilan tsakkandø wesrawabeta, tsiitøga itchai karubelø gøn.

²³Incha nømune truba yam ichabeta, kailan keeri yau kebusra, truyu ashib pasrabigwane webamrraingag purø may ashib tøgagungarubelø gøn. ²⁴Inchen tru treeg martrai karuigwan mørabe, truyu ashibiibe gatøguchi umbusrø gueera, srøbmeran cepoyu kegwana, purrønnøbig køn.

²⁵Inchen yem døbøtasrømbe Pabloba, Silasbabe Tiusba waminchib, Tiusweyasig cantab gøben, katøganelø truyu keerig pønrrabeløbe mørøbelø gøn. ²⁶Inchene igatø! møin gagúitø mur birøgønabig arruptinchen, tru kailan keeri yawan niga basrabigwan truilanguen punø banrrø sruaguchen, igatø! tru urastø truyu maya yaskabmeraba kurig bønrramisren, tru keerig bønrrabelai cadenasmerabe mayeelaimba picha gørrabelø gøn. ²⁷Inchen truyu keeriilan ashib pasrabig kiagasrøbene, mømibe tru kailan keeri yau yaskabmerabe kurim bønrraptindi ashabe, nui espadan wesrawa, igatø! nøasiitø ke yandø kwanrrab inchibig gøn, kaguende truyu pønrrabelø chab wegørra chab lulitamab isua.

²⁸Inchene Pablobe mur trashib trenchibig køn:

—iÑiguen øyeeg kaig marmøtø kagøbash! cha. iSøtøba nambe yu ka burrer!— cha.

²⁹Inchene tru kailan keeri yawan ashib pasrabiibe kan pela biløgaig miawa, umbusrø luløb guebya, Pabloimba, Silasweimba merrab itønab tømønrsøbig køn. ³⁰Incha wambig pera webyabe, payibig køn:

—iAu kasukumera! ¿na kaigyugurri wesraig kømibe chi maramig balønrrerah?— cha.

³¹Inchene nømbe trenchibelø gøn:

—Señor Jesucriston køreu cha. Incha ñiba, ñui yaeløbañau kaigyugurri wesrailø gønrrabguen— cha.

³²Inchen nømbe Señorwei wamwan nunba, nui yau purrabelø sètøelanba waminchibelø gøn. ³³Incha nømun ichabeta tru pisrø mariilan tru yemdøwei tre uras pillmawa, tru urastø nøba, nui yaelø kerrigueløba piu umbu ulsrailø gøbig køn. ³⁴Incha

trugurrimbe Pablonba, Silaswanba nui yamay pera ya, manna, nōba, nui yauelōbañau Tiuswan kōreikkurri truba kasraarabelō gōn.

³⁵Indiibe tōr-rabene, tru maig maramigwan asha marōb purrabelōbe tru policíameran karua ørōbelō gōn, tru kailan keeri yawan ashib pasrabigwan, trenchinrai: “Pablonba, Silaswanbabe elatchain” cha. ³⁶Inchen tru yawan ashib pasrabiibe Pablone trenchibig kōn:

—Tru maig kōnrrabigwan asha marōb purrabelōbe yandø ñimun weeriilø gōnrai karua ørin gōn cha. Pøs treeg kōbene, webamba, chi isumøtø, ka ambay— cha.

³⁷Trune Pablobe trenchibig kōn:

—Nam ya Roma birausrø kal-lawar gōb lataitøwei kal-lawarwan, namun maig kuitashchab payaguen ashmubendø, maya misagwei merrab namun ichabeta, namun kailan keeri yau kebusra ðmōingan mugucha wammøriimøzhig namun nilø wertrab inditarru? cha. iPøs chi treeg kōnrraamøn! chibig kōn. Pøs truiløtøwei namun wesrunrab amrrubash— cha.

³⁸Inchen tru policíamerabe tru maig kōnrrabigwan asha marōb purrabelan tru treeg taigwan eshkabene, truba kwaarōb kōrig kui inchibelø gōn, truiløbe Roma kal-lawar lataitøwei kal-lawar gúin gúii wammørøppe. ³⁹Inchen nømbe Pablonba, Silaswanba ‘kan nambe treeg kōmui tamab isua indig kōn’ chib amba, kailan keeri yaugurri wesrawabe, ‘ciudayugurri ke tiusmanda amrray’ chibelø gōn. ⁴⁰Incha truyugurri webambabe, nømbe Lidiai yamay amba, truyu Jesucristogurri nōmui nunelan ashabe, maig melamigwan treeg marōb melønrrigay chib wamincha, yandø ambubelø gōn.

Pabloba, Silasba Tesalónicasrø

17 ¹Pabloba, Silasba ambuppe, Anfípoliswanba, Apoloniawanba puraambub amba, Tesalónica ciudadsrø judíosmerai kan tulundzuni ya pasrabnug pubelø gōn. ²Incha Pablobe nøbe trendø treeg marōbig kua, tru judíosmera tulundzuni yausrø nōmun ashchab kebya, pøn sábadø ørōba tru judíosmeraba Tiuswei wamwan pørigugurri ‘øyeeg kōn’ chib, ‘øyamay gōn’ chib, waminchibig kōn. ³‘Øyeeg kuig kōn’ cha, tab eshkab:

—Tru Cristo ñim muniirab gúibe truba kaig indinab megawa, kwawa, katø kwailai utugurri kurrab indamig, trendø treeg purayamig palønrrabig kuig kōn— chib.

Incha nõbe trenchibig køn:

—I Jesús na ñimun eshkaab wamindiibe, Cristo truitøwein gøn cha, tru ñim muniirab gúig.—

⁴Inchen mõiløgøsrøn tru Pablo wamindigwan yandø treegwein gúitamab isua, Pablonba, Silaswanba linchen, katø griegosmera Tiuswan truba isua melabelø truba yameløba, katø ishumburmera truba kusrebelø yameløba truiløgucha linchibelø gøn. ⁵Inchen judíosmerabe truba pusrkwai namig kui asha, larrø gaig mõguelø ka llliraptø bønrrabelan wama, kan nu sötø trubalatømisra, ciudayu misaameran chinetø isunrrai trømbøig inchib gurrabelø gøn. Incha Jasónwei yau kegørrabelø gøn, Pablonba, Silaswanba merrarrawa, misaamerai merrab wesrunrrab. ⁶Incha truyu wetørranrrab gaimappe, Jasónwanba, nunelø gatøganelanba kemøra, paluunchib waram srúa ambubelø gøn, ciudayu misaameran ashib karub purrabelaimay, trenchib trashib:

—Yu pirau kerriguba maya misaameran igatø! kan ørøba mandøgucha gømuieøl melønrrai marøb mõgueløbe yusrøngucha amrruin gøn chib. ⁷Inchen Jasónbe nui yau wama pera wain gøn cha. Iiløbe tru Roma maya misagwan ashib karub wabig César tru maig maramigwan martrai pøra wariilane, mørøg kømub utsøbetab ka nõmuimburaaptø marøbelø gøn cha, katøgan rey køn chib, kan Jesús taig.—

⁸Inchen iigwan mørabe, maya misaameraba katø tru misagwan ashib karub purrabeløbabe truyu nõmgucha ke mandøguen gømui inchibelø gøn. ⁹Inchendø Jasónwanba, tru kanelanba elatsamig kønrrai truburø an utabe, elachibelø gøn.

Pabloba, Silasba Berea ciudasrømay ambub

¹⁰Inchen nuneløbe ke pillirabendø Pablonba, Silaswanbabe Bereasrømay webambingaruben, trusrø puabe, judíosmera tulundzuni yau kebambubelø gøn. ¹¹Tru Bereasrø judíosmerabe tesalónicaelø lata gømo, maig isumigwan isummay isubelø guabe, Jesucristoi wamindigwan truba chull inchib uta, tru nõm trendaibe ka isatø gømutashchab ashchab, kwalømmørig Tiuswei wam pørigwan chi gøtashchab maig køtashchab ashibelø gøn. ¹²Inchawei treekkurri truiløbe Criston truba nu køreben, kusreb ishumburmera griegasmera gøben, katø mõguelø truba yameløba kørebelø gøn. ¹³Inchen Tesalónicasrø judíosmerabe,

Tiuswei wamwan Bereasrøngucha Pablo eshka kusrenanøb unan daig wammørøppe, trusrø misag nørrø pønrrabigwan namig kui inchi gurrønrai martrab ambubelø gøn. ¹⁴Inchen tru urastø nuneløbe Pablone mar bulusrønmay øren, Silasba, Timoteobatø Berea kørørmisrøbelø gøn. ¹⁵Inchen Pablon pera ambubeløbe Atenassrøngatig pera amba pegucha, yandø tru Silaswanba, Timoteowanba ke petø nøba tulundzunørrab amrrunrrain cha, Pablo trencha karuigwan mørabe, nømbe katøle Bereamay legucha amrrubelø gøn.

Pablo Atenassrø

¹⁶Incha Pabloba Silaswanba, Timoteowanba Atenassrø muniirab uña, ke taska mari tiusmeratø netsaig ciuda gúi ashabe, nuinetø chiguen tab gømui inchi gøn. ¹⁷Incha treekkurri judíosmera kusrenani yau judíosmeraba, gatøganelø Tiuswan truba isua melabeløba ‘iibe øyeeg køn’ chib, ‘iibe øyamay gøn’ chib ambugurri igurri waminchibelø gøn, katø mayeelø misaamera tulundzuninug kwalømmørig truyu amrrubeløba chigucha. ¹⁸Inchen nørrø gusreb møguelø, tru filósofos “epicúreosmera” tailø, nømui nørrø isuigu asrwan ka tab gønrai marøb tøgagúinuutø tabig køn chibeløba, katø tru filósofos “estoicosmera” tailø nørrø isuigwan kusrebeløba ‘iibe øyeeg køn’ chib; ‘iibe øyamay gøn’ chib, Pabloba waminchibelø gøn. Inchabe kan utueløbe trenchibelø gøn: —¿I møg ya wamdø nigaibe namune chi wamincherah?— cha.

Inchen kaneløbe:

—Katøgan peg birausrø tiusmeraiwan eshka kusrennøbig køb asønan— chibelø gøn, kaguende Pabloba Jesúswei tru tabig srø wamwanba, kwawa gatø øsiiraigwanba eshka kusrenanen.

¹⁹Incha nune kanbalø Areópago taig, tru kusrebelø tulundzuninumay merrarrowa pera amrrua, trencha payibelø gøn:

—¿Tru srøig peetø gusrenanøb ñi waminchib arrigwan namun wammørøsrøkøbsrumuguh? cha. ²⁰Pøs namui kalumerayube ñibe chigøben ke ka peesrøtiitø waminndan cha. Inchawei trunun tab chi chibig kui wetøgørrag kuin guer— cha.

²¹Kaguende mayeeløba Atenas warab misaameraba, katø tru petø ka amrruatø warabeløba igatø! chi peg isumøtø, chigøben ke srøig isuigwandø waminchib gua, nømbe truigwangøba wamindi mørøg kui inchi gøbig køn.

²²Inchen Pablobe Areópago taig tru kusrebelø tulundzuninug nømuin døbøtag pasramisra, trenchibig køn:

—Atenas misaamera, ñimbe chiyutøgucha Tiuswan isuer taigu ke maizhikken pinab marmønrrab inchibelø guín guí ashar cha. ²³Kaguende na truørø llibab ashib uñene, tru tiuswan køriibala tabig waminchib mariiløsrø, kanbaløsrømbe altargucha wetørrar cha. Truyube trenchibig pørig tøgäig,

TIUS ASIIMIIGWAN

chibig. Tru ñim ashmubendø køriibala tabig waminchib marøb tøgäügig, tru Tiuswan nabe ñimun eshkab waminchar, chibig køn.

²⁴I Tius køn cha, tru pirøwan marøbig, katø truyu chine købelan chigucha. Inchawei srømbalawan lata, pirøwan lata, nøwei ashib pasrabig kuig køppe, nøbe møguelai taska marig tab yamerayu wamfig køn cha. ²⁵Katø misag nømui taska mariiløtøga tab inchaim balai wamfig køn cha, chi palai wamfig kuabe. Kaguende nø gön cha, mayeelan øsig kømigwan tranøb, israb amønämig kønrrai tranøb, katø chigurrimbunø tranøb inchibiibe.



Los Hechos 17.23

²⁶Kan møkkurrindø truyugurri chi misaatø larrøbichib inrrabigwan nòbe marig købig køn cha, pirø muba kuimburab warønrrai. Incha merrabsrøwei nòm maya yana waramigwanba, chutø, chutø waramigwanba kanmaytø chab asha bònstraig købig køn cha. ²⁷Øyeeg marøppe, ka srølamøratøguen Tiuswan lawa inchipa, wetørratashchab indig køn cha. Pøs isa gømø, Tiusbe nam møigweinuutøgucha chi yab pasrømøn cha. ²⁸Kaguende nambe Tiusweinug øsig bønrrab, nøgurri llirab amønib, nøgurri misag bønrrer cha. Katø kan ñimui utuitøwei, chiwan gøben purø tabzhig isua waminchibiima trendaig købig køn cha: “Nambe Tiusweinnukkurri larrøbicha amrrub misaamera guer” cha. ²⁹Pøs trube, nam Tiuswei ureemera gúig gøppe, Tius nò trendø maig kuigwane kabe oron, kabe anwan, kabe srugwan møguelai isuitøga taska purø tabzhig mari lataig kuitamab isumgaig køn. ³⁰Chigucha nebua ashmeelø gøb urassrø øyeeg waraig købigwane, Tiusbe ka treeg purainrraindø kagøbashippa, mõi yan gwalømmerawane maya misaameran chuelandøgucha nòmui kaig mariilan isua møra, Tiusweimay lliranrrai karua basran cha. ³¹Kaguende nòbe pirau maya misaameran maig asha maramig kan kwaløm wesrua pasran cha, tru sølgandø tabig maig kønrrabigwan maramig tru kan møg treegwan martrai nò lawa wesrua pasriitøga martrab. Incha treeg purainrraitamab isua pønrramig kønrraimbe, tru møwane kwailai utugurri kusruig købig køn— cha.

³²Inchen tru mørøbeløbe, tru kwailø gatøle øsiiranrrun daigwan mørøppe, kan utueløbe ke ka indzatø møren, katøganeløbe trenchibelø gøn:

—I wamindigwane katøwan chi mørtrumøn— cha.

³³Inchen yandø Pablobe nòmui utugurri webya ibig køn.

³⁴Inchen gøben, møiløgøsrøn møguelø Pablon mendig amba, Tiuswan kørebelø gøn. Inchen tru ututø Dionisio tru Areópagoyu kusreb møguelai utuiba, katø kan ishug Dámaris taiba, katøganeløba Tiuswan kørebelø gøn.

Pablo Corintosrø

18 ¹Inchen treeg puraiben, Atenaskurri Pablobe Corinto ciudasrømay webibig køn. ²Incha trusrømbe kan judío Aquilas taig Ponto birausriigwan wetørrabig køn, tru Aquilasba, nui srai Priscilababe Italiagurri Corinto ke srø buatø warøben.

Kaguende tru Roma maya misagweim bala ashib karub wabig Claudiobe treeg karuin gøbig køn, judíosmerabe mayamba Romagurri webusriilø gønrraingue. Incha Pablobe truilaimay ibig køn. ³Inchen Aquilasba, Priscilababe Pablo nø marigwandøwei tru carpas ya-ureg marøb tsushibelø gøbene, nomba kørromisra tru marøb warabelø gøn. Pøs nøbe carpas ya-ureg marøb tsushibiitøwein gøbig kua. ⁴Incha judíosmera tulundzuni yau isrin gwalømmørig Pablobe øyeeg køn chib, øyamay gøn chib waminchibig køn, judíosmeran, griegosmeran maig kuigwan nebua asøskønrrab inchib.

⁵Inchen Silasba, Timoteoba Macedoniagurri pubene, Pablobe Jesúsweimburab eshkaab kusrenanamigutø kebya basramisrøbig køn, tru judíosmeran: “Jesúsbe tru ñim muniirab gúig tru Cristo gøn” cha eshkaab. ⁶Inchen judíosmerabe mørøg kømub chi treeg kømubendø indan chib namig kurra, nun tsalø wamøben, Pablobe nui kewagúilan pabørrgøb trenchibig køn:

—iÑimui animbe ñimuim balatøwei peñchai møyimbe ñimdøwei lawa pønrramisran! cha, iYandø møyimbe tru animbe naim bala attraingaig chishig webya basrar! cha. Møingurrimbunøbe judíos kømø misaameraisrømay yamønrrun— chibig køn.

⁷Incha truyugurri webya, kan møg Tito Justo taigwei yamay ibig køn. Truiibe Tiuswan køriibala tabig waminchibig købig køn. Inchen nui yabe tru judíosmera tulundzuni ya mendatøweim basrabig køn. ⁸Inchen tru judíosmera tulundzuni yau ashib pera basrabig, Crispobe, nui yaeløba kerrigu Señorwan køreben, møyiløgøben truba yamelø corintosreeløgucha Pablo wamindigwan mørøbeløbe Criston kørewa, piu umbu ulsrailø gúig køn. ⁹Inchen Señorbe Pablon yem kan piab lataigu trenchibig køn:

—Kørig kui inchimøta cha; waminchibig waminchi cha; ka gøbashiptinchimøtø. ¹⁰Kaguende nabe ñiba basrar cha, ñune mugucha kaig martrab kebatachab gaimanrrun cha. Kaguende i ciudayube nabe misag truba nu tøgä basrar— cha.

¹¹Inchen Pablobe Corintosrø pila y tøbø bila kørromisrøbig køn, Tiuswei wamwan kusrenanøb.

¹²Galiön Acaya birau maya misagwan ashib karubig køb uras judíosmerabe søteeløba ke kandø isua bønrramisra, Pablon ashig kømub namig kurra, tru maig maramigwan asha marøb purrainuumay srua ambubelø gøn, ¹³trenchib:

—Tiuswan kōriibala tabig wamindamig tru maig maramigwan martrai Moisés pōrig maringaruimay gōmōtō, nōbe misaameran ke peemay maramne inchib unan— chib. ¹⁴Inchen Pablobe ke waminchabguen inchen, Galiónbe judíosmeran trenchibig kōn:

—iAu, ñim judíosmera! Kan chigōben truba nu galø marig kui, kabe purø rrōmbøig marig treeg chigúimbe, trube na ñimun treegwan mōrōb wabsrubrainrrun cha. ¹⁵Inchendø iibe chi treeg kōmōtō, ka wamindiilanbah, katø tru munchimera chabah, tru ñimui maig maramigwan martrai pōra wariilø chabatørre inchib gúig kōbene, uyube ñim asay cha, øyeegwane nabe asha rranrrabgucha wamur— chibig kōn.

¹⁶Incha tru maig maramigwan asha marøb purrainukkurri wambig weguchibelø gōn. ¹⁷Inchen mayeelōmisra judíosmera tulundzuni yau ashib pera basrabig Sósteneswan kemōra, tru maig maramigwan asha marøb purraig merrab truba kurraguchibelø gōn. Inchen Galiónbe trunune chigucha isua ashmø, chinchibgucha warøbashmab ashibig kōn.

Pablo katøle Siria biraui Antioquíásrōmay ib

¹⁸Inchen gōben Pablobe katøgucha truyu yam gwaløm kōrrōmisra, nunelan yandø ‘ungwa’ chibig kōn. Incha yandø Siria birausrōmay barcoyu iben, Priscilaba, Aquilasba nōba ambubelø gōn. Incha Cencreasrōmbe Pablobe pusrugwan chishchig parøbig kōn, Tiuswan ‘nø maig martrab cha kōrrōmisrigwan treeg maramōnrrun’ chib. ¹⁹Incha Efeso ciudasrø puabe, Priscilanba, Aquilaswanba tarōmisra, judíosmera tulundzuni yau kebya, judíosmeraba maig kuitashchab payiyab waminchibig kōn.

²⁰Inchen nōmbe katøguchi nōmba truyu kōrrōmisrtrai tiusmanda chib gúingucha, nōbe kōrrōmismōtō, ²¹nōbe yandø:

—Ka inrrab inchar cha ‘ungwa’ chabe, trenchibig kōn: Tius nan gatø yusrōmay attrain gōbene, katø arrumōnrrun— cha.

Incha barcoyu nebya, Efesogurri ibig kōn. ²²Incha Cesarea ciudasrø puabe, tru iglesian ‘ka warøgueh’ chinrrab nebya, trugurrimbe Antioquíamay kōrraarrubig kōn. ²³Incha truyu kan maya yana gōsrøn tsuabe, Galacia birauba, Frigia birauba, trusrø lutøgurri llirab inrrab webibig kōn, mayeelōba tru Jesucristoi kusrenanigwan marøb melabelan kullaaramø, mur bōnrrōnrrai purugub waminchib.

Apolos Efeso ciudasrø eshkaab kusrenanøb

24Inchen tru uras kan judío alejandriasriig, Apolos taig, purø may waminchib møg Tiuswei wam pørigwangucha treetøwei purø nu nebua ashibig, Efeso pubig køn. 25Nøbe Señorwei maywan muba amønamiigwan kusrenanigwan kusreweig kua, nøbe igatø! treegwan martrab isua marøb, Jesúsweimburab waminchib kusrennøppe, maig kuigwan treeg kusrenanøbig køn. Juan tru misaameran piu umbu ulsrailø gømig kusrennigwandø nebua ashibig kuagucha. 26Incha Apolosbe judíosmera tulundzuni yau mungucha kørmø waminchib kusrennøb pølbasren, Priscilaba, Aquilasba tru wamindigwan mørabe, Apoloswane nørørø pera amba, Tiuswei maywan gatøguchinguen tab nebua asingarub maig kuigwan eshkabelø gøn. 27Inchen Apolos Acaya birausrømay inrrab inchen, nuneløbe masken ka martrai inchib, trusrø tru Jesucristoi kusrenanigwan marøb melabelan kan kilga pørøbelø gøn, Apoloswan nøm tabig wamab utønrrai. Inchen nøbe Acayasrø puben, Tius tru nø ka yandø tab indiitøgatø Tiuswan kørebelayasiibe kan maya nuguen tab gøbig køn. 28Kaguende judíosmera tru nøm ‘treeg kømøn’ chib amrruigwane mayeelai merrab Apolosbe mu mandamgaig ‘treeg køn’ chib waminchibig køn. Tiuswei wamwan pørigu treeg chibig køn cha eshkaab: “Jesúsbe tru Cristo ñim muniirab gúig, truig køn” chib.

Pablo Efeso ciudasrø Jesucristoiwan eshkaab kusrenanøb

19 1Apolos Corinto tsumne, Pablobe tru birauwandøwei pureb ya, Efesosrø kørraarrua, kan møiløgøsrøn Jesucristoi kusrenanigwan marøb melabelan wetørrabig køn. 2Inchabe trencha payibig køn:

—¿Ñimbe Criston køreb uras Espíritu Santon utøgueh?— cha. Inchene nømbe:

—Espíritu Santo købig kuin gúi nambe wammørøbguen wammørmeelø guer— cha trenchibelø gøn.

3Inchene Pablobe trenchibig køn:

—Trube, ñimun tru piu umbu ulsraibe ¿chi gøn chibigwan utig køh?— cha.

Inchene nømbe trenchibelø gøn

—Nambe Juanwei piu umbu ulsraigwandø utig køn— cha.

⁴Inchen Pablobe trenchibig køn:

—Juanbe nòm mas kaig marmønrrab isua mōra, Tiusweimay lllirain gønmbaig asamig piu umbu nòmun ulsrailø gúig køn cha, tru nui wendau attrabig Jesúsban nō gúitamab isua, misaamerabe nun køreinrrain— chib.

⁵Inchen misaamerabe øyeegwan mōrabe, Señor Jesúswei munchiyu piu umbu ulsrailø gøbelø gøn. ⁶Incha Pablo tasigwan nōmuim bala estsarene, nōmuim balabe Espíritu Santo kōrraarruben, mōriimø wammera waminchib menda, Tius maig karuigwan nōmbe waminchibelø gøn. ⁷Truiløbe kerrigube mōguelø doceburab gøbig køn.

⁸Incha Pablobe pøn bøl ørøba judíosmera tulundzuni yau nōbe chigucha kōrmø kusrenanøb ‘øyeeg kōmøn’ chib, ‘øyamay gøn’ chib waminchibig køn, maig kuigwan nebua asamne inchib Tius nō ashib karub pasraigweimburab. ⁹Inchen kan utueløbe nōmui manrrōmeran mur marøb, trunun treeg kōmuitamab isub kaashib, maya misagwei merrab trømbøig wamabelø gøn tru srø maywan. Inchen Pablobe nòmun tarømisra, tru Jesucristoi kusrenanigwan marøb melabelan nōørø pera ya, kan Tirano taigwei kusrenani yau kwalømmørig ‘iibe øyamay gøn’ chib eshkaab waminchibig køn. ¹⁰Treetø pa bila ørøba maren, trugurri Asia birau warab misaamerabe mayeeløba, judíosmera lata, griegosmera lata Señorwei wamwan mōrøbelø gøn. ¹¹Incha Tiusbe Pabloi tasikkurri maramburab mariilø purø nørreelø marøbig køn. ¹²Pabloi pañelumeran gatø chigøben marøb pasramisrtrab pala itøgueelø nui asr kebatiilan, truilanbagues kwanrreelaim bala wartrab srua amben, treetøgatø nōmui kwanrrōmerabe chab tammisriilø gørrømisren, kwaimandziimerabe nōmuinukkurri webamben inchibelø gøn.

¹³Inchen mō judíosmera gøsrøn kwaimandziimeran tru misaamerainukkurri webusrøb truørø, truørø amønibeløgucha tru treeg maramig Señor Jesúswei munchitøga mara ashchab inchibelø gøn, tru kwaimandziimeran trenchib:

—iTru Pablo eshkaab kusrenanig Jesúswei munchiyu, nabe webambay tamønrrun!— chib.

¹⁴Inchen tru iigwan marøbeløbe kan judío Esceva taig, tru sacerdotismeran karubigwei nusrkalo siete gøbig køn. ¹⁵Inchendø nòm treeg maren, tru kwaimandziibe nōmune trencha løtabig køn:

—Jesúswane mu gúi ashib, katø Pablongucha mu gúi ashib inchibig kur cha. ¿Inchen ñimbe mumera guermah?— cha.

16Inchen tru kwaimandziitøga møøbe nømuim bala itøbørswa, nømune mayeelanba kamaren, igatø! nømbe tru yaugurri kegøsaateelø kørriindiilø chab luløbelø gøn. 17Inchen tru øyeeg purayaigwane tru Efeso warab misaamera mayeeløba wammørig kørromisrøbig køn, judíosmera lata, griegosmera lata. Inchen mayeeløba truba rruba kørriimatøben, Señor Jesúswi munchibe masken, masken wammørig kørromisrøbig ibig køn.

18Inchen møyiløgøben truba yamelø Criston kørebeløbe øyeeg maramgailanrre marøbelø guer chib mayeelai merrab eshkaab amrrubelø gøn. 19Inchen tru kaig libron kusrewa, kwaimandzigweimburabelan marøbeløbe truba yamelø truiløgucha treetøwei tru nømui kaig libromeran srúa amrrua, mayeelai merrab chab parrøbelø gøn. Inchen tru libro beni anmeran mayan gøtashchab ashene, cincuenta mil gøbig køn. 20Incha øyamay Señorwei wambe larrøbichib nurab, mu chindamgaig kørromisrøbig ibig køn.

21Inchen øyeelø chab puraiben, Pablobe Macedonia birauwan gøben, Acaya birauwan gøben llirab yabe, nuinetø Jerusalénsrømay inrrab isua, trenchibig køn: “Jerusalénsrømay yabe, Romasrømaygucha yamig tab punrrautan” cha. 22Incha Macedoniamaybe nui pagatø purugubelan Timoteowanba, Erastonba øra, nøbe Asia birau gatø kan maya yana gøsrøn kørromisrøbig køn.

Efeso misaamera ke chindi asamgaig inchib gurrab

23Tru gwalømmerawan tru srø mayweimburappe truba namig waminchib kurrabelø gøn. 24Kaguende kan møy, Demetrio taig, andøga chigøben marøbiibe, tiusa Dianai ya-ureemera andøga mariilø tabzheelø marøbig kua, tru gatøganelø treeløwei marøbelane tru yaniiløtøga purø gørrø anmera maringarubig købig køn. 25Incha tru treeg marøbelanba, katøganelø treeg lataitøwei marøbelanba tulundzuna, Demetriobe trenchibig køn:

—iÑim mayeelø! nam puarmera misrøb ambamibe øyeeg mariiløyugurri an arrubig kui ñimbe ashibelø gøn cha. 26Katø ñimbe ashib, mørøb indiinrrun cha, Efesotø gømtø, Asia birau kerrigu lutau Pablobe: “Møguelø taska mariiløbe tiusmera gømøn”



Los Hechos 19.19

chib, ke treeg kuitamab isumne inchib wamincha, misagwan truba nørø tarømarin gøn cha. ²⁷Kan nam iitøga yeeg yanøb an marøb gúibe øyeeg inchene, chi tabig kømui ashib kaashib guebamben nambe kegørramsun gøn cha. Katø trutø gønrrab gúindø, tru purø nu tiusa Dianai tab yagucha, chigucha gømíig lataig kørørmisrøb iben, Diana, tru purø nuig, purø tabiibe petø pinab inrrun chibig køn, Asia birau mayamba, yu pirau katø maya misaameraba, nun køriibala tabig waminchib tøgagúig.—

²⁸Inchen øyeeg wamindiilan mørabe, purø rrømbøig nama, trenchib trashibelø gøn:

—iEfesosmerai Dianabe purø nuig køn!— chib.

²⁹Inchen tru ciudayu maya misaabe ke chindinguen asamgaig inchib mendappe, misaabe ke kanbalatø amba, Pabloi linchibelø Macedoniasrø møguelan, Gayonba, Aristarconba kemøra, igatø! paluunchib waram srúa ambubelø gøn, tru chigøben waminchab misag tulundzuniisrømay. ³⁰Inchen Pablobe truyu misagwan waminchab kebinrrab inchen, Jesucristoi kusrenanigwan marøb melabeløbe kebibashmeelø gøn. ³¹Katø møiløgøsrøn Asia birau misaameran ashib karub purrabelø Pabloi trendø asiilø chigucha, nuimay ørøbelø gøn: “Tru chigøben waminchab tulundzuniisrømbe tiusmanda kebimønrrig” cha eshkanrrai. ³²Inchen misaamera truyu tulundzuna basrabiibe ke chindinguen asamgaig inchib gúig køppe, kaneløbe peg chib rrashiben, katøganeløbe katø peg chib rrashiben, tru mayeelø lutau tøbø pasrabiibe chinchab tulundzunin gúinguen mormøwa gøbig køn. ³³Inchen tru nu misag basrabigwei utuelø møiløgøsrøn Alejandron webingarumdiig køn chib eshkaben, judíosmerabe maya misaamerai merrabsrøngatig purainrrai trawaguchen, Alejandrobe maya misagwei merrab maig kuigwan eshka waminchab, ‘niløtø guy’ cha, tasig kusrubig køn. ³⁴Inchendø judío gúi wetøgørrappe, katøle sötøbah, sötøbah rrashibelø gøn, kan pa ura burab trenchib:

—iEfesosmerai Dianabe purø nuig køn!— chib.

³⁵Inchen tru ciudayu tru chigurrimbunø mariilanba, marmelanba kilga børøb wabiibe misagwan yandø mas trashimumne inchib megaptø, yandø wasrørangaruabe trenchibig køn:

—Efeso misaamera, tru purø nuig tiusa Dianai tab yawanba, katø tru nø lataigwei srømbalasrøngurri peñibigwanba, yamba i Efeso ciudabe

truilan chi kòmønrrai ashib pasrabig kui ìkan mube wammørmiig kònrraitamabelø gø chindah? cha. ³⁶Inchawei treeg kømubendø chib kan mugucha isan damgaig købene, ñimbe yandø wasrøramdiig kòn chibig kòn, chiwandøgucha ke kan chinchaptø inchib marmøtø. ³⁷Kaguende i møguelø ñim srua amrruiløbe namui tiusmerai tab yamerayugurri nilab wesrub gømøwei, namui tiusan purø rrømbøig chi wamab pønrrømøwei indan cha. ³⁸Inchawei Demetrioba, katø tru nøba treetøwei marøb pønrrabeløba muba gøben aleguiyaig tøgaguabe, truweiwei maig kuigwan nøm asha martrai truyu purøra bønramelø bønrrab, katø maig kønrrabigwan asha marøbelø purrab indan cha. Møitøgucha truyube kangurriin gangurri ñimun maig punrrabigwan treeg asha martra tay, chibig kòn. ³⁹Inchen ñim gatøgan peg wamindamig tøgaguabe, trube, treegwan waminchab tulaamba, trunun purramisra asamig balønrrun cha. ⁴⁰Kaguende mõi øyeeg puigwane namune ka kailø gøptørre, øyeeg martrab gurrig kui inchaptiikken gøn cha, kan chigurri nambe øyeeg inchib gurrig kòn cha eshka b pønrramig chigaabendøbe.— ⁴¹Incha nøbe øyeeg taitøga misag tru tulya basrabigwane chab tarømarøbig kòn.

Pablo Macedoniamayba, Greciamayba ib

20 ¹Yandø tru øyeeg chindinguen asamgaig marøb gúig wasrøaben, Pablobe Jesucristoi kusrenanigwan marøb melabelan wamingarua, maig melamigwan treeg marøb melønrrigay chib wamincha, trugurrimbe nømun ‘ungwa’ cha, Macedoniasrømay inrrab ibig kòn. ²Incha tru birau truørø lliirab uña, Tiuswei ureemeran maig melamigwan treeg marøb melønrrigay chib truba nu wamincha guetabe, Greciasrømay ibig kòn. ³Incha nø trusrø pøn bøl kørørmisra, yandø gatøguen Siriamay barcoyu ke inrrabguen incha, judíosmerabe nilø trubatø nun kaig martrab inchib gúi wammørøbig kòn. Incha treekkurri katøyug Macedoniawandøwei purainrrab ibig kòn. ⁴Inchen bereasriig Pirroi nusrkai Sopater gøben, tesalónicasreelø Aristarco gøben, Segundo gøben, Derbe birausreelø Gayo gøben, Timoteo gøben, Asia birausreelø Tíquico gøben, Trófimo gøben Pablon linchibelø gøn. ⁵Incha nømbe namui merrabguen webamba, Troas ciudasrø namun muniirain gøbig kòn. ⁶Pirri chi levaduragaig main gwalømmerra chab patsøben, nambe Filiposkurri barcoyu webamba amba, trattø gwaløm wendau Troas ciudasrø nømun wetøgøbelø guer. Incha truyu trune kørørmisrøbelø guer.

Pablo Troassrø ashchab ib

⁷Incha nambe truaalømbe tru pirriwan pirishinrra manrrab tulundzuna gøben, Pablobe waminchab pølbaserøbig køn. Kaguende katø gwalømdø nuimbe webyamig køben, nui wamindamigwan waminchippe, yem døbøtakkatig waminchibig køn. ⁸Inchen pala pisusrø nam tulundzuna purrainuube, lãmparamera truba yam pilab meløben, ⁹kan matsinø, Eutico taig, pendana bala wabigwane yandø ki ganab arruben, Pablobe igatø! waminchibig waminchen, tru matsinøwane yandø ke kigøbiitø kamarig kib wawa, tru pøn bisusrøngurri kebinabya, kwabeñen, kwaig kusrabelø gøn. ¹⁰Inchen Pablobe kørraarrua, tru matsinan irab kusrawabe, trenchibig køn:

—Øsiiran cha, kwarmøtay— cha.

¹¹Incha Pablobe gatøle palasrø nebarrua, tru pirriwan pirisha mab gua, katø nømui mamigwan chab mabe, tør-rramnegatig wamincha, yandø ibig køn. ¹²Inchen tru matsinane øsiguig pera amben, mayeeløba truba isuin gua, kasrag kuilø gørrømisrøbelø gøn.

Troassrøngurri Miletosrømay ambub

¹³Incha nambe merrab misra amba, Asón ciudaserøngatig barcoyu ambubelø guer, Pablon trusrø katønrrab, kaguende nøbe barcoyu gømøtø, katsikkatø inrrab misra, nøbe treeg kørørmisrig køben. ¹⁴Incha Pablobe namba Asónsrø asiyaben, nambe barcoyu nun nebera, Mitilene ciudaserømay ambubelø guer. ¹⁵Incha truyugurri webamba, katø gwalømbe Quío ciuda binrørguesrø pubelø guer. Incha wendø gwalømbe Samos ciudaserø pua, katø gwalømsrømbe Mileto ciudaserø pubelø guer. ¹⁶Incha Pablobe Efeso ciudaserømbe barcoyu purab inrrab isuig køn, kaguende Asia birau menrra yana gørrømisrmønrrab isua. Pøs treeg nebubene, Pentecostés kwalømbe Jerusalénsrø wanrrab isuig kua, mallatø inchib megaig købig køn.

Iglesiaiyu ashib pønrrabelan Pablo inrrab ‘ungwa’ taig

¹⁷Pablobe Miletosrøngurri wamønrrai ørøbig køn, tru Efeso iglesiasrø tru Tiusweimburabelan pera marøb pønrrabelan. ¹⁸Incha amrrubene, trenchibig køn:

—Ñimbe na srøsrø gwaløm Asiasrø puinukkurimbunø, nabe chu urastøgucha ñimui utu na maig uñibig kuigwan ñimbe tab ashibelø gøn cha. ¹⁹Ñimui utu Señorweimburabelan maig køben inchimø, tammay marøb, truba kappin gørrøgøb, judíosmera nan chinetø kaig martrab gurrøben, treeløyu pureb arrigwan. ²⁰Treeg kuingucha, ñimuyasig chigøben tabig kønrrabigwane nabe kørig kui inchib sørab pasrømø, maya misagwei merrab lata, truørø yamørig eshkaib kusrenanig købig køn cha, ²¹judíosmeran lata, griegosmeran lata, nømui kaig mariilan isua møra, Tiusweimay lliramigwanba, nømui isubigwan namui Señor Jesúsweinug pasra tøgagømigwanba eshkaib waminchib.

²²Incha mømibe nabe Jerusalénsrømay inrrab inchar cha, igatø! nan trusrømay Espíritu ke inrrai inchen, trusrø nan chi burainrrab gúinguen mormubendø. ²³Ciudadmørig na yaisrømbe nane chi peg bunrrabig bønrrømøtø, ka kailan keeri yau pasramibah, kaig nebuben isuig megamibatø treeg nebunrrab gøn cha. Espíritu Santo eshkaigwan trunundøwei nabe asha basrar chibig køn. ²⁴Inchendø nai øsig kømigwangøba isub pasrømøwei, øsig kømibe nayasiibe purø tabig kuitamab isub pasrømøwei inchar cha. Nai chu pumigwan pumsrøngatig pub, katø Tiuswei tru ka yandø tab indig tru tabig srø wamwan eshkaib waminchab na Señor Jesúswan utigwan patsøgøb indikkurimbunøbe chi gømønrrautan cha.

²⁵Inchawei mayeeløba mømibe ñim Tius nø ashib karub pasrainuguigwan na eshkaib kusrenanøb pureb yaisreeløbe nai maløwane katølebe managuen ashchaamøn cha. ²⁶Inchawei mømibe kanmaytø nabe kelarrab trendamønrrun cha: Mayelai ani naim bala attrain gømø, naimburappe yandø chi isumikkaig chish basrar cha. ²⁷Kaguende Tius maig martrab isua tøgagúigwane nabe kørig kui inchib chi sørab pasrømø, kerriguh eshkaib wamindig kuig køn cha. ²⁸Inchawei ñimbe ñimasiitøwei tab ashiptø guy cha, katø ñim ashib tøgagúig Tiuswei iglesia mayeelan chigucha. Truilan ñim Tiusweimburabelan ashib pera bønrrønrrai Espíritu Santo pønstraig købene, mayeelø Señorwei iglesiayuelan maig ashib tøgagømigwan treeg ashib tøgaguy cha. Kaguende truiløbe nuyasig nui anindøga peniilø gøn cha. ²⁹Kaguende na yugurri webya ibene, ñimui utube mendailø kerrunrrun cha, ñim ashib tøgagúi ubisha sőtøwan pinishinrrabelø, kan lobosmera larrø namiguelø latailø. ³⁰Inchen ñimui utueløtøweinguen nømui

kaig kusrenaniilõtøga, tru Jesucristoi kusrenanigwan marøb melabelan peløsrka nømui mendig amõñibelø gønrrai martrabelø kurrønrrun cha. ³¹Inchawei treeg købene, pesannamø tab ashiptø, katø isua guy cha, tru na pøn bila ørøba yem, gwaløm ñimun mõi gwandøgucha maig melamigwan ke isuppatø melønrrai, ñimun chu uraskucha kanun ganun na kappin gørrøgøb wamindig købig køn cha.

³²Trube, mõi mbe øyeeg købene, Señor Jesucristogurri nunelø, ñimun Tius nø ashib tøgagønrraimba, katø nui tru ka yandø tab indig wamyuba pønrrar cha. Trube tabig nørrørab amrrai maramburab marøbig køb, katø tru keta tranrrab gørrømisrigwan, nuyasiitø tarømariilø mayamba trunun utamig kønrrai marøb inchibig køn cha. ³³Nabe anwan lata, oron lata, asru keelan lata, muiwangucha naimarømmørø inchib chull incha gømur cha. ³⁴Ñimbe ashibelø gúinrrun cha, naimburab chi palabelanba, yu purrabelai chi palabigwanba tøgagønrrai, marøbiibe i nai tasiimera gúi. ³⁵Chiyutøgucha nabe øyeeg mariilõtøga, truburab gømeelan kuñab purugunrrab, øyamay gømig købig kuitamab asha gønrrai marøb ñimun kenamarig købig køn cha. Señor Jesús øyah tailane nai turyube ke tindøgague: “Tranamibe, utamig lataguen gømø, mayanguen tab gúig køn” cha, tru trendaigwan.—

³⁶Incha iigwan chab rrenchabe, Pablobe tømboñsra, søteeløbamisra Tiusba waminchibelø gøn. ³⁷Inchen søteeløba truba rrua isub kishib, Pablon irab, muchabelø gøn. ³⁸Incha truba isui kishib waminchibelø gøn, kaguende Pablobe nune yandø mas ashmønrrautan chib wamindikurri. Incha barcosrøngatig lincha ambubelø gøn.

Pablo Jerusalénsrømay ib

21 ¹Incha yandø nambe nømun ‘ungwa’ cha, tarømisra amba, barcoyu nebambabe, Cossrømay sølgandø amba, katø gwalømbe Rodasrømay, truyugurrimbe Pátarasrømay ambubelø guer. ²Incha Pátarabe kan barco Feniciasrømay inrrabig pasrain gøben, truyu nebamba ambubelø guer. ³Incha puraambub amba, mar tøbøtag basrabig tru Chipre birøwan nebua asha, truigwane yandø atsimaygatø gørrømarøb, Siriasrøngatig puraambub amba, Tirosrø pubelø guer, kaguende tru barcobe tru chi niga arrigwan truyu pinøøramig køben. ⁴Incha nambe

truyu trune korrømisrøbelø guer, Jesucristoi kusrenanigwan marøb melabelø truyu warain gøben. Inchen nømbe Espíritu Santogurri eshkailø gua, Pablone Jerusalénsrømay imønrrain chibelø gøn. ⁵Inchen yandø tru waram gwalømmerna nemisren, nambe werruben, mayeelø nømui sraløba, ureeba ciudayugurri wambiisrø werrumnegatig namune lincha werrubelø gøn. Incha truyu pi menda sötøba tømboñsra, nambe Tiusba waminchibelø guer. ⁶Incha nambe kangurri gangurri ‘ungwa’ chabe, barcoyu nebamben, nømbe nømui yamay katø ambubelø gøn.

⁷Incha nambe piu treeg puramrrub amrrua, Tirogurrimbe Tolemaidasrø pubelø guer. Incha tru nunelan ‘ka lincha warøgue’ chib puabe, nømbe truyu kan gwaløm korrømisrøbelø guer. ⁸Incha gatø gwalømbe, truyugurri webamba amba, Cesarea ciudasrø puabe, Felipe tru Tiuswei tabig srø wamwan eshkab uñibigwei yau pubelø guer. Truibe tru srøsrø siete wesrawa pønrrailai utuig købig køn. Incha nambe truigwei yau korrømisrøbelø guer. ⁹Inchen Felipebe pibgatø nimbasmerna nømdeelø tøgag købig køn, truiløbe Tius maig karuigwan eshkabelø. ¹⁰Nam truyu yam gwaløm warøbene, Judeagurri kan møg, Agabo taig, Tius maig karuigwan eshkabig kørarrubig køn. ¹¹Incha namuinug puabe, Pabloi pørønaigwan kusrua, nøasiitøwei katsigwanba, tasigwanba lusrabe, trenchibig køn:

—Espíritu Santobe trendan cha: “Jerusalénsrømbe judíosmerabe i pørønaig buaigwane øyeeg lusra, judíos kømø misaameran tranrrun”— cha.

¹²Inchen trunun mørabe, nambe truyueløba misra, Pablon ‘Jerusalénsrømay imøta’ chib truba inchibelø guer. ¹³Inchen Pablobe trenchibig køn:

—¿Chinchabrre kishib gøgue cha, nai manrrøwan kullaaranøb ke nan ka isui inchai inchib? Pøs nabe ka lusriitø gønrrab gømøtø, kwamig nebubene, Jerusalénsrø ka kwanrraptø basrar cha, Señor Jesúswei munchigurri.—

¹⁴Inchen nambe imønrrai maya, maya inchib meløwa kaimappe, trenchibelø guer:

—Trube, Señor maig kønrrain gøben, treeg kønrrain— cha.

¹⁵Incha yandø truyu treeg warøwa, maig palønrrabigwan srua ambamig chab tamarabe, Jerusalénsrømay nebamben, ¹⁶katø møiløgøsrøn Jesucristoi kusrenanigwan marøb melabelø

cesareasreeløgucha namba amrrubelø gøn, kan chipresriig Mnasun taigwan perar. Tru Mnasunbe manasrøwei Cristoimburabelan marøbig købig køn. Inchen nambe truigwei yausrø pua, kiamig købig køn.

Pablo Jacobon ashchab ib

¹⁷Incha nam Jerusalénsrø pubene, nuneløbe namune truba tab wamab kasrag utabelø gøn. ¹⁸Incha gatø gwalømbe Pablobe namba Jacobon ashchab amben, truyu tru Tiusweimburabelan pera marøb pønrrabeløgucha kerrigu tulundzunabelø gøn. ¹⁹Inchen Pablobe ‘ka lincha warøgue’ chabe, lutøgurrih waminchibig køn, tru judíos kømø misaamerai utu nui maramelan marøb uniiløtøga Tius chitø mariilan. ²⁰Inchen trunun mørabe, Tiuswan truba tabig waminchibelø gøn. Inchabe Pablon trenchibelø gøn:

—Trube, namui nuneg, judíosmerai utube purø norrø Jesucriston kørewa, truiløbe mayeeløba tru maig maramigwan martrai Moisés pøriilane nømbe chiwanguen pinab marmønrrab ke chinsraatø inchibelø gúigwan ñibe ashibig køn cha. ²¹Pøs nømune ñuimburab treeg wammørørskain basran cha, ñibe tru judíos kømø misaamerai utusrø maya judíosmera warabelane Moisés pørigwan kusrenaniiløyugurri tarømisrøb amrrai treeg kusrenana, nømui ureemerane asru circuncidamøtay chib, katø namui trendø marøb amønailan treeg marøb amønīmøtay chib kusrenanin gúi. ²²Trube, ñmøimbe chi martrab? cha, pøs misaabe ñi arrin gúi wammørøptøwei inchun cha. ²³Inchawei øyeeg købene, nam maig taigwan mar cha. Yu namui utu pibgatø møguelø køn cha, Tiuswei merrab maig martrab taigwane treeg martrab kørømisrar. ²⁴Truilan ñiguen pera ya, tru nøm kaig marig chigaig kønrrab chish misrøb marigwan nømbe truguegøtø treegwan ka marøb, nømui pusrugwan køsaazhig partrai tru pusrug barøbigwan ñi pagarab inchi cha. Ñi treeg marene, tru ñi treeg inchibig køn chib tru nøm wammøra gúigwane ka isatø inchib gúi mayeeløba wetøgørra, ñigucha tru maig maramigwan martrai Moisés pøriilan maig tailan marøbig kuin gúi ashchun chibelø gøn. ²⁵Inchendø tru judíos kømø misaamera Criston kørebelaimburappe tru nam isua treeg martrab cha gørrømisrig, trunundø nambe nømun pørig kuig køn cha: tru animal gweecha taska mari tiusmeran pønsrai yaumeran mamøwei, katø aniwan mamøwei, urcawa gweetsi

yauwan mamøwei, katø møguelø lata, ishumbur lata trømbøig marmøwei indamig køn— chib.

Tiuswei yaugurri Pablon merrarrowa, srúa ambub

²⁶Inchen Pablobe tru pibgatø møguelan pera ya, katø gwalømbe truiløba guegøtø tru chish misrøb marigwan nømba guegøtø treeg mara, Pablobe Tiuswei yau kebibig køn, tru kaig marig chigaig kønrrab marøb gúin gwalømmera chi gwaløm nemisren, nømui kanuin ganui Tiuswan tru keta tranamigwan chi gwaløm rranamigwan eshkanrrab.

²⁷Tru treeg marøb gúin rrune patsønrrab gwalømbe, Asia birausrø warab judíosmerabe Pablon Tiuswei yau ashabe, maya misag ke chindi asamgaig namig kurrønrrai mara, Pablon kemørabe, ²⁸trashibelø gøn:

—iNamui misag, israelitasmera purugurray! chib. Chutøgucha mayeelan namui misagweimburappa, tru maig maramigwan martrai pøra wariilaimburappa, katø Tiuswei yaweimburappa tsalø gøb ka nørøtø kusrenanøb uñibiibe, i møg køn cha. Incha kan treetø gønrrab gúindø, Tiusweyasiitø tarømarig i nui tab yau kan treeg ya gømui lata kaig trømbøig marøb, griegosmeran yu kertrab arrin gøn— cha.

²⁹Nøm øyeeg chib gøppe, kaguende mana gøsrøn Jerusalén ciudayu kan efesosriig Trófimoba lincha uni ashibelø gua, trunun Tiuswei yau Pablobe kertrab arritamab isuarre inchibelø gøn.

³⁰Inchen ciudayu misaabe ke chindi asamgaig inchib gurra, mayeeløba namig kurra, kan tulundø misra, luløb amrrua, Pablon kemøra, Tiuswei yaugurri wambiisrømay igatø! paluunchib megam srúa amben, tru urastø yaskabmeran kasrøbelø gøn. ³¹Incha yandø kwetchab inchib gøben, Romasrø maya suldau sötømeran ashib karub wabigwan, yu Jerusalén maya misag chindi asamgaig inchib namig kurrin gøn chib eshka wam puben, ³²møi møi tru maya suldaumeran nø garubiibe suldaumeran gøben, katø suldau cienbatø nøm garubelan gøben, pera luløb kørraarrubig køn. Inchen tru maya suldaumeran nø garubigwanba, suldaumeranba judíosmera ashabe, yandø Pablone mas kurraguchimeelø gøn.

³³Inchen tru maya suldaumeran nø garubig puabe, Pablon merrarrowa, pagatø cadenastøga lusringarubig køn. Incha nøbe mu gúin gúi, chi marøb unig kuin gúi payibig køn. ³⁴Inchen tru nu

misag sətøbe, møyløbe peg chib rrashiben, katøganeløbe katø peetø chib rrashiben, treegu chi tainguen mørtrab gaima, suldaumera waraig muguen chindamga yaumay srua ambingarubig køn.

³⁵Incha tru nebunab nebambiisrøngatig srua pubene, tru nu misag sətø purø rrømbøig inchen, treekkurri yandø truyugurrimbe suldaumerabe Pablone pala muta ambam nebubig køn. ³⁶Kaguende truyu tru nu misag sətøbe mayeeløba wendautø trenchib trashib amrrubelø gøn:

—iKweechi!— chib.

Pablo misagwei merrab ‘treeg mara basrømur’ chib waminchib

³⁷Incha Pablon tru suldaumera waraig muguen chindamga yau yandø ke kertrab inchen, tru maya suldaumeran nø garubigwan Pablobe trenchibig køn:

—¿Na chigøsrøn chinrrab, waminchibashchunrraguh?— cha.

Inchen tru nø garubiibe trenchibig køn:

—¿Ñibe griego wamwan waminchibig køtirru? cha. ³⁸Trube, tru mariizhiitø, misaameran kaig marøb pera gurra, tru pib mil ka kweechabetaptø amøñibelan mu misag warab waraimøsrømay pera webibig ¿ñibe tru egipcio gøppeendi?— cha.

³⁹Inchen Pablobe trenchibig køn:

—Isa gømøtø, nabe judío gur cha, Cilicia birau Tarso ciudayu kal-laweig, chigucha gømø ciudadhigu gømøtø. Tiusmanda misagwan ka waminchibashcha— chibig køn.

⁴⁰Inchen tru suldaumeran nø garubiibe ka wamindingaruben, Pablobe tru nebunab nebambinug kurra basramisra, misaameran niløtø gønrrai tasiitøga siñal maren, yandø wasrønzhiig pinøben, hebreomay trenchib waminchib pølbaserøbig køn:

22 ¹—Ñim, nai nunelø, nai møskalø, na treeg mara basrømuigwan waminchab inchar cha, iMørtray!— chib.

²Inchen nøm wamindig hebreomay wamindi mørøppe, masken wasrønzhiig kørørmisren, Pablobe trenchibig køn:

³—Nabe judío gur cha, Cilicia birau Tarso ciudayu kal-laweig. Inchendø nurappe, yu Jerusalén nurawa, katø nabe kusrebgucha Gamaliel maig kusrenanigwan kusreweig, tru maig maramigwan martrai Moisés pøriilan merrabsrø namui kølli misaamera kan maizhikken pinab marmø, marøb tøgagúigu treegwan kusrenanig kur cha. Tiusweimburabigwan kalø marmønrrab ñim møin

gwaløm mayeelø ke chinsraatø inchib pønrrab lataitøweingue.

⁴Nabe merrappe tru i srø maywan amønibelane kwamnegatig marøb, møguelan gøben, ishumburwan gøben merrarawa, kailan keeri yau keeriingarub indigwan, ⁵maya sacerdotesmeran nø garub sacerdote lata, katø mayeelø misagwan karubelø kōlli misaamera lata treegwein gúig kōn chib nøm eshkanrrab gúinrrun cha. Inchen nømbe nane kilga bōriilø tranøbelø gōn cha, tru nammisag judíosmera Damascosrø warabelan tru na chi martrab isuigwan martrai. Inchen Damascosrømay ibig kur cha, Jesucriston kōrebelø trusrø warabelan merrarawa, yu Jerusalénsrømay sruattrab, ichabetiilø gōnrrai.

Pablo nø Tiuswei mayu mandiincha basramisrigwan waminchib

⁶Indiibe na ib pasrøwa, kwaløm dōbøtag kōsrōn Damascosrø na pub lutau ibene, igatø! mōi mōi naingatan srōmbalasrōngurri purø nuig tōrig pilabig kōn cha. ⁷Inchen nabe pirausrø peñabe, kan wam trendaig mōrinabig kōn: “Saulo, Saulo ¿nane chindimbarre kaig martrabgōba inchib arrugu?” chib. ⁸Inchene nabe trencha lōtabig kur: “¿Señor ñibe mu gugu?” cha. Incha nōbe nan lōtappe: “Nabe Nazaretsrø Jesús ñi kaig martrabgōba inchib arrig, truig kur” chibig kōn. ⁹Inchen naim bulu pōnrrabeløbe tru tōrwan ashippe ashendø, tru naba waminchibigwei wamwane, chi tainguen mōrmeelø gōn cha. ¹⁰Inchen nabe trenchibig kur cha: “¿Señor chi maramøh?” cha. Inchen Señorbe nane trenchibig kōn: “Kurra, Damascosrømay inrrø cha. Truyube chi maramigwan karua pasrigwan kerriguh eshkanrrun” cha. ¹¹Inchen nane tru purø tōr bilabiibe ashmīg kōrrōmarig kōppe, tru Damascosrømbe naba lincha amrrubelø tasku kemøra, srua ambindiig kebibig kur cha.

¹²Inchen tuyube kan mōg Ananías taig, tru maig maramigwan martrai Moisés pōrig maig chibig kōben, Tiuswan purø isua marøb megabig, judíosmera Damascosrø warabelaimbe nōbe chiyuguen chi tamga tab uñib mōg, ¹³truike nan ashchab arrua, puabe, trenchibig kōn: “Cristogurri nai nuneg Saulo, katøyug ashibig misr” cha. Inchen nabe gatøle ashibig misra, nun asinabig kōn cha. ¹⁴Inchen Ananíasbe nane trenchibig kōn: “Namui merrabsrø mōskalai Tiusbe, nø maig marøg kuig waigwan ñi nebua ashchai ñune manasrøwei kanmaytø wesrawa basrig kōbig kōn cha, tru Kerrigu Sōlgandiigwan nebua ashib, katø nui triitōga wamindigwan mōrøb

inchai. ¹⁵Kaguende ñibe Tiusweyasig maya misagwei merrab maig kuigwan waminchib pasrønnrabig køn cha, ñi asigwan ñi mørigwan. ¹⁶Treeg købene, ¿chi munig tsunrragu? cha. Kurrø, chibig køn. Incha piu umbu ulsrø cha. Katø ñibe Señorwei munchin wamab ñui kaig mariilan chish misr” chibig køn nane.

Pablon judíos komeelaisrømay ørig

¹⁷Inchen Jerusalénsrømay katø yabe, Tiuswei yau Tiuswan waminchib wawa, kan piab lataig asamig tøgagúinabig køn cha. ¹⁸Incha truyu na Señorwan ashen, nøbe nan trenchibig køn cha: “Mallatø incha, mõi mõi Jerusaléngurri webinrrø cha. Kaguende yube ñi naimburab maig kuigwan waminchen mørtraamøn” cha. ¹⁹Inchen nabe trenchibig kur cha: “Señor, nømbe ashibelø gøn cha, nabe judíosmera tulundzuni yamørig ya, ñun kørebelane merrarrowa kailan keeri yau srua yamba ichabetamba indiilan. ²⁰Katø ñuimbura maig kuigwan waminchibig Estebanwan kweechib ani lushen, tru uraskucha nabe ‘ka kweetsay’ chib truyu pasrøwa, kweechibelø nømui kewagúilan wesra waren, nabe truilanguen ashib pasrabig kui nømbe ashibelø gøn” cha. ²¹Inchene nane Señorbe trenchibig køn: “iInrrø! cha. Kaguende nabe ñune yabsrø judíos kømø misaameraisrømay inrrai øramønrrun”— cha.

Pablo tru maya suldau sötømeran nø garubigwei merrab

²²Inchen judíosmerabe tru iig srabe trendaigwan ke chab rrendamnegatiitø mørabe, trenchib trashib mendabelø gøn: —iØyeeg mowane yu pirau uñmønrrai kweetsay! chib. iKaguende øyeegwane chinchibguen uñbasamgaig køn!— chib. ²³Incha trashibig rrasha, nømui pala kewagúilan wesrawa petamba, usrøwan pala petamba inchibelø gøn. ²⁴Inchen maya suldaumeran ashib nø garub wabiibe, tru suldaumera waraig muguen chindamga yau Pablon keeringarua, ichaguchib maig kuigwan payingarubig køn, misaamerabe chindimbagurrrinre nun tsalø gøb øyeeg trashib gúigwan ashchab. ²⁵Inchen lusra srua gua ke yandø ichagutchabguen inchen, Pablobe tru suldau sötø cienwan nø garub pera basrabigwane trenchiptinchibig køn: —¿Roma birau gal-laweigwan chi kalø marig køtashchab paya ashibguen paya asiimíigwan ñim treeg ichaguchib pønrramibe merig kømuitarru?— cha.

²⁶Inchen truigwan mørabe, tru suldau cienwan nò garub pera basrabiibe tru maya suldaumeran nò garubigwan trenchib eshkabig kòn:

—¿Ñi chi marøb pasraigwan ñigan maig kui asha basrøtirru? cha. iKan! i møøbe Roma birauig kuin gòn— cha.

²⁷Inchene tru maya suldaumeran nò garubiibe arrua, Pablon payibig kòn:

—Ñibe Roma birauig kuin chindi, eshkarra— cha.

Inchene Pablobे trenchibig kòn:

—Øø, treegwein gur— cha.

²⁸Inchen tru maya suldaumeran nò garubiibe trenchibig kòn:

—Nama kan Roma birau kal-lawei køb lataitøwei misrtrappe, tsabøtø nu an betabe treeg misrar— cha.

Inchene Pablobे trenchibig kòn:

—Nabe treeg mara gømøtø, kal-lainukkurri trendø truig kur— cha.

²⁹Inchen Pablon payrrab inchib srua gøbeløbe møi møi nuinukkurri chab tarømisrøptinchen, tru maya suldaumeran nò garubiitøweinguen Roma birauig kuin gúi ashippe, truba kwaarøbig kòn, keerøba cadenastøga merrarrawa, srua guíkkurri.

Pablo treeg mara basrømur chib waminchib

³⁰Incha gatø gwalømbe tru maya suldaumeran nò garub pasrabiibe tru judfosmera chigurrinrre øyeeg marøbig kòn chib guígwan ke tab ashchab isua, Pablon elacha, sacerdotesmeran karubelanba, katø tru Setenteelø maig maramigwan asha marøbelan mayamba tulundzunønrrai karua, yandø Pablon wesrua, truilai merrab pasrøbig kòn.

23 ¹Inchen Pablobे tru Setenteelø maig maramigwan asha marøbelan ke tab ashabe, trenchibig kòn:

—Nai nunelø, nabe møin gwalømgatig Tiuswei merrab nai isub kebachib pasrabigu chi kalø gòn chibig chigaig, chishig uñibig kur— cha.

²Inchene tru maya sacerdotesmeran nò garub sacerdote Ananíasbe Pabloim bulu purrabelane triibøtø Pablon pashagutsingarubig kòn. ³Inchene Pablobे trenchibig kòn:

—iÑi ya pirøbanrrig pullin itsig lataigwan! iTiusbe ñunguen pashagutchun! cha. ¿Ñibe uyu wappe, tru maig maramigwan

martrai Moisés pørig maig chibig køben, nan treeg asha martrab wamøtirru? cha. ¿Ñibe tru pørigwane utsøguchib ka itøbunab ñigan nan pashagutsingarub watirru?— cha.

⁴Inchen truyu purrabeløbe trenchibelø gøn:

—¿Maya sacerdotesmeran nø garub sacerdote Tiusweiwan marøb pasrabigwan, ñigan øyeeg tsalø wamøtirru?— cha.

⁵Inchene Pablobe trenchibig køn:

—Nai nunelø, maya sacerdotesmeran nø garub sacerdote gøben, nabe ashmø inchibrain gøn cha. Kaguende Tiuswei wamwan pørigube trenchibig køn cha: “Ñui misaameran ashib karub wabigwane kaig nebubash chib trømbøig wamamig kømøn”— cha.

⁶Incha Pablobe tru Setenteelø maig maramigwan asha marøbelø, tøbøbe fariseosmera gøben, tøbøbe saduceosmera gúi ashabe, tru Setenteelan truba mur trashib trenchibig køn:

—Nai nunelø, nabe fariseo gøb, fariseowei nusrkain gøb gur cha. Katø kwabelø gatøle øsiiramigwan muniirabig kuikkurri, øyeeg indinab payib sruagúinab pasrar— cha.

⁷Inchen nø trenchibene, fariseosmeraba, saduceosmeraba nømdø aleguiyab mendappe, ke nøørøtø misra, tru Setenteelø maig maramigwan asha marøbelø tulaamba basrabiibe chab tarømisrøbelø gøn. ⁸Kaguende saduceosmerabe tru kwabeløbe katølebe øsiiramøwei, ángelesmera gawei, møsiimera gawein gøn chibelø gøben, trune fariseosmerabe treelane kerriguh treeg købig kuitamab isubelø gøbig køn. ⁹Inchen mayeeløba trashib mendøben, møiløgøsrøn tru Moisés pørigwan kusrenanøbelø fariseosmeraingateelø kurra bønrramisrabe, trømbøig aleguiyab trenchibelø gøn:

—I mowane kaig mariibe chigucha wetørramer cha. Inchippa kan møsig kui, kabe kan ángel gúi wamindin gøbgun cha, Tiuswane esheerrab inchimugun— chibelø gøn.

¹⁰Inchen ambumay imay ke nømdø aleguiyab gurra nøørøtø misren, maya suldaumeran nø garub pasrabiibe Pablone ke pitis marøbgunmab isua køriimata, suldaumeran kørreaamingarubig køn, nømui utugurri mallatø merrarrawa wesrawa, suldaumera waraig mu chindamga yaumay gatø pera amrrai.

¹¹Inchen gatø yembe Pablon Señorbe kenamisra trenchibig køn:

—Pablo, kullaaramø, kørmø mur basrau cha. Kaguende yu Jerusalénma naimburabigwan maig kuigwan wamindiibe

Romasrøngucha naimburabigwan katø treetøwei ñune wamindamig nebunrrun— cha.

Pablon kwetchab inchib

¹²Katø løtsø judíosmerabe kaig martrab nōmdø nilø wamincha: “Nam treeg martrab taigwan marmubene, namundøwei trømbøig nebubash chib pønrramisra, igatø! Pablon kweechimuppe, mamøwei, muchimøwei inchab” chibelø gøn. ¹³Inchen tru: “Treegwan marmø gømø, igatø! martrab” cha, pønrramisrøbeløbe cuarenta menrra lata gøbig køn. ¹⁴Incha truiløbe sacerdotesperan karubelainuumayba, katø misagwan karubelø kølli misaamerainuumayba ambabe, trenchibelø gøn:

—Nam martrab taigwan nam marmubene, namundøwei trømbøig nebubash chib pønrramisrer cha. iGatø! Pablon kweechimuppe, nambe chigucha mamønrrab ter cha.

¹⁵Inchawei mōimbe ñimbe tru Setenteelø maig maramigwan asha marøbeløbamisra, tru maya suldaumeran nō garubigwan maig chitashchab waminchab ambamdiig køn cha, ñimui merrab Pablon srøna wesrai chinrrab, nun tru øyeeg puigwan maikkurrin gúitashchab ke tab paya ashchab chibelø misrøb. Trune nambe nō trusrø pumøwatø, ke kwetchab tamara munig kōmønrrun— cha.

¹⁶Inchen Pabloi nuchawei nusrkaimbe tru chi isumø amrrub gøben, larab warøwa, tru kaig martrab inchib gúigwan wamindi, tru suldaumera waraig mugucha chindamga yausrø nøbe kebya, Pablon eshkaben, ¹⁷Pablobe tru suldau sötø cienwan nōm garub pønrrabelan kan mōigwan gøsrøn wamabe, trenchibig køn:

—I matsinan maya suldaumeran nō garubigweimay pera inrrø cha. Kaguende chigøsrøn eshkamig tøgagøn— cha.

¹⁸Inchen trube maya suldaumeran nō garubigweimay, pera yabe, trenchibig køn:

—Pablo kailan keeri yau keerig wabiibe nan wama tiusmanda i matsinan ñuimay pera irra chitan cha, ñun kan chigøsrøn eshkamig tøgagøn— cha.

¹⁹Inchen tru maya suldaumeran nō garubiibe tru matsinan tasku kemøra srua ya, nøørø pera yabe nundø mara payibig køn:

—¿Nan chi eshkamig tøgagugu?— cha

²⁰Inchen matsinøbe trenchibig køn:

—Judíosmerabe Pablon srøna tru Setenteelø maig maramigwan asha marøbelai merrab ke tiusmanda ñun wesrabsrumugu chinrrab, ke kandø isua bønrramisrin gøn cha, nuimbura maig kurrin gúitashchab ke tab paya ashchab chibelø misrøb. ²¹Trendaingucha køremønrrig cha. Kaguende nømui utu møguelø cuarenta menrra lata, kaig martrab larønrrab nilø tamarøb gøn cha. “Nam treeg martrab taigwan marmuinabene, namundøwei kaig nebubash chib pønrramisra, igatø! Pablon kweecha guchimuppe, mamøwei, muchimøwei inchab” chib gøn cha. Incha nømbe ke yandø chab tamara, mømibe ke ñi mancha løtamigwandø munig køn— cha.

²²Inchen tru maya suldaumeran nø garubiibe tru matsinane trenchib ‘ungwa’ cha, ørøbig køn:

—Ñi nan eshkaigwane nan eshkar cha, mungucha eshkanrrab gømø— cha.

Pablon Félix kubenadurweimay pera ambub

²³Inchen maya suldaumeran nø garubiibe tru suldau sötø cienwan nøm garub pera bønrrabelan pailan wama, trenchibig køn:

—Yem las nueve webambamig katsikka amrrabelø suldau doscientosba, kaulli balar setentaba, lanza sruar doscientosba Cesareamay amrrai tamaray— cha. ²⁴Incha gatø maya suldaumeran nø garubiibe kaulli itøguanamelø Pabloyasig tamingarua, kubenadur Félixweimay chi indiimíg, tabig pera amrrai inchibig køn. ²⁵Incha øyeeg chibig kilgagucha pøra trana ørøbig køn:

²⁶Na Claudio Lisias, ñi nai purø tab kubenadur Félixwan ‘ka uñgu’ chinrrab inchar.

²⁷Judíosmerabe i mowan kemøra srua gua, kwetchab inchen, trune nabe nune kan Roma birauig kuin gúi wammørabe, nai suldau sötøba ya, truyugurri wesrar.

²⁸Incha nabe chi charre payib srua gúitashchab ashchab isua, Pablone judíosmerai tru Setenteelø maig maramigwan asha marøbelai merrab pera gørrayar. ²⁹Incha nabe tru nømui maig maramigwan martrai Moisés pørigwan ka kalø maran chatørre inchib gúin gúi wetøbeñendø, nune kwanrrai maramdiibe nøbe treekkatig chi trømbøig mara basrømøwei, katø kailan keeri yau keera tøgagømdiig kømøwein gúin gøn.

³⁰Inchen tru mōwan sōratō kaig martrab inchib gōn daig nane wammōrōsrōben, nabe tru urastō ñuisrōmay ōrar cha, katō tru nun ōyeeg mara basrōmōtirru chib payib srua gōbelan chigucha chigōben tamig tōgaguabe, trube, ñui merrab tōrgandō eshkanrrigay cha, nōmune trenchar cha nabe.

³¹Inchen suldaumerabe nōmun maig karuig kōben treeg mara, Pablon wesrawa, yem Antípatrissrōngatig pera ambubelō gōn. ³²Incha gatō gwalōmbe Pablone kaulli bala ambubelōtō lincha amrrai, suldaumera katsikkateelōbe tru nōm waraig mu chindamga yaumay gatōle legucha amrrubelō gōn. ³³Incha Cesareasrō pua, kubenadurwan tru kilga bōra ōrigwan tranabe, Pablongucha nui merrab pera kemallibelō gōn. ³⁴Inchen kubenadurbe tru kilga ōrigwan ashabe, Pablone:

—¿Chu birausriig kugu?— cha payibig kōn. Incha ciliciasriig kuin gúi ashabe, trenchibig kōn:

³⁵—Trube, ñun ōyeeg puigwane tru ñun ōyeekkurrin gúiig kōn chibelō amrruben, trunun ashchab— cha.

Inchabe Herodeswei purō tab yau Pablone keera wanna, tab ashib tōgagōnrrai karubig kōn.

Pablo Félixwei merrab ‘ōyeeg mara basrōmōtirru’ tainab

24 ¹Trattrō gwalōm wendau maya sacerdotemeran nō garub sacerdote Ananíasba, mōilōgōsrōn misagwan karubelō kōlli misaameraba, trugurri kan purō maig waminchibig Tértulo taiba Cesareasrō kōrraambubelō gōn. Incha truilōbe tru misaameran ashib karub wabigwei merrab Pablon tsalō gōb ‘ōyeeg, ōyeeg mara basran’ chinrrab amrrua kemallibelō gōn. ²Inchen yandō Pablon wamōben, Tértulobe Pablone ‘ōyeeg, ōyeeg marōbig kōn’ chib menda, Félixwane trenchibig kōn:

—Namui purō tab kubenadur Félix, kan nambe ñigurri ambumay imay tab warer cha, ñun mayanguen ungwa, ungwa chinrrab inchar cha. Incha ñibe purō tab asha marōbig kuikkurri, nam i birau mayeelō warabelayasiibe, srōitō, srōitō yunōmarōb tammisrōb arrun cha. ³Kan ñi namui Félix purō tabig, chusrōndōgucha katō chu uratōgucha, ñune kashmō mayanguen ungwa, ungwa chibelō guer cha. ⁴Inchendō ñun menrra rrōmbō inchib menrra waminchimōnrrab, kan petōzhiitō tiusmanda kalu bebōbsrumugu chinrrab inder cha, ñibe chiwandōgucha yan

dammay mara rranøb wabig købene. ⁵Kaguende i mōwane nambe kan larrø gaig kwanrrø lataig wetørrer cha. Yu pirau chutøgucha judíosmerai utu misaamerane ke nørøtø marøb namishib pera gurramba, katø tru Nazarenos taig sötømeran ke nø bera marøb chib pasrabig komba indan cha. ⁶Katø Tiuswei yawan chigucha, Tiuswei yaambu gømui lataig kaig trømbøig martrab indamba inchen, nambe nun kemørig køn cha. Incha nambe tru maig maramigwan martrai Moisés pørig maig chibig køben, treeg martrab inchen, ⁷tru maya suldaumeran nø garubig Lisiasbe nui suldaumeraba arrua, tsakkandø namui taskugurri Pablone kerraig køn cha, ⁸tru øyeeg mara basømøtirru chib srua gøbelane ñuisrømay ambay chib amrrai ørøppa.

’Trube, ‘øyeeg, øyeeg mara basømøtirru’ chib gúigwan, ñiashib iigwan kerrigu tab ashabe, maig kuigwan tab ashchabguen—chibig køn.

⁹Inchen judíosmera truyu pønrrabeløgucha:

—Iibe kerriguba isa gømø, treegwein gøn— chib truba inchibelø gøn.

¹⁰Inchen tru kubenadurbe Pablon waminchai señas maren, Pablobe trenchibig køn:

—Ñi ya yam bila i birau maig maramigwan asha marøb wabig kui ashabe, kalø mara basømuiigwan nabe chi kørømø eshkanrrab inchar cha.

¹¹’Ñitøweinguen asiinrrun cha, na Jerusalénsrø Tiuswan køriibala tabig waminchab arriibe kwalømmera docetøwei purayan cha. ¹²Pøs Nane Tiuswei yau muba gøben aleguiyab pasrai ashmøwei, namishib misag sötø peragurri ashmøwei, katø judíosmera tulundzuni yamerayu treeg marøb pasrai ashmøwei, kabe chugøben ciudasrø treeg marøb pasrai ashmøwei indig køn cha. ¹³Inchawei i misaamerabe mõi nan øyeeg mara basømøtirru chibeløbe øyeeg marøbig køn chib gúigwane treeg køn chinrrappe gaimanrrun cha. ¹⁴Inchendø nabe maig kuigwan kelarrab, trendamønrrun cha: Nabe merrabsrø namui kølli misaamerai Tiuswan køriibala tabig waminchibig kur cha, tru nøm Tiusweiwan peemaytø marøbelø cha wamig, tru srø may maig køben treekke. Tru maig maramigwan martrai Moisés pøriilan lata, katø Tius maig karuigwan eshkabelø pøriilan lata isa gømø, kerrigu treegwein gúitamab kører cha. ¹⁵Nabe Tius mandø taigwane

treeg kõnrraitamab isua munig megabig kur cha, tru nòm muniirab gúigwandøwei, tru kwabelø sòlgandø tabelø lata, katø tru sòlgandø tabelø gømeelø lata katøle øsiirawa kurramigwan. ¹⁶Inchawei treekkurri nabe Tiuswei merrab lata, møguelai merrab lata chigøben kalø mara treegwan nai isub kebachib pasrabigu chi kalø gøn chibig chigaig kõnrrab inchib megabig kur cha, chu urastøgucha.

¹⁷Nabe truba yam bila peesrø llirab uñabe, ketamig tulisaigwan naim birau misaameran kettrappa, katø Tiuswan keta trannrappa arrubig kur cha. ¹⁸Incha nabe tru maig maramigwan martrai pørig maig chibig køben, Tiuswei yau tru chish misrtrab marigwan chab mara basrøben, møiløgøsrøn judíosmera Asia birausreelø pubelø gøn, na misagwan namishib pera gurra gømøwei, kabe chindinguen asiimfíg maringarub pera gurra gømøwein basrøben. ¹⁹Inchawei mømbe, truilø nømwei amrrumig køn cha, yu ñui merrab nan øyeeg mara basrømøtirru chib nan tsalø gøb chigøben tamig tøgaguabe. ²⁰Kabe katø tru Setenteelø maig maramigwan asha marøbelai merrab na kemalla pasrab uras nan chi kalø marig wetørraig købene, trube, truburappe nømdøwei yu tømarmash cha. ²¹Nabe tru nømui utu pasrøwa tru urasbeguende mur trashib øyeeg chibwei indig køn: “Kwabelø gatøle øsiiramigwan na muniirabig kuikkurri, mõi ñim øyeeg indinab paya asinab pasrar”— cha.

²²Inchen Félixbe tru srø maywan tab wammøraig kuabe:

—Maya suldaumeran nø garubig Lisias arruben, iigwan na maig køtashchab gatøwan ashchab— chippa, patsøgøbig køn.

²³Incha Félixbe suldau sötø cienelan nø garub pera basrabigwane Pablone elachimø, ashib tøgagønrrai karubig køn. Inchendø nui chi maramdeelane mu merønrrain gømø marøb, katø nui asiilø møiløgøben nun purugunrrab inchene merømøwei inchain garubig køn.

Cesareasrø Pablon kailan keeri yau keerøb

²⁴Mam gwaløm wendau gøsrøn Félixbe nui srai judía Drusilaba gatø pua, Pablon pertrab ørabe, isubigwan Jesucristoinug pasra tøgagømigwan waminchen mørøbig køn. ²⁵Inchen Pablobe tru sòlgandø tabigwanba, chiyugucha srua irramamø amønamiigwanba, katø maig kõnrrabigwan treeg asha maramig punrrabigwanba waminchen, Félixbe truba kwaara, trenchibig køn:

—Møimbatøbe ka inrrø cha. Inchendø gatøwan nan utø gøben, wamørrumøn— cha.

²⁶Inchagucha Pablo nun elatchai kabe kan maya an tranrrua chinraitamabrre muniirabig køn Félixbe. Incha treeg isua, Félixbe nuimay Pablone katø gatø wamabig køn waminchab.

²⁷Inchen yandø pa bila buraiben, Félixbe webiben, Porcio Festo truigwan purø wamisrtrab kubenadur kebibig køn. Incha Félixbe judíosmeraba ka tab gørrømisrøg køptø Pablone kailan keeri yau ka wabashippa, webibig køn.

Pablo tru srø gubenadur Festoi merrab

25 ¹Inchen tru birau karub wanrrab uta kebyaig pøn gwaløm wendau, Festobe Cesareagurri Jerusalénmay nebiben, ²maya sacerdotesmeran karubeløba, katø judíosmeran ashib karubeløba Pabloimburab tru treeg puigwan gatøle kønøgønrrab Festoimay ambubelø gøn, ³Pablon tsalø gøb, Jerusalénmay pegutcha chib. Kaguende nømbe Pablone mayu lara kwetchab isua tamarøb gøbelø gøn. ⁴Inchen Festobe lètappe trenchibig køn:

—Pablone Cesareasrø ashib tøgagúig wan cha. Naashib trusrømay menrra yana gømwatø inrrab isur cha. ⁵Inchawei ñimui utu maig maramigwan ñim asha marøb pønrrabeløbe Cesareasrømay naba kørørruy chibig køn. I møweinug chigøben kalø marig pønrrøbene, trube øyeeg mara basran chib truyu waminchab.—

⁶Incha Festobe Jerusalénsrø trune gøh, kabe trune y pa gwaløm gø chigøsrøn nømbe kørømisra, Cesareasrømay katø ya, katø gwalømbe tru maig maramigwan asha marøbelø purrainug wamisra, Pablon pera amrrunrrai karubig køn. ⁷Inchen Pablo trusrø pua kebarrubene, tru judíosmera Jerusalénsrøngurri amrrubeløbe tulsrua, nune chigøben truba rrua trømbøig marøbig køn chibendø, chigucha ke treeg mariiløbe, wetørranrrab gaimabelø gøn. ⁸Inchen Pablobe nøbe ‘treeg mara basrømur’ chib, trenchib waminchibig køn:

—Nabe i tru maig maramigwan martrai Moisés pørig judíosmeraimburabigwan lata, Jerusalén Tiuswei yaweimburab lata, katø Romasrø maya misagweim bala ashib wabig Césarweimburab lata chi kalø mara basrømur— cha.

⁹Inchendø Festobe judíosmeraba ka tab gørrømisrøg køptø, Pablone trencha payibig køn:

—¿Jerusalénmay attragu? cha, tru øyeeg wamindiilan ñuimburabigwan maig kønrrabigwan trusrø ashchab— cha.

¹⁰Inchene Pablobe trenchibig køn:

—Roma maya misagweim bala ashib wabig César maig maramigwan asha marøb wainug nabe truyuweim basrar cha, tru maig kønrrabigwan nan asha maramnug. Pøs judíosmeran chigucha chi kalø mariibe chigagøn cha, ñiguen tab asiinrrun cha. ¹¹Kabe na chigøben kalø mara basrain gúi, ñim nan kwanrrai maramdiig na treekkatig kaig mara basrøbene, nabe kwanrraptøweim basrar cha. Inchendø nøm øyeeg mara basrømøtirru chib gúig ka isiitø webibene, mugucha nane truilane tranrrappe kaimanrrun cha. Nabe Romasrø tru maya misagweim bala ashib karub wabig César maig maramigwan nø asha martrai miamønrrun— chibig køn.

¹²Inchen Festobe tru maig maramigwan nun isum burugub purrabeløba chab waminchabe, trenchibig køn:

—Ñi maya misagwan ashib karub wabig César nø asha martrai miaig kuig købene, trube, Césarweimay inrrig— cha.

Pablo rey Agripai merrab

¹³Inchen yandø mam gwaløm gøsrøn puraiben, rey Agripaba, Bereniceba Feston ‘ka uñgu’ chib tabig wamab punrrab, Cesareasrømay ambubelø gøn. ¹⁴Inchen trusrø nøm truba yam gwaløm waraig kōppe, Festobe tru Pablon øyeeg nebuigwan reywan trenchib eshkabig køn:

—Yube kan møg wan cha, kailan keeri yau Félix kørrømara wannig. ¹⁵Na Jerusalénsrømay ya wabene, truigweimburappe sacerdotesmeran karubeløba, judíosmeran karubelø kølli misaameraba, ke chinetø gøn chib nan eshkab amrrubelø gøn cha, Pablon truyu mōra pasrønrrai kørrømara pasramdiig køn chib. ¹⁶Inchen nabe nømune trencha lōtig købig køn cha: “Tru ‘øyeeg kaig mara basran’ dainabig; tru ‘ñi øyeeg maraweim basrømøtirru’ chibelø nui malaugue trenchib amrruben, ‘øyeeg kømuig køn’ chib; ‘øyeeg mara basrømur’ chib nøashib waminchimøwatøbe, romanosmerabe mu mōwangucha mana treebe marmeelø gøn” cha. ¹⁷Incha truilø nøm yusrømay naba amrruben, chi srarrømøtø, katø gwalømdø, nabe tru maig maramigwan asha marøb wainug wamisra, tru mōwan pera amrrunrrai karuig køn cha. ¹⁸Inchendø

tru ‘øyeeg mara basrømøtirru’ chibeløbe amrrubendø, chigøben trømbøig kalø mariilø tre latailøbe marig wesrumeelø gøn cha, pøs nabe nø treeg trømbøig mara basraindøweinrre inditamab isubene. ¹⁹Treeg kømøtø, tru nuimburab waminchib gúibe, tru Tiusweimburabigwan nø marøb unigwan truikkurri chabah, katø kan møg, Jesús taig, kwaig købigwan, Pablobe trunun kwaig kømøtø, ka øsig wan cha, trenchibrre inchen, trugurrimbatørre inchib gúin gøn chibig køn. ²⁰Inchen nabe øyeeg maramigwane mandø maram gúi mormøwa, Jerusalénsrømay inrra guh chibig kur, tru maig kønrrabigwan trusrø asha marig kønrrig cha. ²¹Inchendø Pablobe tru maig kønrrabigwan Augusto César asha marig kønrrab cha, ka ashib tøgagúig wanrrab cha nø miaig købene, treekkurri Césarweisrømay na øramnegatig nune tab ashib tøgagønrrai karuig købig køn— cha.

²²Inchene Agripabe Feston trenchibig køn:

—Nangucha tru møwan mörinrrabna gøtan— cha.

Inchene Festobe trenchibig køn:

—Srøna wamindi mörtrabguen— cha.

²³Indiibe katø gwaløm Agripaba, Bereniceba puppe, purø tabig tamarar ke kan chull asamdiig amrruabe, tru chigøben waminchappa, katø wamindiilan mörtrappa tru tulundzuniisrø kebambambubelø gøn, tru suldaumeran karubelø nørreelø gøben, katø nørreelø ashib karubelø ciudayuelø gøbengue. Inchen Festobe Pablon pera amrrungaruben, pera bubelø gøn. ²⁴Inchabe Festobe trenchibig køn:

—Rey Agripaba gøben, ñim maya møguelø yu namba purrabelø gøben, i møwan asay cha. I moweimburappe maya judíosmera sötøeløba Jerusalénsrø lata, yu Cesarea lata ‘yeegwane øsig uñbasamgaig køn’ chib, trashib amrrubelø gøn cha. ²⁵Inchendø nabe nun kwanrrai maramdiig chigucha chi kaig marmuin gúi wetørrab, katø tru maig kønrrabigwan asha marig kømigwan Augusto nø asha martrai nõtøwei miaig kuig købene, trusrømay nabe ørtrab isuig køn cha. ²⁶Inchendø tru Pabloimburabigwan treeg rreeg køn chib nai ashib karub wabig Augusto purø nuigwan na pøra øramig kan chiguen wetørramur cha. Incha treekkurri ñimuinumay pera arrur cha, ñi nai tab rey Agripa. Maig kønrrabigwan tab asha kørømarene, na maitøguen Auguston eshka pøramig kønrrautan chibig køn. ²⁷Pøs kan kailan keeri yau

keerig wabigwan chiburøgurri ‘øyeeg kuig køn’ chib gúigwan chi cha eshkamubendø, na øramibe ke kan ka wainguenig marig lataig bunrrautan— chibig køn Festobe.

Pablo nuimburabigwan rey Agripai merrab eshkab

26 ¹Inchene Agripabe Pablon trenchibig køn:
—Ñuimburabigwan maig kuigwan ñitøwei
waminchi— cha.

Inchen Pablobe yandø waminchab tasigwan kusrawabe, tru nuimburab ‘chi kalø mara basrømur’ tamigwan waminchab pølbasrøbig køn: ²—Møi na naimburab ‘treeg mara basrømur’ chib waminchib pasramig mayaguen tab gúim basrar cha, nai rey Agripai merrab, nan judíosmera chigurrimbunø ‘øyeeg mara basrømøtirru’ chib gúigwan. ³Inchagucha ñibe judíosmera chitø, chitø marøbelø gúigwan kerrigu ashib, katø nam judíosmera mandø melambuyab amrruigwan chigucha ñibe tab nebua ashibig kuig købene, trube, tiusmanda tammay mørtra chinrrab inchar cha.

⁴Maya judíosmera na matsinø-unøgurri nabe nai misaamerai utu Jerusalénsrø maig tsubig kuigwan ashibelø gøn cha. ⁵Truiløbe manasrøngurri ashibelø gøn cha, nømun eshkamdiig købene, øyeeg købig køn chib maig kuigwan ñun eshkamdiig kuinrrun cha, Tiusweiwan kan chizhigwanguen pinab gømø marøb misag sötømerayuig nabe fariseo gøbig kur cha. ⁶Incha mømibe tru merrabsrø namui kølli misaameran Tius tru trannrrab misra kørørmisrigwan muniirabig kuikkurri, mømibe øyeeg paya ashib srua gúinab pasrar chibig køn. ⁷Tru Israelweinukkurri namui doce srøig, srøig karrab misaamera Tius tru trannrrab kørørmisrigwan nømbe nebunrrab isua, yem gwaløm Tiuswan køriibala tabig waminchib gúigwan, nagucha truigwan muniirabig kuinukkurri, judíosmerabe yu ñi øyeeg kaig marøbig kømøtirru tainab pasrar chibig køn, nai rey Agripa. ⁸¿Tiusbe kwabelan kwaitai utugurri kusrumibe kaimanrretamab isubelø gø chindah ñimui utube?

⁹Pøs isa gømø, naguen Nazaretsrø Jesúswei munchiwane tsalø gøb chinetø martrab isua, ¹⁰Jerusalénsrøma treeg marøbig kur cha. Sacerdotesmeran karubelø nan treegwan martrai karuigwan uta, Tiuswei misaameran kailan keeri yau pønsrøb, katø kweecha betøbene, nabe truilaingatøtø inchib pasrabig

købig kur cha. ¹¹Incha gatø, gatø judíosmera tulundzuni yamørig truilane ichabetab ibig kur cha, Tiuswan purø rrømbøig nømun wamingarummørø inchib. Incha igatø! kan nømun namig købiitø ke chinchimmørø inchib, nabe peg birau ciudamerasrønguen kaig martrab wendautø ibig købig kur cha.

Pablo mandøgurri Tiuswei mayu pasramisrigwan waminchib

¹²Nabe øyeeg martrab isua, Damasco ciudasrømay ørig ibig kur cha, tru sacerdotesmeran karubelø maramburab martrai traniitøga treeg martrab inrrai karua basrig. ¹³iNai tab rey! mayu kwaløm døbøtaabe srømbalsrøngurri kan tørbilabig pørr lataguen gømø, purø tørig naingatanba, tru naba ambubelaingatanba piløben, ¹⁴nambe pirausrø sötøba kørrinabig køn cha. Inchen kan wam hebreomay trenchib wamindi mørøptindinabig køn cha: “Saulo, Saulo cha, ¿Chindimbarre nane kaig martrabgøba inchigucha? cha. Ñibe kan wey kølabus tsøb pønsrailøyu søl yatab lataitøwei incha, ñibe ka ñiasiitø gørrindan” cha. ¹⁵Inchene nabe: “¿Señor mu gugu?” chiben, nane Señorbe trenchibig køn cha: “Nabe Jesús, ñi mõi kaig martrabgøba indig, nabe truig kur cha. ¹⁶Inchendø kurra, pasramisr chibig køn. Kaguende nabe ñun kenamisrøppe, naiwan marøb megabig kønrrai wesrawa basrtrappa, katø mõi naimburab ñui kaptøga ñi asigwan waminchibig kønrraimba, katø wendøsrø naimburab maig kuigwan kenamaramigwan eshkabig kønrraimba treeg martrab kenamisrar cha. ¹⁷Inchawei nabe ñui misaamerai taskugurri kaig marmønrrai wesrab, katø judíos kømø misaamerai taskugurri kaig marmønrrai wesrab indamønrrun chibig køn. Pøs nabe mõi trú misaamerayasigwei ørar cha, ¹⁸nebua ashchai ñi nømui kabmeran kuren, løstøyu amøñibelø gøbig kuig, toryumay werrub, katø Satanás maramburab mariilø gua, Tiusweimay purørrunrrai. Tru nømui kaig mariilan ulø bayiimíig pesannaig kømigwan uta, tru nømui isubigwan nainug pasrikkurri tru Tiusweyasig tarømariiløba tøgatø, tru keta tranamig tøgagúigwan utamig kønrrain” chibig køn.

Piab lataigu Tius kenamisra maig taigwan Pablo møra marøb

¹⁹Inchawei, nai rey Agripa, tru srømbalsrøngurri piab lataigu kenamisren asigwan nabe mørmønrrab inchimøtø, ²⁰Damascosrø warabelaisrømaymerrig ibig kur cha. Incha

trugurrimbe Jerusalénsrømay, trugurrimbe Judea birau kerrigu truørø ya, katø trugurrimbe judíos kømø misaameraisrømay ya, nømui kaig mariilan isua møra, Tiusweimay llirawa, yandø tru kaig marmønrrab isua mörin gúi asamdiig kønrrai tabig marøb inday chib eshkaab waminchibig kur cha nabe. ²¹Incha na øyeegwan marikkurri judíosmerabe Jerusalénsrø Tiuswei yau nane merrarrawa, kwetchab indig køn cha. ²²Inchendø møin gwalømgatig Tius nan purugúitøga nabe yu pasrar cha, kusrebelan lata, kusremeelan lata maig kuigwan na waminchib. Nabe waminchippe, ka nøørøtø peetø waminchimøtø, Tius maig karuigwan eshkabelø maig purainrrun daigwanbah, katø Moisés maig purainrrun cha eshkaigwan, truigwanbatø waminchar chibig køn: ²³Tru Cristobe truba rruba kaig nebuinab megawa, trugurrimbe kwawa, nømerriig katø øsiirawa, namui judíosmeran lata, judíos kømø misaameran lata kaigyugurri webambamig tørwan eshkaab kusrennrrun chib trendailan.—

²⁴Pablobe ‘kaig mara basrømur’ chib, waminchib pasramnetø, Festobe øyah chib trashibig køn:

—iPablo ñibe chugúi mørmíig misriasøna! chib. iMenrra gusreptø chugúinguen mørmíig misrin gøn!— chib.

²⁵Inchene Pablobe trenchibig køn:

—Nai purø tab Festo, nabe chugúinguen mørmíig kømøtø basrar cha. Na waminchippe, ka isatø waminchib pasrømøwei, katø chiwan waminchib pasrarmab isua waminchib pasrar cha. ²⁶Pøs rey Agripabe, iilane kerrigu ashibig kuimba, nui merrab chigucha chi korig kuin gømø waminchar cha. Kaguende nøbe iilane ashmíig kønrrab gømøtø, nebua ashibig kuitamab isua basrar cha. Kaguende iilane kan turiumbu mu søratø marikkucha gømøn cha. ²⁷¿Nai rey Agripa, Tius maig karuigwan eshkabelø maig taigwan ñigan treeg kuitamab køretirru? cha. Ñibe kørewa wain gúi nabe asha basrar— cha trenchibig køn Pablobe.

²⁸Inchene Agripabe trenchibig køn:

—iKe yandiitøgatø Tiuswei mayu puraarrua pasramisrtrai indiibel!— cha.

²⁹Inchene Pablobe trenchibig køn:

—Yandiitøgatø gúi lata, kabe nu wamindiitøga gúi lata, ñitø gømøtø, mõi yu mørøb purrabelan chigucha kerrigueløba na latailøwei misra pønrraimbemab isutan chibig køn, inchendø nan lata cadenatøga øyeeg merrarraimeelø.—

³⁰Inchen rey kurra pasramisren, kubenadurgucha, Bereniceba kurrøben, truyu nomba purrabeløgucha kurra, yandø webamba, ³¹nømdø nørørørø ambabe, kangurrin gangurri trenchib waminchibelø gøn:

—I mørøbe chiburø kwanrrai maramdiig kømøwei, katø kailan keeri yau keera tøgagømdiig kømøwei marøbig kuin gøn— cha.

³²Incha Agripabe Feston trenchibig køn:

—Pablo nørashib César asha marig kørnrrab chib miamuig kuimbe, pøs nørø elatsikken gøbsruinrrun— cha.

Pablon Romasrømay ørig

27 ¹Yandø Italiasrømay amrrai treeg wamincha kørømisren, kan suldau tru cienwan nør garub pera basrabig tru Augusto maya misagwan ashib wabigwei suldau sötømerayuig Julio taigwan ashib tøgagønrrai tranøbelø gøn, Pablonba, katøgan kailan keeri yau pønrrabelanba. ²Incha adramitiosriig kan barco Asia birau, tru barcos buisrømay webinrrab inchib pasrøben, nambe truyu nebambubelø guer. Inchen nambabe Aristarco kan Macedonia birausriig Tesalónica ciudayuikkucha arrubig køn. ³Incha gatø gwaløm Sidón tru barcos buisrø nam pubene, truyube Juliobe Pablon truba tab inchib, nune nui trendø asiilaisrømay ibashibig køn, tabig wamab utab tøgagúig uñchai. ⁴Incha Sidóngurri webambabe, Chipre birø pi tøbøtag pasrabiisrø isig srørrø guetawan puraambub ambubelø guer, kaguende isig ichibiibe ambamgaig merramay megambub ichen. ⁵Incha yandø tru nu bi tøbøtaasrø Cilicia birauba, Panfilia birauba pinrrøguesrø misrøb ambabe, yandø Licia birau Mira ciudayu pubelø guer.

⁶Incha truyu suldau sötø cienwan nør garub pera basrabiibe kan barco Alejandría birausriig Italiasrømay inrrabig pasrain gúi wetørrawa, truyu amrrab, namun nebambingarubig køn. ⁷Incha tsøndatø truba yam gwaløm ambub meløwa, isig ichibig namun merramaygøba megambub ichen, ke trendø pumubsruatø Gnido pinrrøguesrø pubelø guer. Incha Salmón pinrrøguesrø Creta isig srørrø guetawan puraambub ambubelø guer. ⁸Incha mendawandø ke trendø chab gaimab purørrub amrrua, kanbalø Buenos Puertos taisrø pubelø guer, Lasea ciuda bulusrø.

Maryu kørig kømndiig pi namab gurra

⁹Inchen amrrub gúi yandø yanaguen misrøb arruben, yandø tru barcoyu ambamikkucha purø gørig kørnrraptiig misrøb arrubig

køn. Kaguende tru ayunain gwaløm puraiawei inchen, yandø tru sre bøl kebinrrab gøbig køn. Incha Pablobe øyeeg maramdiig køn chib waminchibig køn:

¹⁰—Nai lincha amrrubelø, i barcoyu ambamibe barcon mindisainab, katø purø nørro ka yandø pinønrrab gúi ashar cha, barco chigøben niga arriilø lata, barco lata yandø ka pinøben, katø namdøweinguen kwamigwan lanrrun— chib.

¹¹Inchen tru suldau sötø cienwan nø garub pera basrabiibe øyeeg maramdiig køn cha Pablo wamindigwane mormøtø, tru barco srubigwanba, barco buaigwanba, truilangøba mørøppe, Pablone mormiig køn. ¹²Inchagucha barcos buinug sre bubweimbe tab gømøtønug køben, sötøelø lutauba truyugurri webamrrab isubelø gøn, Creta birau Fenice ciudærø tru barcos buinug puin chindi. Inchen truipe pørr neeshibgatømayba, pørr binebgatømayba pinrøguesrøn gøbig køn.

Maryu purø rrømbøig isig ichibig webarrub

¹³Inchen sursrøngurri kan kaizhig isig ichibig webarruben, chu bunrrab isuigwan yandø ke nebuermab isua, barco imønrrai merrarrabig kuatsig tsandzønwan piugurri wesrawa, yandø tru Creta birø bulusrø kemallib ambubelø gøn. ¹⁴Indiibe yanazhigutø Euraquilón cha wamig isig purø rrømbøig pøtømay bailab ichibig tru pørr gal-labgatømaygurri webarrua, barcon yamgaig megambub arruben, ¹⁵yandø barcobe isig ichibig srúa yaig kuig kōppe, tru isig ichibigwane kamara ambamgaig køben, yandø isig ichibig srúa inrraindø ka burrabelø guer. ¹⁶Incha kan pirø, pi tøbøtag pasrabig Cauda tainug isig srørrøgatømay purørrub amrrua, truba rruba inchib meløwa, tru kwamønrrab webambig tru kan lamø barcozhigwan nemørøbelø guer. ¹⁷Incha trunun barcoyu neerabe, nu barco nørøtiig mismønrrai, manilastøga pøtøburab kirrøb mendabelø gøn. Inchendø piu umbu pisrum tunmerayu kegalrraitamab kørig køben, barco inrrai isig utabig velas taigwan kørøøra, tru mur isig ichibig barcon ka srúa inrraindø ka burrabelø gøn. ¹⁸Indig katø gwaløm purø rrømbøig namab isig ichib kurrøben, barco niga arrigwan pinøbusrøb menda, ¹⁹pøn gwalømyube tru barcoyu chi palabelan trendø truyu tøgagúilan nømashib pinøbusrøbelø gøn. ²⁰Inchen truba yam gwaløm kan pørr guenamismøweih, estrellamera

kenamismøwei inchen, purø rrømbøig isig ichib pi welarmera namab gurrøben, yandø øsig webammumuitamaptøwei isub melabelø guer.

²¹Nambe yandø yam gwalømguen mamø ambig kuig kōppe, Pablobe nōmui utu pasramisra, trenchibig kōn:

—Au, nai lincha amrrubelø, na maig taigwan mōra Cretagurri werrumuig kuinguen, barcon øyeeg trømbøig mindisainamøwei, øyeeg nōrrø pinisha bōnrrømøwei inchibsruinrrun cha. ²²Treeg kuindøgucha tru isuptø chi kullaaramugun chinrrab inchar cha; kaguende barcobe chab pinindøgucha, ñimbe mōikkucha kwanrraamøn cha. ²³Kaguende nan tru nuin gōnrrai inchib pasrab, katø nui maramigwan nan maringarub inchib pasrab Tiuswei kan ángel mira yem nan kenamisrtan cha. ²⁴Incha nane tru ángelbe trenchitan cha: “Pablo, chi kōrig kui inchimōta cha. Kaguende ñibe Roma maya misagwan karub ashib wabig César purø nuigwei merrab pasramig palōnrrab gúimba, barcoyu ñiba amrrub gōbelan Tiusbe mayeelanba øsig webambamig kōnrrai martrun” chitan cha. ²⁵Inchawei, nai lincha amrrubelø, chi kullaarab trunun isumōtay cha. Kaguende nabe Tiuswandø isua basrar cha, nō maig taibe treeg kōnrraitamab isuague. ²⁶Inchen gōben, kan pi tōbøtag pirø basrabiisrø barco namunbañau srua ya trusrø kebusriilø gōmig nebunrrun— chibig kōn.

²⁷Indiibe parru gōnrrab yembe nam Adriatico maryu ke pi muba srua yaindeelø ambub gua, yem dōbøtasrø tru barcoyu ambubeløbe yandø ke pirø bulu pub yain gúi mōrabe, ²⁸piwan maya umbuig kōtashchab tsiwan kegucha ashene, treinta y seis metros kōben, katøguchi ambuurøsrø katø kegucha unaashene, veintisiete metros kōbig kōn. ²⁹Inchen nōrrø sruumerayu melambumuitamab kōrig kōben, barcon imōnrrai merrarrabig pibgatø wendaumay kuatsiguelø piu kebusriilan kebeta, ke kan petø tør-rraimbemab isub munig melabelø gōn. ³⁰Inchen tru barco srubelø barcoyugurri wegørra amrrab isua, tru merrabmay piu kebusriilø tru kuatsig tsandzōnmeran merrarrab tsimeran yabranøbelø misrøb, tru kwamø øsig webambam barco-unan piu kebenøsrkøbelø gōn. ³¹Inchen Pablobe suldau sōtø cienwan nō garub pera basrabigwanba, suldaumeranba trenchib eshkabig kōn:

—Iilø yu barcoyu ka burrømøtø wegørra ambisruandøbe, ñimbe øsig webamrraamøn— cha.

³²Inchene suldaumerabe tru øsig webambam barco-unan merrarrab tsimeran para, piyu ibashiptinchibelø gøn.

³³Inchen yandø tør-rrab arruben, mayeelanba maytøguen chi isumø, ka may chib, Pablobe trenchibig waminchibig køn:

—Yandø mõi chabguen parruguen gøn cha, chi buraitashchab muniiraptø ñim chigucha mamø melaig. ³⁴Inchawei nabe tiusmanda ka may tamønrrun cha, pøs ñimui asr tabig chishtø gønrrai. Kaguende ñimune møigwandøgucha kan pusruutøguen mindisaig kønrraamøn— cha.

³⁵Trunun chab waminchabe, Pablobe nui tasku pirriwan muta, mayelai merrab Tiuswan ‘mayanguen pay’ cha, pirisha, trugurrimbe mab pølbaren, ³⁶mayeeløba ka mamøtømab isua, nømgucha mabelø gøn. ³⁷Inchen tru barcoyu nam mayeelø amrrubeløbe doscientos setenta y seis købelø guer. ³⁸Incha yandø mamne ma, tirigun maryu kebetabelø gøn, barco chairanrrai.

Barco piu umbu ulsra pasrambub

³⁹Incha tør-rrabene tru pirøwane chu birau gúinguen ashmubendø, kanbalø barco kebambig wambiitiig pisrum chaabaig nebua asha, trusrø pasrambumdiig købene, barcon trusrø pasrambungarunrrab inchibelø gøn. ⁴⁰Incha barcon imønrrai merrarrabig tru kuatsig tsandzøn piu kegutsigwan piu wamnetø tsimeran parøppa, trugurrimbe tru barcon muba inrrai lliskaigwan lusrig pasrabigwan alaaanøb, tru isig utabig vela taigwan kusrubene, tru barcobe pisrum chaasrømay ib mendabig køn.

⁴¹Inchendø tru pi ambugurri igurri megambuinug pisrum dunyu pasrambunrrab iben, barcone trusrø kegaløsrka pasrambungarubelø gøn. Inchen merrabmayiibe pisrum tunyu ulsra kønømíig pasrambuben, wendaumayiibe tru nørrø bi welarmera purø rrømbøig megambuben, barcobe ke nøørøtiig misrøb ibig køn.

⁴²Inchen suldaumerabe tru kailan keeri yau bønrrabelan srua amrruulan kwetchab isubelø gøn, wegørra amba møikkucha lulmønrrai. ⁴³Inchen tru suldau sötø cienwan nø garub pera basrabiibe Pablone kweechimønrrai isua, nøm isuigwane ka isuitø burainrrai marøbig køn. Incha møiløgøben nadam gusrebeløbe truilmerrig kegørra ambingarubig køn pursrø webamrrai.

⁴⁴Inchen gatøganelane:



Los Hechos 27.44

—Tablamerayu gúi, kabe tru barco nòròtiig misra wegòrriiløyu gúi ambay— chibig køn. Øyeeg inchib meløwa mayeeløba pirausrø øsig pubelø gøn.

Pablo Maltasrø chitø marøb purayailø

28 ¹Incha yandø sòtøba øsig webambabe, tru pi tøbøtag pirø basrabiibe, Malta cha wamim birø gúin gúi nebua ashibelø guer. ²Inchen trendø truyu warab misaamerabe namun kwa tab inchib tab wama, srebub gwa pishin gøben, nømbe nag urra, namun sòteelanba kemallchai wamabelø gøn. ³Inchene Pablobe trar mul nu tulisha, nagu kebusrene, mømimbe kan ul nag bachiiraben truyugurri webarruppe, Pabloi tasku tsacha megambuben, ⁴trendø truyu warab misaamerabe ul Pabloi tasku tsacha megai ashabe, kangurrin gangurri trenchibelø gøn:

—I mөөbe chiguen gөmө kweechaitөwein гúinrrun cha. Maryugurrimbe chindiimíг ka өsig webarrindөгucha, tru maig көнrrabigwan asha mariibe pinab ashmíг kuabe, өsig uñbashmөнrrab asөnan— chibelө гөн.

⁵Inchen Pablobe ulwan nagu pabөrrгөbene, chigucha inchimíг көн. ⁶Inchen нөмbe parab mendөtashchab, kabe мөи мөи kwain tsumbutashchab ashib muniirab гөbelө гөн. Inchendө tru chindashchab truba yaana ashib гөбен, chigucha inchimui ashabe, katөbe peemayтө isua, Pablone ‘kan tius көн’ chib mendabelө гөн.

⁷Inchen tru warainug trugatanbe Publio taigweim birөmera гөbig көн, tru pi төбөtag pirө basrabigu misagwan ashib karubigwei. Truibe namun truba tab wamab uta, пөн гwalөм өрөba truba tab inchib көррөmisringarubig көн. ⁸Inchen tru Publioni mөskaimbe pachiibaig, ani larraibiibaig camayu kwanrrө tsuben, Pablobe ashchab ya, Tiusba wamincha, tasigwan kwanrriigweim bala estsarene, tammisрөbig көн. ⁹Inchen trugurrimbe katөgan gwanreelөгucha tru pi төбөtag pirө basrabigu warabelөbe Pabloimay amrrua, tamariilө гөbelө гөн. ¹⁰Incha chigөben truba ketiilөтөga namun truba rruba tab incha, nam amrrab barcoyu nebammөwatө, ambamig chi palөнrrabigwan нөмbe chishtө rranөbelө гөн.

Pablo Romasрө pub

¹¹Incha tru pi төбөtag pirө basrabigu пөн бөл warөwabe, kan barco alejandríasriig tru srebub пөлmera chab purayamne, truyu pasrabigu ambubelө guer. Tru barcobe Cástorwanba, Póluxwanba marig төgaig көbig көн, chiyuilө гúi asamig көнrrai. ¹²Incha barcos buinug Siracusasрө puabe, truyu пөн гwalөм warabelө guer. ¹³Trugurrimbe pirө buluwandө purөrrub amrrua, Regio ciudasrөngatig amben, katө гwalөmbe sursrөngurri, isig ichib gurrөben pa гwalөм гөнrrabyube Puteolisрө pubelө guer. ¹⁴Incha trusrөmbe nunelө warabelө гúin гúi wetөrrabelө guer. Inchen нөмbe namun truyu көррөmisray chiben nambe kan trune lincha гөrrөmisрөbelө guer. Incha өyeeg amba Romasрө pubelө guer. ¹⁵Inchen Romasрө nunelөbe nam amrrunrrab гúi wammөraguen gua, Apio ciudasрө misag amrrua tulundzuniisрөmba, katө tru Tres Tabernas taisрөmba namun wamab utөнrrab amrruin гөbig көн.

Inchen Pablobe nɔmun ashabe, Tiuswan ungwa, ungwa cha, chi gɔmui lataig katɔle truba tab gúi mɔrɔbig kɔn.

¹⁶Incha nam Roma chab pubene, Pablone trusrɔmbe nuin gúi nɔrɔrɔ yau tsubashibig kɔn, kan suldaowan nun ashchai pasra.

Pablo Romasrɔ Tiuswei wamwan eshkab kusrenanɔb

¹⁷Incha tru puig pɔn gwalɔmyube judíosmeran ashib karubelan Pablobe lynchab amrrunrrai eshkangarua, yandɔ truyu chab tulundzunɔbene, trenchibig kɔn:

—Nai nunelɔ, nabe judíosmeran tsalɔ gɔb chi kaig marmɔwei, katɔ namui kɔlli misaamera nɔmui trendɔ chigɔben marɔb tɔgagúilan treelane marmumig kɔn chib pasrɔmɔwei inchendɔ, Jerusalénsrɔwei nane merrarrowa, romanosmerai tasku tranig kɔn cha. ¹⁸Inchen truilɔbe nan maig kuigwan tab ashabe, elatchab inchibelɔ gɔn cha, kwanrrai maramdiig nainug chigucha chi kalɔ marig kaaben. ¹⁹Trune judíosmerabe nan elachimɔnrrai sɔtɔlulen, nane treeg marɔg kɔmuindɔgucha nan maig punrrabigwan César asha martrai nane miamig nebuig kɔn cha, kabe na naim birau, nai misaameraimburab chi kɔn chinrrab isua gɔmɔtɔ. ²⁰Inchawei ɔyeeg buikkurri ñimun ashchappa, waminchappa nabe wamig kɔn cha. Nam israelitasmera muniirraigwan muniirabikkurri mɔi yu i cadenastɔga merrarraig pasar— chibig kɔn.

²¹Inchene nɔmbe Pablon trenchibelɔ gɔn:

—Nambe Judeagurri ñuimburab eshkabig chi kilga bɔra ɔrig utɔmɔwei, katɔ namui misag judíosmera trusrɔngurri amrrubelɔ mɔikkucha ñi kalɔ maran chib ñuimburab namune chigucha waminchimɔwei indig kɔn cha. ²²Inchendɔ ñi maig isuigwan wamindi mɔrinrrabna gúin guer cha. Kaguende tru i sɔtɔ Tiusweiwan srɔig peemay kusrenanɔb marigwane chutɔgucha ‘kaig kɔn’ chib, wamindi ashibelɔ guer— cha.

²³Incha nɔmbe kan ɔ gwalɔm Pabloba tulundzunɔnrrab cha wesrawa basra, tru Pablo ya beba tsuinumay truba nu amrruben, lɔtsɔgurri maabengatig ‘Tius tru nɔ ashib karub wainuguigwan ɔyeeg, ɔyeeg kɔn’ chib eshkab, nɔbe maig kuigwan waminchibig kɔn. Jesucristoimburab ke treegwei gɔbig kuin gɔnmab nɔm nebua isumne inchib, tru maig maramigwan martrai Moisés pɔriilan pɔlbasra, Tius maig karuigwan eshkabelɔ pɔriilanbañau waminchibig kɔn. ²⁴Inchen kan utuelɔbe Pablo wamindigwan

treegwein gøbig kuin gúi isuben, trune kan utueløbe køremeelø gøn. ²⁵Incha nømbe nømui ututøwei lata kandø isumuig køppe, tarømisra ambub gøben, yandø ke srabe Pablobe trenchibig køn:

—Espíritu Santobe tru Tius maig karuigwan eshkabig Isafaskurri tru merrabsrø ñimui kølli misaameran øyah chib, waminchippe, sølwei wamindin gøn cha:

²⁶“I misaameran iigwan waminchab inrrø cha:

Ñimbe mørøppe, mørenðø, managuen chigúi mormønrrun chib.

Ashippe ashendø, chigúinguen nebua ashchaamøn chib.

²⁷Kaguende i misaamerai manrrømerabe nasrkwailø, katø mørøppe, mørenðø, tab chigúinguen mørmeelø gøn chib.

Nømui kabmerabe kasrailø gøn cha,

kabmeratøga ashmøwei, nømui kalumeratøga mormøwei inchai.

Katø nømui manrrøtøga mandø gúinguen mormøwei,

katø naimay lliamøwei,

katø na tamariilø gømøwei gønrrun chinrrig,” taimbala.

²⁸Pøs øyeeg købene, ñimbe isua guy cha. Judíos kømø misaameran tru kaigyugurri wesrabig Tiusweiwane wammørøsrailø gøben, truiløbe mørtrun— chibig køn. ²⁹Inchen Pablo øyeeg chibene, judíosmerabe nømdø truba rruba payiyab waminchib ambubelø gøn.

³⁰Inchen Pablobe tru an bagarawa pebi yau pa bila ørøba kørrømisra, nun ashchab ambubelane mundøgucha wamab utab wabig køn truyu. ³¹Tius nø ashib karub wainuguigwan waminchib, Señor Jesucristoimburabigwan eshkab kusrenanøb inchibig køn, mui malautøgucha trurrigu chi sötø luliimíikke.

Romanos

‘Ka amõñiguh’ chib pørig

1 ¹Na Pablo, Jesucristoi marøb megabig, Jesucristo nõashib nan karua ørig kønrrai nan wama basrøb, Tiuswei tabig srø wamwan eshkab kusrenanøb pasrønrrai nan tarømara basrøb indig, i kilga børigwan ørar.

²Iig tru tabig srø wambe Tius maig karuigwan eshkabeløgurri nui newan tab wam pøriiløyu tru merrabsrøwei Tius tranrrab misra kørrømisri wam gøn ³tru nui Nusrkaweimburab. Tru Nusrkai nõ misag kuigweimburappe, nõbe Davidwei misagugurri arrubig køben, ⁴tru Espíritu Newan Tabigweimburappe, tru maramburab mariitøga nune Tiuswei Nusrkain gøn cha eshkawa pasrig. Treeg køn, tru kwabelai utugurri nõ gatøle øsiirawa kurrig kuikkurri, truike Jesucristo, tru namui Señor.

⁵Incha nõgurri tru ka yandø tab indigwanba, nõashib karua ørig kømigwanba nambe utig køn, judíos kømø misaamera chu birausreelandøgucha nõmui isubigwan nuinuutø pasrikkurri nõ maig taigwan mørøbelø gømigwan nam waminchib ambamig kønrrai, Cristoi munchiweyasig. ⁶Inchen tru maig taigwan mørøbelai utu Jesucristoielø gønrrai wamiiløba ñimgucha truyu tøga bønrran. ⁷Ñim mayeelø Romasrø warabelø Tius undaarailø, Tiuswei misaamera gønrrai wamiilan ka yandø tab indiiba, chi isumgaig tab gøbiiba ñimba gønrrai inchar, Tius namui Møskaweinukkurrimba, Señor Jesucristoinukkurrimba arrubigwan.

Pablo Romasrømay yainrrabna gúi inchib

⁸Señor Jesucristogurri nai Tiuswanmerrig ungwa, ungwa chinrrab inchar ñim mayeelaimburab. Kaguende ñim ñimui isubigwan Cristoinuutø pasra tøgagúigwane chutøgucha tabig waminchibelø gøn. ⁹Pøs nai manrraugurri kerrigu newan isua, nui Nusrkawei tru tabig srø wamwan eshka kusrenanøb, nuiwan na marøb pasraig Tiusbe nane asha basran, tru na nøba wamindigube managuen pesannamø ñimun isubig kuigwan. ¹⁰Nabe nai Tiuswan ‘purugurra’ cha, miabig kur, Tius nan inrrain gøben, yandø na chinchagøben ñimun ashchab arrumig may gurtrai. ¹¹Kaguende nane ñimun asinrrabna gøtan, Tiusweimburabeløyuigwan chitøguen ñimun pirishinrrab, ñim mas mur pønrramig kønrrai, ¹²masken tru ñim lata, na lata namui isubigwan Jesucristoinug kanguelarrøtø tōga pønrraitōga nam ambugurri, igurri kuñab pønrramig kønrrai.

¹³Pøs nabe ñim, nai nunelan, wammøra gønrrai inchar, nabe ñimuisrømay ñimun ashchab katø gatø attrab isub megaigwan, na judíos komeelø katøgan misaamerai utusrø kan ellmarig tulishib latawei, ñimui utugucha maitøguen tulishinrrab. Inchendø mōingatig arrumgaig pasrambuig megabig kur. ¹⁴Nabe griegosmeran lata, griegos kømø misaameran lata, kusreb misaameran lata, chi kusremø misaameran lata ulø basrar Tiuswei wamwan eshka kusrenanamig. ¹⁵Inchawei treekkurri ñim Romasrø warabelangucha nabe Tiuswei tabig srø wamwan truba ruba eshka kusrenanøg kuim basrar.

**Tiuswei tabig srø wambe kaigyugurri
wesramig maramburab marøbig køn**

¹⁶Pøs Tiuswei tabig srø wamweimburappe nabe chi korig kui inchib pasrømur, kaguende truike Tiuswei maramburab marøbig køn kaigyugurri wesrailø gønrrai mutøgucha Jesucriston kørebigweimbe, judíosmeramerrig, trugurrimbe gatø griegosmeragucha. ¹⁷Kaguende tru tabig srø wamyu kenamisran tru chi kaig marmeelø lataig tabig kørrømisra pønrramig Tiusweinukkurri arrubig, truike isubigwan Cristoinuutø pasra pønrraikkurrimba, katø isubigwan nuinuutø pasra pønrramig kønrraimba. Tru Tiuswei wamwan pørigu maig taimbala: “Tiusba

tru mandø basramigwan sølgandø treeg tabig basrabiibe nui isubigwan Tiusweinug pasra tøgagúitøgatø uñchun” daig.

Maya misaamera kaig mara pønrraig

¹⁸Tiuswei purø rrømbøig namig kòbiibe srømbalasrøngurri kenamisrøb arrun, tru møguelø larrø rrømbøig mariilaim balaba, tru sølgandø tabig kòmífigwan mariilaim balaba, tru treeg sølgandø tabig kòmífigwan mariiløtøga tru newan cierton tabigwan sötøgatab pønrrabelan. ¹⁹Kaguende Tiusweimburabig kui asamigwane nømbe törgandø ashibelø gøn, pøs Tiusbe nøashib trunun nømun kenamarig kua. ²⁰Kaguende tru chigurrimbunø pirøwan mara pasrøb uraskurri Tiusweimburabigwan tru kaptøga nebua asiimeelø, tru managurri managatig nui maramburab marøb pasrabiiba, nø trendø Tius køppe, treeg kuibabe törgandø chigúi nebua asamdiig kenamisran tru nø chi mariiløyu. Inchawei treekkurriwei chi guemesra gøben ‘ashmeelø guer’ chib pønrramibe chigagøn.

²¹Kaguende nømbe Tiuswan nebua ashippe ashendø, Tius kui ashabe, Tiuswan lataig tabig inchib tøgagømwøwei, mayanguen ungwa, ungwa chimøwei inchibelø gøbig køn. Treeg kømøtø, nømui isubigube chi purugunrrabgailø isumguengailan isuben, nømui chugúinguen mormubendø isub manrrøbe løstøraig kørørmisrig købig køn. ²²Nømbe truba rruba kusrebelø guermab inchendø, chugúinguen mormeelø gørrørmisrig købig køn. ²³Tius mananguen pinønrrabig kòmífigwei tru törguegwalmabigwane møg kwawa pinønrrabigwei asrwan tre lataitøwei maramba, illimera latailø maramba, pib srøptøga animalmera latailø maramba, pirau srala ambub animalmera latailø maramba inchib, øyeeløtøga yunømarøbelø gøbig køn.

²⁴Inchawei treekkurri nømui manrrau møgueløba, ishumburmeraba trømbøig marøg købig arrubigu trømbøig marøb chinchibgucha warønrrai Tiusbe elatsig køn, nømui asrmeran nømasiyaitø larrø rrømbøig marøb gønrrai. ²⁵Nømbe Tiuswei tru newan ciertonig køreigwane lelacha, isa wamindigwan kørewa, Tius tru mara pønrrailan kòriibala tabig waminchib, truilayasis marøbelø gøbig køn, tru chigurrimbunø kønrrai Tius mara pønrsøbig, Tius tru managatig mayanguen tabig wamindigwan tabig wamindi urasbe. Treeg kønrrun.

²⁶Inchawei øyeekkurri nòmune purø rrømbøig kørikken gønraptiig marøb gønrrai Tiusbe elatsig købig køn, ishumburmerabe nòmui asrwan møguelan rranamig købigwan treeg marmøtø, ishumburmeraasiyaitø trømbøig marøb guebamben. ²⁷Katø møgueløbe treetøwei nòmui asrtøga ishumburba trendø treeg marigwan elacha, kanikkurri kanikkurri trømbøig marøg købiitø kan chinsraatø inchib, møgueløbe nøm møgueløasiyaitø purø rrømbøig kørikken gønraptiig marøb guebambig købig køn. Nøm treeg trømbøig marøb pønrraimburø nòmui asrutøwei nøm mōra melamigwan utig købig køn.

²⁸Inchagucha nømbe Tiuswane ni Tius kuitamabguen isug kōmui inchen, Tiusbe elachiptindig købig køn, nòmui isubigwane larrø kaig mindiilø tøgagøbashchab chi maramgaigwan marbashib. ²⁹Nømbe kalø marøb amrruiløtø netsailø, purø rrømbøig marøbelø, pareelø, trurrigu yandø larrø gailø, treelø gøn. Nømbe chigurrin gøben pusrkwai asamig køben, misagwan kweecha betamelø gøben, kwayam lamelø gøben, isatø may wamincha kegørrørskamelø gøben, katøganun kaig martrab isumelø gøben, trutø netsailø gøn. ³⁰Katøganuimburab chine wamincha mørøbelø, wam gusrupteelø, Tiuswane larrø tsaleelø, mōramguenga trømbøig wamabelø, purab nørreelø mørørai inchibelø, nōmasiitø purab nørreelø misrøb waminchibelø, chigurrimbunø kaig maramigwane srøitø, srøitø isua wesrubelø, usri mōskalan chigucha mørmeelø, ³¹larrø chugúi mørmeelø, chi martrab waminchendø ka wamdø waminchibelø, manrrøga latailø, mungucha lastima ashmeelø, treelø gøn. ³²Tru øyeeg marøbeløbe kwamig kōnrrai Tius treeg nebunrrai mara pasrigwan nømbe ashibelø gøbendø, katøgucha nømbe treegwan ka mariitø gōnrrab gúindø, katøganelø treeg marene, 'øyambe søldøwei maran' chibelø gøn.

Tiusbe mayeelan maig maramigwan asha martrab pasrainrrun

2 ¹Inchawei treeg købene, au, ñibe chi guemesra gøben 'ashmfīg kur' tamibe chigagøn, ni mu gúingucha, ñi katøganun 'øyeeg, øyeeg marøbig køn' chib pasrabiibe. Kaguende ñi katøganun 'øyeeg marøbig køn' chib pasrappe, ñibe ñiasiiitøwei kebeñib pasran. Pøs katøganun ñi 'øyeeg, øyeeg marøbig køn', chib pasraptøga ñigucha treetøwei marøb pasran. ²Inchawei nambe ashibelø guer, tru øyeeg marøbelane Tiusbe maig kōnrrabigwan treeg kōnrrai mara

basrøppe, tru newan ciertonig maig køben treeg marig kui. ³Au, ñi tru katøganelø treeg marøbelan ‘øyeeg, øyeeg marøbelø gøn’ chib pasraptøga, ñigucha treetøwei marøb pasrøbendø, ñi isuppe, ¿Tius tru maig kønrrabigwan treeg kønrrai mara pasrigugurri chi indiimíig ñigan welulrrurmatirru? ⁴¿Kabe Tiuswei tru purø tab indig tøgagømburab tøgagúilanba, nø chindingucha tammayig kuigwanba, tammay munugubig, munugubig kuigwanba, truilan kashchab inchib pasrøtirru, Tiuswei tru purø tab indiibe ñui kaig mariilan isua møra, Tiusweimay lllanrrai inchib pasrøben, trunun isua ashmøtø?

⁵Inchendø ñibe ke ñi isuiwandø martrab inchibikkurrimba, mas kaig marmønrrab ñui manrrau ñi isua mormuikkurrimba, ñibe Tiuswei namig købigwan nui sølgandø maig kønrrabigwan asha maram gwalømwei ñuyasiitøwei tunbasrøb yan, Tiuswei tru maig kønrrabigwan sølgandø asha marig kenamisram gwalømweyasig. ⁶Tiusbe møigwandøgucha nøm maig marig køben kanun ganun truburø nø maig tranamigwan treeg tranrrun. ⁷Managatig øsig kømigwan tranrrun Tiusbe, tru managuen elachimø, tabig marøbig marøb melaigu tru maya nuguen tab indigwanba, tabig kui asha tab indigwanba, managuen patsønrrabig kømíigwanba labelane. ⁸Inchendø tru nøm maig isuppe, ke treegwandø gønrrai isua marøb, tru newan ciertonigwan møra marmøtø, tru sølgandø tabigwan møra marmeelaim bala attrun Tiuswei tru purø rrømbøig namig købiibe. ⁹Tru kaig marøbelaimbe muim balatøgucha purø rrømbøig chine nebui melamiba, ni mumayguen gømíig isui melamiba attrun, judíosmeranmerrig, trugurrimbe judíos kømø misaameran. ¹⁰Trune mønundøgucha tabig marøbelaimbe tru maya nuguen tab indiiba, tabig kui asha tab indiiba, chi isumgaig tab gøbiiba kønrrun nømuimbe, judíosmeranmerrig, trugurrimbe judíos kømø misaameran. ¹¹Kaguende Tiusbe muingatøgucha wamøtø, lata ashibig køn.

Tru maig maramigwan martrai Moisés pørig

¹²Inchawei maig maramigwan martrai Moisés pørigwan chigarmera gua, mutøgucha kaig marøbeløbe tru maig maramigwan martrai pørigu asha mariilø gømuingucha, pinab pinamnuumay amben, katø tru maig maramigwan martrai Moisés pørigwan tøgarmara gua, kaig marøbeløbe, trube, tru nømui

pørig tøgagúitøwei maig kønrrabigwan asha mariilø gønrrun. ¹³Kaguende maig maramigwan martrai pørig maig tailan ka mørato amøña, Tiuswein gabyu sølgandø tabelø gønrrab gømotø, tru maig maramigwan martrai Moisés pørig maig tailan mōra marøbelø, truiløbeguende Tius tabig kørromariilø gønrrun. ¹⁴Pøs tru judíosmera gømeelø tru maig maramigwan martrai pørig chigarguen tru pørig maig martrain chibigwan nømbe ka trendø treeg marøb amønñippe, nømbe tru maig maramigwan martrai pørigwane chigarmerabe gøbendø, nømui mariiløyu tru maig martrai karuigwane pøri latailø gøbig køn nømashib. ¹⁵Nømbe tru maig maramigwan martrai pørigwane nømui manrrau pøri lataig tōgar gúin gúi kenamaran. Tru nømui isub kebachib pasrabiibe nøm maig kuigwan eshkaben, tru nømui isubiibe, ‘ñibe kalø mara basran’ dain gúi, kabe ‘tabig mara basran’ dain gúi indan. ¹⁶Inchen øyeebe tru mōguelø nømui manrrau mu asiimíig nōmuinetø tøgagúilan Cristo Jesúskurri Tius maig kønrrabigwan asha marøb gwaløm treeg kønrrun, Tiuswei tru tabig srø wamwan na wamindig maig køben.

Judíosmeraba, tru maig maramigwan martrai Moisés pøriiba

¹⁷Ñi, judío misag cha wamig, tru maig maramigwan martrai Moisés pørig maig chibig køben ñibe ke truigwandø guemenda basrōwa, ‘Tiusbe namunwei lawa wesrailø guer’ chib, ñi nuig misrøb mōg inchib pasrab, ¹⁸katø ñibe Tius maig martrai palai waigwan nebua ashib, katø tru purø tabigwane ñibe ‘tabigwein gøn’ chib, pasrab inchibig køn, kaguende ñibe tru Moisés pørigwan kusrenanig kua. ¹⁹Ñibe tru chi ashmeelø kabgar latailan muba ambamigwan ‘nabe sí, pera ibig kurma’ isua basrab, katø løstøyuelaimbe ñibe ‘tør gurma’ isub, ²⁰katø, ‘chugúi mørmeelan maig kuigwan kusrenanøb, ureg latailan kusrenanøb inchibig kurma’ isuinrrun, kaguende tru maig maramigwan martrai Moisés pørigube nebua ashib kusreelanba, tru newan ciertonigwanba maig kuigwan newan trendailan ñibe tōgagua. ²¹Ñi katøganelanguen kusrenanøbig købendø ññiasiitøweimbe kusrennrrab inchimøtirru? ‘Nilamig kōmøn’ chib, ñi eshkab kusrenanendø, ññigan niløtirru? ²²Katø ‘itølulmumig køn’ chib, ñi waminchendø, ññigan itøluldirru? Ñibe taska mari tiusmeran larrø tsaliig købendø, trube, truilø pønrrai yau chi pønrrabigwane ññigan nila wesratirru? ²³Tru

maig maramigwan martrai Moisés pørigu ñibe truba nuig misrøb waminchib pasrøbendø, ðtru pørigwandøwei kalø marøb itøbunab pasraitøga, Tiuswane kaigwan lataig inchib ñigan maig købash marøb pasrøtirru? ²⁴Tiuswei wam maig pørig pasraimbala: “Ñimgurrindø judíos kømø misaamerabe Tiuswei munchiwan purø rrømbøig wamig køn” daig.

²⁵Pøs ñi circuncisionwan mara tøgagúibe, tru maig maramigwan martrai Moisés pørig maig chibigwan møra mareneguende, purugubwei indan. Inchendø tru maig maramigwan martrai Moisés pørigwan ñi kalø marøb itøbunøbene, tru ñi circuncidawa pasrab taibe chi circuncidamui g latakøwein gøn. ²⁶Inchawei tru circuncisionwan marmíikken tru maig maramigwan martrai Moisés pørigu maig chibigwan treeg marene ðcircuncidamíig kuingucha, Tiuswein gabyube nui misag kui asamig circuncidaweig kui latakøwei kørømarig kømuitarru? ²⁷Inchen tru judío gømø misag, asru tru circuncidamíig købendø, tru maig maramigwan martrai Moisés pørig maig taigwan marøbiibe, ñi, judío, tru Moisés pørigwan tøgag, katøgucha circuncidaweig købendø, tru pørigwan kalø marøb itøbunøbene, nø maig uniitøga ñune nøguen ñi kalø marøptiig kui kørømartrun.

²⁸Kan judío gømibe, ka palatø judío gønrrab gømøwei, asru ka palatø circuncidaweig kuikkurri judío gønrrab gømøwein gøn. ²⁹Treeg kømøtø, kan cierton judíobe nui umbugurri treeg køn. Katø tru circuncisiónwan Espíritu Santogurri manrrau marig køn, tru maig maramigu pøriiløgurrin gønrrab gømøtø. Inchen tru treeg mowane maya nuguen tabig wamindiibe móguelainukkurrin gømøtø, Tiusweinukkurri arrubig køn.

3 ¹Trube, treeg købene, ðkan judíoimbe chiyutørre mas tabig kerah kan judío gømíigwei lata? ðKatø tru circuncision mariibe chi burugub pasrah? ²Pøs, kan judío gømibe chiyutøgucha truba rruba tab gøn. Srøtøbe, Tiuswei wamwan nømunwei asha marøb tøgagønrraimab isua trana basrig købig køn. ³Pøs nøm møiløgøben Tiusba maig pønrramigwan treeg pønrrømuingucha, tru nøm Tiusba treeg pønrrømuikkurrindø, Tius nø maig tabig kuigwane treeg kømønrrai mana rreeg martrab gø. ⁴¡Kah! mumaygucha chi treeg kønrraamøn. Treeg kømøtø, Tiusbe nø maig martrab taigwane isømø, treeg marøbig køn, misaabe mutøgucha isapteelø gúingucha. Tiuswei wamwan maig pørig pasraimbala:

“Ñi wamindiiløyu səlwan waminchibig kui asig kōnrrain gōn daig.

Katø ñun ‘øyeeg, øyeeg marøbig kōn’ dainab pasraigu ñibe tab puraya webyan” daig.

⁵Inchen tru nam sōlgandø tabig marmub pōnrraibe Tius nō sōlgandø tabig kuigwane masken tab nebua asig kōnrrai kenamarene, trube, ñnambe chi chinrrab gōh? ÿTru Tius nui namig kōbiitōga namun mōra melōnrrai marōppe, səl marmfig kōptø, treeg marig kōnrrab gō chindah? (Nabe iigwan trenchippe, mōguelø maig isubelø gōben, trumay isua rrenchar.) ⁶iKah! mumaygucha chi treeg kōnrraamōn. Trube, øyamay gūimbe ÿpirau maya misaameran tru maig kōnrrabigwan Tiusbe chinha asha martrab gō?

⁷Inchen tru nai isa wamindiibe Tiuswei newan ciertonigwane masken maya nuguen tabikken gōnrrai marendøbe, trube ñnane katøgucha chindimbarre kaig marøptiig kuig mara gōrrōmarah?

⁸Trube, øyah chinrrauta (tru mōiløgōsrōn namuimbura trōmbøig waminchib itō amrrubelōma namun ke øyeeg chib pōnrrabelø gūi marøbelø gōn): “Kaigwan margun cha, tabig attraimbe”. Tru trenchibelane mōra pōnrrōnrrai maramig səlwein gōn.

Tabig səlwan marøbeløbe kanguen mu gaagōn

⁹Trube, treeg kōbene, ñnam judíosmerabe katøguchi tabelø gōbra chindah? iKah! mumaygucha chi treeg kōmōn. Kaguende: “Judíosmeran lata, judíos kōmeelan lata, kaibe mayeelanba nō garub tōga basran” cha. Yandø nambe: “Treeg kōn” cha chab rrendaig kuig kōn. ¹⁰Tiuswei wamwan pōrigu maig taimbala:

“Sōlgandø tabiibe ni kan kandøguen mu gawei,

¹¹ maig kuigwan chi chibig kui mōrtrabig muguen gawei, Tiuswan isub lanrrabiibe muguen gawein gōn cha.

¹²Mayeelōba peeburabgōba amba, mōitøgucha chi martrabgaig kailø misrin gōn cha.

Tabig marøbiibe muguen kaagōn cha, ni kan kandøguen mu gaagōn cha.

¹³Nōmui mōrambe kan kwaig sōrin rrabwan kura basri lataig kōben, nōmui nilōtōgabe may wamincha, isa kegōrrōsrkōbelø gōn. Nōmui trikkalusyube ulmerai venenon muga latailø, treelø gōn cha.

- 14 Katø nòmui trigube kaig nebunrrai trømbø wamamibah,
larrø busrkwanrraptiig wamamig møbgølig lataibatø
netsailø gøn cha.
- 15 Nømbe kweechib, ani lushib luløb pønrramig srømmerabe
unchaguen tøgar gøn cha.
- 16 Nòmui amønailøbe purø isumdiig kørørmisra waramig
kønrraimba,
chugurringuen gømuilø isuig kørørmisra waramig
kønrraimba,
treeg marøbelø gøn cha.
- 17 Ambumay imay tab amønami gwane ashmø misaamera gøn
cha.
- 18 Nømbe Tiuswan korig tøgagømigwane
ni managuen isumeelø, treelø gøn” cha,
trenchibig køn.

19 Pøs nambe ashibelø guer, tru maig maramigwan martrai Moisés
pøriibe tru pørig maig chiben truigwan marøb melabelaimburab
waminchibig kui, mumeratøgucha chi chinchab gaima pønrramig
kønrraimba, katø Tiuswei merrab pirau maya misaamera kerriguba
nòmui chi mariilan eshka b pønrramig kønrraimba. 20 Kaguende tru
maig maramigwan martrai Moisés pørig maig chibig køben trunun
marikkurri Tiuswei merrab chi kaig marmíig lataig munguen tabig
kørørmarig kønrraamøn. Treeg kømøtø, tru pøriibe nambe kaig
marøbelø gúi trunun kenamarøb pasran.

**Kaigyugurri webambamibe isubigwan
Jesucristoinug pasra tøgagúikkurriin gøn**

21 Inchen mømibe tru chi kaig marmeelø lataig tabig kørørmisra
pønrramig kønrrai marøbig Tiuswei yandø kenamisrin gøn, tru
maig maramigwan martrai Moisés pøriiba chi asamikkaig, Tius
maig karuigwan tru eshkabeløba, katø tru maig maramigwan
martrai Moisés pøriguba, tru truigweimburab maig wamindig
køben, treeg. 22 Iig tru chi kaig marmeelø lataig tabig kørørmisra
pønrramig kønrrai marig Tiusweimbe, isubigwan Jesucristoinug
pasra pønrraikkurri arrubig køn mayeelø nun kørebelaimbe,
mungucha nøørø marøb kandarøtø inchimø. 23 Kaguende mayeeløba
kaig mara, Tiuswei torguegwalmabigwane chinchu nebumøn.
24 Incha tru chi kailø gømeelø lataig tabig pønrramig keta traniibe

Tius ka yandø tab indikkurrin gøn, Cristo Jesús kurri Tiusweyelø gønrrai wesuilø gúikkurri. ²⁵Tiusbe Cristone kan animal gweecha tranøb lataitøwei marig køn, Cristoi ani lusinug nømui isubigwan pasrikkurri misag kaig mariilan Tius ulø baymumig kønrrai. Øyeeg marøppe, Tius nui tru sölgaandø tabigwan ashchai kenamaran, kaguende tammay muniirabig køptø, tru merrabwan kaig mariilane chi ulø baymønrrab pesannawa. ²⁶Nøbe øyeeg marøppe, tru mõi øyan gwaløm nui sölgaandø tabigwan kenamartrab indig køn. Katø nøbe isubigwan Jesúsweinug pasrøbigwane chi kaig kømíig lataig tabig kørromisrtrai marøbig køn.

²⁷Trube, treeg købene, ¿chiyu møg inchib pønrrønrrerah? Pøs treeg indamibe yandø patsan. Trube, ¿trunune mumay martrai pasriitøga patsøga basrah? ¿Chigøben tabig mariiløtøga gønrrab gø chindah? Kah, treeg kømøtø, truike isubigwan Cristoinug pasrtrai indiitøga patsøgan. ²⁸Pøs nambe øyamay gøn chibrran bønrrer, tru chi kaig kømíig lataig tabig pasramibe isubigwan Cristoinug pasra tøgagúikkurrin gøn cha, tru maig maramigwan martrai pørigu truilan mariiløgurrin gønrrab gømøtø.

²⁹¿Kabe Tiusbe judíosmerayasiitø Tius kønrrab gø chindah? ¿Nøbe judíos kømø misaameraingucha Tius kømuitarru? iPøs yamba treegwein gømuitarru! Judíos kømø misaameraingucha nøbe Tius køn. ³⁰Kaguende Tiusbe nøtø kandø gøn, isubigwan nuinug pasrikkurri judíosmera, tru asru circuncidawarmeran chi kailø gømeelø lataig tabig pønrramig marøb, katø judíos kømeelø, tru asru circuncidawa gømeelangucha nømui isubigwan nuinug pasrikkurri chi kaig kømeelø lataig tabig pønrramig marøb inchibig. ³¹Pøs treeg købene, ¿isubigwan Tiusweinug pasra tøgagúitøga tru maig maramigwan martrai pørigwane chigucha gømíig mara kørromartrautah? ¡Kah! mumaygucha chi treeg kønrraamøn. Masken nambe tru maig maramigwan martrai pørigwane maig købiibe, treeg kønrrai inchib pønrrer.

**Abraham isubigwan Tiusweinug pasrikkurri Tiuswei
merrab chi kaig kømíig lataig kørromarig**

4 ¹Treeg købene, ¿nam judíosmerai tru merrabsrø namui kølli misag Abrahambe chi wetørraig køn, chinrrab? ²Pøs Abraham chigøben tabig mariitøga chi kaig kømíig lataig tabig pasramig kuig kuimbe, møg inchib waminchib pasramig købwei

inchibsruiinrrun, inchendø Tiuswei merrab gømtø. ³¿Tiuswei wamwan pørigube mandø chibig køh?: “Abrahambe Tiuswan køreben, treekkurri nune Tiusbe chi kaig kømíig lataig, tabig treeg asha pasrig køn” cha, trenchibig køn. ⁴Pøs møikkøben kan chigøben marenma, truburø traniibe keta rranig kømøtø, nui marimburø tranamigwan tranig, treeg køn. ⁵Inchen Tiusba tab pønrrønrrab chi marmuindøgucha, tru kaigwan chi kaig kømíig lataig tabig kørromarøb Tiuswan kørebene, tru nui isubigwan nuinug pasrigwane Tiusbe sølgandø tabig kui asan. ⁶Davidbe gatø treetøwein daig køn: “Maya nuguen tab gúig køn cha, kan møg nui tabig mariiløgurriin gømtø, Tius ka yandø chi kaig kømíig lataig tabig treeg asha treeg kørromarinabigweimbe.” ⁷Øyah chib:

“Mayanguen tab gúilø gøn cha,

kaig mariilan Tius nømun chigucha chi ulø baymønrrab pesannab,

katø nømui kaig mariilan chi isua ashmø kasra kørromarinabelaimbe.

⁸Mayanguen tab gúig køn cha,

Señor nui kaig marigwan trunun isua ashmøtø, Señor kagøbasinab møøbe.”

⁹Inchen iig tru mayanguen tab gøbiibe ¿circuncidawarmeraindø gønrrab gø chindah, kabe circuncidameelaingucha gønrrab gø chindah? Pøs nambe trendaig kuig køn: “Abrahambe isubigwan Tiusweinuutø pasra tøgagúikkurri nune Tiusbe chi kaig kømíig lataig tabig treeg asha pasrig kuig køn” cha. ¹⁰Inchen ¿tru treeg mara kørromarøb urasbe nøbe maig uñen gúig køh? ¿Nøbe circuncidaweig køben gúig køh, kabe circuncidamíig srø gøben gúig kø chindah? Nøbe circuncidaweig køben gømtø, nøbe circuncidamíig srø gøbenbatøsrøwei treeg kørromarig kuig køn. ¹¹Inchen Abrahambe tru isubigwan Tiusweinuutø pasra tøgagúikkurri chi kaig kømíig lataig tabig treeg asha kørromari wendøsrø, truigweimburab tru circuncisiónwane kan siñal, kan sello lataig utig køn. Treekkurri Abrahambe circuncidameelø mayeelø Tiuswan kørebelaimbe nøbe møskain gøn, nømgucha kaig kømeeelø lataig tabig treeg asiilø gømig kønrrai. ¹²Katø Abrahambe tru circuncidailaingucha møskain gøn, tru treegwan ka mariitø gømtø, tru namui møskai Abraham circuncidamíig

køppatøsrøwei nui isubigwan Tiusweinuutø tōga unigu
truwandøwei trappunabelaimbe.

**Tius nō martrab kōrrømisriibe isubigwan
nuinuutø tōgagúikkurri utønrrun**

¹³Kaguende Tius tru treeg tranrrab cha kōrrømisrigwan Abrahamwanba, nuinukkurri karrab misaameranba pirōwan ketig utønrrun chib urasbe, tru maig maramigwan martrai pōra wesruitōga tranmōtō, nō isubigwan Tiusweinuutø pasra tōgagúigu chi kaig kōmíig lataig nō treeg kuigu tranig kōn. ¹⁴Kaguen tru keta tranrrab misrigwan utønrrabeløbe tru maig maramigwan martrai pōrig maig taigwan marøbelø, truilōtō gúig kuimbe, trube, tru isubigwan Tiusweinug pasra tōgagúibe chi tōgagømuingenig kōben, katō tru treeg tranrrab cha kōrrømisrikkucha ka treeg martrab taitō burebsruinrrun. ¹⁵Pōs kaguende tru maig maramigwan martrai pōriibe Tiuswei trōmbøig namig kōbigwan tōgaig arrubig kōn mōrmeelaim balabe. Inchen tru maig maramigwan martrai pōra wesruig chiganuube, kalō marøb itubunab gōmikkucha chigagōn.

¹⁶Inchawei Tius tru treeg tranrrab cha kōrrømisriibe misaamera nōmui isubigwan Tiusweinug pasrikkurri arrubig kōn, trube Tiuswei tru ka yandō ketig kōnrrai. Incha tru Abrahamweinukkurri amrrub misaamerai mayeelaimba maig marigwane mu kōnōgamgaig treeg marig kōrrømisrtrain gúig kōn. Tru maig maramigwan martrai pōrig maig taigwan marøbelaindō gōmōtō, tru isubigwan Tiusweinuutø pasrig Abraham tōgagúigwandøwei tōgarweimbe nōmuingucha kōnrrai. Inchawei Abrahambe Tiusweimburabigu nam mayelai mōskain gōn. ¹⁷Tiuswei wamyu maig chibig pōrig pasraimbala: “Truba yambalø peesrōn, beesrō warōnrrab misaamerai ñune mōskain gōnrrai marar” taig. Tru Abraham kōrewa basraig Tiuswein gabyube Abrahambe namui mōskain gōben, tru Tiusbe kwaitan øsiirangarub, chi marig kaabendō, chabguen marig pōnrrai lataig wamabig, treeg Tius kōn.

¹⁸Chi treeg kōnrraitamab isua muniiramig chigagúingucha, Abrahambe kōrewa, muniirab megaig kōn. Treekkurri truba yambalø peesrōn, beesrō warōnrrab misaamerai mōskai misrig kōn, Tius øyah taimbala: “Ñuinukkurri karrab misaabe øyeeg

nørrø gønrrun” daig. ¹⁹Abrahambe isubigwan Tiusweinug pasra tøgagúigube treeg kòmuptinchaitamab nui asrwan isua, kullaaramuig køn, nòbe yandø kwai lataig kuinaindøgucha. Kaguende nòbe yandø cien años lutauig købig køn. Katø Saragucha ureg tøgagømibe kwai lataitøwein gøbig køn. ²⁰Øyeeg køben Tius tru treeg martrab cha kørørmisrigwane Abrahambe treeg kòmuptinchaitamab isumuig køn. Treeg kømøtø, nui isubigwan nò Tiusweinuutø pasra tøgagúibe masken mur basrønrrai marig pasrøwa, Tiusweyasig maya nuguen tabig marøbig køn. ²¹Abrahambe treeg kønrrab gúi newan isua basrabig køn, Tius treeg martrab cha kørørmisrigwane maramburab maramigwan tøgä Tius kui. ²²Incha nui isubigwan Tiusweinug pasrikkurri Tiusbe Abrahamwane chi kaig kømfig lataig tabig kui asha utig køn.

²³Inchen tru: “Chi kaig kømfig lataig tabig kui asha utig køn” cha pøriibe Abrahamweyasiitø gømøtø, ²⁴namuyasikkucha tøgä børa basrig køn, tru nam chi kaig kømeeleø lataig tabig kui asha Tius utiilø gønrrabelaimbe, tru namui Señor Jesucriston kwailai utugurri katøle øsiirangarub Tiuswan nam kørebelaimbe. ²⁵Cristobe namui kaig mariilaimburø kwanrrai tranig kua, katø nune gatøle øsiirangaruig køn, Tius namun chi kaig kømeeleø lataig tab gúi asiilø gønrrai.

Kaig marig chigar gønrrai yandø tabig kørørmarig

5 ¹Inchawei isubigwan Cristoinug pasra bønrraikkurri chi kailø gømeeleø lataig tabig pønrramig kua, Tiusba chi isumgaig tab pønrramigwan tøgaguer, Señor Jesucristogurri. ²Pøs katø nambe nøgurri namui isubigwan nuinuutø pasriitøgä øyeeg tru ka yandø tabig tranigu kebamba, truyu pønrrøwa, Tiuswei törguegwalmabigwan namgucha tøgagønrrab, treegwan isua muniirab tab gúi mørøb pønrrer. ³Incha øyeetø gømøtø, namun chigøben isumdiig nebuben, katø nambe mayanguen tab gúi kasraarabelø guer, kaguen tru chigøben isumdiig nebui pønrramig arrubiibe maig kuingucha tammay melam gusremig arruben, ⁴tru maig kuingucha melabig melaigugurri arrubiibe, chine pub arrubigu chi gømui lataig pønrrabelø gømig arruben, tru treeg chi gømui lataig pønrrabelø gúigyugurri arrubiibe, tru tøgagømigwane yandø tøgaguen bønrrermab isua bønrramig arrubig kui isubelø

gúig kòppe. ⁵Inchen nam tru tøgaguerma isua munig melaibe, treeg kòmuptincha namun ka isuindø bønrramig kònrrai kòrrømartrabig kòmøn. Kaguende Tiusbe namui manrròwan nui undag kòbiitøga netsøgana basrig kòn, Espíritu Santon namun tøgagønrrai tranikkurri.

⁶Pøs nambe chigucha chi martrabgailø bønrrøben, Cristobe kailayasig kwaig kòn, yandø ke treeg maramig puben. ⁷Tabig sòlgandø uñib moweimburo kan mugøben nò purøbasramisra kwanrrab indamibe purø murig kòn, ke kan larrø tabig marøb moweimburogan pøs kan mube nò purøbasramisra kwanrrab pasramisrøbwei inchibsruitaru gøben. ⁸Trune Tiusbe nui undag kòbig namuyasig tøgagúigwan øyeeg marigu kenamaran, nam kaig marøbelø gøbenbatøsrøwei, Cristo namuimburo nò purøbasramisra kwaigu. ⁹Møimbe yandø Señor Jesúscristoi ani lusiitøga nam chi kaig kòmeelø lataig tabig pønrraig kòppe, møyimbeguende Tiuswei trømbøig namig kòbig namuim bala attrabig pasrabigwan Cristogurri treeg pumønrrai mariilø gømønrrun. ¹⁰Pøs nam Tiuswan ashig kòmui inchib pønrrab urassrøweinguen, nui Nusrkai kwaikkurri Tiusba tammay tabig kòrrømisra pønrramig kònrrai mariilø gúig kòppe, møyimbeguende, yandø nam nøba tabig kòrrømisra pønrrønrrai mariiløbe, nambe kaigyugurri wesrailø gømønrrun Nusrkai øsig kuikkurri. ¹¹Incha gatø iitø gømøtø, nambe Tiusweinug maya nuguen kasrag bønrrer namui Señor Jesucristogurri. Pøs nøgurri nambe Tiusba tru tammay tabig kòrrømisra pønrramigwan møyimbe utig kuig kòn.

Adánweiwanba, Cristoiwanba waminchibig

¹²Pøs kaig mariima kan møkcurrindø yu pirau kebarruben, kwamibe tru kaig marikkurri arrig kòbene, øyeetøwei tru kwamibe maya misagwan puraarrub arrig kòn, kaguende mayeeløba kaig marig kua. ¹³Tru maig maramigwan martrai pørig chigaabenbatøwei, kaig mariibe yu piraube pasrabguen indig kòn. Inchendø tru maig maramigwan martrai pørig kaabene, kaig marigwangucha chi isua asamig kaabig kòn. ¹⁴Treeg kuindøgucha, tru kwamibe Adán tsub urassrøngurri Moiséskatig mayeelaim bala basrøben, mayeealanba kwamig arrig kòn, Tius karua basrigwan kalø marøb itøbunab Adán mari lataitøwei marigwan marmeelaim

balaguen. Adánbe tru wendau attrabigweimbe tre lataitøwein gúig køn.

¹⁵Inchendø Tius nø keta traniiba, tru karua pasrigwan Adán kaig marøb itøbuniibabe treetøwein gømøtø, peg køn. Kaguende Tius karua basrigwan kan mөг kalø marøb itøbunikkurrindø misag truba nørrø kwamima gúibe, treetøguen gømø, Tiuswei tru ka yandø tab indiibe misag nørrø bønrrabelaim bala arrumburab arrig køn, tru Jesucristo kan mөweinukkurrindø ka yandø keta tranig arrubig. ¹⁶Inchagucha Tius tru keta traniibe, tru kan mөøtø kaig marigugurri arrubig lataig kømøtø gøn. Kaguende tru kaig marimburo maig kønrrabigwan asha mariilø bønrramig arrubiibe, kanbalø kalø marikkurrindø arrua, misagwan kailø gúi kørømara pønrrailø gømigwan tøgag arrig køn. Trune Tius tru ketiibe mөгuelø purø nørrø kalø mara bønrrøben, treekkurri arrua, Tiuswein gabyu nam chi kaig kømeeleø lataig tabig pønrramig kønrrai mariilø gømigwan tøgag arrig køn. ¹⁷Pøs Tius tru karua basrigwan kan mөг, nøtø kaig marøb itøbunikkurrindø maya misagweim bala tru kwamig nø garub pasrønrraima, tru kan mөøtø øyeeg mariibe, treetøguen gømøtø, tru Jesucristo, nø kan mөkkurrindø nøm øsig kuigube chigurrimbunø arrubigwan nøm kanawa puraambub amrrun, tru Tiuswei nørrø ka yandø tab indigwanba, tru chi kaig kømíig lataig kømig ketigwanba Tius tranig utabelø.


¹⁸Pøs Tius karua basrigwan kan mөг kanbalø kaig marøb itøbunikkurrindø maya misaameran mөra pønrrønrrai pønrrailø gømima gúibe, katø treetøwei kan mөг kanbalø sølgandø tabig mariitøgatø maya misaameran tru chi kaig kømeeleø lataig tabig kørømisramigwan maran, truibe nөmuyasig øsig kømigwan tøgag arrubig. ¹⁹Kaguende kan mөøtø maig karuigwan mөra marmuikkurrindø misaamera truba nørrø kaig marøbelø gønrrai mara kørømariibe, katø treetøwei kan mөøtø tru maig karuigwan mөra mariibe truba nørrø chigucha chi kaig kømeeleø lataig tabig kørømariilø gønrrun.

²⁰Tru maig maramigwan martrai pøriibe tabigwane tabig kui ashchaimba, kaig marigwane kaig kui ashchaimba asøskønrrab kebarrubene, tru kaig marøb itøbunab gømiibe masken nurab larrøbitsig køn. Tru kaig marig mas larrøbichib nurabene, Tiuswei tru ka yandø tab indiibe treetøguen gømø, purab nuikken

nurab larrøbitsig kòn. ²¹Inchawei tru kaig mariibe misagwan Tiusweinukkurri tarømara, kwamigumay srua ib truig kerriguwan nò garub pasrab lataitøwei, tru ka yandø tab indikkucha tru sòlgandø tabig mariitøga kerriguwan nò garub pasrønrrain gúig kòn, managatig øsig kømigwan tøgais Jesucristo namui Señorgurri.

Kaig marøb melaigugurri yandø wesrailø

6 ¹Trube, treeg købene, ìmandø chinrrab? ÌTiuswei tru ka yandø tab indig mas nurab larrøbichib attraimbe, trube, kabe kaig maramigwan marøbig martrab gøh? ²ìKah! mumaygucha chi treeg kònrraamøn. Kaguende nam kaig maramigweimburappe yandø kwailøbe tru kaig maramigu gatøgucha chinchas øsig bønrrønrrab. ³ìKabe ñimbe ashmeelø gøtirru, nam mayeelø Cristo Jesúswei munchiyu piu umbu ulsrøbeløbe, tru nò kwaigu namgucha nòba kanguegøtø nò gwab lataitøwei mara bønrrain gúi? ⁴Kaguende nambe piu umbu ulsraitøga nòba kanguegøtø sòri latailø gúig kòn,



Romanos 6.3

nø kwaigu namgucha kwanrrab, Møskawei torguegwalmabiitøga kwabelai utugurri Cristo gatøle øsiirawa kurrab lataitøwei, namgucha katøgan srøig peemay øsig amønamiɡwan tøgagønrrab.

⁵Cristo kwaiguma trakkandø kanbalatø nam nøba pønrrain guabe, treetøwei nø øsiirawa kurrigugucha nambe øsiirawa pønrramig kønrrun. ⁶Kaguende nambe ashibelø guer, tru nam trendø kaigwan tøga gal-laig tru køllig namui umbu pasrabigwane Criston tru kurusy mesrøben, tøga mesrøb lataig marigwan, tru namui umbu kaig martrai isungarubigwan pinisaig kønrrai, nam kaig maramigutø melabig melamig kømønrrai. ⁷Kaguende yandø kwabiibe, treeg kaig marøb megamigugurrimbe treeg marmønrrab webya basran. ⁸Pøs namgucha Cristoba kanguegøtø kwab lataitøwei marabe, katø nøba øsig burramigwangucha purramig kønrrab gúi isua bønrrer. ⁹Kaguende nambe ashibelø guer, Cristobe kwabelai utugurri katøle øsiirawa, yandø kurrikkurrimbe katøbe yandø mana kwamønrrabig køben, tru kwangarub pasrabiibe yandø nune katøbe chigucha martrab gaimanrrab gúi. ¹⁰Cristobe kwappe, tru kaig marigweimburab kan bijitø managatiɡweyasig kwawa, katø mõi øsig wappe, Tiusweyasig øsig wan. ¹¹Inchawei treetøwei ñimbe kaig maramigweimburappe yandø kaig marmønrrab kwailø guermab isua bønrray. Inchendø Tiusweyasiibe Cristo Jesúsba kanbalatø pønrraikkurri øsiguelø guermab isuague.

¹²Trube, treeg købene, tru kaig maringarub pasrabig tru ñimui patsønrrab asru nø garub pasrønrrain gømøtø gúiɡ, tru kaig marøb købig arrubigwan ñim tru gúindø maramig kømønrrai. ¹³Katø ñimui asru tasiimera, srøbmera, øyeelø chine tøgagúilan kaig maramigweyasig tranrrab inchib pønrrømøtay. Treeg kømøtø, masken ñimbe kwailø latailø gua, katøle øsiirawa latailøsun Tiusweyasig tranrrab inchib, ñimui asru chi pønrrabigwane trurrawa sølgandø tabig marøb gømigweyasig tranrrab inday. ¹⁴Pøs tru kaig mariibe ñimune yandø nø garub pasrømønrrun. Kaguende yandø ñimbe tru maig maramigwan martrai pørig truig karuig melømøtø, Tius nø ka yandø tab indig truig karuin bønrran.

**Møimbe yandø kaigwan gømø, tabig
maramigwan marøb melabelø.**

¹⁵¿Trube, treeg købene, mandø inchab? ¿Tru maig maramigwan martrai pørig truig karuig melømøtø, Tiuswei tru ka yandø tab indig

karuig pønrraig kōppe, kabe kaigwan marōb gōnrrab gōh? iKah! mumaygucha chi treeg kōnrraamōn. ¹⁶¿Ashmeelō gōtirru, ñimma mungōben nō maig karuben treeg karui mōrōb melōrrumōn cha melamisrabe, nō maig karuben ñim mōra marōb melai mōwaimbe nō karuindiig melamig kōbig kuin gúi? Pōs, tru kaig maramig nō garub tōga basraibe kwamigumay srua iben, Tius maig karuigwan mōra marig truig karub tōga basraibe Tiusba tab pōnrramigumay srua ibig kōn. ¹⁷Inchendō Tiuswan mayanguen ungwa, ungwa chinrrab. Pōs ñimbe merrappe tru kaig marig karuindō melabelō guagucha, tru tabig kusrenanigwan ñim maig utig kōben, treeg marōb gōmigu pōnrramisra, ñimui manrraugurri newan isua treegwan mōra marig kōn. ¹⁸Ñimbe kaig marigugurri yandō wesrailō gua, mōimbe ñimbe tru sōlgandō tabigweyasig karuindō melōnrrabelō misrin gōn.

¹⁹Nabe waminchippe, misaamera wamindimay waminchar, kaguen ñim misaamera gúig kōppe, isuigu kullaguelō gúimba. Pōs tru merrabwanma ñimui asru tasiimera, srōbmera øyeelō chine tōgagúilan kōsōngōnrraptiigweyasig treegwandō, treegwandō gatōguchinguen, gatōguchinguen trōmbōig marōb gōmima gúibe. Mōimbe treetōwei ñimui asru chine pōnrrabigwan tru sōlgandō tabig marōb gōmigweyasig treegwandō marōb gōmig tranrrab inday, ñimuyasiitōwei Tiusweindō tarōmarig pōnrramig kōnrrai.

²⁰Pōs tru ñim kaig maramigu trutō rrutō marōb gōb urasma tru sōlgandō tabig maramig ñimun truig nō garuimíig amōñibelō gúig kōn. ²¹¿Inchen tru kaig marigugurrimbe tabiibe chi wesrawa bōnrrōgue? Mōi yambalasrōmbe ñimune kōrikken gúim bōnrramitō gōn. Pōs truike srabebe ka kwamitōwei srua arrubig kōn. ²²Trune mōimbe ñimun kaig marōb melaigugurri yandō wesrailō, Tius karuindō melabelō misrikkurrimbe, Tiusweyasiitō tarōmarig bōnrramig tōgagōn. Inchen truikkurri arrubiibe tru managatig øsig kōmig, truig kōn. ²³Kaguende kaig mariibe tru kaigwan marimburo nō tranōppe, kwamigwane rranan. Trune Tius keta rraniibe managatig øsig kōmig, truig kōn, namui Señor Jesucristoba kanbalatō pōnrraigu.

Kasharawarmera maig kōben, treetōwein gōn cha wamindig

7 ¹Nai nunelō, tru maig maramigwan martrai karuigwan ashibelan nabe waminchar. ¿Ñimbe ashmeelō gōtirru, tru maig maramigwan martrai karuibe kan mōwane øsig unamnegatiitō nō

tøga basrabig kui? ²Kaguen kan kasharawa ishuwanma tru maig maramigwan martrai pasribe keeba nørø gønrrain gømø, kandø mara tøgagøn keg øsig wamnegatiibe. Inchendø yandø keg kwabene, tru pørig nui keeba nørø gønrrain gømø, mara kørømarig købigwane nøbe yandø truburappe chi asamikkaig kørømisran.

³Inchawei keg øsig wamne, katøgan møøba kasharabene, truigwane ‘kewan itøluløptø ishug køn’ cha, nune treeg wamig kørømisrtrun. Inchen nui keg kwabeneguende, tru maig maramigwan pasrig nui keeba nørø gønrrain gømø, kørømarig købigwane, yandø nøbe truburappe, chi asamikkaig kørømisran. Katøgan møøba ya, kasharaingucha, yandø kewan itøluløptø ishug kønrraamøn.

⁴Katø treetøwei ñim, nai nuneløgucha, Cristoi asruelø guíkkurri tru maig maramigwan martrai pørigweimburappe ñimbe yandø kwai latalø kørømisrig kuig køn, tru katøganwei misra pønrrønrrab, Cristo tru kwailai utugurri øsiirabigwei, nam øyamay Tiusweyasig tabig marøbelø gønrrab. ⁵Kaguende trendø kaig marøb asr namun nø garuim bønrrab urasbe, tru maig maramigwan martrai Moisés pørigu kaigwan marmønrrai tru mera basriibe namune kaigwan martrab isunrrai masken kiagasrønanen, tru kaig marøg købiibe namui asru marøb pasrabig køn, namun øyamay kwamigumay srua inrrabigweyasig marøbelø gønrrai marøb. ⁶Inchendø mømbe tru Moisés pørig nø garub tøgagúigweimburappe nambe yandø kwaikkurri, nambe truigweimburappe chi asamikkar gørrømisrig køn, Espíritu Santoinug peemay øsig kømig srøizhigu nam Tiusweyasig marøb melamig kønrrai, tru maig maramigwan martrai merrabsrø køllin børigu gømøtø.

Tabigwan martrab inchen kaigwan martrai inchibig namui umbu pasrabig

⁷¿Trube, treeg købene, mandø chinrrab? ¿Tru maig maramigwan martrai pøriibe kaig marøbig kønrrab gø chindah? ¡Kah! mumaygucha chi treeg kønrraamøn. Kaguende tru martrai pørig kømuimbe, kaig mariibe maig købig kuin guí nabe nebua ashmubsrubrainrrun. Pøs tru maig maramigwan martrai pørig: “Mendaigweiwane chull asamig kømøn” cha, trenchimuig kuimbe, trube, tru mendaigweiwan chull asamibe kalø gøbig kuig nabe nebua ashmubsrubrainrrun. ⁸Inchen kaig maramibe

tru øyeeg marmønrrai karua basrinug nø guelula, basramisra, nane chigurrimbunø chull ashib pasramig kønrrai nane masken isunrrai kiagasrønang køn. Kaguende tru maig maramigwan martrai pørig chi gaabene, tru kaig mariibe chi martrabgaig, kwaig lataig køn. ⁹Tru maig maramigwan martrai pørig maig maringaruigwan merrabsrø chigaig køppatøbe, nabe øsiguig købig kur. Inchen tru maig maramigwan martrai pasrig arrubene, tru kaig maramibe nainuube ke øsiirab lata inchen, nabe kwai lataig kørrømisrinabig køn. ¹⁰Pøs tru maig maramigwan martrai pøriibe tru øsig kømigumay pera inrrabig kuig købendøbe, nane masken kwamikken gønrrai marøptinndan. ¹¹Inchen kaig maramibe tru maig maramigwan martrai pasrinug nø guelula, basramisra, nane purø may guebenørka, tru karua basriitøga nane kwaig lataig mara, Tiusweinukkurri tarømartan.

¹²Inchawei tru maig maramigwan martrai pøriibe newan tabig køben, katø tru martrai karua pasriibe newan tabig, sølgandø maig maramigwan marøbig, tabig køn. ¹³¿Trube, tru treeg tabig købendøbe nane kwamig kønrrai marøb pasra chindah? ¡Kah! mumaygucha chi treeg kømøn. Treeg kømøtø, tru kaig mariibe tru tabig martrai pørigwan nø merrarrowa marøb pasraitøga nane kwanrrai mara, øyamay kaig mariibe kaig marigwein gøbig kuin gúi ashchai kenamarig køn. Inchen tru maig maramigwan martrai pasriibe tru kaig marigwane newan kaig købig kui kenamaran.

Møøbe kullaguig køn

¹⁴Pøs tru maig maramigwan martrai pøriibe Tiuswei newan tabigweimburabigwan nambe asamig køben, trune nabe asr mumay srua iben treeg kuinawa, trumay isumøtø, kaig marigu trunundø, rrunundø marøb meganrrai yani lataig kur. ¹⁵Pøs natøweinguen na marøb pasraigwane ni mandø gúinguen mormuinatan. Kaguende na marinrrabna indigwane marmubendø, tru tsalø gømdiig na marmønrrab isuigwane, trube, marøptø marinabig køn. ¹⁶Pøs tru nai isub kebachibigu kalø gúi mørendø, na trunun marøptø marinaig købene, trube, tru maig maramigwan martrai pøriibe chi kaig kømøtø, nabe truigwane tabig kui asha basrar. ¹⁷Pøs treeg købene, tru treeg kaig marigwane yandø narre marøb pasrømøtø, tru nainug kaig martrai inchib pasrabig, truirre marøb pasran. ¹⁸Pøs Tiusba gømiibe trendø na kaig kuinaigube

chigucha tabiibe pasrømuin gúi ashar nabe. Kaguende tabigwan nabe martrappe isuinabendø, truigwane martrappe kaimainatan.

¹⁹Pøs tru na mariibe tru tabig martrab isuigwan marmøtø, tru kaigwan marmønrrurmab isuigwane marøptø marinatan.

²⁰Inchawei tru na marmuinrrabna indigwan na mariibe, narre marig kømøtø, nainug kaig martrai inchib pasrabig, truirre marøb pasran.

²¹Inchawei nainug kaig martrai inchib pasrabig købig kuin gúi nebua ashar, nabe tabigwan martrab indingucha, tru kaig maramibe nainuube nømerrig, nømerrig basrabig kuin gúi.

²²Kaguende nabe nai umbube truba rruba tab gúi mørøb kasraarar tru maig maramigwan martrai Tius pasrigu kaigwane marmub, tabigwane marøb indamigwan nebua asha. ²³Inchendø nai asru tasiimera, srøbmæra øyeeg chine pønrrabigu øyeegwan martrai inchibig katøgan nuin gúi nainug kaig maringarub pasrabig kuin gúi ashar, tru nai turtrawa isugu maringarub pasrabig tabig karuigwane marmønrraingøba inchib pasrabiiba kwayab, tru nai asru chine pønrrabigu kaig maringarub pasrabig, truig køn, tru nan iløsrka meganrrai nø merrarrowa srua ibig.

²⁴iKarregucha gúita kan na waachawane! ¿I tru kaig maringarub pasrabig kwamigumay srua ibigugurrimbe nane mu wesranrrerah? ²⁵iPøs Tiuswan mayanguen ungwa, ungwa char, namui Señor Jesucristogurri nan wesranrrab gúi! Inchawei natøweinguen nai turyu isuitøgabe Tius martrai karua pasrigu isub megainabendø, tru na trendø kaig kuinaitøgabe kaig martrai karua basrigu marøb megainatan.

**Tiuswei Espiritu maig kønrrain gøben amønibeløbe
yandø tabigu webamba bønrran.**

8 ¹Inchawei mømibe Cristo Jesúsba kanbalatø pønrrabelaimbe møra melønrrai maramibe yandø chigaagøn. ²Kaguende Espiritu tru martrai karua pasrig øsig kømig Cristo Jesúsweinug pasrabiibe, tru kaig marøbig kønrrai indamba, kwamig kønrrai indamba tru martrai karua pasrig treeg inchibigugurri nane wesruig køn. ³Kaguende tru maig maramigwan martrai Moisés pøriibe truburab martrab gaimaigwan Tiusbe marig køn, pøs tru pøriibe yandø truburab martrabgaig køben, tru namui trendø kaig kuinaigu truikkurri. Inchen Tiusbe nui trag Nusrkai

managuen kaig marmfigwan kan kaig marøb mөг kui lataig, kaig mariilaimburø kwanrrai øra, øyamay tru kaig marøb gөmig namuinug maringarub pasrabigwane chinchaingaig kөrrömara basran, ⁴tru maig maramigwan martrai pөrigu sølgandø maig marøb gөmigwan karuilø namuinug marig kөrrөmisrtrai, tru namui trendø kaig kuinaigu marøb amөнainug kөmөtø, tru Espíritu Santo maig kөнrrain gөben marøb amөнibelainug.

⁵Tru trendø kaig kuinaigu treegwan marøb amөнibeløbe, ka truburabigwandø isuben, trune tru Espíritu Santo maig amөнinrrai inchen treegwan marøb amөнibeløbe, Espíritu Santoimburaigwan isubelø gөн. ⁶Inchen tru trendø kaig kuinaigu isub pasraibe Tiuswan tarөmisra, kwaig lataig pasraig, treeg kөben, trune Espíritu Santo maig kөнrrain gөben treegwan isub pasraibe srөг øsig kөmiba, Tiusba chi isumgaig tab gөmiba, treeg kөн. ⁷Pөs tru trendø kaig kuinaigu treeg isub tөгa basraibe Tiuswan tsalø isub pasran, kaguende Tiuswei tru maig maramigwan martrai karuilan mөra martrab inchimөwei, katø truilan martrab gaimabwei indig kua. ⁸Incha tru trendø kaig kuinaigu isubig maig karuben treegwan mөra marøb amөнibeløbe, Tiuswane tab gúi wanrrai martrab gaiman.

⁹Inchen ñimbe tru ñimui trendø kaig kuinaigu isubig maig karuben treegwan mөra marøb amөнibelø gөmөtø, Espíritu Santo maig amөнinrrain garuben treeg amөнibelø gөн. Treetөгucha Tiuswei Espíritu ñimuинug pasrөbene gөнrrun. Pөs mөikkөben Cristoi Espíritun chigaibe, Cristoin gөmөн. ¹⁰Inchendø Cristo ñimuинug pasraikkurrimbe asrbe kaig mariilөгurri kwamig kuindөгucha, Tius nөba ñimun kaig marmeelø lataig tabig kөrrömara pөnsraikkurri, ñimui espíritube øsig basran. ¹¹Inchen Tiuswei Espíritu Jesúsuan kwailai utugurri katøle øsiirangarubig ñimuинug pasrөbene, Criston kwailai utugurri tru katøle kusrubiibe ñimui ka pinөнrrab asrmerangucha tru nui Espíritu Santo ñimuинug pasrabiitөгa øsig kөmigwan tranrrun.

¹²Inchawei, nai nunelø, nambe uløbe bөнrrөbendø, tru trendø kaig kuinaigu tru kaig maramigwan ulөгucha bөнrrөmer, truig maig marөг kuinchen marøb pөнrrөнrrab, ¹³kaguende tru trendø kaig kuinaigu isubig maig karuben treegwan marøb amөнäbe, ñimbe kwanrrun Tius malø asamikkaig. Inchendø tru ñim asru kaig marøb tөгa bөнrraigwan Espíritu Santotөгa

kwai lataig kōnrrai kōrrōmarabe, ñimbe managatig Tiusba øsig kōnrrun.

¹⁴Mayeelōba Tiuswei Espíritu maig amōñinrrain gōben truwan ambubelōbe Tiuswei ureemera gōn. ¹⁵Pøs ñim Espíritu Santon utiibe ke larrō gwaarōsra srua gúilō lataig kōrig kuindō katōle treeg melōnrrai marōbigwan uta bōnrrēmōtō, kan trag ureemera lataig kōnrrai marōb Espíritu Santon utig kōn. Incha nambe nōgurri Tiuswan: “Abba, nai Mōskain” chib wamabelō guer. ¹⁶Inchen tru Espíritu Santotōwei namui espíritune eshkabig kōn, nambe Tiuswei ureemera gúi. ¹⁷Trube, nam nui ureemera gúig kōppe, nō keta tranamig tōgagúigwangucha utōnrrabelō guer, Tius tru keta tranamigwan nam utōnrrabelō gōb, katō Cristo utigwan namgucha kanguelarrōtō utōnrrabelō gōbgue. Pøs ka yandō gōmō, cierton nun chine nebuinab megaigwan namgucha chine puraambub melōwabe gōn, nōba kanbalatō tōrguegwalmabiisrō purramig kōnrraimbe.

Tru purō tabig wendōsrō attrabig

¹⁸Pøs mōin gwalōm nam chine kaig nebuinab melaibe tru tōrguegwalmabig namun kenamarig kōnrrabiibabe, ni kan ‘øyeeg kōn’ cha waminchibguen wamindamgaig purō nuig kōn. ¹⁹Tius chigurrimbunō mara pōnsrailōbe truba rruba ashig kui muniirab gōn Tiuswei ureemera tōrguegwalmabelō kenamisramigwan. ²⁰Kaguende tru chigurrimbunō mara pōnsrailōbe øyeeg mumayguen tab pumuig pōnrramig kōnrrain gúig kōn, nōm treeg pōnrrōnrrab indikkurrin gōmōtō, Tius nō trendō treeg kōnrrai marikkurri. Inchendō treetō gōrrōmisrtrain gōmōtō muniiramigwan tōgaig marig kua, ²¹tru chigurrimbunō mara pōnsrailōtōweinguen minchib trerab inrrai marigugurri mas treramōnrrai wesrailō gōnrrun, tru Tiuswei ureemera purō nuig purō tabigu webamba pōnrraigu truilōgucha pōnsrailō gōnrrab.

²²Pøs tru chigurrimbunō mara pōnsrailōbe mōin gwalōmgatig kan ishuumisag unō tammisrtrab truba rruba mullib pusrkwai inchib lataig indi aser. ²³Pøs tru treeg tab gōmui pōnrrappe, tru chigurrimbunō mara pōnsrailō truilōtō gōmōtō, Espíritu Santon namun pōlbasra tranigwan uta tōgarmera namdōweinguen namui umbu truba rruba mullib pusrkwai inchib lataitōweim bōnrrer, Tius tru namun nui trag ureg lataig mariilō gōmigwan

truba rruba muniirab, tru namui pirau asrmeran kaigyugurri wesruilø gømigwan. ²⁴Kaguende treeg kønrraitamab isua muniirab melaigu kaigyugurri wesruiø bønrrer. Pøs tru nam muniirab melaigwan nam chab ashaguen bønrraimbe, trube, tru muniirab melamigwane chinchab muniiramubsruiinrrun. ¿Kaguen yandø chab ashaguen pønrraigwane chiwan muniiraiasamørra? ²⁵Inchen nam chi nebua asiimíigwan ke tøgagønrrurmab isua muniirab meløwabe, munig melabiitø munig meler.

²⁶Katø treetøwei Espíritu Santobe namui kullag kuigu purugubig køn. Pøs nambe Tiusba wamindigu chi wamindam gúinguen mørmuben, Espíritube namuimburo nø purøbasramisra miappe, wamdøgabe ni mandø chibguen miamgailan truba rruba nu israb miabig køn. ²⁷Inchen Tius namui manrrømeran maig køtashchab umbusrøngue tab ashibiibe, Espíritu Santo nø maig isua basraigwan ashibig køn. Kaguende Espíritube Tius maig kønrrain gøben, trumay Tiuswei misaamerai purøwaminchib miabig køn.

Tius namun kaigyugurri wesranrrab øyeeg marig

²⁸Tiuswan undaguelaimbe chitøgucha pub arrubiibe tabguen gønrrai Tiusbe treeg marøbig kui nambe ashibelø guer, tru nø martrab isua tøgagúig truig maig køben trumay treeg wamiilaimbe. ²⁹Tius tru manasrøwei nø asiilane manasrøwei kanmaytø lawa wesrabgucha wesraig kuig køn, nui Nusrkai maig køben, treeløtøwei misrtrai, Nusrkaimbe truba nørø nunelø mayelai utu nømerrig kønrrai. ³⁰Incha tru manasrøwei kanmaytø treelø gønrrai lawa wesrailane gatø nøbe nui misaamera misrtrai wama, katø tru nø wamiilane chi kaig komeelø lataig tabig pønrrønrrai mara, tru treeg tabelø gønrrai kørømmariilane nui torguegwalmabigugucha tøgatø pønrrønrrai marig køn.

³¹¿Trube, iibe øyeeg købene, nambe mandø chinrrab gøh? Tiusbe namuingatø basrøbene ¿namune mugøben sötøbasramisrøb gurringucha, chigúin gønrrautah? ³²Tiusbe nui trag Nusrkawanguen namun tranmønrrab inchimøtø, nam mayeelayasig kwanrraima traniibe, ¿chigurrimbunø tranamburab namun tranamigwangucha tranmønrraitarru, Nusrkaimba guegøtø? ³³¿Tius nø lawa wesruilane mu gúi ‘øyeeg, øyeeg kaig marøbelø gøn’ chinrrautah? Pøs, chi kaig komeelø lataig tabig pønrsrøbiibe, Tius, nø gøn. ³⁴Trube, ¿kaigyu pønrrønrrai, mu pønrsønrraitama

chindah? Pøs Cristo Jesúsbe mana rreeg martrab gø. Kaguende nøbe kwawa, katø trutø gømtø, nøbe katøle øsiirawa, Tiuswei kusrmaygatø wan, katø namuyasig purøwaminchib. ³⁵¿Cristoi undag købigugurri namune mu gúi tarømartrab gø? ¿Chine isui melamig pub arrubiiteh, kabe chigøben murig pui melamig arrubiiteh, kabe kaig indinab melamig arrubiiteh, kabe mamig kaagøbig parø arrubiiteh, kabe asru kemig chigucha kaagøb arrubiiteh, kabe chigøben kørig kømdiig pub arrubiiteh, kabe kweecha betiilø gømig arrubiiteh? ³⁶Pøs Tiuswei wamwan pøriguma trenchibig køn:

“Nambe ñigurri chu urastøgucha kwaitø, kwaitø meler cha.

Namune ubishameran kweetsamsrømay srua ambamig kui lataig mara tøgagúilø guer” cha.

³⁷Inchendø chigurrimbunø øyeeg pub arrubigu chinchangaig kanawa webamba bønrrer, tru namun undaarabikkurri. ³⁸Pøs Tiuswei undag købigwane ni chigucha tarømartrab gaimanrrab gúi nabe asha basrar, kwamig lata, øsig kømig lata, ángelesmera lata, nøm asha garub pønrrabelø lata, møin gwalømig lata, katø wendø attrabig lata, katø maramburab marøb pønrrabelø lata, ³⁹purø balasriig lata, purø umbusriig lata, chigurrimbunø Tius mara pønrsailøyu købeløbe møikkucha namune chinchagucha tarømartrab gaimanrrun tru Tiuswei undag købig namui Señor Cristo Jesúsweinug pasrabigugurrimbe.

Tius Israelwan lawa wesraig

9 ¹Na Cristoinug pasrawa cierton waminchar. Nabe isa waminchimur. Tru nai isub kebachib pasrabiibe Espíritu Santogurri isa gømmø, treegwein gúi eshkatan, ²tru nai manrraube truba nu isui basrab chu uraskucha nabe pusrkwai isuin basrabig kui. ³Pøs nai misag israelitasmera, nai nunelø nammisamera, nøm Criston yeeg kaashene, nøm kaigyugurri webamrrai nane Cristoinukkurri tarømisra, Tius trømbøig nebunrrai pasrigu naasiitøweinguen truyu pasrønrrab indamdiig kuimbe, treeg maramdiig køtan. ⁴Truiløbe Israelweinukkurri amrrub misamera, nømbe Tiuswei trag ureemera gønrrai kørrø mariilø, Tius nui torguegwalmabigwan kenamarig lata, Tius nømbe tru acuerdomera mara kørrø misriilø lata, tru maig maramigwan martrai Moisés pørigwan utig lata, Tiusweiwan marøb tulundzuni

yau nun mandø tabig marøb gømigwan eshkaig lata, katø Tius trannrrab kørørmisriilan tranamig lata nømunwei traniilø gøn nømbe. ⁵Tru merrabsrø kølli misaamera nørreeløbe nømuin gøben, katø Cristo møg lataig misra arriibe tru misaamerayugurri arrig køben, Cristobe, nø Tius chigurrimbunø købigweim bala pasrabig, imanagurri managatig mayanguen tab indig køn! Treeg kønrrun.

⁶Pøs Tiuswei wambe treeg kønrrabigwan martrab gaimaig kømøtø gøn. Kaguén Israelweinukkurri amrrub misaamerabe mayambagucha nømbe Tiuswei misaasunelø gømøn.

⁷Maya Abrahamweinukkurri amrrub misaamera guagucha, mayambagucha nui ureemera gømøn. Treeg kømøtø, Tiusbe Abrahamwan trendaig køn: “Nuinukkurri karrab misaamerai utu Isaackurri larrøbichib ambubelandø Abrahamweinukkurri amrrub misaamera cha, wamiilø gønrrun” cha. ⁸Pøs øyeeg chippe, tru Abrahamwei misagugurri amrruitøgatø Tiuswei ureg kønrrab gømøtø, Tius tru trannrrab kørørmisri unø Isaackurri larrøbichib amrrub ureemerabeguende Abrahamweinukkurri amrrub misaamera gúi asiilø gøn. ⁹Kaguende Tius tru trannrrab kørørmisriibe Abramwan øyeeg taig kuig køn: “Øyan gwalømmerawan na arruben, Sarabe kan nusrkai tøgagønrrun” cha.

¹⁰Katø treetø gømøtø, Rebeca ureg tøgagúiløma kan møskaindø tøgarmera gøbig køn, tru merrabsrø namui møkai Isaacwei.

¹¹Inchawei tru pa ureemera tru urastø parchig kal-lanrrabelø kal-lamøwatø, tru ureezheelø tabig marig kawei, kaig marig kawein gøbenbatøwei, Tius nø tru martrab isua tøgagúig pasramisrtraimbe nø lawa wesruigu, trumay gønrrai indig køn, ¹²kabe chigøben tabig maragurrin gømøtø, Tius tru lawa wesrua wamikkurrin gønrrai. Pøs Tiusbe Rebecane trendaig købig køn: “Tru srøsrø gal-labiibe wendau gal-labigweyasig karuig marøb meganrrabig køn” cha. ¹³Tru Tiuswei wamwam pørigu maig taimbala: “Jacobwane nabe undaarappe, Esaúwane tsalø indig købig køn” daig.

¹⁴Trube, treeg købene, ¿mandø chinrrab? ¿Tiusbe sølgandø tabig marmíig køn, chinrrab gø chindah? ¡Kah! mumaygucha chi treeg kømøn. ¹⁵Kaguén Tiusbe Moiséswane trendaig købig køn:

“Nan mun lastima ashig køben,
truigwan lastima ashib,
nan mun tab inchig køben,

truigwan tab indamønrrun” cha.

¹⁶Inchawei treeg købene, Tius tru lawa wesruig kømibe møg nø treeg kønrrab isuigu gømøwei, kabe møg nuinetø treegwan nebunrrab inchib megawa gømøwein gøn. Treeg kømøtø, Tius lastima asiitøgatø gøn. ¹⁷Pøs Tiuswei wamwan pørigube Faraónwanma Tiusbe trenchibig køn: “Øyeeg martrab ñune rey gønrrai kusraig køn cha, ñi øyeeg inchib pasraigu tru nai maramburab mariilan kenamartrappa, katø nai munchiwan pirø muba kuimbura nan mu gúi nebua asig kønrrai martrappa.” ¹⁸Inchawei Tiusbe mun lastima ashig køben, truigwan lastima ashib; møigwei manrrøwan gøben murig marøg købene, murig marøb inchibig køn.

Tiuswei lastima asiiba, nui namig købiiba

¹⁹Pøs ñimui utu møibe nane trenchinrraabe: “Trube, treeg købene, ðkatøgucha Tiusbe namune chindimbarre kailø gøn dah? cha. Kaguende ðnø martrab indigwane mu gúi treeg marmønrrai indiasamørra?”

²⁰¿Ñi, møøbe, mu gurmagu? Tiuswan: “¿Øyeebe mumay margu?” chib wamincha mørtrappe. Kabe kan pirøgøtsøma tru marøbigwan øyeeg chinrrautah: “¿Chindimba nan øyeeg margu?” cha. ²¹¿Chilliitøga chigøben marøbiima tru chilliitøgatøwei kan gøtsøne tabigutø katørab srua gømig marøppe, katøgan gøtsøne chiyugøben katørab srua gømig nun maig maramdiig køben treeg maramig kømuitarru?

²²Inchippa Tiusbe nui namig købigwanba, katø nui maramburab marigwanba kenamartrab inchib weig køppeendi, tru manasrøwei kaigu pønrrønrrab amrrai tamariilø nun yeeg namig kømødø misaameran yeeg tammay awentab. ²³Pøs kabe Tiusbe nui tørguegwalmabigu chine nørrø købigwan tru nø lastima asiilan kenamartrab indig køppeendi, manasrøwei nø tamariilan tru tørguegwalmabigweyasig. ²⁴Inchen tru wamiiløbe namgucha guer. Pøs tru nam wamiiløbe, judíosmerai utugurrindø wamiilø gømøtø, judíos kømø misaamerai utugurringucha wamiilø guer. ²⁵Katø Oseaswei pørigu Tiusbe trenchibig køn:

“Nai misag sötø gømeelan: ‘Nai misaamera gøn’ damønrrun cha.

Undaaraimíig købigwan: ‘Undaaraig’ cha, wamamønrrun cha.

²⁶ Katø tru: ‘Ñimbe nai misaamera gømøn’ chib pasrainuutøwei:

Ñimbe: ‘Øsig Wab Tiuswei nusrkalo gøn’ chib, wamiilo
gønrrun” daig køn.

²⁷ Israelitasmeraimburab Isaiasbe trenchib trasaig købig køn:

“Israelweinukkurri amrrub misaamera nu gøptø,

maryu kan pisrum lataig købendø,

nui misagugurri kan lamø kørørmisrøbiitø

kaigyugurri wesrailø gømigwan tøgagønrrun cha,

²⁸ kaguende Señorbe yu pirau øyeeg nebuiløgucha warøbash cha,
nø trencha pasrigwane petø kanmaytø newanig martrun”
chib.

²⁹ I wendauigwan trenchimøwatø, mas merrabsrøwei Isaiasbe
nøtøwei trendaig købig køn:

“Señor, Mayeelaim Bala Pasrabig,

tru nam israelitasmeran srøig larrøbichib kurrønrrai

kørørmarmuig kuimbe,

nambe Sodoma lataitøwei nebuilø gøb,

Gomorra lataitøwei kerriguwan pinisailø gøbsrubrainrrun”
cha.

Judíosmeraba, Tiuswei tabig srø wamba

³⁰ ¿Øyeeg købene, trube, nambe mandø chinrrab gøh?

Judíos kømø misaamera tru chi kaig komeelø lataig Tiusba tab

pønrramigwan nebunrrab chi tranrrømeeløguen treeg Tiusba

tabig pønrramigwan nebuig køn, tru isubigwan Cristoinug pasra

tøgagúikkurri. ³¹ Trune israelitasmera Tiusba tab pønrramigwan

nebunrrab maig maramigwan martrai pørigu maig taigwan tru

gúindø martrab tranrrabeløguen, tru truigwane chinchu nebua

tøgagønrrab gaimaig købig køn. ³² ¿Chindimba? Kaguende tru

isubigwan Tiusweinug pasra tøgagúigu lamøtø, chigøben tabig

mariitøga nebunrrab inchibelø gøn. Incha tru “srurrengwam srugu”

srurrengwaig købig køn. Tru sruube Cristo nøm kaasig, truig køn.

³³ Pøs Tiuswei wamwan pørigube øyah chibig køn:

“iAu! Nabe tru Jerusalén Siónsrø kan srug srurrengwangerubig
trarramønrrun cha,

kan srug tru misagwan kørørsrkønrrabig.

Inchen nun kørebiibe chi køriimisra gørørmismønrrun” cha.

10 ¹Nai nunelø, na nai manrrau truba isuiba, nai Tiuswan na truba miab wamindiibabe israelitasmera kaigyugurri wesrailø gønrraimab isua inchar. ²Pøs nabe nømuimburappe, ‘treeg køn’ cha, tømærb wamindamønrrun. Nømbe Tiusweiwane truba rruba marøb meløbendø, Tius nø maig martrain gúigwane chigúi mōra marøb pønrrømøn. ³Pøs misaamera mandø incha Tiusba tab pønrramig Tius nø mara basrigwane israelitasmerabe ashmeelø misra, tru Tiusba tab pønrramigwane nøm marøb tøgagúigu ke treeg nebunrrab inchibelø guabe, tru chi kaig kōmeelø lataig tabig pønrramig Tiusweinukkurri arrubig maig køben, treeg mōra martrab inchimeelø gøbig køn. ⁴Kaguende tru maig maramigwan martrai pørigwan øyangatiitø gønrrai mara basrøbiibe, Cristo, nø gøn, mutøgucha isubigwan nuinug pasrøbigwane Tiusba tabig kørørmisra pønrramig kønrrai.

⁵Tru chi kaig kōmeelø lataig Tiusba tab pønrramig maig maramigwan martrai pørig maig taigu gømigwane Moisésbe øyeeg cha børig køn: “Møikkøben øyeeg karua pønrrailan marabeguende, truikkurri øsig uñchun” cha. ⁶Trune tru isubigwan Tiusweinug pasra tøgagúikkurri Tiusba tab gørrørmisra pønrramigwan waminchibiibe Tiuswei wamwan pørigu øyeeg chibig køn: “Ñui manrraube øyeeg cha, mormōta cha: ‘¿Srømbalasrømaybe mu nebinrrerah?’ cha, Criston kørattrai inchib lataig. ⁷Kabe: ‘¿Tru purø umbusrø mu gørrainrrerah?’ cha, tru kwabelø pønrraisrø truilai utugurri Criston nebattraí inchib lataig.” ⁸Treeg chib gunrriibe, trube, ¿Tiuswei wamwan pøriibe mandø chibig køh?: “Tiuswei wambe ñuim bulu, ñui trigu, ñui manrrau basran” dan, tru isubigwan Cristoinug pasra tøgagøm wam, i tru nam øyeeg eshka kusrenanig: ⁹Ñi ñui triitøga: “Jesúsbe Mayeelaim Bala Nø Garub Pasrabig køn” chib, katø Tiusbe Cristone kwailai utugurri kusraig købig kuin gúi ñui manrrau køreb inchabe, ñibe kaigyugurri wesraig kønrrabguen cha. ¹⁰Kaguende tru chi kaig kōmíig lataig tabig kørørmarig kōmigwan nebua tøgagømibe, manrrau køreitøga gøben, katø kaigyugurri wesraig kōmigwan nebua tøgagømibe, triitøga: “Jesúsbe Mayeelaim Bala Nø Garub Pasrabig køn” daigu gøn.

¹¹Pøs Tiuswei wamwan pøriguma trenchibig køn: “Mutøgucha Tiuswan kørebeløbe chi kørig misra gørrørmisrmønrrun” cha.

¹²Kaguende judíosmera lata, judíos kōmeelø lata, møitøgucha chi

peg kɔnrab gɔmɔtɔ, treetɔ gɔn. Pɔs tru Señortɔwei mayeelaim bala nɔ ashib karub pasrabig kua, mayeelɔ nun wamab waminchibelane truba rruba tab inchibig kɔn. ¹³Kaguende: “Mutɔgucha Señorwei munchiwan wamabiibe kaigyugurri wesraig kɔnrrun” chibig kɔn, Tiuswei wambe. ¹⁴¿Inchendɔ nɔmbe mandɔ chib wamiasamɔ nun kɔremubendɔbe? ¿Katɔ tru nuimburabigwan wamindi mɔra gɔmɔwabe, kɔrebgucha mandɔ incha kɔreasamɔ? ¿Katɔ nuimburabigwan mu eshka kusrenanmubene, mɔrɔbgucha chinch mɔriasamɔ? ¹⁵¿Katɔ tru Tiuswei wamwan eshka kusrenanrrai nɔmun mu karua ɔrmubendɔbe, nɔmbe mandɔ incha eshka kusrenaniasamɔrra? Øyeeg pɔrig basraimbala: “Tabig srɔigwan wammɔrɔskɔnrab srua amrrubelaimbe yeekkucha kasrag kɔmdiig kɔn” daig.

¹⁶Inchendɔ tru tabig srɔ wamwanma israelitasmera mayeelɔbabe mɔra marmuig kɔn. Kaguende Isafasbe trendaig kɔn: “Señor, ¿nam waminchib eshkaigwanma mu kɔreig kuitarru?” cha. ¹⁷Inchawei isubigwan Cristoinug pasra tɔgagɔmibe wamwan wamindi mɔrikkurrin gɔben, tru wamwan wamindi mɔriibe Cristoimburabigwan eshka kusrenanikkurrin gɔn.

¹⁸Inchendɔ nabe payrrab: Trube ¿nɔmbe mɔrmuig kɔnrab gɔ chindah? cha. iNɔmbe mɔrɔbwei indig kɔn! Pɔs Tiuswei wamwan pɔriguma trenchibig kɔn:

“Tiuswei wamwan eshka kusrenanɔbelai wambe pirau truɔrɔ wamindi mɔrig kɔben,
katɔ nɔmui wamindiilɔbe yu pirau maya yabsrɔngatikken
puig kɔn” cha.

¹⁹Pɔs nabe katɔyug payrrab: ¿Trube, israelitasmerabe chi burainrrab gúi mɔrmuig kɔnrab gɔ chindah? cha. Tiusbe Moiséswanmerrig trendingaruig kɔn tru israelitasmeran:

“Israelitasmera, nai misag sɔtɔ gɔmeelɔtɔga ñim namig ashib
gɔnrrai marɔb,
chugúinguen mɔrmɔ misag sɔtɔmeratɔga ñim namig kui
inchib gɔnrrai indamɔnrrun” cha.

²⁰Katɔ Isafaskucha tsakkandɔ kelarrab trendaig kɔn:

“Nan Tiuswan lameelɔ israelitasmera gɔmeelɔguen nan wetɔrraben,
truilɔ nan paymeelanguen nabe kenamisrig kɔn” cha.

²¹Inchen israelitasmeraimburappe Tiusbe trendaig kɔn:

“Nabe nòmun utønrrab nai kwalmeran chu urastøgucha nabe larrøbicha pasraig køn cha,
yeeg mormø misaamera, trurrigu nòm maig isuigwandø martrab inchibelan.”

Israelwei misagugurri unchibelan Tius nøørø lawa wesruilø

11 ¹Trube, treeg købene, nabe payrrab: Pøs, ¿Tiusbe nui misag sètømera israelitasmeran kaasig kønrrab gø chindah? ¡Kah! mumaygucha chi treeg kømøn. Kaguende nama natøweinguen israelita tru Abrahamwei misagugurri arrubig, Benjaminwei misag karrabigugurri arrubig kur. ²Tiusbe israelitasmera nui misaameran kanmaytø manasrøwei tru nø asha tøgagúilane chi kashmuig købig køn. ¿Ashmeelø gøtirru? Pøs Tiuswei wamwan pørigu nø maig karuigwan eshkabig tru Elíasweimburab waminchibigu, Elías Tiusba waminchib israelitasmeran ‘øyeelø gøn’ chib, mandøtø taigwan: ³“Señor, ñi maig karuigwan eshkabelan kweetsamba, ñui altarmeran pøtiitsamba inchen, nabe natøzhiitø øsig kørrømisra basrøben, nangucha kwetchab inchib gøtan” chib, trendaigwan. ⁴Inchen ¿Tiusbe nune mandø cha løtig køh?: “Tru taska marig tius Baalwei merrab tømønøsrømø møguelø siete mil nayasig tarømarar” cha, trencha løtig køn. ⁵Pøs treetøwei møin gwalømgucha israelitasmera kan tøbø uncha kørrømisrøbelø køn, Tius ka yandø tab indiitøgatø lawa wesruilø. ⁶Trube, tru lawa wesruilø gømibe ka yandø tab indiitøga gúig købene, yandø chigøben tabig mariiløtøga gømøtø gøn. Pøs trumay gúig kuimbe, tru ka yandø tab indiibe, trube, chi tab indig kømubsruiñrun.

⁷¿Trube, treebe mandø guerah? Tru israelitasmera unchibelø Tius tru lawa wesruiløbeguende Tiusba tab pønrramigwan nebua tøgagøben, trune tru lawa wesruimeelø Tiusba tab pønrramigwan ke chinsraatø inchib lab melaigwan nømbe nebumuig køn, nømui manrrømerabe larrø murelø misriilø gua. ⁸Tiuswei wamwan pørigu tru nø lawa wesruimeelaimburab maig taimbala:

“Nømui isubig tøgagúigube chigucha isumeelø nasrkwailø,
kabmerabe chi ashmeelø latailø,
kalumeragucha mormø galumera gønrrai
møin gwalømgatig Tius treeg mariilø gøn” cha.

⁹Incha Davidbe nømuimburaptøwei trendaig købig køn:

“Nøm tulundzuna kasrag warønrrab

mab, muchib waraibe
 nòm truyutøwei ka iløsrka melamibah,
 kegørra waramibah, treegu srurrengwamibah,
 øyee marøb gúimburo mōra melamigweyasiibatø misrbash cha.
 10 Nømui kabmerabe ashmønrrai løstørailø gørrømisren,
 nømui lliibe chu urastøgucha kurraashibguen
 kurrashmeelø murigu marøb melamig nebuilø gøbash” cha.

Judíos kømø misaamera kaigyugurri webambub

11 Trube, treeg købene, nabe payrrab inchar: ¿Judíosmera treeg srurrengwawa kørrappe, katølebe managuen kurrønrrabikkaig kørrig kø chindah? cha. iKah! mumaygucha chi treeg kønrraamøn. Tru Tius karua pasrigwan nøm kalø marøb itøbunab gúibe judíos kømø misaamera kaigyugurri wesrailø gømigweyasig arrin gøn, judíosmera nømguen pusrkwai ashib gømig kønrrai.

12 Inchen judíosmera kalø marøb itøbunab gúibe yu pirau katøgan misaamera Tiusweimburabigwan nørrø tøgagømigweyasig køben, katø judíosmera nøm ke ka gømnørraindøzhig tōga bønrraibe judíos kømø misaamerayasiibe tru Tiusweimburab purø tabigwan nørrø tøgagømig kønrrai marøb inchene, imas maig tabig kønrrerah tru judíosmera maig pønrramigu nøm newan pønrramisren, truyugurri arrubiibe!

13 Nabe mømbe ñim judíos kømø misaameran waminchar. Pøs judíos kømø misaamerai Cristo nøashib nan karua ørig kuikkurri, tru na marøb tøgagúigwane truba tabig kui asha tōga basrar.

14 Pøs nabe nai misag judíosmeran pusrkwai ashib gønrrai mumay gøben kiagasrønannrab isua inchar, truilø møiløgøben kaigyugurri wesrailø gønrrai. 15 Inchen judíosmeran Tius kaashen, yu pirau tru katøgan misaamera nø Tiusba tabig kørrømisra pønrramima gúibe, trube, judíosmeran Tius yandø utøbene, ike kwailø latailø gúig, katøle øsiiraig latailø gønrrun! 16 Pøs tru harina masaigugurrima piti lurra, truigwanmerrig pirri mara, Tiusweindø gønrrai tranene, tru masaibe kerriguba Tiusweindø gørrømisran. Inchen katø tru srølwanma Tiusweindø tarømarig kuig købene, srarmeragucha nuindø tarømariiløtøwein gøn.

17 Pøs tru israelitasmera lawa wesruimeeløbe tab olivo tusryu srarmera latailø gua kegølsrailø latailø gøben, trune ñibe, judío gømíig, kan kau umbu olivo, nøtø beña gal-lab tusryu srar-unø

lataigwan, tru tab olivo tusryu kal-lanrrai kemesra basren, ñibe tru ellmarig tab olivo srølyu tab piwan mømimbe tøgatø utab pasran. ¹⁸Inchendø tru olivo tusryu trendø truyu srarmerane ñibe purab tabig kurmab ka isaba inchimøta. Inchen ñi treeg ka isaba inchib pasrøwabe, trube, srølwan øsig kømigwan ñi rranøb pasrømøtø, øsig kømigwane srølguen ñun rranøb pasrain gúi isuagu.

¹⁹Pøs ñibe inchipa trendaisruandøbe trenchinrrun: “Tru olivoyu mø srarmerane kegølsrailø gúig køn cha, truyu nan kemendøsrka kal-lanrrab.” ²⁰Pøs treebe treegwein gøn. Judíosmerabe chigucha chi kørenrrab inchimuben, treekkurri kegølsrailø gøbwei indig køn. Inchen ñibe isubigwan Cristoinug pasra tøgagúikkurri truyu pasran. Pøs inchawei purø nuig kømmørø inchib pasrømøtø, ñibe køriibala isuatø basrau. ²¹Kaguende Tiusbe tru srarmeran trendø truyuelanguen ka bønrrøbashmøtø, para betiibe, ñungucha ka basrøbashmøtø, treetøwei para gutchun.

²²Pøs isua ash, Tius nø yeeg tammayig kuigwanba, nø chi chippe, kandø wamabig kuigwanba, tru kørta pønrrabelaimbe nøbe kandø gandø wamabig købendø, trune ñune tammay indan. Inchendøgucha tru nø tammay indigu ñi truyu pasrabig basrøbene gønrrun. Treeg kømuisruandøbe, ñigucha kegølsraig kønrrabguen. ²³Inchen judíosmera nøm køremø, treetø melønrrab inchimøtø, nøm kørebene, katøle tru olivoyutøwei nuranrrai kemesra pønrrailø gønrrun. Kaguende Tiusbe maramburab marøbig køn, gatøle kemesra pønrramig. ²⁴Pøs ñi, judío gømíig, tru ñi kau umbu ka trendø nøtø beña gal-lab olivo lataigwan para, mana treeg mariimíigwan tru ellmari tab olivo tusryu nuranrrai truigwanma kemesra basriibe, kan mas tru ellmari tab olivo tusryu srarmera kegølsrailø gøbelane katøle tru tusryutøwei nørørøranrrai kemesrailø gømønrraitarru, tru judíosmeran.

Israel misagweyasig Tius maig martrab isua tøgagúig

²⁵Nai nunelø, israelitasmera gømeelø, Tiuswei tru mu asiimíig pasrabigwan tab chigúi møra gønrrai inchar, ñim ñimuinetø purø nørreelø misrøb pønrrømønrrai. Israelitasmerabe ke mayambagucha gømø, kan tøbøtø nømui manrrømeran mur marøb pønrraigu kegørra pønrrappe, tru judíos kømø misaamera kaigyugurri webamrrabelø mayeeløba kaigyugurri webambamnegatiitø gøn. ²⁶Inchen øyeeg nebubene,

israelitasmerabe mayamba kaigyugurri wesrailø gønrrun, Tiuswei wamwan pørigu maig taimbala:

“Tru Kaigyugurri Wesrawa Pønsrønrrabiibe Jerusalén Sión
Tunsrøngurri arrua,
Jacobweinukkurri amrrub misaamerane nòmui kaigwan
kerranrrun cha.

27 Inchen tru kaig marigwan na kerrabene,
tru nòmba na acuerdo marig, truig kønrrun” cha.

28 Pøs judíosmerabe Cristoi tabig srø wamwan kaasikkurri,
truburappe Tiusbe tsalø indiiløwein gøbig køn, tru ñim judíos
kømeelaimburab tabguen gønrrai. Inchendø nòmun Tius
lawa wesruikkurri, truburappe tru nòmui merrabsrø Tiuswan
mørøbelø kølli misaameragurri nømbe Tius undaarailø gøn.

29 Pøs Tiusbe nø keta traniilane katø kerranrrab gømøwei,
katø nø wamigwane wamømuig kui lataig martrabgucha
gømøwein gøn. 30 Inchen ñim judíos kømeeløgucha treetøwei
merrabwansrømbe Tiuswan larrø mørmeelø gøbig kuig, mømibe
Tiuswei lastima asigwan nebua tøgagøn, judíosmera mørmeelø
gúikkurri. 31 Inchen tru ñim judíos kømeelan Tius lastima
asigwan ñimun tranikkurri nøm judíosmeragucha mõi yambe
nømbe larrø mørmeelø misrin gøn, nømgucha Tiuswei lastima
asigwan nebua utamig kønrrai. 32 Pøs Tiusbe maya misaameran
larrø mørmeelø misra melamigu mumaygucha wegønønrraingag
pønsrailø bønrran, tru maya misaameran nø lastima asha
tøgagønrrab.

33 ¡Tiuswei kusremburab kusrebig kuiba,
kusrebig kua nebumburab nebua asiiløbabe
purø nørriig muguen nebua isumgailø gøn!
iNø maramig tøgagúilane ni mandøguen ‘øyeeg køn’
damgailø,
nø mandø martrab isuiløbe maig kermab nebua isumgailø,
treelø gøn!

34 Tiuswei wamwan pørigube trenchibig køn:
“¿Señor isua tøgagúilane mu nebua asitarru cha?
¿Kabe Señorwane ‘ñi øyamay marambala’
chinrrabig mu købig kuig kø chindah cha?

35 ¿Kabe Tiuswanmerrig mugøben chi tranig kø chindah cha,
truburø katøle Tius nun tranrrai?”

³⁶ Kaguende chitøgucha købiibe Tiusweinukkurri arrubig køb,
 katø nøgurrim bønrrab, katø nuyasig køn.
 Tiuswane managatig törguegwalmabig kønrrun.
 Treeg kønrrun.

Tius tab gúi wanrrai nam tabig amønaig

12 ¹ Inchawei nai nunelø, Tiuswei lastima asiitøga nabe
 ñimun tiusmanda trenchinrrab inchar, ñim møitøgucha
 ñimui asrmeran kan øsiguig keta tranøb lataig Tiuswan keta
 tranay cha, Tiusweindø gønrrai tarømarig, nuin gabyu truba tab
 gúi asig, treekke. Iig køn, tru ñim øsig amønaigu Tiusweimburab
 køriibala tabig maramibe. ² Møin gwaløm pirau maig pub
 arrubigu ñimgucha trumay ambub pønrrønrrab gømøtø bønrray.
 Treeg kømøtø, Cristogurri ñimui srøig peemay isuitøga ñimui
 amønamiwan yunømariilø guy. Treeg marabe, Tiuswei isuigube
 ñim maramig nø møigwan maramig balaiwein gúi ñimbe
 nebua ashchabguen, tru purø tabigwanba, nuinug truba tab gúi
 asigwanba, newan tabigwanba.

³ Tius nui ka yandø tab indigwan nan traniitøga nabe
 ñim mayeeelan trendamønrrun: Møitøgucha ñim mayangatig
 kuigugurrimbe mas nuig kurmaib inchib pasrønrrab gømø
 cha. Masken treeg kømøtø, tab isua basramig køn cha, Tius
 møigwandøgucha pirisha ketig, tru isubigwan Cristoinug
 maya pasra tøgagúi maig køben, treetøh kuy cha. ⁴ Pøs nambe
 møitøgucha asrbe kandø gøbendø, namui asrube chine pønrran.
 Inchendø truiløbe chi maramigwan mayambabe truigwandøwei
 marøbelø gømøn. ⁵ Øyeetøwei namgucha truba nu gøbendø,
 Cristoinuube nambe kan asrtø misra, nambe mayeeløba nørø
 gønrrab gømøtø, kangurriin gangurri kanbalatø misra pønrrer.

⁶ Tiusbe namun chigøben peg peg marøbelø gønrrai keta
 tranøppe, nui ka yandø tab indig maig køben, treeg tranig køn.
 Pøs trube, Tius maig eshkangaruigwan wamindamigwan ketig
 uta tøgaike nui isubigwan Cristoinug maya pasra tøgagúi maig
 køben, treetø waminchi. ⁷ Katøganelan purugub megamigwan
 ketig uta tøgaike purugumigu purugu. Kusrenanøbig kømigwan
 ketig uta tøgaike kusrenanamigwan kusrenan. ⁸ Katøganelan
 øyamay maramdiig køn chib waminchibig kømigwan uta tøgaike,
 øyamay maramdiig køn chib waminchi. Chigøben palai melabelan

tranøbiibe, merøbala gømo, treeg rranøb; chi maramigwan nø bera marøb pasramigwan uta tøgaiibe, trunun martrab isua pera marøb; lastima ashibig kømigwan uta tøgaiibe, larrø tab gúi kasraatø marøb; treeg maramig køn.

Tiuswei ureemerabe øyamay marøb gømigwan waminchibig

⁹Ñimui undag købiibe ka palatø gømo, cierton gømig køn. Kaig maramigwane trømbøig kui mørøb, tabig maramigwane si, merrarrowa maray. ¹⁰Ñimbe kangurrin gangurri trag nunelø lataig undaarayay. Nayasig tab gønrain gømo, katøganelayasig tab gønrri, ñimbe treeg marøbelø guy, ambugurri igurri maig købash kømø.

¹¹Ñui chi maramigwane marig kørømisrtrai marøb, pøilø gømunig køn, Señorweiwane martrurmab isua marøb.

¹²Cristoba purø tabig tørbilabigu pønrramigwan ñim isua munig melaigu kasrag bønrrab, chigøben isumdiig murig pub arrubigu tammay melabig melab, Tiusba wamindamigwane elachimø, marøbig marøb inday.

¹³Tiuswei misaameran chigøben palabig arrubigu purugub, møiløgøben ñimui yau pubelane tabig wamab, treeg maramig køn ñimbe.

¹⁴Ñimun kaig marøbelane ‘chigøben trømbøig nebubash’ chib, treeg inchimøtø; ‘mayanguen tabig nebunrrun’ chib, treeg indamig køn.

¹⁵Kasraatø burrøbene, tru kasraatø burrabeløba lata kasraarab; kishib purrøbene, tru kishib purrabeløba lata kishib inday.

¹⁶Ambugurri, igurri lata tabig lincha warab, truba nørreelø gømmørø inchimøtø, chigucha gømo misaazheeløba chi pesriig kui mørmø linchibelø gømig køn. Ñim ñimuinetø truba kusrebelø guermab isumøtay.

¹⁷Ñimun mugøben kaig maren, truburø ñimgucha treetøwei marøb gønrab gømøtø, ñimbe maya misaamerai merrab tabigwan marøbelø gønrab inday. ¹⁸Ñimuimburappe, ñimun mayangatig tabig waramdiig køben mu misaamerabatøgucha ambugurri, igurri tabig warønrrab inday. ¹⁹Ñim, nai undaarailø, kaig marimburø ñimashib treetøwei pagaranrrab inchimøtø, Tiuswei namig købigwan nømuim bala arrubasay. Kaguende Tiuswei wamyube øyeeg chibig pørig pasran: “Kaig marimburø pagaramibe nain

gøn cha. Truburøbe na asha maramig køn” cha, Señorbe trendan.

²⁰Masken treeg inchimøtø:

“Nun ashig kømui inchibig chugurri mamig kaagúin gøbene,
manrrai tranøb,

pi mulgwai inchene, mutchai pi srørrøb indamig køn cha.

Treeg marabe, tru ñun kalø marimburø nune nuba køriimarøb
may barra gørrømartrabguen” cha.

²¹Tru chigurrimbunø kaibe ñun nø gananrrain gømøtø,

tru chigurrimbunø kaigwane tabiitøga ganamig køn ñibe.

13 ¹Misagwan ashib karub purrønrrai purrønniilane nøm maig
chiben mayeeløba truilan møramig køn. Kaguende ashib
karub purrønrrai purrønniiløbe Tiuskurrin gømíibe purrømøn.

Inchen treeg purrabeløbe nø treeg kønrrai mariiløgurrim burran.

²Inchawei tru ashib karub purrabelan sötø basramisrøb gurrabiibe
Tius treeg kønrrai mara pasrigwan treeg kømønrrai sötø basramisrøb
gurran. Inchen tru treeg marøb gurrabeløbe nømuyasiitøwei
tru møra pønrramig kønrrai marinab gømigwan lab pønrran.

³Kaguende tru ashib karub purrabeløbe tru tabig marøbelan truba
kwaarøsa tøgagønrrab purrømøtø, kaig marøbelane nømbe treeg
martrab purran. ¿Ashib karub wabigwan chi kørig isumø, ñune treeg
uñig køtah? Pøs, trube, tabigwan mar, trumaybe nø tabig wamindig
kønrrabguen.

⁴Kaguende tru ashib karub wabiibe Tiusweimburø
mara rranøb wan, ñuimburab tab gønrrai. Inchendø ñi chigøben
kalø marabe, trube, kørig tøgagu. Kaguende tru ashib karub wabiibe
nui espadane kagatø tøgagømøn. Kaguende nøbe Tiusweimburø
mara rranøb pasrappe, kalø marøbigwane Tius øyamay martrai
palai waitøga møra melønrrai marøbig køn. ⁵Inchawei tru ashib
karub purrabelane nøm maig taigwan møramig køn, møra melønrrai
mariilø gømigwan kørig isuatø gømøtø, namui isub kebachib
pasrabigu chi isumig kaanrraingue.

⁶Inchawei øyeekkurri ñimbe an pagaramigwan pagarabelø
gøn. Kaguende tru ashib karub purrabeløbe Tiusweimburø
marøb purran, tru nøm mandø maramigwan chu urastøgucha
trunun merrarrowa marøb.

⁷Pøs mønundøgucha ñim maig
pagaramigwan trunun treeg bagaramig køn: chi tøgagúimburø
chi pagaramigwane trunun bagarab; yanøb, penab indimburø
pagaramigwane treeburø pagaramig køn. Inchen tab inchib
tøgagømelane tab inchib; maig købash inchimumelane tab inday.

⁸Mungucha chigøben ulø gømtøt. Kangurrin gangurri undaguelø gømigwan, truigwane ulø bønrramig køn. Kaguende mendaigwan undaarabiibe tru maig maramigwan martrai Moisés pørig maig taigwan, trunun maran. ⁹Kaguende tru maig maramigwan martrai pønrrailø, tru: “Itøulmøwei, kweecha betømøwei, nilømøwei, ñui marømmørø inchib chull ashmøwei indamig køn” chib, tru katøgan maramig karua pasrig chigucha, tru: “Ñui mendaigwan ñiasiitø lataitøwei undaaramig køn” cha, trencha karua pasrigu, truyutø chishtø tøga rrendain basran. ¹⁰Pøs tru undag købiibe mendaigwan chi kalø marmøn. Inchawei undag købiibe tru maig maramigwan martrai Moisés pørig maig taigwan treeg marig kørørmisrtrai maran.

¹¹Pøs ñimbe øyeegwane maramig køn, mõi yambe maig kwalømmerra gúi ashabe. Pøs yandø ñim kiagasramig puin gøn. Kagen nam kaigyugurri wesrailø gømibe mømibe gatøguchinguen lutau basran, tru nam Criston srøtø køreb uras lataguen gømø. ¹²Yandø yana yemguen purayain gøben, Cristo arrumig tør-rram lutau lataig misrøb arrun. Chigøben kaig marig løstøyuelane yandø elacha, tøryu gwayab kewa bønrrailan kewa bønrrøgun, tru tabig sølgandø marig tøryu marøb pønrrailøtøga. ¹³Nambe kan kwalømyu amøñib lataig maig amønamiigwan sølwan amøñigun, mabgucha mamburab mab, mutsiirab, ishumburmeraba, møgueløba trømbøig marøb, chugatig trømbøig marøg køben treeg marøb, kwayam lab, pusrkwai ashib treeg marøb gømtø. ¹⁴Masken, Señor Jesucristo nø binøbuliilø gønrrab inday, trendø kaig kuinaigu asr maig marøg kui inchen, treegwan martrab inchab gømtø.

Cristoimburab nuneløbe kullaateelane isuptø maramig køn

14 ¹Møikkøben nui isubig Cristoinug pasra tøgagúigu newan gømíig kullaatiigwan utappe, nø chigøben øyamay gúi tamab isua tøgagúigwane ‘øyeeg, øyeeg køn’ chib wam lamøtø, utamig køn. ²Pøs møibe chi mamigwandøgucha maben Tiusweimburappe chi gømíig kui treeg isubene, møibe nui isubigwan Cristoinug pasragúigu kullaatiibe ka mamizhiitø man, kaguende yau mabene, Tiuswein gabyube kalø gønrrai tamab isua. ³Inchawei møikkøben chi mamigwandøgucha lutøgurri mabiibe tru mø mamimerandø mabigwane kashmumig køn. Inchen tru mø mamimerandø mabiibe,

trube, tru chi mamimerandøgucha lutøgurri mabigwane kalø gøn chib chinetø cha mormumig køn. Kaguene Tiusbe nune kashmø, utig køn. ⁴Kan karuindiig megabig katøganuiwan ñi ‘øyeeg, øyeeg køn’ chinrrappe, ¿ñibe mu gurmaqu? Pøs nø kebenin gúi, kabe kebeñmuin gúi tru nø karub pera wabig uyube nø ashchab gúinrrun. Inchen karuig megabig Señorweimbe kebeñmø basrønrrun. Kaguende Señorbe maramburab marøbig køn nune mur basrønrrai maramig.

⁵Pøs møibe treeg isun, mø gwalømbe katøgan gwaløm lata gømø, mas tabig kuitamab. Inchen katøgane mø gwalømmeratøgucha treetø gúitamab treeg isun. Pøs øyeeg isuilan ñim møitøgucha maig isua tøgagúigwane chigurri øyan gøbig kuin gúi ashabe, trube, kanmaytø treeg isua gømig køn. ⁶Inchen møikkøben mø gwalømbe tabig kuitamab isubiibe tru gwalømwane Señorwan tab indig kønrrai isua maran. Inchen chi mamigwandøgucha mabiibe Señorwan tab indig kønrrai isua man. Kaguende Señorwan ungwa, ungwa tan. Inchen tru mø mamigwan mamíig, truikkucha Señorwan tab indig kønrrai isua trunun mamøwa, Señorwan ungwa, ungwatøwein dan.

⁷Kaguende nambe møitøgucha nayasiitøwei øsig uñmøwei, katø kwabgucha nayasiitøwein gwamøwei indan. ⁸Pøs nambe øsig warappe, Señorweyasig øsig warab; kwamig nebubene, Señorweyasig kwamig kønrrun. Inchawei øsig waramig nebui lata, kwamig nebui lata, nambe Señorweyelø guer. ⁹Kaguende Cristobe øyeeg kønrraiwei kwawa, katøle øsiiraig køn, kwabelai lata, øsiguelai lata mayeelaim bala nø Ashib Karub Pasrabig kønrrab.

¹⁰Trube, treeg købene ¿ñibe ñui nunewane chindimbarre ‘øyeeg, øyeeg marøbig køn’ chigu? ¿Katø ñui nunewane chindimbarre kashku? Kaguende nambe mayeeløba tru maig kønrrabigwan Tius nø asha marøb wainug kemalamig kønrrab gøn. ¹¹Kaguende Tiuswei wamyube trenchibig pørig basran:

“Señorbe trendan cha: ‘Na øsig wamma waibe, treetøwei nai merrappe mayeeløba tømboñsrøben, katø mui niløtøgucha ‘Tiuswan tabig køn’ chib, waminchun’”
cha.

¹²Inchawei nambe møitøgucha naimburabigwan Tiuswan eshkamig nebunrrun.

¹³Pøs treeg købene, nambe kangurri gangurri mas ‘øyeeg, øyeeg køn’ chimugun. Masken treeg kømøtø, katøganelan ka srurrengwangerub, søbøbasramisrøb nui nunewene gabyu kalø gúi

asigwane marmønrrab isumig køn. ¹⁴Nabe Señor Jesúsweinuube kerrigu newan øyeeg kuitamab isua basrar, chi mamimeratøgucha ka yandøbe kaig kømuin gúi. Inchendø møikkøben 'i mamibe kaig kuitamab' isubigweimbe, nuimbe kaløwein gøn. ¹⁵Inchen ñi kan mamigwan maikkurrindø ñui nunewan ka isui uñchaindø mariibe, yandø ñibe undag købiitøga marøb pasrømøn. Ñui mamikkurrindø ñui nunewan kerriguwan mindisha kørromarmøta, Cristo nuyasig kwaig købigwan. ¹⁶Øyeeg marigwan tru ñuimburappe söl gúi asha, ñi treeg tøgagúigwane katøganeløbe chine kaig wamincha mørøb gønrrain gømøtø guy, tru ñi øyeeg mariitøgatø. ¹⁷Kaguende Tius nø ashib karub waibe mamimeragurri chi asamig kønrrab gømøwei, mutsiløgurri chi asamig kønrrab gømøwein gøn. Treeg kømøtø, Tius tru nø ashib karub waibe tabig sølgandø mariiba, chi isumgaig tab gøbiiba, kasrag købiiba, truilø gøn, Espiritu Santogurri. ¹⁸Kaguende Criston øyeeg mariitøga nuyasig marøb pasrabiibe Tiuswan truba tab gønrrai marøb, katø misaameragucha nune chi tamgaig marøbig kui asig køn.

¹⁹Inchawei treeg købene, ambumay imay tab gønrrai marøb, ambugurri igurri puruguyab Señorweimburab nørrørab ambamigwan tøgagønrrab inchigun. ²⁰Tiuswei mariilan mamimeragurrindø ka mindisha kørromarmøta. Isa gømøtø, chi mamimerane Tiusbe mamønrrain cha meriibe kaaben, tru kalø gøppe, tru mamimeragurrindø kan mæg katøganelan treegu ka srurrengwanrrai indig, truirren galø gøn. ²¹Pøs trembe yau mamøwei, vino muchimøwei, katø ñui nunewan penøsrkønrrabig chigøben marmøwei indikken, söl gøn. ²²Pøs ñui isubigwan Cristoinuutø tøgagúigwane ñiba Tiusbatø tøgagu. Pøs nø chi marøb pasraigu nui manrrau isub kebachibigube chi kalø gúi mørmø marøb pasrabigweimbe mayanguen tab gøn. ²³Trune tru kalø gønrraitamabgøba isubendø mabiibe, maikkurrindø kaig mara basramisran. Kaguende nui isubigwan Cristoinug tøgagømubendø maran. Inchawei chitøgucha isubigwan Cristoinug pasra tøgagúigugurrin gømøtø arrubiibe, kaig køn.

Ñuimburab gúi lataitøwei mendaigwan tab gønrrai marøb

15 ¹Inchawei nam Señorweimburabigu tabig mur pønrrabeløbe tru Señorweimburabigu kullaateelan nambe purugumig køn, nam namasiitøwei tab gúi mørøb pønrrømøtø. ²Nambe

møitøgucha namui nuneg kullaatiigwan tab gúi mørtraí maramig køn nuimburab tab gønrrai, Señorweimburabigu nurab inrrai marøb. ³Kaguende Cristo gøbenguen nōasiitōwei tab gúi mørøb pasramigwan lamøtø, Tiuswei wamwan pørigu Cristo maig taimbala gúig køn: “Tru tsalø wamabelø ñi Tiuswan tsalø wamiiløbe naim balatø arrig køn” daig. ⁴Kaguende kerrigu tru merrabsrø Tiuswei wamyu pøriibe namun kusrenanrrab pørig købig køn, tru nam tammay melabig melaikkurrimba, tru Tiuswei wam pørig namun tabig purugub wamgurrimba, nam Tiuswei torguegwalmabigu nam Cristoba kanbalatø pønrramigwan isua muniiramig tøgagønrrai. ⁵Inchen tru namun tammay melabig melamigwan tranøb, katø tru namun tabig purugub Tiusbe ñim kanikkurri kanikkurri kandø isua bønrramigwan tranrraimab isur, Cristo Jesús nō maig isuig køben, treetøwei, ⁶ñim mayeeløba kandø isua, kan wamdø misra namui Señor Jesucristoi Mōskai Tiuswan truba tabig wamindamig kønrrai.

Tiuswei tabig srø wambe mu misaameraindøgucha gøn

⁷Inchawei ñimbe ambugurri, igurri wamab utay, Cristo ñimun utab lataitøweingue Tiusweyasig torguegwalmabig kønrrai. ⁸Pøs nabe ñimun trendamønrrun: Cristobe judíosmera, tru circuncidawarmeran purugub meganrrab arrig køn cha, tru Tiuswan mørøbelø merrabsrø kølli misaameran nō maig martrab kørørmisrig købigwan treeg marig kørørmisrtrai, øyamay Cristobe kenamartrab indig køn, Tiusbe nō maig martrab taigwane treeg marøbig kui ashchai. ⁹Incha gatø trutø gømøtø, Cristobe arruppe, tru judíos kømø misaamera nōmun Tius lastima asimburø Tiuswan maya nuguen tab indig kønrrai arrig køn. Tiuswei wamwan pørigu maig taimbala:

“Øyeekkurri nabe judíos kømø misaamerai utu
ñi, Tiuswan tabig waminchib,
ñui munchiwan cantab indamønrrun” cha, trendaig.

¹⁰Katø katøganbaløsrø trenchibig køn:

“Ñim, judíos kømø misaamera, Tiuswei misaameraba truba
kasraaray” cha.

¹¹Incha gatøganbaløsrø katø trenchibig køn:

“Mayeelø judíos kømø misaamera Señorwan purø tabig
waminchib,
mu misaameratøgucha nun purø tabig waminday” cha.

¹²Katø Isaías kucha øyeeg taig kòn:

“Isaíweinukkurri arrubig kan tusrwan srøldø basram barig
lataigugurri
srøig kal-lab lataitøwei katøgan srøig kurra,
judíos kømø misaameran ashib karub pasrønrrab pasramisren,
truiløbe nøm isua muniirab melaigwan ke nuinuutø pasra
tøgagønrrun” cha.

¹³Pøs tru nam isua muniirab melamigwan tranøb Tiusbe tru
ñim nun kørekkurri maya nu kømburab kasrag købigwanba, chi
isumgaig tab gøbigwanba ñimun netsøganrrai isur, tru isua
munig melaig, truitø tøgagømburab tøgagønrrai Espíritu Santoi
maramburab mariitøga.

Jesucristo maig karuilan Pablo mariilø

¹⁴Pøs, nai nunelø, nabe ñimuimburab øyeeg kuin gúi asha basrar,
tab inchibelø gømitø netsailø, chigurrimbunø nebua asamig truitø
netsailø, ambugurri igurri maig maramigwan waminchib eshkab
pønrrønrrapteelø, ñimbe treelø gúi. ¹⁵Inchendø nabe ñimun
iigwan pørøppe, kanmaytø murtø rrencha børar, tru chimerayube
maig kømigwan ñimun gatøle isunanrrab isua, nui ka yandø tab
indigwan Tius nan tranikkurri, ¹⁶tru na Cristo Jesúsweiwan judíos
kømø misaamerayasig na marøb meganrrai. Pøs, na Tiuswei tru
tabig srø wamwangøba eshkab kusrenanøbig kur, kan sacerdote
Tiuswan keta tranøb latawei tru judíos kømø misaameran
na Tiuswan keta tranen, nø ka utamdeelø gønrrai, nuyasiitø
tarømariilø Espíritu Santogurri.

¹⁷Inchawei nabe Cristo Jesúsweinuube truba tab gúi mørøb
pasramig tøga basrar, na mariilø Tiusweimburabeløyu. ¹⁸Pøs nabe
gatøgan chi pegwan waminchab inchimøtø, na waminchippe,
tru judíos kømø misaamera Tiuswan møra marøbelø gønrrai,
tru nagurri Cristo chi mariilandø wamindamønrrun. Iigwane
nabe marøppe, wamindiiløtøgaba, mariiløtøgaba, ¹⁹Tius naba
basrain gúi asamig nørreelø mariiløtøgaba, kwaara asha gønrrai
mariiløtøgaba, iilai tru maramburab mariitøga marøb, katø
Tiuswei Espíritui tru maramburab mariitøga marøb indiilan,
nabe trunundø wamindamønrrun. Øyamay Jerusalénsrøngurri
chutøgucha Ilírico birausrøngatig kerrigu chigucha palømfíg na
Cristoi tabig srø wamwan eshkab kusrenanig købig kòn. ²⁰Pøs

nabe Criston tru mana wamindi mōriimōsrø, treegu tru tabig srø wamwan eshkab kusrenanøb pasramigwan mas isua martrab inchibig kur, Cristoi tabig srø wamwan mōikkøben eshkab kusrennøbig pølbasa marinug srøig itø marøb guebimønrrab.

²¹Masken Tiuswei wamwan pørig maig taimbala:

“Managuen nuimburaigwan mu wammørøsrimeelø gøbelø nun nebua ashib,

wamindigwan mana mørmeelø gøbelø chigúi nebua mørøb inchun” daig.

Pablo Romasrømay inrrab isub

²²Inchawei øyeekkurri nabe katø gatø ñimun ashchab attrab inchen, arrumønrrai marinab pasrabig kur. ²³Inchendø mōimbe yu na tsuim birausrømbe naimbe yandø chu maramig kawein gøben, katø merrab pilamerawansrøngurri ñimun ashchab truba arrug kui megaig kōppe, ²⁴Españasrømay na inrrab arrua, pua burainrrab inchar. Kaguende nabe ñimun asha burainrrab isur, tru petø purainrrab arrua, kan maya yana ñimba lindigu truba kasraatø buraya, na trusrømay yamigwan ñim nan purugunrrai.

²⁵Inchendø mōimbe nabe Jerusalénsrømay inrrab yar Tiuswei misaameran an burugúigwan tranrrab. ²⁶Kaguende macedoniasreeløba, acayasreeløbabe tru Jerusalénsrø Tiuswei misaamerai utu waachameran purugumig an tulisamig nōmune tabig asønaig køn. ²⁷Pøs nōmbe tabig martrab isua marig køn. Inchagucha nōmbe judíosmerane uløweim bønrran. Kaguende tru judíos kōmø misaamerama Tiusweimburabig purø tabig tru judíosmeraiwan nōm tōga utab pønrraibe, nōmgurringucha nōm chi tōgagúiløtōga judíosmeran tranøb pirisamig ulø bønrran. ²⁸Incha i maramigwan nabe yandø chab mara, tru kan mamig misrizhig latawei tru an purugúigwan nōmun purøørabe, Españasrømay inrrab arrua, ñimun ashchab arrumønrrun. ²⁹Incha na ñimuisrømay arruppe, Cristoi mayanguen tabigwan ñimun pirishinrrab tōgagømburab tōga arrum gúi nabe asha basrar.

³⁰Inchendø nabe, nai nunelan, namui Señor Jesucristogurrimba, Espíritu Santoi undag kōbikkurrimba, naimburab ñim Tiusba truba rrugab wamindigu, tiusmanda naba kanbalatø misrtrai chinrrab, Tiuswan truba rruba miab melamigu. ³¹Pøs tru Judea birau Jesucriston chi kørenrrab inchimø misaamerai tasku na

kebeñmønrraimba, katø tru Jerusalénsrø Tiuswei misaamera tru an burugúig srua yaigwan tabig kui ashib utønrraimba Tiuswan miarrunrigay, ³²pøs Tius treeg kønrrain gøbene, na ñimuisrø arruppe, truba rruba kasrag bua, ñimba kanbalatø pishindø tab wamig kønrrai. ³³Inchen Tius tru chi isumgaig tab gøbiibe ñim mayeeløba pasrønrrai isur. Treeg kønrrun.

‘Tab ka amøñigueh’ chib, Pablo wam øriilø

16 ¹Cristogurri tru namui nuchag Feben tabig ashib tøgagørrunrigay chinrrab inchar, tru Cencia iglesiayu chi maramigu purugubigwan. ²Señorwein gúimba ñimbe nun truba tab wamab utønrrigay chinrrab, Tiuswei misaameran maig utamig køben, trumay. Katø ñimgurri nun chi purugumig palain gøbene, purugub inchigay. Kaguende noma truba yamelan truba rruba purugub megabig køn, katø nan chigucha.

³Cristo Jesúswei maramigu lincha marøb melabelø, Priscilanba, Aquilanba ‘tab ka amøñigueh’ tan chirrunrigay. ⁴Truiløbe naimburab nan chi kømønrraindø kwam labguen inchibelø gøn. Truilane nabe mayanguen ungwa, ungwa tamønrrun. Katø natø gømøtø, judíos kømø misaamerai iglesiameragucha mayamba nømune ungwa tan. ⁵Katø iglesia tru nømui yau tulundzunabelangucha ‘ka amøñigueh’ tan chirrunrigay. Katø tru Epeneto, nai undaaraig, Asia birausrø ke srørøzhiitø Criston nømerrig kørewa pasramisrøbigwangucha ‘ka uñgu’ tan chirrunrigay. ⁶Katø ñimuyasig truba rruba marøb megabig Mariangucha ‘tab ka uñgu’ tan chirrunrigay. ⁷Andróniconba, Júniaswanba, nai misaameran ‘ka amøñigueh’ tan chirrunrigay, kailan pønsraig yau merrarrawa keeriilø naba lincha bønrrabelø gøbelan. Truiløbe Cristo nøashib karua øriilø nømune tabelø mumera gúi asiilø, katø nømbe Criston nagen køremøwatø, nømerrig kørewa pønrrabelø, treelø gøn.

⁸Señorweimbura nai undaaraig Ampliaswan ‘ka uñgu’ tan chirrunrigay. ⁹Katø Cristoi maramigu namun lincha marøb megabig Urbanonba, katø nai undaaraig Estaquiswanba ‘ka amøñigueh’ tan chirrunrigay. ¹⁰Apeles, Cristoimburaigu chine nebuinab puraya mowanba, katø Aristóbulo yaelanba ‘ka amøñigueh’ tan chirrunrigay. ¹¹Nai misag Herodiónwanba, Narcisoi yaelø Señorwan kørewa pønrrabelanba ‘ka amøñigueh’

tan chirrunrrigay. ¹²Señorwei maramigu truba marøb melabelø Trifenanba, Trifosanba ‘ka amøñigueh’ tan chirrunrrigay, katø Pérsida, truba undaaraig, tru Señorwei maramigu truba rruba marøb megabigwanba. ¹³Señorweinug purø tabig kui asig Rufonba, nui usranba ‘ka amøñigueh’ tan chirrunrrigay, pøs truipe nai usri lataig kuig køn. ¹⁴Asíncriton gøben, Flegonten gøben, Hermeswan gøben, Patrobaswan gøben, Hermaswan gøben, katø nunelø nømbe warabelan gøben ‘ka amøñigueh’ tan chirrunrrigay. ¹⁵Katø ‘ka amøñigueh’ tan chirrunrrigay Filólogon gøben, Julian gøben, Nereowan gøben, katø nui nuchawan gøben, Olimpaswan gøben, katø tru nømbe warabelø mayeelø Tiuswei misaameran gøbengue.

¹⁶Kangurri gangurri ‘ka amøñigueh’ chib tabig wamab Tiuswei undag købiitøga tasig rraniyay. Cristoi iglesiamerabe mayamba ñimun ‘ka amøñigueh’ cha øran.

¹⁷Pøs nabe ñim, nai nunelan, ashiptø gønrrigay chinrrab inchar ñimun nørøtø misrtrai indamba, Cristoi maywan sètøbønrramisramba inchibelan. Truiløbe tru ñimun kusrenanigwan ka peemaytø bunrrai marøbelø gøn. Ñimbe truilane tarømisray. ¹⁸Kaguende treeg misaamerabe namui Señor Cristoiwan marmeelø gøn. Treeg kømøtø, ka nømuimburaptø tab gønrrai labelø gua, waminchibgucha purø tabzhig wamincha, mørøptø wamdiig tabzhig wamincha, chigucha trunun nebua ashmø misaazheelan kegørrørskøbelø gøn. ¹⁹Pøs tru tabig srø wam maig taigwan ñim møra marøbelø gúigwane mayeeløba nebua asha gøn. Treekkurri nane ñimuimburab truba kasrag køtan. Inchendø ñimbe chigøben tabigwane purø nu gusrebelø, kaigwane kan isubguen isumeelø gúimbe gøtan. ²⁰Inchen Tius tru chi isumgaig tab gøbiibe kan maya yanayutø Satanáswane nøbe tambalørtrun ñim itøbuna bønrrønrrai. Namui Señor Jesúswei ka yandø tab indiibe ñimba gønrrun.

²¹Timoteo, maramigu nan lincha marøb megabig, ñimune ‘ka amøñigueh’ cha øran, katø trugurri tru nammisaamera Lucio gøben, Jasón gøben, Sosípater gøben, truiløgucha.

²²Na, Tercio, Pabloi kilga børøbikkucha ‘ka amøñigueh’ cha ørar, Señorwei munchiyu.

²³Gayogucha ñimun ‘ka amøñigueh’ cha øran, tru nan truyu tsumig ya bebøb, katø iglesia mayeelanba pebøb inchibig. Inchen

gatø Erasto tru ciudayu an asamigwan nø ashibiiba, katø trugurri namui nuneg Cuartogucha ‘ka amønigueh’ cha øran.

Tiuswan srabe tabzhig wamindig

²⁴Namui Señor Jesúswei ka yandø tab indiibe ñim mayeeløba gønrrun. Treeg kønrrun.

²⁵Møimbe Tiuswan maya nuguen tabig waminchigun, Tiuswei tru tabig srø wamwan na wamindiiba, Jesucristoimbura na eshkab kusrenaniiba iilø maig køben treegu mur bønrrønrrai marøbigwan. I tru tabig srø wambe tru manasrøngurri mu asiimíig pasrabig Tius nø maramigwan nuinetø tøgagúigwan tru kenamarig maig køben, treeg køn. ²⁶Inchendø møimbe Tius tru maig karuigwan eshkabelø pøriiløgurri tru mu asiimíig pasrabigwane kenamaran judíos kømeelø chu birausrø misaamerandøgucha, Tius tru manasrøngurri managatig wabig nø maig maramigwan martrain basrig, treeg, nømui isubigwan Cristoinug pønsra tøgagúigu maig taigwan møra marøbelø gønrrai.

²⁷iTius tru nøtø kandø wabig, tru muguen nebua kusremgaig newan kusrebigwan managatig törguegwalmabig kønrrun Jesucristogurri! Treeg kønrrun.

1 Corintios

Pablo pørøb

1 ¹Na Pablo, Tius nan trendø treeg kønrrain gøben, Cristo Jesús nøashib karua ørig kønrrai wamig, nai nuneg Sóstenesba misra, i kilgawan pørar, ²Corintosrø iglesiayuelan, Cristo Jesúskurri tru Tiusweyasig tarømariilø, nuyasiitø newan tabelø gønrrai wamiilanba, katø tru mayeelø chutøgucha namui Señor Jesucristoi munchiwan wamabelanba, truike namuimba, nømuimba Señorwan. ³Namui Møskai Tiusweimba, Señor Jesucristoimba tru ka yandø tab indigwan gøben, chi isumgaig tab gøbigwan gøben ñim tøgagønrrai inchar.

Cristogurri tabig tranigwan ‘ungwa, ungwa’ taig

⁴Chu urastøgucha nabe Tiuswane ñimuimburab ‘ungwa, ungwa’ chibig kur, Cristo Jesúskurri ñimun Tius ka yandø tab indigwan tranikkurri. ⁵Kaguende chiyutøgucha ñimbe nuinug purø nørø tøgagønrrai traniilø gøn, kerrigu wamindigu lata, kerrigu nebua ashib ambigu lata. ⁶Trumay Cristoi tru srøig tabigwan wamindiibe ka wamindiitø gømø, ñimuinuube cierton kørømisrin gøn, ⁷Tiusweiwan marøbelø gømigwan keta tranig chigucha chi palømeelø gømnegatikke, Jesucristo kenamisramigwan ñim munig melappe. ⁸Katøgucha srabegatig ñim kørørmø mur bønrrønrrai nøbe tøgga basrønrrun, namui Señor Jesucristo gatø arrub gwaløm chi kaig mariilø chigar bønrramig kønrrai. ⁹Tiusbe nøbe maig martrab chippe, treegwan marøbig køn. Ñimbe nøgurri wamiilø gúig køn, nui Nusrkai Jesucristo namui Señorba lincha bønrramig kønrrai.

Corintosrø Tius wami misaamera nørøtø inchib tarømisrøb

¹⁰Nai nunelø, Señor Jesucristoi munchiyu maig maramigwan tiusmanda øyeeg marøb melørrunrrigay chib waminchab inchar. Peg peg isub gømtøt, kandø isuy cha, ñimui utu mas nørøtø inchib tarømisramig kaanrrai. Masken treeg kømtøt, newan kanbalatø lincha kandø isub, maig marameløyu kandø isub inchigay cha. ¹¹Nai nunelø, møiløgøsrøn Cloéwei yaueløbe nane eshkatan, ñimbe kwayam labrre waran cha. ¹²Pøs nabe trenchinrrab inchar, møiløgøsrøn ñimbe trenchibrren gøn dan cha: “Nabe Pabloingatiig kur” chiben, katøgane: “Apolosweingatiig kur” chiben, katøgane: “Nabe Cefasweingatiig kur” chiben, katøgane: “Cristoingatiig kur” chib. Treeg inchib gøn dan cha.

¹³Trube, treeg købene, ¿Cristobe nuin gúi, nuin gúi misra basra chindah? Kabe ñimuyasig kurusu kwanrrai mesrøppe, ¿na Pablon mesraig kø chindah? Kabe ñimun piu umbu ulsrøbgucha ¿nai munchiyu piu umbu ulsraig kø chindah? ¹⁴Tiuswan nabe ‘mayanguen ungwa, ungwa’ tamønrrun, ñimun møigwangucha na piu umbu ulsrømuigwan. Nabe piu umbu ulsrøppe, Crisponbah, Gayonbatøwei treeg marig kuig køn, ¹⁵nai munchiyu ‘piu umbu ulsrailø guer’ chib mugucha trenchib gømønrrai. ¹⁶(Katø Estéfnaswei yaue landøbe piu umbu ulsrøbwei indig køn. Inchendø katøgan mas mungucha piu umbu ulsraibe nane isumøtan). ¹⁷Kaguende nane Cristobe misagwan piu umbu ulsrøb uñchai ørmøtø, Tiuswei tru tabig srø wamwan eshka kusrenanrrai ørig køn. Incha nabe waminchibgucha, nørø wammeratøga purø may waminchimur, Cristo kurusu kwaigwane chigucha gømfiig kui lataig marig kømønrrai.

**Cristobe tru Tiuswei muguen nebua kusremgaig
kusreiba, maramburab mariiba gøn**

¹⁸Cristo tru kurusu kwaigweimburab tru eshka kusrenaniibe yandø tru kaigyu kegørra pønrrabelaimbe chigucha gømfiig, ke chugúinguen mørmubendø wamindi lataig køn. Inchen nam yandø kaigyugurri wesrailaimbe tru wamindiibe Tiuswei tru maramburab marig, truig køn. ¹⁹Kaguende trenchibig ørig pasran:

“Purø gusreb møguelø chigurrimbunø nebua kusrewa tøgagúilane pinisamønrrun cha.

Kusrebelø nøm chigúi møra tøgagúilane chigucha gømfiig mara kaasha kørørmaramønrrun” chibig

²⁰¿Pøs, tru purø gusrebiiba, katø kusrennøbiiba, katø mõi i gwaløm norrø kusrewa ‘treeg, reeg køn’ chibeløbabe chu bønrrah? ¿yu pirau chine purø norrø kusreegwane chugúinguen mormubendø marig, Tiusbe treeg mara tøgagømuitarru?

²¹Kaguende Tiusbe, tru nui muguen nebua kusremgaig kusrebig kuigu, yu pirau misaamerabe nømui tru purø norrø kusrewa tøgagúitøgabe nun nebua ashmønrrai indig køn. Pøs tru chugúinguen mormubendø wamindig mara tøgagúigwan eshkab kusrenaniitøga nun kørebelane kaigyugurri wesramig, Tiuswane tabig asønaig køn.

²²Kaguende judíosmerabe kan møg Tius nøba pasrain gúi ashchai mariilan miaben, griegosmerabe tru purø norrø gusreeg wamindiilan mørøg kui inchibelø gøn. ²³Trune nambe Cristo kurusu kwaigwan eshkab kusrenanøbelø guer. Truibe judíosmeraimbe ke ka srurrengwangerubig køben, judíos kømø misaameraimbe ke chugúinguen mormubendø wamindig, treeg køn. ²⁴Trune Tius tru wamiilayasiibe, judíosmerai lata, griegosmerai lata, Cristobe tru Tiuswei maramburab mariiba katø Tiuswei tru muguen nebua kusremgaig kusreiba, truig køn. ²⁵Kaguende Tiuswei tru chugúinguen mormubendø wamindi lataig asønabiibe møguelø purø may isua wamindi lataig kømøtø, mas purab nuig køben, katø Tius tru itønaptiig lataig kuibe, kan møwei fuerzas lataikken gømøtø, purab murikken gøn.

Corintosrø Tiuswei misaamera mailø gúig

²⁶Inchawei, nai nunelø, tru ñimun wamab uras ñim mailø gøbelø gúigwan isua asamig køn. Misaamerain gabyu kusrebeløbe ñimbe ke kan gandøwein gøben, katø ashib karub purrabelø norrøeløbe mamdø gøben, katø tab misagugurri amrrub misaamerabe mamdø gøn. ²⁷Yu pirau chugúinguen mormubendø wamindi lataig tøgagúigwan Tiusbe truigwan wesrawa basrig køn, tru purø norrø kusrebelan kørig mara gørrømartrab. Katø yu pirau kwa gaizheelø gønma ash a tøgagúilan Tiusbe truigwan wesrawa basrig køn, norrøelan kørig mara gørrømartrab. ²⁸Yu pirau misagwein gabyu larrø gaizheelø gønma ash a tøgagúilanba, katø kaashib indiilanba, tru chigucha gømøzheelø gúi asiilan, Tiusbe truilan lawa wesraig køn, tru norrøelan chigucha gømeelø mara gørrømartrab, ²⁹mugucha Tiuswei merrab norrøelø misrøb møg

inchib pønrrømønrrai. ³⁰Ñimbe Tiuskurri Cristo Jesúsba kanbalatø pønrran. Cristo Jesúsbe namuimbe tru mu nebua kusremgaig kusremiba, katø sölgaandø tabiiba, katø Tiusweyasiitø tarømariilø gømiba, kaigyugurri wesruilø gømiba, treeg køn nøbe. ³¹Inchawei Tiuswei wamwan pørigube trenchibig køn: “Møikkøben truba nuig kømmørø inchib waminchib pasrag købene, Señorweimburappe mөг inchib waminchib pasrøbash” cha.

Criston kurusyu mesraigwan wamindig

2 ¹Inchawei nai nunelø, Tiusweimburabig mun kenamariimíig pasrabigwan na ñimun eshkab kusrenanøb arrub urasma, ke kan chull møramdiig purø may waminchib, katø purø nørrø kusreb nebua asiilan waminchib arrumuig køn. ²Pøs nabe ñimui utube katøgan chi pegwan isub pasrønrrab gømøtø, Jesucristonba, nun kurusyu mesra kweetsigwanba, trunundø isua basrønrrab isuig køn. ³Incha nabe ñimui utu uñib urasbe trubørab chish kømøwei, trurrigu kørig kuig igatø! itønab pasraig købig køn. ⁴Inchawei na wamindigu lata, katø Tiuswei wamwan eshkab kusrenanigu lata, purø nørrø nebua ashib kusreig wamdøga purø may gøremdiig waminchimuig køn. Treeg kømøtø, Tiuswei Espíritui maramburab mariitøga kenamarøb wamindig køn, ⁵tru ñimui isubigwan Jesucristoinuutø pasriibe mөгuelø purø nørrø kusreegu basrig kønrrain gømøtø, Tiuswei maramburab maramigu basrig kønrrai.

Tiusbe nui Espíritugurri nebua ashchai marøbig køn

⁶Treeg kuingucha, Tiusweimburabeløyu yandø tsabø nørrørawarwei utubeguende nørrø nebua kusreegwan waminchibwei inchibelø guer. Nambe waminchippe, tru nørrø nebua ashib kusreegwan møi nam warain gwalømigwan gømøwei, kabe møin gwaløm yu pirau nøm ashib karubelø nømguen patsab ambubelaiwan gømøwei wamindig køn. ⁷Treeg kømøtø, nambe waminchippe, Tiuswei tru muguen nebua kusremgaig mu asiimíig, sørig pasrabigwan wamindig køn, tru chi pønrrabikken kaabenbatøsrøwei namuyasig maya nuguen tab gønrrai kanmaytø manasrøwei Tius treeg martrab isua tøgagúigwan. ⁸Inchen møi yu pirau nørreelø karub purrabeløbe møitøgucha iig tru muguen nebua kusremgaigwane chigúinguen mørmuig køn. Pøs iigwan chigúi mørig kuimbe, namui Señor tru tørguegwalmabigwane

kurusyu mesra kweechimubsruig kuinrrun. ⁹Inchendø Tiuswei wamwan pørigu taimbala:

“Mugucha kaptøgabe nebua ashmøwei,
muguen kalutøgabe nebua mormøwei,
ni muguen øyeeg kuitamappe isubguen isumøwei indigwan,
Tiusbe nun undaguelayasiibe trunun tøgagønrrai tamara
pønsrain gøn” cha.

¹⁰Inchendø Tiusbe sorig pasrabigwan nui Espíritugurri namune kenamarig køn, kaguende tru Espíritube maig kuigwan kerriguh chishtø ashibig kua, Tiuswei tru muguen nebua asiimiig nø purø umbusrø tøgagúilanguen kerrigu. ¹¹Pøs ¿kan mōwanma nui manrrau umbusrøngue chi isub pasraigwan nebua ashibiibe nui espíritutøweimbe nebua ashmuitarru? Øyeetøwei Tius nø purø umbusrø tøgagúilane mugucha nebua ashmuben, Tiuswei Espíritutøwei nebua asan. ¹²Nambe espíritu yu pirauigwan utømøtø, utappe, Tiusweinukkurri arrubig Tiuswei Espíritun utig køn, nø ka yandø keta tranigwan chigúi mørøbelø gømig kønrrai. ¹³Inchawei nam iigwan waminchippe, møguelø yu pirau kusremburab kusrebelø kusrenani wamdøga waminchimer. Treeg kømøtø, Espíritu Santo kusrenaniitøga Tiusweimburabelan øyeeg køn chib waminchippe, Espíritu Santon tøgarmen waminchibelø guer.

¹⁴Kan møg Tiuswei Espíritun chigaibe, Tiuswei Espirituimburabigwane utønrrab gaiman. Pøs nuimbe ke chugúinguen mormubendø mari lataig køben, ni mandø gúinguen mormøn, kaguende Espíritu Santo purugubendøwei, øyeeg, øyeeg købig kuin gúi nebua asamig kua. ¹⁵Inchen Tiuswei Espíritun tøgaiibe chiwandøgucha øyeeg, øyeeg købig kuin gúi nebua isumig tøgag køn. Inchen nungurrimbe mugucha ‘øyeeg, øyeeg køn’ chinrrab gaimanrrun. ¹⁶Pøs Tiuswei wambe trenchibig køn:

“¿Señorwei isuilan kabe mu nebua asitarru? cha.

¿Señorwane kabe mu kusrenrrautah?” cha.

Inchendø nambe Cristo nø isuimay isumigwan tøgar guer.

Tiusweimburabeløyu lincha maram burugubelø

3 ¹Inchawei nai nunelan, nabe Tiuswei Espíritu maig kønrrain gøben treeg isubelan lataig waminchab gaimaig kuig køn. Treeg kømøtø, tru maig amøñig køben amøñibelan lataig, trumay wamindig køn, Cristoimburabigube kan shush ureezheelø latailan. ²Nabe ñimune

pitsøtø mutsøsaig køn, tranrrø mamig manrrai manmøtø, kaguende gatøgucha truigwane utønrrabgailø srø gúimba. Ni mõi yanguen gatøgucha treeg mamigwane manrrabgailø srø gua, ³katøgucha ñimbe ñimui asr maig marøg kui inchen treegwan marøbelø srø gøn. Pøs ñimui utube pusrkwai ashib gømig, aleguam lab treeg inchib pønrraibe, ðñimui asr maig marøg kui inchen treegwan marøb, maig købash amøñibelø lataig marøb amøñimøtirru? ⁴Kaguende ñim mõi: “Nabe Pabloingatiig kur” chiben, katøgane: “Nabe Apolosweingatiig kur” chiben, øyeeg inchib pønrrappe, ðmaig amøñig køben amøñibelø lataig marøb pønrrømøtirru?

⁵¿Trube, treeg købene, na Pabloa, Apolosbabe chimera gøbrah? Pøs nambe ka marøb melabeløtø gøben, ñimbe namgurriwei kørewa bønrran, namun møigwandøgucha Señor maig martrai karua pønsraig køben, treegwan marøbelø. ⁶Nabe ellguaben, Apolosbe pi guchen, tru tusrwan nurangaruppe, Tius nø nurangarun. ⁷Inchawei ellguabig lata, pi guchibig lata chigucha gømeelø gøben, kal-lawa nuranrrai marøbiibe Tius, nø gøn. ⁸Ellguabig lata, pi guchibig lata, mõi kabe peg kønrrab gúindø trunundøwei marøb gøn. Inchendø nøm møitøgucha nømui maramigwan maig marig køben, Tiusbe tru marimburo pagaraben, utønrrab gúinrrun. ⁹Kaguende nambe maramigwan Tiusba lata lincha maren, ñimbe Tiuswei elmari tul gøb, katø Tiuswei ya gøb indan.

¹⁰Tius nui ka yandø tab indigwan nan maya traniitøga, kan møg yawan purø may maram gusrebig lataitøwei yawan niga basrønrrabigwan nabe pølbasa basren, katøgane tru na pølsrugwan mara pasrim bala, kusrub yan. Inchendø møitøgucha marøb ambuppe, mandø marøb yainatashchab asha maramig køn. ¹¹Pøs kaguende yawan niga basrønrrabigwan chab marig basrøbene, mugucha gatøgane katø srøig peg nøørø maramig kømøn. Kagen tru chab mara pasriibe Jesucristo gøn. ¹²Inchen tru yawan niga basrønrrai pølbasa marim balabe: orotøga marin gúi, andøga marin gúi, kabe purø tab sruuzheeløtøga marin gúi, tsiitøga marin gúi, putøga marin gúi, kabe ka shautøgatø marin gúi inchen. ¹³Inchen tru nøm treeg mariiløbe møigweindøgucha tørgandø chigúi asamdiig kenamistrun tru maig kønrrabigwan asha marøb gwaløm. Kaguende maig køtashchab naatøga parra ashen, tru naabe kanuin ganui nøm maig marigwan chigúi

ashchai kenamartrun. ¹⁴Inchen møyikkøben tru yawan niga basrørrabigwan marim bala nø marøb kusrab yaig chi gømø, nagu ka buraibene, truburø nøbe tru utamigwan utønrrun.

¹⁵Inchen møyigwein gøben nø chi marøb megaig pachiptinchene, tru nø treeg marigwane kaptøashchun. Nøbe truyugurri weluløppe, weluløbwei inchendø, treetøgucha welulrrab kan nag bilab utuwan burøluløb ib lataig welulabe gønrrun. ¹⁶¿Ñimbe ashmeelø gøtirru? yamba ñimdøweinguen Tiusweimbe tab ya gøben, Tiuswei Espíritube ñimuinug basrabig kuin gúi. ¹⁷Inchawei møyikkøben i Tiuswei yawan pinishibigwane Tiusbe nungucha pinishinrrun. Kaguende Tiuswei yabe newan tabig nuyasiitø gøben, tru Tiuswei yabe ñimdøwein gøn.

¹⁸Kusrebelø guermab ñimasiitø kegørrab pønrrømøtay. Ñimui utu møyikkøben misaamera møin gwaløm yu pirau isuigu truba rruba nu gusrebig kurmab isubiibe, chi nebua ashmfig lataig misramig køn, cierton kusrebig kønrrappe. ¹⁹Kaguende kusremburab kusreeg yu pirauibe Tiuswein gabyube ke chugúinguen marmubendø marig treeg køn. Pøs øyeeg chibig pørig pasran: “Nøm truba rruba kusrebelø guermab isuigutøwei Tiusbe ilørka kegørrønrrai marig køn” chibig. ²⁰Katø treekkucha chibig køn: “Señorbe ashibig køn cha, tru nørro gusrebelai isuiløbe chi isumuinguenig isuilø gúi.” ²¹Inchawei mugucha, ø møyøbesin chib, truba rruba møg inchib waminchib pasramibe chigagøn. Pøs kerriguba ñimuin gøn: ²²na Pablo lata, Apolos lata, Pedro lata; iig waraig pirø lata, øsig kømig lata, kwamig lata, møin gwaløm lata, katø wendø attrabig lata; pøs ñimuiwein gøn kerriguba. ²³Katø ñimbe Cristoielø gøben, Cristobe Tiuswein gøn.

Cristo nøashib karua øriilø nøm marøb gúilan waminchibig

4 ¹Ñimbe mutøgucha namune Cristoi maramigwan marøb, katø Tiuswei tru mu asiimfig sørig pønrrabigwan nam asha marøb, kusrennøb pønrrønrrai pønrrailø gúi, namune ka treetø isua tøgagørrunrigay. ²Pøs tru maramigwan nøm asha marøb gønrrai pønrrainabeløbe møyitøgucha nui mariiløyu chi isumgaig marøbelø gønrrain gøn. ³Nane naimburappe, chi menrra isumøtan, ñim gúi, kabe yu piraelø mugøben tru maig kønrrabigwan asha marøb purrabelø, truilø gúi, nan ‘ñibe øyeeg, øyeeg marøbig køn’ dainab pasramig. Kaguende nabe naasiitøweinguen ‘øyeeg, øyeeg kur’

chimur. ⁴Pøs nabe naimburappe, nai manrraube chi kalø marig kebachibiibe chigaig basrar. Inchendø na treeg pasraitøga ‘chi kalø marmíig kur’ tamig kaagøn. Kaguende nan maig kønrrabigwan asha marøbiibe Señor, nø gøn. ⁵Inchawei treeg købene, treeg maramig pumøwatøbe ‘ñibe øyeeg, øyeeg kuin gøn’ chib, treeg kui mara kørrømarmøtay. Muniiray Señor arrumnegatig. Tru sørig pønrrabig løstøyuelan nøbe toryu wesrawa, møguelø nømui manrrømerayu chi martrab isua tøgagúilan kuragutchun. Inchen møitøgucha Tius tabig wamindig kømigwan utønrrun, nøm maig marig køben, treekke.

⁶Nai nunelø, iigwan kerrigu øyeeg pørøppe, Apoloswanba, nanba asha kusrenrrai indig køn ñimuyasig tab gønrrai, ñim namun asha kusrewa, pørig maig chibigwan purab marøb pønrrømønrraimba, kanune kaig køn chib, kanuingatøgøba inchib ñim truba møg inchib nørreelø misrøb pønrrømønrraimba. ⁷¿Ñun mu gúi nebua asig kønrraima ñune mu rreeg mara basrta? ¿Tius tranigwan utiimíibe ñibe chi tøgagugu? Inchen nø rranigwan ñi uta tøgagúig købene, trube, ¿chindimbarre møg inchib nuig misrku, tranigwan uta gømøwa lata?

⁸iPaare, ñim waachaalleeløbe! Yandø ke newanelø, katø ñimbe yandø chiyutøgucha palømfíig ke newan døgar gøppeendi, ñimbe namun balain gømø, yandø reymera, yandø ñimdø ke tsabø asha garubelø. iKan waachaalleelø! Ñim isa gømøtø, reymera gua, ke ñim garub pønrraimbe, namgucha treetøweim bønrrønrrab, ñimba ke amønigasamig køtan. ⁹Pøs nam Cristo nøashib karua øriilane yandø wendau ke srabesrø melab lataig treeg pønrrønrrai pønrrailø guer, yandø kwanrrai wesrawa pønrrailan latawei. Pøs nambe yu pirau mayelai merrab misagashib srua gúilø gømig køtan, ángesmera lata, misaamera lata. ¹⁰Nambe Cristoimburbikkurri ke chugúinguen mørmeelø lataitø gøben, trune ñimbe Cristoimburbeløyu purø gusrebelø latailø gøn. Nambe ke itaptø gaizheelø gøben, trune ñimbe purø mur chibelø latailø gøn. Ñimbe tabelø gønmaasiilø gøben, trune nambe kaasiilø guer. ¹¹Pøs nambe møin gwalømgatig parøgwai mørøb, pi mulgwai mørøb øyeeg nebuig meler, asru kemig truburab gømuieelø, ichabeta kørriindiilø, katø chu waramig ya gaweyelø. ¹²Nambe namui tasiimeratøga muraara, muraara marøbelø guer. Namune trømbøig tsalø wamøben, namgurrimbe nømune mayanguen

tabig nebuilø gønrrai inchibelø guer. Namun kaig maringucha, namgurrimbe awentabelø guer. ¹³Namune kailø gønmab ashchai isa waminchen, namgurrimbe maig købash inchimø, tammay løtabelø guer. Nambe mõi øyan gwalømgatig yu pirau yandø kaasha kørømarig chilliirrøsr kørreibig latailø guer, mayeelai kaasi shau.

¹⁴Nabe ñimun iigwan pørøppe, ka korig martrab inchimøtø, masken tabig melønrrai waminchar, nai undaaraig ureemera latailø gúimba. ¹⁵Pøs ñimbe Cristoimburabigu kusrenanøbeløbe diez milburab tøgagúindøgucha, kan møkai lataibe kandø tøga gøn. Kaguende Cristo Jesúsweinuube Tiuswei tru tabig srø wamgurri nabe ñimuimbe møkai misrig køn. ¹⁶Inchawei nabe ñimun øyeeg marøb melørrunrigay cha waminchar, na maig marøbig køben, ñimgucha treegwei marøb gønrrai.

¹⁷Inchawei nabe Timoteowan ñimuimay ørig køn, nai undaaraig nusrkai lataig Señorwan maikkucha tarømisrmø megabigwan. Nøbe na Cristo Jesúsweimburab maig marøb uñibig kuigwan ñimun isunanrrun, na chutøgucha iglesiamørig maig kusrenanøb yailan. ¹⁸Inchen ñim møiløbe na ñimun ashchab arrumønrraitamab purø nørreelø misrøb møg inchibelø misrin gøn. ¹⁹Inchendø nan Señor inrrain gøbene, peba ñimun ashchab arrua, nøm truba rruba nørreelø misrøb wamindiilan ashmøtø, tru nømui marøb gúigwan asamønrrun. ²⁰Kaguende Tius nø ashib karub waibe wamindigu basrømøtø, maramburab marigu basran. ²¹¿Nabe ñimuimay tsig srua arrumig balain gøgueh? ¿Kabe undag købiitøga larrø tammay waminchab arrumig balain gøgueh? ¿Ñimbe møigwan balaingøgue?

Møgueløba, ishumburmeraba trømbøig marmumigwan waminchibig

5 ¹Ñimui utube ishumburmeraba, møgueløba trømbøig marøb gúigwan truba wam gøn, ñimui utube møikkøsrønbe panabusrandøwei pera tsuin gúi, judíos komeelø Tiuswan ashmø misaameraguen kan øyeekkatig trømbøig maramigwane purø rrømbøig kui asha treeg marbasiimfigwan. ²Trune treeg kømnebe ñimbe chi gømui lataig nørreelø misrøb ka møg inchippe bønrran! ¿Ashene, øyeeg bubene, ñimbe isuig kishibguen bønrrømø, chindah? Tru øyeeg kaig marøb møwane

ñimui utugurrimbe wegutchai inday. ³Pøs nabe ñimba gòmõtø, nai asr pasraigube yabsrø nørøø basraindøgucha, nai isuigube ñimba basrøwa, tru treeg kaig marøb mowane nun maig itø attrabigwan treeg kønrrai kørrømara pasrøbguen inchar, na ñimui utu basrøwa lataitøwei. ⁴Namui Señor Jesucristoi munchiyu ñim tulundzunøben, na maig isubig kuigube ñimba basrøben, Señor Jesúswei maramburab maramig truyu basrøben, ⁵tru larrø kaig marøb mowane Satanás nø tøgagønrrai pasrtrigay, nui asrwan pinisaig kønrrai, Señor arrub gwaløm nui espíritune kaigyugurri wesraig kønrrai.

⁶Ñim nørreelø misrøb waminchib pønrraibe chi tabig kømøn. ¿Ashmeelø gøtirru, harinayu levaduran lamõtø pusriitø maya sømarigwan larrøb pulingarubig kui? ⁷Tru kølli levadura lataig tøgagúigwan wegutsay, harina sømarig chi levadura larriimíig latawei ñim chishelø gønrrab, ñimbe yandø chabguen treelø gúig køppe. Kaguende Criston, tru namui Pascua Fiestayu Ubisha-unø gweetsamig købigwane namuimburo kweetsig købig køn. ⁸Inchawei nambe tru Pascua Fiestan marøppe, tru kølli levadura lataigwan tøgä marøb gømøgun, tru kaig martrabgøba isub, chine trømbøig maramigwangøba isub indi levaduran. Treeg kømõtø, tru pirri chi levadura chigaig lataitøga fiesta margun, tru pirriyu chi lindisaímíig chi sorig chigaig, ciertongue.

⁹Nabe ñimun kilgayu pørøppe, asrtøga trømbøig marøb ishumburmeraba, trømbøig marøb møgueløba linchimøtay cha borig køn. ¹⁰Inchendø nabe iigwan trenchippe, yu pirau tru Tiuswan ashmø misaameran truilaimburab waminchimur, tru ishumburmera lata møguelø lata trømbøig marøbelan, tru larrø pareelan, chi isa gøben an nila wesrabelan, katø chiwangøben kan tius kui lataig inchibelan. Pøs treeg misaameraba kerriguwan linchimumig kuimbe, trube, ñimbe yu piraugurrimbe webambam nebubsruiñrrun. ¹¹Pøs nabe ñimun pørøppe, ‘ñimui nuneg kur’ chib pasrøbendø, menda ishumburba trømbøig marøptiig, larrø pariig, katø chiwan gøben kan tius kui lataig inchibig, kabe isa waminchib wam gusruptiig, mutsiiraptiig, purø may isa nila wesraptiiba, øyeeløba lindamig kømøn cha borrar. Treeg inchibiibabe mabguen lincha mamumig køn. ¹²¿Pøs nagan Tiuswei misaamera gømeelø nørøreelan kabe na asha marøb pasramig kuitarru? ¿Tru iglesiayuelan asha maramigwane ñim maramig

kømutarru? ¹³Kaguende Tiuswei misaamera gømeelø nøøreelane maig kønrrabigwan Tius nø asha martrab gúinrrun. Inchendø: “Tru ñimui utu tru larrø rrømbøig marøbigwane ñimbe wegutsamig køn” cha, trenchibig køn Tiuswei wamwan pørigube.

Tiuswei ureemera ambugurri, igurri aleguiyab

6 ¹¿Maig marøb pønrrabelø guaasamø, ñim møikkøben Cristogurri nui nuneeba aleguiyam laig tøgagua, Tiuswei misaamerainug kømøtø, tru sølgandø tabigwan marmeelaisrø tru kwayam laigwan ‘tamara guettra’ chib, treeg inchib pønrrørnrappe? ²¿Ñimgan ashmeelø gøtirru Tiuswei misaamerabe yu pirau misagwan maig asha maramigwan nømguen asha martrabelø gúi? ¿Inchen yu pirau misaameran treegwan ñimguen asha martrabelø gøbendøbe, trube, chigøben kwayam lailø yandøzhig pub arrubigwane treetøwei asha martrab gaimabelø gø chindah? ³¿Ashmeelø gøtirru ángelesmeranguen maig asha maramigwan nam asha martrabelø gúiibe, mas yu pirau chigøben pub arrubigwandøbe chinchas asha marmønrrab gø? ⁴Inchawei tru kwayam lailø yu pirau chigøben pub arrubigwane iglesiayuelø gømeelan ¿mandøgurri truilan asha martrai pønserøbelø gøh? ⁵Nabe ñimune kørig burørtrab rrenchar, tru nunelai utu kwayam lailan maig kuigwan paya ashib martrabig chigúi mørøb isum gusrebig ñimui utube, ipaare! ¿ni kandøguen mu gaagø chindah? ⁶Inchen kan treeg martrab isui urasbe kan nuneebe katøgan nuneeba kwayam lawabe, juezmeran ‘tamara guettra’ chib, eshkab ambubelø gøn Tiuswan køremø misaameran.

⁷Ñimbe ñimuimburappe chiguen gømø, yandø newan kegørria bønrran, ñimui ututøwei øyeeg kwayam lab pønrraikkurri. ¿Trembe ñimun sølwan marmø kalø marindøgucha, treegu ka puraambub melamdiig kømø, chindah? ¿Ñimun isa wamincha nilindøgucha, trembe ka awentamdiig kømø, chindah? ⁸Treeg inchibelø gúi urasbe sølwan marmø ñimguen galø marøb, isa wamincha nilamba inchibelø gøn, kan trutøgucha nunelandøwei.

⁹¿Tius nø ashib karub waigwan tru sølgandø tabigwan marmeeløbe tru ketig utamigwan utømønrrabelø gúi ashmeelø gø chindah? Ñimguen ñimdøwei kegørrib pønrrømøtay: møguelø lata, ishumburmera lata trømbøig marøbeløba, chiwangøben kan tius kui lataig inchibeløba, itøluløpteeløba, møkkølig købendø ishug

lataig inchibeløba, mōgueløbe mōgueløasiyaitø, ishumburmerabe ishumburasiyaitø trømbøig marøbeløba, ¹⁰nileeløba, larrø pareeløba, mutsiirapteeløba, isa waminchib wam gusrupteeløba, purø may isa an nila wesrapteeløba, tru Tius nø ashib karub waigwan truiløbe ketig utømønrrab gúi. ¹¹Ñimgucha mōiløbe merrappe øyeeløwei inchibelø gøbig køn. Inchendø mōimbe yandø chishtø pillmailø, ñimbe Tiusweyasiitø tarømariilø, chi kaig kōmeelø lataig tabig kōrrømariilø gøn, Señor Jesucristoi munchiyuba, namui Tiuswei Espiritugurrimba.

Asrbe trømbøig maramigweyasig kōmøtø gøn

¹²“Chiwandøgucha nan meriimíig, na ka maramdiig købendø”, kerrigubabe chi purugunrrabgailø gøn. “Chiwandøgucha nan meriimíig, na ka maramdiig købendø”, na treeg marøb megamig kønrrai na øyeeg marameløyu ni møyutøgucha truig srua yaig pasrønrrabgucha gømur. ¹³“Mamibe patsauweyasig køben, patsøbe mamigweyasig køn”. Inchendø Tiusbe mōnundøgucha i pabaløwanba chigaanrrai pinishinrrab gøn. Asrbe ishumburmeraba, mōgueløba trømbøig marøb tøgagømigweyasig kōmøn. Treeg kōmøtø, asrbe Señorwein gøben, Señorbe asrweyasig køn. ¹⁴Pøs Tiusbe Señorwanma katøle øsig kønrrai kusraig køppe, namungucha gatø treetøwei øsig kōmig kønrrai nui maramburab mariitøga kusanrrun.

¹⁵¿Ñimgan ashmeelø gøtirru, ñimui asrmerabe Cristoi asrutøwei pønrrabelø gúi? ¿Inchen nabe Cristoi asru pønrrabelan wesrawa, kan kaig ishug nui asrwan anwei yanøbigweinug kandø misrtrai mara, truyu pønrrønrraitamaguh? ¡Managuen treebe kōmønrrun! ¹⁶¿Kabe ashmeelø gøtirru, tru treeg kaig ishuuba kandø misra kaig mariibe, yandø kan asrtø lataig kōrrømisrig kui? Kaguende trenchibig pørig basran: “Tru pailøbe kan asrtø gønrrun” cha. ¹⁷Inchen mōikkøben Señorba kandø misriibe, nøba kan espíritutø gøn.

¹⁸Ishumburba, mōgueløba trømbøig maramigugurrimbe wegørray. Mōguelø gatøgan chinetø kalø mariiløbe nømui asrutøwein gōmøtø, nøørø gøn. Inchen ishuuba, mōøba asrtøga trømbøig mariibe, nui asrwandøwei trømbøig maran. ¹⁹¿Kabe ashmeelø gøtirru, ñimui asrbe Espíritu Santo nø kebya basraig tab ya gúi, ñimuinug pasrabig tru ñim Tiuswan uti Espíritu? Ñimbe

ñimdøwei ñimuyasig kòmøn. ²⁰Kaguende Jesucristo nuwei peniilø gøn. Inchawei ñimbe ñimui asrtøga Tiuswan maya nuguen tabig indig kønrrai maray.

Kasharawarbe maig kòmigwan waminchibig

7 ¹Trube, møyimbe ñim nan kilga bōra paya ørig købigwan trencha lètønrrab inchar: Pøs tab gøn cha, kan møg kasharamø, nøtiig kòmig. ²Inchendø ishumburmeraba, møgueløba purø rrømbøig marøbelø gúikkurri, møgueløbe møyitøgucha nui srain dōgaig kòmig køben, ishumburmerabe møyitøgucha nui keg tōgaig kòmig køn. ³Pøs keebe srawei asrwan tab gønrrai maramig køben, sraimbe nui kwei asrwan tab gønrrai maramig køn. ⁴Kaguende sraimbe, nui asr kuimba nuimburaptø tōgagømig kømøtø, keg nø asamig køben, katø kekkurringucha nui asr kuimba nuimburaptø tōga gømøtø, srai nø asamig køn. ⁵Inchawei tru ñim Tiusba wamindamigutø kebamrrab, kan maya yanagatig ñim pailø lata tru treegwan marmønrrab wamincha gømøwabe, kanikkurri kanikkurri asrwan tranmønrrab inchimumig køn. Tiusba wamindamigwan chab wamincha, trugurrimbe ñimui asrwane gatø treetøwei tranamig køn, tru treegwan marmuikkurrindø Satanás ñimun kegørrørskønrrab chigøben mara ashmønrrai.

⁶Nabe iigwane ka øyamay maramdiig køn chatø eshkar. Ke treeg maramig køn cha, karua basrmøtø. ⁷Pøs maya møgueløba na lataitøwei nømdeelø gúimbemab isur. Inchendø møyitøgucha tru nøm trendø treeg kòmigwan keta tranig uta tōgar gøn Tiusweinukkurri arrubigwan, møyibe øyamayig købene, katø møyibe peemayikke.

⁸Nømdeelanba, piudameranbabe trendamønrrun: Na lataitøwei natø kørørmisrimbe tab gøbsruinrrun cha. ⁹Inchendø kaig marmø uñibig uñchab gaimabiibe, kaig marøg købiitø ke chinsraatø inchib uñibgunrriibe kasharaikken søl gønrrun cha.

Kasharawarbe petiyamumig

¹⁰Inchen kasharawarmerane iigwan karua basrar; na garua basrig kømøtø, Señor nø garua basrig køn: Sraimbe kewane kuchimumig køn cha. ¹¹Inchen srai kuchippe, trube, nøtø tsumig køn. Trengømuppe, nui keeba katøle tammay kørørmisra lindamig køn. Inchen keebe nui srawane tarømisrøb kutsamig kømøn.

¹²Inchen gatøganelane Señor trendaig kòmõtø, naimburab na trendamønrrun: Møikkøben kan nuneg, nui sraimbe Tiuswan koremíig pera gua, nø ka lincha meganrrab megabene, keebe tarømisrøb kutsamig kømøn cha. ¹³Inchen kan srai, keebe Tiuswan koremíig tøgagua, nø ka lincha uñchab inchene, sraimbe tarømisrøb kutsamig kømøn cha. ¹⁴Kaguende tru keg Tiuswan koremíibe nui sraingurri Tius kaasiimíig køben, katø Tiuswan koremø sraimbe, nui kekkurri Tius kaasiimíig køn. Pøs treeg kømumbe ñimui ureemerabe kaiba lindig købsruben, mømibe yandø Tius tabig kui asiilø gøn. ¹⁵Inchendø møikkøben tru pailøyu Tiuswan koremíig tarømisra ibene, ka ibasamig køn. Pøs øyeegube, kan srai lata, kan keg lata Tiuswan kørebeløbe imønrrai inchib ke treegutø melønrraingucha pønrrailø gømøn. Kaguende Tiusbe ñimun wamappe, chi isumø pishindø tab waramig kønrrai wamig køn. ¹⁶Pøs, ¿ñi sraimbe ashtirru, ñi ñui kewan inchippa kaigyugurri wesram gønrrab gúi? Kabe ¿Ñi kekkucha ashtirru, ñi ñui srawan kaigyugurri wesram gønrrab gúi?

Tiuswan ashibig maig kømigwan waminchibig

¹⁷Inchendø ñim møigwandøgucha ñimun Señor maig uñchai marig køben, treegutø unamig køn, tru ñi Tiuswan nebua ashib uras maig købig kuibe, trumaytø ka unamig køn. Chu iglesiamerayuelandøgucha iigwan øyamay marøb gønrrai nabe treeg karua basrar. ¹⁸¿Tru ñui isubigwan Cristoinug pasra tøgagønrrai wamab uras yandø circuncidaweikken gøbig kőtirru? Trube, circuncidaweig kømønmaib ashchai inchimøta. ¿Ñim møikkøben ñui isubigwan Cristoinug pasra tøgagønrrai wamab uras asru circuncidamíig køben wamig kőtirru? Trube, treeg marmíig købig kuabe, circuncidanrrab inchimøta. ¹⁹Kaguende circuncidaweig kui chi kønrrab gømøwei, circuncidamíig kui chi kønrrab gømøwein gøn. Tius maig maramigwan martrai pønrrailan møra marig, trube tabig køn. ²⁰Tius ñimun wamab uras møitøgucha ñim mailø gøben, treeg wamiiløbe, trumaytø ka gørrømisramig køn. ²¹¿Tru ñun wamab uras karuindiig megabig kőtirru? Trube, trunune chi isumøta. Inchendø ka karuindø megabig kømønrrab indamdiig købene, trube, treegwan mar. ²²Inchen karuindiig megaben Señor waminabiibe, Señorweimburappe yandø webya basran. Inchen gatø treetøwei ka

karuptø srua gúig megabig kòmøtø, nuimburab uñen waminabiibe, Cristo karuindiig meganrrabig køn. ²³Kaguende ñimbe Tius nuwei peniilø gúig gøppe, møguelø karuindiig melabelø gømøtø guy. ²⁴Inchawei, nai nunelø, ñim møitøgucha ñim maigu pønrrøben wamiiløbe, Tiusba treegutø ka gørrømisray.

Nømdeelan wamindig

²⁵Inchen tru kasharameelø nømdeelaiburappe, Señor nø garua pasriibe chigagur. Inchendø Señor nan lastima asigwan nebua tøgagúikkurri, na maig taigwan ñim treeg kuitamab isumdiig kuinawa, naimburab ñimun øyamay maramdiig køn chinrrab inchar. ²⁶Pøs møi ya øyeeg chinetø isumdiig købene, maig basrabiibe trumaytø kørrømisramig søl lataig kui ashar. ²⁷Inchen ñi srain døgai kuabe, trube, tarømisrtrab inchimøta. Kabe chi sraingaig, ñitiig kuabe, trube, srai tøgagønrrab lamøta. ²⁸Inchendø ñi kasharaikkucha, chi kaig marig kømøwein gøben, katø kan srusrø kasharaikkucha, chi kaig marig kømøwein gøn. Inchen gøben tru kasharabeløbe chinetø nebuig pønrramig arruben, isui melamig kønrrab gøn. Pøs nane ñim treeg nebuig melai ashmuinrrabna gøtan.

²⁹Inchendø nabe, nai nunelan, ñimun trenchinrrab inchar: Srabe gwalømmerra pumibe purø landøraim basran cha. I landøzhig pasrabigwan Tiusweimburabigwan martrab, sralø tøgærbe sralø tøgær gømøwa lataig bønrray. ³⁰Inchen truba isui kishib melabeløbe isui kishib pønrrømøwa lataig bønrrøben, truba kasrag bønrrabeløbe chi kasrag bønrrømøwa lataig bønrrøben, chigøben penabeløbe chigucha penømøwa lataig bønrrøben, ³¹katø yu pirau chine købigu tab gúi mørøb amønibeløbe ke truitø srua yailøgucha amønimumig køn. Kaguende yu pirau øyeeg pasrabiibe ka pureb arrubiitø gøn.

³²Nane ñim chigucha chi isumikkaig treeg amønaimbemab gøtan. Kaguende kan kasharamíig nøtiibe Señorweimburabigwan katøguchingen isun, Señor tab gúi wanrrai maramigwan.

³³Trune kasharaweibe yu pirau chigøben købigwan mas isun, nui srawan mandø tab gúi wanrrai maramigwan. ³⁴Incha nø chi martrab isuiibe pabalø, pabalø isuim basran. Inchen kan ishug kasharamíig, nøtiig, kabe kan srusrø nøtiibe Señorweimburab marøb megamigwan mas isun, nui asru lata, nui espíritu lata

Señorweyasiitø gønrrab isua. Trune kasharawa ishuube yu pirau chi købigwan mas isun, nui kewan mandø tab gúi wanrrai maramigwan.

³⁵Igwan na kerrigu ñimun trenchippe, ñimundøwei tab gønrrai trenchar. Kabe ñimun ke truyutø iløsrka melønrraingucha inchimøtø, masken mumay amønarnigwan treeg marøb amøña, Señorweimburabigwan tab chi iløsrkaimíig marøb melamig kønrrai inchar.

³⁶Inchen mu møøba kimø srusran kan møg kasharanrrab misraig, nø tab marmurmab kørig isub, katø tru srusrøgucha yandø køligwein gøben, treekkurri møøbe yandø kasharam gúi ashabe, trube, maig maramdiig køben treeg maramig køn. Treebe chi kaig marøb pasraig kømøtø gøn. Ka gasharay. ³⁷Inchen kan møg nui manrrau nø maig isuigwane treeg martrab kandø isua basrabig, katø nui asru maig marøg købig arruben, truig mumaygucha srua irramamø, tru nø maig isua tøgagúigwan isua mōra tōga basrōwa, tru srusrōba kasharamønrrab nø treeg isua basrabiibe, kasharamuig søl gøn. ³⁸Inchawei tru kasharanrrab misri srusrōba kasharaig sōldøwein gøben, katø kasharamuibe mas tabguen gøn.

Piudameraimburab waminchibig

³⁹Keg øsig uñene, sraimbe nøørø gønrrab gømø, kandø gøn. Inchen keg kwabeneguende, yandø nuin gúin gøben, mubagøben ka gasharamig køn, Tiuswan ashibiibabe. ⁴⁰Pøs na isuibe øyeeg køn: katøle kasharamø, nøtø kørømisrikken, mayanguen tab gønrrab gúi. Nagucha Tiuswei Espiritun tøgagurmab isua, trenchib pasrar.

Cierton tius kōmeelan trani yaumeran mandø indamigwan waminchibig

8 ¹Animalmera kweecha tru yauwan taska mari tiusmeran trana pønšraigweimburappe nambe mayeelōba nebua ashibelø guer. Pøs tru nebua ashib kusreibe ka nørreelø misrøb pønrrønrrai maren, trune tru undag købig Tiusweinukkurri arrubiibe Tiusweimburabigu nørøram burugubig køn. ²Møikkøben maitøguen nebua ashibig kurmb isubiibe, tru maig kuigwan tab nebua asamigwane katøgucha tab ashmø srø gøn. ³Trune møikkøben Tiuswan undaguigwane Tiusbe nune mu gúi nebua asan. ⁴Trube, tru taska mari tiusmeran

pønsraig yaumeran maigweimburappe ðmandø chinrrab? Pøs tru taska mari tiusmerabe yu piraube chigucha gømeelø gúi nambe ashibelø guer, katø Tiusbe nøtø kandø gúi. ⁵Pøs srømbalasrø lata, piraui lata tiusmera cha wamiilø møiløgøben købwei indan ('tiusmera gøn' cha, wamiiløba, katø chiwandøgucha nøm garub purrabelø cha wamiiløba truba nørrø køb lataitøwei). ⁶Treeg kuingucha, namuimbe Tiusbe kandø nøtø gøn, tru Møskai. Tru chigurrimbunø arrubiibe nuinukkurrindø arruben, katø nambe nuyasig øsig amøner. Katø Señor Jesucristo kandø gøben, chitøgucha købiibe nøgurriwei pønrrøben, namgucha nøgurriwei øsig amønibelø guer.

⁷Inchendø mayeeløbabe iigwane chigúi nebua ashmeelø gøn. Møiløbe katøgucha tru taska mari tiusmeran tøgagøm gusreelø gøbig kua, tru mamimeran mappe, tru tiusmeran trani mamig kønmab isua mabelø gøn. Incha tru nømui isub kebachib pasrabigu kullaguelø gúikkurri, yandø kaig mararmab isub kørrømisrøbelø gøn. ⁸Pøs mamibe Tiusweinug nam katøguchi kemalla pønrramig kønrrai marmøwei, katø nam tru mamuikkurri mas kailø misrtrab gømøwei, kabe nam truigwan maikkurri mas tabelø gønrrab gømøwein gøn.

⁹Inchendø ñim tru chi kalø gønrraitamab isumikkaig marøb tøgagúigwane kullaateeløbe truyu srurrengwanrrain gømøtø ashiptø maray. ¹⁰Kaguen møikkøben nui isub kebachib pasrabigu kullaatiig tøgag, ñi tru maig kuigwan yandø tab nebua ashib kusrebig, tru taska mari tiusmerai tab yausrø ñun mab wai ashabe, ðnøgucha tru taska mari tiusmeran trani mamimeran ka manrrurmab isumønrrab gøh? ¹¹Inchawei tru maig kuigwan ñi nebua asha kusrewa tøgagúig, truikkurrindø kan nuneg kullaatiibe yandø kebeña, pinab pinønrrun, Cristo nuyasig yamba purøgwaig købigwan. ¹²Inchawei øyamay tru nunelan kaig marøb, nømui isub kebachib pasrabigu kullaguigwan kørriincha kørrømarøb pønrrappe, ñimbe Criston kaig marøb pønrran. ¹³Inchawei mamibe nai nunewan kebenøsrkamitø gønrrab gøbene, managuen nabe yauwane mamumønrrun, nai nunewan ka srurrengwangarumønrrappe.

Cristo nøashib karua ørig maig marøb pasramig

9 ¹ðMaig maramdiig køben treegwan maramig nabe tøgag basrømubra chindah? ðNabe Cristo nøashib karua ørig kømubra chindah? ðKabe nabe Jesús namui Señorwan ashmuig kuig kø chindah? ðSeñorweimburab na marøb pasraigu yell

gørrømisrøbeløbe ñimwein gømøtirru? ²Pøs møilaimbe nabe Cristo nøashib karua ørig lataig utig kømuinaindøgucha, isa gømøtø, ñimuimbeguende nøashib treeg karua ørig kur. Kaguende Señor nan nøashib karua ørig kui asamdiibe ñimwein gøn.

³Nan møiløgøben 'øyeeg marin gøn' chib, payibelane 'øyan gøn' chib, kusra løtamønrrun. ⁴¿Kabe nam gøbgan mab, muchib indamig kømuitarru? cha. ⁵¿Kabe nam gøbgan Tiuswan ashibigwan srai mara, pera bønrramig kømuitarru? cha, tru gatøganelø Cristo nøashib karua øriiløba, katø tru Señorwei trag nuneløba, katø tru Pedroma, truilø lataitøweingue. ⁶¿Kabe naba, Bernabébatøgan namui taska maramigwan elatsamig kømønrrain gúitarru, namui øsig waramig marøb gúigwan?

⁷¿Kan suldauma maig kuaasamø nø suldau basraptøga, chi palabigwan nui andøgatøwei penabiibe? ¿Kan mu guaasamø uvas tusrmera ellguawa, uvas misren, truigwanguen mamíibe? ¿Kan mu guaasamø kabramerane ashib tøgagøbendø, pitsøn sunna muchimíibe? ⁸Kabe na øyeeg chib pasrappe, ¿møguelø isuimay trendaig tamagueh? ¿Tru maig maramigwan martrai Moisés pørikkucha treetøwein chibig kømuitarru? ⁹Kaguende tru maig maramigwan martrai Moisés pøriguma øyeeg chibig pørig basran: Kan wey tirigun kwattrai itøbunab megabigwane mabashig kømub pusalgutsamig kømøn cha. ¿Kabe Tiusbe weymeran isua trendaig kø chindah? ¹⁰Øyeeg chippe, ¿namuimburab trendaig kømønrrab gø chindah? Pøs namuyasigwei pørig kuig køn. Kaguende pirowan arab megabiibe mamuitamab isuawei kwallib megaben, katø mugøben tirigun kwattrai itøbunab megabiibe tru misrigwan manrrab isuawei marøb megan.

¹¹Inchawei nama ñimuinug Tiusweimburabelan ellmarig købene, trube, ¿ñim chigøben tøgagúigwan maitøguen nam utamig menrra indig kønrrab gø chinderah? ¹²Tru kaneløma nømui chi palabigwan ñimun utambuawei utig købene, ¿nambe treetøguen gømø, utamigwein gømuitarru? Inchen gøben, nambe tru treeg utamigwane managuen treebe marmuig køn, Cristoi tabig srø wamwan chigøben iløsrkøbelø pønstrømønrrab, chigúindøgucha ka puraambub melaig køn. ¹³¿Ashmeelø gøtirru, Tiuswei yau marøb melabeløma truyigwan maben, katø Tiuswei altaryu marøb pønrrabeløbe truyigwan mabelø gúi? ¹⁴Inchawei Señorbe

treetøwei karua basrig kòn, Tiuswei tabig srø wamwan eshka
kusrenanøbeløbe trutøga øsig warønrrain cha.

¹⁵Inchendø øyeeg maramdeelø gúindøgucha, nabe managuen
trunune marmuig kòn. Katø iigwan na pørøbgucha, nan treeg
martraimab isua børmur. Pøs na chi treeg marmøwagurri na
øyeeg purø tab gúi mørøb møg inchib waminchib pasraigwan nan
mugøben kerramøwatø, kwamikken søl gønrrautan. ¹⁶Pøs Tiuswei
tru tabig srø wamwan na eshka kusrenanøb pasraibe nainetø
møg inchib waminchib pasramig kømøtø gøn. Kaguende nane
truigwane martraim basrig kur. iPøs Tiuswei tabig srø wamwan
na eshka waminchimuinaisruandøbe, nane maig kuaasamø!
¹⁷Inchawei maramigwan na naashib martrab isua marabe, truburø
utamigwane utamønrrun. Inchen treeg kømøtø, ke nan trunun
martrai inchendø marinaisruandøbe, trube, tru karua basrigwan
ka marmøn chimønrraindø marig kørørmisrtrun. ¹⁸¿Pøs trube, tru
na marøb pasraimburo utiibe chi gønrrab gø? Na Tiuswei tabig
srø wamwan eshka kusrenanøppe, truburø chi tranrrain gømø,
na ka yandø waminchib pasraig, truig kòn, tru Tiuswei tabig srø
wamwan waminchib uña, na miambuawei miamigwan treeg utab
pasrømø kagøbasig.

¹⁹Nabe mu karuig megamfig kuagucha, nabe natøwei mayeelø
karuindiig meganrrab pasramisrar, maya nebuingatig Cristoyasig
misag nørø nebua tøgagønrrab. ²⁰Nabe judíosmerai utu uñippe,
kan judío lataitøwei uñibig kur, nøm Criston nebua ashchai
martrab. Tru maig maramigwan martrai Moisés pørig maig chibig
truig ke nø garuig natøweinguen ke treeg pasrømuinaindøgucha,
tru pørig maig chibig køben treeg melabelai utube, trube, tru
pøriilan marøb megabig lataig uñibig kur, tru pørig maig chiben
treeg melabelan Criston nebua ashchai martrab. ²¹Inchen
Moisés pørigwan tøgagømeelai utube, treetøwei nagucha
chigaig lataitøwei uñibig kur, tru maig maramigwan pørig
chigaig melabelan Criston nebua ashchai martrab. (Tius maig
maramigwan martrai pørigwan na chi asamig chigaig kønrrab
gømøtø, Cristo maig martrai karuigwan trunun nabe marøb
megabig kur.) ²²Kullaateeløbabe nagucha kullaatiig lataitøwein
basrabig kur, tru kullaateelan Cristoin gønrrai martrab. Mu
misaamerabatøgucha, nøm mailø gøben, treeg kønrrab inchibig
kur, møilandøguen chinchagøben kaigyugurri wesranrrab.

²³Igwan na kerrigu øyeeg marøppe, Tiuswei tabig srø wamgurri øyeeg marøbig kur, truyugurri purø tabig tøgag arrubigwan nagucha trunun tøgatø utønrrab.

²⁴¿Ashmeelø gøtirru misaamera nørø tulaamba ashib purrainug møig kanab luldashchab luløbeløma luløppe, soteeløbawei lulendø, tru kanaigwan utabiibe kandø gøbig kui? Inchawei ñim luløppe, tru kanawa utamigwan Tius tranig utønrrurmab isua lulay. ²⁵Inchawei møikkøben treeg lulameløyu kebya basramisrøbiibe, chiyutøgucha nui asr maig marøg kōtanmaptø marøb megamøn. Pøs truiløbe kan corona ka petø minchib pinønrrabigwan utønrraptø treeg maren, trune nambe corona managuen minchib pinønrrabig kōmfigwan utønrrab Tiusweiwan marøb meler. ²⁶Inchawei nabe luløppe, chu bumgúinguen mormubendø, luløbig lataig luløb megamøwei, katø kan kwayabig nørøtø, nørøtø gurrøb kwayab lataig pasrømøwei inchar. ²⁷Treeg kōmøtø, nabe naasiitøwei nai asrwane purø murigu purayam gusrenrrai kusrenanøb ke treegwan kōnrrai inchibig kur. Inchippa na katøganelan eshka kusrenanøb pera basrøwa, natøweinguen kaiman dainab megamønrrappe.

Taska mari tiusmeran Tius kui lataig mara tøgagømunig

10 ¹Nabe, ñim nai nunelan, tru merrabsrø namui kōlli misag, judíosmera, mayeeløba wañi umbu melab, katø mayeeløba mar Rojoyu larraambub indigwan pesannamø, isua gōnrrai inchar. ²Incha nømbe mayeeløba tru wañimba, marba pinøgasrøb pinøbuliilø gúikkurri Moisésba kanbalatø bōnrran. ³Incha gatø treetøwei mayeeløba Tiusweimburab mamigwandøwei mab, ⁴katø mayeeløba Tiusweimburab piwandøwei muchib indig kōbig kōn. Kaguende tru nu srug nōmun lincha ibig Tius tranigugurri webarrub piwan nømbe mutsig kōn. Inchen tru nu sruube Cristo gúig kōn. ⁵Inchen treeg amrruig kuindøgucha, misagwane kerrigu latauwan Tiusbe chi tab gúí ashmuig kōbig kōn. Incha nōmui asrmerabe mu misag warab waraimønug truørø kwaig waramig nebuig kōn.

⁶Øyeeg pureppe, nam trunundøguen asha kusremig kōnrrain gúig kōn, nam ke chinchimmørø inchib chigøben kailan isub pōnrramig kōmōnrrai, israelitasmera ke chinchimmørø inchib isub pōnrrab lataitøwei. ⁷Pøs nōm mōiløgøben chiwangøben kan

tius kui lataig inchibelø lataitøwei marmøtay ñimbe. Pøs tru uras nøm øyeeg marigwan treeg chibig pørig pasran: “Tru misaamerabe manrrab, mutchab purramisra, trugurrimbe pailamburab pailanrrab kurrig køn” cha. ⁸Katø nambe menda møgueløba, menda ishumburmeraba namui asrtøga trømbøig marøbelø gømumig køn, tru møiløgøben truilø treeg marøb latawei. Incha treekkurri kan gwalømyutø misaamera 23.000 kwaig købig køn. ⁹Katø Señorwangucha ke chinchibig køtamørtrab kaig inchimumig køn, tru møiløgøben truilø ke chinchibig køtashchab inchibelø latawei. Pøs truiløma ulmera tsatsiilø kwamig nebuig købig køn. ¹⁰Nilø waminchib ñimuinetø namig, Tiuswan mulla mormøtay, tru møiløgøben truilø treeg marøbelø lataitøwei. Truilanma tru kweechib ángel arrua, nømune pinisaig køn.

¹¹Israelitasmeran øyeeg pureppe, nam trunundøguen asha kusremig kønrrain gúig køn. Incha nam kusremig kønrrai pøriilø pønrran, nam yandø tru srabe gwalømmerra pui warab misaamerayasig. ¹²Inchawei møikkøben Tiusweinug yandø ke tab pasrarmab isua basrabiibe, trube, peñchab gømø, purø tab isua basrau. ¹³Ñim ebenøsrkønrrai indinab chigøben puinab pønrraibe, ke mun treeg nebui asiimiig kømøtø, mundøgucha treeg nebui asig køn. Inchendø Tiusbe managucha nø maig tabig køppe, trendø treeg kua igatø! ke ñim kaima melønrraingatikkuha treeg bønrrøbashmønrrun. Ke chinchibelø gøtashchab puim bønrrøbene, truguetøtø treegugurri wegørramigwan tøgatø tranøbig køn, ñim kørørmø, ka buraambamig kønrrai.

¹⁴Inchawei treeg købene, nai undaarailø, tru taska mari tiusmeraimburabigwane kerriguwan tarømisray. ¹⁵Nabe ñimun waminchippe, yandø tab chigúi mørøbelan lataig waminchar. Na wamindigwane søl gøtashchab isub purray. ¹⁶Tru copa mayanguen tabig, tru nam, ‘mayanguen pay’ tain copabe, ¿tru Cristoi ani namgucha kanguelarrøtø lata nøba bønrraig truig kømuitarru? Katø nam pirriwan pirisha maibe nam kanguelarrøtø Cristoi asru kanbalatø pønrraig ¿truig kømuitarru? ¹⁷Kaguende pirrima kandø gúig køppe, namgucha truba nu gøbendø, nambe kan asrtø guer, pøs mayeeløba kan birriwandø mabeløgurri.

¹⁸Tru israelitasmeranma ñimguen isua asay: Tru kweecha tranig animalmerai yauwan mabelø, treeg marøppe, ka yauwandø mamøtø, ¿altarweimburabigwangucha tøga marøb

põnrrømuitarru? ¹⁹Iigwan na øyeeg chippe, tru taska mari tiuswan trani yaumbe chi køn chib, kabe tru taska mari tiusbe chi marøbig køn chib pasrømur. ²⁰Pøs nabe treeg kømøtø, Tiuswan ashmø misaamera judíos komeelø tru animal gweecha traniibe Tiuswan gømøtø, kwaimandziimeran tranig køn cha rrenchar. Incha nabe ñimune kwaimandziimeraba kanbalatø marøb pønrrømønrrai inchar. ²¹Ñimbe Señorwei copayuigwan mutsamba, kwaimandziimerai copayuigwan mutsamba inchimumig køn. Katø Señorwei mishatsigúigwan mamba, kwaimandziimerai mishatsigúigwan mamba inchimumig køn.

²²¿Kabe nambe peg tiuswan keesha bønrramisrøb Señorwane ke larrø namishinrrab inchab gø? ¿Kabe nambe nø lataguen gømø, purab martrapteelø gøbra chindah?

**Chiwandøgucha marøppe, Tiuswan tabig
wamindig kønrrai maramig køn**

²³Pøs: “Chiwandøgucha meriimíig, ka maramdiig”, købendø, chiwandøgucha lutøgurri maramibe chi tabig kømøn. Pøs: “Chiwandøgucha meriimíig, ka maramdiig”, købendø, lutøgurri truiløbe Tiusweimburab nørøramigube chi purugunrrabgailø gøn. ²⁴Mutøgucha ñuimburabigwandø tab gønrrai lamøtø, katøganelaimburab tab gønrrai lamig køn.

²⁵Yau yanøbyu maig yau yanbashtø ka pena may, ñimui isub kebachib pasrabikkurri chi paya mørøb pønrrømøtø. ²⁶Kaguende: “Pirøba, truyu chi pønrrabeløbañau kerriguba Señorweindø gøn.”

²⁷Inchen møikkøben Tiuswan køremíig nui yamay manrrab ñimun amrrunrrigay chiben, ñim ambabe, ñimun chi manrrai pønsrøbendø, mamig køn, ñimui isub kebachib pasrabikkurri chi payib purrømøtø. ²⁸Inchen ñimun møikkøben: “I yaumbe tru taska mari tiusmerai kweetsi yaun gøn” cha, trenchibene, trube, mamumig køn, tru treeg yaun gøn cha eshkabigwan mindisha kørørmarmønrrappa, katø trugurri isub kebachib pasrabigu kalø gøn chibig tøgagømønrraimba. ²⁹Inchendø nabe tru isub kebachib pasrabig ñuinug pasrabigwan waminchib pasrømøtø, nabe tru gatøganuinuguigwan waminchib pasrar. Na chi iløsrkaimíig basraigwan gatøgan møweinug isub kebachib pasrabig nan kalø marøptiig kui mara, chiburø treeg marinab pasramibe chigagøn. ³⁰Mamigwan na Tiuswan ‘mayanguen ungwa, ungwa’ cha maben,

trube, ÷nane chindimbarre ‘kalø marøptiig kòn’ dah, tru na ungwa taig mamigwan maikkurri? ³¹Inchawei mabyu lata, muchibyu lata, kabe chi peg marøbyu lata, chi marigutøgucha Tiuswan maya nuguen tab indig kònrrai maramig kòn ñimbe. ³²Pøs mu misaamerandøgucha, judíosmeran lata, griegosmeran lata, Tiuswei iglesian lata ka srurrengwanrrai marmøtay, ³³na mundøgucha chiyutøgucha lata tab gònrrai inchib megab lataitøweingue. Nabe naimburaptø tab gònrrai lamøtø, misaamera truba nørrowan tab gònrrai inchibig kur, nøm kaigyugurri wesrailø gònrrai.

11 ¹Na maig marøbig køben, ñimbe trunun asha marøb melønrrigay, Cristo maig marøbig køben, na trunun asha marøb megab lataitøweingue.

Tiuswei yau maig kømigwan waminchibig

²Nabe ‘ñimune tabig marin gòn’ chib mayanguen tabig waminchar, kaguende ñimbe chiyutøgucha nane isua melab, na ñimun maig waminchib kusrenniilane ñimbe elachimø, tøgä bønrraimba. ³Inchendø nabe iigwan nebua asha gònrrai inchar, Cristobe maya møguelaim bala nø ashib pasrabig, nø tur gøben, katø møøbe ishuwan nø ashibig, nø tur gøben, Tiusbe Criston nø ashib pasrabig, nø tur gúi. ⁴Mu møøtøgucha turwan nebetsa Tiusba waminchib, kabe Tius maig karuigwan eshka b waminchib, treeg basrabiibe, Cristo, tru turwane chigucha gømíig kuig lataig marøb pasran. ⁵Inchen mu ishuutøgucha chi nebetsømø, turtiig Tiusba waminchib, kabe Tius maig karuigwan eshka b waminchib, treeg basrabiibe, møømisag, tru turwane chigucha gømíig kuig lataig marøb pasran. Kaguende pusrugwan mulla, barig lataitøwein gòn. ⁶Inchen ishug nebetsømíibe, trube, pusrugwan mulla, baramig kòn. Inchen ishuwan pusrugwan mulla, bariibe korig kònrraptiig købene, trube, turwan nebetsaig kømig kòn. ⁷Inchen møøbe turwan kasrøb nebetsamig kømøn. Kaguende møøbe Tius nø maig køben treetøwein gøb, katø Tiuswei tru purø nuig törguegurnabigwan nuinug kenamarøbig kòn. Inchen ishuumisaabe møwei tru törguegurnabigwan kenamarøbig, treeg kòn. ⁸Kaguende møøbe ishuumisagweinukkurri arrubig kømøtø, ishukken møweinukkurri arrubig kòn. ⁹Inchagucha tru srøsrø Tius mowan marøppe, ishuumisagweyasig marmøtø, ishuwanguen møømisagweyasig marig kòn. ¹⁰Inchawei treekkurri ishuube møg

maig chiben treeg megabig kui ashchai, ángelesmeragurri nui turwane nebetsaig kômig kôn.

¹¹Inchendø Señorweinuube mømmisag ka nuimburaptø gônrrab gômøwei, ishuumisag ka nuimburaptø gônrrab gômøwein gôn.

¹²Inchawei ishuuma møweinukkurri arrub lataitøwei, mökkucha ishuumisagweinukkurri kal-labig kôn. Inchendø kerriguba arruppe, Tiusweinukkurri arrubig kôn. ¹³Inchawei ñimdøwei maig kôtashchab isuy: ¿Ishug misaabe turwan chi nebetsømíig Tiusba waminchib pasramig söl gøbsru chinderah? ¹⁴¿Inchen kan mowane pusrugwan yabig wanøsrkøb tøgagømibe trømbøtiig kørikken gônrraptiig købig kui, tru trendø treeg kônrrai chine mara pønrrailøtøweinguen kusrennøbig kômuitarru? ¹⁵Trune ishuwane pusrugwan yabig wanøsrkamibe nuimbe truba tabig kôn, kaguende ishuwane turyu nebetsig lataitøwei pusrugwan tranig kua. ¹⁶Inchen møikkøben ‘øyeelan treeg kømøn’ chib, chinetø chib waminchig kui indindøgucha, nambe øyeelanwei maren, katø Tiuswei iglesiamera chigucha treetøwei marøbelø gôn.

Señorwei mamigwan mabyu maramgailan marøb

¹⁷Na øyamay maramig kôn chib yu wamindamigube, ‘ikan waachaalleelø! yangucha tabig marøb melain gôn’ chinrrab inchimur. Ñim tulundzunappe, ka trømbøig martrab tulundzunabelø gúin gôn, chi tabig martrab gømøtø. ¹⁸Na pølbasa wamindamibe øyeemerrig kørre, ñim kan iglesiasun tulundzunøbendø, ka nøørø nøørø misra warønrraptørre tulundzunabelø gúigwan, pøs møyube nabe treegwein gøbwei inditamar. ¹⁹Pøs øyeeg nømuin gúi nøørø misrøb ñim treeg inchib waramig palabwei indan, ñimui utu møilø sölwan isua marøbelø gúitashchab truyu asamig kônrrai. ²⁰Pøs ñim kanbalatø linchib tulundzunappe, Señorwei mamigwan manrrab tulundzunømøtø, ²¹møitøgucha ñimui mamigwanmerrig manrrab tulundzunabelø gôn, katøganelan munugumøtø, kane parøgwaig wamnebe, kane mutsiguikken wanrrab. ²²¿Kabe ñimbe yamera chigargøtirru mab, muchib purramig? ¿Kabe Tiuswei iglesiane kaashib, chigar burrabelane korig burørtrab inchigueh? ¿Nabe ñimune mandø chinrrab gøh? ¿Kabe, iwaachaalleelø, yangucha tabig marin gôn! chinrrab gø chindah? iØyeeg marigwane kan waachaalleelø truba tabig marin gôn! chinrrab pasrømur.

**Señorwei pirriwanba, copayu mutsigwanba mandø
maramigwan Pablo tab eshkab**

(Mt 26.26-29; Mc 14.22-25; Lc 22.14-20)

²³Kaguende tru na ñimun katøle kusrenanigwane nabe
Señorwan utig kuig køn: Señor Jesúswan tru ashig kømui
inchibelan tranrrab yem, nøbe pirriwan muta, ²⁴yandø
'mayanguen pay' cha, pirishabe, trendaig køn: "Iibe nai asr køn cha,
tru ñimuyasig kwanrrai tranig. ligwan øyeeg marøppe, nan isub
gønrrab martrigay" cha. ²⁵Incha tru mamigwan chab mabe, katø
copangucha mutabe, trendaig køn: "I copabe tru nai anindøga Tius
tru srø acuerdo mara basrig, truig køn cha. ligwan mutsimørig,



chu uraskucha nan isub gønnrab martrigay” cha. ²⁶Inchawei chu uraskucha i pirriwan mab, i copayuigwan muchib indimørig, Señorbe namuimburo kwaig købig køn cha ñimbe eshka b pønrran nò arrumnegatig.

Señorwei mamigwan sølwan maramig

²⁷Inchawei møykkøben maig købash inchendø, Señorwei pirriwanba, copayuigwanba mab, muchib inchibiibe, Señorwei asrwanba, aniwana nuinug trømbøig marøb pasran. ²⁸Inchawei møytøgucha ñimashib maig bønrrabraitashchab isummerrig isuy. Trugurrimbe pirriwan mab, copayuigwan muchib indamig køn. ²⁹Kaguende møykkøben Señorwei asrwane ni kan maig kerahmabguen isua ashmøtø, tru mab, muchib indibe nuyasiitøwei lab pasran trømbøig nebui pasramig kønrrai. ³⁰Inchawei øyeekkurri ñimui utube kwanrreelø, kullaarailø truba nørø gøben, møylo be kwaig, mu gaagøn. ³¹Inchendø nam namashib møytøgucha nam mandø bønrramigwan treeg bønrrabraitashchab tab isubene, trube, Tius namun maig maramigwan asha mara, kørrø mariilø gømbu sruinrrun. ³²Inchendø Señor namun maig maramigwan asha mariilø pønrrappe, nam kalø marigwan nò namun ølmartrab mariilø bønrrer, pirau nun ashmeeløba tøgato namun kaigy pønrrailø gømmønrrab.

³³Inchawei, nai nunelø, ñim tru mamigwan manrrab tulundzunabe, kangurri gangurri muniiramig køn. ³⁴Ñimun møygan gøben parøgwabene, trube, ñimui yausrø mamig køn, tru ñim tulundzuna waraibe Tius ñimun møra pønrrønrrai marinab waramig kømmønrraimbe. Inchen nørø katøgan maramelane, na trusrø pua, maig kønrrabigwan tamara bønrramønrrun.

Espíritu Santo møygwandøgucha Tiusweyasig peg peg marøbelø gønrrai pirisha ketig

12 ¹Nai nunelø, Tiusweimburabeløyu iglesiayasig marøbelø gønrrai Espíritu Santo keta tranigweimburappe, chigüinguen mørmeelø gørrø misrmønrrai inchar.

²Ñimbe isua güinrrun, ñim judíos komeelø Tiuswan ashmeelø gøb urasbe, mumay gøben srua amrramabelø gøbig kuigwan tru chi wamgailø taska mari tiusmeraimay. ³Inchawei nabe ñimun eshkanrrab inchar, Tiuswei Espíritu trendingaruben

waminchibiibe, mugucha øyeeg chinrraamøn cha: “Jesúswane kaig nebubash” chib. Katø Espíritu Santo trendingarumubene, mugucha øyeeg chinrraamøn cha: “Jesúsbe tru Señor gøn” cha.

⁴Pøs Tiusweimburabigu marøbig kørnrai keta traniiløbe peg, peg købendø, tru traniiløbe Espíritu Santoinukkurrindøwei arrubig kørn. ⁵Katø chi purugub marameløgucha, peemay, peemay maramig kuindøgucha, Señorbe kandø gøn. ⁶Katø chi marameløgucha peemay, peemay maramig købendø, tru marameløyu chiwandøgucha trumørig mayeelainug marøb pasrabiibe, tru Tiustøwein gøn.

⁷Inchendø Espíritu Santo nø møigweinuutøgucha øyamay marøb kena basrabig kørn, mayeelan kelarrappa tab gørnrai. ⁸Kaguende møigwane Espíritu Santo nøgurri nui wamindiiløyu maig kømigwan purø may isua waminchibig kørnrain rranøppe, katøganune maig kuigwan tab chigúi mōra waminchibig kørnrai tranan tru Espíritu Santotøwei. ⁹Inchen tru Espíritu Santotøwei katøganune nui isubigwan Jesucristoinug tøgagømburab tøgagørnrai tranen, katøganune kwanrreelan tamarøbig kømigwan tru Espíritu Santotøwei tranan. ¹⁰Katøganune Tius maramburab mariilan marøbig kømigwan tranen, katøganune Tius maig karuigwan eshkabig kørnrai trunun tranen, katøganune Tiuswei Espíritu gúin gúi, kabe treeg kømuin gúi törgandø nebua ashibig kømigwan, trunun tranan. Inchen katøganune peg, peg wammera waminchibig kørnrain rranen, katøganune tru peg wammera wamindiilan: “Øyeeg tan” cha eshkabig kørnrai, treeg rranan. ¹¹Inchen iilan kerrigu øyeeg marøb pasrabiibe, nõtø kandø, tru Espíritu Santotøwein gøn, møigwandøgucha nun maig tranamdiig køben, treeg tranøbig.

Asrbe kandø gøbendø, truyube chine bønrran

¹²Asrma kandø gøbendø, tru asrube chine tōgaig kørn. Inchen tru asru pønrrabeløbe truba nu gøbendø, kan asrtø gøn. Inchawei Cristogucha treetøwein gøn. ¹³Kaguende nambe mayeeløba kan asrtø misrtrab kan Espíritutøgatø pinøbuliilø gúig kørn, judfosmera lata, griegosmera lata, karuindiig melabelø lata, treeg melømeelø lata. Incha namune mayeelanba tru Espíritu Santondøwei utønrrai tranig kørn.

¹⁴Inchawei asrbe kanbaløtiig kōnrrab gōmōtō, chine, chine pōnsraig tōgaig kōn. ¹⁵Inchawei srōbma øyeeg taimbeh: “Tasig kōmuikkurri asruig kōmur” cha. ¿Treekkurri, trube, asruig kōmōtō, nōøriig kōnrrautah? ¹⁶Inchen kalugucha øyeeg taimbeh: “Nabe kab gōmuikkurri asruig kōmur” cha. ¿Treekkurri, trube, asruig kōmōtō, nōøriig kōnrrautah? ¹⁷Inchen asr ørōba kaptō gúimbe ¿trube, mandø incha mōrōbsruerah? Inchen kerriguba kalutō gúimbe ¿trube, mandø incha irrōmōrōbsruerah? ¹⁸Pōs Tiusbe asru chiwandøgucha nōm chu pōnrrōnrrabelan truyu, rruyu pōnrrōnrrai pōnsraig kōn, nun maig asōnaben, treekke. ¹⁹Kaguende asru chi pōnrrabig kerriguba kanbaløtiig kuimbe ¿trube, asrbe chu basrabsruerah? ²⁰Inchawei nuin gúi, nuin gúi truba yambalø gōbendø, asrbe kandø gōn.

²¹Pōs kappe tasigwane øyeeg chinrraamōn: “Ñune chi palōmōtan” cha. Katø tur chigucha srōmmeran øyeeg chinrraamōn: “Nimune chi palōmōtan” cha. ²²Inchawei treeg kōmōtō, asru murguen guebatamgailøbe masken balabig kōn. ²³Inchen asru tre tabig kōmō lataigwane nambe katøguchinguen tab tōgagōbelø guer. Inchen asru tre tabig kōmúig asōnabelane nambe masken tabig kasra tōgaguer. ²⁴Pōs namui asru chi kōrig isumgaig tōgagúiløbe tre isua asamig palain gōmōn. Inchendø Tiusbe namui asrwan øyamay pōnsrōb tamaran, tru trengatig tab inchib tōgagúimeelane mas tab inchab. ²⁵Øyamay mōibe nōrōr, nōrōr gōnrrain gōmōtō, masken asru pōnrrabeløbe mōitøgucha ambugurri, igurri lata isunrrain gōn. ²⁶Asru pōnrrabelø mōikkōben pusrkwai inchene, truyu pōnrrabeløgucha kerriguba truiba pusrkwai mōran. Katø asru mōigwan gōben tab inchene, truyu pōnrrabeløbe mayamba truiba tab gúi mōrōb kasraaran.

²⁷Pōs inchawei ñimbe Cristoi asr kua, ñimbe mōitøgucha kan gan nui asruelø gōn. ²⁸Incha Tiusbe nui iglesiayu Cristo nōashib karua øriilan nōmunmerrig wesrawa, bōnsraig kōn. Incha tru wendaube Tius maig karuigwan eshkabelan wesrawa, bōnsra, yandø tru wendaube kusrennrrabelan wesrawa, pōnsrōbig kōn. Incha trugurrimbe maramburab mariilø treeg marōbelan, trugurrimbe kwanrreelan tamarōbelø gōnrrai keta traniilan, trugurrimbe tru purugubelan, trugurrimbe chi maramigwan asha marōb pōnrrabelan, katø mōilane peg, peg wammera waminchibelø gōnrrai keta traniilan, treeg pōnsraig kōn. ²⁹¿Kabe mayeelōba Cristo nōashib karua øriiløtō gúitarru?

¿Kabe mayeeløba Tius maig karuigwan eshkabeløtø gúitarru? ¿Kabe mutøgucha kusrennøbeløtø gúitarru? ¿Kabe mayamba maramburab mariilan marøbeløtø gúitarru? ³⁰ ¿Katø mayeeløba kwanrreelan tamarøbelø gømigwan keta tranig utartø gúitarru? ¿Kabe mayamba peg wammera waminchibeløtø gúitarru? ¿Kabe mayamba peg peg wammera wamindiilan 'øyeeg tan' cha, eshkabeløtø gúitarru? ³¹ Inchendø ñimbe tru keta traniilan mas tabigwan nebua ke tøgagønrrab isua lab melamig køn.

Chiwandøgucha purab nuibe tru undag købig køn

Inchen nabe treetøguen gømø, kan may mas tabigwan eshkanrrab inchar, truwan ambamig.

13 ¹ Chi wammera gøben møguelø wamindi wamwan na waminchib, katø ángelesmera wamindi wamwanguen na wamindindøgucha, tru na undag købigwan chigaig kuinaisruandøbe, nabe kan tsandzøn wanrrøbig lataig, kabe kan tsandzøn platilloswan ichen ka wanrrøbig lataitø gømønrrun. ² Tius maig karuben na trunun eshkab pasramig keta tranig tøgäig køb, katø mu nebua asiimíig sörig pønrrabigwan kerriguba chigúi mörøb, katø nebua asamburab kerriguwan nebua ashibig køb, katø nai isubigwan kerriguba Jesucristoinuutø na tøgagømburab tøgagúikkurri norrø tunmeranguen nørørørø puraamba pønrrønrrai marøbig, na treeg tøgagøb indinaindøgucha, undag købigwan chigaig kuinaisruandøbe, nabe chigucha gømur. ³ Na chi tøgagúilan kerrigu ketøb, katø nai asrwanguen parrig kønrrai na tranøb indindøgucha, undag købigwan na tøgagømuinaisruandøbe, treeg maratøbe nabe chigúi wesramø.

⁴ Undag købiibe chi buindøgucha tammay ka megabig kømig, larrø tab inchibig kømig, treeg køn. Undag købiibe katøgan chigøben tøgagøben pusrkwai ashib pasrømíig kømig, katø purø møg inchib chib waminchimíig kømig, katø undag købiibe purab nuig misrøb pasrømíig kømig, treeg køn. ⁵ Undag købiibe larrø tsag inchib maig købash inchimíig kømig, nuimburaптø tab gønrrai inchimíig kømig, ke kuchingurrindø namømíig kømig, kalø marig chab purayeelan gatøle isub namig kørørmismíig kømig, treeg køn. ⁶ Undag købiibe chigøben sølgandø tabig mariimeeløyu tab gúi mörøb kasrag basramig kømøtø, isa gømíig, søligube tab gúi mörøb kasrag basramig, treeg køn. ⁷ Undag købiibe 'øyangatiitø gøtan'

chimø, awentabig kômig, kerrigu kørewa basrabig kômig, katø chiwandøgucha ka muniirabig kômig, chine nebub arruben, treegu ka bureb megabig kômig, treeg kôn.

⁸Undag købiibe managuen patsønrraamøn. Trune Tius tru maig karuigwan eshkameløbe patsab, katø peg, peg wammera wamindiiløbe yandø patsab, trugurri tru kusremburab kusrewa nebua asiiløgucha patsab inchun. ⁹Kaguende nambe newan gømø, mayandøwei nebua asha gøben, katø Tius maig karuben nam eshkailøgucha newan gømø, mayandøwei nebua eshkailøgøn. ¹⁰Inchen Señorwein gwaløm tru newanig tabig pubene, tru newanig kømfig mayandøwein gøbiibe yandø pinønrrun.

¹¹Na unø gøb urasbe unø wamindimay waminchib, unø isuimay isub, øyamay gúitamab unø isuimay isub inchibig købig kur. Inchen yandø kølig misrabe, unø gua maig købig kuigwane elachar. ¹²Møimbe nambe kan espejo tre tør guenamfigu ashib lataitø aser. Inchendø tru urasbe nambe malaugue asamig kønrrun. Møi yambe nabe mayangatiitø nebua ashibig kuinaindøgucha, tru urasbe kerrigu newan nebua asamønrrun, na maig kuigwan Tius nan asig køb lataitøwei.

¹³Inchen møi yambe pøngatø pønrrabig bønrran: isubigwan Jesucristoinuutø pasriiba, katø isua munig melaiba, trugurri tru undag købiiba. Inchendø tru i pøngatøyu purab nuibe tru undag købig kôn.

**Peg wammera waminchibig kønrrai traniiløba,
Tius maig karuigwan eshkailøba**

14 ¹Ñimbe undag købigwan tøga pønrrabig bønrrab, katø Tiusweimburabeløyu marøbelø gømig nø keta traniilan tøgagømigwan isub inday. Inchendø Tius tru maig karuigwan eshkabelø gømigwan, trunun tøgagønrrab indamig kôn.

²Kaguende peg wam møriimfig waminchibiibe møguelan gømøtø, Tiusba waminchen, mugucha ni chi tainguen mørmøn, pøs Espíritu Santogurri chinchaguen wetøgørramgailø waminchen.

³Trune Tius tru maig karuigwan eshkabiibe misagwan wamindan, Tiusweimburab mas nørrørab ambamigweyasiiba, maig melamigwan treeg marøb melønrrai wamindamigweyasiiba, chigúindøgucha ka puraambub melønrrai purugumigweyasiiba.

⁴Møikkøben kan peg wam møriimfig waminchibiibe Tiusweimburabigu nøasiitøwei nuraben, trune Tius maig

karuigwan eshkabiibe iglesian Tiusweimburabigu nòrròranrai wamindan. ⁵Pòs nane ñim mayeeløba peg wammera waminchibelø gúimbemab isutan. Inchendø Tius maig karuigwan ñim trunun eshkabelø gúimbe gøtan. Kaguende treegwan waminchibiibe mas nuikken gøn. Inchendø peg wam wamindikkucha tabiitøwein gøn, tru peg wam wamindigwan mòiikkøben ‘øyeeg tan’ cha eshkabene, iglesiabe Tiusweimburabigu nòrròranrai. ⁶Pòs inchawei, nai nunelø, na ñimuisrømay arrua, peg wam wamindimbe ñnimune chigúi purugunrrab gø? Tius maig kenamarigwan eshkamøwei, chigúi mørøb nebua asilan waminchimøwei, kabe Tius maig karuigwan eshkamøwei, kabe chi kusrenmøwei inchene.

⁷Kan chimera gøben øsiguig kòmeelanguen, luswan lata, arpan lata chiwan urramigwan chi wanrri mørtrain gønømbene ÷trube, tru lus urrigwan chi urri møramgawei, arpa gønigwan chiwan gøni møramgawei gømønrraitarru? ⁸Inchawei gatø kan trompetanma tru chi maramigwan chigúi mørtrau truigwan urrømbene ÷kwayanrrab webamrrab mu gúin damartrab gø? ⁹Inchawei ñimgucha treetøwein gøn. Ñim tru peg wamwan wamindigu chi tai møramdiig treeg waminchimubene, ÷ñim waminchib pønrraigwane mandiincha chi tai møriasamø? Ñimui wamindiibe isig ichibigu wamindi lataitø burainrrun. ¹⁰Pòs yu pirauma chi wammera gøben purø nòrrø køn. Inchendø chi wamdøgucha tru wamwan waminchibigweimbe chi taig møramdiig køn. ¹¹Inchawei nama mòiikkøben peg wam wamindigwan ni chi tainguen mørtrab gaima basrappe, nabe tru waminchibigweimbe nuim birauig kømøtø, peesriig lataig kømønrrun. Inchen nøgurringucha naimbe peg birausriig lataig kønrrun. ¹²Inchawei ñim tru Tiusweimburabeløyu maramig nø keta tranigwan tøgagønrrab inchib melabeløbe, truilan masken, masken tøgagønrrab inday, iglesian Tiusweimburabigu nòrrøram burugumig.

¹³Inchawei mòiikkøben kan peg wam møriimíig waminchibiibe, trube, tru peg wam wamindigwan ‘øyan dan’ cha katøburø eshkaig kønrrab, Tiuswan trunun tranrra cha miamig køn. ¹⁴Kaguende na peg wamdøga Tiusba waminchib pasrøbene, nai espíritube Tiusba wamindingucha, nai turyu isubigube chigucha chi kørromismønrrun. ¹⁵÷Trube, treeg købene, nabe mandø inchab gøh? Nai espíritutøga na Tiusba waminchippe, nai turyu chigúi mørøb isuitøgagucha Tiusba wamindamønrrun. Katø nai

espíritutøga cantappe, katø turyu chigúi mørøb isuitøgagucha Tiuswan cantamønrrun. ¹⁶Inchawei ñibe ñui espíritutøgatø ‘Tiuswan mayanguen tabig køn’ chib, ‘ungwa’ chib pasrøben, møikkøben Tiusweimburabigwan chi kusremíbe ñi trenchib pasraigwan chi tainguen mormuig kōppe ‘treegwein gøn’ chib, maana rrenchinrrab gø. ¹⁷Pøs ñibe Tiuswan mayangucha tabig ungwa taingucha, treeg mariibe kanune Tiusweimburabigu nuramig chi purugumøn.

¹⁸Nabe Tiuswan ‘mayanguen ungwa, ungwa’ char; kaguende nabe peg wammera mas yamguen waminchibig kur, ñim mayeelø lataitøguen gømø. ¹⁹Inchendø iglesiyube trattrøgatøtiitøgucha chi taig mōramdiig treeg wamindinguen gøtan, kaneløgucha chigúi mørøb kusrenrrai, peg rriimay diez milburab chi taig mōramgaig waminchib pasrabgunrriibe.

²⁰Nai nunelø, ñim maig isumigube ureezheelø latailø gønrrab gømøtø, chigøben kaig maramigwan isua asamigube shushcheelø latailø gømig køn. Inchen maig isumigube yandø køleeløsun isubelø gømig køn. ²¹Pøs tru maig maramigwan martrai Moisés pøriguma trenchibig køn:

“Señorbe trendaig køn cha:

‘I misaameran mōguelø peg rriimay wamindiiløtøga na wamindamba,

peg birausrø misaamera nøm wamindigu na wamindamba inchen,

ni treekken nane mormønrrautan” cha.

²²Inchawei tru peg wammera mōriimíig wamindiiløbe Tiuswan kørebelayasig kømøtø, Tiuswan køremø misaamerain gøn, Tius truyu pasrain gúi asamig kønrrai. Trune tru Tius maig karuigwan eshkaibe Tiuswan køremø misaamerain gømøtø, Tiuswan kørebelayasig køn. ²³Inchawei ñim iglesia mayamba tulundzuna, mayamba peg rriimay mōriimíig waminchib gøben, tru peg wammera waminchibig kønrrai Tius keta tranigweimburabigwan kusremeelø gúi, kabe Tiuswan køremeelø gúi mōin guebambatø bønrrabeløbe, ñnimune ‘chab lukiaín gøn’ chimønrrab gøh?

²⁴Trune ñim mayeeløba Tius maig karuigwan trunun eshkabene, Tiuswan køremíig kui, kabe mōikkøben Tiusweimburabigwan kusremíig kui kebya basrabiibe, mayeelø wamindiitøga nøbe kaig marøbigwein gøbairrenmab isunrrai marøb, mayeelø

wamindiitøga nune kaig marøbig kuin gúi asha kørømarøb inchun. ²⁵Inchen nui manrrau nuinetø chi isua tøgagúiløbe tøgandø kenamarig kørnrun. Inchen øyeekkurri nøbe pirau srala, Tiuswan kóriibala tabig waminchib, trenchinrrun: “Ílsa gømotø, Tiusbe ñimui utu pasrabwei indan!” cha.

**Tiusweyasig marøb tulundzuninug maig
maramigwan tabig marøb**

²⁶Trube, treeg købene, nai nunelø, ¿mandø chinrrab gøh? Pøs ñim tulundzunappe, møitøgucha kane cantamig tøga gúin gúi, kabe møibe kusrennamig tøga gúin gúi, kabe møibe Tius nun kenamarigwan wamindamig tøga gúin gúi, møibe peg wam møriimíig wamindamig tøga gúin gúi, kabe møibe tru peg wam wamindigwan ‘i wamindiibe øyeeg chibig køn’ cha, eshkamig tøga gúin gúi, ñimbe treeg burrabelø gøn. Trube, truigwan marøppe, chiwandøgucha iglesiane Tiusweimburabigu mas nørørab ambamig kørnrai maramig køn. ²⁷Inchawei tru peg wamwan waminchippe, pailø gúi, kabe pønøløgatig, treetø wamindamig køn. Treetøgucha kan gan waminchen, kane ‘i wamindiibe øyeeg chibig køn’ cha eshkamig køn. ²⁸Inchen tru peg wamwan wamindigwan ‘i wamindiibe øyeeg tan’ cha eshkanrrabig mu gaabene, trube, iglesiyube truigwane esegappa, nuinetø waminchib katø Tiusbatø wamindamig køn.

²⁹Inchen gatø Tius maig karuigwan eshkabeløgucha pailø gúi, pønølø gúi treetø wamindamig køn. Inchen kaneløbe tru wamindigwan Tiuswein gøh, kabe Tiuswein gømø chinderamab isub purramig køn. ³⁰Inchen møigwan gøben truyu wabigwan inchippa, chigøben waminchai Tius eshkanгарuben wamincheenchene, trube, tru waminchib pasrabiibe mas waminchimumig køn. ³¹Kaguende ñimbe mayeeløba Tius tru maig karuigwan eshkappe, kan gan wamindamig køn, mayeeløba kusreb, katø mayeeløba tab melamigwan utab inchai. ³²Inchagucha Tius maig karuigwan eshkabelai espíritumerabe nøm maig kørnrain gøben, treegwan martrab pønrran. ³³Kaguende Tiusbe chi maringuen asiimíig marøb Tius kømøtø, ambugurri, igurri chi isumgaig lata tab gúi møramig, treeg Tius køn.

Tru Tiuswei misaamera maya iglesiamera maig marøbelø gøben, ³⁴treetøwei ishumburmerabe iglesiyube niløtø burramig køn.

Kaguende truyube ishuumisagwane waminchimønrrai indiilø gøn. Pøs tru maig maramigwan martrai Moisés pørigu chigucha trenchibig køn, nømbe maig chiben treeg melamig køn cha. ³⁵Nøm chiwan gøben nebua kusremig paløbene, nømui kelan nømui yau bayamig køn. Kaguende kan ishug iglesiayu waminchab indamibe chi søl gømøn. ³⁶¿Tiuswei wambe kabe ñimuinukkurri pølbasa arrig kø chindah? ¿Kabe ke ñimuinuutø buig kø chindah?

³⁷Pøs møikkøben ‘Tius maig karuigwan eshkabig treeg kurma’ isub, kabe ‘Tiusweimburabigwan maramig keta tranig tøgai kurma’ isub inchabe, trube, tru iig na ñimun pørigwane Señor nø garua basrøbwei indig kui, treeg isua asamig køn. ³⁸Inchen øyeeg kui ashatøgucha, nø ashmíig misrene, nungucha treetøwei isua ashmuinab pasrønrrun.

³⁹Inchawei treeg købene, nai nunelø, Tius maig karuigwan eshkamigwan martrab inchib melay. Katø tru peg wammera møriimíig wamindamigwangucha merømøtay. ⁴⁰Inchendø chiwandøgucha marøppe, tabig sølwan marammay maramig køn, ambumay, imay ke chi maringuen asamgaig martrab gømøtø.

Cristo kwawa, katøle øsiiraigwan waminchibig

15 ¹Møimbe, nai nunelø, na Tiuswei tabig srø wamwan eshka kusrenanig købigwan katøle ñimun isunanrrab inchar, ñim trunun uta, truigwan elachimø, truyu mur bønrraigwan. ²Ñimbe tru Tiuswei tabig srø wamgurriwei kaigyugurri wesrailø gøn, na ñimun maig eshka kusrenanigwan trunun elachimø, tindøga bønrrøwabe. Trengømuisruandøbe, tru ñim køreibe chi køremui lataitøwein gúin gønrrun.

³Nabe ñimun kusrenanøppe, tru nan mas nuig purø tabig kusrenanig utig købigwan ñimun kusrenanig køn, Tiuswei wamwan pørigu maig chibig køben, namui kaig mariiløgurri Cristobe treeg kwawa, ⁴katø nøbe, Tiuswei wamwan pørigu maig chibig køben, treeg sorig kua, pøn gwalømyube gatøle øsiirawa, ⁵Pedron kenamisrøb, katø trugurrimbe tru nøashib karua øriilø tru doceelan kenamisra, ⁶trugurrimbe albiji nunelø quinientos menrrawan kenamisrig købigwan. Tru ashibeløbe mayeelø lutau ka øsig amønan, kan gandøwei yandø kwaig mu gaaben. ⁷Incha trugurrimbe Santiagon guenamisra, trugurri mas wendøbe tru nøashib karua øriilan mayeeelanba kenamisrig køn.

⁸Incha yandø kerrigu srabebe katø nan kenamisrig købig køn, na tru kal-lam gwaløm gømø, kal-lawa lataigwan. ⁹Pøs nabe Cristo nøashib karua øriilai utube truburab gømíig, purø lamíig kur. Trurrigu Cristo nøashib karua ørig køn cha trenchaguen wamig kønrrabgaikke, kaguende nabe Tiuswei iglesian larrø kaig marøbig købig kur. ¹⁰Inchendø na mõi øyah pasrappe, Tius nan ka yandø tab indiitøgatø na treeg pasrainatan. Inchen nui tru ka yandø tab indiibe kagatø purayaig kømøtø gøn. Treeg kømøtø, nabe masken tru Cristo karua øriilø mayeelø nøm lataguen gømø, marinabig køn. Inchendø na marig kømøtø, Tiuswei tru ka yandø tab indig naba pasraikkurri marig køn. ¹¹Pøs na wamindig kui lata, kabe nøm wamindig kui lata, nambe iigwan eshka kusrenanen, ñimbe iigwan treeg køreig købig køn.

Kwabelø katøle øsiiramigwan waminchib

¹²Pøs trube, Cristobe tru kwailai utugurri katøle øsiiraig købigwan eshka kusrenanig købendøbe, trube, ñim mõiøgøben ñimui utu mandøgurinre øyeeg chib gøh, kwabeløbe katøle øsiirawa kurrømønrrun chibren gønrrappe? ¹³Pøs, tru kwabelø gatøle øsiirawa kurrømuig købene, trube, Cristogucha gatøle øsiirawa, kurrømuig køn. ¹⁴Trube, Cristo gatøle øsiirawa, kurrømuig kuig købene, nam Tiuswei wamwan eshka kusrenaniibe ka yandiig kørømisren, katø treetøwei ñimui isubigwan Cristoinug pasra pønrraikkucha tøgagømuingueniitø purayan. ¹⁵Katøgucha treetø gømø, nambe Tiusweiwan ka isatø waminchib pønrrabelø gúig, treeg webinrrun. Kaguende nambe ‘Tiusbe Cristone katøle øsiirangaruig køn’ chib pønrraig kuig køn. Inchen kwailø øsiiramønrrab gúi cierton webibene, trube, Tiusbe katøle Criston øsiirangarumuig, treeg køn. ¹⁶Pøs kwailø gatøle øsiiramuiig købene, Cristogucha, trube, øsiiramuiig køn. ¹⁷Inchen Cristo gatøle øsiiramuiig købene, trube, ñimui isubigwan nuinug tøgabønrraikkucha, tøgagømuinguenig tøgagúig puraiben, trube, ñimbe gatøgucha kaig marøb srø amønan. ¹⁸Trube, treeg købene, Criston tru kørewa kwabeløgucha pinab pinamsrø pønrrønrrab amban. ¹⁹Nam yu øsig amønaigu ka pirauweyasiitø Criston isub muniirabelø gúisruandøbe, nambe maya misaamerai utu trembe misag kømuinguenelø guer.

²⁰Inchendø treeg kòmøtø gøn. Cristobeguende kwabelai utugurri katøle øsiirabwei indig køn, tru kwabelai utugurri ke srøsrøzhiitø ke nømerrig pølbasra øsiirab. ²¹Pøs kwamima kan mökkurrindø arrig købene, katø kwabelø gatøle øsiirawa kurramikkucha kan mökkurrindø arrig køn. ²²Inchawei Adángurrima mayeeløba kwaben, katø treetøwei Cristogurri øsig kømigwangucha mayeeløba tøgagønrrun. ²³Inchendø møitøgucha nøm møimerrig pølbasra øsiinrrabig køben, treeg kønrrun: Cristo ke srøsrøzhiitø nømerrig pølbasra øsiiraben, trugurrimbe nø gatøle arruben nuielø øsiiranrrabelø gøn. ²⁴Trugurrimbe yandø tru srabe gwaløm punrrabig køn, Cristo tru nørreelø nøm asha garub purrabelan gøben, mugucha manchinrraingai nøm garubelan gøben, nørreelø maramburab marøb purrabelan gøben, yandø truilan kerriguwan chigucha martrabgailø kørromara, tru Cristo ashib karub waigwan yandø Tius Møskawan nø ashchai purøren. ²⁵Kaguende Cristobe nun tru ashig kømui inchibelø tsaleelan nui srøb umbu nø maig chiben treeg pønrrønrrai, Tius nun pønramnegatig, nøbe ashib karub wanrrabig køn. ²⁶Inchen tru ashig kømui inchib tsalø inchibig srabeig pasrabigwan pinisaig kønrrabiibe, tru kwamig køn. ²⁷Kaguende Tiuswei wamwan pørigube trenchibig køn: “Chigurrimbunø købigwan kerriguba nui srøb umbu nø maig chiben treeg pønrrønrrai Tius pønraig køn” cha. Pøs: “Chigurrimbunø købigwan”, nui srøb umbu pønraig køn chippe, Tiuswangucha truyu tøgä basrig køn cha trenchimuig kui törgandø asamdiig køn. Kaguende Tius nøwein gøn tru chiwandøgucha kerriguba Cristo maig chiben treeg pønrrønrrai marøbiibe. ²⁸Inchen Tius chiwandøgucha kerriguba Cristo maig chiben treeg pønrrønrrai, nun chab pønstrøbene, Cristo, tru Nusrkaindøweinguen, tru chigurrimbunø købigwan nø maig chiben treeg pønrrønrrai, nun pønstrøbig Tiuswan maig chiben, nøbe treeg pasrønrrab pasramisrtrun, chiyutøgucha kerriguwan Tius nø ashib karub pasrønrrai.

²⁹Pøs trube, ¿tru kwabelayasig piu umbu ulsrailøbe chi martreerah? Tru kwabelø kerriguwan øsiiramønrrab gøbene, trube, ¿chinchabrre tru kwabelaimburab isua piu umbu ulsrøbelø gøh? ³⁰Inchen ¿nambe chu urastøgucha chindimbarre kwam lab pønrrabrah? ³¹Nai nunelø, nabe kwalømmørig ke kwamigu puitø, buitø ka megar. Iibe isatø gømøtø, namui Señor Cristo Jesúsweinug

na purø nuig mørøraim basramibe ñim gøn. ³²Pøs mөг kuinawa, ka treekkurrindø tru Efesosrøma larrø namig animal lataig inchib misaameraba namig aleguiyab, na treeg marøb megaibe chi marmui lataitøwei webinrrautan. Pøs tru kwabelø gatøle øsiiranrrab gømubene, mugøsrøn chibgunrrig, trube:

“iMab, muchib inchab gøh,
pøs srønato kwamig købashtø!”

³³Ñimbe chi isa gøben sruamrramamøtay. Mugøsrøn chibgunrrig: “Kaig marøbeløba linchib pønrraibe tabelø gúigwan ka mindishibig køn.” ³⁴Ñimbe gatøle tab chugúi møra sölğandø pønrrønrrab inday, mas kaig marøb pønrrømøtø. Kaguende møiløbe Tiusweimburabigwane ni maig kuinguen ashmeelø gøn. Iigwan na trenchippe, ñimun kwaarøsrøb kørig burørtrab rrenchar.

Katøle øsiiraig asrbe øyeeg kønrrabig køn

³⁵Pøs møibe øyeeg chinrraabe: “¿Kwabeløbe mandø øsiiranrrerah? cha. ¿Katøle øsiirawa amrruppe, maig asrmera tøgar amrrunrrerah?” cha. ³⁶Kan ñi gúi chugúinguen mørmúig, kan yellwanma ñi ellguabene, kwamøwabe, øsig kømigwan tøgagønrraamøn. ³⁷Tru ñi ellguappe, tru tusr maig kønrrabigwan ellguamøtø, trulzhigwandø ellguan, tirigu gúi lata, kabe gatøgan chi peg yell gúi lata. ³⁸Pøs Tiusbe i yellwanma chi tusr kønrrai marøppe, nun maig maramdiig køben, treeg marig køn, chi yellðøgucha trumørig chi tusr kønrrabiibe tru tusr kønrrai. ³⁹Chi asrmeratøgucha lata treeg asrmeratø gømøn, kane misag asr køben, kane animalmerai asr køben, kane illimerai asr køben, kane peskaumerai asr køn. ⁴⁰Inchen gatø treetøwei srømbala bønrrabelan maig kønrrabelan treeg mariilø køb, katø pirauelan maig kønrrabelan treeg mariilø køb indan. Inchendø tru srømbala pønrrabelai tabzhig tør bilabiibe katøgan gøben, yu pirau pønrrabelai tabzhig tør bilabiibe katøgan peemayig køn. ⁴¹Inchen nøsigwei tabzhig tør bilabiibe peemayig køben, katø pølwei tabzhig tør bilabiibe peemayig køn. Katø estrellamerai tabzhig tør bilabiibe peemayig køben, tru utu mø estrellamerai tabzhig tør bilabiibe gatø peemayig køn.

⁴²Inchawei øyeetøwein gøn tru kwabelø gatøle øsiiramikkucha. Tru asrwan søriibe treranrrabig køben, katøle truig øsiirabiibe yandø managuen treranrrabig kømøtø gøn. ⁴³Yandø chigucha

gómíigwan pirau sora trarrig, katøle truig øsiirappe, tør bilab tabig øsiiranrrun. Chigucha martrabgaig pirau sora trarrig, katøle truig øsiirawa kurrappe, maramburab marøbig kurrønrrun. ⁴⁴Trendø yu pirau tōga basrai asrwan sorig, katøle øsiirawa kurrappe, asr espíritu gurrønrrun. Asr yu pirauig køb, katø asr espíritugucha gøn.

⁴⁵Katø Tiuswei wamwan pørigugucha treeg chibig køn: “Tru srøsrø mōg Adánbe kan misag øsiguig misrig køn” cha. Inchen Adán tru Srabe Arrubig, Jesucristobe, espíritu gøn, nōbe øsig kōmigwan tranøbig. ⁴⁶Inchawei espírituimburabiimerrig arrumøtø, asr trendø maig kōnrrabig truimerrig arruben, trugurrimbe yandø espírituimburabig arrig køn. ⁴⁷Tru srøsrø mōøbe pirøtōga marig yu pirauig køben, tru wendau mōøbe srømbalasrø Tiusweisriig køn. ⁴⁸Inchawei tru pirøtōga mari mōg maig købig køben, yu piraeløbe treeløtōwein gøn. Inchen tru srømbalasrø mōg maig køben, tru srømbalasreeløbe truig lataitōwein gøn. ⁴⁹Yu pirau mōg maig køben, nam treelø gōmigwanma tōgagúibe, katø tru srømbalasrø mōg maig køben, nambe truig lataitōwei kōmigwangucha tōgagømønrrun. ⁵⁰Inchawei nabe, nai nunelan, trendamønrrun: Tius nō ashib karub waigwane asr yaumbaig animbañauibe chinchā tōgagønrrab gaimanrrun cha. Katø tru trerawa patsønrrabiibe tru mana trerab patsønrrabig kōmíigwane chinchā nebua tōgagønrrab gaimanrrun cha.

Tru kwamigwan yandø srabe kanawa puraambamig

⁵¹¡Au! mōimbe kan chigøsrøn mu asiimíig sorig pasrabigwan na ñimun eshkanrrab inchar: Nambe ke mayeeløbabe kwamig kōmønrrab gøn cha. Inchendø nambe mayeeløba yandø kerriguwan peemayelø gōnrrai yunømariilø gōmig kōnrrun, ⁵²¡gatø! mōi mōi, kan kab gasrøb lataitōgue, tru trompeta srabe urrig wanrrøben. Kaguende trompeta wanrrøbene, kwabeløbe øsiirangaruilø gōnrrun katøbe managuen treranrrabelø gōmíikke. Inchen nambe mayeeløba yandø kerriguwan peemayelø gōnrrai yunømariilø gōmig kōnrrun. ⁵³Kaguende tru treranrrab asrbe trerab minchabgaitōga pinøbulig kōnrrain gøben, katø iig tru patsønrrabigwane tru patsønrrabgaitōga pinøbulig kōnrrain gøn. ⁵⁴Inchen tru treranrrabigwane yandø tru managuen trerab minchabgaitōga pinøbulig køb, katø iig tru patsønrrabigwane tru managuen patsønrrabgaitōga pinøbulig kōrrømisrøb inchene,

iig tru øyeeg cha pøra basriibe yandø treeg nebunrrun: “Tru kwamigwane yandø kanawa kenaguen gømfīg, pinisan” daig.

55 “¿Ni, kwangarub pasrabig, ñi ganawa basraibe mømimbe chu basra? taig.

¿Ni, kwangarub pasrabig, ñi pusrkwananøb pasraibe mømimbe chu basra?”

56 Kaguende tru kwamigwei pusrkwangarub pasrabiibe tru kaig marig, truig køn. Inchen tru kaig marig maramburab marøbiibe tru maig maramigwan martrai Moisés pørig, truig køn. 57 Inhendø Tiuswan ‘mayanguen ungwa, ungwa’ chinrrab, namui Señor Jesucristogurri nam kerriguwan kanawa pønrramig kønrrai tranigwan.

58 Inchawei treeg købene, nai undaaraig nunelø, kørrønrrabgaig mur bønrrab, mumaygucha wemaløsrkønrraingaig bønrrab, chu uratøgucha Señorwei marameløyube katøguchinguen, katøguchinguen marøb melay, kaguende Señorweimburabeløyu ñim nøba marøb melaibe, ka treeg marøb melaitø puraimønrrab gúi ashabe.

Jerusalénsrø Tiuswei misaameran purugumig an utig

16 ¹Tru Jerusalénsrø Tiuswei misaamerayasig an purugúig utamigweimburappe, tru Galacia birausrø iglesiameran na mandø martrai karua bønstraig køben, ñimgucha treetøwei martrigay. ²Ñim møitøgucha an maya tulishabe, truyugurri tarømara, esegab amrrigay truaalømmørig, na trusrø puben, ñim ke møin dulishib mendaptindamig kømønrrai. ³Incha ñim møilan karua øramdeelø gúi asha kørrømaríilan, na trusrø puabe, tru Jerusalénsrømay trana øramig ñim an guetigwan nømun trana ørøppe, kan kilga pøra, tøga rana øramønrrun, tru i karua øriiløbe chi isumga møguelø gúi nøm ashchai. ⁴Inchen naimburab nagucha yamig søl gønrraptiig købene, trube, na iben, nømbe naba amrrunrrun.

Pablo nui lincha amrrabeløba mandø ambamigwan wamindig

⁵Nabe Macedonia birauwansrø pureb arrua, yandø ñimuisrø pumønrrun, kaguende nabe Macedoniawansrø pureb yamig kua.

⁶Inchippa kan maya yanagatig kørrømisrisruandøbe, ñimba ka kørrømisramønrrun, kabe tru pishim bølmera chab purayamnegatikken,

nan chumay yamig nebuben, nai yamigu ñim purugumig kørnrai.
 7Kaguende mõimbe ñimun ke ka petø asha burainrraptø arrug kømøtan.
 Pøs Señor nan treeg kørnrain gøbene, kan maya yanagatig ñimba
 kørromisrtrab attrab isur. 8Inchendø Pentecostés kwaløm bumnegatig
 nabe yu Efeso kørromisrtrab gur. 9Kaguende yube kan yaskab purø
 nuig nayasig kurin gøn, Tiusweiwan wamindig nu larrøbichaptiikke.
 Inchendø marmønrrai nan sötølulrrabelø truba rruba køn.

10Inchippa Timoteo trusrø pubene, ñimui utu chi korig kui
 inchimønrrai inchigay. Kaguende nøgucha Señorwei marameløyu na
 lataitøwei marøb megabig køn. 11Inchawei nune mõitøgucha palabinøtø
 inchib gønrrab gømø, masken chi isumø inrrai purugua ørtrigay, naimay
 gatø attrai. Kaguende nabe namui nunelanba, nunba munig megar.

12Inchen namui nuneg Apolosweimburappe, tru nunelø
 ñimuisrømay amrrabeløba nungucha na tiusmanda maya lincha
 irra taingucha, mõimbatøbe nøbe chi inrrab inchimøn. Inchendø
 nun chu uras yamig pubene, inrrab gúinrrun.

**Maig amønamiɡwan treeɡ melønrrai
 wamindiiløba, ‘ka amøñigueh’ tailøba**

13Tab ashiptø bønrray. Pesan amøñimøtø, isubigwan Cristoinug
 tøga pasra bønrraigu mur bønrrab, chishkandø møgueløsun
 bønrrabelø gøb, trurrigu murelø guy. 14Incha chiwandøgucha ñim
 marøppe, undag købiitøga maramig køn.

15Nai nunelø, ñimbe ashibelø gøn tru Acaya birausrø Estéfanaswei
 yaeløbe ke srøsrøzhiitø nømmerrig Tiuswan nebua ashibelø misra,
 Tiuswei misaameran nømbe purugunrrab pønrramisrigwan. 16Inchawei
 nabe ñimun øyeeg melørrunrrigay chinrrab inchar, tru øyeeg
 melabelane nøm maig chiben mørøb melønrrigay cha, katø tru mayeelø
 i maramigwan purugub marøb melabelan treetøwingue.

17Nane truba kasrag køtan Estéfanas køben, Fortunato
 gøben, Acaico gøben amrruin gøben. Kaguende ñim mu gaagua,
 purugunrrab gaimaigwan nømbe nan purugua, 18pøs truiløbe nai
 isubigu lata, ñimui isubigu lata chi isumikkaig, tab gønrrai marig
 køn. Øyeeg møgueløbe mayanguen tab indig kønrrabelø gøn.

‘Ka amøñigueh’ taiba, ‘ungwa’ taiba

19Tru Asia birausrø iglesiamera ñim corintosreelan ‘ka
 amøñigueh’ cha øran. Aquilaba, Priscilaba, katø iglesia nømui yau

tulundzunabelø, truilø chigucha Señorwei munchiyu ‘mayanguen tab ka amøñiguh’ cha øran. ²⁰Katø mayeelø nuneløgucha ñimun ‘ka amøñiguh’ cha øran. Ñimbe kangurrin gangurri ‘ka amøñiguh’ chib, Tiuswei undag købiitøga tasig rraniyay.

²¹I ‘ka amøñiguh’ taigwan na Pablo ñimun naashib nai taska pørar.

²²Møikkøben Señorwan undaguig kømígwane Tiuswei namig købig nui m bala gøbash. ¡Namui Señor Jesucristo amø!

²³Señor Jesúswei tru ka yandø tab indiibe ñimba pasrønrrai inchar. ²⁴Cristo Jesúsweinug nai undag købiibe ñim mayeeløba pasrønrrun. Treeg kønrrun.

2 Corintios

‘Ka amõñiguh’ chib pørig

1 ¹Tius nan trendø treeg kønrrain gúikkurri, na Pablo Cristo Jesús nõashib karua ørig, namui nuneg Timoteoba misra, Corintosrø iglesianba, katø tru Acaya birau muba kuimburab Tiuswei misamera warabelanba i kilgawan pørar. ²Tius namui Møskaweimba, Señor Jesucristoimba tru ka yandø tab indig køben, chi isumgaig tab gøbig køben ñimba gønrrai inder.

Chine isumdeelø nebuingucha Pablo Tiuswan ‘ungwa, ungwa’ tailø

³Tru namui Señor Jesucristoi Møskai, Tiusbe mayanguen tabig wamindig kønrrun, tru lastima ashib pønrrabelø gømigwan tøga Møskai, katø isui meløben chiyutøgucha isui inchimønrrai purugub Tiuswan. ⁴Truibe nam chine puig meløben, namun tab gúi mørtraí purugubig køn, katøganelø chiyugøben treetøwei isui meløben, Tius namun isui inchimønrrai purugúitøgatøwei namgucha purugubelø gømig kønrrai. ⁵Criston tru chine, chine kaig nebuilø namuinug treetøwei itømaytø nebub arrubene, katø treetøwei tru isui inchimønrrai purugúikkucha tru gúindø, tru gúindø Cristoinukkurrindøwei arrubig køn. ⁶Inchendø namun chine puig melamig arrubiibe, ñim chi isui inchimø tab gúi pønrramigweyasiiba, kaigyugurri wesrailø gømigweyasiiba gøn. Inchen namun tru isui inchimø pønrramig kønrrai publiibe, tru ñim chi isui inchimø pønrramig kønrrain gua, tru namun isui melamig nebub lataitøwei ñimun treeg nebub arruben, ñim chigúingucha melabig melamig truibe treeg attrun. ⁷Inchawei nam ñimuimburab

øyah kørnrunmab isuibe treeg kørnrrab gøn. Pøs nam chine kaig nebuinab melaiguma treetøwei ñimgucha pørnrrabelø gúig kòppe, nam chi isumø tab gúi pørnrraigugucha, ñimbe treetøwei tab gúi pørnrrørnrrab gúi asha bønrrer.

⁸Namui nunelø, namun Asia birausrø purø isumdiig nebui melaigwan ñim wammøra gønrrai inder. Yandø mu melamgaig trømbøig arruptø, namuinetøbe yandø chinchamelaiggaig purø rrømbøig køben, yandø ke øsig webammumuitamab isubelø guer. ⁹Pøs nambe ke yandø kwamigu puermaptøwei isub melabelø guer. Pøs øyeeg puppe, nam namasiitø namdø tsabø guermab isubelø gønrrain gømøtø, Tius tru kwailanguen gatøle øsiirangarub kusrubigwan isua bønrrabelø gønrrain gúig køn, ¹⁰tru øyeeg trømbøig ke kwamitø balab melaigugurri nø namun ka buraambingarub, katø namun ka buraambub ambamig kørnrrai martrabigwan. Incha nambe ke nuinuutø isua meler, ka puraambub ambamig katøgucha namun ashib pasrørnrrab gúi, ¹¹ñim Tiuswan namuyasig ‘purugurra’ chib miab meløbene. Øyamay truba yamelø namuimburab Tiuswan ‘mayanguen ungwa, ungwa’ chib gønrrun, pøs truba yamelø misra Tiuswan namuimburab miaben løtigwan nam truba nu purugúig utikkurri.

Pablo Corintosrømay chindimba imuigwan eshkab

¹²Kaguende nam tab gúi mørøb pørnrraibe iig køn: yu pirau namui isub kebachib pasrabigu ‘chi kalø marig køn’ chibig chigaig bønrraig, mas ñimui utube gatøguchinguen isuptø amønaig købig køn. Amønippe, tru newan chishchiitøgaba, søratø gømø, sølwan marig Tiusweinukkurri arrubiitøgaba nambe amønaig køn, chine nørøø kusreelø møguelainukkurri arrubiitøga marmøtø, Tiuswei ka yandø tab indiitøga marøb. ¹³Pøs nam ñimun kilga børøppe, chi peg waminchibikkucha gønrrab gømøtø, ñim chi leb gúigwan ñim chigúi nebua mørøb gúigwan truigwan newan chigúi mørtraimab isua pører. ¹⁴Inchawei namuimburab mayandøguen nebua chigúi mørig kòppe, pøs ñimbe tab newan chigúi mørtrun, ñim namuimburab tab gúi mørøb pørnrramig kørnrrai, tru nam ñimgurri tab gúi mørøb pørnrramig kørnrrab gøb lataitøwei tru Señor Jesús arrub gwaløm.

Pablo Corintosrø ashchab inrrab waminchib

¹⁵Inchawei nabe iigwan treeg kørnrraitamab isua, ñimuisrømaymerrig attrab isuig køn, ñim srøsrø truba tab gúi

nan utig kòmnetø gatøle nan tab gúi utamig kònrrai. ¹⁶Incha Macedoniasrømay pureppe, ñimuinug pua buraya, katøle trusrøngurri arruppe, ñimuinug puatøweim burainrrab isuig kuig kòn, ñim nan Judeasrøngatig yamigwan purugunrrai. ¹⁷Tru na øyeegwan martrab isuibe, ðkabe nabe ke mõi mõi martrab gurrig kònrrab gø chindah? ðKabe tru na øyeeg martrab indiibe, nai isuigu Tiuswan ashmø misaamera lataig martrab inchibig kua, mõiindø ke: “Martrab” taitø, katø: “Marmønrrab” taitø inchab inditamagueh?

¹⁸Pøs Tiusbe nø maig chippe, nøbe treegwan marøbig køb lataitøwei, nam ñimun wamindiibe mõiindø: “Øn” daitø: “Ka” taitø indig kømøtø gøn. ¹⁹Kaguende ñimui utu na gøben, Silvano gøben, Timoteo gøben, nambe Tiuswei Nusrkai Jesucristoimburab eshkab kusrenanig kòn: “Øn” tantø: “Ka” tantø indig kømøtø, nuinuube chu uraskucha: “Øn” daig. Nøbe truig kòn. ²⁰Kaguende Tius kerrigu nø chi martrab cha kørørmisriiløbe Cristoinuube: “Treeg martrab” taig, truig kòn. Inchawei nambe Cristogurri: “Treeg kòn” chibelø guer, namgurri Tiusbe mayanguen tabig wamindig kònrrai. ²¹Inchen Tius nõtøwein gøn Cristoinug mur bønrramig kònrrai marøbiibe namun lata, ñimun lata. Incha namune nuindø gønrrai tarømara bønsra, ²²nuielø gønrrai sellotøga sellawa, namui manrrau pasrønrrai Espíritu Santon katsig basra tranøbguen indig kòn, tru tranrrab kørørmisrigwan kutøguewan tranrrab gúi asamig kònrrai.

²³Pøs nabe Tiusken ashen trendamønrrun: Na Corintosrømay gatøgucha arrumuppe, na ñimun kalugueetømønrrab lastima ashiptø arrumuig købig kòn cha. ²⁴Kaguende ñimui isubigwan Cristoinug pasra bønrramigwane treeg bønrrønrrai inchib ke nam garub pønrrønrrab gømøtø, masken ñim kasrag bønrrønrrai nambe purugubguen bønrrer. Kaguende ñimbe tru isubigwan Cristoinug pasra pønrraikkurriwei ñimbe mur bønrran.

2 ¹Inchawei na gatøle ñimuisrømay arruppe, nabe ñimun truba rruba isui inchain gømøtø, attrab isuig kuig kòn. ²Kaguende na ñimun isui inchai marene, trube, ðnane mu gasraaraniasamø? ðTru na isui inchai mariiløtøwei kasraaranmønrraitarru? ³Inchawei nabe øyeekkurri tru merrab guilgawan na pørøppe, tru nanguen kasraaranrrabelø na trusrø puben, nan isui indingarumønrraim børig kòn. Pøs na kasrag basrøbene, ñimgucha chiguen gømøtø,

mayeeløba treetøwei pønrrønrraimab isuague. ⁴Kaguende nabe ñimun pørøppe, truba rruba isui pørig kuig kòn, nai manrraube purø tab gømui, truba kappin gørrøgøb. Kabe na ñimun truba rruba isui inchai martrab gømtø, nabe ñimun truba rruba undaguig kui ashchai indig købig kòn.

Kalø marøbigwan Pablo truburø ulø baymub

⁵Tru øyeeg isuim basrønrrai møikkøben treeg marøbiibe, nandø gømtø, kan mayangatig ñim mayeelanba isui inchai mara basran damønrrun, ke menrra inchimønrraptø. ⁶Inchawei tru mowan ñim mayeelø lutaueø misra, nui kalø marigwan øl martrab ñim asha mariibe yandø tsabø gøn. ⁷Truigwane yandø ulø bayib gømø, pesannab, masken kuñab purugumig kòn, isubiitø yandø kerriguwan mandøguen gømui inchimønrrai. ⁸Inchawei nabe ñimun tru moweimburab ñimui undag købigwan gatøle tiusmanda kenamaray tamønrrun, ñim undaguelø gúi nø ashchai. ⁹Kaguende na ñimun pørøppe, øyeegwan isua børig kòn, chiyutøgucha maig taigwan ñim mørøbelø gøtashchab ashchab isua. ¹⁰Inchawei chigøben kalø marøbigwan ñim chi ulø baymø pesannanrrab isua kørromarene, nagucha nune treetøwei ulø baymø kørromisramønrrun. Pøs chi kalø marigwan na ulø baymø, pesannappe, (ulø baymumig chi pønrraig kuig køh chindindøbe gøben) ñimgurri treegwan marig kòn, Señor Jesucristoi merrab, ¹¹namun Satanás kegørrørskøb nø ganailø gømønrrab. Kaguende nambe tsabø ashibelø guer nøbe chitø martrab inchibig kuigwan.

Cristotøgabe kanawa puraamba pønrramig

¹²Na Troas ciudasrø, Cristoi tabig srø wamwan eshkab kusrenanrrab pubene, Señorweimburabelan maramig yaskappe tabig kurøppe kurendø, ¹³nai nuneg Tito trusrø mu gaagøptinchene, nane nai isubigube ni mumayguen gømuben, nabe trusrøngurri nømun ungwa chippa, Macedoniasrømay ibig kur.

Tiuswan ‘ungwa, ungwa’ taig

¹⁴Inchendø Tiuswan ‘mayanguen ungwa, ungwa’ chinrrab, Cristoinuube nam kaigwan kanawa igatø! luchimíig tsimaytø puraambub ambamig kønrrai marøb, katø tru Cristoimburab nebua asiiløbe purø may irrabzhig lataig chutøgucha namgurri larrøbitchai

marøb Tiuswan. ¹⁵Kaguende Tiusweimbe nambe Cristoi tru purø may irrabzhig latailø guer, kaigyugurri wesraig pønrrabelai lata, tru managatig pinab pinamsrømay amrrab pønrrabelai lata. ¹⁶Incha møilø tru pinab pinamsrømay amrrabelaimbe tru irrabiibe kwaitø irrøben, katøganelø kaigyugurri wesrailaimbe tru may irrabiibe øsig kømigwan irrabig køn. ¿Inchen øyeegwan marøb pasrønrraptiibe mu kø chinderah? ¹⁷Katøganelø misaamera truba nørø tru Tiuswei wamwan kan chigucha gømíig kui lataig an marøb srua llirabelø latawei, nambe treetøwei marøb pønrrømeelø guer. Treeg kømøtø, Tiuswei merrab waminchippe, maig wamindamigwan sora gømø, sølwan waminchib, Tius øriilø guermab isua, Cristogurri waminchibelø guer.

Tru srøig 'øyeeg, øyeeg martrab' cha kørømisrig

3 ¹¿Kabe nambe gatøguen namashib chi isumgaig 'tabelø guer' chib waminchib pønrrabra chindah? ¿Kabe nambe katøganelø latawei chi isumgaig tabelø gúi ashchai, kilga pøriilø ñimun tranamig, kabe ñimgurri kilga børiilø namun tranamig balaim bønrrabra chindah? ²Nam mailø gúigwan treeg asønanrrabelø tru namuyasig kilga børig latailøbe ñimwein gøn, tru ñim purø tabig amønaig, tru namui manrrømerayu pørig basrabig, mu misaameratøgucha ñimun mumera gøtashib, mailø gøtashib ashib tøgagúilø. ³Ñimbe torgandø asamdeelø gøn, kan kilgayu Jesucristo nøashib pøri latailø, tru namui maramigwan marøb pønrrailøygurri ñim srøig kurrabelø, tintatøga børig kømøtø, øsig wab Tiuswei Espíritutøga pøriilø. Kabe srug tambalmerayu pøriilø gømøtø, misaamerai manrrømerayu pøriilø gøn.

⁴Nambe iigwane Cristogurri Tiuswei merrab treeg kuitamab isua bønrrer. ⁵Kabe nam namashib øyeegwan martrapteelø namdø tsabø marøbelø gua, chi arrubiibe namuinukkurri arrubig kui lataig inchib pønrrømøtø, nam øyangatig tsabøtø marøb pønrramig arrubiibe Tiusweinukkurri arrubig køn. ⁶Incha Tius nøtøwei namune tru srøig acuerdo marigwan nam sølgandø marøbelø gønrrai mara pønsraig køn, tru acuerdo merrabsriig maig maramigwan martraim børigwan gømøtø, tru Espiritu Santoiwan. Kaguende tru maig maramigwan martrai pørigwan mormíigweimbe kwamigwan srua arruben, trune Espiritu Santobe tru srøig øsig kømigwan tranøbig køn.

⁷Inchen tru maig maramigu marøptøga bønrraig kwamigwan srua arrubig, srug tambalmerayu pørikken torguegwalmabig køptø, Israel misaamerabe Moiséswan malauguen ashchab gaimaig købig køn, nui malø torguegwalmabig køben, tru torguegwalmabiibe kwab yaindøgucha. ⁸Inchen tru øsig kømigwan srua arrubigwan marøb pønrraig tru Espíritu Santoimbe, ÷kan treetøguen gønrrab gømø, maig torguegwalmabig kuaasamø? ⁹Inchen tru maig maramigwan marøptøga bønrraig misagwan kaigyu pønrrønrrai kørromara pasrøbikken treeg torguegwalmabig kuibe, tru marøptøga bønrraig misagwan Tiuswei merrab chi kaig kømeeleø lataig tabig kønrrai marøbiibe, ikan treetøguen gønrrab gømø, mas purø torig torguegwalmabig køn! ¹⁰Kaguende truig torguegwalmabig lataig kuikken tru iig purø torguegwalmabiibamara ashene, truike chi torguegwalmabig kømøn. ¹¹Inchawei tru torguegwalmabig kwab ibikken kan treeg torguegwalmabig tøgais arriibe, tru mana pinømø pasrabig basrønrrabiibe mas maig torguegwalmabig kuaasamørra!

¹²Inchawei tru tøgagønrrurmab isugwan nam tøgaguen pønrraig køppe, nambe chi kørmeø maig tamigwan torgandø waminchibelø guer. ¹³Kabe tru Moisés lataig inchib pønrrømer, tru Israel misaamera nui malau torguegwalmabig kwab arrubig yandø patsi ashmønrrai, malø gasraitøga kasrøb lataig. ¹⁴Inchendø nømui turmerayube yandø chi wamindikken kebyainameelø murig misriilø gua, møin gwalømgatig tru merrabsrø Tius acuerdon marig købigwan leben, chi tainguen mørmeelø gøn, tru malø binøgasrøb pasrabiitøwei pasrabig pasraikkurri. Kaguende tru pinøgasrøbigwane Cristotøwei kerranrrun. ¹⁵Incha møin gwalømgatig tru maig maramigwan martrai Moisés pøriilan asiimørig, tru maløwan pinøgasrøbig lataig pasrabiibe nømui manrrømerayube kasrain basran. ¹⁶Inchendø møikkøben Señorweimay lllirawa pasramisrene, tru pinøgasrøbig lataig pasrabiibe nuinukkurrimbe kerraig kønrrun. ¹⁷Kaguende Señorbe tru Espíritu gua, Señorwei Espíritu chu pasrøbene, Tiuswei merrab kemalamig truyube chigucha iløsrkønrrabiibe chi gaagøn. ¹⁸Inchawei nambe mayeeløba maløwan chi kasra gømø lataig ashib pønrrabeløbe, kan espejo latailø guer, Señorwei tru torguegwalmabigwan kegurnabelø, nø maig køben nam treeløtøwei misrøb, katøguchinguen, gatøguchinguen tøreleø misrøb amber. Treebe Señorweinukkurri arrubig køn, tru nø Espírituinug.

Jesucristoimburabigwan eshkabelø

4 ¹Inchawei nambe Tius namun lastima asiitøga i tru marøb pønrramigwan tøga bønrraig kōppe, nambe chi kullaarab melømer. ²Pøs chigøben ke kōrikken gōnrrapteelø sōratø mariilane nambe yandø wendøbasrar guer, sōratø larrø mōg isua marøb pōnrrømøwei, Tiuswei wamwan lliska peemaytø marøb pōnrrømøweingue. Treeg marøb pōnrrømøtø, tru newan ciertonigwane maig kuigwan tōrgandø kenamarøb pōnrraikkurri, nam tabelø gúigwan namashib kenamarøb pōnrrer, maya misaamerai isub kebachib pasrabigu ka inchib pasrø mugumab isumig kaanrrai Tiuswei merrab. ³Inchen tru tabig srø wamwan nam eshkab kusrenanig katøgucha pinøgasaig lataig chugúi mōriimfīg kōrrømisrøppe, tru yandø pinab pinamnuumay amrrabelaimbe pinøgasaig lataig kōrrømisran. ⁴Kaguende tru mōin gwaløm yu pirau tius, tru nugwaimandziibe, tru chi kōremeelane nøm chigúi mōramig isubig tōgagúigwane chigúi mōrmeelø gōnrrai kasra basrin gōn, tru Cristoi tōrguegwalmabigwei tabig srø wam tōrbilabigwan nøm nebua ashmōnrrai; tru Cristobe Tius maig kōben, truig kōn. ⁵Kaguende nambe namuimburabigwandøwei eshkab kusrenanmøtø, Cristo Jesúsbe mayeelaim bala nō ashib karub pasrabig kōn cha eshkab kusrenanøbelø guer. Katø nambe Jesucristoyasig ñimuimbe ka karuindø melabelø guer. ⁶Kaguende: “Tru lōstøyugurri tōr pilōnrrain” cha, trenchib Tius nōtøwei namui manrrømerayu nui tōrtøga kebilin gōn, tru Tiuswei tōrguegwalmabig Jesucristoi malau pilabigwan nebua asam tōrwan namun tranig kōnrrai.

Chigøben trømbøig puingucha mur bōnrrab

⁷Inchendø nambe iig tru purø tabigwane namui asr kan pirø gōtsø lataigutø tōgaguer, tru iig maramburab marøbíg purø nuig tabiibe namuin gōmøtø, Tiuswein gúi kenamartrab. ⁸Chiyutøgucha chine chine pui melamig nebuingucha, ke truyutø tambal ambagucha warømer. Ke kan chindamermab isumig pui meløbendø, yandø ke kaimamuitamappe isuiløgucha melømer. ⁹Namun kaig marøb amrruindøgucha, namundø elatsiilø melømer. Pōtiitsiiløbe gúinabendø, kerriguwan pinisiiløbe gōmuinatan. ¹⁰Inchawei nambe chu ambuptøgucha, namui asru Jesucristo

kwaigwane tōga amōner, katø Jesucristo øsig waikkucha namui asru kenamisrtrai. ¹¹Kaguende nam øsig bønrrabeløbe Jesucristogurri chu urastøgucha ke kwaitø, kwaitø melamig nebutan, namui ka pinønrrab asru Jesucristoi øsig basraikkucha kenamisrtrai. ¹²Inchawei namuinuube kwamig marøb pasrøben, trune ñimuinuube srøig øsig kōmig marøb pasran.

¹³Tiuswei wamwan pōriguma trenchibig kōn: “Kōrewa, treekkurri waminchar” cha. Pøs namgucha namui isubigwane Cristoinug treetøwei pasra bønrrøwa, treekkurri nambe kōrewa, Tiuswei wamwan waminder. ¹⁴Pøs nambe ashibelø guer, Señor Jesúsuan kwailai utugurri Tius tru gatøle øsiirangarubiibe, namungucha Cristo Jesúsba tru kanbalatø pønrraikkurri kusrua, Tiusbe nui merraptøwei nam ñimba kanbalatø pønrramig kōnrrai martrab gúi. ¹⁵Pøs kerrigu øyeeg pub arrubiibe ñimuyasig tab gōnrrain gōn, tru ka yandø tab indig misagwan katøguchinguen, gatøguchinguen nebub ibene, ‘ungwa, ungwa’ tameløgucha nuramburab nuranrrai, Tiusweyasig maya nuguen tab gōnrrai.

¹⁶Inchawei nambe chi kullaaramer. Kaguende namui asrbe patsab yaingucha, namui umbube kwalømmørig, kwalømmørig srøig misrøb inrrun. ¹⁷Pøs nam chigøben puinab melamig ka petø pureb arrubig, kan yangucha murig kōtanmab isub mur gúi melaiibe managuen patsønrrabgaig kan tōrguegwalmabig maya nuibaguen øyeeg lataig kōn cha, kemesra trendamgaig tabigwan tōgaig arrubig kōn. ¹⁸Kaguen nambe namui kaptøga asigwan asha bønrrømøtø, chi nebua asiimíigwan asha bønrrer. Kaguende kaptøga nebua asiiløbe ka purainrrabiitøwein gøben, trune tru kaptøga nebua asiimeeløbe managatigweyelø gōn.

5 ¹Pøs nambe yandø ashibelø guer, yu pirau nam øsig bønrraig tru namui asr ka petøweindiig kan rancho-unø mara basrindø lataig, yandø minchib patsindøgucha, katøgan srø asr puro tab ya lataig, mu mōguelø taska mari ya gōmøtø, srømbalasrø managuen patsønrrabig kōmíig Tius tranig tōgagømigwan. ²Inchawei nambe yu pønrrappe, tru srømbalasrø kewa burramitøga pinøbuliilø gømigwan, mana gōnrrermab truba rruba nuisrab isubelø guer. ³Treebe namune srø asrtøga kenanen, nambe yandeelø asr chigar gōmø, tōgar gōmønrrun. ⁴Inchawei i asr kan carpa ya lataigu nam øsig bønrrabeløbe larrø tab gōmui, truba rruba nuisrab isuig melabelø guer. Pøs namune kwamuinrrabna gōtan nam

tøga bønrraig asrwan trubalatø srøig itøguenniilø gømwatøbe, tru yandø pinab patsønrrabigwane tru srøig øsig kømibe yandø nøtø kerriguwan pinabgasra basramisrtrai. ⁵Inchen namun øyeeg pønrramig kønrrai marøbiibe Tius nø gøn, tru treeg kønrrai Espíritu Santon katsig basra namun tranøbguen inchibig, tru tranrrab kørømisrigwan kutøguewan tranrrab gúi asamig kønrrai.

⁶Inchawei nambe chu urastøgucha chi isumø bønrrer, tru namui asru øsig amønippatøbe, Señorweim bulu gømøtø, nambe yabsrøndø pønrrabelø gúi nebua asha. ⁷Kaguende nambe amønippe, namui isubigwan Cristoinug pasriitøgatø amøner, namui kabrrawa nebua ashagurrin gømøtø. ⁸Inchendø nambe treeg kønrraitamab chi isumø bønrrer, masken namune asrugurri tarømisra ambinrrabna gøtan, Señorba kanbalatø purrønrrab amrrab. ⁹Inchawei namui asru øsig bønrrøwa lata, asrugurri tarømisra amba lata Señor nø tab gúi mørøb wanrrai marøbelø gømig namuimbe truig køn. ¹⁰Kaguende nambe tru maig maramigwan Cristo asha marøb wainug mayeeløba kemalamig køn, namui asru amøña tabig marig kuin gúi, kaig marig kuin gúi maig marigwan nam møitøgucha truburø utønrrab.

Tiusba katøle tab gørrømisramig

¹¹Inchawei Señorwan mandø korig tøga bønrramigwan nam ashibelø gúi g køppe, misaamera Señorwan kørenrrai inchib melabelø guer. Pøs Tiuswei merrabma nam mailø gúigwan torgandø kenagúibe, katø ñimui isub kebachib pasrabigugucha treetøwei torgandø kenagønrraimab isur. ¹²Kabe nambe namasiitø katøguen ñimui merrab ‘truba tabelø guer’ chib pønrrømøtø, ñim namgurri tab gúi mørøb kasrag bønrramigwan tøgagønrrai treeg isua inchib pønrrer, ñim tru mandø løtamigwan tøgagønrrai, tru manrraugurri isua gømøtø, ka palatø treeg maranmab ashchaindø møg inchib chib pønrrabelan. ¹³Namun ‘locos køn’ dainab pønrraibe, Tiusweyasig køn. Inchen maig pønrramigwan chugúi møra bønrraibe, ñimuyasig køn. ¹⁴Kaguende Cristoi undag købiibe namune martrai trawaguchibig køn. Pøs iigwan nam isua ashene: Cristoma kwappe, mayeelaimburø kwaig købene, treekkurri mayeeløba kwaig køn. ¹⁵Inchen Cristobe kwappe, mayeelayasig kwaig køn, tru øsig amønibeløbe ka nømuyasiitøwei

øsig amøñimøtø, nuyasig amøñibelø gønrrai, tru kwawa, katøle nømuyasig øsiirabigwei.

¹⁶Inchawei nambe yandø møingurrimbunøbe mundøgucha yu piraueø isui may ka treetø isua ashib pønrrømeelø guer. Pøs nambe merrappe Cristone yu piraueø isua asimay ashibelø guatøgucha, møimbe yandø treetø nebua asha tøga bønrrømer.

¹⁷Inchawei møikkøben Cristoinug pasrabiibe, yandø nøbe kerrigu srøig køn; merrabiibe yandø chab puraiben, møimbe yandø kerrigu srøig marig peemayig køn. ¹⁸Inchen kerriguba øyeeg arrubiibe Tiusweinukkurrin gøn. Pøs nam kailø gua nøbatøwei tab gørrømisramigwan Cristo Jesúskurri treeg kønrrai mara, kailø gua, Tiusba tru tab gørrømisram wamwan nam marøb pønrrønrrai, nø tranig køn. ¹⁹Tru wambe iig køn: Tiusbe nøbatøwei Cristogurri pirau maya misaameraba kailø gua, tab gørrømisramigwan marøb pasraig, nømui chi kaig mariilan ulø bayrrab isua ashmøtø. Tru øyeeg nøba tab gørrømisram wamwane namun waminchai trana bønsraig køn. ²⁰Nambe Cristoi munchiyu, misag utu Cristo nø waminchib pasrab lataitøwei nui wamwan waminchib pønrrønrrai pønrrailø guer. Namgurri Tius nøashib treeg maray chib pasrab lataitøwei, nambe Cristoi munchiyu ñimun tiusmanda øyeeg martrunrrigay tamønrrun: iTiusba tab gørrømisramigwan maray! cha. ²¹Cristobe chigucha chi kaig marig chigaigwan, Tiusbe namuimburo nune kaig marøbig kui lataig treeg mara basrig køn, nam kaig marmua lataig pønrramig kønrrai Cristogurri treeg martrab.

6 ¹Nam Tiusba marøb pønrrabelø gúig kōppe, ñimune øyeeg marøb gørrunrrigay chinrrab, Tiuswei tru ka yandø tab indigwane ke chi martraamøbendø uta tøgagømøtay cha.

²Kaguende nui wamwan pørigube Tiusbe trenchibig køn:

“Yandø tru purugum gwalømmera puim basrøben, ñun mørig køn cha.

Kaigyugurri wesrailø gøm gwaløm puim basrøben ñun purugúig køn” cha.

iMøi yan gøn, tru tabig purugúigwan utamibe! iMøi yan gøn, tru kaigyugurri webambam gwalømbe!

Pablon chine chine nebub arriilø

³Mugøben Tiuswei tabig srø wamwan kaashib, nam marøb pønrraigwan kaig køn chib wamindig kømønrraimbe, nambe

kaig marøb mungucha srurrengwangerub pønrrømer. ⁴Masken treeg inchimøtø, nambe chiyutøgucha Tiusweiwan marøb melabelø gúi asiilø gønrrab treeg kenamarøbelø guer: chu uraskucha elachimøtø, marøbig marøb melamigu lata, chine kaig pub arrubigu lata, chine palai mørøb, isui melamig arrubigu lata, ⁵ichagutsiilø gømig nebui lata, kailan pønsrai yau keerig pønrramig nebui lata, kanbalatømisra kaig martrab namig kurrøben treegu melamig nebui lata, maramga murelan marøb melamig nebui lata, kibguen kimø melamig nebui lata, chigucha mameelø puraambub melamig nebui lata, ⁶chi kaig marmø chishig amønamigu lata, nebua ashib ambigu lata, chine indindøgucha tammay ka melabig melab, tab inchibelø gømigu lata, Espíritu Santo namba pasraigu lata, nam ka inchib gømö, cierton undaguelø gúigu lata ⁷cierton wamindamigwan treeg waminchibelø guer. Tiuswei maramburab marøbiitøga marøb, tru chigurrimbunø tabig sølgandø marøb pønrraitøgabe nambe kusrmayba, atsimayba srua kwayab pønrrer, kan suldau kwayab turiamig kusrmayba espadan atsimayba escudon srua kwayab pasrab lataitøweingue. ⁸Kanmaywane truba tab indinab, kanmaywane maig købash indinab, kanmaywane truba tabelø gøn chib wamindinab, kanmaywane larrø gailø gúi mara wamindinab, maig kuigwan nam cierton waminchendø, larrø may wamincha isapteelø gúi marinab, ⁹nambe mumera gúi nebua asiilø gúinabendø, asiimeelø gúi lataig tøgagúinab, yandø kwawa pinanmab asha tøgagúindøgucha, øsig amønibig amønibelø, trømbøig ichabetiilø gúinabendø, kwamø ka øsig amønibelø, ¹⁰truba isuilø meløbendø, purø tab gúi kasrag bønrrabelø, larrø waachamera gúinabendø, misag truba nørrowan tabigwan tøgagømburab tøgagønrrai marøbelø, chugurringuen gømeelø kerrigu chiga latailø gúinabendø, kerriguh tøggar treelø gúinatan.

¹¹Nambe, ñim corintosreelan, maig wamindamigwan törgandø treeg waminder. Nam ñimuimburab isumibe namui manrrømerabe ke kurindø basran. ¹²Ñimuimburab nam isumibe chugatikkucha kurin basrøben, ñimweinre kasrøb tøgagøn namuimburab. ¹³Ambugurri igurri lata treeg kønrraimab isua, kan nai ureg kui lataitøwei nabe ñimune trenchar: iÑimui manrrømerangucha treetøwei kura tøgagørrunrigay! cha.

Nambe øsig wab Tiuswei ya guer

14 Ñim Tiuswan kørebeløbe Tiuswan lata køremeeløbabe lincha maramgaigube chi lincha maramig kòmøn. ¿Kaguende tru tabig sòlgandø maramiba, sòlgandø gòmø mariibabe chinchà kandø gònrrab gø? ¿Katø løstiiba, tørbabe chinchà trubalatø gònrrab gø? 15 ¿Cristoba, Belialbabe chinchà kandø isunrrab gø? ¿Criston kørebiiba, Criston køremíibabe chinchà kandø isub pønrramdiig kònrrab gø? 16 ¿Katø Tiuswei yaba, taska mari tiusmerababe chinchà trubalatø gònrrab gø? Kaguende nambe tru managuen kwamø øsig wab Tiuswei ya guer. Pøs nøbe trendaig køn: “Nabe yandø nòmuintug pasrabig basrab, nòmui utu uñib indamønrrun cha. Nabe nòmui Tius køben nømgurrimbe nai misaamera gònrrun” cha.

17 “Inchawei treeg købene:

Tru kaig marøb misaamerai utugurrimbe webamba,
yandø nørørmisray” cha,

Señorbe nui misaameran trendan.

“Chigøben køsongømdiigwane katøramøtay cha.

Pøs marmubene, nabe ñimun utamønrrun” cha.

18 “Incha nabe ñimuimbe møkai misren,

ñimgurrimbe naimbe nai nusrkalo,

nai nimbasrmera misrtrabguen” cha,

Tius Newan Maramburab Marøbiibe trendan.

7 1 Inchawei ñim, nai undaarailø, tru Tius tranrrab misra kørørmisriilan tøgørbe, namui asru lata, namui espírituyu lata, kaig marig køsongønrrapteelan kerriguwan chish misrkun, Tiuswan køriibala pønrraigu kerriguwan nuindø newan tabelø gònrrab.

corintosreelø yandø mas kaig marmønrrab isua mørøb

2 Namun ñimui manrraugurri isua utørray chinrrab inchar. Nambe møigwangucha ñimun sòlwan marmø kalø mara bønrrømøwei, kaig marøb ñimun møigwangucha mindisha kørørmarmøwei, kabe nam ñimgurri nam tøgamismøwei indig køn. 3 Nabe iigwan ñimun øyeeg chippe, ñimbe øyeeg kailø gøn chinrrab gømøtø inchar. Nabe yamba trendaig kuig køn, nambe ñimune namui manrrau tøgø bønrrer cha, øsig amøña lata, kwamig kui lata ñimun namui manrrau tøgagønrrab. 4 Nabe ñimune chi

isumgailø gúi isua basrab, chiburø gøben ñimgurri na truba tab gúi mørøb pasramigwan tøgagøb inchar. Nan truba tab gønrrai mari basrar, chine isui pønrramig puindøgucha, kasrag købigwan tøgagømburab tøga.

⁵Nam Macedoniasrø puabe, namui asrwane kan pishindø tabguen israb tøgagømig nebumíig køn. Treeg kømøtø, chiyutøgucha ka isui melamitø, isui melamitø arrubig køn namune, namuim bötøgatanbe chinetø indinab melamig arruben, namui manrraube korig isub melamig. ⁶Inchendø Tius tru larrø kullaarai isui melabelan isui inchimønrrai marøbiibe, Tito arriitøga namune truba tab gúi melønrrai marig køn. ⁷Katø Tito arrikkurrindø gømøtø, nøgucha ñimgurri truba tab gúi mørøb pasramigwan utikkurrimba gøn. Nøbe namun wammørøsrkøtan, ñimbe nan truba ashig kui melaigwanba, ñim tru merrab kalø marig købigwan isua møra kappin gørrøgaigwanba, ñim naimburab truba rruba isub melaigwanba. Treekkurri nane gatøguchinguen kasraaranrrai martan.

⁸Pøs na ñimun tru kilga pøra øriitøga ñimun truba isuilø kørrømisrtrai marig købigwane nane chi isumøtan. Pøs tru urasbe nane isubwei indig køn, kaguende tru na kilga børa øriibe kan maya yanagatiitøbe ñimun isui melønrrai marøbwei inchen. ⁹Møimbe nane kasrag køppe, tru ñim truba isui melaigwan, trunun isua kasrag kømøtø, tru ñim truba isui indiiibe ñimui kaig mariilan isua møra, Tiusweimay llliranrrai marikkurri nane kasrag køtan. Pøs ñim truba isui inchib pønrrappe, Tius trendø treeg kønrrain gøben gúig kua, nambe ñimune chigucha chi kalø bunrraimbe marmuig køn. ¹⁰Tius maig palain gøben nam trumay isui inchib pønrraibe ñimui kaig mariilan isua møra, Tiusweimay llliranrrai marøbig køn, kaigyugurri wesrailø gømigweyasig trembe kaabashmøtømab isumig chigaikke. Trune isui inchib pønrramig arrubig yu pirauibe, kwamibe tøgagø arrubig køn. ¹¹Tius maig palai inchen, ñim trumay isui inchib pønrraigwan ñimguen asay: ñimuinug truba marøg kui inchib pønrramig arrub, øyeekkølig kalø marøbrain gøn chib tør marøb pønrramig arrub, kalø maren namig isub pønrramig arrub, køriibala bønrramig arrub, truba rruba asinrrabna gúi inchib pønrramig arrub, tabigweimburab ke chinsraatø inchib pønrramig arrub, kaig marøbigwane møra meganrrai marøb pønrramig arrub, treeg arrin gøn. Inchawei kerrigu øyeeg purayaigu ñimbe chi kalø mara bønrrømuin gúi

kenamarøb pønrran. ¹²Inchawei tru kilgawan pørøppe, tru sölwan marmø kaig marøbigwan isua, truikkurrim bormøwei, kabe tru kalø marinabigwan isua, truikkurrim bormøwei indig køn. Treeg kømøtø, tru ñim namuimburab truba isubelø gúigwan ñimui utu Tiuswei merrab nebua asig kønrrai indig kuig køn. ¹³Inchawei nambe chi isumø tab gúi pønrramig kønrrai mariilø guer.

Nam tru treeg tab gúi bønrraig kømnetø, Titon truba rrua tab gúi pasrai ashabe, nambe larrø tab gúi truba kasrag bønrrer. Kaguende Titone nui isubigu katøle truba tab gúi mørøb pasrønrrai, ñim soteelømisra purugúin gøn. ¹⁴Pøs ñim corintiosmeraimburab truba tab gúim basrar chib Titon na waminchib pasraigwan, chi køriimisra kørørmismur. Nam ñimun kerriguba chigøben wamindiima chi isa wamindig kømugig kōppe, ñimuimburab truba tab gúi mørøb Titon nam waminchib pønrraikkucha treetøwei isa gømø wamindig webyan. ¹⁵Inchawei Titobe mōimbe ñimune gatøguchinguen undaguig køn, tru nø maig karuigwan ñim mayeeløba mørøb, nun utabgucha, køriibala ke itōnab utig købigwan isua. ¹⁶Chiyutøgucha ñimbe chi isumgailø gúimba mayanguen nane tab gōtan.

Merø gømø, tranamburab tranigwan waminchibig

8 ¹Trube, mōimbe ñim nai nunelø, wammøra gønrrai inder, tru Macedonia birausrø iglesiameran Tius nui ka yandø tab indigwan øyeeg tranigwan. ²Yeeg chine kaig nebuinab melamig pub arrubig ututø, nōmui kasrag købigwan kasrag kōmburab tōgagúiba, larrø chugurringuen gōmuilø melaibabe, merøbala gømø, tranamburab tranøbelø gønrrai marin gøn. ³Inchawei nabe maig kuigwan wamindamønrrun, tru nōmun maig purugumdiig køben treeg purugua, nebumgaigwanguen nebua tranig køn cha, nōmun mu tranrrai indig kømøtø. ⁴Pøs namune truba rrugabelø gøn: “Tru Jerusalénsrø Tiuswei misaameran namgucha truilan tōga purugúig kønrrai treeg marbashibsrumøgue” chib. ⁵Incha nam treeg martraitamab isuigwandø marmøtø, nōmbe Señorweyasimerrig pønrrønrrab nōmashib pønrramisra, trugurrimbe namun treetøwei pønrrønrrab pønrramisrøbelø gøn, Tius maig kønrrain gøben treeg. ⁶Inchawei nambe Titone øyeegwan martrunrrig cha waminchibelø guer: “Iig truba tab indigwan ñi maig marøb pølbasriibe, katø treetøwei tru

corintiosmera jerusalénsreelayasig tranigwane tabig marøb patsøgørrunrig” cha. ⁷Pøs ñimbe isubigwan Jesucristoinug pasra tøgagømigü lata, Tiusweimburabigwan nebua ashib waminchib ambigu lata, Cristoi maramigwan tab asha maramigu lata, ñim namuimburab undag købig tøgagüigu lata, chiyutøgucha ñimbe ya merrabguen melaig køppe, lastima asha tranøbelø gømigü chigucha iyu treetøwei merrabguen webamrrab inchigay.

⁸Maig martrain chippe, ke kandø chibig lataig nabe treeg karua basrmur, treeg kømøtø, ñim undag købigwan cierton tøgagüitashchab ashchab inchar, katøganeløma treeg tab marøbelø gøn cha trunun eshkab. ⁹Kaguende ñimbe namui Señor Jesucristoi tru ka yandø tab indigwan nebua ashibelø gøn, nøbe chigucha chi palømfíg tøgagü købendø, ñimun undag købiitø larrø waacha misra, tru nø treeg waacha misriitøga ñimun Tiusweimburabigwan chigucha chi palømeelø gønrrai marigwan.

¹⁰Incha iigube nabe ñimun øyeeg maramdiig køn chinrrab inchar: tru purugunrrab tulisamigwan ñimbe marig bilawei tranamigwan ñimmerrig tranøb, katø trutø gømøtø, maramigwan ñimwei isuig kuig købene, ¹¹trube, ñim pølbasa marigwane mømbe tabig marøb patsøgamig køn cha. Tru ñim purugunrrab indamigwanma ñim ke martraptø bønrraig køppe, trube, tru maramigwane treetøwei marøb patsøgamdiig køn cha, ñimun maig nebubendø. ¹²Kaguende møikkøben ke tranrrab isua, mayanzhig tranamdiig køben treeg tranigwane Tiusbe chi kashmø utabig køn, ke chugurrin gømuingucha tranrrai inchimøtø.

¹³Inchendø nabe øyeeg chippe, kaneløbe chairailø gørrømisren, ñimbe purugub meløwa, ke chugurringuen gømui inchib gønrrain gømøtø, ¹⁴mumaytøgucha lata gønrrai inchar. Møin gwaløm ñim chigucha chi palømfíg uncha tøgagüibe nømun purugumig køben, katøwan ñim palai meløbene, tru nøm uncha tøgagüibe ñimun purugumig kønrrai. Trumaybe mumaytøgucha lata gønrrun. ¹⁵Tiuswei wamwan pørigu maig taimbala: “Nu tulishibiibe ke unchagøm tøgagømøwei, lamøtø tulishibiibe palappuin gømøwein gøn” daig.

Titon Corintosrømay karua ørøb

¹⁶Namui Tiuswan ‘mayanguen ungwa, ungwa’ chinrrab, ñimuimburab na isui lataitøwei Titoi manrraugucha isunrrai

pasrigwan. ¹⁷Pøs na nun Corintosrømay ya, øyeeg maramdiig kòn cha, na wamindigwan ka møriitø gømøtø, nøbe maramigwane ke marøg kuindø megaig kuig køppe, nøashib treeg martrab isua, ñimuisrømay yan.

¹⁸Incha kan nuneg, Tiuswei tabig srø wamwan eshka kusrenanøb pasraigu, chu iglesiameratøgucha nune truba tabig wamindinabigwan nambe Titoba lincha inrrai ører. ¹⁹Incha gatø treetø gømøtø, tru iglesiameragucha nun lawa wesraig kuig kòn, tru jerusalénsreelai tab indig purugúigwan nam srua amben, nø namun lincha attrai. Nambe Señorwan maya nuguen tab indig kònrraimba, nam purugug kui pønrraigwan katøganelan kenamartrappa, tru an tulisaigwane nam asha marøb pønrrabelø guer. ²⁰Mugøben namun ‘øyeeg kalø marøpteelø gøn’ dainab pønrramig kømønrrai inder, tru yeeg nørro keta traniiilan nam asha marøb tøgä bønrrønrrai tranigwan. ²¹Kaguende nambe chiwandøgucha maig maramigwan sölwan martrab inchi melabelø guer, Señorwei merraptø gømø, misaamerai merrabgucha treetøweingue.

²²Incha nambe gatøgan namui nunewan nømun lincha inrrai ører, nui mariiløyu chiyugøben ke martraptø basrabig kui katø gatø treeg møg kui nam asigwan. Incha mømimbe nøbe gatøguchinguen tru maramigube ke martraptøweim basran, ñim chi isumgailø gúi nø truba isua tøgagúikkurri. ²³Pøs Titobe, naimbe nan lincha megabig, katø ñimui utu chi maramigu purugub megabig, treeg kòn. Inchen tru gatøgan lincha ambub nuneløbe, tru iglesiamera karua øriilø, Cristoyasiibe maya nuguen tabig kònrrai pønrrabelø, nømbe treelø gøn. ²⁴Inchawei ñimbe tru møguelane truba undaguelø gúin gúi ashchai kenamartrigay, iigwan tru iglesiamera mayeeløba asha gønrraingue. Katø na ñimuimbura tab gúi mørøb pasraibe chigurrin gúi ashchai inday.

Cristogurri nunelan purugumig an tulisaig

9 ¹Inchen tru Tiuswei misaameran purugumig tru an tulasamigweimbura ñimune chi pøramikken palømøtan. ²Pøs tru purugumigwane ñimbe purugunrrab ke muniitø bønrrabelø gúi nabe ñimune ashibig kur. Incha nabe treegwan ñimuimbura macedoniasreelai utu truba tab gúi waminchi pasraig kòn, ñim acayasreeløbe tru tranamigwane marig

bilasrøwei tranrrab chab tamara gúig købene. Inchen tru maramigwan igatø! marig kørromisrtrai isua ñim marøb gúibe, nòm tru macedoniasreelø truba yamelø treetøwei martrab isunrrai indin gøn. ³Øyeeg kuindøgucha tru ñimuimburab nam øyeegu truba tab gúi mørøb waminchib pønrraibe, ka wamindiitø pureptinchibgunmab isua, i nunelan ørar, tru ñimuimburab na maig waminchib arrig, masken tamara gønrrai, ⁴inchippa macedoniasreelø møiløgøben naba amrrub chi inchene, ñim chigucha marmø, pesan gøben puinab melømønrrai. Pøs, kan treeg bubene, namune purø nu kóriimisram nebunrrab gøn, ñim chab tamara melaitamappa nam ñimun chi wammørørørømøikkurrindø. Pøs, ñimune masken kóriimisram nebunrrun. ⁵Inchawei øyeekkurri, i nunelan ñimuisrømay merrab ashchab amrrai øramig nabe palai asig kuig køn tru purugumburab purugunrrab misrig købigwan tulisam burugua yandø ke chab tamara munig kønrrai. Trumay tru ñim purugumig tulisaiibe merøbala gømø, rranig kui asamdiig kønrrai, ke tranrrai inchendø, rranig kømøtø.

‘Merø gømø, purugumigwan øyeeg maray’ chib wamindig

⁶Incha ñimbe iigwan isua guy: møikkøben ke kagømønrraindiig ellguabiibe, katø treetøwei kagømønrraindiig tulishinrrun. Inchen møikkøben ellguamburab ellguabiibe, katø ellmarigwan tulisamburab tulishinrrun. ⁷Ñim møitøgucha tranamigwan tranøppe, ñui manrrau maig tranrrab isua tøgagúig køben, treeg rranamig køn, ke tranmuinrrabna gøbendø, tranmøwei, kabe ke treeg tranamig kuikkurrindø tranmøweingue. Kaguende Tiusbe kasraatø rranøbigwane undaguig køn. ⁸Inchen Tiusbe maramburab marøbig køn chigurrimbunø tøgagømigwan ñimuinug tøgagømburab unchaguen tøgagømig kønrrai, treeg maramig, chiyutøgucha ñim chi palabigwan chu urastøgucha palømø tøgagua, chigøben tabig maramigu kerriguba ñim purugub gømig unchaguen tøgagønrrai. ⁹Inchawei Tiuswei wamwan pørigube trenchibig køn:

“Larrøbitchai tsurøb, waachameran tranøb indig køn cha.

Inchen nui tru tabig sølgandø maramibe managatig pasrabig pasran” cha

¹⁰Inchen Tius tru ellmarøbigwan yell rranøb, pirri manrrai tranøb inchibiibe, maig palabigwan tranøb, ñimui yellwan

nørrø larrøbitchai marøb, tru ñim tabig sølgandø maramibe kan ellmarig misrøb lataitøwei nørrø larrøbichib inrrai martrun. ¹¹Trumaybe ñimbe chiyutøgucha chi palømfīg tøgagønrrai mariilø gønrrun, chiyutøgucha purugumigu merøbala gømø, tranamburab tranøbelø gønrrai. Inchen ñim tru purugúigwan nam nømun tranen, nømbe Tiuswan ‘mayanguen ungwa, ungwa’ chib gømig kønrrun. ¹²Kaguende ñim øyeeg marøb gúibe Tiuswei misaameran chi palabigwan treeg purugúitø gørrømisrømøtø, Tiuswan ‘mayanguen ungwa, ungwa’ chib gømikkucha truba rruba kønrrun. ¹³Inchen tru ñim øyeeg purugúigu ñimbe mumera gúi asiilø gøn. Katø nømbe Tiuswan truba tabig waminchun, Cristoi tabig srø wamyu pønrrøwa, truig maig taigwan ñim møra, truigwan kenamarikkurrimba, katø ñimbe nømun merøbala gømø purugub, gatøganelø mayeelan treetøwei purugub indikkurrimba. ¹⁴Katø nøm tru ñim purugúigwan utabeløbe ñimuyasig Tiusba waminchippe, ñimuimbura truba nu undaatøga martrun, Tius nui ka yandø tab indigwan tøgagømburab tøgagønrrai ñimun tranikkurri. ¹⁵iTiuswan ‘mayanguen ungwa, ungwa’ chinrrab, wamindiitøgabe kan mandøguen tamgaig purø nuig tabig keta tranigwan!

**Pablo Tiusweiwan nø marøb pasraigwan
chinhaingai waminchib**

10 ¹Na Pablo ñimun øyeeg martrigay chib waminchar, Cristoi tru purø tammayig kuitøgaba, purø tab inchibig kuitøgaba. Tru na ñimui malau basrappe, chi tre chish waminchib pasrømfīg køn dainab, trube, peesrøn basrappe, maig tamigwan kelarrab, guelarrab trenchibig køn dainabig. ²Na ñimun trenchinrrab inchar, na ñimuISRømay arrua, namun møiløgøsrøn ka namuimbura ptø isub yu pirau maig købashtiig amønibelø gøn chibelan kelarrab, guelarrab tamig tøgagúigwan tiusmanda ñimun trendamig kømønrrai inchunrrigay cha. ³Pøs nambe misag kuinabwei inchendø, yu pirauelø maig kwayabelø gøben, treeg kwayab amønimeelø guer. ⁴Kaguende tru chitøga kwayamig nam tøgagúibe, møguelain gønrrab gømøtø, trube Tiusweinug maramburab marøbig, treeg køn, ni mumaygucha chindamga murelø nugwaimandzig pønsraig pønrrabelan pøtiitsamig. ⁵Pøs truitøga nambe tru kusremburab kusrewa wamindiilanba, katø

tru purab nørreelø isuilø misaamera Tiusweimburabigwan nebua ashmønrrai sötø basramisrøb kurrabigwanba pøtiitser, tru chigurrimbunø isuilane Cristo maig kørnrai inchen, treegu pønrrønrrai merrarrowa pønsrøb. ⁶Incha ñim newan mørøbelø misra pønrramisrene, tru maig taigwan mørmeelane nambe møra melønrrai mara kørromartrab pønrrer.

⁷Ñim gúi ñimui kabyu maig kenagøben, ka palatø isua ashibelø. Møikkøben, isa gømø Cristoin gurmab isua basrøwabe, trube, iigwan isua gømig køn: Nøma Cristoin gúig købene, namgucha Cristoietøtøwein gúin gúi. ⁸Maig maramigwan nam karub tøga pønrrønrrai Señor namun trana pønsraigwan, iigwan na purø mөг inchib waminchib pasrab lataig indinaindøgucha, nabe chi korig misrabe pasrømumønrrun. Pøs tru maig maramigwan karub pønrrønrrai Señor namun trana pønsrøppe, ñimun mindishaguen gørrømartrain gømøtø, Tiusweimburabigu nørøram purugunrrainguen tranig kuig køn. ⁹Pøs na kilgamera pøra, ñimun truiløtøga ke kwaarøsrøg køb lataikkucha indig kømønrrai inchar. ¹⁰Pøs møiløbe trenchibelø gøn: “Tru Pablo kilga børiiløbe purø murtø rranøbig, ke menrra mur waminchibig treelø gøn cha. Inchendø nøashib namba basrappe, chi trengatig kømøøllig, waminchibgucha chi may waminchimíig køn” cha. ¹¹Pøs tru treeg chibeløbe, trube, iigwan isua gømig køn: nam yabsrøm bønrrøwa, kilga pørigu mandø chib pørøbeløbe, ñimui utu amrrua, marøbgucha treetøwei martrab gúi.

‘Nuig misrøb mөг inchibig køn’ daigwan lötäb

¹²Pøs nambe tru nòmasiitø ‘truba tabelø guer’ chib pønrrabelø truilø mailø gøben, namgucha nomba latailø guer chib pønrrømøwei, kabe nøm maig tabelø gøben namgucha treeløtøwein dabelø gøbraitashchab inchib pønrrømøwei inder. Trune truiløbe nòmasiitø kangurri gangurri mayangatig køtashib, katøganelø lataitøwein gøbraitashchab inchib pønrrappe, chugúinguen mørmeelø gøn. ¹³Inchen nambe mөг inchib ke purabgucha waminchib pønrrønrrab gømøtø, Tius namun mayangatig martrai pønsraigwan nambe treegwandø marøb pønrrer, katø ñimuisrøngatikken pumig kørnrai tranigwan marøb. ¹⁴Kaguende nambe namuinukkurri webunagucha bønrrømer, pøs nam ñimuisrø pumuig kuig lata. Pøs nambe ñimuisrøngatig

Cristoi tabig srø wamwan nammerrigwei srua amrruig købig køn. ¹⁵Kabe gatøganelø nørreelø marigu kebamba, purab møg inchib waminchibgucha bønrrømer, namuinukkurri webambub. Masken treeg kømøtø, ñimui isubigwan Jesucristoinug pasra tøgagúigu katøguchi nørørab amrraimab isua muniirab meler, namui maramig ñimui utube nørø larrøbichib inrrai, ¹⁶Tiuswei tru tabig srø wamwan ñim corintoelainukkurri mas yabsrønguen eshka kusrenanig kønrrai; peenug katøganelø kebamba marinug trusrø nam kebuna møg inchib waminchib pønrrømønrrab.

¹⁷Inchen mõikkøben nui misrøb møg inchib waminchib pasrag købene, nøasiitø gømø, Señorweiwane tab gúi mørøb tabig waminchib pasrøbash. ¹⁸Kaguende nøasiitø ‘truba tabig kur’ chib, nuimburaaptø waminchibigwan tabig kui asha kørømarig kønrrab gømøtø, tabig køn cha, Tius nø wamindig, trube tabig køn.

**Pabloba, ‘Cristo nøashib karua øriilø
guer’ chib ka isatø inchibeløba**

11 ¹Ke na chugúi mõrmíig lataig na mayandø wamincha mõrtrab ñim trunun ka awentaimbe gøtan. Pøs na treeg indingucha ñimun ka awentarray chinrrab inchar. ²Kaguende ñim mõigweyasig pønrrappe, ke truigweindø gønrrai, na treeg inchib truba isub pasrappe, Tiusweinukkurri arrubiitøga treeg inchib pasrar. Muba kasharanrrab misrabe, truibatø kasharanrrai nabe ñimun treeg mara tøga basrar, trube tru Cristoba, tru nø perainrrab arrub gwaløm nui merrab kan mu mõøbagucha kimø srusrø newan chishig lataitøwei na ñimun nun treeg kenamartrab. ³Inchendø nane kørig isutan, tru ul purø may kebenøsrkamig tøgagúitøga tru Evan kebenøsrkøb lataitøwei ñimungucha mumay gøben ñimui isubigu peløsrkøngarunrraitamab tru ñim isa gømø pønrraigwanba, tabig chishchig Cristoinug pønrraigwanba. ⁴Kaguende mõikkøben ñimun tru nam eshka kusrenani lataig kømøtø, Jesúsweiwane peemay eshka kusrenanøb arrin gúi, kabe tru ñim Espíritu Santo uta tøgagúigwan gømøtø, katøgan peg espíritun waminchib arrin gúi, kabe Tiuswei wamwan ñim uta tøgagúigwan gømøtø, pegwan waminchib arrin gúi inchibigwane, trube, ñimbe chi chimø melabelø gøn. ⁵Cristo nøashib karua øriilø misrøb, tru purab nørreelø chib pønrrabelai merrab chiyugucha lamíig kømur nagucha. ⁶Pøs nabe nai wamindigube kan mõrøptø burramdiig, may waminchimíig kuinaindøgucha, nebua kusreb asigube nabe maig

kuigwan nebua ashibig kur. Iigwane chiyutøgucha ñim törgandø ashchai kenamarig køn.

⁷Ñim nørreelø misrtrai, nabe naasiitø chigucha gømíig misrøb, Tiuswei tabig srø wamwan truburø chi utømø eshkaab kusrenanøb pasrappe, ¿kabe nabe kaig marøb pasrabraig kø chindah? ⁸Na ñimun purugub pasrønrrab, nabe gatøgan iglesiameranguen kerrab lataig utamig nebubig køn, nai chi palab arrubigwan tøgagønrrab. ⁹Pøs na ñimui utu Corintosrø uñib urasma nan chi palab arringucha, munguen tranrra cha, miamuig køn. Kaguende nan chi palab arrubigwane namui nunelø Macedoniasrøngurri amrrua, tranig køn. Chiyutøgucha nabe ñim ke nan tranrraindø, rranrraindø inchimønrrab, nabe purø ashiptø megaig køn. Pøs katøgucha mun miamø, nabe treetø ka megabig megamønrrun. ¹⁰Cristoi newan ciertonig nainug pasrai mōra lataitøwei, na chi an purugúig utømø, tru mōg inchib tab gúi mōrøb waminchib pasraigwane Acaya birausrøngucha nane muguen waminchimønrrai katønrraamøn. ¹¹¿Chindimbagurri? ¿Pøs kabe na ñimun undaguig kōmubra chindah? ¡Pøs Tiusbe asha basran, nabe ñimun undaguig kui!

¹²Nabe tru purugurray chib miamø maig marøb arrigwane marøbig maramønrrun, an utab pønrrøbendø, tru nam lataitøwei marøbelø guer chi køptø tru guemesratøguen mōg inchib waminchib pønrramigwan labelan marbashmø kanmaytø kata basrtrab. ¹³Kaguende tru treeg inchibeløbe, Cristo cierton nōashib karua øriilø gømøn. Tru marøbeløbe ka may wamincha isatø marøbelø, Cristo nōashib karua øri latailø misrøb treeg inchibelø gøn. ¹⁴Inchen øyeegwane ke kwaara asamikkucha gømøn. Kaguende Satanástøweinguen kan ángel tabig torigwan tōgaig lataitøwei misrøbig køn. ¹⁵Inchawei øyeebe kwaaramdiikkucha gømøn, pøs tru Satanás karuigwan marøb pønrrabeløgucha tru sōlgandø tabigwan marøbelø misrøb pønrrøben. Pøs nōmui kaig marimburø maig utamig køben, treegutøweim batsønrrun.

Pablo chine chine kaig nebuinab megaig

¹⁶Pøs nabe gatøle trenchinrrab inchar: mugucha nane ke chugúi mōrmíig kui lataikkucha mara srua gømørrunrigay cha. Inchendø ñim nan treeg isua tøgaguabe, trube, na chugúi mōrmíig kuingucha, nan treeg ka utørray chinrrab, na maitøguen mōg inchib pasramig kønrrai. ¹⁷Tru na naasiitø truba tab gúi mōrøb mōg inchib waminchib pasraibe, nan Señor wamindingaruben

wamindig kòmõtø, chugúinguen mORMubendø wamindi lataig, treeg køn. ¹⁸Pøs truba yamelø møiløgøbenma pirauig maig køben treegu nòmasiitø purø nørreelø mØrørai inchib pØnrrøbene, nagucha treetøwei purø nuig kui mØrørai inchib pasrønrrab. ¹⁹Ñimbe ya kusrebelø gøbendø, chugúinguen mØrmeelane, trube, ñimbe ke mØrøguen isrømøzhig melabelø gøn. ²⁰MØikkøben ñimun maig martrain chippe, ke treeg marøb melønrrai inchibigwanba, ñimun sØtø bØnsra nØ tØga gØrrømisrtrab marøbigwanba, ñimun chi isa gøben kerrawa, nui marøbigwanba, ñimune chigucha gØmeelø marøb nuig misrøb pasrabigwanba, ñimun maløbØtø pashaguchib, treeg inchibigwanbabe, trube, truigwane ñimbe ke chi chimøzhiitø melabelø gøn. ²¹Pøs nambe øyeeg kenamarøb pØnrramibe yangucha kullaguelø gØbrain gøn damig, nane kØrikken gØtan.

Kaneløma ke nòmasiitø chinetø mØg inchib wamincha mØrene, treetøwei nagucha martrab, treeg wamindamibe na chugúi mØrmøgølig lataig wamindig kuindøgucha. ²²¿Nømbe hebreosmera gØ chindah? Nagucha hebreotøwein gur. ¿Nømbe Israelwei misaamera gØ chindah? Nagucha Israelwei misaatøwein gur. ¿Nømbe Abrahamwei misaamera gØ chindah? Nagucha Abrahamwei misaatøwein gur. ²³¿Nømbe Cristoiwan marøb melabelø gØ chindah? (Pøs chugúi mØrmíig lataitøwei waminchar) Nabe nØm lataitøguen gØmØ, masken marøb, marmeløyugucha mas mur marøb, kailan keeri yau nØmun lataitø gØmØ, katø gatø merrarrawa keeriinab, ichaguchibgucha, mam ichagutsamigwan nØmun lataitø gØmØ, ichagutsamburab ichagutsinab, katø gatø ke yandø øsig kØmurmab isui megamig pub, ²⁴katø trattø bijibe judíosmera maig ichaguchibelø gúigwan treinta y nuevebatø ichagutsinab megabig kur. ²⁵Katø pØnmay tsiitøga ichib srúa gúinab, katø kan bijibe kwetchab sruutøga petinab, katø pØnmay barco pitis misrøb chab mincha, piu asentaben, kan bijibe kwalma y mawa nane mar tØbØtaasrø pi srúa yaig megamig nebubig køn. ²⁶Chu urastøgucha naimbe webya yamitø, yamitø nebuben, kanmaywane nØrrø pimerayu chine purayaig megamig nebuben, kanmaybe nileelai utuwan chi kuinanrraptiig purayamig nebuben, kanmaybe naim birau misaameratøwei chigøben marinanrraptiig pureb yamig nebuben, kanmaywane judíos kØmØ misaamera chigøben marinanrraptiig



2 Corintios 11.23

purayamig nebubig kòn. Inchen kanmaywane ciudayu korig kòmdiig inchibeløyu purayamig nebuben, katø kanmaywane mu misag warab waraimørø korig kòmdiigu purayamig nebuben, kanmaywane maryu chigøben kuinanrraptiig treegu pureb megamig nebuben, katø kanmaymerawane ka isatø ‘Cristogurri nunelø guer’ chibelø chigøben marinanrraptiig, treeg unamig nebubig kòn. ²⁷Marameløgucha purø murig, trurrigu ni mandøguen gømui megamig, treeg nebubig kòn. Katø gatø kibguen kimøwei, katø parøgwai mørøb, pi mulgwai mørøb, katø gatø chigucha mamíig megamig nebub, kørrag

kui megamig nebul, asru kemig chigagúinab megamig nebul inchibig køn.

²⁸Inchen tru gømnetø kwalømmørig na isuim basramibe iglesiamerabe mayamba chinchib guermab isub pasramig, truig købig køn. ²⁹Møikkøben kullaarain basrøbene, nan gullaaraig kui lataig købig køn. Inchen møikkøben kaigu srurengwanguinab megabene, nan pusrkwabig køn. ³⁰Na møg inchib waminchib pasramig neubene, na truburab gømfig kullaguig kuigu, truyube møg inchib waminchib pasramønrrun. ³¹Namui Señor Jesucristoi Møskai, Tius tru managurri managatig mayanguen tabig wamindinabiibe nabe ka isatø inchib pasrømui asha basran. ³²Rey Aretas karuigwan marøb wabig, tru Damasco ciudayu kubenadurbe tru damacenosmerai ciuda bötøgatan laringaruin gøbig køn, nan kemørtrab. ³³Inchen nane tru ciudayu pötøgatan srug birøbanrrig marigugurri kan pendanayu kørørøbelø gøn, kan tasinyu waya. Øyamay nabe truigwei taskugurri welula, ibig kur.

Pablon Tius nuimburabig mu asiimíig pønrrabelan kenamarøb

12 ¹Nabe gatøgucha naasiitø møg inchib waminchib pasramig køtan, treeg mariibe chi purugumíig kuindøgucha. Nabe piab lataigu na chigøben asiilanba, Señor nuimburabelan nan kenamariilanba, trunun waminchab. ²Nabe kan møg ashibig kur, Criston kørewa pasrabigwan, mõi ya catorce añosken gøn. Truigwane tru pøn srømbalsrøngatig srua yaig købig køn. Nune asrbañau srua yaig køh, kabe asrbañaun gømø, srua yaig køh, chindindø, truigwane maig kui mørmur. Trunune Tiustøwei asan. ³⁻⁴Tru møwane tru srømbala Tiuswei purø tabzhiisrømay srua yaigwan nabe asha gur. (Nune asrbañau srua yaig køh, kabe asrbañaun gømø, srua yaig køh, chindindø, truigwane maig kui mørmur. Trunune Tiustøwei asan.) Inchen trusrømbe ni kan mandø chaguen trendamgailø nøbe wamindi mørig køn, treegwane kan møwane waminchimønrrai meriilan. ⁵Pøs nabe tru møweimburappe si møg inchib waminchib pasrabwei indamønrrun, pøs truike nawein gúinaben. Inchendø nabe naasiitø møg inchib waminchib pasrømøtø, na trengatig kømfig kullaguig kuinaigube møg inchib pasramønrrun. ⁶Pøs nan møg inchib waminchib pasrag køben, na treeg inchib pasrainguen, nabe ke chugúi

mørmfiig lataig indig kòmubsruinrrun. Kaguende nabe cierton waminchibsrubrainrrun. Inchendø nabe treebe marmumønrrun, na maig kuigwan asig tre lataitø gømøwei, na waminchen ñim mōri lataitø gømøwei, mas nuikken gúin gúi mugøben nan treeg isumønrrai.

7 Øyeeg chigøben purø nørreelø nan kenamarig, truilø nan purab nuig kurmab isub pasramig marmønrrai, nane nai asru chu uragucha kan kal lataig kebuchib pasrønrrai pasrig køn, Satanás ørig, ni mandøguen gømui pasramig kønrrai martrabig, na purab nuig misrøb pasramig kømønrrai. 8 Inchen nabe iigwan Señorwan pønmay ‘tiusmanda kerrarra’ cha miaben, 9 Señorbe nane trenchibig køn: “Tru nai ka yandø tab indig truitø ñune tsabø gøn cha. Kaguende tru nai maramburab marøb pasrabiibe ñi truburab gømfiig kullaguig kuigu masken tab kenamisran” cha. Inchawei treeg købene, na truburab gømfiig kullaguig kuigu mayanguen tab gúi mørøb møg inchib waminchib pasramønrrun, Cristoi maramburab marøbig nainug pasrønrrai. 10 Inchawei nabe na truburab gømfiig kullaguig kuigu lata, nan tsalø waminab pasraigu lata, nan chi palabigu lata, Cristogurri nan kaig martrabgøba indinab megaigu lata, nabe truba tab gúi mørøb kasraarar.

Pablo corintosreelan isub

11 Pøs nabe kan chugúi mørmfiig lataig indig køn. Inchen na treeg inchaimbe nane ñimweinrre indig køn. Naimburab tabig waminchippe, ñimguen tabig wamindig kønrraptiig kur. Kaguende tru Cristo nøashib karua øriilø misrøb purab nørreelø chib pønrrabelaimbe nabe chiyugucha lamfiig kømur, nabe maya chigucha gømfiig kuinaindøgucha. 12 Cristo nan nøashib karua ørig kuin gúi asamig, maig kuindøgucha tammay nabe ñimui utu kenamarig køn: Tius naba pasrain gúi ashchai mariilø marøb, kwaara asamdeelø marøb, maramburab mariilø marøb, treeg. 13 Tru gatøgan iglesiameran lataguen gømø, ¿nabe ñimun chiyurren lameelø marøb kørørøra bønserøbrah? Na ñimun tranrrai miamuig, trutøwein gøn. Pøs na miamub kalø marigwan ulø baymø pesannarra chinrrab inchar. 14 ¡Au! Nabe katøguen chab tamaraguen megar ñimun ashchab attrab, mømimbabe chabguen pønmayguen gønrrab gøben. Treetøwei katø na ñimun mianrrab gømø arrumønrrun. Kaguende nabe ñim chi tøgagúigwan isua

lamøtø, ñimun isur. Pøs kaguende ureemera mōskalayasig esegab tulisamig kōmøtø, uregweyasig esegab tulishib melamibe mōskalainguen gøn. ¹⁵Inchawei nabe tab gúi kasraatø naiwan kerrigu kastamønrrun, naasiitøweinguen ñimuyasig patsønrrai marøb. Na ñimun mas undaarabene, ññimgurrimbe nane tre undaaramønrrapteh?

¹⁶Pøs trube, naimburappe ñimbe ashibeløguen na ñimun tranrrai miamuigwan. Inchendø nabe ke chi maramdiig kōtashib ashib megabig kōndainabig kuig kōppe, trube, ñke chi isa gøben kabe ñimun chi wesrabraig kōppeendi? ¹⁷ÑKabe na tru mōilan gōsrøn na ñimuisrømay karua øriiløtøga chi isa gøben, kabe ñimun chi wesrabraig kō chindah? ¹⁸Nabe Titone: “Tiusmanda ashchab irrunrrig” cha, Cristogurri namui gatøgan nunewanba nun lincha inrrai ørig kuig køn. ñKabe Titobe ñimune chi isa gøben chi wesraig kōppeendi? ñNambe yamba pailøba treetøwei kandø isua marøb, katø pailøba yamba tru maywandøwei pønrrammørgøppeh?

¹⁹Nambe ñimui merrab ka tab wegørrag kōptørre inchib pønrrabelø gúi, ññimbe katøgucha mõi øyangatig kabe treeg asønain bønrrøgueh? Treeg kōmøtø, nambe waminchippe, Cristoinug pønrrabelø gúi asamdiig Tiuswei merrab waminchib pønrrer. Inchen nam kerrigu mariiløbe, ñim, nai undaarailø, Tiusweimburab ñim nørørab amrrain gøn. ²⁰Pøs nane kōristø gøtan na ñimuisrø puben, na ñimun mailø gønrrai isua pasraig ñim treelø gømøwei, katø ñimgurri nan maig kønrrai isua pønrraig treeg kømøwein gøptinchen tsaatø indinab pønrrainabgunmab. Nane kōristø gøtan ñimui utu aleguam lailø, mōikkøben chi tøgagøben pusrkwai asiilø, purø rrømbøig namig kui indiilø, nørøø katøgan sötømisrøb tarømisrøb ambiilø, katøganuimburab wam gusrub wamindiilø, isa wamincha mōriilø, purø nørreelø misrøb pønrrailø, mumaygucha gømīg mara pōnsrailø, treeg kōnrraitamab. ²¹Incha nane kōrig isutan na ñimun gatø ashchab puben, Tiusbe ñimui merrab nan kōrig burøøren, truba yamelaimburø nan kisamig nebunrraitamab isua, tru merrabwan nømui kōsøngønrraptiig mariilanba, møgueløba, ishumburmeraba trømbøig mariilanba, mu mandiimīg chi marøg køben trømbøig maramitø srua ambiilanba isua mørmuin gøben.

‘Isua ashiptø melønrrigay’ chib wamindiilø srabeig

13 ¹Na ñimun ashchab arrumig mõiimbabe pønmayguen gønrrab gøn. Chigøben kalø buigwan asha marøppe, kan pailø gúi, pønelø gúi ‘maig purayaigwan treeg køn’ cha nømashib eshkabendøwei, maig kønrrabigwan asha maramig køn. ²Nabe tru pamay gønrrabyu marig merrabwan arrua, ñimba pasrøwa, kanmaytø isua gønrrai eshkaig købig kuig køn. Na mõi katø ñimba pasrømøwagucha gatøle katø eshkanrrab inchar, tru merrabwan kaig marøbelanba, mayeelø katøganelanba na katøle arruppe, kan waachaalleelø chib mun lastima ashchab attrab gømur cha, ³kaguen ñimbe Cristo nagurri waminchib pasrabig kuitashchab ashig køb ñimbe trurre lab gúig køben. Cristobe ñimba mumay gømigwane chi martrabga gaizhikkucha gømøtø, nøbe ñimui utu maramburab marøbig køn. ⁴Pøs isa gømø, Cristobe misagwei asr lataitøwei kullag kua, kurusu mesrøben, kwaig køn. Inchendø Tiuswei maramburab marøbiitøga øsig wan. Pøs katø treetøwei nambe Cristoinuube kullaguelø gúinabendø, Tiuswei maramburab marøbiitøga Cristoba øsig pønrramønrrun ñimuyasig marøb pønrrønrrab.

⁵Ñimui isubigwan Jesucristoinug pasra bønrraigu pønrrabraitashchab tab isua ashib, maig købraitashchab ñimasiitøwei paya mørøb inday. ¿Jesucristo ñimuinug pasrabig kuin gúi ñimbe ashmeelø gø chindah? tru ñim maig bønrraitashchab isub pønrraigu chi kalø webammuikkurrimbe. ⁶Pøs namui isubigwan Cristoinug pasra tøgær gua nam tabig webamba pønrraigwan ñim nebua ashchun. ⁷Incha nambe Tiuswan purugurra cha mier, ñim chigucha chi kalø marøb gømønrrai. Kabe tru namun mailø gúitashchab ashen, tab webambigwan ashchai isua gømøtø, ñim tabigwan marøbelø gønrrai isua inder, ñimuin gabyube nambe kegørra bønrrai lataig asønaindøgucha. ⁸Kaguende nambe tru newan ciertonigwane chi treeg kømønrrai martrab indamgaig køn. Treeg kømøtø, tru ciertonigweimburab nam marøb pønrramibe gøn. ⁹Inchawei namun kullaatø mørøraingucha, ñim tabig mur bønrrøbene, kasraarabelø guer. Incha nambe Tiuswan iigwan miabelø guer: ñim newan tabelø gønrraimab isua. ¹⁰Inchawei øyeekkurri nabe yabsrø pasrappatøwei iigwan pørar, tru na ñimuisrø pua, nai

maramigwan na tsakkandø marøb pasrønrrab arrumig kòmønrrai. Señor nan ashíb karub pasrønrrai tranøppe, pinishíb inrrain gømøtø, kusrua pønsrøbguen inrrai tranig køn.

‘Ka amøñiguh’ chib wamindiilø srabeig

¹¹Trube, mømbe yandø, nai nunelø, maya nuguen kasraaray. Ñimbe newan tabelø gønrrab inchib, na ‘øyeeg, øyeeg melønrrigay’ chib wamindigwan møra marøb, katø pønrrabgucha kandø isua bønrrønrrigay. Katø kangurrin gangurri tab warønrrigay. Tius tru undag købig tru chi isumgaig tab gøbiibe ñimba pasrønrrun. ¹²Kangurrin gangurri ‘ka amøñiguh’ chib tabig wamab, Tiuswei undag købiitøga tasig rranay. ¹³Tiuswei misaamera mayeeløba yuelø ñimun ‘ka amøñiguh’ chib wam øran.

¹⁴Señor Jesucristoi ka yandø tab indiiba, Tiuswei undag købiiba, Espíritu Santoi tru trakkandø lincha pasraibabe ñim mayeeløba pasrønrraimab isur.

Gálatas

‘Ka amõñiguh’ chib pørig

1 ¹Na Pablo Jesucristo nõashib karua ørig, mu møguelø nõmuimbura karua ørig kømøwei, mu katøgan inrraincha karua basrig kømøwein gur. Treeg kømøtø, Jesucristoba, katø Tius Møskai Jesucriston kwaitai utugurri øsiirangarubiiba karua ørig kur. ²Namui nunelø mayeelø naba warabeløba Galacia birausrø iglesiameran i kilgawan na pørar. ³Namui Tius Møskaimba, Señor Jesucristoba nui ka yandø tab indigwan gøben, chi isumgaig tab gøbigwan gøben ñimun tranrrun. ⁴Truibe nam kaig mariilaimburab nõashib kwanrrab pasramisrig køn, nam warain gwaløm larrø gaig pasrabigugurri namun wesraig kønrrai, tru namui Tius Møskai maig kønrrain gøben, trumay. ⁵Truigwan torguegwalmabig kønrrun managatig. Treeg kønrrun.

Kaigyugurri wesrab wam katøgan peebe chi gaagøn

⁶iPaare! Kan øyeeg misaamerabe mailø guermab ashar, Tiuswei tabig srø wamwan peemay yunømara srúa bønrrønrrab, tru Cristoi ka yandø tab indiitøga ñimun wamabig Tiuswan chabguen yandø yanayutø tarømisrøbguen ambin gøben. ⁷Tabig srø wam katøgan peg kuimba gømøtø, møiløgøben ñimune ke ka ilørkøb, Jesucristoi tabig srø wamwane ke kan mumaygucha gømíig kønrrai mindisha bønrrøg køb indan. ⁸Namdøwein gúi lata, kabe kan ángel srømbalasriig kui lata, tru tabig srø wamwan nam ñimun eshkaib kusrenani lataig kømøtø, katøgan peemaytø yunømara waminchibiibe, managatig trømbøig nebuig pasrønrrai pasrig købash. ⁹Nam ñimun eshkaigwan, mõi katøle katø nabe

eshkanrrab inchar: tru ñim uti lataig kòmõtø, møikkøben tru tabig srø wamwan yunømara peemaytø eshka kusrenanøbiibe, managatig trømbøig nebuig pasrønrrai pasrig købash cha.

¹⁰ ¿Nabe misaamera nan tab inchamab lab pasrabrah, kabe Tius tab inchai lab pasrabrah chindah? ¿Kabe misaamera tabzhig inchai lab pasrabra chindah? Pøs na gatøgucha misaamera tab gúi mørtrai na nømun tabzhig inchib pasrabig kuimbe, trube, nabe Cristoi marøb megabig kòmubsrubrainrrun.

Pablon Tius martrai karua basrig

¹¹ Iigwan ñim, nai nunelan, wammørørskønrrab inchar, tru tabig srø wamwan na eshka kusrenaniibe møguelø nømdø isua wesruigwan wamindikkucha gømøn. ¹² Pøs nabe, kan mowan utig kømøwei, katø kan møg kusrenanig kømøwein gur. Treeg kømõtø, nan Jesucristo ashchai kenamaren, treeg utig købig køn.

¹³ Kaguende ñimbe manawei nane wammørøbelø gúinrrun, judíosmera Tiusweyasig maig marameløyu, na trunun marøb uñib uras na merrabsrø maig inchib uñibig kuigwan: kan namig købiitø igatø! chindinrrabna gúi inchib, Tiuswei iglesian kaig martrab wendautø llirab, nøm tru treeg marøb tøgagúigwan kerriguwan pinishinrrab truba rrua inchib unig købigwan. ¹⁴ Namui misag utu, naba guetøtø nørrørawarwei utu møilan gøben nabe kanab gusrebig købig kur, judíosmera Tiusweyasig maig marameløyube, kaguende nabe merrabsrø namui kølli misaamera maig marøb amrruigwane maikken purøbuniimíg kønrrai inchibig købig kua. ¹⁵ Inchendø Tiusbe nane nai usrai patsø umbu wabenbatøsrøwei nane tarømara, nui ka yandø tab indiitøgatø nane wamig køn. Incha nun tabig asønaben, ¹⁶ nui Nusrkawan na nebua ashchai kenamarig køn, judíos kømø misaamerai utu nuimburabigwan na eshka kusrenanamig kønrrai. Inchen nabe tru urastø mu mowan paya mørmøwei, ¹⁷ katø nagen treeg kømøwatø Cristo nøashib karua øriilan payrrab Jerusalénsrømay nebimøwei indig køn. Treeg inchimøtø, Arabia birausrømay ya, trugurrimbe katøle Damascosrømay arrig købig køn.

Jesucristo nøashib karua øriilø katøganeløba

Pablo lincha waminchib

¹⁸ Indiibe yandø pøn bila puraiben, Jerusalénsrø nabe Pedroba waminchab ya, trusrø nøba parru kørrømisrøbig kur. ¹⁹ Cristo

nøashib karua øriilan nabe trusrømbe møigwangucha ashmur. Ashippe, Señorwei nuneg Jacobondøh ashar. ²⁰Na ñimun pøriibe, Tiuswei merrab isa gømtø, treeg køn cha, treeg bōrar.

²¹Incha trugurrimbe Siria birausrømayba, Cilicia birausrømayba ibig kur. ²²Nane Judea birausrø Cristoi iglesiamerabe malauguebe ashmeelø srø gøbig køn. ²³Truiløbe øyeegwandøwei wammørøbelø gøn: “Tru merrabsrø namun kaig marøb lllirab uñibig købiibe, mōimbe tru Jesucristoi tabig srø wamwan eshkab kusrenanøb unan daig, tru merrabsrømbe nø pinishinrrab inchib unig købigwan.” ²⁴Incha nagurri Tiuswan truba tabig waminchibelø gøn.

Cristo nøashib karua øriilø Pablon chi chimø ka utab

2 ¹Indiibe yandø catorce años misren, katø Jerusalénmay Bernabéba ibig kur, katø Titongucha tøgatø pera. ²Inchendø nabe trusrømay ippe, Tius nan trusrømay inrrai nan kenamaren, nabe treekkurri yaig køn. Incha tru Tiuswei tabig srø wamwan judíos kømø misaameran na mandø eshkab kusrenanøb unigwan nōmun eshkabig kur. Nabe truigwan marøppe, tru tabelø gúi asha tøgagúig nørreeløba, namdø nørø tulundzuna trunun wamindig køn, na tru mōi marøb pasraigwanba, na tru marøb unig købigwanba, ka treeg marøb uniitø buraimønrrai. ³Inchendø na pera yaig Titon gøbenguen griego gúingucha, nune circuncidaweig kønrrai inchimuig køn. ⁴Tru treegwan martrai inchibeløbe ka isatø Cristogurri namui nunelø chib isabelø sōlwan gømø, peemaytø gusrenanøbelø, ashmøwatø nilø kegørrin gøbig køn, nam Cristogurri chi ilørkaimeelø melaigwan maig inchibelø gøtashchab larønrrab, katøle truyutøwei kegørra melønrrai martrab. ⁵Inchen nambe nōm chi tailan ni kan petøzhiitøguen alrranmeelø guer, Tiuswei tabig srø wam newan ciertoniibe ñimui utu maig købiibe treetø pasrabig basrønrrai.

⁶Tru tabelø gúi asha tøgagúig, tru nørreeløbe, nane øyeeg martrig cha, srøibe chigucha eshkawa pasrmuig køn. Tru truilaiburappe, nōm nørreelø gúigwane naimburappe trunun isua ashib pasramibe chigaagøn. Pøs Tiusbe muingatøgucha basrømfig køn. ⁷Masken treeg inchibgunrriibe Tiuswei tru tabig srø wamwan judíos kømø misaamera, tru circuncidameelan na eshkab waminchib unamig kønrrai, nan trana basrig kuin

gúi ashibelø gøn, judíosmera circuncidawarwan kusrenanøb waminchib uñchai Pedron pasrig køb lataitøweingue. ⁸Pedron tru judíos misaamerayasig Jesucristo nøashib karua ørig kønrrai, tru nø marøb uniiløyu marøb pasrab Tiustøwei na marøb uniiløyugucha marøb pasraig køn, tru judíos kømø misaamerayasig Cristo nøashib karua ørig kønrrai. ⁹Nan øyeeg kønrrai tranig kuin gúi nebua ashabe, Jacoboba, Pedroba, Juanba tru tabelø gúi asiilø, kan pilarmera latailø gúi asha tøgagúiløbe, nanba, Bernabéwanba kusrmay tasigwan tranøbelø gøn, yandø møimbe lata lincha marøb amøñibelø gønrrab cha, treeg kenamarøb, nambe judíos kømø misaameraisromay amben, nømbe judíosmera circuncidailimay ambamig kønrrai. ¹⁰Namune eshkappe, waachameraimburab pesannamø isua gønrrai, trunundøh eshkabelø gøn. Pøs nabe trununwei truba rruba isua marøb megabig kur.

Pablo Antioquíasrø Pedron ‘kalø marin gøn’ cha namab

¹¹Inchendø wendø Antioquía ciudasrø Pedro puben, nabe nun malaugue ‘øyebe maig margu’ chib truba mur namabig kur, kaguende nø treeg mariibe, pella marøb pasraig køben. ¹²Kaguende Jacobo karua øriilø møiløgøsrøn amrrumøwatøbe, judíos kømø misaameraba ka lincha mab uñabe, truilø yandø pubene, trube, nørørtø inchib, yandø linchimub guebibig køn, tru judíos kømø misaamera kørebelane, trube, circuncidamig køn chib, treeg inchib sötømeran kørig køptø. ¹³Inchen Jesucriston kørewa pønrrabelø katøgan judíosmeragucha, Pedro tru kalø marøb pasraigutøwei marøb guebamben, tru nømguen treeg marmubendø, treeg marøbelø misrøb pønrraigu Bernabéguen tøga guebeña basrabig køn. ¹⁴Inchawei Tiuswei tru tabig srø wam newan ciertonig maig køben treegwan sølgandø amøñimuin gúi ashabe, nabe mayelai merrab Pedrone trenchibig kur: “Ñi ya judioguen yandø kan judío gømiig lataig marøb uña, ¿judíos kømø misaamerane, trube, ñigan judíosmera latailø gønrrai martrab inchib pasrøtirru?” cha.

Isubigwan Jesucristo pasra tøgagúikkurri kaigyugurri webambamigwan tøgagøb

¹⁵Nambe kal-lainukkurri trendø judíos misaamera guer, judíos kømø misaamera kaig marøbelø gømtø. ¹⁶Inchendø nambe

ashibelø guer, tru maig maramigwan martrai Moisés pørig truig maig karuilan treeg mara, ni kan muguen chi kaig kømíig lataig tabig kørømartrab gaimaigwan. Treeg kømøtø, isubigwan Jesucristoinuutø pasrikkurri, treeg køn. Namgucha Cristo Jesúswan køreig køn, isubigwan Cristoinug pasra tøgagúikkurri chigucha chi kaig kømeeelø lataig kørømarig kørørrab, tru maig maramigwan martrai Moisés pørig maig martrain chibig køben trunun mara gømøtø. Kaguende tru maig maramigwan pørig, truig maig chibig køben treelan mariitøgabe, muguen chi kaig kømíig kui lataig tabig kørømarig kørørraamøn.

¹⁷Pøs nambe Cristogurri chigucha chi kaig marmøwa lataig kørørrab inchib meløben, trube, mõi Cristoinuube gatø nambe kaig marøbelø gúin gúi treeg buptinchene, trube, ¿Cristobe kaig martrainguen inchib pasrabig køn da chindah? ¡Kah! mumaygucha chi treeg kørørraamøn. ¹⁸Tru maig maramigwan martrai Moisés pørig maig chibig køben trunun na mas treeg marøb pasrømønrrab pinishib patsøgaigwan, katøle trunundøwei kusrua basrøb kebyabe, tru na treeg marmønrrab cha wamindigwane natøwei itøbunab pasraig webinrrun. ¹⁹Tru maig maramigwan martrai Moisés pøriibe yandø nane chi martrabgaikkurri truigweimburappe yandø nabe kwaig lataig kur, na Tiusweyasig øsig basrønrrab. ²⁰Kaguende nabe Cristoba guegøtø kurusu mesraig lataig kuig køn. Incha mømibe nabe yube naimburab naasiitø øsig uñmøtø, Cristo nainug basran. Mõi ya na øsig uniibe, Tiuswei Nusrkaweinug isubigwan pasrikkurri øsig basrar, nøbe nan undaarawa, nøashib nayasig kwaig køn. ²¹Nabe Tiuswei ka yandø tab indigwane kashmur. Kaguende tru maig maramigwan martrai Moisés pørig maig taigwan treeg mariitøga, chi kaig kømíig lataig tabig basrønrrab indamig kuig kuimbe, trube, Cristo kwaibe ka kwag køptø gwaig lataig webibsrudinrrun.

**Isubigwan Jesucristoinuutø pasra bønrraiba, maig
maramigwan martrai Moisés pøriiba**

3 ¹¡Ñim Gálatasmera larrø chugúi mørmø misaamera!
¿Ñimune øyeetø mumaygucha wegønønrraingaig lataig melønrraimbe ñimune murre may sotiicha bønstrøta? Jesucristone tru kurusu mesraig køn cha, ñimun ke tab asha gønrrai kusrennøb wamindigwan øyeeg martraimbe. ²Nabe ñimuimbura

chi mas kômõtø, iigwandøh wammørinrrabna gøtan: ¿Tru maig maramigwan martrai Moisés pørig maig chibig køben treegwan mara, Espíritu Santon utig køh, kabe isubigwan Cristoinuutø pasra, tru tabig srø wamwan mørikkurrin gø chindah? cha. ³¿Kan ñim gúi, larrø chugúi mORMø misaamera! Espíritu Santotøga marøb pølbasa, ¿trube, mØimbe chu bunrrab indamigwane ka ñimuimburab ka ñim mariiløtøgatø punrrab inchib gøtirru? ⁴¿Ñim chinetø chinetø maig kuig mØrøb puraambiibe, trube, chiweingucha chi purugumuig kønrrab gø chindah? Pøs purugubwei indig kuinrrun. ⁵¿Kabe Tiusbe nui Espíritun ñimun tranøb, katø tru maramburab mariilan ñimui utu marøppe, tru maig maramigwan martrai pørig, truig maig chibig køben trunun ñim marikkurri treeg mara chindah? ¿Kabe tru tabig srø wamwan ñim mØra kØreikkurrin gø chindah?

**Abraham nui isubigwan Tiusweinug pasrikkurri
Tiusbe nune kaig kØmfíg lataig tabig kui asig**

⁶Abrahamma Tiuswan øyeetøwei kØreben, nune chi kaig kØmfíg lataig tabig kØrrømarig købig køn. ⁷Inchawei isua asamig køn, isubigwan Tiusweinug pØnsrøbeløbe si, Abrahamwei ureemera gúi gúi. ⁸Inchawei Tiuswei wamwan pørigube manasrøwei trendaig købig køn: Isubigwan Tiusweinuutø pasrikkurri judíos kØmø misaamerangucha chi kaig kØmeelø lataig tabig kØrrømariilø gØnrrain cha. Tiusbe kanmaytø nui tru tabig srø wamwane Abrahamwan eshkaig købig køn, øyah chib: “Judíos kØmø misaamera chu birausreelandøgucha ñigurri mayanguen tab indiilø gØnrrun” cha. ⁹Inchawei kØrebeløbe tru Abraham Tiuswan kØreb mØøba kanbalatø mayanguen tab indiilø gØn.

¹⁰Kaguende mayeeløba tru maig maramigwan martrai Moisés pørig, truig maig chibig køben treeg mariitøga trumay kaigyugurri webamrrab inchibeløbe, trømbøig nebuig pØnrrønrrai pØnsrailø gØn. Kaguende treeg pørig pasran: “Mundøgucha trømbøig nebuig pØnrrønrrai pØnsrailø gØnrrun cha, tru maig maramigwan martrai pØrin guilgayu maig taigwan marøbig marmeelane.”

¹¹Inchawei tru maig maramigwan martrai pørig maig chibig køben, treeg mara, Tiuswei merrappe, chi kaig kØmeelø lataig muguen tabig kØrrømisrmuig kuin gúi tØrgandø asamdiig køn. Kaguende: “Sølgandø tabig uñibiibe isubigwan Tiusweinuutø pasra

tøgagúikkurri øsig uñchun.” ¹²Inchen tru maig maramigwan martrai pøriibe, tru isubigwan Tiusweinuutø pasra pønrraigugurri arrumíig køn. Treeg kømøtø, tru maig maramigwan pøriibe trenchibig køn: “Truig maig karuilan marabe, treeg mariiløtøga øsig uñchun” cha.

¹³Cristobe nø namun pena, kaigyugurri wesruig køn, tru maig maramigwan martrai pørig namun trømbøig nebuig pønrrønrrai indigugurri, tru nø namuimburab nøashib larrø rrømbøig nebuig pasramisra. Kaguende Tiuswei wamwan pøriibe trenchibig køn: “Mutøgucha kan tusryu mesra kweetsinabiibe larrø gaig kui asig kønrrun” cha. ¹⁴Øyeeg marøppe, Abrahamwan tru mayanguen tabigwan tranig købiibe Cristo Jesúsukurri tru judíos kømø misaameran tøga nebunrrai indig kuig køn, isubigwan Jesucristoinuutø pasra, Espíritu Santon trannrrab kørørmisrig købigwan nam utamig kønrrai.

Maig maramigwan martrai pøriiba, Tius trannrrab misriiba

¹⁵Nai nunelø, møimbe misag maig waminchibelø gøben nabe trumay isua waminchab inchar: ‘Øyeeg marig kørørmisrtrai treeg martrab’ cha, kan møg wamindigwan gøbenguen yandø treeg marig kørørmisrtrai pøra kørørmarigwane, utsøgutsamig kømøwei, kabe srøitø nemaramig kømøwein gøn. ¹⁶Inchawei Tiusbe Abrahamwan ‘øyeeg marig kørørmisrtrai treeg martrab’ cha kørørmisriilane Abrahamweinukkurri arrub misagwein gønrrai tøga rrencha basrig køn. Nui wambe: “misaamera srøig srøig kurrab amrrubelø” chimíig køn, purø nørø gúi lataig. Treeg chimøtø: “ñuinukkurri kandøzhiitø arrub misagwein” daig køn, truiibe Criston. ¹⁷Inchawei nabe trenchinrrab inchar: Tius Abrahamwan manasrøwei tru nuinukkurri acuerdon treeg martrab cha kandø isua nø kørørmisrigwane, tru maig maramigwan martrai Moisés pørig 430 años puraiben wendau arrubiibe, treeg marig kørørmisrmønrrai martrab gaimanrrun cha, Tius tru øyeeg martrab cha kørørmisrigwan treeg marmuig kui lataig mara gørrømartrab. ¹⁸Inchawei tru namun keta tranamig tøgagúigwan tru maig maramigwan martrai pørig truikkurri utamig kønrrab gúi kuimbe, trube, tru ketig utamigwane tru ‘tranrrumøn’ cha kørørmisrikkurri utamig kømubsruinrrun. Inchendø Abrahamwane Tiusbe keta tranamig tøgagúigwan ka yandø keta tranig købig køn, tru ‘tranrrumøn’ cha kørørmisrig truikkurri.

¹⁹Trube, treeg købene ðtru maig maramigwan martrai Moisés pøriibe chindamigweyasig kerah? Pøs trunune tranøppe, tru kalø marigwan chigúi nebua ashchai treekkurri tranig købig køn, tru ‘tranrrumøn’ cha kørørmisrig, tru Abrahamweinukkurri arrubig arrumnegatig truigwan marøb gømig kønrrai. Inchen tru maig maramigwan martrai pørigwane Tiusbe ángelesmeragurri kan møg katøganelayasig purøwaminchabigwan tranrrai tranig køn. ²⁰Inchawei Tiusbe Abrahamwan tru ‘treeg martrab’ cha wamincha gørrømisrøppe mu gatøgan purøwaminchabig palain gømøtø marig køn, pøs Tiusbe nøtø kandø gua.

Tru maig maramigwan martrai pørigwan Cristobe patsøgøb

²¹Trube, treeg købene, ðtru maig maramigwan martrai pøriibe, Tius tru ‘treeg martrab’ cha kørørmisriilane treeg marmuig kuig lataig, kabe sötø basramisrøb nøørøtø gutchab inda chindah? iMumaygucha chi treeg kønrraamøn! Pøs maig maramigwan martrai tøgagúig, tru øsig kømigwan tranrraptiig kuig kuimbe, trube, tru sølgandø tabig mariibe tru maig maramigwan martrai pørikkurri gøbsruinrrun. ²²Inchen Tiuswei wamwan pøriibe trenchibig køn, maya misaamerabe kaig maramigutø melønrrai merrarrowa tøgagúilø gøn cha, tru isubigwan Jesucristoinuutø pasra bønrraikkurri Tius tru tranrrab misrigwan nun kørebelane tranamig kønrrai.

²³Inchen tru isubigwan Jesucristoinug pasra tøgagømig arrumøwatøbe, tru maig maramigwan martrai pøriibe namune nø merrarrowa tøga basrabig køn, isubigwan Jesucristoinuutø pasra bønrramigwan ashchai kenamariilø gømnegatig wegønømø bønrrønrrai. ²⁴Inchawei tru maig maramigwan martrai pøriibe namune Cristoinug pegutchab nø bereb pasrabig lataig kuig køn, isubigwan Jesucristoinuutø pasra tøgagúikkurri nam chi kaig marmeelø lataig tabig kørørmisra pønrramig kønrrai. ²⁵Trune mømibe yandø tru isubigwan Jesucristoinuutø pasra tøgagømig puikkurrimbe peguchib pera lliraindeelø melømer. ²⁶Inchawei isubigwan Cristo Jesúsweinug pasra tøgagúikkurrimbe ñimbe mayeeløba Tiuswei ureemera gøn. ²⁷Incha Cristoba kanbalatø misrtrab mayeeløba ñim piu umbu ulsrailøbe, yandø Cristotøga pinøbuliilø misrin gøn. ²⁸Mømibe yandø ‘judío gøn’ damig kawei, ‘griego gøn’ damig kawei, ‘karuindiig megabig køn’ damig

kawei, ‘mu karuimíig nuimburab uñibig kòn’ damig kawei, ‘møg kòn’ damig kawei, ‘ishug kòn’ damig kawein gòn. Kaguende Cristo Jesúsba kanbalatø pønrraikkurri ñimbe mayeeløba kandø gòn. ²⁹Incha ñimbe Cristoielø gúikkurrimbe, yandø ñimbe tru Abrahamweinukkurri amrrub misaamera gòn, Tius tru keta tranrrab misrig truig maig køben treeg ketig utønrrabelø.

**Møimbe karua srua gúindiig melabelø
gømøtø, yandø nusrkalo guer**

4 ¹Incha nabe trenchinrrab inchar: Kan yauma, tru chi købigwan ketig utønrrab unø lamíig srøbatøbe, kan karuindiig megabig maig køben, treetøwein gòn cha, tru chigurrimbunø købigwan puaibe nøwein gøbendø. ²Masken treeg kømøtø, tru unøbe nøm møilø ashib pera gønrrab kørørmisrøbeløba, katø tru unaimburab chi købigwan nøm ashib gønrrab pønrramisrøbeløba truilø ashib pera gúindiig kòn, møskai tru maya yanagatig treeg kønrrain cha pasrig truig nebumnegatikke. ³Inchawei namungucha treetøwei, nam ureemera latailø srø gøbenbatøbe, yu pirø muba kuimbura mandø isua marøb gømig tøgagúilø truig nø merrarrawa tøgagúig melabelø gøbig ker. ⁴Inchen ke yandø treeg maramig pubene, Tiusbe nui Nusrkawan ørig købig kòn, ishug misagweinug kallaweig, tru maig maramigwan martrai Moisés pørig maig chibig køben treegwan marøb megabig. ⁵Tru maig maramigwan martrai pørig maig martrain garuben, treegwan marøb melabelan, namun pena wesranrrai ørig kòn, nam nui trendø trag ureemera latailø gømigwan utamig kønrrai. ⁶Incha yandø møimbe Tiuswei ureemera gúig købene, Tiusbe nui Nusrkawei Espíritun namui manrrømerayu pasrønrrai ørig kòn. Inchen tru Espíritu Santobe truba rruba miabig kòn: “Abba, nai Møskain” chib. ⁷Inchawei treeg købene, møimbe yandø ñibe karuindiig megabig kømøtø, nusrkain gòn, trube, yandø nusrkai misra kørørmisrikkurrimbe, tru keta tranamigwangucha utønrrabig kønrrai marig kòn Tiusbe.

**Tru maig maramigwan pørig ke truig srua
ambiilø melømønrrai wamindiilø**

⁸Pøs ñimbe Tiuswan nebua ashmeelø gøb uras merrabsrømbe chi cierton tiusmera gømeelan karuindiig melabelø gøbig kòn.

⁹Trune m̃imbe yandø ñim Tiuswan nebua ashen, kabe Tius ñimun yandø mumera gúi asiilø gúig k̃oppe, trube ÷yu pirø muba kuimburab mandø isua marøb g̃omig t̃ogagúilø truig nø merrarrawa pasrabigwan katøle truigwan chinchab marøb guebamgue? Yeeg chiweingucha chi purugunrrabgaig, kaizheeløyu, ÷ñimungan gatøle truilandøwei marøb melag kuitarru? ¹⁰Ñimbe katøgucha m̃ø gwalømmerawane øyeeg marmumig k̃on chib, i bølmerawane iigwan maramig k̃on chib, øyeeg bølmera arrubene, øyeelan maramig k̃obig k̃on chib, i bilamera pubene, iilan maramig k̃on chib, ñimbe treeg inchibelø g̃on. ¹¹Nane ñimuimburab truba k̃orig isutan, na ñimuimburab tab g̃onrrai marøb megaibe, ke ka treeg marøb megaitø purainrrab g̃ø chindermab isua.

Nun chitø purayailø

¹²Nai nunelø, tiusmanda na lataitøwein g̃orrunrrigay chinrrab inchar, nama ñim lataitøwein g̃onrrab pasramisrig k̃obene. P̃os ñimbe nane chigucha chi kaibe marmuig k̃on. ¹³P̃os ñimbe ashibelø g̃on, na sr̃sr̃owan Tiuswei tabig sr̃ø wamwan ñimun eshka kusrenanøb uras nai asru kwanrrøbe Tiuswei wamwan wamindig k̃onrrai treeg puig k̃obigwan. ¹⁴Inchen nai asru tru treeg kwanrrøbe ñimune ke chindashig k̃øb lataig indingucha, ñimbe nane k̃os̃on gúi inchimøwei, kashmøwei indig k̃on, masken ñimbe treeg inchimøtø, nane kan Tiuswei ángel gúi lataig, kabe Cristo Jesús kui lataig utig k̃obig k̃on. ¹⁵÷Tru ñim treeg tabig kasrag k̃obig t̃ogagúig k̃obigwane, m̃imbe chu chinchab b̃onrrøgue? P̃os nabe ñimuimburab treeg tamig t̃ogagur: ke ñimbe ñimui kabmeranguen wesrua, nan tranamdiig kuimbe tranømmørø inchibelø g̃obig kuig k̃on cha. ¹⁶Maig k̃obig kuigwan na waminchib pasrappe, ÷kabe na ñimun tsalø g̃øb ashig k̃omui inchibig misrarre inchib pasrabra chindah?

¹⁷Tru kusrenanøbelø katøganeløbe ñimune ñomui marøg k̃øb ke chinsraatø inchibelø g̃on, chi tabig isua g̃omøtø. Masken ñimune namuinukkurri ñørø misrtrai inchib g̃on, ñim ñomuingatø misra ñomun ke chinsraatø inchib p̃onrr̃onrai isua. ¹⁸P̃os tab g̃onrraimab isua, chu uraskucha ke chinsraatø inchib isub p̃onrramibe tabigwein g̃on, na ñimui utu uñendø g̃omøtø. ¹⁹Nai ureezheelø, kan ishuumisag unø tammisrtrab pusrkwai inchib lataitøwei, katøle pusrkwai isuim basrar, Cristo ñimuinug ke newan tab

pasramisramnegatig. ²⁰Kan mõiwei nane ñimui utu pasrammørø gøtan, øyeeg murtø waminchimøtø, peemay waminchab. Pøs nane ñimuimbura ni chi isumgúinguen møramgaig køtan.

Agarwanba, Saranba kemesra wamindig

²¹Tru maig maramigwan martrai pørig maig chibig køben ñim treegwan marøb melag kui inçibeløbe, trube, ¿tru martrai Moisés pøriibe maig chibig kui ashmeelø gø chindah? ²²Kaguende Abrahambe pagatø nusrkalø tøgagúig køn chibig pørig pasran Moisés pørigu: kan nusrkaimbe tru karuindiig megab ishuwein gøbene, kane mu karuimíig megab ishuwei nusrkai. ²³Inchen tru karuindiig megabigwei unøbe, mutøgucha maig tøgagøbelø gøben treeg kal-laig tøgagúig unø gøben, trune tru mu karuimíig megabig tru srawei unøbe, Tius ‘treeg tranrrumøn’ cha kørørmisrig købig kua treeg kal-laig købig køn. ²⁴Iig tru øyeelø purayaibe ‘øyeeg lataig køn’ cha eshkabig køn: Tru i pagatø ishumburmerabe Tiuskurri pabalø acuerdo marigwan trunun eshkabig køn: Agar tru ureemera karua srua gúindiig melabelø gønrrai tøgagøb ishuube Tius tru Sinaí Tunsrø nø øyeeg martrab cha kandø isua kørørmisrig, truig køn. ²⁵Kaguende Agarbe Arabia birausrø Sinaí Tunyu maig purayaigwan eshkabig kua, tru møin gwaløm Jerusalénwan eshkabig køn, trube truyu nui ureebañau karua srua gúindiig megabigwan. ²⁶Trune tru Jerusalén srømbalasriig tru namui usrimbe, mu karua srua gúig kømøtø gøn. ²⁷Kaguende øyeeg chibig pørig pasran:

“Ureg tøgagønrrab gaimab ishug,
managuen ureg tøgagømíibe,
truba tab gúi mørøb kasraarab trashi cha,
unø tammisrtrab pusrkwabigwan ñi mana maig kui
mørmíibe.

Kaguende kan ishug nundø elatsigwei ureebe mas nu gøn,
keg tøgä ishuwei lataguen gømø.”

²⁸Trube, mømibe nai nunelø, Isaac latawei ñimigucha Tius ‘treeg tranrrumøn’ cha kørørmisrig tru ureemera gøn. ²⁹Inchendø tru urassrøma mutøgucha maig tøgagøbelø gøben treeg kal-lab unøbe Espíritu Santo maig kønrrain gøben treeg kal-lab unane ashig kømui inçib kaig martrabgøba inçibig køn. Møingucha treetøwein gøn. ³⁰Inchendø ¿Tiuswei wamwan pøriibe mandø

chibig kòh? “Karuindiig megab ishuwane unanbañau weguchi chibig kòn. Kaguende tru karuindiig megab ishuwei nusrkaimbe, tru mu karuimíig megab ishuwei nusrkawan chi kòbigwan keta tranamigwan tøgatø utamibe managuen chi gaanrrun” cha.

³¹Inchawei, nai nunelø, nambe tru karuindiig megab ishuwei ureemera gømøtø, tru mu karuimíig megab ishuwei ureemera guer.

**Cristo chigucha iløsrkaimeelø gønrrai
marigu wemallmø bønrramig kòn**

5 ¹Cristo namun chigucha iløsrkaimeelø gønrrai mara, treegu pønrrønrrai pønstraigugurri mur bønrray. Katø tru maig maramigwan martrai pørig, truig maig karuben trunun martrab guebamba, truyutø srua gúindiig melønrrab gømøtø.

²iAu ñimguen mørtrai! Na Pablobe ñimun trenchar: Ñim asru circuncidarramaysruandøbe, trube, Cristobe ñimune chiweingucha chi purugumíig kui lataig webibsruiinrrun cha. ³Nabe gatøle maig tamigwan katø trendamønrrun: Møikkøben circuncidarramabiibe, trube, tru maig maramigwan martrai Moisés pørig maig karuigwan kanguen pinab marmø, kerriguwan martrai indig kønrrun cha.

⁴Tru maig maramigwan martrai Moisés pørig maig karuigwan ñim treeg mara, chi kaig kømeeelø lataig tabig kørørmistrab inchibeløbe, Cristoinukkurri tarømisrøb, katø Tius ka yandø tab indiitøga pønrramigugurrimbe tarømisramba indin gøn. ⁵Kaguende nambe isubigwan Cristoinuutø pasra truba muniirab meler, Espíritu Santogurri chi kaig kømeeelø lataig tabig kørørmariilø gømigwan muniirab. ⁶Kaguende nam Cristo Jesúsba pønraikkurrimbe circuncidaweig kui chi kønrrab gømøwei, circuncidamíig kui chi kønrrab gømøwein gøn. Treeg kømøtø, isubigwan Cristoinuutø pasra undag kòbiitøga marøb pønrraig treeg mariibe tabig kòn.

⁷Ñimbe yamba tsabøtø tab ambub melaigwan, ÷tru newan ciertonig maig taigwan ñim mørøb melømønrraimbe, ñimune murre iløsrkøb sòtø bønrramisrta? ⁸Øyeeg maramne inchib pasrabiibe, tru ñimun wamabigweinukkurri arrumíig kòn. ⁹Pøs: “Levaduran kan lamøzhig pusriitø harinawan maya sòmariimba kerrigu larrøbig kòn.” ¹⁰Nabe Señortøgabe ñimuimburab chi isumø basrar, na maig isubig køben ñimgucha treetøwei isunrrab gúi. Inchen ñimun øyeeg punrrai marøbigwane mu gúindøgucha møra meganrrai marig kønrrun.

¹¹Nai nunelø, naimburamma na katøgucha circuncidamig køn chib eshkab kusrennøb unimbe, ÷trube, nane kaig martrab llliramubsruinrrun? Pøs na treeg inchib uñibig kuimbe, trube, tru Cristo kurusyü kwaigwan wamindiibe nømune yandø chi iløsrkøb namishimubsruinrrun. ¹²Ñimun asrwan circuncidangarub, iløsrkøb sötø bønrramisrøb lllirabelane, nømundøweinguen kanmaytø kapainguen gøn.

Asr maig marøg kui mariiløba, Espíritu Santogurri mariiløba

¹³Nai nunelan, ñimun wamappe, ñimbe chiyugucha iløsrka melønrrain gømøtø wamig køn. Inchendø tru ñim chigucha chi iløsrkaimeelø gømig tøgagúigwane, treelø guer chiptø tru guemesra, ñimui asr maig marøg kui inchen trømbøig maramigweyasig tøgagømumig køn. Masken treeg inchimøtø, undag købiitøga kanikkurri kanikkurri mara tranay. ¹⁴Kaguende tru maig maramigwan martrai Moisés kerrigu pøriibe iigwan martrai karua pasrigu chishtø tøga basran: “Ñui mendaigwan ñiasi lataitøwei undaarau” cha, trendaigu. ¹⁵Inchen ñim namig købiitø kanikkurri kanikkurri lasrüyab ke chab mab lataig inchib amøñabe, ñimbe kangurrin gangurri yandø chab pinammay inchib amøñinrrun.

Tiuswei Espíritu maig kønrrain gøben amønaig

¹⁶Inchawei nabe ñimun trendamønrrun: Espíritu Santo maig martrain gøben trunun marøb amønay cha, trumaybe ñimui asr maig marøg kui inchen, treegwan marmeelø gønrrabguen. ¹⁷Kaguende asr maig marøg kui inchen kaig marøg købiibe Espírituimburabigwane chi marbashmø gatøben, katø Espíritube asr kaig marøg kui inchen marbashmø gatan. Inchawei møikkurrindøgucha sötø bønrramisrøb marbashmø katab pønrran, ñimun maig marøg køben treeg marmønrrai. ¹⁸Trune tru Espíritu Santo maig martrai isunanen treegwan marøb meløwabe, tru maig maramigwan martrai pørig truig karuig kømøtø marøb melønrrun. ¹⁹Inchawei asr maig marøg kui inchen treeg mariiløbe törgandø asamdiig øyeelø gøn: møgueløba, ishumburmeraba trømbøig mariilø, køsongønrraptiig mariilø, maramburab trømbøig mariilø, ²⁰chiwan gøben kan tius kui lataig mara tøgagúilø, misag burrønna kwaimandzigweimburabelan mariilø, ashig kømui inchib

tsalø asiiyailø, kwayam lailø, naiwan katøgan kerranrraitamab isub pusrkwai asiilø, namig købiitø ke kan chinchimmørø indiilø, chiyutøgucha ke na basrainrrabna gúi isub indiilø, nørø katøgan sötømisrøb tarømisrøb ambiilø, kanuingatøtø inchib trugatø misrøb ambiilø, ²¹møikkøben chigøben tøgagøben pusrkwai asiilø, mutsiirab indiilø, mabgucha maya mag køben mamburab maig øyeelø gøn. Katøgan øyeeg latailan nabe ñimun treeg marøb gømønrrai kanmaytø waminchar, marigwansrø waminchib lataitøwei. Inchen øyeelan marøbeløbe Tius nø ashib karub waigwan utamibe chi gaanrrun.

²²Trune tru Espíritu Santoinukkurri arrubiibe øyeeg køn: undag købig tøgagømig, kasraatø unamig, chi isumø tab unamig, chine arringucha tammay ka megamig, maig købash inchimø purø tammayig kømig, larrø tab inchibig kømig, maikkucha tarømisrmø megamig, ²³chish inchimíig, tammayig kømig, asr mumay srua itanmaptø gømø isua møra uñibig kømig. Øyeeg mariilan ‘kalø gøn’ chinrrabiibe wesrue pasrig chi gaagøn. ²⁴Kaguende Cristo Jesúsweyeløbe tru trendø kaigwan tōga gal-laig asrwane chine kaig marøg købig arrubigwanba, katø treetø rreetø kaig marøg købigwanbañau marmønrrab elachar gøn, tru kurussyu tōgatø mesrøb lataig. ²⁵Inchen mōimbe nam Espíritu Santogurri øsig amøñibeløbe, trube, Espíritu Santo namun maig amøñinrrain gøben treegwan amøñigun.

²⁶Purø nørreelø misrøb ka isaba inchibelø gømun, kangurriin gangurri namisiyab, kanikkurri kanikkurri chigurriin gøben ka pusrkwai asiyab.

Kangurriin gangurri puruguyamig

6 ¹Nai nunelø, inchipa møikkøben chiyugøben kaig mara kebeña megabene, Espíritu Santo maig maringaruben ñim treeg bønrrabeløbe, katøle treetøwei tab pasramisrrai maig købash inchimø, tammay puruguy. Inchendø ñiasitøwei ashiptø mar, ñigucha treegutøwei kebeñib megamønrrappe. ²Chinetø puig meløben kangurriin gangurri lata kuñam buruguyamig køn. Treeg marabe, Cristo maig martrai karua basrigwan ñimbe marøb gønrrabguen.

³Kaguende møikkøben truburab gømíig købendø, truba rruba nuig kurmab inchibiibe, chi treeg kømubendø incha, nøtøwei

ka kebeñib pasran. ⁴Inchawei ñim mōitōgucha chi marigwan ñuimburabigwan sōl gōtashchab tab isua asamig kōn, trumaybe ñibe ñiasitiō tab gúi mōrōb pasramig kōnrrun, na marigwanba, katōgan marigwanba, maig kōtashchab ashīb pasramig kōmōtō. ⁵Kaguende mōitōgucha nui chi maramigwane mu mendaig kōmōtō, nōashīb srua yamig kōn.

⁶Tiuswei wamwan kusrebig kōnrrai mōikkōben ñun kusrenanōbigwane chigurrimbunō ñi tabig tōgagúitōga nun purugub pirisamig kōn.

⁷Chigōben kōmōnrraitamab ñimguen ñimasiitō treeg isumōtay, Tiusbe nun maig kōbash inchib ka indzatō mōrtraingucha gōmōtō gōn, kan mōg nō maig ellmara kōrrōmariibe katōburō trunundōwei tulishinrrun. ⁸Kaguende ñim asrwan tab gōnrrai ellmarōb pōnrraibe, truikkugurrimbe trōmbōig marig utōnrrun. Inchen Espíritu Santon tab gōnrrai ellmarōb pōnrraibe, truikkurrimbe managatig ōsig kōmigwan uta tōgagōmig kōnrrun. ⁹Tabig maramigwane muraaramō marōbig marōb melōgun. Kaguende tru treeg marigwan utamig yandō pubene, treeg marigwan utamig kōnrrun, nam kullaaramō marōb melōwabe. ¹⁰Inchawei treeg kōbene, chigōben maramdiig kōbenbatō, mayeelanba tabig margun. Inchen mas Tiuswei misag, tru isubigwan Cristoinug pasra tōgarmerane gatōguchinguen tabig maramig kōn.

Mandō gōmigwan Pablo srabe wamindiilō

¹¹iAu, ñimguen asay! Nabe nai taska ñimuyasig ōyeeg nōrriig pōrar. ¹²Mōilōgōben truba tabig marōbelō gōnmab asiilō gōnrrab inchibelōbe, ñimune asru circuncidamne inchibelō gōn, Cristo kurusyu kwaigwan waminchen, kaig martrab wendautō llirailō gōmōnrrab. ¹³Pōs tru circuncidawar gōbenguen, tru maig maramigwan martrai pōrig maig karuben trunun marmeelō gōbendōrre inchibelō gōn. Inchendō nōmbe ñimune asrwan circuncidanrrai indan, nōmbe ñimui asru truba tab gúi mōrōb, ka mōg inchib pōnrramig kōnrraindō. ¹⁴Pōs naimburappe namui Señor Jesucristo kurusyu kwaigweimburab gōmubene, managuen gatōgan chi pegube, mōg inchib pasramig pumuimbe gōtan. Jesucristo kurusyu kwaikkurri naimburappe yu pirauibe yandō kwai lataig patsig kōben, katō nagurri pirauigweimburappe kwawa lataitōwei patsig kur. ¹⁵Asru circuncidaweig kui chi kōnrrab

gømøwei, circuncidamíig kui chi kørnrab gømøwein gøn, treeg kømøtø, kerrigu srøig peemay amønamig truibeguende tabig købwei indan. ¹⁶Tru iig maig karuigwan treeg amøñibelane tru chi isumgaig tab gøbiiba, lastima asiiba, nømuim bala gønrrai inchar; katø tru cierton mayeelø Tiuswei israelitasmeraim balagucha.

¹⁷Møingurrimbunøbe mugucha nan chinetø pui basramig kørnrrai marmørrunrrigay. Kaguende nabe nai asru Jesucristogurri kaig indinab kørriindiilan nai asru asamdiig tøgá basrar.

¹⁸Namui Señor Jesucristoi ka yandø tab indiibe, nai nunelø, ñimba pasrønrraimab isur. Treeg kørnrun.

Efesios

‘Ka amõñigueh’ chib pørig

1 ¹Na Pablo, Tius trendø øyeeg kønrrain gúikkurri Cristo Jesús nòashib karua ørig, Tiuswei misaamera, Cristo Jesúswan tarømisrmø pønrrabelø, Efesosrø warabelan, truילayasis i kilgawan pørar. ²Tius namui Møskaimba, namui Señor Jesucristoba tru ka yandø tab indigwan gøben katø chi isumgaig tab gøbigwan gøben, ñimun tranrrun.

Tiusbe Cristogurri chigøben tabigwan tranøb

³Namui Tius Señor Jesucristoi Møskaimbe mayanguen tab indig kønrrun, srømbalasrø tru chigurrimbunø nuimburabelø tabig pønrrabiitøga Cristogurri namune trutøga mayanguen tab gúilø gønrrai marøbigwan. ⁴Pøs Tiusbe tru chigurrimbunø pønrrabigwan nø mara pønsrømøwatø manasrøwei namune Cristogurri tarømara wesraig købig køn, tabigweindø tarømariilø, kaig mariitøga chillig inchar gømeelø, nui merrab pønrramig kønrrai. ⁵Nøbe namune undag købiitø Jesucristogurri nui trag ureg kønrrai maramig manasrøwei nø treeg mara tøgagúig købig køn, tru nø trendø treeg martrab isua tøgagúig truig maig køben treekke, ⁶tru nui ka yandø tab indig purø nuig purø tabigwan maya nuguen tabig wamindamig kønrrai, tru nui truba undaaraig Nusrkaingurri namun ke ka yandø tab indig tranigwan. ⁷Nuinug nambe nui aningurri nuielø gønrrai kaigyugurri wesrailø guer, namui kaig mariilan ulø bayimeelø, Tiuswei tru ka yandø tab indig tøgagømburab tøgagúig truig maig køben treeg. ⁸Tru ka yandø tab indigwan tranøppe, Tius namun tøgagømburab

tøgagønrrai tranig køn, tru chiwandøgucha nam purø tab asha maram gusrebelø gømigwanba, katø törgandø chigúi mørøbelø gømigwanba. ⁹Nøbe tru nø trendø treeg martrab isua tøgagúig tru muguen asiimíig pasrabigwan namun kenamarig køn, Cristoinug nø treeg maramig nun maya nuguen tabig asønaben tru treeg tōga waig købigwan, ¹⁰tru treeg maram gwalømmerna pubene, trunun treeg maramig pasrønrrai: tru srømbalasrø chi pønrrabigwan lata, katø pirauigwan lata kanbalatø mara, maig maramigwan Cristo kerriguwan nø asha martrai pønsrønrrab.

¹¹Katø nambe tru namuimburabigwan nø ketig tranamig tøgagúigwane Cristoinuutøwei utig købig køn, manasrøwei namun treegwan utønrrain gønrrai marig købig kua, tru chiwandøgucha Tius nun maig maramdiig asønaben tru treeg kønrrai marøbig, maig martrab asig køben trumay treeg. ¹²Tru srøsrø ke nammerrig Criston muniirab melabelø gúikkurri, tru nui törguegwalmabigwan namgurri maya nuguen tabig wamindig kønrrai. ¹³Katø treetøwei ñimbe nuinug tru wam newan ciertonig, tru tabig srø wam kaigyugurri wesrabigwan ñim mōra, nun køreben, tru tranrrab misra kørørmisrig Espíritu Santotōga Tiusweyelø gúin gúi asiilø gønrrai ñimbe sellailø gúig køn. ¹⁴Truibe tru namuimburabig kønrrabigwan ketig utamig kønrrai katsiibasra tranøbguen indig truig køn, tru Tius nuyasig tøgagønrrab wesrailan ke tab webamba pønrramnegatig, nui törguegwalmabigwan maya nuguen tabig wamindamig kønrrai.

Pablo Tiuswei ureemerayasig Tiuswan miab

¹⁵Inchawei treekkurri tru ñimui isubigwan Señor Jesucristoinug pasra tøgagúigwanba, katø Tiuswei misaameran mayeeelanba ñim truba undaguelø gøn daig na wammørabe, ¹⁶chu urastøgucha na Tiusba wamindigu tōgatø isub palømmø, ñimuimburab ‘ungwa’ chibig kur. ¹⁷Nabe tru namui Señor Jesucristoi Tius tru törguegwalmab Mōskawan miabig kur, ñimun Espíritu Santogurri øyeegwan tranrrai, kusrebelø gømigwanba, katø nebua asiimíigwan törgandø tab chigúi nebua ashchaimba, newan nun tab nebua asamig kønrrai.

¹⁸Katø chigúi mørøb nebua asamig ñimui isubigu törgandø kebiliilø gua, tru ñim tøgagønrrurmab isua muniirab melønrrai ñimun wamigwan, øyeeg købig kuin gúi nebua ashchaimba, tru

nui misaameran keta tranrrab misrig chigucha palømfīg purø nuig purø tabigwan øyeeg købig kuin gúi nebua ashchaimba, ¹⁹katø tru nam nun kørebelainug maramburab marøbiibe, purø nuig købig kuin gúi nebua ashchaimba, miabig kur. Inchen tru nui purø nuig maramburab marøb pasrabiibe, ²⁰Tius tru Criston kwailai utugurri gatøle øsiirangarua, tru srømbalasrø nø wainug nui kusrmay wamisrtrai maramburab mariitøgatøwei marøb pasran. ²¹Mayeelaim bala nøm asha garubelaim bala gøben, katø mugucha manchinnraingaig karubelaim bala gøben, katø maramburab marøbelaim bala gøben, katø maya misagwan nøm asha garubelaim bala gøben, nørrø gusrebelø gúikkurri nørrø munchimera tøgagønrrai tranilaim bala gøben, kerrigu iilaim bala nun wannig køn, mõi i gwalømwēindø gømøtø, katø wendøsrø attrabiguwein chigucha. ²²Incha Tiusbe tru chigurrimbunø købigwanguen Cristo nø maig kønrrain gøben treeg pønrrønrrai pønsra, iglesiaimbe chiyutøgucha nø tur gønrrai pasrig køn. ²³Inchen truiibe Cristoi asr køn, Cristo nøtøwei tru chigucha chi palømfīg netsiig pasraig. Cristobe treetøwei chi købigu mumaytøgucha nøtø netsiig pasrabig køn.

Tius ka yandø tab indikkurri kaigyugurri wesrailø

2 ¹Ñimbe ñimuimburappe, martrai karua pønrrailan mørmø, itøbunab marmuiløyubah, katø kaig marøb amønailøyubatø kwailø gøbig køn. ²Kaguende ñimbe merrabsrømbe yu pirau maig arrub pasrøben trunun marøb, katø tru srømbala chiguchagayu nø muba karumburab nø garub pasrabig, tru nugwaimandzig, maig maringaruben treeg marøbelø gøbig køn, tru mõi ya Tiuswan mørmø misaameran nø kaig maringarub pasrabig karuig. ³Namgucha merrabsrømbe mayeeløba namun asr maig trømbøig marøg kui inchen nømui utu treetøwei marøb amønibēlø gøbig ker, namui asr maig srua itanmaptø, tru gúindø kaig marøb, kailan isub. Kaigwan nam trendø tøgagúikkurri, Tiuswei purø rrømbøig namig købigwan utønrrabelø gøbig ker, katøganelø mayeelø latawei. ⁴Inchendø Tiusbe yeeg purø nuig lastima asamburab isua ashibig køptø, tru purø nuig undag købig tøgagúitøga namun undag køptø, ⁵tru martrai karua pønrrailan møra marmuiløyutø kwailø amønibenbatøsrøwei, tru øsig kømigwane Cristoba kanbalatø tøgagønrrai namun tranig købig køn. iTius tru ka yandø tab indiitøgatø ñimbe kaigyugurri wesrailø gøn!

⁶Incha Tiusbe namune Cristo Jesúsba kegøtø øsiirangarua, nøba srømbalasrø Tius waisrø purramisingaruig købig køn, ⁷tru wendøsrø attrabigu nui ka yandø tab indig tøgagømburab tøgagúigwan kenamartrab, nø namun purø tabig køptø Cristo Jesúskurri. ⁸Kaguende ñimbe Tius ka yandø tab indiitøgatø kaigyugurri wesrailø gøn, ñimui isubigwan Jesucristoinuutø pasrikkurri. Iibe ñim chigøben marikkurri gømøtø, iigwane Tiusbe ka yandø keta tranig køn. ⁹Kabe nam chigøben tabig marikkurri gømøtø gøn, ‘tabig marikkurri gøn’ cha, mugucha møg inçhib pønrramig kaanrai. ¹⁰Kaguende nambe Tius nø mariilø guer, Cristo Jesúskurri srøig peemayelø gønrrai mariilø tabigwan marøbelø gønrrai mariilø, tru treegwan marøb amønibelø gønrrai Tius manasrøwei pønrsailan.

Cristogurri kanguelarrøtø lincha pønrramisrig

¹¹Inchawei ñim tru trendø judíos kømø misaamerane merrabsrømbe tru judíosmera nømui asru taska circuncidailøbe ñimune: “Circuncidaimø misakkølleelø” cha wamab tøgagúilan isua guy. ¹²Ñimbe tru urasrømbe Cristone chigar, Israel misaamera chitø marøbelø gøben, ñimbe treegwan maramig chigar gønrrai tarømariilø, katø Tius nui misagwan øyeeg tranrrab kørrømisri acuerdosmera mariilane chi asamig chigar, katø chiwan muniirab melamig chigawei, yu pirau ñimbe Tius kaweyelø gøbig køn. ¹³Inchendø mømibe Cristo Jesúsba kanbalatø pønrraikkurri Tiusweimay kemalsrailø gøn, Jesucristoi anindøga, ñim merrabsrømbe yabsrø pønrrabelø gøbig kuigwan.

¹⁴Kaguende tru ambugurri igurri chi isumikkaig tab gøbig namuinug pasrabiibe Jesucristo nøwein gøn, tru pa sètø gøbigwan kan sètøtø gønrrai marøbig. Tru ashig kømui indiyab waraig købig kan pirøbanrrig sètøbasrab lataig pasrabigwan pøtiichippe, ¹⁵tru maig maramigwan martrai Moisés pøriiløygurri wesrawa, øyeeg, øyeeg maramig køn chibig pørig pønrrabigwan chi asamig kaanrai mara basra, treeg mariitøga patsøga basrig kuig køn, Cristo nø kurusyu kwawa, tru pa sètø nøørøtø gøbelan nuinug srøig kandø mara basrtrab, øyamay ambugurri igurri tabig kørrømisrtrai marøb. ¹⁶Incha gatø Cristobe tru pabalø gøbigwan kan asrtø lataig mara, Tiusba gatøle treetøwei katø tab kørrømisrtrai marig køn, tru ashig kømui indiyab pønrraigwan

yandø mas treeg kømønrrai nò kurussyu kwaitøga patsøga gørrømarøb.

¹⁷Incha Cristobe arrua, tru ambugurri igurri tab waramigwan eshkaab kusrenanig køn: ñim judíos kømeeelø Tiusweinukkurri yabsrøn bønrrabelan lata, pulutø bønrrabelø judíosmeran lata. ¹⁸Kaguen nøgurriwei nam lata, nøm lata, Tius Møskawan tru Espíritu Santotøgatøwei kemalamig tøga bønrrer. ¹⁹Inchawei yandø ñimbe peg birausreelø gømøwei, ni pestø ka pua buramrraptø amrruateelø gømøwein gøn. Møimbe treeg kømøtø, Tiuswei misaameraba kanguelarrøtø marøb tøgagømigwan tøgar, Tiuswei misaameraba kan yautø latailø, ²⁰Cristo nøashib karua øriilaim balaba, katø Tius maig karuigwan eshkabelaim balaba ñimbe pølbasra kusrub mariilø gøn, tru katsigugurri niga basrab sruube Cristo nøtøwein gøben. ²¹Inchen nuinug tru yawan, purø may tamara warøb tabig kusrub marene, tru yabe kurrab ippe, Señorweyasiitø tarømari ya gønrrab kurrab yan. ²²Inchen tru utu ñimungucha kanbalatø kusrub marøb ambiilø gøn, Espíritu Santogurri Tius truyu nò pasramig kønrrai.

**Nui tabig srø wamwan judíos kømeeelan
waminchib inrrai Pablon Tius pasrig**

3 ¹Øyeekkurri na Pablobe Cristo Jesúsweiwan marøb megabig kuikkurri kailan keerig yau pasrar, ñim judíos kømeeelayasig tab gønrrai. ²Pøs ñimbe manawei wammøraguen gúinrrun, Tius ka yandø purø tab inchibig køptø ñimuyasig tab gønrrai nan iigwan martrai pasrigwan. ³Iibe tru mu asiimíig pasrabigwan nan ashchai Tius kenamarig truig køn, tru na ñimun landøtiig pørøbguen indig. ⁴Inchawei ñim iig tru pørigwan ashabe, muguen asiimíig pasrabig Cristoiwan, øyeeg chigúí møramgailan nabe nebua ashibig kuin gúí ñimbe wetøgørrønrrabguen. ⁵Iig, tru muguen asiimíig pasrabigwane merrabsrø misaamerane munguen kenamarmuig købig køn, tru mõi ya Cristo nøashib karua øriilø, Tiusweindø tarømariilanba, katø Tius maig karuigwan eshkabelanba, Tius nui Espíritu Santotøga kenamarøb lataibe. ⁶Iig, tru muguen asiimíig pasrabiibe, tru judíos kømø misaameragucha judíos misaameraba tøgatø tru ketigwan utamig tøgagøb, tru asryutøwei pønrramig køb, katø Jesucristoinug tru tranrrab misra kørørmisrigwan tøgatø utamig tøgagøb indamig truig køn, tru Tiuswei tabig srø

wamgurri. ⁷Nane Tius ka yandø tab incha ketikkurri, iig tru tabig srø wamwan waminchib marøb meganrrai pasrig kur, nui maramburab marig maig køben truitøga.

⁸Nabe Tiuswei misaamerai utu tru chigucha gømø waachawan tru Cristoi chine chine purø tabig, kan øyangatiitø gøn damgaig Tiuswei tru tabig srø wamwan eshka kusrenanøb pasramig kønrrai pasrig kur, tru judíos kømø misaameran, ⁹katø trugurri tru mu asiimíig pasrabigwan maitø marøb attrabigwan, Tius tru chiwandøgucha mara pønrsøbigweinug tru manasrøngurri sorig pønrrabigwan. ¹⁰Iigwane tru iglesiagurri kerriguba mõi ya asig kønrrai kenamartrab isua indig kuig køn, nui tru muguen nebua isumgaig purø nuig kusrebig kuigwan tru srømbalasrø nøm asha garubelanba, katø mugucha manchinrraingaig karubelanba. ¹¹Tius øyeeg marøppe, tru nø trendø manasrøngurri treeg martrab isua tøgagua, trunun treeg marig købig køn namui Señor Jesucristoinug. ¹²Inchawei nambe chigucha katønrraingaig chi isumø nøgurri Tiusweinug kemalamig tøgaguer namui isubigwan Jesucristoinuutø pasra tøgagúikkurri. ¹³Inchawei nan øyeeg trømbøig isumdiig puig megaigwan, trunun isuptø kullaaramørrunrigay chinrrab inchar. Masken nan øyeeg puibe ñimuyasiibe maya nuguen tab gønrrain gøn.

Cristoi undag købig

¹⁴Inchawei nabe Tius Møskawei merrab tømønrsøbig kur, ¹⁵tru srømbalasrø lata, yu pirau lata, kan sötø, kan sötø købelan trumørig munchi bønra wamabigwei merrab. ¹⁶Tru nø chigurrimbunø nui törguegwalmabig chi palømfíig maya tøgagúig, truig maig køben, tryugurri tru ñimui manrrau chishkandø mur basrønrrai, nui Espíritugurri maramburab mariitøga martrai miar, ¹⁷Cristo ñimui manrrømerayu pasrønrrai tru isubigwan nuinuutø pasra tøgagúikkurri. Pøs øyangurrimbe ñimbe umbu srøl gueetiilø, undag købigutø pønrramisra, ¹⁸Jesucristoi undag købig maya nuig kuigwan ñim mayeelø nui misaameraba kanbalatø pønrramisra, tru Cristoi undag købiibe lendømay rreetøwei, yamay rreetøwei, palamay rreetøwei, lendegørrab rreetøwei nuigwan ñim tab chigúi mørtrai miar. ¹⁹Katø tru Cristoi undag købig mu newan nebua isumgaigwan ñim nebua ashchai miar, ñim øyamaybe Tius nø maya nu kømburab kuig truig ñimuinug netsiig basrønrrai.

20Inchen tru chiwandøgucha nøbe marøppe, tru nam miaigwandø gømøwei, kabe nam isuigwandø gømøtø, ke uñcha gøm tøgagønrrai marøb Tius, tru nui maramburab marøb pasrabig maig køben namuinug treeg marøb pasrabigwan, 21Tiuswei iglesiyuba, Cristo Jesúsweinuuba törguegwalmabig kønrrun, managatig. iTreeg kønrrun!

Criston kørebeløbe Espíritugurri kandø gøn

4 1Inchawei Señor Jesucristogurri tru kailan keeri yau na pasrabiibe, ñimun trenchinrrab inchar: Tius ñimun treeg amøñinrraiwei wamiilø gúig køppe, maig amønamigwan trumay treeg amøñirrunrrigay cha, 2maig køben inchimeelø larrø gørrøteelø, maig købash indingucha larrø tammayelø, maig køben gúingucha tammay melabelø, kanikkurri kanikkurri chigúingucha lata inchimøtø undag købiitøga chi gømui lataig pønrrabelø. 3Espíritu Santoinug newan kanbalatø pønrrønrrab indamigwan treeg pønrrønrrab inday, tru kanbalatø pønrramig ambugurri igurri tab gøbiitøga, 4kan asrtø, kan Espíritu Santotø gøn, tru ñim muniirab melønrrai ñimun wamig kandø gøb lataitøwei. 5Señor kandø gøb, tru isubigwan Jesucristoinug pasra pønrramikkucha treetøwei kandø gøb, piu umbu ulsraikkucha treetøwei kandø gøb indan. 6Tius kandø, trurrigu mayelai Møskai, nøbe mayeelaim bala nø basrabig køb, mayeelainug trumørig nø basrab, mayeelainug pasrabiibe nøtø gøn.

7Inchendø namune kanun ganun Tiusweyasig chigøben marøbelø gønrrai keta tranig køn, Cristo pirisha keta tranig maig køben, treeg. 8Inchawei Tiusbe trendaig køn:

“Tru srømbalasrømay ippe,

tru merrarrowa srúa gúig melabelan
nø merrarrowa, nø pera yaig køn cha.

Incha misaamerane Tiusweyasig chigøben marøbelø gønrrai
keta tranøb indig køn” cha.

9Tru øyeeg: “nebyaig køn” cha trenchippe, ¿tru wallibirø umbugatig kørrebmerrig kørroyaig køn cha rrenchimuitarru? 10Tru kørraiibiibe nøtøwein gøn, tru maya srømbalamera pønrrabigu purø balasrø nebibig, kerriguwan nøtø netsiig pasrønrrab. 11Incha truig nøtøwei mõilane nøashib karua øriilø gønrrai marøb, mõilane Tius maig karuigwan eshkabelø gønrrai marøb, mõilane Tiuswei

tabig srø wamwan truørø srua llirabelø gønrrai marøb, møilane tru Criston kørebelan tab ashib pera pønrrabelø gønrrai marøb, katø kusrenanøbelø gønrrai øyeeg pønsraig køn, ¹²tru Tiuswei misaamera nømui marøb pønrramigu purø may gusrenniilø gønrrai isua, Criston kørebelø, tru nui asr, nurab inrrai martrab. ¹³Tru nam mayeeløba tru isubigwan Jesucristoinuutø pasra kanbalatø bønrramiguba, katø Tiuswei Nusrkawan tab nebua asamiguba nam kanbalatø bønrramigwan nebumnegatig martrab, kan møg ne nuraig lataig misrøb, Cristo maig køben treeg misramnegatig nebumig kønrrai.

¹⁴Øyangurrimbe nambe yandø mas shush ureemera latailø gømumønrrun, kan pi latøgushibig amburab iburab srua ambi latailø, chine srøig peemaytø kusrenaniilø kan isig ichibig lataig arrubig punø, banrrø sruabetiilø, møguelø kaig maramigwandø isubelø kaigu kegørrørskamig purø may isua pønssrailøtøga kegørrørskaimelø. ¹⁵Masken treeg kømøtø, tru newan ciertonigwan undag købiitøga waminchib, chiyutøgucha nørrøragun tru tur Cristoinug nøba kanbalatø. ¹⁶Pøs nøgurriwei asr ørøba kandø misra, tru kønabigu merrarrab srølmørig abumay imay lata purugubene, nøm møitøgucha chi maramigwan trunun rrunun marøb pønrramisren, nurab yan, katø undag købiitøga nørrørab ambamig kønrrai.

Cristogurri srøig peemay amønamigwan tøgagøb

¹⁷Inchawei nabe iig øyeegwan ñimun eshkappe, marmø gømø, martrai karunrrab inchar Señorwei munchiyu: møimbe yandø amønippe, Tiuswan ashmeelø judíos kømø misaamera nøm chiweingucha chi purugunrrabgaig isub amønailøyu ñimgucha amønimøtay cha. ¹⁸Nømui isubiibe løstørailø, nømui manrrømera purø murelø gúikkurri chugúinguen mørmeelø gua, øsig kømig Tius tøgagúigugurrimbe nømbe purø yab pønrran. ¹⁹Yandø chi kørikkengar misrikkurrimbunøbe, yandø kaig maramigwandø martrab guebambubelø gøn, chigurrimbunø køsøngønrraptiig marøg købig arrubigwan neguen gømuig marøbig marøb pønrrønrrab. ²⁰Trune ñimbe Cristoiwan kusrepppe, øyeeg marøbelø gømønrrab gusreeg køn. ²¹Ñimbe isa gømø, tru newan ciertonig Jesúsweinug pasrabigwan cierton mørøb, nuinug kusrenaniilø gúig kuinrrun. ²²Tru ñim merrabsrø Tiuswan ashmeelø gøb uras marøb tøga amønaig købigwane wegutsay, tru køllig ñim trendø kaigwan

tøga gal-laig, chi tabig pummørø chull isubig purø rrømbøig marøg købig trutø srua yaig, ñimui umbu kaig pasrabigwan, ²³tru ñimui isubigu srøig peemay isubelø gønrab. ²⁴Ñimbe tru srøig øsig kømigwan kewa bønrray, truike Tius nø maig køben treetøwein gønrrai marig køn, cierton sølgandiitøgaba, newan chishchig tabiitøgaba.

²⁵Inchawei øyeekkurri ñimbe isa wamindamigwane yandø elacha, masken ñim møitøgucha ñimui mendaigwane isa gømø, sølwan wamindamig køn. Kaguende nambe mayeeløba kangurriin gangurri kan asrtø guer.

²⁶Namappe, namubendø, namig køtanmaptø chigøben kaig marmøwei, namig købigwane ke pørr binayamnegatikkucha tøga amønimøwei indamig køn. ²⁷Katø nugwaimandzig ñimuinug kelulrrain gømøwein guy.

²⁸Nilaptiig købiibe yandø mas nilømøta. Masken treeg inchimøtø, ñui tasiitøga chigøben tabig maramigwan mar, møikkøben chi palai inchene, purugumig tøgagønrrab.

²⁹Ñimui trigugurrimbe mørøbguen møramgaig trømbøig webinrrain gømøtø guy. Treeg kømøtø, Tiusweimburabigu maig palaim burøben purugunrraptiig, treeg wamindamig køn, mørøbelanguen purugunrraptiig, treeg kønrrai. ³⁰Tiuswei Espíritu Santon isuim basrønrrai marmøtay, tru kerrigu yandø newan kaigyugurri wesram kwalømweyasig truitøga ñimbe Tiusweyelø gúi asamdiig kønrrai sellailø gøn.

³¹Ñimui manrrau chu uraskucha møbraindø pønrramig kønrrai marøb pasrabigwanba, ke chab srurab namig købigwanba, trømbøig namig købig pasrabigwanba, trømbøgølig namig rrasamigwanba, trømbøig tsalø wamab indamigwanba, chigurrimbunø kaig pønrrabigwan kerrigu truilanbañau chishtø elatsay. ³²Masken treeg inchibgunrriibe, ñimbe larrø tab inchibelø, lata lastima asiylabelø, Tius ñimun Cristogurri kaig marigwan ulø baymub pesannab lataitøwei, kangurriin gangurri ñimgucha ulø bayiyab pønrrømumig køn.

Tiuswei ureemera mandø amønami

5 ¹Inchawei ñimbe Tiuswei undaaraig ureemera gúig køppe, nø maig køben treetøwein gønrrab inday. ²Amønippe, undag købigwane tøga amønay, Cristo namun maig undaguig køben

treetøwei. Nøbe nøashib namuyasig purøbasramisra kwaig køn, kan animal gweecha purø may irrabzhig Tiuswan keta tranøb lataig.

³Nimbe ñimui utube, møgueløba, ishumburmeraba chigøben trømbøig maramigwanba, katø chinetø køsongønrrapteelanba, katø chiwandøgucha ke chinchimmørø inchib parø indamigwanba, øyeelane mørøguen wamincha mormumig køn, Tiuswei misaamera gúig køppe. ⁴Mørøbguen møramgaig wamincha ashib pønrrømøwei, chugúinguen mormubendø wamincha mormøwei, trømbøig wamindamgailan wamincha indza mormøwei indamig køn, treeg indamgailan maraashib pønrrømøtø, masken ñimbe Tiuswan 'ungwa' chib gømig køn. ⁵Kaguende ñimbe yandø iigwane tsabø ashibelø gøn: møguelø ishumburmeraba trømbøig marøbeløba, katø chigøben ashikken gønrrabgaig trømbøig marøbeløba, chiwandøgucha ke chinchimmørø inchib parø inchib, pønrramigwane ke tius mara tøgagøbeløba, treeløbe Tiusba, Cristoba nøm ashib karub purraisrømbe mugucha chi ketig utamig chigar gønrrab gúin gúi.

Tørwei ureemera maig amønamigwan waminchibig.

⁶Chiweingucha chi purugunrrabgailø wamindiiløtøga mugøben kegørrørskainab gønrrab gømø, kaguende øyeekcurrindøwei Tiuswei purø rrømbøig namig købiibe tru mormø misaameraim bala arrubig køn. ⁷Inchawei ñimbe treeg marøbeløba lincha tøgatø marøb gønrrab gømø. ⁸Kaguende ñimbe merrabsrømbe løstøyuelø gøbig kuig, mømimbe Señorweinuube toryuelø gøn. iÑimbe amønippe, tørwei ureemerasun amønay! ⁹Kaguende tru toryugurri chi arrubiibe maya nuguen purø tab indiiba, sølgandø tabig mariiba, ciertoniiba øyee gøn. ¹⁰Señorwan tab gúi wanrrai maramigwan, mumay maren tab gúi mørtashchab treegwan lab melamig køn. ¹¹Chi tabig marig kørrømisrtrabig chigaig løstøyuigwan mariilan ñimgucha tøgatø marøb gønrrab gømø, masken ñimbe treeg inchibgunrriibe øyeebe kalø gøn cha eshkabguen bønrramig køn. ¹²Kaguende nømui chigøben søratø mariiløbe wamindamikken kørig kønrraptiig trømbøig mariilø gøn. ¹³Inchen tru chigurrimbunø købigwan toryu pønsrcøbene, maig kuigwan törgandø asamig kenamisran. Pøs tru chiwandøgucha

maig kuigwan asha gømig kønrrai torgandø kenamarøbiibe tru tør gøn. ¹⁴Inchawei øyeeg chibig køn:

“Ñi, kib lataig tsubiibe, kiagasra,
kwailai utugurri kurrø cha.

Cristobe ñun kebilønrrun” cha.

¹⁵Inchawei tab isuamøra amønay ñim mandø amønamigwane. Kan chugúinguen mørmeelø lataig amøñimøtø, maig amønamigwan tab isuamøra amøñibelø guy. ¹⁶Chigøben tabig maramdiig pubene, treegwan ka purainrraindø ashatø bønrrømøtay. Kaguende puro gaig kwalømmera gøn. ¹⁷Inchawei ñimbe ke chugúinguen mørmeelø gømøtay. Treeg inchimøtø, Señor nam chiwan martraim balai watashchab trunun nebua ashchab indamig køn. ¹⁸Vino mucha; mutsiiramøtay. Truike chugatig kaig marøg køben kaig martrai srúa ibig køn. Masken treeg kømøtø, Espíritu Santotø netsailø gømig køn.

¹⁹Ñimbe salmostøga, himnostøga, Tiusweimburabelan cantailøtøga kangurriin gangurri waminday. Ñimui manrraugurri newan isua cantab, Señorwan maya nuguen tabig køn chib waminchib. ²⁰Chu uragucha Tius Møskawan ‘mayanguen ungwa, ungwa’ tay chiwandøgucha lutøgurri namui Señor Jesucristoi munchiyu.

**Tiuswei ureemera keeba, sraimba mandø
gømigwan waminchibig**

²¹Ñimbe kanikkurri kanikkurri lata mørøb melamig køn, Criston køriibala tøgagúikkurri.

²²Sraløbe, kelø maig chiben treeg mørøb melamig køn, Señorwan lataitøweingue. ²³Kaguende keebe srawane nø asha garubig tur gøn, Cristo nui iglesiai, tru nui asrwein tur gøb lataitøwei, truigwane tru Kaigyugurri Wesrabig nøtøwein gøn. ²⁴Cristo nø maig karuigwan iglesia møra marøb melab lataitøwei, sraløgucha kelane treetøwei mørøb melamig køn chiyutøgucha.

²⁵Keløbe nømui sralane undaguelø gømig køn. Cristoma nui iglesian undag køptø, nui øsig kuigwan nøashib tranig køn, ²⁶tabig nuyasiitø tarømari misaamera gønrrai martrab, tru nui wamdøga piu umbu ulsraitøga pillmawa, chish mara, ²⁷iglesia torguegurnabig, kaig mariitøga chigucha chillig inchaig kømíig, maig købendiig trømbøtiig mindig kømøwei, chi tre lataibe

chiguchagaig, masken treeg kòmõtø, tabigweindø tarømarig, kaig mariitøga chillig inchaig kòmíig treeg pasramig kònrrai nuyasiitøwei øyamay kenamartrab indig kòn. ²⁸Øyeetøwei keløbe sralan undaguelø gømig kòn, nømui asrwan lataitøweingue. Nui srawan undaguibe nøasiitø undaaran. ²⁹Kaguende mugucha nui asrwane managuen nøasiitøweimbe tsaliinchimøn. Treeg kòmõtø, asr maig palai inchen mab muchib, maig køben gønrrain gømø ashib tøgagøn, Cristo iglesian ashib tøgagøb lataitøweingue. ³⁰Pøs kaguende nambe nui asruelø gúimba, namungucha treetøwei ashib tøgagøn. ³¹“Inchawei treekkurri møøbe usri møskawane elacha, sraimba kandø misrtrun. Incha tru pailøbe kan asrtø gønrrun.” ³²!Øyeebe mandø gúinguen møramgaig purø nuig kòn! Inchendø iigwan waminchippe, ‘Cristonba, nui iglesianba treeg kòn’ cha waminchar. ³³Inchawei treeg købene, ñim keløbe møitøgucha sralane ñimui asrwan lataitøwei undaguelø gømig kòn. Inchen sraløgurrimbe kelane maig købash inchimø, korig tøgar gømig kòn.

6 ¹Señorwan undag købiitø ureemerabe ñimui møskalane mandø chiben treeg møramig kòn. Kaguende iibe treeg maramig søl gøn. ²“Ñui usri møskawane maig købash kømø, purø tab inchib tøgagu, ³yu pirau purø tabig kasraatø tsumig kònrraimba, øsig køllirab tsumig kònrraimba.” (Tru maig maramigwan martrai karua pønsrailøyu iimerrig kòn, tabig tranrrab misra kørørmisrigwan utamibañauibe.)

⁴Inchen ñim møskaløbe ñimui uregwane namishib namig køtanmaptø menrra inchimøtay namig isumønrrai. Treeg kòmõtø, sølwan maram gusrenrrai kusrenanøb, Señor maig kusrenaniitøga ‘øyeeg maramig kòn’ chib waminchib kusrenanamig kòn.

Ka karuindø melabeløba, karub pera gøbeløba

⁵Ñim, karuindiig melabelø, yu pirau ñimun karub pera gøbelane møramig kòn, køriibala, maig købash inchimø, manrraugurri tabig isua, Criston mørøb melab lataitøweingue. ⁶Marøppe, nømba ka tab gørrømisrtraptø marmumig kòn, nøm ñimun ke ashib pønrrøbendø. Cristo karuindiig melabelø gøppe, Tius maig martrain gøben palabinøtø gømø, tabig martrurmab isua maramig kòn. ⁷Maramigwane ka palabinø inchib, møguelayasig marøb pønrrermab isua marmøtø, marøppe, martrab isua Señorweyasig lataig maray. ⁸Yandø

ñimbe ashibelø gøn, karuindiig megabigwan lata, kabe mu karuimíig nuimburab uñibigwan lata, mōigwandøgucha chi tabig marigwan tru marimburøbe Señor nø rranrrab gúi.

⁹Inchen ñim karub pera gøbeløbe ñimui karuig mørøb melabelane ñimgurringucha tabig tøgaguy ‘yeegwane chigøben martrumøn’ chib, chinetø chimøtø. Kaguende ñimbe ashibelø gøn, tru nømun ashib karub pasrabig tru Señortøwei ñimun ashib pasrabiibe srømbalasrø wabig kui. Kaguende Tiusbe mōigwane purømisrøb, kandarøtø inchimíig køn.

Tiuswei uregwan kwaimandziiba chitøga kwayanrrai traniilø

¹⁰Trube, mōimbe yandø Señorweinuuba, nui maramburab marøb tøgagúiig purø nuiguba kørønrrabgaig mur pønrramisray.

¹¹Tius tru chitøga kwayanrrai kerrigu traniiløtøga tamara pønrramisray, nugwaimandzig purø may guegørrørskønrrab tamara pønsra gua kegørrørskønrrab inchen, maig kuingucha kørømø kwayawa, truyu puraambub ambamig kønrrai. ¹²Kaguende nambe kwayab puraambub

ambamibe yu pirau misag yaumbaig, animaig, treeløba gwayamig kømøtø, tru nøm asha garubeløba, katø mugucha manchinrraingaig karubeløba, tru løstøyu nøm muba karumburab karub pønrrabeløba, tru kwaimandziimera larrø rrømbøig marøbelø srømbalasrø pønrrabeløba, treeløba gwayamig køn. ¹³Inchawei øyeeg købene, Tius chitøga kwayanrrai traniilane truigwane kerrigu tøga bønrray, kaig kwaløm pubene, kullaaramø pønrramig kønrrai, incha yandø øyeegwan kerrigu chab mara pønrramisrikkurrimbe kørønrrabgaig mur bønrrønrrab.

¹⁴Inchawei kørønrrabgaig mur bønrray, tru newan cierton wamindiitøga pørønawa lataig.



Trugurrimbe tru sɔlgandø tabig amønaitøgabe, tru pechoburab chinchimønrrai katabigwan kewa lataig bønrray. ¹⁵Tiuswei tru tabig srø wam chi isumgaig tab gøbigwane waminchab amrrab muniitø bønrramig, srøbyu keetigwan lataitøwei tōga bønrray. ¹⁶Kerrigu iilø gømnetø, tru isubigwan Jesucristoinuutø pasra bønrraigwane sɔlburramamønrrab katab srua basraigwan lataig tōga bønrray, tru nugwaimandzig flechamieran pilōga petiilø, chigurrimbunø amrrubigwan kweetsamig kōnrrai. ¹⁷Katø tru kaigyugurri wesraig kōmig tōgagúigwane chinchimønrrai turyu petsig kan tsandzøn cascon lataig tōga bønrray. Espíritu Santoi espadane srua bønrray, truike Tiuswei wamwan. ¹⁸Tiuswei Espíritu maig maringaruben, Tiusba waminday, chu urastøgucha ñim mumay gøben Tiusba waminchib, miab indiiløyu. Isua ashiptø guy, Tiuswan ‘purugurra’ cha miab, nui misaamerai mayeelayasig maikkucha pesannab gōnrrab gømøtø.

¹⁹Katø naimburabgucha Tiuswan ‘purugurra’ chib miarrunrrigay, na ke waminchab inchen, tru na maig tamelan nan tranrrai, tru Tiuswei tabig srø wam sōrig pasrabigwan nebua ashchai chigucha chi kōrig kuin gømø, wamindamig kōnrrai. ²⁰Truigwan Jesucristo nø waminchib pasrab lataitøwei yu pirau nui wamwan na waminchib pasrōnrrai pasrig kur. Katøgucha kailan keeri yau pasrar. Tiuswei wamwan na maig wamindamigwan chigucha kōrmø wamindamig kōnrrai Tiuswan miarrunrrigay.

‘Ka amõñigueh’ cha wamindig srabeilø

²¹Trube, treeg kōbene, Tíquico, namui undaaraig nuneg, Señorwei maramigu chu uragucha tarømisrmø, chi maramelan nø asha marøb megabiibe, na maig tsuigwanba, katø na chi marøb megaigwanba, kerriguba ñimun eshkanrrab wam srua inrrun. ²²Nabe nune truweiwei ørar, nam mandø melaigwan ñimun wammørøsrōnrraimba, ñim truba tab gúi mørøb gōrrømisrtraimba.

²³Tius Møskaweinukkurrimba, Señor Jesucristoinukkurrimba tru ambugurri igurri tab gøbig arrubigwan nunelan tranrrai inchar, undag kōbig tru isubigwan Jesucristoinuutø pasra tōgagúigwanbañau. ²⁴Tiuswei tru ka yandø tab indiibe tru namui Señor Jesucriston undaaramigwane managucha patsōnrraingaig undaarabelø mayeeløba pasrōnrrun.

Filipenses

Pablo kailan keeri yaugurri filipos iglesian pørøb

1 ¹Pabloba, Timoteoba Señor Cristo Jesúsweimburabigwan marøb melabelø Cristo Jesúskurri Tiuswei misaamera mayeelø Filipos ciudasrø warabelan pørar, tru Tiusweimburabelan ashib pera bønrrabelanba, Tiuswei yau purugunrrai wesrawa pønsrailanbañau. ²Namui Tius Møskaweimba, Señor Jesucristoimba tru ka yandø tab indigwanba, chi isumgaig tab gøbigwanba ñim tøgagønrrai inder.

Pablo Tiuswei ureemerayasig Tiuswan ‘purugurra’ cha miab

³Na ñimun isuimørig nai Tiuswan ‘mayanguen ungwa, ungwa’ chib, ⁴chu uraskucha na Tiusba wamindimørig ñim mayeelaimburab kasraatø miabig kur, ⁵kaguende ñimbe tru Tiuswei tabig srø wam tabigweimburabigu srø pølbaserøb gwalømgurri moin gwalømgatig lincha marøb melabeløgurri. ⁶Nabe iigwan treegwein gønrrab gúi asha indig køn: ñimuinug tabig marøb pølbaserøbiibe Jesucristo arrum gwalømgatig ñimune newanelø gønrrai tamarøb pasrønrrab gúi. ⁷Ñim mayeelaimburab na øyamay isumig søl gøn. Kaguende nabe ñimune nai manrraube tøgä basrabig kur. Na kailan keeri yau pasraigu lata, mui merraptøgucha Tiuswei tabig srø wamwan puømisrøb, maig kui ashchai ‘øyeeg køn’ chib, waminchib pasraigu lata, Tius tru ka yandø tab indigwane ñimbe naba tøgatø utab gøn. ⁸Inchawei Tiusbe asha basran, na ñimun mayeelan pesannamø, truba rruba isubig kuigwan Señor Jesucristoi undag købiitøga. ⁹Inchawei na Tiusba waminchippe, ñimui undag købiibe katøguchinguen

gatøguchinguen nurab inrraimba, katø purø nu nebua ashib kusreb amrraimba, maig køb arrubigwan tøgandø nebua ashib amrraimba miabig kur. ¹⁰Chiwan mas tabig kui nebua ashibelø misra, kaig marig chigar chishelø ‘ñibe øyeeg kalø mara basran’ dainab pønrramig chigar gønrrai, Jesucristo gatø arrub gwaløm. ¹¹Jesucristoinukkurri arrubig tru tabig sølgandø marig, treeg ellmarig arrubiitø netsaim bønrrønrrai inchar, Tiusweyasig maya nuguen tab indig kønrraimba, purø tabig wamindig kønrraimba.

Na øsig unamibe Cristo gøn

¹²Nai nunelø, nan chi pub arrubiibe, Tiuswei tabig srø wamweimburappe masken purugubguen inchib arrin gúi, ñim wammøra gønrrai inchar. ¹³Inchawei tru palacioyu suldaumera lata, katø maya misaamera lata, kailan keeri yau na pasrappe, Cristogurri keerim basrai asha gøn. ¹⁴Inchen nan treeg pasrønrrai keerikkurri, nai nuneløbe, kerrigu lutauba, chigucha kullaaramø pønrramisra, Tiuswei wamwan chigucha chi kørmø waminchibelø gøn.

¹⁵Pøs ka isatø gømø, møiløbe Cristoimburabigwan eshkab waminchippe, pusrkwai ashib tsalø gøppah, ka kwayam lag køppatø marøbelø gøn. Trune kaneløbe tabig isua, marammay maran.

¹⁶Incha iiløbe Cristoimburab eshkab waminchippe, undaguelø isuar gua waminchibelø gøn, Tiuswei tabig srø wamwan waminchib purømisrøb pasrønrrai, nan pasrig kui asha. ¹⁷Trune tru kaneløbe Cristoimburab eshkab waminchippe, ka kwayam lag køptø maran, tabigwan isua gømøtø, ka indzaashig køptørre marøbelø gøn, kailan keeri yau na pasramnebe gatøguchinguen isuim basrønrrai martrab isua. ¹⁸¡Inchendø chigúin gønrrautah! Ka isatø inchib Cristoimburabigwan ka wamincha møri lata, kabe cierton wamindi lata, pøs mumaytøgucha Cristoiwan waminchib, kusrenanene, nane kasrag kòtan. Incha nabe gatøgucha kasraarabig kasraaramønrrun, ¹⁹ñim Tiuswan nayasig miab melaikkurrimba, Jesucristo Espíritu nan purugúikkurrimba, øyeeg pub arrubiibe na øyeeg keerig pasraigugurri wesraig kømig punrrab gúi, nabe asha basrar.

²⁰Chiyugucha na chi kørig misrmø purayamuitamab isua basraig, treeg punrrab gúi, masken chi kullag isumøtø, møi lata, chu urastøgucha, Cristobe nai asru purø nuig marøb tabig wamindig kønrrun, na øsig basrai lata, kabe na kwaimbala lata. ²¹Kaguende

naimbe øsig unamibe Cristo gøben, kwamibe maya nuguen tabig tøgagig køn. ²²Inchen na asru øsig uniibe, Tiuswei marameløyube tsabøtø truba nørø kønrai maramdiig kønrrautan. Trube, ðnabe møyigwan merrarrowa pasramisrtrab gøh? Pøs mandøguen gømøtan. ²³Inchawei nabe mumay yam gúinguen mormøwa basrar. Nane yugurri webya, Cristoba wanrrab yainrrabna gøtan. Kaguen trumaybe naimbe masken tab gønrrautan. ²⁴Inchendø na øsig basramibe gatøguchinguen tab gønrrab gøn ñimuimburappe. ²⁵Inchawei øyeeg kønrrab gúi ashabe, chiguen gømøtø, ñimba unamuitamab isur, ñim mayeeløba kørrømisrtrab, katøguchinguen gatøguchinguen nebua asamigwan ñim nebua ashib, isubigwan Jesucristoinug pasra tøgagúigwan kasrag tøga bønrramig kønrai. ²⁶Ñim naimburab Cristo Jesúsweinug maya nuguen tab gúi pønrramig punrai, na ñimui utu katøle arrua pasraikkurri.

**Jesucristoi srø wam tabig maig chibig
køben treeg marøb amønamiig køn**

²⁷Jesucristoi srø wam tabig maig køben, trumay treeg amønamiirre mas palan, na ñimun ashchab arri lata, ashchab arrumui lata, ñimbe masken kanbalatø ke tab pønrramisra, tru isubigwan Cristoinuutø tøga pasra bønrramig Tiuswei srø wam tabigweimburappe, ñimbe kanbalatø mayeeløba ke kandø isub truba rruba marøb gøn dai wammørinrrabna gøtan. ²⁸Katø ñimun ashig kømui inchibelø ‘chigøben martrumøn’ cha, kwaarøsa tøgagúilø gømøweingue. Tru ñim truilø kwaarøsraimíig pønrraibe nømuyasiibe managatig pinønrrab ambamnuumay amrrab pønrrain gúi asamig kenamisren, trune ñimbe truyugurri wesrailø pønrrain gúi asamig kenamisran. Inchen iibe Tiusweinukkurri arrubig køn. ²⁹Pøs ñimune Cristogurri øyeekkatig tabig pønrrønrai marøppe, nun ka kørewatø bønrrønrai marmøtø, nuimbura chinetø nebuig melamig kønrraingucha marig kuig køn. ³⁰Nan maig kaig nebub arri asigutøwei ñimgucha melan. Katø møy ya nan øyeeg kaig puig pasraigwangucha ñimbe wammøra gøn.

Jesucristo maig kuigwan nam asha kusremig

2 ¹Inchawei ñim Cristoinug kanbalatø pønrraikkurri kuñab purugumig tøgagøb, nui undag købig chi isumig kaanrai marøbíg tøgagøb, Espíritu Santogurri kanguelarrøtø lincha

bønrramig tøgagøb, ñim larrø tab inchibelø, trurrigu lastima ashibelø gømigwan ñim tøgagøb indig købene, ²trube, nai kasrag købig palabigwan ñim nemartrunrigay, mayeeløba kandø isub, undag købigwan mayeeløba trunundøwei tøgagøb, kandø lataig pønrrab, kandø lataig isub tøgagøb indiitøga. ³Chiyutøgucha ke nøtø gønrrab inchimøwei, purø nuig kømmørø inchib marøb gønrrab gømøwein gømig køn. Masken treeg kømøtø, larrø tammayig, katøganelane ñim lataitøguen gømø, katøguchinguen nørreelø gønmab asha tøgagømig køn. ⁴Møitøgucha ke nømuimburaigwandø tab gønrrai marøb guebammøtø, katøganelayasikkucha tab gønrrai maramig køn.

Cristobe managuen nuig misrmøtø, masken lamíig misrig

⁵Cristo Jesús maig isubig købig køben, ñimgucha treetøwei isubelø gømig køn:

⁶Nøbe trendø Tius købendø, nø treeg kuagucha,
Tiusba lataig kønrrab inchimuig køn, treeg kurmaptø
elachimønrrab.

⁷Masken treeg inchimøtø,
nø treeg kuigwane mendamara basrøb,
kan karuindiig megabig lataig kønrrab treeg misra,
møguelø mailø gøben treetøwein gørrømisra,

⁸yandø møg lataitøwei misra pasrøwabe,
nuig kurmab inchimøtø,
nøasiitø chigucha gømíig lataig misra,
maig taigwan mørøbig køptø,

kwamnegatig maig taigwan marig køn,
trurrigu kurusu mesraig kwamig.

⁹Inchawei treekkurri Tiusbe nune purø nuig kønrrai mara,
maya munchimeraim bala, nui munchiwane mu gúi nebua
asig kønrrai tranig køn,

¹⁰Jesúswei munchiwan wamindi møra, mutøgucha
tømbønsramig kønrrai,
srømbalasrøm bønrrabelø lata, yu piraelø lata, pirø
umbuelø lata.

¹¹Mu misaameratøgucha Jesucristobe Señor tru Mayeelaim Bala
Nø Ashib Pasrabig køn chib waminchain gúig køn,
Tius Møskawan maya nuguen tab indig kønrrai.

Tiuswei ureemerabe yu pirau kan tør latailø gømig køn

¹²Inchawei ñim nai undaarailø, na ñimba pasrøben, chu uratøgucha mørøb melabelø, na mõi ñimba pasrømubene, katøguchinguen mørøb melabeløbe, kaigyugurri wesruigwan ñim tøga pønrraigu nørørabig nørøranrrab marøb ambay, køriibala, purø isuptø. ¹³Kaguende Tius, nø gøn, tru maramigwan martrab isunrraimba, katø marøbelø gønrrai ñimuinug tranøb inchibiibe, tru nø maig martrab isuigwan treeg marig kønrrai.

¹⁴Chiwandøgucha marøppe, ñimuinetø chinetø chib mulla mørmøwei, chinetø aleguiab pønrrømøtø maray. ¹⁵Mugøben ñimun 'ñibe øyeeg køn' dainab pønrrømeelø, kørrøteelø, misaamera larrø minchar, purø kaig misaamerai utu, ñimbe Tiuswei ureemera chigucha kaig mara chillig inchar gømeelø, ñimbe truilai utube yu pirau pala pilab pønrrabelø latailø guy, ¹⁶Tiuswei wam øsig kømig tranøbigwane elatchab gømo, tab tøga bønrrabelø. Treekkurrimbe Cristo gatø arrub gwaløm truba rruba tab gúi pasramig kønrrautan nane, na larrø muraaraig pasrønrrab luløb lataitøwei, na truba muraaraig marøb megaibe ka yandiig kørrømisrmøwei inchen. ¹⁷Ñimui isubigwan ñim Jesucristoinuutø pasra tøgagúikkurri marøb gúiibe kan animal gweecha Tiuswan keta tranøb lataig marøb tøgagúig køben, trubala na øsig kuigwan itølusig kønrrai tranamig nebinguen mayanguen tab gúimørøb tranamønrrun, ñim mayeeløba mayanguen kasraarab. ¹⁸Inchawei ñimgucha treetøwei mayanguen tab gúi mørøb, naba mayanguen kasraaray.

Timoteoba, Epafroditoba

¹⁹Señor Jesús treeg kønrrain gøbene, Timoteowan petø ørtrab isur, ñimuisrøngurri wam srua arruben nagucha ñim maig waraigwan wammørabe, katøle tab gúimørøb wamig kønrrai. ²⁰Pøs katøgan munguen nø lataibe tøgagømur, ñimuimburab tab gønrrai inchib, treegwan martrab truba rruba isubig, trurrigu ka isatø inchib pasrømíig. ²¹Kaguende mayeeløba nømuimburab tabig pub attraingøba labelø gøn, Cristoimburab tab gønrrain gømo. ²²Pøs ñimbe Timoteowane yandø mu gúi ashibelø gøn, kan nusrkai mōskawan lataitøwei Tiuswei tabig srø wamwan wamindamigu naba marøb pasrabig køn. ²³Inchawei yu naimburab chi pub

arrubig maig korrømisri ashabe, nun ørtrab isur. ²⁴Inchendø nagucha naashib ñimun ashchab peba arrumigwan isua tōga basrar, Tius naba pasraikkurrimbe. ²⁵Treeg kuindøgucha namui nuneg Epafroditon ñimuimay gatøle øramig truba palai ashar, maramigu nan purugub, kan suldau lataitøwei tru maramigu naba lincha megabig, katø ñimuisrøngurri naimay wam srua arrubig, na chi palai megaben nan ashchai ñim ørigwandøwei.

²⁶Nøbe ñimune asinrrabna gúi truba isui inchib unig kuig køn, kaguende nø kwanrrø tsuin gúi ñimbe wammøra gúimba trurrewei isub. ²⁷Isa gømøtø, yandø ke kwamdø balabig tsubwei indig kuig køn. Inchendø Tiusbe Epafroditon lastima asig køn. Katø nundø gømøtø, nangucha lastima asig køn, na yeeg isuig megamne, srøitø srøitø isuig megamig arrumønrrai. ²⁸Inchawei nabe nune mas peba ørtrab isur, ñim gatøle Epafroditon ashabe truba kasraaraben, na chi isumø tab wamig kønrrai. ²⁹Señorgurri nune truba kasraatø utay. Katø Epafrodito lataitøwei melab mōguelane truba tab inchib tōgagømig køn. ³⁰Kaguende Cristoi maramelan marøb megaikkurri nøbe yandø ke patsønrraptiig tsuig kuig køn, ñim ñimashib trugatig nan purugunrrab gaimailøyu kwam lab nōguen burugub.

Ka namuimbura isuitøgatø Tiuswan nebunrrab inchimumig

3 ¹Møimbe trube, nai nunelø, Señorweinug truba kasraaray. Nane chigucha chi pesriig kømøtan, na ñimun pørigwan gatøle trunundøwei pøramibe, øyamaybe ñimuinguen chi isub korrømisramig kaanrrai tabguen gøn.

²Tru wera lataig inchib misaamera, chi tabigwan gømø, kaigwan marøb amønibelø, tru asrwan parøb mindishibelan ñimbe purø ashiptø guy. ³Kaguende tru treeg circuncidailøbe nam guer, Tiuswei Espiritutøga køriibala tabig waminchibelø, Cristo Jesúsweinug purø tab gúi mørøb kasraarabelø, asru chi mariitøga 'øyangurrimbesin' chib pønrrømeelø. ⁴Kaguende naimburabgucha asru treeg mariitøga 'øyangurrimbesin' chib pasramig tōgagur. Pøs asru treeg mariitøga 'øyangurrimbesin' chib mōg inchib pasrønrraptiig mube købwei inditarru gøben, nabesi katøguchinguen 'treeg kur' tamig tōgagur. ⁵Naneguende kal-laig trune gwalømyube circuncidaig købig køn. Nabe katø israelitasmerai misagugurri arrubig, tru Benjaminwei misag karrabigugurri arrubig køb, hebreo, trendø hebreomerai anin

nusrkain gøb, katø tru maig maramigwan martrai Moisés pørig maig chibig køben trunun purab punømø marøb pasrabig, katøgucha fariseo gøbig kur. ⁶Inchen na maig chull isuigwan ke chinchimmørø inchib maramibe, tru iglesiayuelan kaig maramig naimbe truig købig køn. Inchen tru maig maramigwan martrai Moisés pørig maig chibig køben truigwan na sølgandø tabig kuigube ‘kalø maran’ chib muguen chi tainamø møg købig kur.

⁷Merrappe øyeeløbe naimbe truba rruba nørriig tabig købig kuig, Criston nebua asikkurrimbe mømibe truiløbe chigucha gømfig købig kuin gúi mara tøgagur. ⁸Inchagucha treetøguen gømø, Cristo Jesús nai Señorwan na nebua asiibe, kan chibaguen øyeeg køn cha, kemesra eshkamgaig purø nuig purab tabig køben, tru na tøgagúigwane chigucha gømeeelø mara tøgagur. Inchawei nögurri nabe kerrigu trunune chi asamig kaanrrai, wendøbasra øyeegwane chigucha gømíig kan køsøngømdø shau lataig mara tøgagur, Criston na nebua tōga basramisra, ⁹nuinug na pasramig kønrrai. Tru na naashib tabig sølgandø marøb taig tru maig maramigwan martrai pørigugurri arrubiitōga inchimøtø, tru isubigwan Jesucristoinuutø pasra tøgagúikkurri arrubigwan tøgagønrrab inchar, tru tabig sølgandø marig Tiusweinukkurrigwan. ¹⁰Nane Criston mas nebua ashib, nø kwawa, katøle øsiiranrrai maramburab marøbigwan nebua ashib indinrrabna gøtan, katø nø chine isumdiig puinab megamigu treetøwei puinab megawa, kwamigugucha nø lataitøwein gømig nebuben, ¹¹nagucha mumay gøben kwallai utugurri øsiirawa kurramigwan nebua tøgagømig kønrrai.

Nabe tru pumsrø pumigwandø asha yar

¹²Nabe øyeeg chippe, ‘kerrigu newan yandø nebua tōga basrar’ cha, kabe ‘yandø chigucha palømíig newan tabig kur’ cha rrenchimur. Inchendø nabe ibig ibig yamønrrun tru nebumigwan nebuinatashchab, kaguende Cristo Jesús nømerrig nan nebua tōga basramisrig købig køn. ¹³Nai nunelø, kabe nabe ‘iigwan yandø nebuaguen basrar’ chimur. Inchendø nabe iigwan marinabig køn: yandø wendau kørromisrøb arrubigwane pesannawa, nai pumsrø pumigwan nebunrrab tranrrab megar. ¹⁴Incha nabe chu pumsrø pumigwan punrrab isua luløb megar, tru lulimburo na kanaigwan utamig kønrrai, tru treegwan

utamig kōnrraiwei Tius nan Cristo Jesús kurri srōmbalasrōmay wamisrōmay.

¹⁵Nam mayeelōba Tiusweimburabelōyu newan nōrrōrawarbe ōyamay isumig kōn. Inchen ñim chigōben peemay isua gúin gōbene, trube, Tiusbe ñimune trunungucha tōrmarōb kenamartrun. ¹⁶Inchen nam yandō nebua tōga bōnrramisrigwane truig maig kōben trunun tarōmismō, amōñibig amōñigun.

¹⁷Nai nunelō, na maig uñibig kōben, treetōwei amōñib, katō nam maig amōñibelō gōben treetōwei amōñibelane asha guy. ¹⁸Nabe mōindō gōmōtō, ñimune katōle, gatōle eshkaig kuig kōn, mōimbe kappin gōrrōgōbguen eshkar, Cristo kurusyu kwaigwan tsaleelō ashig kōmui inchibelō truba nu amōnaimba. ¹⁹Nōmuimbe pōnrrōnrrab ambamibe, pinab pinōnrrab ambamsrōmay ambamig basran. Nōmuimbe mab muchib waramibe kan tius lataig kōben, kōrikken gōnrraptiig mariitōga nōmbe purō nōrreelō misrōb pōnrrabelō, nōmbe ka yu pirauigwandō isua bōnrrabelō gōn. ²⁰Trune tru nam purramibe srōmbalasrōn gōn, tru Kaigyugurri Wesrabig, Señor Jesucristo, trusrōngurri tru nō arrumigwan nam truba rruba munig melaig nō waisrō. ²¹Nōbe namui asr trengatig kōmfigwan peemayelō gōnrrai yunōmara, nui asr tōrguegwalmabig lataitōwein gōnrrai martrun, tru chiwandōgucha nō ashib karub wamig kōnrrai tru nui maramburab marōbig truitōga.

4 ¹Inchawei, nai nunelō, truba undaarailō, na truba asinrrabna gúi inchib isub uniilō, ñimgurri na truba kasrag kui indiilō, katō ñimbe naimbe kan corona lataig tōgagúilō, ōyeetō Señorweinug tarōmismō melabig melōnrrigay.

‘Ōyeeg melōnrrigay’ chib wamindiilō

²Evodianba, Síntiquenba Cristogurri numōsralan peg peg isub pōnrrōmōtō, Señorgurri kandō isua pōnrrōrunrrigay chinrrab inchar. ³Katō nai maramigu elachimō maram burugub megabigwan ñungucha purugurrūnrrig chinrrab inchar, tru iig ishumburmeran ñui nuchalan, na Tiuswei tabig srō wamwan waminchib uñen, nōmbe nai mendig lata tranrrab lincha llirab melaig kōbig kōn, katō Clemente gōben, katōganelō naba lincha marōb melabelō gōbengue. Truilai munchimerabe tru managatig ōsig purrōnrrabelai munchimeran pōri libroyu pōrig pōnrran.

⁴iChu uraskucha Señorba pōnrraikkurri kasraaray! Katōyug trendamōnrrun: iKasraaray! cha. ⁵Ñimbe truba tab inchibelō

gúigwane mayeelø nebua asig kønrrai inday. Señor arrumibe lutau gøn.

⁶Ke ka yandø chinsraatø inchib, ke chab pureb gúi lataig inchimøtay. Masken treeg inchimøtø, chiyutøgucha Tiuswei merrab, ‘øyeeg palai meler’ chib, nøba waminchib, ‘øyeeg purugurrurrig’ chib miamig køn, trurrigu ‘ungwa, ungwa’ chib. ⁷Inchen Tius tru chi isumgaig tab gøbig chi isuilan purab nuibe tru ñimui manrrømeranba, ñimui turyu isubigwanba Cristo Jesúsweinug pønrrønrrai tøga pasrønrrun.

⁸Trube, mømibe yandø, ñim nai undaarailø, chiyutøgucha ciertonigwanba, chiyutøgucha maig købash inchimumigwanba, chiyutøgucha sølgandø tabigwanba, chiyutøgucha newan tabig chishigwanba, chiyutøgucha larrø tammayig kømigwanba, chiyutøgucha yeeg tabig kønrrab chib wamindigwanba isumig køn. Katø chigøben purø tabig tøgagúin gúi, kabe tabig wamindig kønrraptiig treeg købene, trunungucha, trube, tøga isuy.

⁹Na chigurrimbunø kusrenaniilanba, na chi marigwan ñim uta, na maig kuigwan, na maig mariilan ñim ashib, ñim mørøb indiilanba, iilane marøb ambamig køn. Inchen Tius tru chi isumgaig tab gøbiibe ñimba pasrønrrun.

Filipossrø Cristogurri nunelø Pabloyasig an burugúig

¹⁰Nabe Señorweinug truba kasraarar, ñim gatøle nan isunrrab indin gøben. Pøs ñimbe isuppe, isubwei inchendø, tru øyeeg maramibe pumø srø gúig kuinrrun. ¹¹Nabe øyeeg chippe, palain basraptø rrenchimur. Kaguende nabe nan maig pub arrindøgucha treegu kasraatø purayam gusrewa gur. ¹²Chi palaim basramig maig kui mørøb, chigucha palømø uncha tøga basramig maig kuig mørøb inchibig kur. Maig pub arrindøgucha kerrigu treegu purayamigwan kusrewaig kur: patsau chi palønrraingai tøga wamig nebui lata, parø burayamig nebui lata, uncha tøga wamig nebui lata, chugurringuen gømui wamig nebui lata. ¹³Cristo naba basrøbene, chiwandøgucha kaimamø maramønrrun, kaguende nø nan purugub pasraikkurri. ¹⁴Inchendøgucha na truba isui megaben, ñimgucha treetøwei lata naimburab isub purugub melaibe mayanguen tabig køn.

¹⁵Katø ñim filipossreelø isua gúinrrun, Tiuswei tabig srø wam ke srø guebyaindø gøben, tru Macedoniasrøngurri na yandø inrrab

inchen, mu katøgan iglesiabe purugumuben, ñimbeguende nan an burugub, nagurri purugúigwan utab indamig kønrrai marig købig køn. ¹⁶Incha trutø gømtø, na Tesalónicasrø uñenguen, ñimbe pamayguen purugua ørig købig køn, nai chi palabeløyu nan purugunrrab. ¹⁷Kabe ñim nan ke ka tranrraindø isua rrenchimøtø, tru ñim mariiløbe katøguchinguen ñimuindøwei nurab inrraimab isua rrenchar. ¹⁸Inchendø nabe chi palabigwan kerriguh uta tøgagur, unchaguengue. Tru ñim nan keta trana øriilø Epafrodito srua arrua traniiløbabe, igatø! chigucha palømözhig tøgagur. Tru ñim keta traniibe kan animal gweecha Tiuswan tranig, purø may irrabzhig lataig køn, Tius truba rruba tabig kui asha utamdiig. ¹⁹Inchawei nai Tiusbe ñimune chi palabigwan lutøgurrih tranrrun, nui tru chigurrimbunø chigucha palømöig törguegwalmabigu maya købigwan Cristo Jesúskurri. ²⁰Namui Tius Møskawan managatig törguegwalmabig kønrrun. Treeg kønrrun.

Wamindiilø srabeig

²¹Cristo Jesúskurri Tiuswei misaamera mayeelanba ‘ka amøñiguh’ chirrunrig. Katø namui nunelø naba amøñibelø chigucha ‘ka amøñiguh’ cha øran. ²²Katø Tiuswei misaamera katøganeløgucha ñimun ‘ka amøñiguh’ cha øran, trugurri katø mas ‘ka amøñiguh’ cha ørøppe, tru Roma maya misagwan ashib karub wabig Césarwei yau purrabelø, truilø øran.

²³Namui Señor Jesucristoi ka yandø tab indiibe ñim mayeeløba pasrønrrun. Treeg kønrrun.

Colosenses

Pablo ‘ka amõñiguh’ chib pørig

1 ¹Tius trendø treeg kønrrain gøben na Pablo Jesucristo nõashib karua ørig nai nuneg Timoteoba misra, i kilgawan pørar, ²ñim Tiuswei misaamera chu uragucha tarømisrmø melab nunelø Cristo Jesúsba kanbalatø pønrrabelø Colosassrø warabelan. Namui Møskai Tiuswei ka yandø tab indiiba, chi isumgaig tab gøbiiba ñimba gønrrai inchar.

Pablo Tiuswan ‘ungwa, ungwa’ chib

³Chu uraskucha nambe ñimuyasig Tiusba waminchippe, nun ‘ungwa, ungwa’ chibelø guer Señor Jesucristoi Møskawan. ⁴Kaguende ñim ñimui isubigwan Cristo Jesúsweinug pasra tøgagúigwanba, katø Tiuswei misaameran mayamba ñimbe truba undaguelø gúigwanba wammører, ⁵tru ñimuyasig srømbalasrø esegaig pasrabigwan ñim muniirabelø gúikkurri treeg kuigwan. Truigwane Tiuswei tabig srø wam newan ciertonigwan waminchen, ñimbe mørig købig køn, ⁶tru ñimuisrø kebiben. Inchawei yu pirau chutøgucha tru tabig srø wambe truba rruba nurab, kan yell larrøbichib ib lataitøwei, ñimui utugucha treetøwei larrøbichib arrun, tru ñim Tiuswei wamwan mørøb, katø Tiuswei tru ka yandø tab indigwan maig kuigwan ñim tab chigúi mørøb indin gwalømgurrimbunø. ⁷Epafras maig kusrenanig køben, trunun ñim kusreeg køn. Truibe namui undaaraig, tru marameløyu namba lincha marøb megabig, Cristoiwan maizhikken elachimø, ñimuyasig tab gønrrai marøb megabig køn. ⁸Katø, Espíritu Santogurri ñim undag købig tøgagúigwan nøgucha namun eshkatan.

⁹Incha treekkurri namgucha trunun wammørin gwalømgurrimbunø chu urastøgucha ñimuyasig elachimø, Tiusba waminchib miabelø guer, Tius tru nø maig martrai palai waigwan ñim nebua asambørab nebua ashibelø gønrrai Tiusweimburabigu, newan nebua asamig kusreitøgaba, katø tab chigúi møriitøgaba. ¹⁰Amønippe, Señorweyelø gúi asamdeelø amøninnrai miabelø guer, chiyutøgucha nø tab gúi mørøb wamig kønrrai marøbelø, ñimui chigøben tabig mariiløbe, yell larrøbichib ib, katø Tiusweimburabigwan nebua asamigu nørrørab ambamig kønrrai. ¹¹Nui mayanguen tabig maramburab marig kerrigu maya tøgagúig, truitøga kullaaramø, ka melamig kønrrai martrai miabelø guer, maig pub arrindøgucha mur isua melaptø melamigweyasiiba, maig indindøgucha tammay melabig melamigweyasiiba. ¹²Tius Møskawan ‘maya nuguen kasraatø ungwa’ tay, tru nø ashib karub waisrø torguegwalmabnug nui misaamera ketig utamigwan ñim tøgatø utønrrabelø gønrrai tamara pønsraigwan. ¹³Kaguende nugwaimandzig løstiigu nø garub pasrabigugurri Tiusbe wesrawa, namune nui undaaraig Nusrkai nø ashib karub waisrø purøorig køn. ¹⁴Nø nuielø gønrrai nambe kaigyugurri wesrailø guer, namui kaig mariilan yandø pesannab chi ulø bayimeelø.

Cristo tru chiwandøgucha purab nuig

¹⁵Tius, tru namui kaptøgabe asiimíigwan øyeeg kuitamab asamig, Cristobe truig køn, chigurrimbunø pønrrabigwan marmøwatørøwei tru srøsrø nømerrig pasrabig. ¹⁶Kaguende Tiusbe Nusrkaingurri mara pønsraig køn tru srømbalasrø chi købigwan lata, pirau chi købigwan lata, kaptøga asigwan lata, asiimíigwan lata, reymera purramisra karub purraigwan lata, kerriguwan nøm merrarrawa garuigwan lata, katø nøm asha garuigwan lata, katø mugucha manchinrraingaig karuigwan lata, kerriguba nøgurri mara pønsraig køn, trurrigu nuyasig kønrrai. ¹⁷Nøbe chiwangucha marig kaabenbatørøwei manawei købig kua, chigurrimbunø pønrrabiibe pinømø, nøgurri pønrrabig pønrran. ¹⁸Inchagucha nøbe asrwei tru tur gøn, tru iglesiai. Nusrkaimbe manawei nømerrig købig, kwaitai utugurri katø nømerrig øsiiraig køn, chiyutøgucha nø purab nuig kømig kønrrai. ¹⁹Kaguende Møskawane mayanguen tabig asønaig køn, nø maya nu kømburab kuigwan Nusrkaweinug pasrønrrai pasramig. ²⁰Incha nui Nusrkaingurri Tiusbe pirau chigurrimbunø

købigwan lata, srømbalasrø chi købigwan lata katøle nøba katø tab gørrømisrtrai martrab isuig køn, nui Nusrkai kurusu kwawa ani lusiitøga ambugurri igurri tab gønrrai marøb.

²¹Pøs ñimbe merrabsrømbe Tiusweinukkurrimbe nøørø bønrrabelø tarømisrar, ñimui isubigwane ke kaig marameløygøba pasra tøgar gua, Tiuswane ashig kømui inchibelø gøbig køn. ²²Treeg købig kuigwan møimbe gatøle ñim nøba tab gørrømisrtrai kørømarig køn, Nusrkai nui asru kwaitøga nui merrab tabigweindø tarømariilø, kaig mariitøga chillig incha gømeelø, ñimbe øyeeg køn dainanrrabgailø pønrramig kønrrai martrab. ²³Pøs øyeeg kønrraimbe, tru isubigwan ñim Cristoinuutø pasra tøgagúigu truyutø pønrrabig pønrrab, katø mumaygucha kørørrabgailø tru Tiuswei tabig srø wamwan ñim mørigu tru munig melaig pasrabigugurri tarømisrmø, melabig meløwabe gønrrun. Tru srø wamwane yu pirau maya misaameran mundøgucha eshka kusrenanig køn. Inchen na Pablobe tru wamwan waminchib meganrrai pasrig kur.

Pablo Tiuswei tabig srø wamwan waminchai wesrawa pasrig

²⁴Na ñimuimburab chine kaig nebuinab megaigwan møimbe nane kasrag kōtan, Cristo nui asr, tru iglesiayasig chine kaig nebuinab megaigu tru palabigwan nai asrutøwei kaig indinab megaitøga nemarøb ya. ²⁵Nabe tru mayeelø nun kørebelayasig tru chiwandøgucha marøb meganrrai wesrawa pasrig kur, ñimuimburab tab gønrrai Tius nø garuig, nui wamwan maig kuigwan newan waminchib pasrønrrai, ²⁶tru manasrøngurri maya misagwan mungucha Tius kenamariimíig tøgagúigwan. Inchendø truigwane mõi yasrømbe nui misaameran kenamaran. ²⁷Tru judíos kømø misaamerai utu tru mungucha kenamariimíig tøgagúigu tru törguegwalmabigwei chigurrimbunø palømíig pønrrabigwan Tiusbe nømune asingarunrrab isuig kuig køn. Truibe Cristo yandø ñimuinug pasraig, truig køn, ñim munig melaig törguegwalmabig.

²⁸Nambe tru Criston eshka kusrenanøbelø guer, mundøgucha øyamay melønrrigay chib, kusrenanøb, maig kuigwan tab chigúi mørage, mu misaamerandøgucha Cristo Jesúsweinug newan tabig pønrrønrrai Tiuswan kenamartrab. ²⁹Treeg kønrraiwei na maya nebumburab truba rruba mur tranrrab marøb megar, Cristoi maramburab marig tru nainug marøb pasrabiitøga.

2 ¹Pøs nabe ñimuimburappa, laodiceasreelaimburappa, katø mayeelø nan malaugue nebua ashmeelaimburappa, truba rruba mur tranrrab marøb megaigwan ñim nebua asimbemab isutan. ²Undag købigu kanbalatø pønrramisra, nømui manrrømerayu tab gúi mørøb kørørmistrai inchib megabig kur, tru chigurrimbunø palømfīg pasrabig tabigwan chigúi nebua mørøb ambamnegatig, tru mungucha kenamariimfīg Tiuswei pasrabigwan ashmø gømmø nebua ashchai, truike tru Criston. ³Kaguende chigúi mørøb kusrebig kømiba, chigúi nebua asamiba, tru iig purø tabiibe kerriguba Cristoinuutø sorig bønrran. ⁴Nabe øyeegwan øyeeg chippe, ñimun may wamincha mugucha kegørrørskømønrrai waminchar. ⁵Nabe ñimui utu pasrømuingucha, nai isuigube ñimba basrar, ñim maig købendiig kømø, maig amønamiigwan amønib, ñimui isubigwan Cristoinug pasra tøgagúigwane elachimø, tøg bønrrøben, nabe truigwan ashib, truba rruba kasraarab.

Cristoba pønrraikkurri yandø chigucha ilørkaig kømumig

⁶Ñim Cristo Jesúswan ñimun nø asha garub pasrabig kui asha utamma, utig kuibe, nuinug treeg amønay, ⁷umbusrø srøl gueyatab lataitøwei, nuinug pølbasa kusrub marøb, ñimun maig kusrenanig køben, ñimui isubigwan Cristoinug pasra tøgagúigwane trumaytø tøgagøbig tøgagøb ambamigwan tøg, tru ungwa tamigwane katøguchingen nuramburab nurab inrrai marøb. ⁸Isua tab ashiptø melay, møguelø nørø gusreelø chi purugunrrabgailø ka kegørrørskamitø marøbiitøga, ñimun srua ambinab melønrrab gømmø, tru kusreeløbe chi purugunrrabgailø, ka kegørrørskamitø marøbigwan. Truiløbe misaamera nøm merrabsrøngurri trendø isub amrruiloýugurrimba, katø chinetø yu pirau muba kuimburab mandø isua marøb gømig tøgagúiloýugurrimba arrubig køn, Cristoinug maig køben, treeg kømøtø.

⁹Kaguen Tius maya nu nø kømburab kuibe, Cristoi asru pasran. ¹⁰Inchawei ñimbe chigucha palømfīg kerriguwan neilø bønrran, Cristoinube. Tru nøm asha garuigu lata, katø mugucha manchinrraingaig karuigu lata Cristobe nø pasrabig, chiyutøgucha nø asha garubig nø tur gøn. ¹¹Katø trendø trømbøig marøg kui inchib pasrabigwan ñimui asrugurri kerrab ñimbe nuinug mu gúi asiilø gønrrai mariilø gøn, tru møguelø tasiitøga asru circuncision marig tøgagømøtø, tru mu gúi ashchai kørørmariibe Cristoinukkurri

arrubiitøga. ¹²Ñimun piu umbu ulsrøben, Cristoba kegøtø soriilø lataig kuig køn. Incha tru piu umbu ulsraigugurri kurrappe, ñimbe nøba kegøtø øsiirawa kurrig køn, Criston kwaitai utugurri kusrubig Tiuswei maramburab marøbigu ñimui isubigwan truyu pasrikkurri.

¹³Tru ñimui chigurrimbunø kaig mariiløyuba, ñimuinug trendø trømbøig marøg kui inchib pasrabigwan kerrab tru asru circuncisionwan marøb latakøwei chi mariimeelø ñim kwailø srø gøbenbatøwei, Tiusbe Cristoba kanbalatø øsig kømigwan ñimune tranig køn; namui kaig mariilan ulø baymø, kerriguwan pesannab. ¹⁴Tru nam 'øyeeg, øyeeg ulø gøn' cha kan kilgayu pøri latakøwei købigwanba, katø truyutøwei 'øyeeg maramig køn' chib pøri latakøwei pønrrabigwanba, Criston tru kurussyu mesrøben tøgatø mesrøb latakøwara, Tiusbe chi asamig kaanrai kerraig køn. ¹⁵Incha katø tru kailø nøm asha garuigwanba, katø mugucha manchinrraingaig karuigwanba yandø truilane chigucha martrabgailø misrtrai kørømara, nømune mayeelø ashig kui ashchai marig køn, tru kurussyu kwawa, yandø nø kanawa basramisra.

¹⁶Inchawei chigøben mamimeran mutsamelan, chigøben fiesta marin gwalømmeran, srø bøl tsumisrin gwalømmeran, isrin gwalømmeran, øyeebe maig marøbelø gøgue chib ñimun mugucha wamincha ashmønrrai maray. ¹⁷Inchen øyeeg mariiløbe kerriguba tru wendøsrø attrabigwan øyeeg kønrrabig kuitamab asamig, iibe ka treetø gøn. Inchen tru cierton maig kønrrabiibe, Cristo, nø gøn. ¹⁸Ñim ketig utamigwan mugøben utøbashmuinab pønrrønrrab gømø. Nømbe ka isatø, purø tabzhig misrøb, ángelesmeran køriibala tabig waminchib tømønnsrøb, truiløbe 'piab latakø kenamisrigu chigøben aser' chib wamindamburab waminchib, nømui trendø kaig isub turyu ke purab nørreelø isumuinguenig isubelø gøn, ¹⁹tru asru Cristo turwane trag bulu trakkandø bønrrømøtø, ka nørøtø misra ambub. Kaguene tru turwein gøn, tru asr ørøba truba tabig chishmisrøb, katø asru truørø kønab pønrrabelanba, truyu ambumay imay kandø gønrrai merrarrab srølmeranba asrwan kandø misrøb inrrai marøbiibe. Treebe Tius maig nurab inrrai inchen, trumay nurab yan.

Cristoba pønrraikkurri srøig peemay amønamiig tøgagøb

²⁰Tru chinetø marøb gømig yu pirau muba kuimbura mandø isua marøb gømig tøgagüilan marøb gømønrrab, ñim Cristoba

yandø kwawarbe, katøgucha yu piraueło gua lata tru maig martrai wesrawa pønsrailan, ÷chindimba tru gúindø marøb pønrrabelø gøgue ²¹tru øyeeg tailan: “Øigwane kusrawa ashmøta” tamba: “Iigwane mamøta” tamba: “Katøramøta” tamba indiilan? ²²Truiløbe ka katørab, srua gúinuutø pinønrrai mariiło gøn, pøs øyeeg marameløbe møguelø nøm karua pønsrailøyugurrimbah, katø nøm isua kusrenanigugurrimbatø arrubig kua. ²³Inchawei øyeelan marøb gúibe, ciertonwei purø may isua mari lataiło asonan, tru nøm Tiuswan yangucha isub chib pønrraiba, chigucha gømeelø misrøb pønrraiba, nømui asrwandøweinguen murigu puraambingarub pønrraibabe. Inchendø tru nøm øyeeg marøb pønrrailøbe nømui asru tru kaig marøg købig arrubigwan kerramibe chiweingucha chi purugumíig køn.

3 ¹Inchawei yandø ñimbe Cristoba øsiirawar gúig køppe, ñimbe srømbalasriigwan lamig køn, Cristo tru Tiuswei kusmay waisreelan. ²Ñimbe isuppe, srømbalasreelan isuy, yu pirauelan gømøtø. ³Kaguende ñimbe yandø kwaig lataiło gua, møimbe ñimui øsig kømibe Cristoba Tiusweinug søra tøgagúig pønrran. ⁴Inchen Cristo tru ñim øsig bønrraig kenamisrene, ñimgucha nøba törguegwalmabigu tøgatø kenamisrtrun.

Møin gwaløm amønaibe merrabsrø amønaig lataig kømøn

⁵Inchawei ñim trendø kaig marøb gúig yu pirauiğ ñimuinug pasrabigwane patsøga basray: ishuuba, møøba trømbøig kaig maramelanba, køsøngønrraptiig maramelanba, ke chinsraatø inchib trømbøig marøg købigwanba, chigøben kaig maramig isumelanba, parø indamigwanba (tru parø indiiibe tius mara tøgagúi lataig køn). ⁶Øyeelan marikkurriwei tru mørmeelaim bala arrubig køn Tiuswei namig købiibe. ⁷Ñimgucha merrabsrømbe øyeelandøwei marøb amønibelø gøbig køn. ⁸Ñimbe møimbe iilane kerriguh elatsay: trømbøig namig købig pasrabigwanba, ke chab srurab namig købigwanba, katøganun kaig maramigwangøba isumigwanba, trømbøig wamamelanba, chine møramguengaig trømbøig wamamelanba elatsamig køn. ⁹Ñimbe kanikkurri kanikkurri isa waminchimøtay. Tru køllig ñim trendø kaigwan tøga gal-laig ñimui umbu pasrabigwan treetø rreetø marøb tøgagúilanbañau ñimbe wesrua gutsig køn. ¹⁰Incha ñimbe tru srøigwan kewa bønrran. Tius nø marøbig maig køben treetøwein

gõnrrai marigwan, tru srøibe kerriguwan tab nebua asamnegatig srøitø srøitø yunømarøb arrun. ¹¹Trube, møimbe, griego gøn damig kawei, judío gøn damig kawei, asru circuncidaweig køn damig kawei, circuncidaimfíg køn damig kawei, peg birausriig køn damig kawei, escitamera gøn damig kawei, karuindiig megabig køn damig kawei, mu karuimfíg nuimburab uñibig køn damig kawein gøn. Treeg kømøtø, Cristobe chiyutøgucha kerriguwan nøtø gøb, katø mayeelainug nø basran.

¹²Inchawei Tius lawa wesruilø, ñim newan tabig chishelø, trurrigu undaarailøbe iigwan kewa lataig bønrray: lastima ashibig kømigwan gøben, larrø tab inchibelø gømigwan gøben, kørørteelø gømigwan gøben, larrø tammayig kømigwan gøben, maig køben kuingucha tammay megabig kømigwan gøben, ¹³kanikkurri kanikkurri chigúingucha lata inchimumigwan gøben, møikkøben ‘øig øyeeg inndan’ chib pønrramig tøgaguabe, kanikkurri kanikkurri chi ulø baymø, pesannab inchibelø gømigwan gøbengue. Señor ñimun ulø baymø, mandø pesannaig køben, ñimbe treetøwei maray. ¹⁴Inchen gøben iilø kerrigu gømnetø tru balabe, undag købigwan itøguewa bønrramig køn, tru undag købiibe mumaytøgucha kanbalatø newan purø tabig pønrramig kønrrai marøbig køn. ¹⁵Inchen Cristo tru chi isumgaig tab gøbiibe ñimui manrrau maig maramigwan nø garub pasrønrrai inday. Kaguende ñim kan asrtø gúig køben, øyeegumay wamig køn. Ñimbe ‘mayanguen ungwa, ungwa’ chibelø gønrrigay.

¹⁶Cristoi wambe ñimuinuube maya nu pasramburab pasrønrrai inday, purø tab isua asha, kanikkurri kanikkurri kusrenanøb ‘øyeeg, øyeeg marøb melay’ chib waminchib. Tiuswan ñimui manrraugurri ‘mayanguen ungwa, ungwa’ chib nuyasig salmoswan, himnoswan, nuimburab cantailan cantab inchigay. ¹⁷Inchawei chigøben marøppe, wamindigu lata, chigøben mariiløyu lata, Señor Jesúswei munchiyu maray, nøgurri Tius Møskawan ‘ungwa, ungwa’ chib.

Tiuswei ureemera nømui yau maig kømigwan waminchibig

¹⁸Sraløbe, kelø maig chiben treeg mørøb melamig køn, Señor nø maig martrai indig køben, trumay. ¹⁹Keløbe, ñimui sralane undaguelø gømig køn, namikkølig inchib tsag inchimøtø.

²⁰Ureemerabe, chiyutøgucha nømui møskalane maig chiben møramig køn. Kaguende øyeeg mariibe Señorwane truba tabig

asønan. ²¹Møskaløbe, ñimui uregwane purø rrømbøig inchib namig kui inchai marmøtay, chine isub kullaarai inchimønrrai.

²²Ñim karuindiig melabeløbe, yu piraelø ñimun karub pera gøbelane chiyutøgucha møramig køn. Møgueløba ka tab gørrømisrtrapto marøbelø latawei nøm ñimun ashib pønrrøbendø martrab gømøtø, ñimui manrraugue tabigwan isua, Tiuswan køriibala maramig køn. ²³Chiwandøgucha marøppe, martrab isua maramig køn, møguelayasig kømøtø, Señorweyasig lataig marøb, ²⁴truburø ketig uta tøgagømigwan tranrrabiibe Señor nø rrannrrab gúi ashibeløbe. Kaguene ñim chi marøb pønrraibe Cristo tru Señorweiwan marøb pønrran. ²⁵Inchen møikkøben maig maramigwan marmøtø, kalø marøbigwane nui kalø marig maig køben truburø nøgucha treetøwei kaigwan utønrrun. Kaguende Tiusbe møigwane purømisrøb kandarøtø inchimíig køn.

4 ¹Ñim karub pera gøbeløgucha ñimui karuindiig melabelane sølgandø tabig marøb tøgaguy, ñimgucha srømbalasrømbe ñimun Ashib Karub wabig tøgare gwa mørabe.

²Chu urastøgucha Tiusba wamindamigwane maikken elachimø melønrrigay, trunune marøppe, nørøtø isub palabino gømø, tab isua marøb, Tiuswan ‘ungwa, ungwa’ chib. ³Katø namuimburaabgucha Tiuswan tøgato miarrunrrigay, nui wamwan wamindamig nø kan yaskab gurtrai, Cristo, tru asiimíig sørig basrabigwan eshkab wamindamig kønrrai. Pøs nabe trunun wamindikurri kailan keeri yau pasrar. ⁴Katø Tiuswan miarrunrrigay, nui wamwan waminchippe, na maig wamindamig køben tøgandø treeg waminchab.

⁵Tiuswan ashmø misaamerai utube purø tab isua purø ashipto amønamig køn, tabigwan maramdiig pubene, treegwan ka burainrraindø ashatø bønrrømøtø. ⁶Ñim waminchibgucha tabig mørøptø burramdiig waminchibelø gømig køn, kan mamigu tre may larri lataig, chull møramdiikke, mundøgucha mandø lötamigwan tab lötabelø gønrrab ñim tøgagømig kønrrai.

Pablobe Tíquiconba, Onésimonba karua ørøb

⁷Tíquico, namui undaaraig nuneg, Tiusweiwan maizhikken elachimø marøbig, Señorwei marameløyu naba lincha marøb megabig, naimburab chitø wamindamelane nø waminchun.

⁸Nabe nune ñimuisrømay ørøppe, treeg isua ørar: namuimburaab

maitø pub arrigwan ñimun wammørøsrkønrraimba, katø ñimui manrrømeran chi isumø tab gønrrai martraimba. ⁹Tíquicobe inrrab gøn tru Onésimo namui undaaraig nuneg, maikkucha elachimø megabig, tru ñimui utuiba. Nømbe yu chitø pub arrigwan kerrigu waminchun.

‘Ka amøñiguh’ chib Pablo wam øriilø

¹⁰Aristarco, tru kailan keeri yau naba lincha pasrabikkucha, ñimun ‘tab ka amøñiguh’ tan; katø Marcos Bernabéwei lenunekucha. (Marcosweimburab na maig martrai eshkaigwan ñimbe wammøra gúinrrun, ñimuisromay ibene, tab utønrrigay.) ¹¹Katø Jesús, tru Justo cha wamig, truikkucha ‘ka amøñiguh’ tan. Tius nø ashib karub waigweimburabeløyu nan maram burugub melabelø, judíosmera kørebeløbe i pøneløtø gúig køn, nayasiibe truba rruba tab gønrrai marøbelø. ¹²Katø Epafraskucha ñimun ‘ka amøñiguh’ tan, tru ñimui utuig Cristoi marøb megabig. Nøbe chu uraskucha ñimuyasig Tiuswan truba rruba miab megabig køn, ñim kørrønrrabgaig tabig melabelø, Tiusweimburabeløyu newan nørørowar, Tius kerriguwan maig palai waben, chiyutøgucha palømíig, newanelø gønrrai. ¹³Nøbe ñimuimburab maramigwan truba rruba isuaig kui nabe ñimun eshkamønrrun, ñimuimburappa, laodiceasreelaimburappa, katø hierápolisreelaimburappa purø isua marøb megaigwan. ¹⁴Lucas, tru mø marøbig undaaraig, truikkucha ‘ka amøñiguh’ tan, katø Demaskucha.

¹⁵Katø namui nunelø Laodiceasrø warabelan chigucha ‘ka warøgue’ tan chirrunrrigay, Nimfaswanba, katø tru iglesia nui yau tulundzunabelanba. ¹⁶I kilga børigwan ñimui utu chab lebene, Laodiceasrø iglesiangucha lenrrai inchigay. Katø Laodicea iglesiasrøngurri kilga børig pubigwan ñimgucha lenrrigay. ¹⁷Ñim Arquipone trenchinrrigay: “Señor ñun chi martrai karua basrigwane isuptø marøb megau tan cha, maig maramigwan mara kørrømartrab.”

¹⁸Iig ‘ka amøñiguh’ chib pøriibe, na Pablo nai taska børig køn. Ñimbe pesannamø, isua guy nabe kailan keeri yau pasrar. Tiuswei ka yandø tab indiibe ñimba pasrønrrun.

1 Tesalonicenses

Pablo ‘ka amõñigueh’ chib pørig

1 ¹Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, Tius Møskaimba, Señor Jesucristoba kanbalatø pønrrabelan. Tius nui ka yandø tab indiiba, chi isumgaig tab gøbiiba ñimba pasrønrrun.

Tiuswei ureemerasun Tiuswan ‘ungwa’ taig

²Chu uraskucha nambe Tiuswan ‘ungwa, ungwa’ chibelø guer ñim mayeelayasig. Katø chu uraskucha nam Tiusba wamindigube ñimuimbura b tøgä isuppatø melabelø guer. ³Chu uraskucha nambe Tius namui Møskawei merrab maikken pesannamø isubelø guer, tru ñimui isubigwan Jesucristoinug pasra tøgagúikkurri chigøben marigwanba, tru undag købigwan tøgä bønrraikkurri marigwanba, katø namui Señor Jesucristoinug muniiraikkurri maikken elachimø, melabig melaigwanba. ⁴Namui nunelø, Tiuswei undaarailø, ñimune Tius lawa wesruilø gúin gúi aser. ⁵Pøs tru Tiuswei tabig srø wam ñimuinug pub urasma ka wamindiitø gømtø, maramburab mariitøgä, Espíritu Santotøgä puig købig køn. Katø tru wamindiibe treeg kømønrrab gømtø, nambe treeg kui ashawei wamindig købig køn. Ñimuyasiitøwei tab gønrai, ñimui utu nam amønammay amønaig købigwan ñimbe ashibelø gøn.

⁶Ñimbe ñimuimbura ppe nam lataitøwei, katø Señor lataitøwei mandø amønami gwan treeg amøñibelø misrin gøn, Espíritu Santogurri Tiuswei wamwan tranigwan truba kasraatø utab, chine purø rrømbøig isuig melamig nebuingucha. ⁷Øyamay ñimbe Macedonia birauba, Acaya birauba mayeelø Criston kørebelaimbe,

truiløguen asha kusremdiig ñimbe treelø misrin gòn. ⁸Tru Señorwei wam ñimuinukkurri larrøbichib ibiibe, Macedonia biraute gòmøwei, Acaya biraute gòmøwei, chusrøndøgucha larrøbitsin gòn. Katø trutø gòmøtø, ñim isubigwan Tiusweinug pasra tøgagúigwan chigucha nebua asig misrin gòn. Treekkurri namune yandø mas chi tamig palønrrabga lataig kòtan. ⁹Inchawei trusreeløtøweinguen nam ñimuinug kebamben, mandø tab wamab utig kòbigwan waminchibelø gòn, katø tru øsig wab Tius ciertonigweiwan marøb pønrrønrrab, tru taska mari tiusmeran wendøbasra, Tiusweimay ñim mandø lliraigwanba, ¹⁰katø Tius tru kwailai utugurri øsiirangaruig tru srømbalasrøngurri nui Nusrkai arrumigwan muniiranrrab pønrramisrigwanba, tru Tiuswei purø rrømbøig namig kòbig attrab pasrabigwan Jesús namun chi treeg kòmønrrai marøbigwan.

Pablo Tesalónicasrø marøb uniilø

2 ¹Namui nunelø, ñimdøweinguen ashibelø gòn, nam ñimuisrømay amrruibe, ka amrruitø webimuigwan. ²Pøs ñimbe yandø ashibelø gòn tru Filipossrømbe merrabwane chine purø rrømbøig nebuinab, tsalø waminab melaig kòbigwan. Inchendø treeg kuingucha, namui Tius purugúitøgabe nui tabig srø wamwan chigucha chi kòrig kuin gømø, eshkanrrab pønrramisrig kòbig kòn, marmønrrai namun yeeg trømbøig katingucha. ³Kaguen nam ñimun ‘øyeeg marøb meløgun’ chib wamindiibe, peemaytø pella gusrenaniiløyugurri arrubig kòmøwei, kabe chigøben trømbøig martrab isua wamindigugurri arrubig kòmøwei, kabe nam chiyugøben isatø kegørrørskønrrab wamindigugurri arrubig kòmøwein gúig kòn. ⁴Treeg kòmøtø, tru Tiuswei srø wamwan namun waminchai pønsrcøppe, maig wamindamigwan waminchibelø gúi Tius treelø gúi asiilø gøbelø guer nambe. Inchawei nambe waminchippe, mu misaamera tab gúi mørtrai tabzhig inchib pønrrønrrab gòmøtø, Tiuswan tab gúi mørøb wanrrai marøbelø guer, nø namui manrrømeran mailø gøtashchab ashibigwan. ⁵Pøs ñimbe ashibelø gòn, nambe managuen chull mørtrai isatø tabzhig waminchimøwei, kabe chiwan gøben parøgøb, chine isab truba tabzheelø misrøb amrrumøwei indigwan. Tiusbe iigwan asha basran. ⁶Nambe Cristo nøashib karua øriilø gøppe, ñim namun tab inchai indamdiigwein gøbendø, nambe

managuen misaamera tabelø gønmab asha tab inchai lamuig køn, ñim lata, gatøganelø lata.

⁷Masken treeg inchimøtø, nambe purø tammay inchibelø gøbig ker, kan usri nui shush uregwan maig køben inchimø ashib norrøranøb lataitøweingue. ⁸Namui undag købigwan ñimuyasig purø nuig tøgagøptø, Tiuswei tabig srø wamwandø ñimun tranrrab inchimøtø, nam namashibguen øsig kuigwan tranamdiig kuig køn, kaguende ñimbe namuimbe purø undag kømdeelø misrin gøben. ⁹Namui nunelø, ñimbe isua gúinrrun, nam øbøøba muraara, muraara marøb melailan, ñimui utu møikkøben namun chi palabigwan ka tranrraindø burrømønrrab, yem, gwaløm truba marøb melaig købig køn, Tiuswei tabig srø wamwan ñimun eshkab kusrenanøb amønñippe.

¹⁰Ñimbe ñimashib ashibelø gøben, katø Tiuskucha asha basran, nambe chishig newan tabig, sølgandø maig maramigwan marøb, katø muguen chi tamgaig amønaig købigwan, ñim Criston kørebelai utu. ¹¹Pøs ñimbe ashibelø gøn, nambe ñimun møigwandøgucha kan møkai nui uregwan waminchib lataitøwei, ¹²‘øyeeg marøb melamig køn’ chib, ‘chigúingucha ka meløgun’ chib, ‘Tius wamabigwei ureesun amønay’ chib, Tius nø ashib karub waisrømayba nui törguegwalmabiisrømayba ñimun nø wamab wan.

Tiuswei ureemeran kaig martrab gurrig

¹³Inchawei nambe chu urastøgucha Tiuswan ‘ungwa, ungwa’ chibelø guer. Kaguene tru Tiuswei wamwan nam waminchen ñim mørøb uras, ka møguelø wamindig kui lataitø mara utømøtø, Tiuswei wam ciertonig kuitamab isua utig køn ñimbe. Truibe tru ñim kørebelainuube ka basrømøtø, marig misrøb pasran. ¹⁴Kaguende ñim, nai nunelø, tru Judea birausrø Tiuswei iglesiamera tru Cristo Jesúsweinug kanbalatø pønrrabelø lataitøwei nebuinab melaig køn. Ñimungucha ñimuim birau misaameratøwei truba rruba kaig indinab melamig nebuig køn, tru Judea birauelan nøm judíosmera kaig indinab melab lataitøweingue. ¹⁵Tru judíosmerabe Señor Jesúswan kweetsamba, tru Tius maig karuigwan eshkabelan kweetsamba, namune nømuinukkurri webetamba indig købig køn. Incha truiløbe Tiuswane tab gúi wanrrai marmeelø, maya misaameran ashig kømuingøba inchibelø gøn, ¹⁶tru judíos kømø misaameran kaigyugurri wesrailø gønrrai

waminchab inchen, waminchamamønrrab namun merab. Øyamay nømui kaig mariilane katøguchinguen gatøguchinguen nemarøb ambubelø gøn. Inchendø Tiuswei namig købig arruppe, nømuim bala purab nuig attrab gøn.

Pablo tesalónicasreelan katø ashchab inrrab isub

¹⁷Namui nunelø, nam ñimba maya yana gøsrøn tarømisra, ashippe, ashmubendø, namui manrraube chu uraskucha ñimune pesannamø tøga bønrrøwa, ñimun malaugue ashchab amrrug købiitø truba rruba inchib melaig køn. ¹⁸Incha nambe amrrunrrab inchib melaig køn. Na Pablobe, katø gatø attrab inchib megaben, Satanásbe namun chigøben iløsrka bønsrcøbig køn. ¹⁹Pøs tru nam tøgagønrrurmab isua munig melamiba, namui kasrag købiiba, katø Señor Jesucristo arruben, nui merrab nam kan corona lataig kanawa nam uta, purø tab gúi mørøb pønrramibe ñnimwein gømtirru? ²⁰Pøs ñimwein gøn tru nam maya nuguen tab gúi mørøb pønrramiba, nam kasrag kui pønrramibabe.

Timoteowan ashchab inrrai karua ørig

3 ¹Inchawei treeg isuptø, treeg isuptø melømønrrab, Atenassrømbe trembe namdøgucha ka gørrømisrtrab isuer. ²Incha namui nuneg Timoteo Jesucristoi tabig srø wamwan larrøbichib inrrai wamindameløyu Tiusweimburabelan marøb, namba lincha marøb megabigwan nambe ñimun ashchai ører, tru ñim kørørnrrabgaig mur isua melønrraimba, ñimui isubigwan Jesucristoinug pønsra tøgagúigwan elachimø, tøgagøbig tøgagønrrab isunrrai martraimba. ³Øyeeg ñimun chine isumdeelø puben, ñim møitøgucha mandøguen gømuilø melømønrrai isuer. Pøs ñimbe yandø ashibelø gøn, namune øyeeløyu puraambub melønrraiwei marigwan. ⁴Inchawei nambe ñimba amønñipatøwei, øyeeg chine isumdiig puig melamig kønrrun cha, kanmaytø eshkaig købig køn, truibbe mømibe ñimguen ashen treeg purebweindan. ⁵Inchawei treeg isuptø, treeg isuptø megamønrrab ñimui isubigwan Jesucristoinuutø pasra bønrraigwan maig melaitashchab ashchai ørar. Inchippa Satanás, tru kebenøsrkønrrab inchibig ñimun kaigu kegørrøsrkøben, nam ñimuyasig chigøben mariibe ka yandiig chi mariimfig kui lataig kørørmisrtraitamab isua.

⁶Inchendø gatøle Timoteobe ñimuisrø uña, puppe, namuyasig tru tab wam wammørørkønrab srua arrin gøn ñimui isubigwan Jesucristoinuutø pasra amønaigwanba, truba undaguelø gúigwanba. Katø ñimbe chu uraskucha namune pesannamø, tabig isub tøgagøbelø gúin gøn chib, namgurri ñimun asinrrabna gúi melab lataitøwei ñingucha treeg isub melabelø gúin gøn chib wamindan. ⁷Inchawei treekkurri, namui nunelø, namun purø kaig nebuinab purø isuig melamig nebuingucha, ñimui isubigwan Jesucristoinug pasra amønaigu treeg tabig melan daig nam wammøriibe, namuimbe truipe purø nu tab gøtan. ⁸Ñim Señorweinug tarømisrmø melan dai wammørene, namune ke kan øsiirab lataig kòtan. ⁹Tiuswei merrab ñimgurri nam øyeeg kasrag bønrramig kuigwan, ñnambe nun mandø incha ungwa tamburab newan ungwa chinrrab gøh?

Tiusba wamindig

¹⁰Nambe yem gwaløm Tiuswan miab melabelø guer, katøle ñimun malaugue ashchab amrrua, ñimui isubigwan Cristoinug pasra tøgagúigu ñim ke truburab nebuimig palabigwan nemartrab isua. ¹¹Inchawei nam ñimun gatøle ashchab amrrumig kørrai, namui Møskai Tiusba, Señor Jesúsba namui maywan kura rrattraimab isuer. ¹²Ñimui undag købig tøgagúigwan Señorbe truba rrua nemarøb nurab inrai martrun, ñim kangurri gangurri undarayamigwanba, katø mayeelan undaaramigwan chigucha, namgurri ñimun undaarab lataitøweingue. ¹³Ñimui manrrømeran nøbe tab mur isua bønrrabelø gønrrai martrun tru newan tabigu, ñimun ‘øyeeg marøbelø gøn’ dainanrrabgailø, Tius namui Møskawei merrab pønrramig kørrai, tru namui Señor Jesús nuyasiitø tarømariilø mayeeløba arrub uras.

Tiuswei merrab kasrag køndiig amønib

4 ¹Møimbe yandø, namui nunelø, Tius tab gúi wanrrai marøb llirab amønamiig nam mandø kusrenanig køben, ñim treeg marøb amønibeløbe, treegwane katøguchinguen gatøguchinguen marøb melønrrai iigwan Señor Jesúswei munchiyu øyeeg melønrrigay chib, tiusmanda øyeeg martrunrrigay chinrrab inder. ²Ñimbe ashibelø gøn, Señor Jesús treeg martrai karua basriitøga maytø marøb gømigwan nam ñimun eshkaigwan.

³Tiusbe treeg isua wan, ñim newan tabigweindø tarømisrar gønrrai: peg ishuuba, peg møøba trømbøig marmeelø. ⁴Katø ñim møitøgucha ñimui asrwane isua mōra tøgagøm gusremig kōn, newan tabig, trømbøig marøb maig købash kōmøtø. ⁵Judíos kōmeelø Tiuswan ashmø misaamera latawei trømbøig marøg købiitø ke chinchimmørø inchib, truitø srua ambiilø bønrramig kōmøn. ⁶Inchawei øyeeløyube nui nuneweiwan nuin gúi lataig merrarrowa marmøwei, ke chi chimíig kōnmaptø marmøwei indamig kōn, Señorbe kerrigu øyeeg trømbøig mariiløgurri nōmune mōra melønrrai martrun. Nambe kanmaytø ñimun eshkaig købig kuig kōn, isuptø gønrrigay cha. ⁷Kaguende Tiusbe namune wamappe, kōsøngønrrapteelø marøbelø gønrrai wamømøtø, masken newan tabig amønibelø gønrrai wamig kuig kōn. ⁸Inchawei i kusrenaniilan kaashibiibe, mu mōwan gashmøtø, Tiuswan gaasan, nui Espíritu Santon ñimun tranøbigwan.

⁹Ñim nunelan tru undaguelø gømigweimburappe undaguelø gømig kōn chib, ñimun pøramibe chi palømøn. Kaguende Tius kusrenanin gøn, kangurrin gangurri ñim undaguelø gønrrai. ¹⁰Masken ñimbe Macedonia birau muba kuimburab nunelø warabelan mayeelanba undaguelø gøn. Inchen gøben, nambe, ñim Cristogurri nunelan 'øyeeg melønrrigay' chib wamindamønrrun, katøguchinguen undag købig nurab inrrai. ¹¹Warappe, ñimuimburab wasrøndaa tab waramigwan isumig kōn, mu mendaigweiwan gømø, ñimuimburabigwan isub, ñimui taska ñimui maramelan marøb, nam ñimun maig martrain garuig treekke, ¹²ñim treeg waraigwan menda misaamera tabikken gúi asig kōnrrai, mun chi miab warømønrrab.

Señor katø arrumig

¹³Ñim, namui nunelan, tru kwawa ka kib lataitø warabelaimburabigwan mandø inchab gúinguen mørmeelø kørørmismønrrai nambe eshkanrrab inder, katøganelø tru isua muniiramigwan chigar lata ke chinsraatø isui inchimønrrai. ¹⁴Jesucristo kwawa, katø øsiiraigwanma nam køreibe, treetøwei tru Criston kōrewa, kwawa, ka kib lataitø warabelane Tiusbe Jesucristoba pera attrab gúi nambe kōrewa guer.

¹⁵Señor nø maig taig, nambe nø arrumnegatig nam ka øsig amønibeløbe kwabeløguen ammwøwatø nammerrig

ambamibe kaanrrun cha trendamønrrun. ¹⁶Kaguende Señorbe srømbalasrøngurri wamab kørarruppe, nò wamigwane mørtrai kandø wamab kørattrun, kan arcángel tru ángelesmeran nò garub pera basrabigwei wamdøgaba, Tiuswei trompeta wanrrøbiitøgaba. Inchen Criston korewa kwabeløbe nømmerrig øsiirawa, katøle chab gurrønrrun. ¹⁷Inchen nam ka øsig amønibeløbe tru kwaig warøwa kiagasrabeløba kanbalatø wañiyu srua ambiilø gømønrrun Señorwan palasrø katønrrab. Øyamay nambe managatig Señorba purramig kønrrun. ¹⁸Inchawei kangurriin gangurri øyeeg wamindiiløtøga waminchib puruguyay

Señor arrumigwane isuptø melamig køn

5 ¹Inchen Señor chiwei arrumigwanba, katø mana arrumigwanbabe ñim, namui nunelan, na chi pøramig palømøn. ²Tru Señor arrum gwalømbe kan niliig yem arrub lataitøwei punrrab gúi ñimbe tab ashibelø gøn. ³Misaamerabe ‘ambumay imay tab waramdiig køb, mømibesi yandø chi isub melamikkaig tab waramdiig køn’ chib gøbene, kagøppa, mõi mõi nømuim balabe pinisailø gømig attrab gøn, kan ishuumisag patsø gwanrriigwan kagøb, mõi mõi unø tammisrtrab pusrkwab arrub lataitøweingue. Inchen truyugurrimbe mumaygucha wegørramibe kaanrrun.

⁴Inchendø ñim, namui nuneløbe, løstøyu bønrrømøn, tru gwaløm ñimun kan niliig arrub lataitøwei, ke chi isumø gøben arrinab pønrrønrrain gømø. ⁵Kaguende ñimbe mayeeløba tørwei ureemera, kwalømyuelø gøn. Nambe løstiigwei ureemera gømøwei, yemyuelø gømøwein guer. ⁶Inchawei treekkurri, nambe gatøganelø lataitøwei kib lataig amønīmøtø, pesannamø purø isuptø meløgün, trurriigu tab isuamørague. ⁷Kaguende tru kibeløbe yem guian. Inchen mutsiirabeløbe yem mutsiiran. ⁸Inchen tru nam kwalømyueløbe, tab isuamøra amønīgün, isubigwan Jesucristoinug pasra tøgagúiitøgaba, undag købiitøgaba, truigwane pechoburab chinchimønrrai katabiitøga kasra lataig. Inchen nam kaigyugurri wesrailø gømig munig melaitøgabe petsamig kan tsandzøn casco lataig mara tøgä bønrramig køn. ⁹Kaguende Tiusbe namune nui purø rrømbøig korig kømđiig namig købigwan utønrrai mara bønsmøtø, kaigyugurri wesraig kømigwan nebua utønrrain gúiig køn, namui Señor Jesucristogurri. ¹⁰Nøbe namuyasig

purøbasramisra kwaig kuig køn, nam øsig amønai lata, kabe nam kwaimbala lata nøba kanbalatø purramig kønrrai. ¹¹Inchawei kangurrin gangurri masken treeg melamigwan isunrraimba, gatøguchinguen tab mur isua pønrramisrøb amrraimba kangurrin gangurri puruguyay, ñim chabguen yandø treeg marøb melaig kōppe.

Pablo Cristoielan øyeeg martrigay cha waminchib

¹²Katø ñim namui nunelan trenchinrrab inder, ñimui utu marøb, katø karub pønrrabelane maig købash inchimø, tiusmanda tab inchunrrigay cha, Señorweimburabeløyu tru pera marøb, maig maramigwan treeg marøb melamig køn chib waminchibelane.

¹³Nømune maya nuguen tab inchib, undaguelø gømig køn, nømui maramelan marøb melaimburø. Kangurrin gangurri tab amønay.

¹⁴Katø ñim, namui nunelan, trenchinrrab inder, chigøben marøg kømui inchib pøilane murba waminchigay cha, katø køriiteelane treetø melømønrrai waminchib, katø chiyugøben purø gullaguelane purugub, mayeelanba larrø tammay inchurrunrrigay cha.

¹⁵Møikkøben chigøben kaig marene, katøburø nungucha treetøwei marøb gømønrrab isuptø guy. Masken chu uragucha ñimui utube kangurrin gangurri tab inchibelø gønrrab inday, katø mendailø mayeeløba chigucha.

¹⁶Chu urastøgucha ñimbe kasraatø amønñib, ¹⁷chu urastøgucha Tiusba wamindamigwane elachimø, nøba waminchib, ¹⁸chi pub arrindøgucha, Tiuswane ‘ungwa, ungwa’ tamig køn; kaguende Tiusbe ñim øyeeg marøbelø gønrraiwei isua gøn, Cristo Jesúscurri.

¹⁹Espíritu Santoi marøb pasraig kan nag lataitøwei ñimuinug pilab pasrabigwane kwabashmøtay. ²⁰Katø ‘chigøben pub attrun’ chib Tius maig karuigwan waminchen kashmumig køn.

²¹Chiwandøgucha maig kōtashchab isua ashibmerrig asamig køn. Incha chi tabigwane elachimø, marøb tøgagørrømisrøppe, ²²chigurrimbunø kaigwane marmumig køn.

²³Inchen Tius tru chi isumgaig tab gønrrai marøbig, nøtøwei ñimune newan nuindø gønrrai tarømartrun. Ñimun kerrigu newan ñimui espíritun, ñimui mōsigwan, ñimui asrwan kaig mariitøga chigucha chillig inchar gømeelø, chishcheelø tōga basrønrrun, tru namui Señor Jesucristo arrumigweyasig. ²⁴Tru ñimun wamabiibe,

nøbe maig taigwan treeg marøbig køn. Incha nøbe treegwan martrab gúinrrun.

‘Ka amøñigueh’ taiba, ‘mayanguen tab gønrrain’ daiba srabeig

²⁵Namui nunelø, namuyasig Tiuswan tøga miarrunrrigay.

²⁶Ñimbe namui nunelan mayeelan purø tab wamab, Tiuswei undag købiitøga tasig rranøb ‘ka amøñigueh’ chinrrigay.

²⁷Señorwei merrab nabe ñimun karua basramønrrun, i kilgayu na pørigwan namui maya nunelan lemønrrab gømø, lenrrai.

²⁸Namui Señor Jesucristoi ka yandø tab indiibe ñimba pasrønrrun.

2 Tesalonicenses

Pablo ‘ka amõñiguh’ chib pørig

1 ¹Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, namui Tius Møskaimba, Señor Jesucristoba kanbalatø pønrrabelan, ²Tius Møskaweinukkurrimba, Señor Jesucristoinukkurrimba tru ka yandø tab indiiba, chi isumgaig tab gøbiiba ñimba pasrønrrun.

Cristo katø arruben Tiusbe maig kønrrabigwan asha martrun

³Chu uraskucha ñimuimburab Tiuswan ‘ungwa’ chib gømig køtan, namui nunelø, nam treeg marambuawei maramig søl gúimba. Kaguende ñimui isubigwan Jesucristoinug pasriibe maramburab gatøguchingen nurab iben, katø ñim møitøgucha kanikkurri kanikkurri undag købig tøgagúikkucha nurab yain gøn. ⁴Inchawei treekkurri nambe Tiuswei iglesiamerayu ñimuimburab truba tab gúi waminchibelø guer, ñim melabig melaigwanba, isubigwan Jesucristoinug pasra melaigwanba, chine kaig indinab melamig arrubigu, ñim truba isuig puraambub melamig nebuindøgucha. ⁵Pøs kerrigu iibe tru maig kønrrabigwan Tius nø asha mariibe, sølgandø maig maramigwan marøbig kui ashchai kenamaran, Tius nø ashib karub waisrø ñim kebamrrabgailø gøbigwan kebambamig kønrrai marøb. Treekkurri ñimbe truigweimburab mõi ya yeeg kaig indinab melan.

⁶Tiusbe sølgandø tab asha marøbiibe ñimun kaig nebunrrai marøbelane, nømungucha treetøwei møra melønrrai martrun. ⁷Incha ñim chine kaig nebui melabelan lata, katø namun lata isramig kønrrai tranrrun. Øyeeg buppe, Señor Jesús nui

ángelesmera maramburab marøbeløba, srømbalasrøngurri naabaig arrua, kenamisrøb gwaløm treeg punrrun. ⁸Tiuswan ashmeelanba, katø namui Señor Jesucristoi tabig srø wamwan mørøg kømui inchibelanba Tiusbe maig kønrrabigwan møra melønrrai martrab attrun. ⁹Truilane tru managatig pinisainug møra pønrrønrrai pønrrailø gønrrun. Incha Señorwei merrabgurrimba, tru nui maramburab marigwei torguegwalmabigugurrimba webusriilø gønrrun, ¹⁰tru nui misaamera nun maya nuguen tab indig kønrrappa, tru mayeelø nun kørebelø yeekkucha gønrrabmab kwaara asig kønrrappa arrub gwaløm. Inchen ñimgucha tru utu tøgä bønrrønrrun, kaguende nam maig eshkaab wamindingwan ñim køreikkurri.

¹¹Øyeeg punrraiwei nambe chu uraskucha ñimuyasig Tiuswan ‘purugurra’ cha miabelø guer, ñim treeg kønrrabgailø gúigwan Señor wamigwane nø wamiilø gúi treeg mara tøgagønrrai. Incha nui maramburab mariitøga ñim chigøben tabig martrab isua tøgagúilanba, katø isubigwan Jesucristoinug pasra chigøben marøb gúigwanba newan treeg marig kørrømisrtrai, ¹²namui Señor Jesúswei munchiwan øyamaybe ñimgurri maya nuguen tab indig køben, ñimbe nøgurri maya nuguen tab indiilø gønrrai miabelø guer, tru ka yandø tab indig namui Tiusweimba, Señor Jesucristoimba maig kønrrain gøben treeg.

Señor katø arrumigwan tab eshkaab

2 ¹Pøs trube, Señor Jesucristo katø arrumigweimburappa, katø nam nøba tulundzunamigweimburappa, ñim namui nunelan, ²tiusmanda ñim maig isua pønrraigwan ke mõi mõi peetø isub yunømarøb, ke chinsraatø inchib pønrrønrrai kwaarøsrainab pønrrønrrab gømø chinrrab inder. ‘Tru arrum gwalømbe yandø pun’ chib, ‘Tius treeg wamindingarutan’ chib wamindi lata, kabe ‘treeg køn’ chib eshkaig lata, kabe ‘treeg kønrrun’ chib ‘nam guilga børig køn’ chib waminchib gúi lata mørmønrrigay. ³Ñimbe mumaygucha kegørrøsrkainab pønrrønrrab gømø, melay. Kaguende tru Señor arrum gwaløm pumøwatø, misaamera Tiusweimburabelan elacha, yandø wendøbasrøb, katø tru newan larrø gaig, tru managatig pinisaig kønrrabigu pasrønrrai pasrig kenamismøwatøbe treeg pumønrrun. ⁴Tru møøbe tru chimerandøgucha ‘tius køn’ chib tøgagúilanba, katø chiwan gøben

køriibala tabig waminchib tøgagúilanba, ashig kømui inchib sètø basramisrøb, purab nuig misrøb pasrønrrun. Incha treetø gønrrab gúindø, Tiuswei yauguen kebya wamisra, nøashibguen ‘Tius kur’ chib wanrrun.

⁵¿Na ñimba uñib uraswei na ñimun iigwan wamindigwan isumuitarru? ⁶Tru kaig martrab møg treeg maramig puben tru uras kenamisrtrai tru merrarrab sètø basrabiibe chi sètø basrain gúi ñimbe ashibelø gøn. ⁷Kaguende tru mu asiimíig purø gaig pasrabiibe chabguen marøbguen basran. Inchendø tru treeg marmønrrai mõi ya merrarrab sètø basrabiibe, sètø gatab pasrabig pasrønrrun tru utugurri wesramnegatig. ⁸Inchen yandø tru newan larrø gaibe kenamisrtrun. Inchen truigwan Señor Jesúsbe nui trigugurri urriitøgatø kweecha, tru nø törguegwalmabig arriitøga pinishinrrun. ⁹Tru larrø gaig arrua mariibe, Satanás purugúitøga marøb attrun, marøppe, Satanás maramburab mariiløtøgaba, nø pasrain gúi ashchai mariilan mariitøgaba, tabig kømíitøga kwaara asha gønrrai marøb pasrailøtøgaba. ¹⁰Incha tru kaigyu pønrramsrømay amrrabelan kegørrøsrkamig nøbe chigurrimbunø sölwan gømø, kaløwan marøb kaig martrai pønsrcønrrun, kaguende tru kaigyugurri wesrailø gønrrab tru newan ciertonigwan undaaramø, kaashibeløgurri. ¹¹Inchawei Tiusbe tru peløsrkøb kegørrøsrkøbigwan maramburab martrai ørtrun, isa wamindiilan kørenrai, ¹²katø tru newan ciertonigwan køremøtø, sølgandø tabigwan mariimeeløyu truba tab gúi inchib marøb pønrrabelane mayeealanba kaigyu pønrrønrrai pønsrcamig kønrrai.

Kaigyugurri wesrailø gønrrai lawa wesrailø

¹³Inchendø nambe chu uraskucha Tiuswan ñimuimbura ‘ungwa, ungwa’ chib gømig køtan, Señor undaaraig nunelø. Kaguende srøsrøgurri kaigyugurri wesrailø gømig kønrrai Tiusbe ñimune lawa wesraig købig køn, Espíritu Santogurri tabig chishmarikkurrimba, katø ñimui isubigwan newan ciertonigu pasra tøgagúikkurrimba. ¹⁴Tru øyeeg kønrrai isuawei, Tiusbe ñimun wamig køn, tru tabig srø wamwan nam eshka wamindiitøga, tru namui Señor Jesucristoi törguegwalmabigwan ñimgucha nebua tøgagønrrai.

¹⁵Treeg købene, namui nunelø, maig pønrrabeløbe truyutø tarømisrømø melay, namashib pønrrøwa kusrenaniilan lata, kabe

kilgayu pørigwan kusrenaniilan lata truigwane elatchab gømə, tab tøga bønrray. ¹⁶Namui Señor Jesucristo nøtøwei, namui Tius Møskaimba tru nø namun undaarawa, tru nui ka yandø tab indiitøga managatig chi isumig kaanrraimba, munig melamig truba tabigwan tranøbiibe, ¹⁷ñimui manrrømerayu purø tab gúi pønrrønrraimab isub, ñimui chigurrimbunø tabig marigu lata, tabig wamindigu lata tabig marig kørørmisrtrai treeg martrun.

‘Tiuswan namuyasig tøga miab gørrunrigay’ cha Pablo miaig

3 ¹Pøs treeg købene, yandø mømibe, namui nunelø, namuyasig Tiuswan miab melørrunrigay chinrrab, Señorwei wam petø truørø larrøbichib inrrai, trurrigu tru wambe maya nuguen tabig kui mørøb utig kønrrai, tru ñimui utusrø puben, utab lataitøweingue. ²Katø trømbøig marøptø yandø mindiilø, larrø gaig møguelai tasku nam kegørrab melamig kømønrrai tøga miarrunrigay. Kaguende isubigwan Jesucristoinug pasra tøgagømigwane mayeeløbabe tøgagømøn. ³Inchendø Señorbe chu uraskucha tarømismíig kua, nøbe ñimun kørørmø, mur bønrrønrrai purugub, Satanás, tru larrø gaigwei tasku kegørrømønrrai ashib tøga basrønrrun. ⁴Nambe Señorøgabe treeg kuitamab isua bønrrer, martrai nam karua pønstraigwan ñim mõi ya marøb melaigwan lata, katø maramigwan ñimbe marøbíg martrab gúi. ⁵Tiuswei undag købigwanba, maig kuingucha yaandø, yaandø melamig Cristo tøgagúigwanba, Señorbe ñimui manrrømeran trunun nebua tøgagønrrai martraimab isur.

Maramigwane martrai waminchib

⁶Namui nunelø, maramigwan treeg marøb melønrrigay chib, Señor Jesucristoi munchiyu, marmø gømə, treeg martrai ñimun karumønrrun, tru Cristogurri ñimui nunelø mõikkøben ke chigucha chi marmø, ka uñchabgøba inchib, nam ñimun maig kusrenanig køben treegwan møra marmíibabe linchimøtay cha. ⁷Pøs ñimbe yandø ashibelø gøn, nam mandø waraig købigwan ñimngucha treetøwei waramig kønrrai. Nambe ñimui utu warappe, chi marmø ka warønrrabgøba inchimøwei, ⁸kabe namma mõigweiwan gøben mappe, chi marmø ka purrøwatø mamøwei indig køn. Masken treeg kømøtø, namma maramigwane isua møra, muraara muraara yem gwaløm marøbelø guer, ñimun

møilan gøben kagatø ka tranrraindø munig burrømønrrappe. ⁹Nambe mu mandamgaig maramig chigar guagurri ñimun ‘purugurra’ chinrrab gaima pønrrømøtø, ñimguen namun asha kusrenrrai isua, øyeeg muraara marig købig køn. ¹⁰Nambe ñimba amøñib urassrøweinguen øyeeg kønrrain cha iigwan karua pasrig købig køn: møikkøben maramigwan chi marøg kømui inchibiibe, trube, mabgucha mamumig køn cha. ¹¹Nambe wammøra guer, møiløgøben ñimui utuelø ke chigucha chi marmø ka amøñinrrabgøba inchibelø kuin gúi, nømuimburab gømubendø, mendailaisrø ke ka neesha mørøb. ¹²Treeg inchib misaamerane nambe Señor Jesucristoi munchiyu marmø gømø, martrai karua basrer, maig maramigwan treeg marøb melønrrain cha, nambe nømun waminder: warappe, nømuiwan marøb wasrøndaa marøb guy cha; mappe, nømuiwan manrrab.

¹³Inchen ñim, namui nuneløbe, chigøben tabig maramigwane muraarab melønrrab gømø, maray. ¹⁴Møikkøben tru i kilgayu maig martrain cha trendaigwan mormígwane ñimbe trunune trendø treeg kui yandø asha tøgaguy. Incha truibabe linchibgucha linchimumig køn, treenchene kwartrai. ¹⁵Inchendø kaig kønmab ashiptø ashig kømui inchib treeg inchib tøgagømøtø, nuneg kui ashabe, ‘ashiptø megau cha; øyeebe marmumig køn’ chib, eshkaab wamindamig køn.

Tabig wamindiilø srabeig

¹⁶Señor tru chi isumgaig tab gøbigwan tranøbig, nøtøwei manatøgucha maig kuindøgucha ñimun tru chi isumgaig tab gøbigwan tranrrun. Señorbe ñim mayeeløba pasrønrrun.

¹⁷Na Pablo nai taska iigwan pørar, ñimun ‘ka amøñigueh’ chib. Kilgamera møitøgucha na børiløbe na børig kønmab asamdeelø gønrrai, øyamay pørøbig kur. ¹⁸Namui Señor Jesucristoi ka yandø tab indiibe ñim mayeeløba kønrraimab isur.

1 Timoteo

‘Ka amõñiguh’ chib pørig

1 ¹Na Pablo Jesucristo nõashib karua ørig, Tius namui Kaigyugurri Wesrabiiba, Cristo Jesús, tru nam nundø isua munig melaig truiba karua basrig, ²nui isubigwan Jesucristoinug pasra tøgagig, tru cierton nai nusrkai lataig ñi Timoteowan i kilgawan pørar. Tius Møskaimba, Cristo Jesús namui Señorba nui ka yandø tab indigwan gøben, lastima asigwan gøben, chi isumgaig tab gøbigwan gøben ørtraimab isua inchar.

Ashiptø gønrrai wamindig

³Na Macedonia birausrømay inrrab pasramisra, ‘tiusmanda ñune Efeso kørrømisrtra’ cha eshkaig købig kuig køn, tru møiløgøsrøn sølwan gømø, ke peemaytø gusrenaniiløtøga kusrenanøbelan treegwan kusrenanmønrrai merab ashib pasrønrraimba, ⁴katø chi treeg kømubendø nõmdø isua wamindiilanba, katø nõmbe ‘i misaamerainukkurri amrrubelø guer’ chib, tru munchimera kan managuen patsønrrabgaig arrubigwanba, tru gúindø mørøb pønrrømønrrai ashib pasrønrraimba. Treeløbe ka kwayab waramigweindø gøn, tru isubigwan Jesucristoinuutø pasra tru Tiusweimburabelan marøb big marøb ambamigwan purugunrrab gømøtø.

⁵Inchen na iigwan martrai karua basriibe iig køn: tru manrrau chishchigugurrimba, isub kebachib pasrabigu chi kalø gøn chibig chigaig, tabigugurrimba, katø isubigwan Jesucristoinuutø ka inchib gømø, cierton basra tøgagúigugurrimba undag købig arrubiitøga undaaramig. ⁶Inchawei møiløgøben truiløma øyeeg kømigwan

yandø pella tarømisra, nømuimbura ke ka chine wamincha mørøb gúiløytø chab tarømisrin gøn. ⁷Tru maig maramigwan martrai Moisés pørigwane ke nøm gusrenanøbelø gøg kui inchibelø gøn, nøm wamindigwane nømdøweinguen ni chigúinguen mormøwei, katø 'iibe treeg kømønrrab gømø, treeg køn' chib wamindiilan chigucha chigúinguen mormøwei inchendø.

⁸Pøs tru maig maramigwan martrai Moisés pøriibe tabigwein gúi ashibwei inchibelø guer, tru chiyuwei maramigwan treegweyasig merrarrowa marene. ⁹Inchawei tru maig maramigwan pøra warøppe, tru tabig sölwan marøbelain gømøtø børa warig kui nambe ashibelø guer. Treeg kømøtø, tru larrø gailaimba, mørmeelaimba, chigucha Tiuska misaameraimba, kaig marøbelaimba, kaig maramigwane chi kørikkengaig marøb misaameraimba, Tiusweimburabelane ke ka kaigwan lataig inchibelaimba, usri møskalan kweechibelaimba, ka kweecha betaptø amønibelaimba, ¹⁰møguelø ishumburba nømui asrtøga trømbøig marøbelaimba, katø møgueløbe møgueløasiyaitø trømbøig marøbelaimba, misagwan karuindiig melønrrai nila yanøbelaimba, isa waminchipteelaimba: 'nabe si, isatø waminchimur' chibendø, isapteelaimba, tru tabig sölwan gusrenanigwan chigurrimbunø kaitøga itøøra bønstrøbelaimba gøn, ¹¹Tius mayanguen tabigwei tru tøbilibig tabig srø wam maig køben treetøwei kusrenanigwan. Truigwane na waminchib tøga basrønrrai Tius nan tranig køn.

Tiuswan 'maya nuguen ungwa' chib

¹²Cristo Jesús namui Señorwan na 'mayanguen ungwa, ungwa' chinrrab, muraaramø marøb megamig kønrrai tranøbigwan, kaguende tru nui marameløyu chi isumgaig marøb meganrraptiig kui asha nan pasrigwan. ¹³Nabe merrabsrømbe nun purø rrømbøig wamaptiig, katø Tiuswei uremeran kaig maramigwangøba lab, larrø namiguig maig købash inchiptiig købig kuingucha, nane lastima asig køn, kaguende nabe chigúinguen ashmfiig køremfiig kua, øyeeg marig kuikkurri. ¹⁴Inchendø namui Señorwei tru ka yandø tab indiibe naim bala purab nuikken arrig køn, tru isubigwan nuinuutø pasra tøgagømiba, undag købiiba kanbalatø Cristo Jesúsweinug pasrabig.

¹⁵Inchawei i trendaibe chi isumgaig isig kømøtø gøn, mayeeløba chi kashmø, ka utamig: Cristo Jesúsbe piraumay arruppe, kaig

marøbelan kaigyugurri wesranrrab arrig køben, tru truilai utu purab gaibe na gur. ¹⁶Incha Tiusbe treeg køptøwei nane lastima asig køn, tru kaig marøbelai utu na mas larrø gaigwan Jesucristobe chugatikkucha nò nan tammay ka awentab wabig kuin gúi kenamartrab, tru managatig øsig kømigwan tøgagønrrab, tru wendøsrø nun kørenrrabelø nan øyeeg marigwan asha gønrrai. ¹⁷Inchawei managurri managatig mayeelaim bala nò ashib wabigwan, managatig øsig wabigwan, kaptøgabe asiimfigwan, Tius nò kandø wabigwan managatig nun purø tab indig kønrraimba, maya nuguen tabig kønrraimba inchar. Treeg kønrrun.

¹⁸Timoteo, nai nusrkai lataig, ‘i maramigwan martrunrrig’ cha na ñun karua basrar. Tru ñi maig kønrrabig kuigwan merrabsrøwei ñuimbura Tius maig karuben eshkailan, truilan isua basramisra, Señorweimbura belan elatchab gømmø, may gwayanrrig, ¹⁹isubigwan Jesucristoinug pasra tøgagúigwanba, isub kebachib pasrabigu ‘chi kalø gøn’ chibig chigaig kømigwanbabe tindøgague. Pøs møiløma nømui isub kebachib pasrabigu ‘kalø gøn’ chib kebati mørendøgucha mørmøwa, tru nømui isubigwan Jesucristoinug pasra tøgagúigwane kan nubi itøgasrai lataig kørrømisra, yandø trubisan. ²⁰Truilai utube, Himeneoba, Alejandroba treeg melan. Inchawei nabe truilane Satanás nò asha martrai nui tasku pønrrar, Tiuswan purø rrømbøig wamumum gusrenrrai.

Tiusba mandø wamindamig

2 ¹Inchawei iilanmerrig marøb gønrrai eshkawa pasramønrrun: ‘øyeeg, øyeeg palai meler’ chib Tiuswan miab, katø Tiusba waminchib, katøganelayasig Tiuswan ‘purugurra’ cha miab, katø mu møguelayasiitøgucha Tiuswan ‘ungwa, ungwa’ tamig køn, ²reymerain gøben, katø nørreelø misagwan ashib karub purrabelain gøben. Masken chi isumø tab waramdiig, ambumay imay chigucha chi kuin gømmø, Tiusweimbura belan tabig marøb, chiyutøgucha mu chi tamgaig waramig kønrrai. ³Kaguende øyeebe tabig køn, Tius namui Kaigyugurri Wesrabiibe tab gúinguen asig. ⁴Kaguende nøbe maya misaamera kaigyugurri wesrailø gønrrai indan, tru nui newan ciertonigwan nebua ashchai. ⁵Kaguende Tiusbe kandø nøtø gøben, katø Tiusba misaameraimba tøbøtag pasramisra purø waminchibikkucha kandø gøn, Jesucristo møg. ⁶Truibe nøashib maya misagwan kaigyugurri wesranrrab nò

kwaitōga pagaraig kōn. Incha iigwane yandø ke treeg maramig buben, eshkab wamindig kōbig kōn. ⁷Inchawei øyeegweyasig nabe Señorwei wamwan waminchib kusrenanrrai wesrawa pasrig, katø Jesucristo nōashib karua ørig kur, judíos kōmø misaameran tru isubigwan Jesucristoinug pasra tōgagōmigwanba, newan ciertonigwanba kusrenanrrai. Iigwan nabe isa waminchimur.

⁸Inchawei chutōgucha mōgueløbe Tiusba waminchippe, chi kaig marig chigaig tasigwan chishig kusrub pōnrramig kōn, truba namig kuim balatø gōmōwei, muba aleguiyawa gōmōweingue. ⁹Katø ishumburmeragucha asru keppe, chull ashchai purab tabig kemumig kōn, maig kemigwan treetōgue. Pusrugwangucha tamarøppe, ke purø tabig tamarmōwei indamig kōn, orotōga, kabe tab sruuzheeløtōga. Katø keilōgucha ke purab nōrrōweyelø guemōwei indamig kōn. ¹⁰Treeg kōmøtø, chigøben tabig mariiløyu tabig kōnrrab indamig kōn, ishumburmera Tiusweyasig tabiitø martrab pōnrramisrøbelø maig kōmig kōben treekke. ¹¹Ishuumisaabe kusreb wappe, niløtø wamig kōn, trurrigu maig kōbendiig inchimø nōmun mōrøb. ¹²Kaguende nabe kan ishuumisaabe kusrenanmōnrrai inchar, katø mōwan ke nō garunrrain gōmōweingue. Treeg kōmøtø, niløtø wamig kōn. ¹³Kaguende Tiusbe srøsrø marøppe, Adánwanmerrig marig kōn, trugurrimbe Evan. ¹⁴Inchagucha isa waminchen truyu kebenippe, Adán gōmøtø, Eva guebenig kōn. Incha yandø kaig srua irramaikkurrimbe, yandø kaigyu kebenig kōn. ¹⁵Inchendōgucha ishube ureg tōgagua, kaigyugurri wesraig kōnrrun, tru isubigwan Jesucristoinuutø pasra tōgagōbig tōgagōb, undag kōbigwan tōgagōb, Tiusweyasiitø tarōmarig, trurrigu maig kōmigwan tōga uñabe.

Tiuswei ureemeran mandø pera basramigwan wamindig

3 ¹Inchawei i trendaibe chi isumgaig isig kōmøtø gōn. Mōikkøben Tiusweimburabelan ashib pera pasrōnrrab isubiibe, tabigwan marøb meganrrab isun. ²Trube treeg kōbene, tru Tiusweimburabelan ashib pera pasrabiibe, mugøben ‘ñibe øyeeg kōn’ dainanrrabgaig kōmig kōn. Kan sraindø tōgaig, chigøbendø incha ashmøtø, maig pasramigwan basrabig, maig unamigwan tab isua mōra uñibig, katøganelø ‘øyeeg kōn’ cha, chi tainanrrabgaig, katø mugøben nui yau pubelane, yaambumay wamōnrrab muniitø wabig. Katø kusrenanrrab gaimabig kōmø, kusrennōbig, ³vino menrra mucha mutsiiraptiig kōmōwei, kwayam lamig larrø chullig kōmōwei, treeg kōmøtø,

purø tab inchibig, kwayamigwan gømmø, tab gømigwangøba labig, anwan larrø chullig kømøwei, treeg kømig køn. ⁴Katø nui yaambu mandø maramigwan asam gusrebig, nui ureemeragucha nø maig taigwan mørøbelø tøgag kømig køn, maig købash inchimeeløgue. ⁵Kaguende nui yaambuguen mandø maramigwan asam gusremíibe, ¿Tiuswei iglesiayuelane kan mandø asha marøb pasraiasamø? ⁶Tru Tiusweimburabelan asha marøb pasrabiibe, Tiusweiwan ke mõi srø nebua ashib megabigwan pasramig kømøn, ke purab nuig kurmab inchib guebya, inchipa tru nugwaimandzigwan møra basrønrrai pasrinuutøwei kebeñib megamønrrai. ⁷Katø nøbe Tiuswan ashmø misaamera mendailø chi tamgaig chiyutøgucha sølwan uñibig kømig køn, nøguen treeg kømubendø, ka isatø inchib pasran dainab pasrømøwei, katø nugwaimandzig chiyugøben kebeñchai pasrigu, truyu kebeñib megamøwei inchai.

**Iglesiaiyu purugub pønrrønrrai pønrrailan
maig kømigwan wamindig**

⁸Katø diáconosmera, tru iglesiayu purugunrrai wesrawa pønrrailø chigucha, mugøben chine cha asinamø møguelø gømig køn, chigøben martrab chippe, ka wamindiitø gømmø, martrab waminchibelø, katø vinon menrra mucha mutsiirapteelø gønrrab gømøweingue, maramgaigwan mara, ke chinch gøben an nørø gatøramigwangøba lamøwei inchibelø. ⁹Tru isubigwan Cristoinug pasra tøgagúigwei sorig pasrabigwane tin dōga bønrramig køn, nømui isub kebachib pasrabigu chi kalø gøn chibig chigaig, chishchig tøgague. ¹⁰Tru iglesiayu purugub pønrrønrrabelane maig kōtashchab ashbmerrig asiilø gømig køn. Inchen yandø ‘chi køn’ damgailø gúikkurrimbe, iglesiayu purugunrrab diáconosmera pønrramisrtrun. ¹¹Katø ishumburmera chigucha, mugøben chine cha asinameelø gømig køn, ambumay imay wam gusrab, wam niga llliramøwei, ka chigøbendø incha ashmøtø, maig pønrramigwan bønrrabelø, katø chiyutøgucha chi isumgaig pønrrabelø, treelø gømig køn. ¹²Iglesiaiyu tru diáconosmerabe kan sraindø tōgar gømig køn, katø nømui ureemeran tab asam gusreb, nømui yaambu chitø maramigwan asam gusreb inchibelø. ¹³Kaguende tru diáconosmera nømui maramigwan tabig marøb pønrrabeløbe truba tab pera marøbelø gúi asiilø gøb, katø tru nømui isubigwan Cristo Jesúsweinug pasra tøgagúigwane masken chigucha chi kōrig isumø eshkab pønrrønrrun.

Purø nuig tabigwan mu nebua asiimíig pasrabig

14Na iigwan ñun pørar, petø ñun ashchab attrab isua. 15Inchippa nan petø arrum nebumub chi inchene, trube, Tiuswei yauelai utu ñi mandø megamigwan tab isua basramig kønrrai inchar. Truibe Øsig wab Tiuswei iglesia, tru newan ciertonigweyasiibe pilar lataig, merrarrab pasrabig, truig køn. 16Inchawei mu 'treeg kømøn' chib pønrramga, nam Tiusweimburabelan marøb pønrraig mu nebua asiimíig pasrabiibe, purø nuig køn:

Cristobe kan møg lataig asrbaig kenamisrøb,
 Espíritu nune chigucha kalø marmíig,
 tabig kui kenamarig køb,
 katø nøbe ánglesmera asig køb,
 judíos kømø misaamera wammøra gønrrai wamindig køb,
 yu pirau misaamera nune kørewa pønrramisrig køb,
 katø nune srømbalasrø törguegwalmabiisrø utig køb gøn.

Tiusweimburabigwan elacha kaigwan marøb gurrabelan wamindig

4 1Pøs Espíritu Santobe törgandø kelarrab eshkan, srabe gwalømmerawane mõiløgøben nømui isubigwan Jesucristoinuutø pasra meløwa truyutø melømøtø, chab tarømisra, kwaimandziimera kegørørsrøbelan tru gúindø mørøb, katø kusrenaniilø kwaimandziimeraimburabigugurri arrubigwan mørøb guebamrrun cha. 2Treeg kusrenaniiløbe tru purø rrømbøig isa waminchibelø ka palatø tab inchib misaamerainukkurri arrubig køn, kørig tøgagønrrai tru nømui isub kebachib pasrabiibe yandø nasrkwailø tøgar, kan tsandzøn bachibiitøga parri latailø. 3Tru misaamerabe kasharamønrrai meramba, katø mø mamimerane mamønrrai meramba inchun, tru newan ciertonigwan nebua asha kørebelø, 'truba ungwa' chib manrrai Tius mara pønrrailan. 4Kaguende chiwandøgucha, Tius nø mara pønrraibe kaig kømø, tabig køn. Inchawei Tiuswan 'mayanguen ungwa, ungwa' chib utigwane nambe chiwangucha kashmumig køn. 5Kaguende Tiuswei wamgurrimba, Tiusba wamindikkurrimba tabig chishig kønrrai marig køn.

Jesucristo karua basrigwan purø tab marøb megabig

6Inchawei namui nunelan iilan kusrenanøb, katø tru isubigwan Cristo Jesúsweinug pasra tøgagøm wamdøgaba, purø tabig

kusrenanigu treegwan marøb arriitøgaba chishkandø pasramig kørnrai marig basrøwabe, ñibe Cristo Jesúswei truba tab marøb megabig kørnraguen.

⁷Chi treeg kømubendø, nõmdø isua chugúinguen mormubendø wamindiilanba, ishumburmera køllizheelø kagatø ka wamincha møriilanba, mørøb pasrømumig køn.

Ñibe masken Tiuswei tabigutø marøbig marøb meganrrab isu. ⁸Asr chishtø gørnrai eshegøb luliima, maitøguen purugúibe, tru mas Tiusweimburabelan maikken elachimø marøb megaig truibeguende, chiyutøgucha lutøgurri tab gørnrai purugubig køn. Kaguende yu mõi øsig waraigu lata, katø wendø attrabigu lata, tabigwan tranrrab misrig tøgäig køn. ⁹I trendaibe chi isumgaig isig kømõtø gøn, mayeelø treeg kuitamab isua chi kashmø utamig. ¹⁰Incha øyeekkurriwei nambe i maramigwane igatø! martrab isua marøb, maig kuingucha kullaarab elachimø marøb melabelø guer, kaguende nambe Øsig wab Tiuswan muniirab melabelø gúikkurri, tru mayeelan kaigyugurri Wesrabigwan, nun kørebelaneguende wesrabwei inchibigwan.

¹¹Iilane ñibe maringarub kusrenanrrig. ¹²Ñi unøtiig kuikkurri mugucha kaasiinab pasrønrrab gømõtø, masken ñibe Jesucriston kørebelayasiibe ñi chi wamindiiløyu lata, maig køben gømø, tab isua unigu lata, undag købigwan tøgagúigu lata, ñui isubigwan Jesucristoinug pasra tøgagúigu lata, kaig marmø chishig unigu lata, nõmguen ñun asha kusrenrai megamig køn. ¹³Na arrumnegatiibe mayelai merrab, Tiuswei wamwan pørigwan leb, ‘maig melamigwan treeg marøb melay’ chib, kusrenanøb indamig køn. ¹⁴Ñun Tius keta traniitøga chigøben marøbig kuigwane pesannab elachib pasrønrrab gømø, Tiusweimburabelan pera marøb pønrrabelø nõm mayeelø misra nõmui tasiimeran ñuim bala estsara, ñi chigøben marøbig kørnrun cha Tius maig karuben ñun eshkaig købigwan.

¹⁵Iilandø ñiguen tab isub kebya, truigwandø martrab pasramisr, Tiusweiwan ñi gatøguchinguen nebua ashib megaigwan mayeelø nebua ashchai. ¹⁶Pøs maig kømigwan ñiasiitø ñuimburaaptøwei tab ashiptø megau, katø tru ñi kusrennøb megaigwan chigucha. Truigwane elachib pasrønrrab gømø, kerriguba marøbig marøb megau. Ñi treeg marøb megawabe, ñiasiitøwei kaigyugurri webib, katø tru gatøganelø ñun mørøbelan chigucha kaigyugurri wesrab inchabguen.

Tiuswei ureemeraba mandø gømigwan waminchib

5 ¹Kølli misagwane tsakkandø namig wamømøtø, masken tammaytø, wamindamig køn, maig melamigwan treeg marøb megamig køn chib, kan møskawan lataitøweingue. Inchen ureeteelane ñui trag nunelø gúi lataig indamig køn.

²Inchen ishumbur køllizheelane ñui usrin gúi lataig inchippe, srusralmerane ñui trag nuchalø gúi lataig indamig køn, chigøben kaig isua gømøtø, tabig chishigwan isuague.

³Inchen piudamera kerriguwan nømdø gørrømisrar kerrigu mugucha ashchaptiig chigarwane tabig purugunrrig. ⁴Inchen kan piuda nusrkalo gúi, kabe awelumera gúi tøgag købene, trube, tru ureemerabe Tiusweimburabigu maig maramig køben treeg marøb, trube, tru nusrkalo be nømui yaelai chi palabigwane nømwei ashib purrønrrabelø gøn, nømunma maig tabig marig købig køben, kølleelan treetøwei marøb. Kaguende øyeebe Tiuswei merrab truba tab gúi asig køn. ⁵Inchen piuda tru kerriguwan nøtøzhig, yandø nøtø gørrømisraibe, Tiustøwei purugunrraitamab isua basramisra, yem gwaløm Tiusba waminchib, purugunrrig chib miab megabig megan. ⁶Trune piuda tru nøtø gørrømisrøbig nun maig marøg købendø marøb pasrabiibe, øsig uningucha nøbe kwaig lataig køn. ⁷Øyee maramelangucha marmø gømø, martrain garunrrig, mugøben 'kailø gøn' dainab pønrramig chigargønrrai. ⁸Pøs møikkøben nui nømmissagwan lata, katø nui naachaguelandøweinguen isua ashmíibe nui isubigwan Jesucristoinuutø pasra tøgagúigwan wendøbasraig, katøganelø Tiuswan køremeelø lataguen gømø, purab gaikken gøn.

⁹Tru munchimeran pøra tøgagúigu kan piudai munchiwan keerøppe, sesenta añoskurrimbuniigwandø pøra gueeramig køn, trurrigu nui keebatø megabig købigwan. ¹⁰Truibe chigøben tabig mariiløyu mu gúi asig kømig køn: nui uregwan nørrøranøbig, katø mugøben nui yau pubelan, yaambumay tab wamab wabig, katø Tiuswei misamera yau puben, srøbmeran kwallibig, katø chine kaig nebuilø melabelan purugub megabig, katø chine tabigwane marøb megabig treekke.

¹¹Inchendø tru piudamera ureeteelø nømdø gørrømisrøbelane, tru munchimeran pøra tøgagúigu nømungucha tøgaguerbasamig kømøn. Kaguende nømui asru kaig marøg købig arrubiitø,

Cristoinukkurri tarømarene, katø kasharag kui inchib mendabelø gøn. ¹²Inchabe tru Criston srøtø nebua asha tru nøba pønrrønrrab misrig købigwan treeg martrab gaima, kaigyu pønssailø gønrrab pønrramisrøbelø gøn. ¹³Inchagucha ke yamørig, yamørig llirab pønrraptø, yandø pøiløguen misrøbelø gøn. Trurrigu pøiløtø misrmøtø, katø ambumay imay wamniga lliramba, katø chiyugøben guegalamørøb, chi wamindamgailan wamincha møramba inchibelø gøn. ¹⁴Inchawei treekkurri piudamera ureeteelø nømdø gørrømisrarbe nabe ka kasharanrrai inchar. Ureemera tøgagøb, katø nømui yaambu mandø burramigwan asam gusreb inchai, Satanás, tru ashig kømui inchibig, chinetø tainab pønrramig chigagønrrab. ¹⁵Inchawei piudamera møiløma, pella chab tarømisra, Satanáswei maywan wendautø chab ambubguen indin gøn. ¹⁶Kan ishug Jesucriston kørebig nui yau piudamera tøgaguabe, purugub nø asamig køn, iglesia ke tranrraindø muniirab gømig kømønrrai. Øyamaybe tru piudamera kerriguwan mugucha ashchaptiig chigarwan, maig palabigwan ashib tøgagømig chi palømønrrun.

¹⁷Iglesiaiyu maig køben gømønrrai truba tab ashib, Tiusweimburabelan pera marøb pønrrabelane nøm mandø tabig indig kønrrabelø gøben treegwandø tab inchimøtø, maya nuguen tab inchib tøgagømig køn. Tru Tiuswei wamwan waminchib eshkamiguba, kusrennamiguba, truigwandø truba martrab isua merrarawa pønrramisrøbelan. ¹⁸Kaguende Tiuswei wamwan pørigube trenchibig køn: “Kan wey, tirigun kwattrai itøbunab megabigwane, mabashig kømub pusalgutsamig kømøn” cha. Incha gatø trenchibig køn: “Chi maramigwan marøb megabiibe tru nø marøb megaimburø pagar utamigwein gøn” cha.

¹⁹Tiusweimburabigwan pera marøb pasrabigwane kaig køn dainab kemesrøb srua gønrrai inchimumig køn, tru treeg marigwan kan pailø gúi, pønelø gúi nømashib ashibelø treeg køn chib eshkanrrabelø gaabene.

²⁰Inchendø kaig maramigwan elachimø marøbig marøbelane ‘øyeeg marmumig køn’ cha, mayelai merrab mur alegamig køn, katøganeløgucha treegwei marmønrrab køriimatønrrai.

²¹Tiuswei merrappa, Jesucristoi merrappa, katø ángelesmeran Tius lawa wesrailai merrappa, iig øyeeg maramelan marmø

gømø, ñi martrai karua basrar, kabe møyigwane purømisrøb trugatøtø inchab gømøwei, møyigwandøgucha lata asha maramig køn. ²²Chigøben marøb pasrønrrai wesrawa basrtrab, ke møy møy tab ashmubendøbe, møyigweim bala gøben, ñui tasiimeran estsarmøta, nømui kaig mariilan ñigucha tøgatø marøb pasraig webimønrraimbe. Chigucha kaig martrab gømø, tabig chishig basrønrrig.

²³Møingurrimbunøbe, tsøøbitø, tsøøbitø muchimøtø, katø lamøzhig vinogucha mutchig. Kaguende ñibe patsø tre tab gømuinab, kwanrrømeragucha chi gwanrrø gøben katø gatø webarrinabig køn.

²⁴Kaig mariilø kan utu møguelaimbe maig køtashchab asamig pumøwatø törgandø kenamisrøbguen indan. Inchen kaig mariilø katøganelaiwane tsøndatøsrø treeg kuin gúi nebua asiilø gøn. ²⁵Katø treetøwei chigøben tabig mariiløgucha tru urastø törgandø asamdiig kenamisran. Inchen tabig mariilø gatø møy møy kenamisrmø pønrrabikkucha, asiimfíg treetø gørrømisrmøtø, kenamisrøbig køn.

6 ¹Ñim møyitøgucha ka karua srua gúindiig melabeløbe ñimun karub pera gøbelane ka palabinø inchib maig købash inchimø, tab indamig køn. Tiuswei munchiwanba, katø tru tabig kusrenaniilanba purø rrømbøig wamindig kømønrrai. ²Inchen ñim møyiløgøben, ñimun karub pera gøbelø Jesucriston kørebeløtøwein døgarbe, Cristogurri nunelø gønmaptø, maig køben palabinøtø indamig kømøn. Masken treeg kømøtø, purø tabguen mara rranøb melamig køn, kaguende nømui maramelan ñim mara traninabeløbe Jesucriston kørebelø undaaraig nunelø gúimba. Iigwane kusrenanøb, øyeeg marøb gømig køn chib waminchig.

Chigurrimbunø palømfíg purø tabig ciertonig

³Namui Señor Jesucristoi chigucha chi kalø gusrenaniimfíg tabiiba, katø Tiusweimburabelan nam marøb gømig kusrenaniiba truig maig køben treetøwein gømøtø, møyikkøben ka peemaytø chi tabig kømífíg kusrenanøbiibe, ⁴nøasiitø purø gusrebig kurmab indan, chigucha chi kusremfíg købendø. Incha maig kø chib payib aleguiyamig, chigøben wamindiilan kwayam lab wamindamibe, kan kwanrrø lataig nigaig køn. Incha øyeekkurrindøwei truyugurri arruppe, katøgan chigøben tøgagøben pusrkwai asamig arrumba,

kwayam lamig arrumba, katøganun trømbøig marøb tsalø wamamig arrumba, chigøben guemesra trømbøig isub amønamig arrumba, ⁵katø tru kaig maramig isubiitø nømui turmera mindiilø tōga misaameraba ke chi gømbendø ka kwayab gømig arrumba indan. Truiløbe tru newan ciertonigwane kerraig chiga misaamera, Tiusweimburabelan marøb tōgagúigwane nømbe trutōga an marøb pønrramigweyasig tōgar gøn.

⁶Inchen nam maig tōgagúizhiitōgatø kasraatø melabelaimbe tru Tiusweimburabelan marøb tōgagúiyugurri, chigurrimbunø tōgagømig arrubwei inchibig køn. ⁷Kaguende nambe yu piraumayma, chigucha chigar yandiig amrruig køppe, katø treetøwei chigucha chigar ambamig kønrrun. ⁸Inchawei nam mamig tōgagøb, asru kemig tōgagøb indinukkurrimbe, trutōgabe kasraatø amønamig køn. ⁹Kaguende pua misrøg kui inchibeløbe, chine tabig lataig kenamisrøb arruben, treegwan chull asha kegørran. Incha chine chine nebunrrab isuptø maramgaigwan mariiløyuba, katø ka trømbøig mincha pønrramig kønrrai mariiløyuba kegørra pønrramisren, truiløbe mōguelane yandø chindamikkuchagaig misra pønrrønrrai kegørrørskøb, managatig kaigu kegørra pønrramig kønrrai mara bønssran. ¹⁰Kaguende chigurrimbunø kaig maramig arrubiibe, anwan igatø! ke kan chinchimmørø inchib chull indiiløyugurri arrubig køn. Inchawei mōiløgøbenma an dōgagug købiitø yandø pella, nømui isubigwan Jesucristoinuutø pasra tōgagúigugurri tarømisra, nōmasiitøwei chine chine purø isumdiig puig melønrrab tōga bønrramisran.

Kørrømisrmø ibig inrrai wamindig

¹¹Trune ñi Tiusweyasiitø pasrab mōøbe treeg indameløyugurrimbe tarømisramig køn. Sølgandø tabig kømigwanba, Tiusweimburabeløyu tabig kømigwanba, isubigwan Jesucristoinug pasra tōgagømigwanba, undag købig tōgagømigwanba elachimø marøbig marøb megamigwanba, katø maig købendø inchimø, purø tammay megamigwanba, iilan martrig. ¹²Ñui isubigwan Jesucristoinuutø pasra tōgagúigwane ñi tōga basrønrrab isua gwayab, tru managatig øsig kømig tōgagúigwane pachamørtrab gømø tab tōga basrau, Tius trunun tōgagønrrai wamøben, tru ñi truba yamelai merrab, purø tabig pasrønrrab waminchib pasraig købigwan. ¹³Katø chigurrimbunø

pønrrabigwan øsig kønrrai tranøb Tiuswei merrappa, katø Poncio Pilatoi merrab, purø tabig nø maig kuigwan ‘nabe treeg kur’ chib, waminchib eshka pasrabig Cristo Jesúswei merrappa, nabe ñune karua basrar: ¹⁴tru martrai ñun karua basrigwane kaig mariitøga chillig indig chigaig, katø chigøben ‘kailø gøn’ dainab pasramig chigaig, treeg tøgagønrrai namui Señor Jesucristo kenamisramnegatig. ¹⁵Yandø tru treeg maram gwalømmerna puben, trunun nø kenamartrab gúinrrun, tru nø mayanguen tab indig, tru nõtø Mayeelaím Bala Pasrabig trurrigu maya reymeraím bala nø Rey, katø maya misagwan ashib karub pønrrabelaim bala Nø Garub Ashib Pasrabig. ¹⁶Managuen kwanrrabig kømfíg, muguen kemalamgaigu törguegwalmabigu wabig, nune mu møkkuacha asiimíg, katø mugucha nune ashchab gaimaig, Tius nõtø gøn. Treegwan purø tab indiiba, managatig mayeelaím bala karub wamibabe nuyasig kønrrai inchar. Treeg kønrrun.

¹⁷Møin gwaløm yu pirau pua misaamerane puarmera guermaptø, purab nørreelø guermab inchib, tru chigurrimbunø tøgagúilø treetø gønrraitamab isumgailøyu ke truyutø isua bønrrømønrrain garunrrig. Masken treeg inchimøtø, nam kasraatø tab gúi warønrrai Tius tru chigucha palønrraingaig tøgagømburab tøgagønrrai namun tranøbigweinug isua bønrrønrrai inchig. ¹⁸Tabigwan marøbelø gønrrain garunrrig, truba puarmera misrøppe, nømui chigøben tabig mariiløyu puarmera misrtrai. Tøgagúigwane chigucha merø gúi inchimø, lata pirishib purugunrrab muniitø gøbelø gønrrai. ¹⁹Øyamaybe tru wendøsrø attrabigweyasig, tabig pølbasa marøb esegab guebamrrun, øsig kømig, tru managatig cierton øsig kømigwan nebua tøgagømig kønrrai.

Timoteowan wamindiilø srabeig

²⁰¡Au! Timoteo, ñun chi martrai trana basrigwane tabig isua møra tøgagu, Tiuswane chigucha gømfíg marøb wamindiilanba, ke ka wamincha møriilanba, katø tru nømui nørrø nebua ashib kusreb taig chi cierton gømfígwanba, treelan mørøb pasrønrrab gømø meganrrig. ²¹Pøs møiløgøbenma trunun marøb guebamba, nømui isubigwan Jesucristoinuutø pasra tøgagúigugurrimbe yandø pella, chab tarømisran.

Tiuswei ka yandø tab indiibe ñimba pasrønrrun.

2 Timoteo

Timoteowan ‘ka uñguh’ cha, Pablo pørig

1 ¹Na Pablo, Tius nan trendø treeg kønrrain gúikkurri Jesús Cristo nøashib karua ørig, øsig kømigwan Cristo Jesúsweinug trannrrab misra kørrømisrigwan eshkanrrai ørig, ²nai undaaraig nusrkai lataig, ñi Timoteowan i kilgawan pørar. Tius Møskaweimba, namui Señor Cristo Jesúsweimba tru ka yandø tab indigwan gøben, lastima asigwan gøben, chi isumgaig tab gøbigwan gøben ñuim bala gønrrai isur.

Cristoimburabigwan kørmø waminchib

³Chu uraskucha pesannab elachimøtø nabe truigwan, yem gwaløm ñune tōga tōga isua miab megappe, Tiuswan ‘mayanguen ungwa, ungwa’ chibig kur, nai isub kebachib pasrabigu ‘chi kalø gøn’ cha kebachibig chigaig, na treeg marøb pasraig Tiuswan, tru merrabsrø nai kølli misaamera Tiusweyasig maig marøb melabelø gøben treetøwei. ⁴Ñi kappin gørrøgaigwan isubene, nane gatø malaugue asinrrabna gøtan, na purø tab gúi mørøb truba rruba kasrag pasramig kønrrai. ⁵Nabe katø gatø isuinabig køn, ñi ka isatø inchib gømø, ñui isubigwan Jesucristoinug cierton pasra tōgagúigwan. Truigwane ñui awela Loidaba, ñui usri Euniceba truilømerrig pølbasa tōgagúig købig køn. Incha mømbe ñuinukkucha trube pasrømø gømø, pasraitamab isua basrar.

⁶Treekkurri na nai tasigwan ñuim bala estsaren, ñi chigøben marøbig kønrrai, Tius keta tranig tōgagúigwane pesannab elachib imønrrai, katøyug isunanrrab inchar. ⁷Kaguende Tiusbe namune køriiteelø gønrrain gømøtø, chishkandø marøbig

kõnrrain rranig kõn, undag kõbigwan tõgar gõnrraimba, asr mumay srua itanmaptø põnrrømeelø gõnrraimba. ⁸Inchawei Señor Jesucristoimbubelam wamindamigwan kõrig kui inchib pasrømøwei, namui Señorgurri kailan keeri yau na pasranmaptø kõrig kui inchimøwei inchig. Masken treeg kõrig kui inchimøtø, Tiuswei tabig srø wamgurri na maig kaig nebuig megaben, treetøwei meganrrab inchi, Tiuswei maramburab marøbig truig maig køben treeg. ⁹Kaguende namun kaigyugurri wesrawa, newan tabig chishig amøñinrrai wamabiibe nõwein gõn, kabe nam chigøben mariiløgurriin gømøtø, nõ trendø treeg martrab isuitøgaba, nui ka yandø tab indiitøgaba gõn. Tru iig ka yandø tab indigwane Tiusbe Cristo Jesús kurri tranig kõbig kõn, chigurrimbunø põnrrabikken kaabenbatøsrøwei. ¹⁰Inchen mõimbe Cristo Jesús namui Kaigyugurri Wesrabig yandø kenamisren, tru ka yandø tab indig pasrabig købiibe kenamisran. Incha tru managatig kerriguwan kwamig kõnrrai marøb pasrabigwane nõbe kerrigu pinisha, tru Tiuswei tabig srø wamgurri tru øsig kõmig managuen patsømønrrabigwan tõryu wesrawa pasran.

¹¹Inchen nabe truigwan eshkab waminchibig kõnrraimba, Jesucristo nõashib karua ørig kõnrraimba, kusrenanøbig kõnrraimba wesrawa pasrig kur. ¹²Incha øyeekkurri nabe øyeeg kaigu pureb megar. Treeg kuingucha øyeeg basrarmaptø chi kõrig kuim basrømur. Kaguende nabe mun gørewa basrarmab isua basrar. Na tru srabe gwalømweyasig na nuinug esegawa tøgagúigwane chi puraimønrrai ashib tøgä basramig, nõbe maramburab maramigwan tøgäig kui, nabe ashmø gømø, asha basrar.

¹³Tru chi kalø gømø tabig kusrenaniilø na wamindigwan ñi mõrigwane, trunun merrarrawa treetøwei marøb yamig tøgagønrrig, isubigwan tru Cristoinug pasriguba, undag kõbigwan Cristo Jesúsweinug pasra tøgagúiguba. ¹⁴Tru purø tabigwan ñun marøb tøgagønrrai tranigwane, tru namuinug pasrabig Espiritu Santo purugúitøgä tab asha tøgä basrau.

¹⁵Pøs ñibe asha gúinrrun mayeelø Asia birausreeløma nan chab tarømisrigwan, truilai utube Figelo gøben, Hermógenes køben tarømisrig kõn. ¹⁶Onesíforoi yauelan Tius lastima tøgagønrraimab isur. Kaguende Onesíforobe katø gatø nan chi isumø pishindø pasrønrrai purugubig kõn, katø nan kailan keeri yau pasranmaptø

kørig kui inchimøweingue. ¹⁷Masken treeg inchimøtø, Romasrøma pub latatø, nan wetørramnegatig lawa, wetørrabig køn. ¹⁸Señor Onesíforon tru lastima asig kømigwan nebua tøgagønrrai tranrrai isua inchar, tru srabe gwaløm puben. Ñibe yandø tsabø ashibig køn Efesosrøma nøbe namun yeeg purugub megaig købigwan.

Jesucristoi kan tab suldau gømig

2 ¹Ñi nai nusrkai lataibe, tru ka yandø tab indig Cristo Jesúsweinug pasrabigu mur isua basrau. ²Truba yamelai malau na waminchen, ñui kalutøga ñi mørig købigwane katøganelan chi isumgaig martraptø møguelan martrai karua bønstrø, nømgurringucha gatøganelan kusrenanrrapteelan.

³Chine isuig megamig pub arrubigu, ñibe namba treegu pureb meganrrab isu, Cristo Jesúswei kan purø tab suldau lataig. ⁴Kan suldauma chi maramelan marøb meganrrab, truyu kebyaikkurrimbe, katøgan nøørø peg marameløyube kebya megamøn, nun suldau gønrrai pasrøbigwan purø tab gúi mørtrai martrab. ⁵Katø møig kanab luldashchab kan luløbig chigucha lulrrab pasramisra, luløbelø chitø maramig køben treegwan marmøwabe, tru lulimburo coronan utønrrab gaimanrrun. ⁶Katø kan kwallibig chigucha pøsa, bøsa gwallabe, ellmarig misrøbigwane nømerrig tulishinrrabigwein gøn. ⁷Inchawei iig na ñun trendailane ñiguen chi chibig kuitashchab tab isu, pøs Señorbe chiwandøgucha ñi tab chigúi møramigwan tranrrun.

⁸Jesucristo rey Davidwei misagugurri arrubiibe kwawa, kwailai utugurri gatøle kurrigwan ñibe pesannamø isuagu, tru Tiuswei tabig srø wamwan na maig eshkab kusrenanig, treegwan. ⁹Inchawei tru wamgurri chinetø kaig nebuinab, kailan keeri yau pasramig nebutan, kan larrø gaig lataikke. Inchendø Tiuswei wambe merrarraig kømøtø basran. ¹⁰Inchawei treekkurri chinetø kaig nebub arrubigwan treegwan kerrigu ka pureb megar, Tius nø lawa wesrailayasig tab gønrrai isua, tru kaigyugurri wesrailø gømig Cristo Jesúsweinug pasrabigwanba, tru managuen patsønrrabgaig törguegwalmabigwanba nømgucha nebua tøgagønrrai.

¹¹Iig trendaibe chi isumgaig, isig kømøtø gøn:

Nam nøba kwawabe,

katø nøba øsig purramig kønrrun.

12 Maya kaig nebub arringucha, melabig melowabe,
katø nø ashib karub waisrøn chigucha nøba ashib karub
purramig kønrrun.

Nam nun ‘ashmeelø guer’ chibene,
namungucha nøbe ‘ashmíig kur’ chinrrun.

13 Nambe nøba maig pønrramigwan treeg pønrrømuingucha,
nøbe namba maig pasrabiibe chu uragucha treetø pasrabig
køn,
kaguende nøbe maig køppe, managucha treetø gua.

Sølwan marøbig kui asig kønrrab inchi

14 Ilane pesannamønrrai isunanøppatø, isunanøppatø meganrrig,
‘øyeeg martrigay’ chib Tiuswei merrab karua basrøb, ke kan chi
wamindamgaigwan treetøgatø ke larrøbitsamburab larrøbichib,
ambugurri igurri aleguiyab gømønrrai. Treeg mariibe chi tabig
purugumøtø, tru wamindigwan mørøbelane ka trømbøig mindishatø
kørrømarøbig køn. 15 Ñibe ñuimburappe Tiuswei merrab søl marøbig
kui asig basrønrrab, purø tab asha isuptø marøb meganrrig. Chi
maramigwan marøb pasrabig, chiyugucha køriimisra basrønrrabgaig
tru wam newan ciertonigwane, maig kønrrabigwan sølgandø
gusrenanøb pasrabig treeg kønrrab. 16 Tiuswane chigucha gømíig
marøb wamindiilanba, ke ka wamincha møriilanba, treegwan
martrab gømø isua basrønrrig. Kaguende treeg waminchibeløbe nømui
kaig mariiløyu mas kegørrab ambubelø gøn. 17 Inchen nømui treeg
wamindiiløbe kan pill-llab pisrø asrwan trerangarub larrøbichib
ib lataitøwei martrun. Treeg marøb pønrrabelai utube Himeneoba,
Filetoba gøn. 18 Pøs truiløma tru newan ciertonigugurri pella
tarømisra, tru kwailø øsiiranrrun daibe yandø chab øsiirabguen
indin gøn chib, trumay waminchib guebamba, møilanma tru
nømui isubigwan Jesucristoinug pasra tøgga melaigwane yandø
mumaygucha gømuielø melønrrai mindisha kørrømarøb guebambin
gøn. 19 Inchendø treeg kuingucha, Tius purø may tamara pølbasa
pasriibe muguen kønøgamgaig basran. Truyube øyeeg chibig pørig
tøggaig: “Señorbe møiløtø nuielø gúigwan ashibig køn” chibiiba;
katø: “Møitøgucha ‘Señorwei munchiyu uñibig kur’ chib waminchibiibe
kaig marigugurri tarømisramig køn” chibiiba.

20 Kan nu yauma pasumera, køtsømera pønrrappe, orotøga
mariiløtø bønrrømøwei, andøga mariiløtø pønrrømøwei indan.

Treeg kòmõtø, tsiitøga mariilø gøben, pirøtøga mariilø gøben bønrran. Møiløbe purø tabig marøbyutø katørab srua gømig køben, møiløbe ka chi marøbyu gøben katørab srua gømelø gøn. ²¹Inchawei møykkøben øyeeg kaig mariiløyugurri chish misrabe, purø tabig maramigweyasig kan pasun lataig tøgagømig kønrrun, tabigweyasiitø tarømarig, chiyutøgucha Señorweimbe tabig martrabig, chigøben tabig maramigweyasiibe kaima basrønrrabgaikke.

²²Matsørelø chinetø kaig marøg kui indiiløyugurrimbe ñibe tarømisr. Incha tru sölğandø tabigwanba, isubigwan Cristoinuutø pasra tøgagømigwanba, undag købigwanba, ambugurri igurri tab unamigwanba ñibe tøgä uñ, tru nømui manrrømeran chishchiitøga Señorwan ‘purugurra’ chib wamab tabig waminchibeløba kanbalatø. ²³Ke chi wamindamgailan aleguiyam lailøyugurrimba, chugúinguen mormubendø chinetø cha møyiløyugurrimba tarømisr. Kaguende treeg indiibe ka kwayab gømigweyasiitø marig kørørmisrøbig kui ñibe ashibig køn. ²⁴Kaguende Señorweiwan marøb megabiibe kwayam laptiig kòmõtø, masken mayeelan larrø tab inchibig, trurrigu may gusrenanøbig, chigøben pusrkwanrraptiig taingucha namig mormiig kømig køn. ²⁵Katø mørøg kømub chinetø cha mørøbelane, møy møy tsag wamømõtø, tammaytø sölwan isunrrai purugumig køn. Nømui kaig mariilan isua møra, Tiusweimay liramigwan inchippa Tius tranøbgunmab isua, tru newan ciertonigwan nøm tab chigúi mørtraí. ²⁶Incha gatøle tab isua møra, tru nugwaimandzig chinetø mara pønsra nømun kegørrøsrka, nø maig martrain gøben, treeg marøb melønrrai merrarraawa tøgagúiigugurri wegørrønrrai.

Srabe gwalømmerawan misaamera mailø gønrrabelan waminchib

3 ¹Katø ñibe iigwangucha isua asha gømig køn, srabe gwalømmerawane tabguen waramga gwalømmera attrab gúi. ²Møguelø ka nømuimburaптø tabig kønrrai inchibelø, anwane ke chinchimmøø inchib chull inchibelø, purø nørreelø misrøb waminchibelø, purab nørreelø misrøb katøganelane keeshaguen ashmeelø, trømbøig tsalø wamamba inchibelø, nømui møskalan larrø mørmeelø, chiwangucha ungwaguengar, Tius kaagúi lataig inchib misaamera gønrrun. ³Ka trendø treeg

undaguelø gømigwane chigucha chiga misaamera, namappe, chinchaguen tamaramgaig namabelø, wam gusrupteelø, trømbøig maramigwane ke treeg maratøweim buraambubelø, nømun gømøbashtø trømbøig mara betab misaamera, chigurrimbunø tabigwane larrø tsaleelø, ⁴chi gømubendø tabelan kailai tasku purøra pønstrøbelø, chi maramigwan tabguen isumubendø mõi mõi marøbelø, nørreelø guermab isubiitø ke chinsraatø inchibelø, chine tab gúimørøb maramigwangøba undaarabelø gønrrun, Tiuswan gømøtø. ⁵Tiusweimburabigu truba tabig amønib lataig inchendø, tru maramburab marøbig Tiusweiwane chigucha gømíig mara tøgar gøn. Øyeeg misaamerane tarømisr. ⁶Kaguende tru treeg marøb møguelai utuelø møiløgøben køn, ishumburmera chiyu gøben mur isua bønrrømøwa, chigurrimbunø kaig marøg købig arrubig srua ambiilø, kaig mariitø netsailai yamerayu kebamba, tru ishumburmeran kegørrørskræ treetø rreetø melønrrai srua gøbelø. ⁷Inchen tru ishumburmerabe chu uraskucha kusreb chib meløbendø, tru newan ciertonigwane managuen nebua ashchab gaiman. ⁸Tru Janesba, Jambresba Moiséswan chi marmønrrai sötøluløbelø latawei, tru møgueløbe tru newan ciertonigwane treetøwei sötøluløbelø gøn. Truiløbe nømui turyube trømbøig maramig isubiitø netsailø, isubigwan Jesucristoinug pasra tøgagúigugurri tarømisra misaamera gøn. ⁹Inchendø ke øyeetø, øyeetø gúimbe martrab gaimanrrun. Kaguende nøm chigúinguen mormubendørre marøb gúigwane mayelai malau törgandø tømariig kønrrun, tru pailø Janeswanba, Jambreswanba maig purayaig treetøweingue.

Timoteowan chi maramigwan Pablo karua basrig

¹⁰Inchendø ñibe ñuimburappe na maig kusrenaniilan tab ashibig køn, na mandø unigwan, na maig martrab isuigwan, nai isubigwan Jesucristoinuutø pasra tøgagúigwan, maya chindingucha tammay megaigwan, undag købig tøgagúigwan, chine pub arringucha tarømisrmø, megabig megaigwan. ¹¹Katø chine chine nan kaig marinab megaigwan chigucha, purø isuig megamig chinetø puigwan, Antioquíasrø Iconiosrø, Listrasrø nan yeeg trømbøig pui megaigwan. Øyeeg chine trømbøig puig isuig megaben, kerrigu øyeelø chine pub arrubigugurri Señorbe nan chi gømø ka purayamig kønrrai mariig køn. ¹²Inchawei mutøgucha Cristo

Jesúsweimburabeløyu tabig amøñinrrab inchibeløbe, isa gømøtø, kaig indinab melamig kønrrun. ¹³Trune tru larrø gaig møgueløba, katø tabzhig wamincha kaigyu kegørrørskøbeløbabe treetøguen gømø, purø gailøguen misrøb amrrun, nømguen may wamincha kegørrørskailøtøwein gøbendø, may wamincha katøganelan kegørrørskøb.

¹⁴Trune ñibe tru ñi kusrewa tøgagúigu, truyutø megabig megau, tru ñi trunun treeg kuitamab kørewa tøgagúigwan. Pøs ñibe isua gúinrrun ñun truigwan mumera gusrenanig købigwan. ¹⁵Inchagucha ñibe unøgurri Tiuswei tru newan tab wam pøriilan yandø ashibig køn, truiløbe ñune kusrebíg kønrrai martrun, tru isubigwan Cristo Jesúsweinug pasrikkurri kaigyugurri wesraig kømig kønrrai. ¹⁶Pøs Tiuswei wamwan pøriibe kerriguba Tius nui wamwan øyamay chinrrai isungaruben treeg pøriilø gøn, trurrigu kusrenanamibe purø tabig, kalø marigwan nebua ashchai wamindamig lata, kalø maren sölwan martrai watsamig lata, tru sölgandø maramig kønrrai kusrenanamig lata, ¹⁷Tiuswei møøbe chigurrimbunø tabig maramigweyasiibe chigucha palómíig newanig kønrraingue.

Nun maig martrai karua basrigwane martrig

4 ¹Tiuswei merrappa, katø Cristo Jesús, katøle kenamisra arrua, tru nø ashib karub wamigwan nø tōga basramisra, tru øsiguelanba, kwaig warabelanba, maig kønrrabigwan nø asha martrabigwei merrappa, marmø gømø martrai ñun karua basrar: ²Tiuswei wamwan eshkab kusrenanrrig. Wamindamdiig kui lata, wamindamdiig kømui lata nui wamwane waminchab muniitø basrabig kønrrig. Katø øyeeg maramig købig kuin gúi nebua ashchai waminchib, kalø marmønrrai wachib, kullaaramø tranrrønrrai purugub, trurrigu tsag inchimø, tammay Tiuswei wamwan kusrenanøb pasrønrrai pasrar, ñune. ³Kaguende tru chi kalø gømø tabig kusrenanig Tiuswei wamwan misaamerabe mørøg kømui inchib pønrram gwalømmerra punrrab gøn. Nømbe ke chine peetø mørøg køb mendindø gúiig køppe, nømui trømbøig isuiløyu maig køben treegwan marøb gømig, kusrenanøbelø srøitø srøitø tulishib truba nørro pera gønrrun, nøm chi mørøg kuin gøben treegwan waminchabelø. ⁴Incha tru newan ciertonigwane mørøg kømub tarømisra, chi treeg kømubendø nømuinetø

isua wamindiilan mørøb gønnrab chab lliranrrun. ⁵Trune ñibe ñuimburappe chiyutøgucha maig basramigwan tab asha basrau, maya kaig pub arringucha treegu ka megab, Tiuswei tabig srø wam kaigyugurri wesrabigwan trusrøn rrusrø waminchib llirab, Tiusweiwan ñi maig maramig tøgagúigwane newan martrig.

⁶Kaguende nabe yandø naimburappe na øsig kuigwan Tiusweyasig keta tranrrab kweetsig kømig yandø ke lutau basrøben, yandø na kwawa webya yamibe puim basran. ⁷Nabe nai kwayamigwane purø may gwayawa basrar. Katø chu pumsrøngatig lulamigwane trusrøngatig lula, isubigwan Jesucristoinuutø pasra tøgagúigwane maig tøgä basrabig kuig treetø ka tøgä basrar. ⁸Inchawei maig kønnrabigwan sølgandø tabig marimburo utam corona esegaig tøgagur. Truigwane Señor, tru maig kønnrabigwan sølgandø tabig marøbig, tru gwaløm nan tranrrun. Tranøbgucha nandø rranmøtø, katø mayeelø tru nø arrumigwan truba rruba tab gúi isub muniirabelane, mayeelanba tranrrab gúinrrun.

Timoteowan nunashib wamindiilø

⁹Timoteo, petø nan ashchab attrab inchunrrig. ¹⁰Kaguende Demasbe i pirauigwangøba undaarab guebya, yandø nane elachippa, Tesalónicasrømay yaig køn. Inchen Crescentebe Galacia birausrømay iben, Titobe Dalmacia birausrømay yaig køn. ¹¹Yube ke Lucastøwei naba kørørmisran. Marcoswane lawa, ñi pera attrunrrig. Kaguende nøbe tru nai marameløyu truba nu purugunrrautan. ¹²Inchen Tíquicone nabe Efeso ciudadsrømay ørig køn. ¹³Incha ñi arruppe, Troassrø Carpoi yau tru na kørørmarig, nai pala itøgueigwanba, kilgamera pøriilanba srua attrunrrig, katø trugurri tru gatøgan guilgamera mas palønrrabelane pesannanrrab gømø.

¹⁴Alejandro, tru tsandzøndøga chigøben marøbiibe, nane chinetø truba rruba kaig marig køn, nø maig marigwan Señorbe truburø maig tranamigwan tranrrab gúinrrun. ¹⁵Tru møwane ñigucha isuatø ashiptø uñchig. Kaguende Tiuswei wamwan nam waminchimønrrai truba rruba sötøluløb gurrig køn.

¹⁶Tru maig maramigwan asha marøb purrabelai merrab ke srøsrø nan payib srua gønnrab pølbaserendø, tru naimburab ‘na treeg mara basrømur’ chib, megabenma, nane mugucha purugumøtø, masken nandø elacha, mayeeløba ke chab

tarømisrøptindig købig køn. Nøm øyeeg marigwan Tius isua ulø baymuimbe gøn. ¹⁷Treeg kuindøgucha, Señorbeguende naba pasrøwa, chigúingucha kullaaramø, mur basrønrrai purugúig køn, Tiuswei wamwan nagurri eshka kusrenanig kørømisren, mayeelø judíos kømø misaamera truigwan truyu nebua mørig kønrrai. Incha nane Señorbe león lataigwein rrigugurri kerraig køn. ¹⁸Katø Señorbe nane chine kaig nebunrrab pønrrabigugurri chi gømø, ka purayamig kønrrai, chi indiimfig ashib tøgagønrrautan, srømbalasrø nø ashib karub waisrø tōga wamigweyasig. Tørguegwalmabiibe Tiuswein gønrrun managatig. Treeg kønrrun.

Tabig wamindiilø srabeig

¹⁹Priscilanba, Aquilaswanba, Onesíforoi yauelanba ‘tab ka amøñiguh’ tan chirrunrrig. ²⁰Erastobe Corintosrø kørømisren, Trófimone Miletosrø kwanrrø gørrømarar. ²¹Pishim bølmera guebimøwatø ñibe petø attrab inchig. Eubulo gøben, Pudente gøben, Lino gøben, Claudia gøben, katø nunelø mayeelø truilø chigucha ñun ‘ka uñguh’ chirrunrrig cha, øran.

²²Señor Jesucristobe ñiba pasrøben, nø ka yandø tab indikkucha ñimba pasrønrraimab isur.

Tito

Pablo Titon pørøb

1 ¹Na Pablo Tiusweiwan marøb megabig, Jesucristo nøashib karua ørig kur, Tius nø lawa wesruilan, tru isubigwan Jesucristoinuutø pasra bønrramigwanba, katø tru newan ciertonigwan nebua asamigwanba na purugub pasrønrrai, tru Tiusweimburab tabig amønamigumay amrrai marøb pasrabigwan. ²Tru isubigwan Jesucristoinug pasra tøgagúiba, tru maig kuigwan nebua ashib ambiibabe, tru managatig øsig kømigwan tøgagønrrurmab isua munig melaigu truyu basran, Tius tru mana isa waminchimíg, chigurrimbunø købigwan marmøwatøsrøwei tru nø tranrrab misra kørørmisrigu. ³Inchen mømimbe yandø truigwan maram gwalømmera pubene, Tius namui Kaigyugurri Wesrabig nan martrai karua basren, trunun na eshkab kusrennen, nui wambe yandø truyu kenamisran. ⁴I kilgawan ñi Titon pørar, nam pailøba namui isubigwan kanguelarrøtø Jesucristoinug pasra tøgag, ñi nai trag nusrkai lataigwan. Namui Tius Møskaimba, Cristo Jesús namui Kaigyugurri Wesrabiiba, nui ka yandø tab indigwan gøben, chi isumgaig tab gøbigwan gøben ñun tranrraimab isur.

Cretasrø chitø maramelø

⁵Na ñun tru Cretasrø kørørmarøppe, trusrø tru chi maramelø lutø gørørmisriilan lutøgurri tab tamarøb kerrigu chab patsø gønrraimba, katø pueblomørig iglesiamerayu Tiusweiwan pera marøb pønrrønrrabelø wesrawa bønssønrrai, ñune trusrø treeg kørørmarig køn, na ñun maig martrai karuigwan treeg

martrai. ⁶Tiusweiwan pera marøb pasrabiibe mugøben ‘chi kòn’ dainanrrabgaig, kan sraindø tøgäig, katø ureemeragucha Jesucriston kørebelø tøgäig kømig kòn, nòmun ‘maig marøb amønig køben amønibelø gøn’ chib wamindinabelø, kabe ‘mørmeelø larrø gailø gøn’ chib wamindinabelø treeg ureg kømøtø. ⁷Kaguende Tiusweimburabelan ashib pera pasrabiibe ‘øyeeg kòn’ dainanrrabgaig kømig kòn. Ke nø maig taigwandø, martrai inchibig kømøwei, kuchigurrindø ke chinsraatø inchib namabig kømøwei, mutsiiraptiig kømøwei, kwayam lamig larrø chullig kømøwei, ke maramgailan marøb, an nu gatøramigwangøba chullig kømøwein gømig kòn. ⁸Masken treeg kømøtø, mugøben nui yau pubelane yaambumay wamønrrab muniitø wabig kømig kòn. Tabigwane undaguig, maig unamigwan isua møra uñibig, sølgandø tabig marøbig, Tiusweimburabeløyu newan tabig uñibig, asr mumay srua itanmaptø uñmíig kømig kòn. ⁹Tiuswei wamwan chi isumgaig ciertonigwan maig kusrenanigwane, tindøga basrabig kømig kòn, chi kalø gømø tabig kusrenaniitøga katøganelan ‘maig maramigwan treeg maray’ chib wamindamiba, katø ‘kalø maran’ chibgøba waminchibelan, nømguen galø marøbelø gúin gúi nebua ashchai wamindamiba.

Tru peemaytø yunømara gusrenanøbelø

¹⁰Kaguende nøm maig martrab chippe, ke purab purab pønrramisrøbelø gøben, wamdø nigarmera gøben, katø may wamincha ka kegørrørskøbelø gøben truba nørrø gøn. Tru treeg inchibeløbe judíosmera tru asru circuncidawarmera, truilørre mas inchibelø gøn. ¹¹Inchawei treelane waminchib gømønrrai mera, nømui trigwane kandø gasra basramig søl gøn. Kaguende chi maramíig mara an nørrø tøgamisrøg køb, ke yaba, yaba yandø mandøgucha gømuielø melønrrai mara gørrømarøb amrrun, chi kusrenanamgailan kusrennøb.

¹²Tru Cretasrø kan møg nømui utuig nømui tiusmeraiwan waminchibiitøwei nøm tøgagúima trendaig købig kòn: “Cretasrø misaamerabe chu uraskucha isa waminchiptø warabelø, animal lataitøguen gømø purab gailø, kan mabgucha igatø! mamburab mabelø, trurrigu pøgølelø gøn” cha. ¹³Truig trencha wamindiibe isa gømø, sölwei wamindig kòn. Inchawei nømune waminchippe mørmø gømø, mørtrai mur waminchig, tru isubigwan

Jesucristoinug pasra tøgagømigwan chi kaiba lindiimíig chishig tabig tøgagúigwane, ¹⁴judíosmera ka nòmðø isua wamindiilø tøgagúilan tru gúindø mørøb pønrrømøwei, katø møguelø tru newan ciertonigugurri tarømisrar chi maramigwan nòmðø pønrrailan tru gúindø marøb pønrrømøwei inchai. ¹⁵Chi trømbøig isumeelø chishig tabig isubelaimbe chitøgucha tabig chishig køn. Trune Tiuswan chigucha køremeelø, larrø rrømbøig isubelaimbe chigucha chi tabig chishiibe chi gaagøn. Kaguende nømui turyu isubiiba, isub kebachib pasrabiiba truiløbagen larrø rrømbøig mindiilø tøgar gøn. ¹⁶Tiuswei mayu amøñibelø guer chibendø, nømui chigøben marøb amønaitøgabe chi ashmeelø gúi lataitøwei marøbelø gøn, ashikken gønrrabgaig køsongønrraptiig marøbelø, larrø mormø misaamera, chigøben tabig maramigwane martrabga misaamera gøn.

Chi kalø gømø tabig kusrenanigwan waminchib

2 ¹Trune ñibe waminchippe, tru chi kalø gømø tabig kusrenanig, truig maig køben treegwan waminchig. ²Møguelø kølleeløbe chigøben incha ashmø, maig pønrramigwan bønrrabelø gønrraimba, mugøben chine cha asinab pønrrømeelø gønrraimba, isua møra misaasun amøñibelø gønrraimba, isubigwan Jesucristoinug pasra tøgagúigwane chi kaiba lindiimíig chishig tabig tøgagønrraimba, undag købigwan tøgar gønrraimba, chine pub arringucha melabig melønrraimba waminchig.

³Katø treetøwei ishumburmera kølleeløbe, Tiuswei ureemerasun maig amønarnigwan amøñibelø gønrraimba, wam gusrab wamniga llirapteelø, vino mutsamigwan larrø chullelø gømønrraimba, tabigwane katøganelanguen kusrenanøbelø gønrraimba waminchig. ⁴Øyamay nømbe tru keløbar ureetø ishumburmeran: isua møra misaasun amønarnigwan, nømui kelan, nømui uregwan undaguelø gømigwan, ⁵tab isua møra amønarnigwan, chi kaig marmø chishig amønarnigwan, nømui yaambu chi marmelan asha marøb purrabelø gømigwan, tab inchibelø gømigwan, nømui kelø maig chiben treeg melamigwan waminchibelø gønrrai, ‘Tiuswei wamwan chi tabig kømøn’ chib kaig wamindig kømønrraingue.

⁶Katø matsørelan chigucha ‘øyeeg, øyeeg marøb gømig køn’ chib, isua møra amøñibelø gønrrai waminchig. ⁷Ñi chiyutøgucha tabig mariiløyu nømguen trunun asha kusrenrrai marøb kenamar. Incha

ñui kusrenanamigu ñibe kusrenanøppe, maig kusrenanamigwan isa gømø sölwan gusrenanøb, ka indzab marøb lataig kømøtø tab gusrenanøb, ⁸katø waminchibgucha wamindamgailan waminchimøwei, mu ‘øyeeg kalø gøn’ damgaig waminchib kusrenanrrig. Tru namun tsalø gúin bønrrabeløguen namun møjgwandøgucha chi chaguen kaig waminchab gaima, kørig misraguen gørrømisrtrai.

⁹Katø tru karuindiig melabeløbe, nømun karub pera gøbelø nøm maig karuben, ‘chiyutøgucha treeg marøb melamig køn’ chib waminchig, karub pera gøbelø tab gúi mørøb purrønrrai marøbelø gønrraimba, katø trigu rrigu løtapteelø gømønrraimba, ¹⁰katø chigøben tsøgøl inchipteelø gømø, masken newan chi isumgaig tabig marøbelø gúi asiilø gønrraimba, Tius namui Kaigyugurri Wesrabigwei tabig kusrenanigwan nøm chi marigutøgucha purø tab gúi asig kørrømisrtrai. ¹¹Kaguende tru Tiuswei ka yandø tab indiibe maya misaamera ashchai kenamisrin gøn, tru kaigyugurri webambamig kønrrai.

¹²Inchen tru ka yandø tab indiibe mõi ya nam øsig warain gwaløm, isua møra misaasun amønami g kønrraimba, maig kønrrabigwan tabig sølgandø maramig kønrraimba, Tiuswan maikkucha pesannamø tabig amønami g kønrraimba kusrenanøbig køn, Tiusweimbura b trømbøig kaig maramelanba, chigøben ke trømbøig marøg køtanmaptø marmumigwanbabe yandø elachar gømig kønrrai, ¹³tru nam isua munig melaig mayanguen tabigwan muniirab melappe, Jesucristo tru namui purø nu Tius namun Kaigyugurri Wesrabigwei törguegwalmabig kenamisramigwan muniirab. ¹⁴Kaguen nøbe nøashib namuyasig kwaig køn, chigurrimbunø purø rrømbøigugurri wesranrrappa, katø kerrigu newan chishelø, nui misag sötømera nuyasiitø gønrrai martrappa, katø tabig maramigwane marmø gømø martrab inchibelø gønrrai. ¹⁵Ñibe iilan waminchig ‘øyeeg, øyeeg marøb gømig køn’ chib; ‘øyeeg maramibe kalø gøn chib; marmøtay’ chib. Waminchippe, mu mandamgaig waminchig; ñun mu kaashib gønrrain gømøtøgue.

Jesucriston kørebelan mandø amønami gwan waminchibig

3 ¹Misagwan ashib karub purrabelan lata, katø chi maramigwan martrai karub purrabelan lata, truillø maig chiben treeg melabelø gønrrai, isunanøb waminchig, chi garuben mørøbelø

gõnrraimba, chigøben tabig maramigwane martraptø bõnrrabelø
 gõnrraimba, ²mugøben gatøganun chi kaig waminchimeelø
 gõnrraimba, kwayam lapteelø gømøtø, masken tab inchibelø
 gõnrraimba, maig købash inchimø, mu misaamerandøgucha tabig
 marøbelø gõnrraimba. ³Kaguende merrabsrømbe namgucha
 Tiusweimburabelane larrø chugúi mørmeelø, Tiuswan mørøg
 kømui inchibelø, pella amønibelø, chigurrimbunø trømbøig marøg
 købiiba kaig mara tab gúi mørøb waramibatø srua ambiilø, kaig
 maramigwangøba isubelø, chigurrin gøben gatøganun pusrkwai
 ashib, namun katøganelø larrø tsalø asiilø, katøganelan namgurrin
 rreetøwei tsalø ashib nambe treeg amønibelø gøbig ker. ⁴Inchen
 Tius namui Kaigyugurri Wesrabigwei tru ka yandø tab indiiba,
 nui undag købiiba maya misagweyasig yandø kenamisren,
⁵nam chigøben sølgandø tabig marøbelø gúimba gømøtø, nøbe
 lastima asig maig køben, namun kaigyugurri wesraig køn. Treeg
 marøppe, srøilø gõnrrai pillmaikkurrimba, Espíritu Santo namun
 peemayelø gõnrrai srøig yunømarikkurrimba gøn. ⁶Nøbe Espíritu
 Santon tøgagømburab tøgagõnrrai namuim bala ørig køn, namui
 Kaigyugurri Wesrabig Jesucristogurri. ⁷Nui ka yandø tab indiitøga
 namune chi kaig kømeeelø lataig tabig kørrømara, ketigwan
 utønrrab ureemera gõnrrai kørrømarig køn, nam tru managatig øsig
 kømigwan tøgagõnrrurmab isua munig melaig truig maig køben
 treeg. ⁸I trendaibe chi isumgaig isig kømøtø gøn. Inchawei iigwan
 waminchippe marmø gømø, treeg martrai waminchig Tiuswan
 kørewa bõnrrabeløbe chigøben tabig maramelangøba marøb
 melønrrab inchai. Kaguende tru iig tabig mariiløbe misagwan truba
 tabig purugunrrabig køn.

⁹Inchen ke ka yandø kwayam lailanba, katø nambe i
 misaamerainukkurri amrrubelø guer chib wamindiilanba,
 kangurrin gangurri ke chab guemøriyab katø tru aleguiyam
 lailanba, maig maramigwan martrai Moisés pøriiløyu, øyee
 chibig køn chatø ambugurri igurri tru wamindiilanba, treelan tru
 gúindø mørøb pasrønrrab gømø. Øyeebe chi purugunrrabgailø
 waminchimuinguen wamindiilø gøn.

¹⁰Møikkøben Tiuswei ureemeran nørøø gatøgan sötø marøb
 uñibigwane 'øyeebe maramig kømøn' chib kan pamaygatig wama
 wamincha, wamindigwan mørøg kømui inchene, yandø treeg
 møwane chi asamig kaanrrai tarømisramig køn.

¹¹Kaguende øyeeg møøbe yandø nøasiitø tsabø minchaig, kaig marøbig, nui kaig mariitøgatøwei kaigyu kebeñaig køn.

Nunashib wamindiilø srabeig

¹²Artemaswan gúi, kabe Tíquicon gúi ñuimay na ørene, Nicópolisrømay nan ashchab, petø attrab inchunrrig. Kaguende nabe tru pishim bølmerawane trusrø tsunrrab inrrab isur.

¹³Tru maig maramigwan martrai romasreelai pøriilan ne ashibig kusreb møg, Zenaswanba, Apoloswanba, nømui ambamigwan amrrai, chigucha palab punrrain gømø, purugunrrig.

¹⁴Pøs chigøben ke purugumdiig pub arruben treegu purugunrrab, namuieløgucha tabig maramigwane kusreb ambamig køn, ke chigucha marmeelø gønrrab gømøtø.

Wamindiilø srabeig

¹⁵Mayeeløba naba amøñibeløbe ‘tab ka amøñigueh’ cha wam øran. Nam lataitøwei nømui isubigwan Jesucristoinuutø pasra bønrrøwa namun undaarabelan ‘ka amøñigueh’ tan chirrunrrig.

Tius nui ka yandø tab indiibe ñim mayeeløba pasrønrrun.

Filemón

Pablo Filemónwan pørøb

¹Na Pablo Cristo Jesúsweimburabelan marøb megaikkurri kailan keeri yau pasrabiibe, namui nuneg Timoteoba misra, ñi nai undaaraig namui maramigu lincha marøbig, Filemónwan gøben, ²katø namui nuchag Apian gøben, trugurri Arquipo tru namui marameløyu, marig kørørmisrtraí tranrrab megabigwan gøben, katø tru iglesia ñui yau tulundzunabelan gøben pørar. ³Tius namui Møskaimba, Señor Jesucristoba nui ka yandø tab indigwan gøben, chi isumgaig tab gøbigwan gøben, ñimun tranrraimab isur.

Jesucristoinuutø pasra tøgagúiba, undag kòbiiba tøgagúig

⁴Tiusba waminchippe, chu urastøgucha ‘ungwa, ungwa’ chibig kur ñun isub. ⁵Kaguende ñui isubigwan Señor Jesúsweinug pasra tøgá megaigwanba, katø Tiuswei misaameran ñibe truba undaguig køn daigwanba wammørikkurri. ⁶Inchawei tru ñui isubigwan Jesucristoinug namba lata tøgagúig, trube truba tabig purugub pasrønrrai Tiuswan miabig kur, tru Cristo Jesúsweinug nam chigurrimbunø purø tabig tøgagúigwan nebua ashchai. ⁷Kaguende nane truba rruba kasrag køb, truba tab gúig kuig køn, tru ñui undag købikkurri. Kaguende Tiuswei misaamerai manrrømerabe, ñigurri pishindø tab gúig kasraatø pønrrønrrai marin gøn, ñi nai nuneg.

Pablo Onésimoyasig purøwaminchib

⁸Inchawei nabe Cristogurri mu chi chinrraingai, ñi maig maramigwan treegwan martraí karua basramig tøgagøbendø,

⁹treeg inchibgunrriibe tammay undag købiitøga tiusmanda treeg martrurrnrig cha, ñun miawa pasrar, na Pablo, yandø køllig, na mõi ya Cristo Jesúsweiwan marøbig kuikkurri kailan keeri yau pasrabig. ¹⁰Nai nusrkai lataig Onésimoyasig ñui merrab purøwaminchab inchar, na kailan keeri yau pasrøwa, nai unø lataig misra basrabigweyasig.

¹¹Onésimobe merrappe chigucha gømfīg købig kuig, møimbe ñuyasig lata, nayasig lata, chiyutøgucha ke nø burugub megabig misrin gøn. ¹²Incha nabe gatøle nune ñuimay ørar, tru nai manrraugurri undaaraigwan. ¹³Pøs naba kørørmisrtrai nune, nabe kørørmarøbmørø isuig køn, Tiuswei tabig srø wamgurri nan merrarraawa keerig pasrøben, ñi burugub megab lataitøwei nan purugub meganrrai. ¹⁴Inchendø ñimerrig maig tainguen ashmøwatøbe, nabe ke treeg martrab inchimuig køn. Tru na ñun øyeeg martrunrig taigwane, ke na ñun treeg maramne indig kømøtø, uyube ñi maig maramdiig køben treeg asha martrai inchar. ¹⁵Onésimo kan maya yanagatig ñun øyeeg tarømisrøppe, katøle managatig ñi nun yandø tøgagørrømisramig kønrrab gua, øyeeg tarømisrig kuitamab isur. ¹⁶Møimbe yandø nune karuindiig megabig kui lataig kømøtø, katøguchinguen tøgagømmay tøgagørrunrig, kan undaaraig nunewan lataikke, nøbe naimbe truba undaaraig køn. Trune ñibe treetøguen gømø, katøguchinguen isua undaaramig køn, nø misag basraigu lata, Señorweinug pasraigu lata.

¹⁷Inchawei ñi naba lincha marøbig kuabe, trube, nune nan utab lataig uta tøgagørrunrig. ¹⁸Inchippa ñun chigøben kalø mara gúin gúi, kabe chigøben ulø misra gúin gøb chigøbene, trube, trunun na ashchab, nan ulø bayrrunrig. ¹⁹Na Pablo naashib nai tasiitøga iigwan pørar: ‘Ulø chigúin gøbene, trube, na purø waramønrrun’ chib, ñuimbura ñitøweinguen Tiusweimburaibeløyu nan truba nørø ulø gúigwan truigwanguen chi kebachimøtø. ²⁰Trube, nai nuneg, ñi Señorgurri øyeeg tabig nayasig marimbe gøtan, nai manrrau chi isumø, tab gúi pasramig kønrrai Cristoing.

²¹Na pørøppe, na maig taigwan møra martraitamab isua børar, katø na maig taigwandø gømøtø, katøguchinguen tabig martraitamab isuague. ²²Tru gømnetø katø na ñimuisrømay arrua, na chu pua kørørmisramigwangucha tamarøb megarrunrig chinrrab inchar, na ñun ashchab arrumig kønrrai, ñim Tiuswan

miab melaig treeg pubene, katøle ñimun ashchab arrumuitamab isua.

Wamindiilø srabeig

²³Cristo Jesúskurri tru kailan keeri yau naba pasrabig Epafraskucha ñimun ‘tab ka amøñiguh’ cha øran. ²⁴Katø Marcos køben, Aristarco gøben, Demas køben, Lucas køben nai maramigu maram burugub melabelø, truiløgucha ‘tab ka amøñiguh’ cha øran.

²⁵Namui Señor Jesucristoi ka yandø tab indiibe ñimba kønrraimab isur.

Hebreos

Tius Nusrkaingurri wamindig

1 ¹Merrabsrømbe Tiusbe namui kølli misaamerane Tius maig karuigwan eshkabeløgurri, mumay gøben, katø gatø wamindig købig køn. ²Incha mõi i srabe gwalømmerawane nui Nusrkaingurri namun wamindan. Tru pirøwanba, katø srømbalasrø kerrigu chigurrimbunø købigwanbañau Tiusbe nøgurri mara basrøb, katø nundøwei tru chigurrimbunø pønrrabigwan kerrigu keta, nø ashib tøgagønrrai kørømarig købig køn. ³Nusrkaimbe Tius maig törguegwalmabig køben, treetøwei torig törguegwalmabig køn, chiyutøgucha Tius maig køben nø treetøweingue. Katø nøbe tru chigurrimbunø pønrrabigwane nui maramburab mari wamdøga trunun nø ashib tøga basran. Incha nøbe misaamerai kaig mariilan chab chishmarabe, yandø srømbalasrø Tørbilabig Purø Nu Tiuswei kusrmaygatø wanrrab wamisrig køn.

Tiuswei Nusrkaimbe ángelesmera lataguen gømø, purab nuig køn

⁴Pøs øyamay Nusrkaimbe ángelesmera lataguen gømø, purab nuig misrig køn, “Tiuswei Nusrkain” cha, wami munchin nø uta tøgagúibe, “ángeles” cha wami munchi lataitøguen gømø, purab nuig utig køb lataitøwei. ⁵Pøs Tiusbe kan mø ángelwan gøben managuen øyeebe chimuig køn:

“Ñibe nai Nusrkain gøn cha;

nabe mõi ñui Møskai misrar” cha.

Katø mø ángelwangucha øyeeg chimuig køn:

“Nabe nui Møskain gøben,

nøgurrimbe nai Nusrkain gønrrun” cha.

6Incha Tiusbe nui kandø Nusrkawan yu pirau kebattraí ørøb
urasma katø trendaig købig køn:

“Tiuswei ángelesmerabe mayeeløba nun køriibala tabig
wamindamig køn” cha.

7Inchen tru ángelesmeraimburappe Tiusbe trenchibig køn:

“Nui ángelesmerane kan isig ichibig latailø gønrrai maran cha,
katø nuiwan marøb melabelane nag bilabelø latailø
gønrraingue.”

8Trune Tius Møskaimbe tru Nusrkaweimburappe trenchibig køn:

“Ñi, Tius, ñi ashíb karub wamisra waibe
managatig pasrabig basrøben,
tru tabig sølgandø marøb tøgaweim børsøtsiibe
ñi ashíb karub wainug sølgandø marøb waig,
truig kønrrun cha.

9Sølgandø tabigwane ñibe undaarawa,
kaigwane ashig kømui indig køn cha.

Incha treekkurri Tius, tru ñui Tiusbe,
tru ñui línchibelan lataguen gømø,
purab nuig kønrrai mara,
ñune aceite srølig køn cha
maya nuguen kasraaranrrai.”

10Katø Tiusbe Nusrkawan trenchibig køn:

“Ñi Señorbe srøsrøzhiitø pirøwane
ñi mara basrig køben,
srømbalamerabe kerriguba ñui tasiitøga mara
bønsrailø gøn cha.

11Inchen truiløbe kerriguba chab pinøben,
ñibe wabig wanrrun cha.

Srømbalamerabe kerriguba asru kewagúilø lataitøwei
chab gølliranrrun cha.

12Ñibe tru srømbalamerane kan pala itø tsinigwan welan
guitishib lataitøwei kirra,
kewagúilan lataitøwei gatøle peemay
srøig yunømartrun cha.

Trune ñibe chu uraskucha yunømarmø,
treetø rreetø gøben,

ñi øsig wamig pilamerabe managuen patsønrraamøn” cha.

13Tiusbe mō ángelwan gøben managuen trendaig kaagøn:

“Nai kusrmaygatø wamísr cha,
ñun ashig kòmui inchib tsalø inchibelan
ñi ñui srøbmeran truilaím bala nebuna
wamig kònrrai pònsramnegatig.”

14¿Angelesmerabe mayamba espíritumera, Tius karuigwan marøb pònrabelø, kaigyugurri wesraig kòmigwan ketig uta tøgagònrabelan purugub pònrònrrai karua øriilø treelø gòmuitarru?

**Kaigyugurri wesraig tøgá bònrraigwan chinchaindø
elatsamig kòmøn**

2 1Inchawei treeg købene, nam wamindi mørigwane mas tab møramig balan, nam amønaig mayugurri inchippa pella ambinabgunmab. 2Kaguende Tius ángelesmeragurri wamindikken maig chippe, treeg kònrRAIN gúig kua, tru maig taigwan mørøg kòmub itøbunabelanba, møra marmeealanba truburø møra melamigwan maig utamigwan utònrrai pònsraig købig kòn. 3¿Namun kaigyugurri wesraig yeeg nuig tøgá bònrraigwan nam chinchaindø elacha, amøñabe, trube, nambe tru møra melamigugurrimbe, mandø incha wegòrrònrab? Kaguende kaigyugurri wesraig kòmig purø nuigwane Señor Jesús nòashib nòmerrig eshkaben, trugurrimbe tru nò wamindigwan mørøbelø, truigwane ‘øyeeg kòn’ cha, namun eshkaig købig kòn. 4Katø Tiusbe nò pasrain gúi ashchai mariiløtøgaba, kwaara asha gònrrai mariiløtøgaba, maramburab mariiløtøgaba, Espíritu Santogurri peg, peg marøbelø gònrrai nun maig tranamdiig køben pirisha keta traniitøgaba, tru wamindigwan Tiusbe treeg kuin gúi ashchai kenamarøb pasraig kòn.

Jesucristo gøn nam kaigyugurri webamba pònrramibe

5Nam mõi tru waminchib amrruigwan, waramig gatøgan tru wendøsrø srøig attrabigwane ángelesmera nòm garub tøgagònrrai, Tiusbe treeg marig kòmøn. 6Treeg kòmøtø, kanbaløsrø Tiuswei wamwan pøriguma møikkørøn Tiuswan trencha payig kòn:

“¿Misaabe ñuimbe chi gònrab gøh cha,
ñi ya isunrraimbe?

¿Ka mowandø ñi truba isua ashib attraimbe,
nøbe chi gøh cha?

7 Pøs kan maya yanagatiitø ángelesmera lataitøguen gømø,
 mōwane katøguchindø lamíig kōnrrai mara,
 nune maya nuguen tabig indiitøgaba,
 purø tab indiitøgaba,
 treetøga corona betsøsrøb lataig purø nuig kōnrrai marig kōn
 cha.

8 Incha kerriguba nui srøb umbu pōnsraig kōn” cha.
 Incha kerriguba nui srøb umbu pōnsrøppe, Tiusbe chiwan
 kōrrōmara gømōtø, kerriguba nō ashchai pōnsraig kōn. Treeg
 kuingucha, mōi yambatøbe kerrigubabe mōg nō ashib tøgagōmuin
 gúi aser. 9 Inchendø Jesúswane, kan maya yanatø ángelesmera
 lataguen gømø, katøguchindø lamíig kōnrrai marin gúi aser,
 Tius tru ka yandø tab indikkurri mayeelayasig kwamigwan
 maig kuig mōrøb pasramig kōnrrai. Mōimbe tru nō kwaikkurri
 törguegwalmabiitøgaba, purø tab indiitøgaba, treetøga kan corona
 betsøsrøb lataig marig kōn.

10 Pøs tru chigurribunø pōnrrabigwan marøb, katø truilan
 nuyasiitøwei pōnrrōnrrai marøb inchib Tiusbe nui ureemeran
 truba nōrrōwan nui törguegwalmabiisrōmay pera ippe, Tiusbe
 tru Jesucristo nōmerrig nōmun kaigyugurri pera webibigwan
 tru chine kaig indinab pureb megaitøga chi palōmíig newanig
 kōnrrai maramig, Tiusbe söl gúi asig kōn. 11 Kaguende Cristo tru
 Tiusweindø gōnrrai tarōmarøbig lata, katø Tiusweindø gōnrrai
 tarōmariilø lata, mayeeløba kan Mōskaweyeløtø gōn. Inchawei
 treekkurri Jesúsbe nōmune, “nai nunelø” cha, wamamig chi kōrig
 kuim basrōmōn. 12 Tiuswei wamwan pōriguma Cristobe Tius
 Mōskawan trenchibig kōn:

“Ñui munchiwan nabe nai nunelan wamindamōnrrun cha.

Incha ñuielø tulundzuna gúinug mayanguen tabig
 waminchib cantamōnrrun” cha.

13 Katø Cristobe treekkucha chibig kōn:

“Nabe ke Tiuswandø isua basramōnrrun” cha.

Incha gatø trendaig kōn:

“Tius nan trani ureemeraba nabe yu pasrar” cha.

14 Pøs ureemerama asr tōgar, animbar gúig købene,
 Jesucristogucha treeg asrtøwei tōgaig kōrrōmisrig kōn, nō
 kwaitøga tru kwamig kōnrrai nugwaimandzig mu chindamgaig
 marøb pasrabigwan pinishib, 15 katø nōmui øsig amōnaigu chu

urastøgucha tru kwamigwan korig kuindø, korig kuindø melabelan truyugurri wesrailø gønrrai marøb inçhab. ¹⁶Pøs nøbe purugumma, ángelesmeran burugumøtø, tru Abrahamweinukkurri amrrub misaameran burugun. ¹⁷Inçhawei treekkurri chiyutøgucha nui nunelø Tiuswei misaamera lataitøwein gømig kuig køn, kan maya Sacerdotesmeran Nø garub Sacerdote lastima ashibig kømigwanba, katø Tiuswei merrab maig maramigwan elachimø marøb pasrabig kømigwanba, treeg kønrrab, inçha tru maya misagwei kaig mariilan chi ulø bayamig kømønrrai kweetsigwan tranrrab. ¹⁸Pøs chiyugøben kebenøsrkønrrab indinab nõtøweinguen yeeg chine kaig indinab megabikkurri, chiyugøben kegørrønrrai indinab melabelan purugumig nøbe maramburab marøbig køn.

Jesucristobe Moisés lataitøguen gømø, mas nuig køn

3 ¹Inçhawei treeg købene, ñim, nai nunelø, Tiusweindø tarømariilø, nø srømbalasrøngurri wamigwan ñimgucha lata tøgagønrrai wamiiløbe, Jesúsuan, Tius tru Nøashib Karua Ørig, katø tru Maya Sacerdotesmeran Nø Garub Sacerdoten tab isua asay, tru nam nun kørewa pønrrer taigu truyutø pønrraigwan. ²Pøs Jesúsbe nun wesra basrøbig Tiuswan kerriguba maig taigwan møra marig køn, Tiuswei misag israelitasweimburab Moisés kerriguba chi maramelan elachimø, marøb pasrab lataitøweingue. ³Inçhendø Jesúsbe purabguen tab indig køn, Moisés lataguen gømø, kan ya marøbigwan mas tab indig køn, tru yawan lataguen gømø. ⁴Pøs chi yatøgucha pasrappe, mugøben marigweim basrainrrun. Inçhendø lutøgurri chiwandøgucha mara pønrsøbiibe, Tius køn. ⁵Pøs Moisésbe maramigu marøb megabig køppe, israelitasmera Tiuswei misagweimburab kerriguba chi maramelan elachimø, marøb pasraig købig køn. Inçha wendøsrø Tius wamindig kønrrabigwan nøbe kenamarøbig køn. ⁶Trune Cristobe, nø Nusrkain gua, Tiuswei yau chi maramelan elachimø marøb pasran, kerriguwan nø ashib. Inçhen tru yabe namdøwein guer, treetøgucha nam kullaaramø mur bønrramigwanba, nam truba tab gúi mørøb isua munig melaigwanba elachimø, nam tøgä pønrrabig bønrrøwabe gønrrun.

Tiuswei ureemerabe israb purramig tøgä gøn

⁷Inçhawei Tiuswei wamwan pørigu Espíritu Santobe øyeeg taig køn:

“Ñim mœin gwalœm Tius maig taigwan mœrabe,

8 mœrœg kœmui inchib ñimui manrrœmeran mur marmœtay cha,
tru mu misag warab waraimœnug Tius maig taigwan ñim
mœrœg kœmub namig inchib kurrab uras,

Tiuswan ke chinchibig kœtashchab inchib lataitœwei,
9 tru ñimui merrabsrœ kœlli misaamera nan truyu ke chinchibig
kœtashchab lataig inchib namisainug,
tru cuarenta años œrœba na yeeg chigœben mariilan ashatœgucha.

10 Inchawei treekkurri tru uras misaameran nan namig kœben,
na trendaig kœbig kœn: ‘Nœmui manrraube chu uraskucha ka
pellatœ, pellatœ bœnrrabelœ gua,
nai maymeran ashmeelœ gúig kœn’ cha.

11 Inchawei nabe nœmun namig kœben,
igatœ! treeg kœnrrun cha, trendaig kuig kœn:

‘Isramig na tœgagúinug nœmbe managuen kebamrraamœn’” cha.

12 ¡Au, nai nunelœ, ashiptœ guy! Ñimui utu mœikkœben Tiuswan
kœremœ kaig manrrœ tœgaig kua, Øsig Wab Tiuswan tarœmisrœb
megabgunmab. 13 Masken treeg kœmœtœ, kangurrin gangurri
œyamay melœgun chib kwalœmmœrig puruguyay, Tiuswei wamwan
pœrigu tru “Mœin Gwalœm gœn” daig truig pasrœbenbatœ, pœs kaig
maramibe ñimun truba tabig asœnaben, ñim mœitœgucha larrœ
mœrmíig misra pasrœmœnrrappe. 14 Kaguende Cristoba namgucha
tœgatœ melamigwan tœga bœnrrer, treetœgucha tru srœtœ ke truyu
isua pœnrraigwan srabegatig tœga bœnrrœwabe gœnrrun.

15 Inchawei Tiuswei wamwan pœriguma trendan:

“Ñim mœin gwalœm Tiuswei wamwan mœrabe,
ñimui manrrœmeran mur marmœtay cha,

Tius maig taigwan mœrœg kœmub itœbunab uras lataitœwei.”

16 ¿Inchen tru Tiuswei wamwan mœrendœ, Tius maig taigwan
mœrœg kœmub itœbunabelœbe mumera gúig kœh? ¿Moisés tru Egipto
biraugurri mayeelan pera webarrig, truilœ gœmuitarru? 17 ¿Inchen
tru cuarenta años œrœba Tiusbe mumeranre tab gœmui waig
kœh? ¿Tru kaig marœbelœ mu misag warab waraimœsrœ kwabelœ,
truilœre namisaig kœmuitarru? 18 Incha Tiusbe tru isramig nœ tœga
wainug, “¡Gatœ! kebamrraamœn” cha. Trenchippe, pœs ¿mumeran
gúi trenchinrrab gœ? Pœs tru mœrmeelan nœmunwein gúig kœn.

19 Inchawei nœmbe kebamrrab gaimaig kuin gúi aser, kaguende
kœrenrrab inchimeelœ gúikkurri.

4 ¹Pøs treeg købene, tru isramig Tius nø tøgagúinug nam kebambamigwan tøgagønrrun cha tranrrab misra kørørmisrig pasrøbenbatø, trunune purø isuptø tōga amønamig køn, inchipa ñim mõikkøben kebammubgunmab. ²Kaguende tru misag warab waraimøsrø mörög kømui inchibelan lataitøwei namungucha Tiuswei tabig srø wamwan wammørøsrkaig købig køn. Inchendø tru wamwan nøm wamindi möriibe chiweingucha chi purugumuig køn, kaguende tru mörøbeløbe isubigwan Tiusweinug pasra mörmuikkurri. ³Inchendø tru nam korebelaimbeguende tru isramig Tius nø tøgagúinug kebambubwei indamønrrun. Incha gua, Tiusbe trendaig køn:

“Nabe namig køben, igatø! treeg kønrrun cha,
trendaig kuig køn cha:

‘Isramig na tøgagúinuube nømbe managuen kebamrraamøn’”
cha,

nui chi marameløbe pirøwan chi købigwanbañau chab mara, tru isramigwane tru urasøngurri pasrig kuindøgucha. ⁴Pøs Tiuswei wamwan pørigu kanbaløsrø tru kwalømmerra siete nemisrøbigweimbura trendaig køn:

“Nui chi maramelan chab mara, kwalømmerra siete nemisren
Tiusbe isrig køn” cha.

⁵Mira chab rrendainuuma katø trenchibig køn:

“Isramig na tøgagúinuube nømbe managuen kebamrraamøn”
cha.

⁶Inchen truilø gømtø, katøganeløbe katøgucha isramig tru nø tøgagúinug kebambamig palab melan. Tru tab wamwan tru srøsrø nømunmerrig wammørøsrkainabeløbe mōra marmeelø gúikkurri kebaumig køn. ⁷Incha treekkurri Moisés tsub uraskurri yandø yeeg yana purøguchen, Tiusbe katøle gatōgan srøig “Møin Gwaløm” cha pasrig køn. Tiusbe Davidgurri øyeeg taig køn cha, tru mirawei na chab rrendaim bala:

“Møin gwaløm ñim Tiuswei wamwan mōrabe,
mörög kømui inchib ñimui manrrømeran
mur marmøtay” cha.

⁸Kaguende Josué tru israelitasmeran Canaan birausrø pera guebya, Tiuswei tru isramigwan tranig købig kuig kuimbe, trube, Tiusbe Josué uñib uras mas wendøsrø tru isramig Tius tōga waig katōgan gwalømigwan waminchimubsruig kuinrrun. ⁹Inchawei treeg

købene, tru kwalømmerna siete nemisren, Tius tru isrin gwaløm lataitøwei isramig nui misaameraimbe katøgucha truike ka basran. ¹⁰Kaguende isramig Tius nø tøgagúinug mõitøgucha kebibiibe nui chi maramelan israb wamisran, Tius nui chi maramelan chab mara israb wamisrøb lataitøwei. ¹¹Inchawei treeg købene, isramig Tius nø tøgagúinug kebamrrab tranrrønrrab inchigun, inchippa mõikkøben tru mõrmeelø marigwan asha, treegwandøwei marøb pønrrøwa, tru isramigu kebambamigwan kaimamønrrai.

¹²Pøs kaguende Tiuswei wambe øsiguig kømba, ka basrømø, marøb pasrabig kømba, treeg køn. Kan espada pinrrøba gatsig lataitøguen gømø, purø rrøsrig lataikke, namui mõsiiba, namui espírituba pønrraisrøngatig kebibig køn; namui asru kønabimørig, tsutsigu tutanumerasrønguen kelarrabgue. Incha chitø isua tøgagúilanba, katø manrrau chitø, chitø martrab isua tøgagúilanba tøgandø kelarrab kenamara bønrrøbig køn. ¹³Chigurrimbunø kerrigu mara pønrrailø pønrrabiibe Tiuswei merrappe chigucha søriibe pønrrømøn. Treeg kømøtø, tru nam chigøben mariilan eshkab pønrramig Tiuswein gabyube chitøgucha kuragutsiilø tøguelarrø kena bønrran.

Jesucristo, tru Maya Sacerdotesmeran Nø Garub Sacerdote

¹⁴Pøs treeg købene, Jesús Tiuswei Nusrkai, tru Maya Sacerdotesmeran Nø Garub Sacerdote tru srømbalameranguen puraibig namuyasig purøwaminchibigwan nam tøgaguen bønrraig køppe, tru nam nuimburabigwan kørewa pønrrer taigu, truyutø tarømisrtrab gømø, meløgun. ¹⁵Pøs namui tru Maya Sacerdotesmeran Nø Garub Sacerdotebe nam kullaguelø gúigwan namun lastima ashibig køn. Kaguende namun lataitøwei chiyugøben kebenøsrkønrrab indinab megaig købig kua. Inchendø nøbe managuen kaig marmuig køn. ¹⁶Inchawei treeg købene, Tius nø ka yandø tab inchib wainug chi kørig isumøtø kemallgun, tru nø namun lastima asigwan nebua tøgagønrrappa, katø nam chigøben ke palaig meløben tru nui ka yandø tab indiitøga purugumdiig kui asiilø gønrrappa.

5 ¹Mø sacerdotetøgucha maya sacerdotesmeran nø garub sacerdote yu pirauigwane mõguelai utugurri wesrawa basrig køn, Tiusweimburabeløyu misagweimburø nø marøb pasrønrrai, Tiuswan keta tranøb, katø misaamerai kaig mariilaimburø

animal gweecha tranøb, treeg martrai. ²Inchen tru sacerdotebe mayeelø lataitøwei chine nebuinabig kullaguig kuig køppe, chugúi mørmeelø pella amønibelan maig købash kømø, tab inchun. ³Incha nøgucha treetøwei kullaguig kuikkurri animal gweecha Tiuswan tranamig købig køn, misaamerai kaig mariilaimburøtø gømøtø, tru kaig mariilø nuimburabigweiwan chigucha. ⁴Pøs øyeeg purø nuig tabig indig sacerdote gømigwane mugøben ka yandø nøasiitøbe tøgagønrraamøn, treeg kømøtø, tru Aarón latawei Tius wamitøwei trunune tøgagønrrun. ⁵Katø treetøwei Cristogucha tru Maya Sacerdotesmeran Nø Garub Sacerdote gønrrab nøasiitø purø nuig mismøtø, nøbe Tius øyeeg chibigweinukkurringuen utig køn:

“Nibe nai Nusrkain gøben,

møin gwaløm nabe ñui Møskai misrar” chibigwan.

⁶Katø gatøganbaløsrøngucha Tiuswei wamwan pørigu nøbe Criston trendaig køn:

“Ñibeguende managatigwei sacerdote gøn cha,

Melquisedec maig køben, treetøweingue.”

⁷Cristobe yu pirau nø uñippatø Tiusba waminchib kappin gørrøgøb, isuig trashib truba miabig køn, Tius tru kwamigugurri wesramø gømø, wesrabigwan. Inchen nune Tiusbe mørig kuig køn, maig taigwan nø kørriibala mørøbig kuikkurri. ⁸Cristo ya Tiuswei Nusrkain gøbenguen, chine, chine nebuinab purayaigu maig karuigwan møramig købig kuin gúi treegwan kusreeg køn. ⁹Incha kerrigu newanig misrabe, tru mayeelø nun mørøbelaimbe managatigwei kaigyugurri wesraig kømigwane nøgurrrin gønrrai, treeg misra basramisrig køn. ¹⁰Inchen Tiusbe nune maya sacerdotesmeran nø garub sacerdote gønrrai wesrawa basrig købig køn, tru Melquisedec maig køben treetøweingue.

Isubigwan Jesucristoinug pasra tøgagúigwan elachib melønrrab gømø, isuptø tøgaguy

¹¹Pøs øyeegweimburab wamindamibe truba rruba nu tøgaguer. Inchendø ñimun ni kan mandø chaguen øyeeg køn damgailø gøn, pøs ñim chi taig møramigwane purø tsøndailø gúikkurri.

¹²Pøs ñim kusreb melaibe yeeg yanaguen gøben, ashene, ñimbe manawei kusrenanøbeløguen gønrrapteelø gøbendø, katøgucha ñimbe Tiuswei wamwan srøsrø mandø pølbasa kusrenanigwan gatøle møikkøben trunundøwei srøig kusrenanamig balain gøn.

Ñimbe palain gøppe, tranrrø mamig kømøtø, katøgucha pitsøbe balain gøn. ¹³Inchen møitøgucha pitsøtø muchibiibe katøgucha tru sølgandø tabig maram wamwane ni mandø gúinguen mørtrab gaimabig køn, katøgucha unøzhig lataig srø gua. ¹⁴Inchen tru tranrrø mamibe tru Tiusweimburabigu yandø ne nørrørawarwein gøn, tru chi maramigwan yandø trendø mara ashibelø tru tabigwanba, kaigwanba maig kuigwan tab chigúi mørøbelai.

6 ¹Inchawei ke ne nørrøramnegatig ambubig amgun, tru Cristoimburabig ke srøsrø bølbasra kusrenanig købelane nøørø wemalsrøppa bønsra. Incha tru pølbasra kusrenaniilø: tru kaig marmønrrab isua møramigwanba, kwamigumay srua inrrabig kaig mariilan elachib amrruigwanba, isubigwan Tiusweinug pasra tøgagúigwanba, treeg kusrenanigutø gatøle truigwandøwein gusreptø warø mugun, ²katø pitøga chishmarøb gømelan kusrenanigwanba, Tiuswei ureemeraim bala tasiimeran estsaramigwanba, kwabelø gatøle øsiiramigwanba, kaig marimburo tru managatig maig kønrrabigwan kørøramamigwanba, katøle truilandøweih, truilandøwei waminchib. ³Pøs Tius treeg kønrrain gøbene, trube, nørrøram maywan amrrab inchab.

⁴Kaguende yandø tru Tiuswei tørtrowa tør mariilø, srømbalasrøngurri ketigwan tab gúi mørøb utarmera, katø Espíritu Santoiwan utarmera, ⁵katø Tiuswei wamyu tabigwanba, tru wendøsrø attrabigu maramburab marøbelø truilanba nømbe purø tab gúi mørøb inchibelø gøbendø, ⁶Criston kerriguwan wendøbasra gatøle kørøbene, nømune katøyuube nømui kaig mariilan isua møra, Tiusweimay lliranrrai indamibe kaimamdiig køn, kaguende nømdøwei Tiuswei Nusrkawan gatøle kurussyu mesrøb lataig maramba, misaamera nune kan chigucha gømíig kui lataig inchib ka indzatø mørtrai maramba inchibelø gua. ⁷Kaguende sre puimørig tru pirø sre biwan muchibiima tru kwallib melabelai tab gønrrai mamig tusrchig kønrrai tranene, Tiusbe tru pirøzhigwane mayanguen tab inchun. ⁸Inchen kal dusrmerabah, ka kaig kaubatø misrøb pirø tru ellmarig chi misrmíibe, ke kaig puindø mørtrabig køn. Incha yandø srabebe parrig kønrrun.

⁹Pøs nambe øyamay wamindindøgucha, nai undaarailø, ñimuimburappe mas tabig munig basrain gúi nambe asha bønrrer, tru kaigyugurri wesraig pønrrabigugurri arrubig. ¹⁰Pøs kaguende Tiusbe kalø marøptiig kømøtø, sølgandø tabig køppe, ñim chigøben

marigwan pesannanrrab gòmøwei, katø nui munchiwan ñim undaatøga kenamarigwan pesannanrrab gòmøwein gøn, Tiuswei misaameran ñim purugua, katøgucha purugubig purugub gúimba. ¹¹ Ñim møitøgucha maig marøb melaigwan srabegatig treetø rreetø kenamarøb melaimbemab isuer, tru ñim Cristoba törguegwalmabigu purrønrrab isua munig melaigwan ke treeg kømnegatikke. ¹² Pøs nambe ñimun pøilø misrtrain gømøtø, tru nømui isubigwan Jesucristoinug pasra tøgagúitøgaba, tammay melabig melaitøgaba Tius tru tranrrab kørørmisrigwan utab pønrrabelø lataitøwein gønrrai inder.

Tius tranrrab misrig chi isumgaig

¹³ Kaguende Tius tru Abrahamwan ‘øyeeg martrab’ cha kørørmisrøb urasma, katøgan mas nuigwei merrab ‘igatø! marmø gømø, nabe maramønrrun’ cha, trendamdiig mu gatøgan kaabene, pøs Tiusbe nøasiitøwei pasramisra, ¹⁴ trendaig købig køn: “Isa gømø, cierton nabe ñun mayanguen tabig kønrrai marøb, katø ñuinukkurri maya nu misag larrøbichib gønrrai maramønrrun” cha. ¹⁵ Inchen Abrahambe tammay muniirabig muniirab megawa, Tius tru tranrrab misrigwan utig købig køn.

¹⁶ Pøs møgueløbe nøm lataguen gømø, mas nuigwei merrab pønrramisra, martrai indigwan ‘igatø! marmø gømø, nabe maramønrrun’ chib pønrrabelø gøn. Inchen tru nuigwei merrab nøm trenchib pønrraigwane nøm trenchib pønrraitøwei treeg marig kørørmisrtrai marøbig køn, yandø mas wamindamikkaikke. ¹⁷ Inchawei tru tranrrab kørørmisrigwan ketig utønrrabelan Tiusbe nui isuigwane yunømartrab wamfig kuin gúi ashchai törgandø kenamartrappe, nøbe, ‘igatø! marmø gømø, nabe maramønrrun’ cha kørørmisriitøga treeg kønrrai mara basrig køn. ¹⁸ Inchawei iig tru pabaløwane chinchaguen yunømaramgaig, tru tranrrab kørørmisriitøgaba, tru ‘igatø! marmø gømø, nabe maramønrrun’ daitøgaba marig kua, Tiusbe chinchas isønrraamøn. Treeg købene, nambe kullaaramø, mas mur bønrrønrrab inchigun, tru Cristoba törguegwalmabigu purramigwan nam isua munig melamig namui merrab pasrabigwan ke tab tøga bønrramisra, Tius purømisrøb wainug nam kemendønrrab luløbeløbe. ¹⁹ Iig tru törguegwalmabiisrø purramigwan isub munig melaibe kan ancla piumbu ellgwawa barcon merrarrab pasrabig lataitøwei

namui mõiizhigwan yandø chi isumikkaig treeg basrønrrai merrarrabigwan tøgaguer. Tru muniirab melaibe, tru “Kerriguba Tiusweindiig Kønrrain” cha pasrinug tru tab llensuzhig kelarrab megai wendausrøngatig kebya basran, ²⁰tru yandø managatigweyasig, tru Melquisedec maig køben treetøwei Jesúsbe Maya Sacerdotesmeran Nø Garub Sacerdote misra, tru namuyasig may gura rrarrøb nømerrig kebyaisrø.

Melquisedec tru sacerdote

7 ¹Iig tru Melquisedecbe tru Salem ciudayu rey gøb, Tius Mayeelaim Bala Pasrabigwei sacerdote gúig køn. Incha Abraham tru kwayabyu reymeran nø kanawa arruben, truike katønrrab webya, Abrahamwan ‘mayanguen tab gønrrun’ chibig køn. ²Inchen Abrahamgucha tru kwayabyu kanawa chitø srua arrigwan cienyu diez wesrawa, nun tranøbig køn. Tru Melquisedec munchibe: “Tabig sølgandø marøb rey gøn” cha wamig køn. Katø nøbe Salem ciudayu rey gúig kua, tru Salem chippe: “Ambumay imay tab gønrrai marøbig køn” chibig kua, nøbe: “Chi isumgaig tab gønrrai maramigwan tøgarey gøn” cha treeg munchigucha wamig købig køn. ³Melquisedecbe mōskai usringawei, kølli misaamerai munchi bōra wariiløyu pørig kawei, nø kal-laigwan wamindig kawei, katø kwaigwan wamindig kawayig køn. Kan managatigwei sacerdote købig kønrrabig kua, nøbe Tiuswei Nusrkai maig køben, treeg lataitøwein gøn.

⁴Pøs ñimguen isua asay, Melquisedecbe purø nuig køptø, tru namui merrabsrø kølli misag Abrahamguen tru kwayabyu kanawa chitø srua arrigwan cienyu diez wesrawa, nun tranig købig køn. ⁵Pøs tru maig maramigwan martrai Moisés pøriibe treeg kønrrain gøbig køn, tru Leviwei misagugurri amrrubelø sacerdotes kømigwan utabelaimbe tru cienyu diez wesraigwan israelitasmeran utamig, tru nømui nunelandøwei, truiløbe Abrahamwei misagugurrindøwei amrrubelø gúindøgucha. ⁶Inchendø Melquisedecbe Leviwei misagugurri arrumíikken, Abraham Tiusweyasig cienyu diez wesruigwan uta, Abraham Tius tru ‘øyeelø maramønrrun’ cha kørrømisriilan uta tøgawanguen tru Melquisedecbe ‘mayanguen tab gønrrun’ cha trendaig køn. ⁷Pøs kan muguen treeg kømøn damgaig køn, tru ‘mayanguen tab gønrrun’ cha, trenchibiibe, tru ‘mayanguen tab gønrrun’ dainabig lata gømø, mas nuig kui. ⁸Tru

Levíweinukkurri amrrub sacerdotesmeraimburappe, tru cienyu diez wesruigwan utabeløbe mōguelø ka pinørrabeløtø gōben, trune tru utabig Melquisedecweimburappe, Tiuswei wamyube ka øsig wabig kui lataig, treeg waminchibig kōn. ⁹Pøs, øyeekken isumdiig kōrre, tru Leví tru cienyu diez wesruilan nō utabig kōbenguen, tru cienyu diez wesruilan Melquisedecwan Abrahamgurri tru Leví mu gaabenbatøsrøwei traniibe, tru Leví nōguen rrani lataig kōbig kuin gúi tru Melquisedecwan. ¹⁰Pøs kaguende tru Melquisedec Abrahamwan katønrrab webarrub urasbe, Leví tru srøig kurrønrrabiibe nui kōlli misag Abrahamwei asrugurri attrab srø gōbig kōn.

¹¹Inchawei misaamera Tiusba newan tabelø gōmigwan tru levitas sacerdotesmera Tiusweimburabigu marøb pønrraitōga nebua tōgagōmig kōnrrai marig kuig kuimbe, trube, chiwei sacerdote gatōgan, tru Melquisedec maig kōben, treeg tōgagōmig srøig palømubsruinrrun, tru Aaróngurri amrrub sacerdotesmerayugurri arruaig kōmfiig. (Pøs tru israelitasmerayasig maig maramigwan martrai Moisés pōriibe tru levitasmera Tiusweiwan marøb pønrraigugurri arrubig kōbig kuindōgucha). ¹²Kaguende tru sacerdotesmera truyugurri amrrubelan yunōmarene, trube, tru maig maramigwan martrai karuigwangucha srøig katōgan peemaytø yunōmaramig kōn. ¹³Pøs tru Tiuswei wamyu Cristo øyeelan wamindinabiibe tru Levíwei misag sōtōmerayugurrin gōmōtø, katōgan misag sōtøyuig kōben, tru misagugurrimbe muguen trunune tru altaryube marøb pasrømuig kōn. ¹⁴Kaguende trendø asig kōn, namui Señor Jesucristobe Judáwei misag sōtōmerayugurrin gal-lawa arrig kui. Tru misaameraimburappe sacerdotesmera kōnrrun cha Moisésbe treebe chigucha waminchimuig kōn.

¹⁵Inchen iibe mas tōrgandø asamdiikken gōn, tru sacerdote gatōgan kenamisrøbig, Cristobe, tru Melquisedec lataitøwein gúi. ¹⁶Truibe tru nō sacerdote gōmigwan tōgagōppe, tru karua pōra basrig, ‘ø misaamerainukkurri arrubiibe sacerdote gōnrrun’ cha, trendaitōga gōmōtø, tru maramburab marig øsig kōmig mana pinørrabig kōmfiitōga gúiig kōn. ¹⁷Kaguende nuimburappe Tiuswei wamyu øyeegwein chibig kōn:

“Ñibe managatig sacerdote gōn cha,
Melquisedec maig kōben, treetøwingue.”

¹⁸Pøs tru maig maramigwan martrai basrig merrabsriibe misaameran tabelø gønrrai chi martrabgawei, chi purugunrrabgaweyig køben, yandø menda mara basrøppa, kagøbashiitindig køn, ¹⁹kaguende tru maig maramigwan martrai Moisés pøriibe chiwangucha newanig kønrrai marmuig kua. Inchendø mōimbe nam isua munig melamig katōgan mas tabig tōgaigwan Tius namun tranen, truikkurri nambe nun kemaler.

**Jesúswan Maya Sacerdotemeran Nø
Garub Sacerdote kønrrai wamig**

²⁰Inchen iigwan treeg kønrrai marøppe, ‘igatø! marmø gømø, nabe maramønrrun’ cha, Tius trendaitōga marig køn. Inchen merrabsrø katōgan sacerdotesmerane ‘igatø! marmø gømø, nabe maramønrrun’ cha, trendaitōga gømøtø, mariilø gøbig køn.

²¹Trune Jesúswane sacerdote gønrrai neera wannøppe, ‘igatø! marmø gømø, nabe maramønrrun’ daitōga treeg mara wannig køn, tru øyeeg chib uras:

“Señor Tiusbe ‘igatø! marmø gømø,
nabe maramønrrun’ cha,

Tius nø treeg isuigwane yunømarig kønrraamøn cha:
‘Ñibe managatigwei sacerdote gøn’” chib.

²²Incha øyeeg taikkurri, tru srøsrø acuerdo lataig kømøtø, mas purab tabig marigwan treeg kønrrai, Jesús nø purøbasramisrig køn. ²³Pøs tru merrab katōgan sacerdotesmerabe nørrø nemisrøb ambubig køn, kaguende nōmuimbe tru nøm marøb amrruigwan chu uraskatig marøbig marøb purrømøtø kwamig kuikkurri.

²⁴Trune Jesúsbe managatig øsig wabig køppe, tru sacerdotesmera marøb amrruigwan nøbe managatig marøbig marøb wamig tōgagøn. ²⁵Inchawei treekkurri gatø nøgurri Tiusweimay kemallibelane nøbe managatigwei kaigyugurri wesrabig køn, kaguende nøbe nōmuimburab purøwaminchib managatig øsig wabikkurri.

²⁶Kaguende Maya Sacerdotesmeran Nø Garub Sacerdote nambe øyeegweim balai melaig kuig køn, newan tabig kui asig, chigucha kaig marig chigaig, newan chishchig, kaig marøbelainukkurri tarømarig, purø bala srømbalamerasrønguen puraya wanrrai kusruig. ²⁷Tru katōganelø maya sacerdotesmeran nøm garub sacerdotesmera pønrrabeløbe mōitøgucha nōmui

kaig mariilaimburabigwanmerrig trana, trugurrimbe tru maya misagweyasig kaig marimburø kwalømmørig animalmera gweecha, Tiuswan tranøb pasramig, nøm lata Cristobe treeg maramig palain gømøn; kaguende nøbe nøasiitøwei tranøppe, kan bijitø managatigweyasig rranig køn. ²⁸Tru maig maramigwan martrai Moisés pøriibe tru maya sacerdotesmeran nøm garub sacerdotesmerane møguelø newan tabig kømeeelan neera purrønniilø gøben, trune tru Moisés pørigwei wendau arrubig, Tius 'igatø! marmø gømø, nabe maramønrrun' daig wambe, newan tabig kønrrai kørromari Nusrkawan managatigweyasig neera wannig køn.

Jesús namuyasig tru Maya Sacerdotesmeran Nø Garub Sacerdote

8 ¹Tru nam mõi waminchib amrruppe, øyeeg chibrrre amrruer: Maya Sacerdotesmeran Nø Garub Sacerdoten nambe tøgaguer cha, tru srømbalasrø Tørbilabig Tius Purø Nuig wainug kusrmaygatø wamisrøbigwan, ²tru santuario, tru ciertonig mu møg kusrua basrig carpa ya gømøtø, Tius nø kusrua basrigu marøb pasrabigwan.

³Kaguende tru maya sacerdotesmeran nø garub sacerdotebe møitøgucha Tiuswan ketiilø tranøb, animalmera kweecha tranøb indamig købig køben, tru sacerdote, Cristogucha chigøben tranamig købig køn. ⁴Nø yu pirau unimbe, sacerdoteguen gømubsruinrrun. Kaguende Tiuswan ketamelan tru maig maramigwan Moisés pørigu maig tailan treeg marøb sacerdotesmerabe købguen indan. ⁵Inchen tru sacerdotesmera nøm marøb pønrrainuube tru srømbalasrø maig kuigwan øyeeg lataitøwein gúitamab asamibah, ka øyeeg kuitamab isumibatø gøn. Moisés yandø tru Tiuswei carpa ya tabzhigwan pølbasrtrab inchib megabenma, Tiusbe trendaig køn: iAu! Tru tunbalasrø maig martrai eshkaigwan trunun asha maramig køn cha, kerriguba treezhigweingue. ⁶Inchen Jesúsbe sacerdotesmera marøb amrruig mas purø tabigwan nebuin gøn. Kaguende tru purab nuig tranrrab misriilø purab nørreeløyugurri wesrawa, pønsrai tru srø acuerdon Jesúsbe misaamerai nø basramisra marøb pasran.

⁷Pøs tru srøsrø acuerdo Tius marig chi maramigwan newan martraptiig kuig kuimbe, truigwan kørromara, gatøgan srøig mara tøgagømig palømubsruinrrun. ⁸Inchendø Tiusbe nui misagu kalø mariilø gøn tamig wetørrawa, trendaig købig køn:

“Señor Tiusbe trendan cha: Kwalømmerna attrun cha,
Israelwei misaameraba, Judáwei misaameraba,
na nomba gatogan srøig acuerdo maramig.

⁹ Tru Egipto biraugurri nòmun kwalyu guemøra wesrunrrab
gwaløm,
tru na nòmui møskaløba acuerdo marig lataig kømøtø
maramønrrun cha.

Kaguende truiløma na acuerdo marigu pønrrømuikkurri,
nabe nòmune isua ashmuptindig køn” cha,

Señorbe trendaig køn.

¹⁰ “Pøs na Israelwei misaameraba acuerdo maramibe
iig køn cha, tru gwalømmerawangurrimbunøbe,
Señorbe trendan cha.

Na maig martrai karua bønssrailane
nòmui isuiløyu na pønssrøb,
na nòmui manrrømerayu pørøb inchen,
nagurri nòmuiembe Tius køben,
nømgurrimbe naimbe nai misaamera gønrrun cha.


¹¹ Mugucha chi kusrenanamig palømønrrun
nui mendaigwan lata,
nui nunewan lata: ‘Señorwan nebua ash’ chib,
kaguende mutøgucha nane nebua ashchun,
chigucha gømøzhikkurrimbunø mas nuikkatikke.

¹² Kaguende nabe nøm sølgandø tabig marøb amrrumuilan
lastima tøgagøb,
katø nòmui kaig mariilan gatøle isua wanrrab gømøwein
gur” cha.

¹³ Inchawei iig tru srø acuerdon, “srøizhig” cha wamappe, tru
srøtø marig købigwane, “køllig køn” cha trendan. Inchen yandø tru
køllirab tru patsab arrubiibe yandø ke pinamitø balab arrun.

Srømbalasrø santuariobe yu pirauig lataig kømøn

9 ¹ Pøs trube, tru srøtø acuerdo mariibe Tiuswan køriibala
tabig waminchib mandø maramelan nørøø wesruigwanba,
katø tru pirau Tiuswei carpa ya tabzhigwanba waminchibig treeg
tøgaig købig køn. ² Tru carpa yabe øyeeg marig købig køn: tru
umbu kebibyutø, tru “Tiusweindiig Kønrrain” dain gwartuyube,
candileroba, mishatsiiba, Tiusweyasiitø tarømarim birrimeraba



Hebreos 9.2

tøgaig. ³Inchen tru gatøgan tab llensuzhig mesraig wendau trusrømbe, tru “Kerriguwan Tiusweindiig Kønrrain” dain gwartu wamig, truig basrabig køn. ⁴Inchen tru umbube incienso barri altar orotøga mariiba, tru acuerdo mara kørrømarin caja kerriguba orotøga pinøbulig truiba bønrrabig køn. Inchen tru cajayube tru køtsø orotøga marigu tru mamig maná taigwan pusriiba, Aarónwei pørøtsig tru ishiizhig weguchibig købiiba, katø Tius tru acuerdo marigwan pørig tøgaig tru tambal sruuzheelø gøben tøgaig treeg basrabig køn. ⁵Inchen tru caja balabe querubinmera Tiuswei tru torguegwalmabig pasrai asamig treeg bønrrabelø gøn, tru israelitasmera kaig mariilan Tius nø ulø bayiimig kønrrai marinug nømui kwaldzariimeran trubalawan larrøbicha. Kerrigu øyeelane møjimbe lutøgurrimbe wamindamgaig køn.

⁶Mira maig taig tru øyamay tamara basrabe, sacerdotesmerabe Tiusweimburabelan maramigwan martrab katø gatø kebambubelø gøn, tru “Tiusweindiig Kønrrain” cha marin gwartuyu kebambubyutøbe. ⁷Trune tru umbusrø tru “Kerriguwan Tiusweindiig Kønrrain” cha marin gwartuyube pilayutø kebyamig køn, tru maya sacerdotesmeran nø garub sacerdote nøtø aningaig kømøtø, ani srua, trutøga nuyasiitøwei tranamiba, katø chugúi mORMøwa misaamera kaig mariilaimburø tranamibague. ⁸Incha Espíritu Santobe namune

øyamay gúitamab isumig tør maran, tru santuario srøtiig ka basrøbenbatøbe, tru “Kerriguwan Tiusweindiig Kønrrain” cha pasrinuumay misag umbusrø kebambam maybe kuriimfig srø gøn cha. ⁹Iig øyeeg marig pasrabiibe tru mõi øyan gwalømwei øyan gønrrabig køn cha eshkanrrabig kuig køn, Tiuswan tru keta tranøb, katø animal gweecha Tiuswan tranøb, øyamay nun køriibala tabig waminchib marøbelane nømui isub kebachib pasrabigwan newan chish martrab kaimabig kuin gúi ashchai. ¹⁰Tru mamimeran, mutsamelan, pitøga peemay beemay chish maramelan tru øyeelø karua pønsrailøbe asru ka palaweindiig købig kua, srøig mandø maramigwan mara pasramnegatiitø gúig køn.

Cristo nø kwaitøga purab nuig marig

¹¹Inchen tru chinetø purø tabig pønrrabigwei Cristo, tru Maya Sacerdotesmeran Nø Garub Sacerdote arruppe, tru merrab carpa ya lata gømø, purø nuig, trurrigu newan tabigu kebyaig køn, mu taska marig, yu pirauig kømfigu. ¹²Nøbe tru “Kerriguwan Tiusweindiig Kønrrain” cha marin gwartuyu kebippe, kan bijitø managatigweyasig kebyaig køn, møg cabramerai aniwan srua gømøwei, toro-ureemerai aniwan srua gømøweingue. Treeg kømøtø, nui anindøgatøwei kebya, øyamay nuielø gønrrai misagwan managatig kaigyugurri wesrabig køn. ¹³Tru møg cabramerai aniwan gúi, tru toro-ureemerai aniwan gúi, ishug waara-unøzhigwan parri usrøwan gúi, tru chish misramigweimbura Moisés maig martrai pørigwan trumay treeg chish misrmeelaim bala trunun wiitikken, tru nømui asru pala chish kørørmisrtraima treeg marøbig kuibe ¹⁴treetøguen gømøtø itru Espíritu Santo managatig pasrabig, truikkurri Cristo Tiuswei merrab newan chishchig nøashib tranøbigwei animbe namui isub kebachib pasrabigu kaig mariilø kwamyumay srua ibig pønrrabigwan chishmarmønrraitarru, nam Øsig Wab Tiusweyasig marøb pønrramig kønrrai!

Møimbe øyeeg martrab cha wamindig srøig

¹⁵Inchawei øyeekkurri Jesucristobe tru srø acuerdo marigwan misagweimbura tru purøbasramisra marøbiibe nø gøn, tru keta tranrrab misrig managatigweyigwan tru wamiiløbe utønrrai, tru

merrab srøsrø acuerdo marigu pønrrøwa, tru nò kwaikkurri kaig mariiløyu melabelan nuielø gønrrai wesranrrab.

¹⁶Pøs møikkøben kan testamento marigweimburabma, truigwan marøbig kwan cha kilgamerayu yandø treeg eshkabendøwei truyu pøriibe maig taig treeg pub attrun. ¹⁷Inchawei yandø tru testamento mara kørørmariibe trunun mara kørørmarøbig kwabendøwei tru pøriibe maig taig treeg pub attrun, tru kwamøwatø gømøtø. ¹⁸Pøs tru srøsrø marig acuerdoguen anindøga treeg kønrrai mara kørørmarig køn, aningaig marig kønrrab gømøtø. ¹⁹Inchawei Moisésma tru maig maramigwan martrai maig karua bønrrailan trumørig tru maya misaameran waminchib chab eshkawabe, toro-ureemerai aniwanba, møg cabramerai aniwanba, piba lindisha, trugurrimbe hisopo tusrchiiba, pigø isiizhiibamara, tru lindisaitøga tru maig martrai pørig kilga welan guirrigwanba, katø nui maya misaameranba itøtsurøb, ²⁰trenchibig køn: “I anin gøn cha, tru acuerdo marigwan yandø treeg marig kørørmisrtrai marøbiibe, ñim martrai Tius nò karua basrig.” ²¹Incha gatø treetøwei tru carpa yawan lata, Tiusweimburab marøb pønrraigu nøm chigøben marøb lutøgurri srua bønrrailan lata, tru anindøga itø tsurøbig køn. ²²Kaguende tru maig maramigwan martrai Moisés pøriibe kerrigu lutauba anindøga chish marig kønrrain gua, chi ani lusha gømíibe tru kaig marigwan ulø baymø, ka kørørmarig kømibe kaagøn.

Cristo kwawa traniibe kaig marigwan kerrabig køn

²³Inchawei iilø, tru srømbalasrø pønrrabelø lataig asønabelanma animal gweecha trani anindøga chish maramig palaig kuibe, trune tru srømbalasrøngue trendø truyu pønrrabelane tru purab nuig tabig kweecha keta traniiløtøga chish mariilø gømig kuig køn, tru animal gweecha keta trani lataitøguen gømø. ²⁴Kaguende Cristobe tru santuario ciertonig maig køben møguelø ka tre lataig asønabig mara basrinuutø guebimøtø, nøbe srømbalasrøngue kebyaig køn, mõi ya namuyasig Tiuswei merrab purøwaminchib wanrrab. ²⁵Tru maya sacerdotesmeran nò garub sacerdote yu pirauibe pilayu kan bijitø tru “Kerriguwan Tiusweindiig Kønrrain” cha marin gwartuyu ani nuin gømíigwan trannrrab srua guebiben, trune Cristobe katø gatø nòasiitø trannrrab gømøtø guebyaig køn. ²⁶Incha Cristo tru sacerdotesmera lataitøwei maramig kui kuimbe, tru pirøwan

mara pasrinukkurrimbunø katø gatø kwamig nebubsruig kuinrrun. Incha mõi ya kerriguwan srabe gwalømmerawan nõbe kan bijitø managatigwei kenamisrin gøn, tru nõashib kwaitøga kaig mariilan patsøga basrtrab. ²⁷Misaamerane kan bijitø kwamig kønrrai mara basrig køn. Inchen tru wendaube yandø maig kønrrabigwan asha gørrømarig kømig, truig attrun. ²⁸Katø treetøwei Cristogucha kwappe, nõ purøbasramisra kan bijitø kweetsig kwaig køn, truba nu misagwei kaig mariilan nõ kerranrrab. Incha gatøle arruppe, chigøben kaig mariilan nõ niirrab gømøtø, nõ arrumigwan truba rruba munig melabelane kaigyugurri wesranrrab attrab gøn.

Maig maramigwan martrai Moisés pøriibe newan marmuig

10 ¹Tru maig maramigwan martrai Moisés pøriibe tru wendøsrø ciertonig attrabigwan øyeeg kuitamab asamig ka tre lataig asønabiitø gúig køn, ke truiløbe gømuindøgucha. Incha øyeekkurri chu urastøgucha gatø pilamørig, pilamørig animal gweecha traniilø trutø rrutø marøb melaitøgabe newan tabelø gønrraimbe managuen treeg martrab gaimabig køn, tru Tiuswan tabig waminchib øyamay mariiløtøga kemallibelane. ²Inchawei øyeeg mariitøga tru newan tabelø gønrrai marøbig kui kuimbe, tru kweecha tranamelan øyangatiitø tranøbsruig kuinrrun. Pøs tru øyamay Tiuswan køriibala tabig waminchibelø tru nõmui kaig mariilan kan bijitø kerriguweyasig chish mariilø gúi kuimbe, trube, tru kaig marigwan tøga pønrrermab isub pønrramig chigagøbsruig kuinrrun. ³Inchendø tru animalmera gweecha pilayu bilayu tranøb gúiløbe kaig marigwan gatøgucha tøgar guermab isungarubig køn. ⁴Kaguende toro-ureemerai animba, møg cabramerai animbabe tru kaig mariilan chi kerranrrab gaimabig køn.

Cristo nõ kwaitøga kanmaytø newanig marig

⁵Inchawei Cristo yu pirau arruabe, Tiuswan trenchibig køn:

“Ñibe ketig traniilan lata, kweecha traniilan lata
utag kømui indig køn cha.

Inchendø kan asr tøgagønrrai,
ñibe nayasig tamarig køn cha.

⁶Parra keta traniilanba,
kaig mariilaimburø traniilanba
chigucha chi tabig asønamuig køn cha.

7 Inchen nabe ñun trendaig køn cha:

‘Nabe yu pasrar cha, nai Tius,
ñi maig maramig palai waben, na trunun martrab,
tru libroyu naimburab maig pørig basrøben, treeg.’”

8 Tru srøtø yu wendau chibgunrrig: “Ñibe kweecha traniilan lata, ketig traniilan lata, parra keta traniilan lata, kaig mariilaimburø traniilan lata utag kømui inchib, ñune chigucha chi tabig asønamuig køn” cha, (tru øyeelan traniiløbe tru maig maramigwan martrai Moisés pørig maig køben treeg traniilø gúingucha).

9 Inchabe gatø trendaig køn: “Nabe yu pasrar cha, ñi maig maramig palai waben, na trunun martrab”. Tru animal gweecha rranøb gúig merrabsriigwane Tiusbe tarømara basrig køn, Cristo kwaitøga tru wendau srøig arrubigwan mara basrtrab. 10 Tius tru maig kønrrain gøben treegu nambe nuindø gønrrai tarømariilø guer, Jesucristo nui asrwan keta trana, treeg marikkurri, tru kan bijitø managatigweyasig kwaitøga.

11 Chi sacerdotetøgucha kwalømmørig, kwalømmørig Tiusweimburabelan marøb pasrappe, kweecha traniilø katø, gatø, treetøweih, treetøwein rranøbig køn, tru kaig mariilan managuen kerranrrabgailan. 12 Trune Jesucristobe kaig mariilaimburø nø kwawa, kan bijitø managatigweyasig nui asrwan trana, Tiuswei kusrmaygatømay wamisrig køn. 13 Incha trugurrimbunøbe nui ashig kømui inchibelan nui srøbmeran truilaime bala nebuna wamig kønrrai Tius treeg marnegatig, truigwan muniirab wan. 14 Kaguende Cristobe kan bijitø keta traniitøgatø managatigwei newan tabelø marig køn tru Tiusweindø gønrrai tarømariilane. 15 Katø Espíritu Santogucha ‘treeg køn’ cha namun truigweimburab eshkawabe, øyeemerrig chibig køn:

16 Señorbe trendan cha:

“Tru na nomba acuerdo maramibe iig køn cha:
Tru gwalømmerawangurrimbe na maig martrai karua
bønsrailane nømui manrrømerayu pønrrøb,
nømui isuiløyu trunun na pørøb indamønrrun” cha.

17 Incha gatøgucha trenchibig køn:

“Nømui kaig mariilanba, larrø rrømbøig mariilanba
nabe managuen gatøle isub wanrrab gømur” cha.

18 Inchawei iilan yandø chi ulø bayamig kømíig kørrømarene, tru ka i mariilaimburøbe keta tranamig yandø chi palømon.

Tiusweimay kemallgun

¹⁹Inchawei, nai nunelø, santuario marinug srømbalasrø Señor Jesúswei aningurri chigucha chi korig isumø kebambamig tøgaguer, ²⁰srø may tru managatig øsig køm maywan, tru tab llensuzhig kelarrab mesraiwan nø namuyasig kura rrarrøb kebyaiwan. Tru tab llensuzhiibe nui asr køn. ²¹Inchawei kan sacerdote purø nuig Tiuswei misaameran kerriguwan nø ashib pasrabig nam tøgar gúig kōppe, ²²nambe namui manrraube chi sōra gømø kandø isub Tiuswan kemallgun, isubigwan Cristoinug pasrigwan chi kormø tōga, kaig isub kebachib pasrabig tōga manrrømeran chishmartrab anindōga itøtsura, chish bizhiitōga namui asrwan chish marague. ²³Tru nam munig melaigwan treeg kōrewa tōgagúigwane tab tōga bønrrøgun, ambumay imay srua ambinab gømøtø, kaguende tranamigwan Tius tranrrab misra korrømisrøbiibe maig taigwan tranmø gømø, tranøbìg køn. ²⁴Inchawei kanikkurri kanikkurri puruguyamigwan isua asiyaugun, undag kōbigwan tōgagømig kōnrrai martrappa, chigøben tabig maramig kōnrrai martrappa. ²⁵Nambe kanbalatø lynchib Tiusweiwan marøb tulundzunamigwane elachimugun, tru mōiløgøben amrrug kømub elachib guebambubelø latawei. Treeg inchimøtø, kangurri gangurri øyamay meløgun chib puruguyagun tru Cristo Arrum gwaløm yandø pub arri ashabe, masken rraatø melab.

²⁶Pøs Cristoimburab tru newan ciertonig maig kuigwan nam nebua asigwan utappe, utøbendø, kaigwan ke ka marøg kōppa marøb uñene, tru kaig mariilaimburø chiwan kweecha Tiuswan keta tranøptamibe yandø chigagøn. ²⁷Treeg kømøtø, tru korig kōmdiig maig kōnrrabigwan Tius asha marinab pōnrramiba, katø tru Tiuswan ashig kømui inchibeløbe nag purø rrømbøig naarabiitōga pinisailø gømiba, treegwandø muniirab pōnrran. ²⁸Tru maig maramigwan martrai Moisés karua basrigwan mormø, kaashibigwanma pailø gúi, pøneelø gúi 'kalø maran' chibelø werrubene, chigucha lastima asiimíig truike kwamig kōbig køn. ²⁹Inchawei Tiuswei Nusrkawan chi gømíig kui lataig itøbunab, katø tru acuerdo marigwan Tiusweindø gōnrrai nōmun tarømarøb aniwan larrø rrømbøig kui lataig mara tøgagøb, tru ka yandø tab inchib Espíritun tsalø wamamba inchibigwane kan treetøguen gømø, purø rrømbøig mōra meganrrai

marøbwei inchimønrraitarru. ³⁰Kaguende nambe øyeeg chib Tiuswan ashibelø guer: “Kaig marøbigwan mōra meganrrai maramigwane na maramig køben, truburø pagarwane na bagaramønrrun” chibigwan. Katø treekkucha taig køn: “Nui misagwan maig maramigwan asha gørrømarøppe, Señor nō asha gørrømartrun” cha. ³¹Øsig wab Tiuswei tasku kebenamibe si, ipurø rrømbøig kørig kømdiig køn!

³²Ñimguen tru merrab gwalømmerasriigwan gatøle isumbala, Cristoi tru srø wam tabig ñimun kebiløbengurrimbunø, kwayamigu lataitøwei purø rrømbøig nebuinab, isui pønrramig arruben, tru uras ñimbe ka melaig købigwan. ³³Ñimune kanmaymerawane maya misaamera i merrab indza asamig chine marinab, kaig indinab, katøganelan gatø øyeetøwei marøb srua gøben, ñimgucha treegutøwei tōga buraambub lincha bønrrabelø gøn. ³⁴Katø kailan keeri yau pønrrabelø lastima isuim bønrrøbene, ñimbe ñimun gúi lataitøwei isub, ñimui chi tōgagúilan kerrailø melamig nebingucha, treegu kasraatø ka melab inchibelø gøn, kaguende mas purø tabig mana patsønrrabig kømíigwan tōgar guermab isua ñimbe asha melabelø gúikkurri. ³⁵Inchawei ñim ke Tiusweinuutø kemenda pønrraigwane elachippa amrrab gømø, kaguende truike purø nuig tabig utamig kønrrabigwan tōgaig køn. ³⁶Pøs ñimbe chi isumø tammay melabig melay, Tius maig maramig palai waben trunun ñim chab marikkurrimbe, nō tranrrab misra kørørmisrigwan utamig kønrrai. ³⁷Kaguende Tiuswei wamwan pørigube trenchibig køn, pøs kan maya yanazhigutø,

“tru attrabiibe attrun cha. Chi srarrønrraamøn cha.

³⁸Inchendø tru sølgandø tabig naimbe

nui isubigwan nainuutø pasra tōgagúikkurri øsig uñchun cha.

Inchen nō kōriimata wendømay yabe,

trube, nøbe nane tab gúi wanrrai martraamøn” cha.

³⁹Inchendø nambe tru pinisailø gønrrab kōriimata tru wendømay ambupteeløgucha gømøtø, isubigwan Cristoinuutø pasra tōgarmera kaigyugurri wesrailø, truilø guer.

Merrab misaamera nømui isubigwan Tiusweinuutø pasra tōgagúig

11 ¹Pøs isubigwan Tiusweinug pasra tōgagúibe tru munig melaigwan ke treeg kønrraitamab isua pønrramig køb, katø nam chi asiimíigwan chabguen ke asha lataig pønrraig, treeg køn. ²Pøs isubigwan Tiusweinug pasra tōgagúikkurri namui merrabsrø misaamerabe Tius nømun tabig wamindinabelø gøn.

³Pøs isubigwan Tiusweinug pasra tøgagúikkurri kerrigu chi købigwane Tius nui wamdøga mara basrig købig kuin gúi wetøgørra bønrrer. Inchawei kaptøga asiibe chi asiimíigugurri mara basrig køn.

⁴Subigwan Tiusweinug pasra tøgagúikkurri Abelbe animal gweecha Tiuswan purø tabig tranig køn, Caín rrani lataitøguen gømø. Abel nui isubigwan Tiusweinug pasra tøgagúikkurri nøbe sølgandø marøb møg køn cha Tius wamindinabig køn, tru nø keta tranigwan Tius kashmø utab uras. Subigwan Tiusweinug pasra tøgagúikkurri Abelbe kwaig mu gaabendø, katøgucha nøbe wamindan.

⁵Subigwan Tiusweinug pasra tøgagúikkurri Enocwane yu piraugurri Tius srua iben, nøbe tru kwab tamigwane maig købig kui mormuig køn. Incha nune wetørranrrab gaimaig købig køn, kaguende Tius srua yaig kua. Pøs nun srua yaig kømøwatø, nøbe wamindinabig køn, Tiuswan tab gúi wanrrai marøb møg køn cha.

⁶Inchawei isubigwan Tiusweinug pasra tøgagømøwabe, Tiuswane ni chinchaguen tab gúi mørtraí maramgaig køn. Kaguende Tiusweimay møikkøben kemallibiibe, Tiusbe øsig wabig kuin gúi køreb, katø nun labelane nøbe tranamigwan tranøb inchibig kuin gúi køreb indamig køn.

⁷Subigwan Tiusweinug pasra tøgagúikkurri Noéma chi asiimíig attrabigwan isua gønrrai Tius eshkabenma, nun truba køriitøga arcan marøbig køn, nui yauelø kwamø, øsig webamrrai. Noébe tru øyeeg mariitøga pirau maya misagwan kailøgurri Tius møra pønrrønrrai mariilø gøbash cha kørømara, chi kaig kómíig lataig Tius tabig kørømarig kómigwan nøbe utig køn, tru isubigwan nuinug pasra tøgagúigugurri arrubigwan.

⁸Abrahamma isubigwan Tiusweinug pasra tøgagúikkurri tru ketigwan wendø utamsrømay webya inrrai wamøben, nøbe møra, webya yaig købig køn, chumay yam gúinguen mormubendø.

⁹Nøbe isubigwan Tiusweinug pasra tøgagúikkurri nuin gønrrai tru tranrrab misrim birau Abrahambe ka peesrøngurri arruatø lataig, kan peg birau lataitø tsuig købig køn, nun keta tranigwandøwei utabelø tru Isaacba, Jacobpa, truilø lataitøwei kan carpa yamerayu. ¹⁰Kaguende Abrahambe tru ciuda katsigwan niga basrønrrabig tøgagig tru srømbalasriigwan muniirabig købig kua. Inchen tru ciuda maig kønrrabigwan

treegwei unaasha wesrab, truigwan marøb inchibiibe, Tius nø gøn.

¹¹Abrahambe nøbe yandø maya køllig kuatøgucha isubigwan Tiusweinug pasra tøgagúikkurri unøtiig latawei chish kømigwan utig købig køn unø mōskain gōnrrab, (Sarabe ureg tøgagōnrrab gaimabig kuindøgucha), kaguende tru tranrrab misrøbig Tiusbe tru tranrrab misrigwane tranmø gømø, tranrrab gúi, Abrahambe treeg isua tōga basraig kua. ¹²Inchawei tru unø tøgagōmigweimburaeppe yandø kwaig lataig kuig, tru kan mōweinukkurrindø ureemera srøig larrøbichib mendappe, nu gøptø srømbalasrø estrellamera lataig, pi menda pisrum lataig købig køn, mu nebua mundzamgaig.

¹³Inchen i misaamerabe mayeeløba isubigwan Tiusweinug pasra tøgagúigutø amōnaig køn nōmui kwam gwalømgatig. Tius tru nōmun tranrrab misra kōrrōmisriilane utōmuindøgucha, Tius tranrrab misrig nuisrø pōnrrabelan yabsrøngurrindø ke kan asha lataig kasraarabelø gøn, ‘nambe srømbalasreelø, peesreelø gua, yu piraube ka petøweindø warer’ chib, tōrgandø trenchib waminchib. ¹⁴Inchen øyamay waminchibeløbe tru gatōgan birø nōmuin gōnrrabigwan lab ambubelø gúi, nōmbe tōrgandø asamig kenamaran. ¹⁵Pøs tru nōm werrua amrruin birōwan isub pōnrraig kui kuimbe, katøle trusrōmaytøwei llirawa ambimbe, ka ambamdiig kōbsruinrrun. ¹⁶Inchendø nōmbe treeg marmøtø, waramig katōgan birø mas purø tabigwan tøgagōnrrab isub pōnrraig køn, truike tru srømbalasriigwan. Treekkurri Tiusbe chi kōrig kuin gømōn ‘nōmui Tius køn’ daig kømig, pøs nøbe nōmuyasig kan ciuda tamarig kua.

¹⁷Abrahambe isubigwan Tiusweinug pasra tøgagúikkurri Tius Abrahamwan maig inchibig kōtashchab marenma, nøbe Isaacwan tranig køn. Tius tru ‘tranrrumōn’ cha kōrrōmisriilan utabig, tru Abrahambe, nui kandø nusrkai Isaacwan Tiuswan yandø ke kweecha tranamitø balabig køn ¹⁸Abrahamwane: “Tru ñuinukkurri amrrub misaamerane Isaackurrin gōnrrabelø gøn” cha, Tiusbe øyeeg taig købig kuindøgucha. ¹⁹Kaguende Abrahambe isua basrabig køn, Tiusbe kwailai utugurringuen gatøle kusrumig maramburab marøbig kui. Pøs kwailai utugurri gatøle øsiiraig lataig kui mara Isaacwane treeg utig køn.

20Isaacbe isubigwan Tiusweinug pasra tøgagúikkurri Jacobwanba, Esaúwanba nòmune mayanguen tabig pub attrai marig køn tru wendøsrø attrabigwan.

21Jacobma isubigwan Tiusweinug pasra tøgagúikkurri yandø kwanrrab wawa, Joséwei uregwan kanun ganun mayanguen tabig nebunrrai mara, nui pøtønain tsigwan pøtønawa basramisra, Tiuswan køriibala tabig waminchibig køn.

22Joséma isubigwan Tiusweinug pasra tøgagúikkurri yandø kwamig luturaab arruben, israelitasmera mayeeløba Egiptogurri wendøsrø webambamigwan wamincha, nui tsutsiimeran mandø indamigwan eshkab karua basrig køn.

23Isubigwan Tiusweinug pasra tøgagúikkurri Moiséswei mōskaløma Moiséswane larrø tab unøzhig kui asha, pøn bøl ørøba nun sōra tøgagúig køn, tru Faraón Egipto birau rey tru kwetchai karua basrigwan chi køriimatømøtø.

24Moisésma isubigwan Tiusweinug pasra tøgagúikkurri yandø kølig misrabe, tru Faraónwei nimbaserwei nusrkain gøn cha wamig kømigwan kaasig køn. 25Moisésbe Tiuswei misaameraba larrø gaig indinab megamigwan isuig køn, tru kaig mariiløyu tab gúi mōrøb kan maya yanagatiitø kasraarabgunrriibe. 26Wendøsrø attrabig Cristoyasig chine trømbøig waminab megaibe, egipciosmera chigurrimbunø tøgagúilan kerrigu tøgagúi lataikken gømø, purø nuig kui isua basrabig køn, kaguende nøbe tru wendøsrø truburø ketig utamigwan, trunun ashib pasrabig kua.

27Isubigwan Tiusweinug pasra tøgagúikkurri Moisésbe Egipto biraugurri webyaig køn, rey maya namikkølig waingucha. Inchen trunun kørmøtø, nøbe webya inrrab kandø isua basraig køn, kaguende tru kaptøgabe nebua asiimø Tiuswan yandø ke asha lataikken basraig køppe. 28Isubigwan Tiusweinug pasra tøgagúikkurri tru Pascua Fiesta taigwan mara, katø tru yaskappalamerawan aniwan srølig køn, tru kwangarub ángel israelitasmerai mayor nusrkalane kweechimønrrai.

29Isubigwan Tiusweinug pasra tøgagúikkurri israelitasmerabe Mar Rojoyu kan trendø puryu lataig larraambig køn. Inchen egipciosmeragucha larramrrab inchen, pi katøle itøgasrøben, chab gwaig køn.

30Israelitasmera isubigwan Tiusweinug pasra tøgagúikkurri tru Jericó ciuda bøtøgatan sruubirøbanrrimerabe chab



Hebreos 11.28

guegørrig kòn, nòm tru pøtøgatanwan kwalømmerna siete nemisramne llibaben. ³¹ Isubigwan Tiusweinug pasra tøgagúikkurri tru Rahab, nui asrwan anwei yanøb ishuuma, tru mørmø misaameraba kanbalatø nøgucha kwamuig kòn, kaguende tru pailø

israelitasmera maisrøn gøtashchab nilø ashchab amrrubelan tab wamab utikkurri.

³²¿Masbe chiwan waminchab gøh? Pøs nane Gedeónweimburab gøben, Baracweimburab gøben, Sansónweimburab gøben, Jeptéweimburab gøben, Davidweimburab gøben, Samuelweimburab gøben, katø Tius maig karuigwan eshkabelaimburab gøben wamindamikken nebumøtan.

³³Isubigwan Tiusweinug pasra tøgagúikkurri katøganelø nøm ashib karub tøgagúigwan nøm kanab, tabig sølgandø maig maramigwan marøb, Tius trannrrab misra kørørmisriilan nebua utab, leónmerai triimeran kasrøb indig køn. ³⁴Nag kørig kømddiig naarabelan naaramønrrai kweechib, espadatøga kweetsiilø gømigugurri wegørra ambub, truburab chi martrab gaimabelø gøbig kuig chisheelø misrøb, katø kwayabyugucha kwayamburab kwayabelø misra, peg birausrøngurri amrrub suldaumerane luløsrøb inchibelø gøn. ³⁵Isubigwan Tiusweinug pasra tøgagúikkurri ishumburmera nømui kwabelan katøle øsiiraniilø utabelø kuig køn. Inchen møyiløbe kwamnegatig purø rrømbøig marøb srua gúinabelø gøn, elatchab indingucha, elatchamamøtø, kaguende nømbe katøle øsiirawa srømbalasrø purø tabigwan nebunrrab isubelø gua. ³⁶Inchen katøganeløbe kaig marøb indza ashib srua gúinab, ichabetinab, cadenastøga lusrinab, kailan keeri yau merrarrowa keerinab melabelø gøn. ³⁷Inchen kaneløbe sruutøga peta kweetsinab, serruchotøga sølbinab para kweetsinab, espadatøga kweetsinab, amburab iburab ubisha galuschibah cabra galuschibatø kewar amøñibelø gøn, larrø waachamera gømig nebuilø, isubiitø kappinbalatø amønamiq nebuilø, katø larrø kaig indinab melamig nebuilø. ³⁸Øyeeg tab misaameran yu pirau misaamera nømun tøgagømiqe nømbe purø nu balabelø gøbig køn. Nømbe mu misag warab waraimøsrø, nørø tunmerawansrø chu bumgúinguen mørmeelø amøñibelø gøn, nørø srug yaambumerasrø, lendegørrab pirørrabmerasrø, øyeesrø kebamba warab.

³⁹Inchen nømbe isubigwan Tiusweinuutø pasra tøgagúigube tabig wamindiilø gøbendø, tru Tius trannrrab misra kørørmisriilane møykkucha tranig utømuig køn. ⁴⁰Kaguende Tiusbe nømui lata gømø, namuyasiibe purø tabig tøgagúig kua, tru nømbe namba kanbalatø misratøwei tru newan tabig kønrrai indig kuig køn.

**Maramga murelø amrruben, chi isumø,
namgucha mur bønrramig**

12 ¹Inchawei øyeeg købene, tru isubigwan Tiusweinug pasra tøgargøbelø nørø gøptø kan wañi lataig namuim bøtøgatan namun ashib purrabelan namgucha tøgagúig kōppe, namun chiguen tab ambamgaig chigøben kwatsiiranøbelanba, tru kaig marøbig namun iløsrkøptø iløsrkønrrai marøb pasrabigwanba webetøgun. Incha tru nam luløb ambamig Tius namui merrab may rrrrig tsubig nam tōga bønrraiwan maikkucha kōrrømisrmø, luløbig lulgūn, ²namui kaptøgabe Jesúsuan ashib, tru nōmerrig treegwan pera marøb, katø tru namui isubigwan nuinug pasra tøgagúigwan newanig kōnrrai marøb inchibigwan. Pøs Jesúsbe nō pumsrø kasrag kōmdiig pasrabigwan asha basraikkurri kurussyu mesraig kweetsig kwamigwan awentawa, tru kōrig marinab pasramigwan chi trunūn isua ashmøtø, truyu puraya, Tius wamisra wainug kusrmaygatømay wamisrig kōn.

³Incha tru kaig marøb misaamera Jesúsuan chine kaig maren, treegu ka awentab purayaigwan, trunūn ñimguen isuy, ñim chi muraaramøwei, chi kaima gōrrømisrmøwei indamig kōnrrai.

⁴Pøs tru kaig mariiba ñim kwayab melaigu, ñimbe gatøgucha ñimui aniwān lusamnegatiibe mara bōnrrømøn. ⁵¿Tius nui ureg kuimba tab wamdōga waminchib purugúigwan ñimbe yandø pesannabguen inda chindah?

“Nai nusrkai, ñi mur basram gusrenrrai Señor ñun murelan kusrennene,
kagatørre inditamab treeg isua tøgagømøwei,
Señor ñun isua mōrtraí marene,
truyutø kōrrømisrmøwei indamig kōn.

⁶Kaguende tru nui undaaraigwane
Señorbe nune mur basram gusrenrrai kusrennøb,
mundøgucha nui nusrkain gúitamab isua tøgagúigwane
nøbe kalø marigwan ølmartrab murba rranøbig kōn” cha,
trenchibig kōn.

⁷Maramga murig latailø Señor ñun maringaruigwane mur basram gusrenrrai kusrennrrab inditamab isua awentau. Kaguende Tiusbe ñimune nui nusrkain gúimba øyeeg maran. ¿Kan nusrkawan mōskai mur basram gusrenrrai kusrenniimíig mu treeg nusrkai kō

chinderah? ⁸Inchen tru kanelø mayeelø mur bønrram gusenrrai kusrenniilø latawei ñimun kusrenniimeelø gúisruandøbe, trube, Tiuswei trag nusrkalo gømtø, ka menda ureemera gúin gønrrun. ⁹Inchagucha namma yu pirau namui mōskalø namun mur basram gusenrrai kusrennøbelø nambe tōgar gua, truilanma maig kōbash inchimøtø, tab inchib tōgagøbelø gúibe, ÷tru namui espíritumerai Mōskai Tiuswane treetøguen gømo, masken maig taigwan tru gúindø mōrøb meløwa, øsig kōmigwan tōgagømig kōmønrraitarru? ¹⁰Namui mōskaløma nam mur bønrram gusenrrai nōmbe kan maya yanagatiitø namun kusrenanøb tōgagøbelø gøbig kōn, nōmun maig maramdiig kōben, treeg. Trune Tiusbe nam mur bønrram gusenrrai kusrennøppe namunguen tab gønrrai maran, nō newan tabig kuigwan namgucha tōgagønrrai. ¹¹Tru mur bønrram gusenrrai murigwan kusrenanene, ke kan tru urastøbe chiguen chi kasrag kōmdiig kōmtø, mur gúi mōrøb pasramibe gøbig kōn. Inchendø tru øyawan kusrenaninab puraambubelaimbe tsōndatøbe sōlgandø tabig amōnamiba, chi isumgaig tab amōnamiba tōgaig arrubig kōn.

Tius wamindigwan kaasamibe kōrig kōmdiig kōn

¹²Inchawei ñimui kwalmera kullaarailan chishmisrtrai kōnøgøb, ñimui tōmmera itønapteelan gatøle mur misrtrai maray. ¹³Katø ñim tab punab ambamig kōnrrai putur maymeran ølmaray, tru ñimui kōrriindi srøb wetunshimø, tammisrtrai. ¹⁴Ñimbe maya misaameraba ambugurri igurri lata tab gømigwanba, katø Tiusweyasiitø tarømisra tabig amōnamigwanba martrab inchib guy. Kaguende Tiusweyasiitø tarømisra tabig amōñimøwabe, muguen Señorwane ashchaamøn. ¹⁵Ñimbe purø tab isua ashib amōnay Tiuswei tru ka yandø tab indigwan ñim mōikkøben wendøbasrøb pōnrrabgunmab, inchipa ñim mōigwan gøben kan mōb srølgølig lataig kal-lawa nurab ya, truig pesriig ilørkōnrrai maren, misag purø nuwan tru kaitøga mindisailø gōmønrrai. ¹⁶Mugucha mōg lata ishug lata trømbøig marøb uñchab gōmøwei, kabe Tiusweimburabigwane chigucha gømui lataig inchibig gōmøwein guy, tru Esaú latawei. Truima kan mamig nindagweindø kan mayor nusrkai maig tōgagømigwan yanig kōn. ¹⁷Kaguende ñimbe yandø asiinrrun, Esaúbe mas wendøbe tru mayanguen tab indig kōnrrai keta tranigwan katøle mōskawan utønrrab inchen, nune yandø

ka taig købigwan. Tru mayanguen tab indig kønrrai tranigwan tøgagønrrab kappin gørrøgøb lawa, yandø treeg kønrrai chab marigwane ni chinchaguen lliskamgaig kuig køn.

¹⁸Pøs ñimbe, israelitasmera Sinaí Tunyu kemalla bønrrab latawei, kan nu tun katøramdiigu nagurømera naarabig tøgaiгу kemalla gømøwei, kabe løstiig, tru purø rrømbø løstiigu kemalla gømøwei, kabe kørig kømdiig isig ichibigu kemalla gømøwein gøn. ¹⁹Katø ñimbe tru trompeta mur wanrrøbigu kemalla gømøwei, kan wam wamindiilan mørtrab kemallmøwei indig køn. Inchen tru wam wamindiilan mørøbeløma: “Tiusmanda yandø waminncha” chibelø gøn, ²⁰kaguende yandø mas awentawa pønrramgaig køben, Tius tru øyeeg karua basren: “Kan animaldøguen tru tunwan kebachibiibe sruutøga peta kweetsig kønrrabig køn cha” trenchiben. ²¹Inchen tru treeg pureb pasrabiibe purø rrømbøig kørig kømdiig køben, Moisésbe trenchibig køn: “Kwaarøsaig kørig købiitø ke itønab pasrar” cha.

²²Ñimbe treegu kemalla bønrrømøtø, møyimbe ñimuimburaппe tru Sióñ Tun dainug, Øsig wab Tiuswei ciudadrø, srømbala Jerusalénsrø, muguen mundzamgaig ángelesmera tulundzuna kasrag purraisrø, treegu kemalla bønrran. ²³Katø Tiuswei tru srøsrø gal-lawa ureemera nømui munchimeran srømbalasrø pørig tøgarmera kanbalatø purraisrø, katø Tius tru maya misagwan maig maramigwan asha marøbig waisrø ñimbe kemalla bønrrab, katø mayeelø sølgandø tabig misaamerai espíritumera yandø newan tabelø gønrrai kørørmariilø purraisrø kemalla bønrran. ²⁴Katø tru srø acuerdo marigwan misagweimburo purøbasramisrøbig Jesúswangucha kemalla bønrrab, katø tru Abelwei ani ‘tru kaig marøbigwan ñi, Tius, ulø bay’ chib, ani lataikken gømøtø, Jesúswei tru ani itøtsurig mas purø tabig ‘tru kaig marøbigwan ulø baymø, ñi, Tius, pesannau’ chib waminchib aniyu kemalla bønrran ñimbe.

²⁵Inchawei tru waminchibigwan kaashib gønrrab gømø ashiptø guy. Kaguende Tius Moiséskurri isuptø gønrrai wamindigwan kaashibeløma yu pirauguen chi indiimíig ka yandø wegørrømuibe, trube, tru srømbalasrøngurri isuptø gønrrai waminchibigwan tarømisrabe, nambe truyugurrimbe ni chinchaguen wegørramgaig kønrrun. ²⁶Tru Moisés tsub urassrøma Tiuswei wamdøgabe pirøwane kønøgagutsig kuibe, møyimbe øyamay maramønrrun cha kørørmisrig køn: “Nabe gatøle pirøwane kønøgagutsamønrrun

cha, trurrigu pirøwandø gømtø, srømbalameranbañau.” 27Tru, “katøle kønøgagutsamønrrun” cha, tru trendaibe, tru ka mara bønstraindeelø kønøgagutsilane kerranrrab gúi tøgandø eshkan, tru kønøgagutsamgailø, truiløtø pønrrabig bønrrønrai. 28Inchawei tru nam ashib tōga burramig tru kønøgagutsamgaigwan nambe utab gúig købene, nambe ‘mayanguen ungwa, ungwa’ chigun, Tiuswan tab gúi wanrrai marøppe, nun køriibala tabig waminchib, kan yeeg tabig kønrrabmab isub. 29Kaguende namui Tiusbe kan nag lataig køn, chigucha kørørmisrtraingaig barrøbig.

Cristoieløbe mandø amønamig

13 1Abugurri igurri undaarabig undaaray, kan trag nunelø lataitøwei. 2Ñimui yau asiimeelø pubelan tab wamab ya bebamigwane pesannamøtay. Kaguende mōilōma øyamay marøb melōwa, ángelesmeranguen ya bebøbelø gøn, chi truilø gúitamab isumøtø.

3Katø kailan keeri yau purrabelane ñimbe nōmba kanbalatø keerig purrøwa lataitøwei isub, katø kaig indinab melabelane ñimun rreeg indi lataig isumig køn.

4Kasharamibe purø tabig købig kui mayeeløba treeg isua tøgagøb, katø kasharawarmerabe nōmui kiainuube mu pegwan pera guiamig kømøtø gøn. Kaguende mōg lata, ishug lata trømbøig marøbelanba, katø itøluløpteelanba, Tiusbe nōmun maig kønrrabigwan asha martrab gøn.

5Ñim amønñippe, anwane ke chinchimmørø chull inchib amønñimøtø, ñim mōi maig tøgagúitøgatø tab gúi mørøb kasraatø amønamig køn. Kaguende Tiusbe trendaig kuig køn:

“Managuen ñundø elachimøwei,
chinchibgucha tsunrrai managuen ñun tarømisrmøwei
indamønrrun” cha.

6Inchawei øyeeg taig købene, nambe treeg kønrraitamab isua, chi isumø trenchinrrun:

“Nan purugubiibe Señor nø gøben,
nabe chigucha kørmmønrrun cha.

¿Møøbe nane chigúi martrautah?” cha.

7Tiuswei wamwan ñimun waminchib, ñimun pera marøb pønrrabelane isua gømig køn. Nōmui tru tabig amønaigu asha kusrenrrai mandø tabig kørørmarig købigwan tab isua asha,

tru nòm isubigwan Jesucristoinug pasra mandø tøgagúigwane treetøweih tøgaguy.

⁸Jesucristobe merrabsrø lata, møyian gwaløm lata, katø managatig nøbe yunømarmíig, treetø gøn. ⁹Chigøben peemaytø kusrenaniilø pesrøteeløtøga amburab iburab srua ambiilø gønrrab gømøtø guy. Pøs namui manrrømera Tiuswei tru ka yandø tab indiitøga mur bønrramigwan utiibe tabig køn, tru chi mamimeran manrrai karua bønssailan marøb megaig lata gømøtø, tru øyeelan mariibe chiweingucha chi purugumeelan.

¹⁰Nambe kan altar tøgaguer tru Tiuswei carpa ya tabzhigu marøb pønrrab sacerdotesmerabe tru altaryuigwane mamig kømíig. ¹¹Pøs tru maya sacerdotesmeran nø garub sacerdote tru, “Kerriguwan Tiusweindiig Kønrrain” tannug tru animal gweetsiilai aniwane tru kaig mariilaimburø trannrrab umbusrø srua kebyaindøgucha, tru animal gwaigwei asrmerane nøm warainukkurri nøørøsrø srua webamba, parriilø gøbig køn. ¹²Inchawei treetøwei Jesús kucha ciuda yaskabyugurri wambig nøørøsrø kwaig købig køn, nui anindøga Tiusweindø gønrrai misaameran chish martrab. ¹³Inchawei namgucha nuimay nun katønrrab webamgun ciudayugurri wambig nøørøsrø, nun maig trømbøig indinab megaigwan namgucha treetøwei kaig marinab melønrrab. ¹⁴Kaguende nambe yu piraube kan ciuda managatig pasrab pasrønrrabig chigar gua, nambe tru attrabigwan lab guer. ¹⁵Inchawei Señor Jesucristogurri chu urastøgucha Tiuswan nam animal gweecha lataig tranøppe, purø tabzhig wamindiilø trangun, nui munchiwan tabig wamindi wam tru trigugurri webarrubiitøga. ¹⁶Ñimbe tabig maramigwanba, ñim chi tøgagúigwan pirishib gømigwanbabe pesannanrrab gømø melay. Kaguende kweecha tranøb lataitøwei Tiuswan keta traniilø øyeeg traniiløbe nø purø tab gúi wanrrai marøbig, treeg køn.

¹⁷Nimun pera marøb pønrrabelane maig karuigwan mørøb, nøm maig chiben treegwan melay. Kaguende ñimun chi kømønrrai chu uraskucha ashibeløbe nømwein gøn, nømui chi mariilan nøm Tiuswan eshkab pønrrønrrabelø gua. Nøm maramigwan marøb melappe, kasraatø, chi isuin gømøtø, marøb gønrrai inchigay. Kagen trengømuissruandøbe, ñimune chiguen chi tabig kønrraamøn.

¹⁸Namuimburab ñim Tiuswan miarrunrrigay. Pøs nambe namui isub kebachib pasrabigu chi ‘kalø gøn’ chibig chigar bønrrab, katø chiyutøgucha nambe tabig marøb melønrrab isua meler. ¹⁹Nabe ke tiusmanda Tiuswan miab gørrunrrigay chinrrab inchar, na peba ñimuisrømay gatøle arrumig kønrrai.

Patsøgønrrab srabe wamindiilø

²⁰Tru chi isumgaig tab gøbigwan tøga Tius, tru managatigwei acuerdo mari anindøga tru Ubishameran Ashibig purø nuig, namui Señor Jesúswan kwailai utugurri kusrubiiibe ²¹tru nø maig maramig palai waigwan martrai chigurrimbunø tabig palabigwan ñimun tranrrun, Tius nø purø tab gúi ashib wamig kønrrai Jesucristogurri namuinug nø marøb pasraitøga. Jesucristone managatig torguegwalmabig kønrrun. Treeg kønrrun.

²²Na øyamay melamig køn chib wamindi wamwane, nai nunelan, tiusmanda tammay utørrunrrigay chinrrab, pøs nabe landøtiig pørar. ²³Namui nuneg Timoteobe kailan keeri yaugurri webyain gúi ñim wammøra gønrrai inchar. Incha nø petø arrubene, nabe nøba ñimun ashchab arrumønrrun.

²⁴Ñimun ashib pera bønrrabelø mayeelanba, katø mayeelø Tiuswei misaameranba ‘tab ka amøñigueh’ tan chirrunrrigay. Katø italiasreeløgucha ñimune ‘tab ka amøñigueh’ cha øran.

²⁵Tiuswei tru ka yandø tab indiibe ñim mayeeløba pasrønrrun.

Santiago

Israelwei misag truørø amba warabelan Santiago pørøb

1 ¹Na Santiago Tiusweimba, Señor Jesucristoimba marøb megabig Israelwei doce nusrkaløgurri misag nørø larrøbicha, pirau kan ørøtø amba warabelan ‘ka amønigueh’ chinrrab inchar.

Tiuskurri kusrebig kømig

²Nai nunelø, chigøben, chigøben puig meløwabe, truba tab gúi inchib, kasraaray, ³kaguende ñimui isubigwan Jesucristoinuutø pasra tøgagúigwan maig kõtashchab marigugurrimbe masken tammay melamig arrubig kui ñim ashibeløbe. ⁴Inchendø ñim tru treeg tammay kullaaramø, ka melaibe, newanig kønrrai inday, chiyugucha neilø, chi isumgaig newan bønrrabelø, yandø chiyugucha palømø newanelø.

⁵Ñimun møjigwan gøben øyeeløyu tab asha maramigwan kusrebig kømig paløbene, Tiuswan miau, nøbe tranrrun. Kaguende nøbe mayeelan tranøppe, merøbalatø rranmøwei, katø chi miabene, namømotø, tammay tranøbig køn. ⁶Inchendø miappe, ke Tiusbe tranrraitamab isua miamig køn, treeg kømuptinchaitamab maizhikken chi treeg isumøtøgue. Kaguende chi treeg kømønrrab gø chindermab isubiibe kan maryu pi welarwan isig ichibig amburab, iburab srua yaig lataig køn. ⁷Møikkøben treebe Señorwan chigøben utamuitamappe isumøta. ⁸Kan møg møindø øyeeg martrab isub, katøguen srønabe peetø isubiibe, chiyutøgucha mumayguen gømíig unan.

⁹Kan truburab chiga nunezhigwan Tius nune truba nuig marene, purø tab gúi møramig køn. ¹⁰Inchen puaibe purø tab gúi

møramig køn, Tius nune chigucha gømfīg lataig marene. Kaguende puaibe kaumerayu u lataig kua, pasrabig pasrønrrab gaiman. ¹¹Pøs pørr webarrua, purø mur bachene, kaube mul-laben, ube peñen, tru tabzhiibe yandø pinan. Øyeetøwei puaikkucha nui chigøben penab, yanøb uniiløyu pinønrrun.

Chinetø kaig pub arringucha treegu ka megab

¹²Chigøben pub arruben, tammay megabig megabiibe mayanguen tab gúig køn. Kaguende treegu puraya basramisrøppe, nun undaguelan Tius keta tranrrab kørørmisrig tru øsig køm coronan utønrrun. ¹³Møigwan gøben chiyugøben kaigyu kebenamdiig mörørabene, Tius treeg isunandan chimøta. Kaguende Tiusbe mana kaigu kebenamdiig kuig mörørai wamøwei, ni gatø mun kaigu kebenørkønrrab inchimøwei inchibig køn. ¹⁴Treeg kømøtø, møigwandøgucha nui kaig isubeløtøwei srua iben, truiløtø yandø tabig lataig asønangarua kebenørkaim basran. ¹⁵Inchen tru trømbøig isuilø yandø umbu kebya, pasramisrikkurrimbe, kaig maramig kal-lan. Inchen tru kaibe yandø ne nurappe, kwamigwan kal-lanrrai mara basran.

¹⁶Nai undaaraig nunelø, ñimguen pella peemaytø isub pønrrømøtay, ¹⁷chitøgucha tabig ketiiba, katø chigøben tabig newan marøbelø gønrrai ketiibabe srømbalasrøngurri arrubig køn, tru srømbalasrø chine pilab pønrrabigwan marøbig Tiusweinukkurri. Nøbe nø maig køppe, manatøgucha treetø gua, nuinuube løstørab lata inchib, tørmisrøb lata inchib, inchibiibe chigagøn. ¹⁸Nun trendø treeg marøg kuikkurri, nui newan cierton wamdøga namune gatøyg srøig kal-langaruig køn, nø kerrigu misagwan ellmara pønrrailai utu nammerrig ke srøsrø ellmarig misrig latailø gønrrai.

Kalutøga møriitø gømø, maramig køn

¹⁹Nai undaaraig nunelø, iigwan isuy: ñim mayeeløba möramigwane muniitø burramig køn. Inchen wamindamigwanba, namamigwanbabe tsøndatø isuptø maramig køn. ²⁰Kaguende kan møg namig køtanmaptø mariibe Tiuswei sølgandø tabigwan marmøn. ²¹Inchawei treeg købene, ñimbe ashikken gønrrabgaig marigwanba, chigøben kaig mariilø trutø netsaig tøgagúilanba webeta elacha, Tiuswei wamwan ñimui manrrau ellgwaigwane

mur gurrashmø, tammay utay. Kaguende tru wam wamindiibe maramburab marøbig køn, ñimui møsigwan wesramig.

²²Pøs Tiuswei wamwane maig martrain daigwan ñimbe marøbelø gømig køn, ka mørato, mørato gønrab gømotø. Trengømuissruandøbe, chi mormui lataitøwei ñimasiitø ka kegørrab pønrraig webinrrun. ²³Kaguende møikkøben Tiuswei wamwan mørøptø mōra, tru maig taigwan mōra marmíbe, kan mōg nui maløwan espejoyu ashibig lataig køn, ²⁴nui malø maig kuigwan asha, katø llirawa, ippe, pesannab lataitøweingue. ²⁵Inchen møikkøben Cristo maig martrai karua pasrig newan sølgandiig, tru chi iløsrkaimíig kønrrai marøbigwan ke tab asha, truyu megabig megawa, tru martrai karuigwan pesannaptinchimotø marøbigweimbe, nui mariiløyu mayanguen tab gúig kønrrun.

²⁶Ñim møikkøben, Tius martrai karua bønrrailøyu maizhikken purø bunømø marøbig kurmb isubendø, nui niløtøgabe maig kurrøbashtø waminchibiibe nøasiitø kebeñib pasran. Inchen tru nō Tiusweiwan maizhikken purø bunømø marøb pasrab taibe chi marmui lataitøwei webyan. ²⁷Tius Møskawei merrab tru nō karuilan maizhikken pinab marmø, chillig indiimíig mariibe, iig køn: usri mōskai, peta gwailanba, kelø peta gwailanba chigøben isuig meløben isua ashchab ambub, katø yu pirau kaig trømbøig arrubiitøga chillig incha bønrrømøwei indamig.

Misaameran møilandøgucha lata wamamig

2 ¹Ñim nai nunelø, ñimui isubigwan namui Señor Jesucristo tørguegwalmabigweinuutø tōga bønrrøwabe kanundø tab wamab inchimø, mundøgucha lata gømig køn. ²⁻³Ñim tulundzuna purrøbenma, kan truba pua mōg oro surtigastiig, truba tabig keweig pubene, truba tabzhig wamab, ñimbe trenchinrrun: “Yu gatøguchi tab wamdønug warra” cha. Inchen trunetø gatōgan, kwa waacha, truba shautøzhig chilliguig keweig pubene, ñimbe trunune trenchinrrun: “Ñibe øsrøndø, ka basrau” cha; kabe: “Uyu pirau wamisr” cha. ⁴¿Treeg marøppe, ñimui utu ñimdøweinguen kanune yandø nōrøø marøbguen bønrrømøtirru? ¿Ñimbe kaig isuaguen treeg inchib pønrrømøtirru?

⁵Nai undaaraig nunelø iigwan mōray: ¿Tiusbe yamba yu pirau waachameranwei lawa wesruig kømuitarru? ¿Nømbe isubigwan Jesucristoinuutø pasra bønrraigwan tøgagømburab tøgagøb, katø

nun undaguelan tru nø ashib karub waigwan Tius trannrrab misra korrømisrigwan chigucha utønnrabeløbe nømwein gønrrai marig kømuitarru? ⁶Trune ñimbe waachamerane chigucha gømfig marøb ka korig maran. ¿Tru puarmerawein gømuitarru ñimune mōra melønrrai marøb, katø misagwan ashib karub purrabelaimay ñimun uñchib waram srua ambubeløbe? ⁷¿Tru Cristoi purø tab munchiwan ñimun basra wamigwan nømweinre purø rrømbøig wamabelø gømuitarru?

⁸Tius tru martrai karua basrig purø nuig, nui wam pørigu pasrabigwan, maig chibig køben ñim treeg mōra marøb pønrrøwabe, søl marøb pønrrønrrabguen: “Tru mendaigwangucha, ñiasig lataitøwei undaarau” cha trendaigwan. ⁹Inchen ñim kanune tab inchib, kanune maig købash inchib pønrrappe, ñimbe kaig marøb pønrran. Inchen tru maig maramigwan martrai pōra trarriitøwei ñimune ‘kalø marøb itøbunab pønrran’ cha ñimundøwei itøra basrtrun. ¹⁰Kaguende tru maig maramigwan martrai Moisés pørigwan mōikkøben kerriguh mōra marøppe, marendø, tru utu kanundøguen kalø marøb itøbunikkurrimbe mayamba kalø mara basraig korrømisran. ¹¹Kaguende: “Itølulamig kømøn” chibiitøwei, treekkucha taig køn: “Kweetsamig kømøn” cha. Inchawei mōikkøben itøluumingucha, kweechibiibe, tru maig maramigwan martrai Moisés pørigwane itøbunan. ¹²Ñimbe wamindiiløyu lata, amønailøyu lata tru maig maramig chi iløsrkaimfig kønrrai marøbig nømun maig asha maramigwan marig kømig, ke yandø treeg maramig puim bønrrab misaamera lataig kømig køn. ¹³Katøganelan lastimaguengaig marøbelane, nømungucha treetøwei lastimagaig marøb asha korrømariilø gønrrun. Trune, tru lastimabaig marøbeløbe, kørømø, tab gúi webamba bønrrønrrun, tru maig kønrrabigwan asha maren.

Isubigwan Jesucristoinuutø pasra gúiba, chigøben tabig mariiløba

¹⁴Nai nunelø, ñim mōikkøben ‘isubigwan ke Jesucristoinuutø tōga basrabig kur’ chibendø, chigucha tabig marøb kenamarmubene, tru ‘isubigwan pasra tōgagur’ taibe, ¿chiwein gúin burugunrrab gø? ¿Kabe tru isubigwan Jesucristoinuutø tōga pasrab taig, truitø ñun kaigyugurri wesranrrautah? ¹⁵Kan nunewan gúi, kabe kan nuchawan gúi kemig truburab chigawei,

kwalømmerawan chi mamig chigawei megamne, ¹⁶ñimma møikkøben trendaimbeh: “Chi isumø, tab inrrig chib. Pachiitø gønrrai tsitsø gueb, øska mab, muchib uñchig” cha. Inchendø asru maig palain basrøben chi tranmubendøbe, niløtø basrainguen gønrrun. ¹⁷Inchawei øyeetøwein gøn, ‘isubigwan Jesucristoinuutø pasra tøgagur’ taig, chigøben mariilø chigaibe, nøasiitø kwaig køn.

¹⁸Inchendøgucha møibe trenchinrrun: “Isubigwan Jesucristoinuutø ñibe tøga basrøben, nabe chigøben tabig mariilø tøgagur cha. Ñui isubigwan Jesucristoinuutø pasra tøgagúigwan chigucha tabig mariilø chigaig nan kenamartra cha. Inchen nai isubigwan Jesucristoinuutø pasra tøgagúigwane nabe chigøben tabig mariiløtøga ñun kenamartrumøn” cha. ¹⁹Pøs Tiusbe kandø gønmab isub, ñi kørewa basraibe, trumaybe sölwein gøn. Inchendø kwaimandziimeragucha Tiusbe kandø gønmab kørewa, katø kørig køb itønab inchibelø gøn. ²⁰Au, ñi chugúi mormíig, nebua ashchab inchi, isubigwan Jesucristoinuutø pasra tøgagúig, chi tabig mariilø chigaig, ka yandiibe chigucha gømíig kuin gúi. ²¹¿Namui merrabsrø mōskai Abrahamma nui nusrkai Isaacwan tru altar marinug truyu Tiuswan trana, kwetchab trarren, nune chi kaig kømíig lataig tabig kørromarig kømuitarru? ²²Inchawei, ¿Abrahamweimburaibma ashmøtirru, nui isubigwan Tiusweinuutø pasra tøgagúibe tru chigøben mariiløba truiba misra kanbalatø marøb pønrrabig kui? ¿Inchen nui isubigwan Tiusweinuutø pasra tøgagúibe tru mariiløgurri kerrigu newan marig kørromismuitarru? ²³Inchen Tiuswei wamwan pørigu øyeeg taibe nebuig køn: “Abrahambe Tiuswan kørekkurri Tiusbe nune sølgandø tabig kui asha tøgagúig køn” daig. Incha nune ‘Tiusba truba tab linchibig’ cha, wamig købig køn.

²⁴Inchawei ñimguen ashen, Tiusbe kan mōwane nui tabig mariiløgurrimba chi kaig kømíig lataig tabig kørromaran, isubigwan Jesucristoinug pasriitøgatø gømøtø. ²⁵Katø treetøwein gúig køn, ¿tru Rahab, nui asrwan anwei yanøb ishuma, tru maig kōtasha asha wam sruamrrunrrab ambubelan nøbe ya bebamba, katøgan peg maywan amrrai eshkamba, øyeeg tabig marikkurri nune chi kaig kømíig lataig tabig kørromarig kømuitarru? ²⁶Kan asrma chi espíritugaibe kwaig køn; katø treetøwei isubigwan Jesucristoinuutø pasra tøgagøppe, tøgagøbendø, chi tabig mariilø chigaibe kwaitøwein gøn.

Niløbe truba kaig marøbig køn

3 ¹Nai nunelø, ñimui utube mayeeløbabe kusrenanøbeløtø gønnrab isumøtay, nam kusrenanøbelane maig kønnrabigwan asha marøppe, ka palatiig kømø, martrab gúi ashibelø gúig køppe. ²Kaguende nambe mayeeløba chiyugøben kalø marøb pellibelø guer. Inchen møikkøben nui wamindigu pellmíbe, tabigwan newan sølgandø marøb møg køn. Treebe nui asrwangucha kerriguba maig købash kømønrrab isua møra tøgagøn.

³Kaullimeranma nam trigu tsi muusrøppe, muwan inrrain guesruben mørtrai muusrøbelø guer, asr ørøba kønørramamø merrarramig. ⁴Katø barcomeran chigucha asay. Yeeg nørreelø purø mur isig ichibig srua ambiilø gúingucha, barcon muba inrrai inchib pasrabig kan lamøtiitøgatø truyu purrabeløbe nøm muwan ambug køben truwan øran. ⁵Katø niløgucha øyeetøwein gøn: Asru purø lamíig købendø purø nuig misrøb, chigøben purø nørreelø martrab waminchibig køn. iKan lamø naazhikkurrindø kan srønø tsibwan muba kuimbura parrøbig køn! ⁶Inchawei niløbe kan nag lataig køn, namui asru kaitø netsaig, asr ørøba trømbøig marøb mindishibig pasrig tru niløbe. Tru møra melamnug naarab pasrabiitøgatøwei piløga basrig køn. Incha nam øsig kuingurrimbunø kwamnegatig pilab pasrabig basrønrrun.

⁷Møøbe chigurrimbunø namig animalmeran gøben, illimeran gøben, ulmeran gøben, maryu purrabelan gøben kusrenanamdiig køn. Inchawei misaamerabe merrarraawa kusreezheelø marøbelø gøn. ⁸Inchendø niløwan gúimbe mugucha kusrenanrrab gaiman. Purø gaig kua, chinchaguen treeg marmønrrai merrarraawa tøgagønrrab gaimaig, kweechib larrø rrømbø mètø netsaig køn.

⁹Nambe niløtøgabe namui Tius Møskawan tabig wamindamba, katø Tius nø lataitøwein gønrrai mari misaameran tru niløtøgatøwei trømbøig nebunrrai wamindamba inchibelø guer. ¹⁰Tru rrigugurrindøwei mayanguen tabig kønnrai wamindamba, trømbøig nebunrrain chib wamamba indan. Nai nunelø øyeebe maramig kømøn. ¹¹¿Kan bigabyugurrindøwei chish bi webarrumba, kaig bi webarrumba inchautah? ¹²Nai nunelø, ¿kan higuera tusr købendø, aceitunas niguen, katø kan uvas tusr købendø, higos niirrautah? Katø treetøwei kan tre bigabma truyutøwei tab pi weguchimøn.

Kusrebig kômigwane Tius tranøbig kôn

¹³Møikkøben ñimui utu truba kusrebig, trurrigu chiwan gøben tab chigúi mørøbig kuabe, maig købash kômø, tammayig kuitøga kenamar, nuig kurmab inchimøtø, larrø tammay marøb unigu, truba kusrebig kuiyugurri arrubiitøga. ¹⁴Inchen treeg kômøtø, katøganweimburab ñimui manrrau ke chinchimmørø inchib pusrkwai asiibah, chiyutøgucha ke nømerrig kônrrab indiibatø tøga bønrrøwabe, ñimbe truba nørreelø kusrebelø guermab inchimøwei, tru newan ciertonigwan isab pønrrømøwei inday. ¹⁵Kaguende kusrebig kuig øyeebe Tiusweinukkurri arrumøtø, ka i piraugurrindø arrubig ka møwei isuiløyugurrimba, nugwaimandzigweinukkurrimbe arrubig kôn. ¹⁶Kaguende ke chinchimmørø inchib pusrkwai asiibah, chiyutøgucha møig kanab marøbig kêtashchab indiibatø pønrrabnuube, ambumay imay ke mumay gøbashtiibah, katø chigurrimbunø ka trømbøig mariiløbatø bønrran. ¹⁷Trune tru kusrebig kômig Tiusweinukkurri arrub iimerrig kôn, chishig. Trugurrimbe ambugurri igurri tab gønrrai indamig, katøganelø chigøben indingucha tammayig kômig, tab gúi mørøb kasraatø bønrrønrrai marøbig kômig, katøganun chigøben nebui megaben, truba rruba lastima ashibig kômig, tabig marøbig kômig, kanelane ørø mara, kanelandø tab inchimíig kômig, ka treeg kônmba ashchaindø gømø, maig maramigwan marøbig kômig, treeg kôn. ¹⁸Inchen ambumay imay tab gømigwan tøgagønrrab tru ambumay imay tab gøbiitøga ellmarøbeløbe, sølgandø tabig ellmariilø tulishinrrun.

Pirauigwan tab gúi inchib pønrrømumig

4 ¹Trømbøig kwayam lailøba, namishib chinetø cha møriiløbabe ñimui utube ¿chugurrinrre arrubig køh? ¿Ñimui umbu trømbøig kaig isubelø ni kan mandøguen gømíig pønrraptø bønrrøwa, tuyugurrinrre arrubig kømuitarru? ²Ñimbe chigøben tøgagønrrab inchendø, tøgagønrrab gaiman. Kweetsamba, katøgane chi tøgagømønrrai ke chinsraatø indamba indan. Inchendø chinchagucha tøgagønrrab gaiman. Incha ñimbe chinetø chib menda, trømbøig kwayan. Ñimbe chi tøgagønrrab isuigwan tøgagønrrab gaiman, kaguende Tiuswan miameeløgurri. ³Kabe miappe, miabendøgucha, utønrrab gaiman, kaguende

søl isua miamøtø, ka ñimui asrwan tab gønrrai kasraarab kômigwayasiitø miabelø gúikkurri. ⁴iÑim, Tiuswan itøluløptø misaamera! ÌI pirauigwan tab inchib chull inchibiibe Tiuswane ashig kômui inchibelø gúi ashmeelø gøtirru? Inchawei mœikkøben i pirauigwangøba tab gúi mørøb lllirabiibe, Tiuswane ashig kômui inchibig misran. ⁵Kabe Tiuswei wamwan pøriiløyu øyah chippe, ìka trenchig køptø rrendaitamab isutirru ‘tru espíritun Tius namui umbu pasrønrrai traniibe namune igatø! nuyasiitø gønrraimab undaaran’ chibigwan? ⁶Inchen Tiusbe nui ka yandø tab indiitøgabe namune gatøguchinguen tranøbig køn. Incha nui wambe trenchibig køn:

“Nuinetø nuig mørørai inchibelane
Tiusbe sètøbasramisrøb gurrappe,
trune chigucha gømeelø tammayelane
nui ka yandø tab indigwan Tiusbe tranøbig køn” cha.

⁷Ñimbe Tius maig chiben nune tru gúindø møray. Trune nugwaimandzigwane mœrmønrrab mur isua bønrrai, treeg bønrrøbene, ñimuinukkurrimbe lulrrun. ⁸Ñim Tiusweimay kemallene, nøbe ñimuimay kemallchun. iKaig marøbelø, ñimui tasigwan chish maray! iÑim Tiuswan undaaranrrab indamba, katø tru urastø yu pirau chi købigwan undaaranrrab indamba inchib misaamerabe ñimui manrrømeran newan chish maray! ⁹iÑimbe truba isui inchib, chindimbarre nambe øyeeg kailø guermab truba isub, katø kishib inday! Ñimbe indzabgunrriibe kishib; kasraarabgunrriibe truba isui inday. ¹⁰Ñim Tiuswei merrab utsøbasrene, nøbe ñimune nørreelø gønrrai martrun.

Maig maramigwan nai nunewan ke na asha marmumig

¹¹Nai nunelø, kangurriin gangurri katøganun chigøben kaig wamincha ashmøtay. Mœikkøben kan nunewan kaig waminchib, kabe ‘øyeeg søl marmig køn’ chib, waminchibiibe, tru maig maramigwan martrai Moisés pørigwan kaig waminchib ‘søl marmøn’ chib pasran. Inchen ñi tru Moisés pørigwan kaig kui marøb pasrøwabe, ñibe trunun mœra marøbig kømøtø, ñiguen ‘øyeeg køn’ chib asha marøb pasran. ¹²Inchawei mu gatøgane kaaben, Tius nøtø gøn tru maig maramigwan martrai pøriilan tranøb, katø nøtøwei maig maramigwan sölğandø asha marøb inchibiibe. Truibe nø kaigyugurri wesruin gúi, kabe kaigyu

pasrin gúi nò ashchabig kòn. ¿Ñibe chigugu, katøganun ‘øyeeg sòl marmíig kòn’ chib marøb pasrønrrappe?

Srøna gwalømbe chi bunrrab gúi asamgaig kòn

¹³Inchen ñim: “Mòin gúi, srøna gúi, chugøben ciudasrømay amba, trusrø pila ørøba warøwa penamba, yanamba, an nørø maramba inchib warønrrab” chibeløbe, mømbe iigwan mørtrai: ¹⁴Ñimbe srøna rrumar ñimui øsig amønamiigu ni chi bunrrab gúinguen mormubendø rreendan. Ñimbe ka wañi lataitø gøn, møindø kenagúitø, katø yanayube kenamuptinchibig latailøgue. ¹⁵Trembe ñim øyah tamikken sòl gønrrun: “Señor treeg kønrrain gøbene, øsig warøwa, iilan marøb, øilan marøb waramønrrun” damig. ¹⁶Trune ñimbe nørreelø guermab isub, treetø isumøtø, truba nørreelø wamindan. Kan chiyutøgucha øyeeg nørreelø guermab isub wamindiiløbe purø gaig kòn. ¹⁷Møikkøben tabigwan maramig kui ashendø, marmuibe, yandø nuimbe kaig marig kørørmisan.

Puarmeran kaig attrabigwan isua gønrrai waminchib

5 ¹iAu, ñim puarmera, iigwan møray! Chigøben yeeg trømbøig ñimun nebub attrab pasrøben, kishib, trashib inday. ²Ñimui chigurrimbunø pua misrøb tøgagúiløbe trerailø gøben, ñimui keilane pullilla mailø gøn. ³Ñimui oroba, anbabe, mugusiain gøn. Incha tru i mugusiatøwei ñimune ‘øyeeg marøbelø gøn’ chib, chi marmeelø gúi kenamartrun. Tru tsamdzuraibe kan nag lataitøwei ñimui asrwan pinishinrrun. Truba rruba chigurrimbunø tulishib tunbønsrain gøn ñimbe, mòi ya srabe gwalømmerawan. ⁴Ñimui ellmariilan tulishib melabelan tru tulisaimburø ñim anwan pagaramø nili andøwei ñimune ‘øyeelø gømøgue’ chib, wamab trasran. Inchen Tius maramburab marøbiibe tru uløwan tranmuinabelø trashib wamigwan mørin gøn. ⁵Ñimbe yu piraube purø tabig warab, asr maig palai inchen, ñimuimbe treeg marøb waramig tøgä, ñimbe waarameran lataig tsal-lana gøn ñimui manrrømeran, kweetsam gwalømbe yandø punrrabguen gøn. ⁶Ñimbe tru sølgandø tabigwane kaig nebunrrai kørørmara, basra, kweetsig kòn, nøm maig martraindø nøbe chigucha inchimuig kòn.

Tiusba wamindamiba, Señorwan munig megabig megamiba

⁷Trune ñim nuneløbe namui Señor arrumnegatig tammay muniirab melamig kòn. Kan ellmarøb kwallibiima ellmarabe,

tru srø sre attrabzhigwanba, srabe sre attrabzhigwanba
yaandø, yaandø, munig megan, tru pirau ellmarig misrizhigwan
tulishinrrappe. ⁸Ñimgucha treetøwei truba tammay muniirab, katø
kørrønrrab gømo, mur bønrray. Kaguende Señor arrumibe luturaab
pasran. ⁹Nai nunelø, kangurrin gangurri chigøben ‘øyan gøtan’
chib; ‘treeg inndan’ chib, waminchimøtay, ñimun marigwan asha,
kaigyu kørrømara pønstrainab pønrrømønrrappe. ¡Au! Tru ñimun
maig maramigwan asha martrabiibe yandø yaskabuguen basran.

¹⁰Au, nai nunelø, ñimgucha asha kusrewa tøga bønrray tru
merrabsreelø Tius maig karuigwan tru Señor Tiuswei munchiyu
eshkabelø chigøben isumdiig nebuinabendø, yaandø, yaandø
tammay melaigwan.

¹¹Pøs nambe mayanguen tab gúilø gúi aser chigøben isumdiig
puingucha, tru kullaaramø melaptø melabelane. Jobwanma
chigøben yeeg isumdiig nebuingucha, tammay ka megaptø
megaigwan ñimbe wammørøbelø gúinrrun, katø srabebe Señorbe
Jobwane maig indigwan chigucha. Kaguende Señorbe lastima ashib,
trurrigu tammay purugub inchibig køn. ¹²Nai nunelø, iigwane
masken isua guy: ñimbe srømbalawan, kabe pirøwan kabe gatøgan
chigøben, pegwan truilai merrab pasramisra, ‘igatø! marmø gømo,
nabe maramønrrun’ chib, pønrrømøtø, ñimbe ‘treeg martrab’ chippe,
treeg maramig køn. Inchen ‘marmønrrab’ chippe, marmumig
køn, Tius kaigyu pønrsailø gømønrrappe. ¹³Møikkøben ñimui
utu chigøben puben, isuig megawabe, Tiusba waminchi. Inchen
møikkøben tab kasraatø wappe, Tiuswan tabig waminchib cantau.

¹⁴Inchen møikkøben kwanrrø tsuabe, iglesiayu
Tiusweimburabelan pera marøb pønrrabelan wamø, Señorwei
munchiyu aceite srøla, nuyasig Tiuswan ‘purugurra’ chib mianrray.

¹⁵Inchen nømbe Tiusbe ke tamartraitamab isub, Señorba
waminchene, kwanrrøbe puraiben, Señorbe tab uñchai kusranrrun.
Inchen chigøben kalø marin gøbene, Señorbe truigwan pesannab
ulø baymønrrun.

¹⁶Inchawei kangurrin gangurri ñimui kalø mariilan eshkayab,
katø kangurrin gangurri gatøganweimburab Tiusba waminday,
ñim tammisriilø gønrrappe. Kan sølgandø marøb møg Tiusba
wamindiibe truba nørreelø marøbig køn.

¹⁷Tru Elías, Tius maig karuigwan eshkabiima, kan møg ka
nam lataitøwein gøbig køn, tru sre bumønrraima, Tiuswan ‘sre

bumønrrai martrunrrig' chib nøba wamindiibe, pøn bila y tøbø
bilaba srebe pirau pumuig købig køn.

¹⁸Incha gatø sre bunrrai Tiusba gatøle waminchen, srebe puben,
pirabe ellmariilø misrig købig køn. ¹⁹Nai nunelø, ñimui utu ñim
møikkøben Tiuswei newan ciertonigugurri pella, tarømisra iben,
²⁰katø kalø marøbigwan nui pella yainukkurri lliskøbiibe nui
møsig yandø kwanrrab pasraigwan truyugurri wesrub, katø truba
nørrø kaig mariilan kasrøb inchun.

1 San Pedro

‘Ka amõñigueh’ chib pørig

1 ¹Na Pedro Jesucristo nan nõashib karua ørig i kilgawan pørar misag nõmuim biraу gømøtø, peesrø tru ørø amba warabelan, Ponto birausrøn gøben, Galacia birausrøn gøben, Capadocia birausrøn gøben, Asia birausrøn gøben, Bitinia birausrøn gøben, ²Tius Møskai tru manasrøwei nebua asha, nõ lawa wesrailan, tru Espíritu Santogurri ñimune tabigwei tarømarøb, Jesucristo karuilan møra marøb, katø Jesucristoi anindøga chishmarøb indiilan. Tius ka yandø tab indigwanba, chi isumgaig tab gøbigwanba uñcha tøgagønrraimab isur.

Tiuswan kasrag køb wamindig

³Namui Señor Jesucristoi Tius Møskaimbe mayanguen tab indig kønrrain gøn. Nøbe purø nu lastima tøgagua, namun katøyug srøig kal-langaruig køn, tru treeg kønrraitamab isua munig melamig managucha patsønrrabig kømigwan nam tøgagønrrai, tru Jesucristo kwabelai utugurri gatøle øsiiraikkurri. ⁴Tru patsønrrab kømfig Tius namun keta tranamig tøgagúibe pinønrrabig kømøwei, chigøben kaiba lynchabig kømøwei, merguranrrabig kømøwein gøn, tru ñim tøgagønrrai srømbalasrø ñimuyasig esegaig pasrabig. ⁵Ñim isubigwan Jesucristoinuutø pasra tøgagúikkurri Tiusbe nui maramburab mariitøga chinchimønrrai ashib tøga gúilø gøn, yandø kerriguwan tru kaigyugurri wesraig kømig tamara basrig tru srabe gwaløm kenamarig kønrrabigweyasig.

⁶Øyeekkurri ñimbe truba kasrag kuilø gøn, inchipa kan maya yanatø chigøben, chigøben nebuig isuig melamig punrraptiig

kuindøgucha. ⁷Kaguende isubigwan ñim Jesucristoinuutø pasra bønrraibe kan oro lataitøguen gømmø, purø tabig køn. Tru oronma managatig kønrrabig kømfígwanguen maig kətashchab ashchappe, nagu parramig køn. Inchawei ñimui isubigwan Jesucristoinuutø pasra pønrraigwan maig kətashchab asha kørromarikkurrimbe Jesucristo kenamisrøb gwalømbe ñimune səl marig kui asamba, maya nuguen tabig indamba, katø tabig kui asha tab indamba indiilø gønrrun.

⁸Ñimbe Jesucristone ashmuindøgucha, undaarabelø gøn. Katø mõimbe nun kaptøga ashippe, ashmubendø, nun kørewa, purø nuig purø tabig kui møra, truba kasraaran, tab gøbiitø ni manchaguen chi tamgaikke, ⁹pøs tru ñimui isubigwan Jesucristoinuutø pasra tøgagúig yandø tru nebumigwan nebuben, tru ñimui mõsiimera kaigyugurri wesrailø kørromisrig.

¹⁰I kaigyugurri wesraig kømigweimburappe Tius tru maig karuigwan eshkabelø Tius tru ka yandø tab indigwan ñimuin gønrrai nøm waminchibeløbe manasrøwei maig kətashchab ashchab, truba rruba tab ashib, payib laig købig køn. ¹¹Cristoi Espíritube truilan manawei eshkaig købig køn, tru Cristobe truba kaig indinab megamigwanba, katø tru wendaube törguegwalmabig kønrrabigwanba. Inchen nømbe mu gətashchab ke ashibmørø inchib, katø treebe mana gønrrermab indig købig køn, tru Espíritu nømuinug pasrøwa eshkaigwan. ¹²Inchen tru nøm eshkaib wamindigwane nømyasig kønrrain gømmøtø, ñimuin gønrrai, Tiusbe nømun kenamarig køn. Tru srømbalasrøngurri Espíritu Santon ørig treeg maringaruitøga tru mõin gwaløm srøig purø tabigwan ñimun eshkabelø kusrenaniibe, tru merrabsrø Tiuswei tabig srø wamwan waminchibelø wamindigwandøwei ñimune eshkan. Pøs tru øyeelane ángelesmeratøweinguen nebua asinrrabna gúi indan. ¹³Inchawei treeg købene, chi maramigwane kanmaytø tab isua, tab asha maray, tru Jesucristo kenamisrøb gwaløm Tius ka yandø tab indigwan keta tranamigwane igatø! truigwandø muniirab.

Tius namun wamappe, tabigweyasig tarømariilø gønrrai wamig

¹⁴Maig karuigwan møra marøb nusrkalo latailø amønay, Tiuswan ashmeelø gøb uras maig amøñig køben amøñib lataig kømmøtø. ¹⁵Treeg kømmøtø, kaiba lindiimfig chishig newan

tabig amønay. Kaguende Tius nø wamabiima newan tabig køn.

¹⁶Inchawei nui wamwan pøriiløyuma Tiusbe trenchibig køn:

“Ñimbe newan tabelø guy cha; nama newan tabig kur” cha.

¹⁷Møigwandøgucha atsi marmøtø, nøm maig mariilan maig kønrrabigwan marøb Tiuswan ñim: “Namui Møskain” cha, wamabeløbe, chu urastøgucha yu pirau managatig kømø, ka petø warabeløbe, nune køriibala amønamig køn. ¹⁸Kaguende Tiusbe ñimune chi tabig marig kørrømisrtrabgaigwan marøb amønaigugurri wesraig køn, tru treegwane ñimui merrabsrø kølli misaamera marøb amønaigwan ñim tōga gørramisrig købigwan. Inchawei ñimbe tru øyeegugurri wesranrrab purø bagaraigwane tsabøtø ashibelø gøn. Truigwane mana pinønrrabgaitōga purø rranig køn, kan oro lataitōga gømøwei, kabe an lataitōga gømøwei, treeg kømøtø. ¹⁹Cristobe kwawa, nui purø tab anindōga ñimuyasig treeg marig køn, kan ubisha-unø chishchig, newan tabzhigwan kweetsi lataitōwei. ²⁰I pirowan marmøwatø Cristone manawei wesrua basrig købig køn øyeegweyasig. Incha mōin gwalømmerawan kenamisran, ñimuyasig tab gønrrai. ²¹Inchawei ñimbe nøgurri Tiuswan kørewa bønrramisran, tru Criston kwailai utugurri øsiirangarua, katø nune törguegwalmabig kønrrai marøbigwan. Inchawei treeg købene, ñimui isubigwan Cristoinug pasra tōgagúigwanba, truba rruba munig melamigwanba Tiusweinuutø pønsra gønrrain gøn.

²²Incha mōimbe, tru newan ciertonigwan ñimbe mōra marikkurri ñimui mōsiimeran chish marin gøn, nunelan ka undaaranmab ashchaindø gømøtø, undaaranrrab isua, undaarabelø gønrrab. Inchawei kangurrin gangurri manrraugurri newan isua undaaramburab undaaray. ²³Pøs ñimbe katøyug kal-lawar gøn, mōskalø pinønrrabelainukkurrin gømøtø, Tiuswei wam øsiguig, managuen pinønrrabikkaig pasrabig pasrabigugurri. ²⁴Kaguende Tiuswei wamwan pøriiløyube trenchibig køn:

“Maya misaabe kan kau lataig køben,

nøm purø nørreelø tabig kuibe

kauyu kan u lataitø gøn cha.

Tru kaube mul-laben, ube peñen,

²⁵Trune Señorwei wambe managatig kønrrabig køn” cha.

Inchawei i tru wam ñimun eshkaibe tru tabig srø wam truig køn.

Tiuswei misaamera

2 ¹Inchawei treeg købene, chigurrimbunø kailan gøben, katø chine may wamincha isiilan gøben, ka palatø tab indiilan gøben, mendaigwan chigurrin gøben pusrkwai asiilan gøben, chigurrimbunø wam gusrub indiilan gøben elatsay. ²Kan srø gal-laig ureezheelø pitsø muchig kuinchib lataitøwei, tru Tiusweimburabig pitsø chi peebea lindisaimiig lataigwan ñimbe ke chindamdø gúi inchib lay, truiukurri nørrørawa, kaigyugurri wesraig kømigwan tøgagønrrab. ³Kaguende ñimbe yandø Señorwane purø tabig kuin gúi tsabø ashibelø gøn.

Cristobe tru ya marøbelø pølbasrtrab katsigu wayi srug lataig

⁴Ñimbe Señorwan kemalay, tru Øsig Srugwan. Truigwane misaamera kaashippe, kaasig købendø, Tiusweimbe lawa wesruig, purø tab sruuzhig køn. ⁵Inchawei ñim øsig sruumera Tiuswei yayu ñimgucha marøb kusrunrrain guy, sacerdotesmera Tiusweindø tarømariilø gua, Tiusweimburab maramigu keta tranøb pønrramig kønrrai, Jesucristogurri Tiusweyasig chull indamdeelø. ⁶Inchawei Tiuswei wamwan pørigube trenchibig køn:

“Sionsrø kan srug trarrar cha.

Truibe katsigu pølbasrtrab wayi srug,
lawa wesruig, purø tabzhig køn cha.

Trunundø isua basramisrøbiibe
køriimisra gørrømisrtraamøn” cha.

⁷Ñim nundø kørebelaimbe tru sruube purø nuig tabig køn. Inchen tru nundø køremeelaimburappe Tiuswei wamwan pøriiløyu øyah taibe nebun:

“Tru ya marøbelø kaasig sruube
niga basrønrrai katsigu pølbasrtrab
wayig srukken misrig køn” daig.

⁸Katø øyeekkucha chibig køn:

“Kan srug srurrengwangerumba,
katø penøsrkamba inchib srug køn” daig.

Pøs nømbe Tiuswei wamwan maig taigwan mørmeeløgurri srurrengwan. Nømune trendø øyeeg nebuig melønrrai marig købig køn.

⁹Trune ñimbe Tius lawa wesruig misaamera, reywei sacerdotesmera, newan tab misag purø nørrø, Tius tru nui

truba tabig mariilan eshka misaamera gønrrai mariilø gøn, tru ñimun purø løstøyugurri nui purø torigu bønrramig kønrrai wamabigweiwan. ¹⁰Ñimbe merrappe Tiuswei misaamera gømuig køn. Trune mømbe si, nui misaamera gøn. Merrappe ñimbe Tiuswei lastima asigwan utønrrab gaima gúig, mømbe lastima asigwan yandø ñimbe nebua uta bønrran.

Tiuswei karuig melabeløsun amønay

¹¹Nai undaarailø, yu piraube kan peg birausrøngurri ka petø amrruatø latailan ñimun waminchar, ñimui møsigwan kwayab pasrabig tru ñimui asru kaig marøg købig arrubigwan tiusmanda marmøtay cha. ¹²Judíos kømø misaamera Tiuswan ashmeelai utube nømguen ñimun asha kusrenrrai amønay, ñimune ke larrø gailø gúi lataig wamindindøgucha, ñim tabig mariilan ashabe, mayeelan maig mariilan Tius payib gwaløm truiløbe Tiuswan truba tabig waminchai.

Misagwan asha karub purrabelan møramig

¹³Ashib karub purrønrrai møguelø purrønnilane nøm maig chiben møray, namui Señorweyasig. Tru maya misagwan ashib karub wabig, reywan lata, ¹⁴katø kubenadurmeran lata, kaguen truiløbe kailane mørørkøb, katø sølgandø marøbelane nømdøwei tabig waminchai Tius øriilø gúimba, treetøwei nømune møramig køn. ¹⁵Kaguende Tiusbe ñimune sølgandø martraiwei isun. Trumay marene, tru chugúinguen mormubendø waminchibelø chineto wamindiilane ñimbe mu mandamgaig kasra bønrrønrrun.

¹⁶Ñimbe amønippe, chi ilørkøbig chigaig ñimuimburab amønibeløsun amønay. Inchendø ‘chi ilørkaimíig namuimburab amønibelø guer’ chiptø, trunune kaig maramigweyasig merrarrawa, marøb gømuig køn. Treeg kømøtø, Tiuswei maramigu marøb melabelø latailø tab isua amønay. ¹⁷Mundøgucha maig købash inchimø, tab indamigwan treeg tab inchib, nunelan undaarab, Tiuswane køriibala amønib inday. Katø tru reywan chigucha maig købash inchimub tab indamig køn.

Cristo maig købash indinab megaigwan nam asha kusrenrrai kørromarig

¹⁸Karuindiig melabelø, ñimun karub pera gøbelane maig købendø inchimø, køriibala møramig køn. Tabelø chinchimeelandø

gømøtø, martrain chippe, ke kandø gandø wamabelan chigucha treetøwei mōramig kōn. ¹⁹Kaguende øyeebe tabig kōn, mōigwan gøben isumdiig arruben treegu ka awentab, chi kaig marmubendø, maig købash puinab megamig kuindøgucha Tiuswan isua basrabig kuikkurri. ²⁰Inchen ñimun chigøben kaig marikkurri ichabetøbene, ñim tammay ka melaptø melaindøgucha, ñnim treeg melaigwane Tiusbe chinha tabig kui ashchab gø? Inchen ñim sølgandø marikkurri maig købash indinab tammay melaptø melaibe, treebeguendø Tiusweimbe truba tabig kōn. ²¹Tiusbe ñimun wamappe, øyeeb nebunrraiwei wamig kōn. Kaguende Cristogucha ñimuyasig truba kaig indinab megaig købig kōn. Nōma maig uñibig køben, ñim treetøwei asha kusrenrrain gúig kōn, ñim truwandøwei amōñibelø gōnrrai.

²²“Nōma chigucha chi kaig marmøwei,
ni mana gwaløm mungucha may wamincha isømøwei
inchibig kōn.”

²³Chigøben tsalø wamab trømbøig wamøbene, Cristobe treetøwei lètømuig kōn. Nun chigøben truba isumdiig maringucha, nøgucha ‘chigøben maramōnrrun’ chimøtø, maig kōnrrabigwan Tius sølgandø asha marøbigwan nø asha martrain basrøbig kōn. ²⁴Namui kaig mariilane Cristo nøtøwei nui asru niga yaig kōn, kurussyu mesrøb uras, kaig maramigweimburappe nambe yandø kwailø latailø gōrrømisra, sølgandø tabig amōnamigu øsiguelø gōnrrai. Ñimbe Cristoi kōrriindiiløtøga tamariilø gúig kōn. ²⁵Kaguende ñimbe merrabsrømbe kan ubishamera pella, nøørøtø amōñib latailø gúig, mōimbe gatøle Ubisha Ashibigweimay amrruin gōn, tru ñimui mōsiimeran chu uragucha chinchimōnrrai Ashibigweimay.

Kasharawarmera mandø amōnamig

3 ¹Inchawei treetøwei ñim sraløgucha ñimui kelan maig chiben tammay mōrøb melay. Kelø mōiløgøben Tiuswei wamwan køremeeløguen, kan rriitøguen wamindamig palain gømø, ñim maig købash kømø, mandø tab melaigwan ashatø, Tiuswei mayu punrrai, ²tru ñim chishig tabig amōnaigwanba, kōriibala melaigwanba nøm nebua asha. ³Ñimui tabzhiibe asru pala tamarikkurriin gōnrrain gømøtø guy, pusrugwan purø tabig tamarøb, oromera tabzheelø pōnsrøb, purø nōrrøweyelø keb indiiløyu. ⁴Treeg kømøtø, ñimui manrrau gōnrrai inday; mana patsab minchabgaig, larrø gōrrøtiig

kuiguba, larrø tammayig kuiguba gønrrai. Inchen øyeebe si, Tiuswein gabyube purø tabzhig kui asig køn. ⁵Pøs merrabsrøngucha øyeegein gøbig køn, ishumburmera Tiusweyasig tarømariilø tru tabzhig nøm tøgagúibe. Nømbe Tiuswandø muniirabelø gua, nømui kelø maig chiben treeg melabelø gøbig køn. ⁶Inchawei Sarama treeg kuig køn. Abrahamwan mørøbig køptø: “Ñi, nai ashib karub” cha wamabig køn. Inchawei ñimbe Sarai nimbasrmera lataig misrin gøn, ñim treeg sølgandø marabe, chiwangucha chi kørig kui pønrrabig chigar.

⁷Katø ñim keløgucha treetøwei ñimui sralane chugúi mormiig lataig kømøtø, tab isua møra pera guy, nømun maig tab tøgagømig køben, trumaygue, ishuumisaabe møg lata gømø, mas kullaguig kuimba, kaguende nømgucha ñimba kanguelarrøtø øsig amønamiigwan Tius keta tranig tøgar gúikkurri. Øyeege maray, ñim Tiusba waminchen, chiyugucha iløsrkaimiig kønrraimbe.

Tabig marendø chinetø puinab

⁸Trube, mømibe ñim mayeeløba kandø lataig isua lincha bønrray. Chigøben kanelan nebubene, nan gúi lataig isub, nunelø lataig undaarab, tab inchibelø gøb, køramgailø tammayelø guy. ⁹Mugøben chigøben kaig marene, lata treetøwei marmøwei, tsalø wamøbene, lata treetøwei løtømøwei inday ñimbe. Treeg kømøtø, ñimgurrimbe ‘mayanguen tabig kønrrun’ chinrrigay. Kaguende Tius wamappe, ñimun tabigwan utønrrai wamig køn. ¹⁰Kaguende:

“Møikkøben nui øsig tsumigwan tabig tøgagøb,

tab gwalømmøra tøgagug købene,

nui niløwane isua møra tøgagømig køn,

kaig waminchimønrrab,

nui triitøga isa may wamincha kegørrørørkømøweingue.

¹¹Kaigyugurri wemallib, tabig sølwan maramig køn.

Ambugurri igurri tab gønrrabigwan lab, truan unamig køn.

¹²Kaguende Señor Tiuswei kabmerabe sølgandø tabelaim bala ashib pasrøben,

nui kalumerabe nøba wamindiilan mørtrab muniitø basrabig køn.

Trune Señor Tiusbe kaig marøbelane nømuingatø basrømøn.”

¹³Ñim chu uragucha tabigwandø martrab inchib meløbene, ñimune mu gúi kaig martrautah? ¹⁴Inchendø treeg sølgandø tabig maramigwan marøb melaindøgucha, isumdiig nebubene, ñimbe mayanguen tab gúilø gøn. Tru kaig inchibelan kørig kui inchimøwei, kwarmøwei

inday. ¹⁵Masken treeg kømøtø, Cristone ñimui manrraube nø ashib karub pasrabig mara tōga bønrray. Tru ñim Tiusweimburabigwan muniirab melaigwan mugøben: “¿Treebe maig kō?” cha ñimun payene, mandø lōtamigwan chu urastōgucha isua busra amōnay. Inchendø treeg marøppe, nømune maig kōbash inchimøtø, kwa tammay maray. ¹⁶Ñimbe ñimui isub kebachib pasrabigube chi ‘kalø gøn’ chibig chigar gømig køn, ñim Cristoinug tabig amōnaigwan ke ka indzatø ashibelø nømguen kōriimisra gørrømisrtraingue.

¹⁷Tius trendø treeg kōnrrain gøbene, sōlgandø marøb megawa, kaig indinab megamikken sōl gøn, kaig mara gømøtø. ¹⁸Kaguende Cristotøweinguen, nøbe sōlgandø tabig kuagucha, tru sōlgandø tabig kōmeelayasig kaig indinab megawa, kaig mariiløgurri kwaig køn, kanmaytø managatigweyasikke, katø, gatø kwanrrab gømøtø, namun Tiusweimay pera inrrab. Nui asrwane kwangaruindōgucha, nui espíritune øsig kungaruig køn. ¹⁹Incha nøbe espíritu gúig kōppe, tru espíritumera merrarrawa, keeriilø pōnrrabelan Tiusweimburabigwan eshkaib kusrenanig køn. ²⁰Tru espíritumera trusrø pōnrrabeløbe, merrabsrø tru Noé tsub gwalømmerawan mørøg kømui inchibelai espíritumera gøbig køn. Tiusbe tru uras nømune truba tammay muniiraig kōbig køn, tru nu barcon marøb gømne. Tru barcoyu kebamba, piugurri øsig webambubeløbe mamdøzhiitø gúig køn, ochoeløtø. ²¹Inchen tru pibe tru mõi ya piu umbu ulsra kaigyugurri wesrailø gømigwan eshkabig kuig køn, Jesucristo kwawa, katøle øsiiraikkurri. Tru piu umbu ulsraibe asrwan chillig kømønrrai ‘chishmarøbig køn’ cha eshkabig kømøtø, Tiusweimburab namui isub kebachib pasrabigu chi ‘kalø gøn’ chibig chigaig mōingurrimbe nøbatø pasramigwan eshkabig kuig køn. ²²Incha nøbe mōimbe srømbalasrømay ya, Tius Mōskawei kusrmay waben, katø ángelesmera lata, nøm ashib karub pōnrrabelø lata, maramburab marøbelø lata nø maig chiben mørøbelø gøn.

Tius ñimun maig martrai traniiløbe trunun maray

4 ¹Inchawei Cristoma nui asru kaig indinab megaig kōbene, ñimungucha nø mariimaytøwei martrab tamara bønrray. Kaguende mōikkøben asru maig kōbash indinabiibe tru kaig maramigwane yandø nørø mara basran, ²katøguchi øsig unamig arrubigube yandø asr mumay srúa iben, treeg uñchab gømøtø, Tius maig uñchain gøben, treeg uñchab. ³Tru judíos kømø misaamera

Tiuswan ashmeelø maig marøbelø gøben, merrabsrø ñim treegwei marøb amønaibe yandø trutø tsabø gøn. Pøs trømbøig kaig indiiløyu amøñib, trømbøig kailø martrab isub, mutsiirab, kaig fiestamerayu amøñib, katø tulundzuna mutsiiramburab mutsiirab, katø chiwangøben kan tius kui lataig inchibelø larrø gailø gøn, nømbe. ⁴Inchawei nømune mømibe pesriig asønan yandø nømun ñim treetøwei nøm trømbøig marøb llibab pønrrainug lincha marøb pønrrømubene. Incha treekkurri ñimune trømbøig waminchibelø gøn. ⁵Inchendø nømbe Tius tru øsiguelan lata, kwabelan lata maig kuigwan paya ashib martrab tamara wabigwei merrab kemalla, chi mariilan eshkamig kønrrun. ⁶Inchawei treekkurri kwabelanguen Tiuswei tabig srø wamwan eshkaig købig køn, Tius øsig køb lataitøwei nømui espírituyu øsiguelø gønrrai, nømui asrwane misagwan maig asha maramig køben yu piraube treeg asha mara, kørømarig kuindøgucha.

Misaameran mandø purugub gømig

⁷Chitøgucha yandø patsønrrabig pumibe luturaab arrun. Inchawei ke tab asha, tab isua bønrray, Tiusba tab wamindamig kønrraimbe. ⁸Ñimui utube undag købigwanmerrig masken døgagømig køn. Kaguende undag købiibe purø nørø kalø mariilan chishtø gasrøbig køn. ⁹Kangurriin gangurri ya bebay, chigøben cha mørmøtø. ¹⁰Ñim møitøgucha Tiusweyasig marøbelø gønrrai ñimun Tius ketig utiitøgabe katøganelan tab gønrrai puruguy, Tius ka yandø tab indikkurri ñimun tru peg peg ketigwane kan chigøben købigwan tab asha marøb tøgagøbelø lataitøwei maray. ¹¹Møikkøben waminchippe, tru wamindiibe Tius wamindigwandøwei waminchi. Møikkøben chiyu gøben mara rranøppe, ñui asrwan Tius maya fuerzas traniitøga mara rranø. Chiwandøgucha marøppe, Jesucristogurri Tiusbe maya nuguen tabig indig kønrrai maray. Tørguegwalmabiiba, maramburab mariiba managatig nuiwein gøn. Treeg kønrrai.

Chine puindøgucha ka bønrrab

¹²Nai undaarailø, kan maig inchibig køtashchab purø murig nag lataigu ñimun puraambamig nebubene, chindimbarre øyeeg kermab isumøwei, katø kan managuen treeg bumíig kui lataig isumøwei inday. ¹³Treeg kømøtø, masken Cristoimbuburab nøba treetøwei kaig nebuinab puraambub ambamig tøgaguabe, kasraaray, Cristo tørguegwalmabig kenamisren, ñim truba kasraaramig kønrraimbe.

14Ñimbe mayanguen tab gúilø gøn, ñimun Cristogurrindø mugøben tsalø wamøbene. Kaguende torguegwalmab Espíritu, tru Tiuswei Espíritube ñimuim bala basran. 15Nim møikkøben kweecha gúi, kabe nila gúi, kabe larrø gaig kua gúi, kabe nuimburab gømubendø, marøb kegala gúi, treekkurri kaig nebuinab megabgun. 16Treeg kømøtø, møikkøben Cristoin gua kaig nebuig megawabe, kørig kui inchimøta. Cristoi munchiwan ñimun pasra wamikkurri masken Tiuswan truba tabig wamindamig køn.

17Pøs kaguende yandø treeg kønrrabiibe pubguen inchen, Tiuswei yauelainuutøwei maig kønrrabigwan Tius nø asha martrab pølbasrtrun. Tru namunmerrikken maig kønrrabigwan asha marøb pølbasriibe, trube, ¿tru Tiuswei tabig srø wamwan mørøg kømui inchibelane mas maig martrerah? 18Inchen,

“Sølgandø tabig pasrab møwanguen
kaigyugurri wesraig kømibe truba murig kuibe,
¿Tiuswan køriibala pønrrømeelaimba,
kaig marøbelaimbabe mas maig kønrrerah?”

19Inchawei Tius maig kønrrain gøben kaigyu puraambub melabeløbe sølgandø tabigwan marøbig marøb melamig køn, nømui mõiimeran Tius tru Chiwandøgucha Marøbigwei tasku pønsrøb. Pøs nøbe managucha elachimíig køn.

Cristoielø mandø amønamiḡwan waminchib

5 1Møimbe ñimui utu Tiusweimburabelan pera marøb pønrrabelan nabe mandø amønamiḡwan waminchab inchar, nagucha nøm lataitøwei Tiusweimburabelan pera marøb pasrabig, katø Jesucristo maig købash indinaben ashib, katø Cristo torguegwalmabig kenamisren, nagucha truyu tøgatø pasrønrrabig. 2Tius nui ubishameran ñim ashib tøgagønrrai nø ñimun traniilane tab ashib tøgaguy, ke martrai inchendø gømøtø, ñimashib treeg martrab isua marøb, Tius maig palain gøben, treeg. Katø ke anwandø chull inchimø, ñimui maramigwan marøppe, palabino gømø, tab maramig køn. 3Ñim ashib tøgagønrrai ñimun traniilane ñimuielø gúi lata, ke ñim garua srua gømøtø, ñim mandø amønaitøga nømguen asha kusrenrrai maray. 4Treeg marabe, tru Maya Ubisha Ashibelaim Bala Pasrabig kenamisrene, ñimbe corona torguegwalmabzhig managuen minchabgaigwan utønrrun.

5Katø treetøwei ñim matsøreløgucha tru Tiusweimburabelan pera marøb pønrrabelane maig chiben trunun møray. Søteeløba

kangurrin gangurri maig køben inchimøtø, tru tammayig kønrrai marøbiitøga truitø pinøgasrailø amønay. Kaguende:

“Nuinetø nuig mørørai inchibelane

Tiusbe sètøbasramisrøb gurrappe,
trune chigucha gømeelø tammayelane

nui ka yandø tab indigwan Tiusbe tranøbig køn” cha.

⁶Tiuswei maramburab marøb tasig umbu nørreelø misrøb pønrrømø, utsøbasray, yandø nø treeg maramig puben, ñimun nørreelø martraimbe. ⁷Ñim chigøben truba isub tøga bønrrailane Tiuswandø pønrray. Kaguende nøbe ñimuimbura tab gønrrai isua martrab wabig køn.

⁸Mumaygucha srua irramamø isuamøra amønñib, chu uragucha pesannamø, isuatø amønay, kaguende ñimun ashig kømui inchibig, tru nugwaimandziibe kan león pøtøgatanwan namig mullib uñib lataig unan, møigwan gøben manrrab lab. ⁹Inchawei ñimui isubigwan Jesucristoinuutø pasra bønrraitøga truigwane kørtrab gømø, ñimbe mur isua bønrray, yu pirau chusrøndøgucha ñimui nuneløgucha treetøwei kaig nebuinab puraambub melai ashabe. ¹⁰Inchendø kan maya yana gøsrøndø ñim treeg kaig puraambub melaikkurrimbe tru chiyutøgucha ka yandø tab inchib Tius managuen patsønrrabgaig törguegwalmabiisrø Cristoba kanbalatø purramig kønrrai wamabiibe, nøtøwei ñimune gatøle tamara bønrrøb, chiyugucha kørørnrrabgailø marøb, katø trurrigu kullaaramø murelø gønrrai marøb, yandø treeg pønrrørnrrai kørørmarøb inchun. ¹¹Tius nø ashib karub tøga basraibe managatig nuin gønrrun. Treeg kønrrun.

Srabe wamindiilø

¹²Silas, nai nuneg, chi isumgaig na tabig kui asigwan nabe nun landøtiig pøringarur, øyeeg, øyeeg amønay chinrappa, Tius tru ka yandø tab indig ciertoniibe, iig køn cha, eshkanrappa. Inchawei truyu mur bønrray.

¹³Tru iglesia Babiloniasrø ñimun latawei lawa wesruig pasrabiibe ñimun ‘ka warøgueh’ cha øran, katø Marcos nai nusrkai lataikkucha. ¹⁴Katø kangurrin gangurri undag købiitøga muchab ‘manguen ka amønñigueh’ tay.

Ñim Jesucristoieløbe mayeeløba chi isumgaig tab gøbigwan tøgagønrraimab isur.

2 San Pedro

‘Ka amõñiguh’ chib pørig

1 ¹Na Simón Pedro, Jesucristoi marøb megabig, katø nøashib karua øriibe, tru namui Tius Kaigyugurri Wesrabig Jesucristo newan sølgandø tabig marikkurri, ñimui isubigwan Jesucristoinuutø purø tabzhig tøgagømigwan nam døgagúigwandøwei nebua tøgä bønrrabelan iigwan pørar.

²Tiuswanba, namui Señor Jesucristonba nebua asikkurri nui ka yandø tab indig tranigwanba, chi isumgaig tab gøbigwanba ñim uñcha tøgagønrraimab isur.

Tiuswei ureg kømibe øyamayelø gømig køn

³Tius nui maramburab mariitøga namun øsig waramigweyasig lutøgurri chi palabigwanba, nuyasiitø tabig amønamig kønrraimba namun tranig køn, nø trendø törguegwalmabig kuitøgaba, nø purø tab indiitøgaba nø namun nebua asingarua. ⁴Tru øyeeløgurri Tiusbe truba nørreelø, trurrigu purø tabelø namun trannrrab misriilan tranig køn. Incha tru traniiløgurri ñimune Tiusbe, nø maig køben, treeløwein gømigwan tøgagønrrai tranig køn, yu pirau tru køsøngønrraptiig purø rrømbøig marøg købig mindishib treranøb pasrabigugurri wegørrønrrai. ⁵Inchawei treeg købene, iilan tøgagønrrab truba tranrramig køn: Tru isubigwan Jesucristoinuutø pasra tøgagúigwane iigwan nemaramig køn, maig køben inchimø, tabig amønaitøga. Tru tabig amønaigwane Tiuswan nebua asiitøga nemaray. ⁶Tiuswan nebua asigwane asr maig miaben tru gúindø marmuitøga nemaray. Asr maig miaben tru gúindø marmuigwane chigúingucha tammay

yandø, yandø melamitøga nemaray. Tru tammay yandø, yandø melaigwane Tiuswan maikken tarømisrmø tabig amønaitøga nemaray. ⁷Tiuswan tarømisrmø amønaigwane trag nunelø lataig tab indiitøga nemaray. Inchen yandø tru trag nunelø lataig tab indigwane undag kōbiitøga nemaray.

⁸Iilø ñimuinug kerrigu pønrrøwa larrøbichib nurabene, namui Señor Jesucriston ñim nebua asha tøgagúigube ñimbe chi marmø, ka amøñinrrab gømøwei, ke ka nebua asiitø gønrrain gømøwein gønrrabguen. ⁹Inchen iilan chigaibe kan kabgaig lataig, kabe kan yab nebua ashchab gaimabig lataig kōn, merrabsrø nui kaig mariilan chish marigwane yandø chab pesannaweig. ¹⁰Inchawei treeg kōbene, nai nunelø, ñimun Tius wamigwanba, lawa wesrub indigwanbabe, ñimuinug tab pasrønrrai gatøguchinguen gønrrab inday, kaguende iilan marabe, managuen srurrengwamønrrabguen. ¹¹Trumaybe si, namui Señor Jesucristo tru Kaigyugurri Wesrabigwei managuen patsønrrabgaig ashib karub wainug ñimuimbe kebambamig yaskabmerabe ke lendø gurim bønrrønrrun.

Mugucha mandamgaig kusrenaniilø

¹²Tru iilan nabe ñimun chu uragucha isungaruppatø, isungaruppatø megamønrrun, tru newan ciertonigwan yandø ñimbe ashib elatchabgaig tōga bønrraindøgucha tru ñimun kusrenanig kōbigwan. ¹³Na pirau øsig uñippatøbe øyeelø wamindiitøga isuptø melønrrai kuñappatø megamig sōl gúitamab isur. ¹⁴Namui Señor Jesucristo nane tōrgandø eshkaben, nabe petø kwam gúi mōrar. ¹⁵Katø nabe mumaytøgucha ñimuyasig maramdiigwane martrab inchar, na kwaimbala ñim chu uragucha iilan isub marøb gønrrai.

Nømui kaptøga ashibelø

¹⁶Señor Jesucristoi maramburab marøbigwanba, nø arrumigwanba nam kusrenanøppe, misaamera ka nømdø isua wesrue wamindiilan gusrenanmuig kōn. Treeg kōmøtø, nambe namui Señorwei purø nuig tabig purayaigwan namashib namui kaptøga asigwan eshkab waminder. ¹⁷Kaguende Tius Mōskai nun truba tab indigwanba, tōrguegwalmabigwanba utøben, tru Purø Nuig Tōrguegwalmabiisrøngurrimbe kan wam arruppe: “Iibe nai

undaaraig Nusrkain gòn cha. Nabe nògurri truba kasrag war” cha, trenchiben, ¹⁸nambe mórøbelø guer tru wam srømbalasrøngurri nun øyeeg waminchen, Tius tru nuindø tarømara basrin dunsrø Señorba nam pønrrøwa. ¹⁹Inchen katø Tius maig karuigwan eshkabelø wamindiibe treetøguen gømmø, maig taibe treeg kønrrabigwan tøgaguer. Ñim trunun tab asha pønrraibe tab gòn, kan løstøyu tør gønrrai tør-rramnegatig pilabigwan lataig, katø tru løtsøzhig yemdø gal-lab estrella ñimui manrrømerayu kal-lanrrai. ²⁰Trurrigu iigwane purø tab isua tøgagømig kòn: Tius maig karuigwan eshkanrrai Tiuswei wam pørigu pønrrabelane ni mønundøgucha mugøben ka nuinetø isua, ‘øyamay gòn’ chib pasramig kømfig kuin gúi. ²¹Kaguende Tius maig karuigwan eshkabeløma managuen ka nømuimburaipø isuabe waminchimui kòn. Treeg kømøtø, møguelø waminchippe, Espíritu Santo maig wamindingaruben, treeg waminchibelø gøbig kòn.

Maig kuigwan gømøtø, peetø gusrenanøbelø

2 ¹israelita misaamerai utuma ‘Tius maig karuigwan eshkabelø guer’ chibelø isapteelø kuig kòn. Katø ñimui utugucha treetøwei isatø peemaytø gusrenanøbelø kønrrun, lliska nømui isuitøga kusrenaniilø pinishinrrabigwan mu ashmøwatø treeg kusrenaniilø keera bønssønrrabelø. Katø treetø gømøtø, Señor tru nømun kaigyugurri wesranrrab penabigwanguen chigucha gømfig kui lataig mara gørrømaran, nømuyasiitøwei mõi mõi pinisaig kømigwan lab. ²Inchen møiløgøben truba nu treetøwei truilø nømui køsøngønrraptiig marøb amønaigu marøb amøninrrab kebamba, nøm treeg marikkurri tru newan ciertonig, Tiuswei maywane misaamerabe kaig waminchun. ³An bareelø gøptø, nømdø isua, purø may isa wamincha, ñimune an wesrab srua gønrrun. Inchendø nømun kaigyu pønrrønrrai manasrøwei pønsraibe mu katamgaig petø punrrun, kaguende nømune pinisailø gønrrai pønsrailø gua.

⁴Tiusbe tru ángelesmeran gøbenguen kaig marigwane ulø baymø gømø, ulø baya, tru møra melamnug kebata, larrø løstøyu pønrrønrrai cadenastøga merrarrawa, keerøppa bønssraig kòn, Tius tru maig maramigwan asha marøb gwalømweyasig. ⁵Katø merrabsrø yu pirau misaameran chigucha Tiusbe kaig marigwan treetø kørørmisrtrain gømø, ulø bayig købig kòn. Inchendø tru

sølgandø tabigwan eshkab waminchibig Noéwanba, katøgan sieteealanbatø chinchimuig købig køn, yu pirau kaig misaameraim bala pi bulabigwan arringarub uras. ⁶Katø Tiusbe Sodoma ciudawan lata, Gomorra ciudawan lata pinisaig kønrrai marig købig køn, usrø tuindø misramnegatig parra gørrømarøb. Øyeeg marigwane wendøsrø kaig misaamera øsig warønrrabelø trunundøguen isua asha gønrrai marig købig køn. ⁷Inchendø Lotwan, tru sølgandø tabigwane wesraig køn. Tru Lotbe chu uragucha larrø gaig misaamera ashikken gønrrabgaig trømbøig marøb amøñiben asha, truba isui inchib tab gømui megabig køn. ⁸Inchen Lot, tru sølgandø tabig, nømui utu tsubiibe yeeg kaig maren, kwalømmørig, kwalømmørig nui sølgandø tab møsigube purø rrømbøig kui megabig køn, tru nøm treeg trømbøig mari ashiptø.

⁹Inchawei Señorbe nuyasiitø gønrrab pønrramisra bønrrabelane, maig inchibig køtashchab asamig puin bønrrøben, truyugurri wesrappe, sølgandø tabig marmeelane esegappa bønstrøbig køn, tru maig kønrrabigwan asha marøb gwaløm møra melønrrai maramig. ¹⁰Asr purø rrømbøigwan marøg kui inchen tru gúindø marøb, katø ashib karub pønrrabelan mundøgucha mørmø kaashib, øyeeg inchibelanwei treeg martrab gøn. Iiløbe chine maram batsiilø, purø nørreelø gømmørø inchib, srømbalasrø ashib karub pønrrabelan nørreelanguen chigøben tsalø wamamig kørikkengar gøn. ¹¹Trune ángelesmera murelø gúigu lata, nømui maramburab maramig tøgagúigu lata, tru møguelø lataguen gømø, mas nørreelø gøbenguen truiløbe, tru srømbalasrø nørreelø karubelan Señorwei merrab tsalø wamømeelø gøn, kaig nebuig møra bønrrøbash chib.

¹²Trune tru i møgueløbe chigúinguen mørmubendø, chigøben tsalø wamabelø gøn. Kan animalmera gøbgunrriguelø, chugúinguen mørmeelø, ka merrarraawa tøgagønrraimba, pinisailø gømigweyasiibatø kal-lawar gøn, nømui kaig marøb pønrrainuutø chab pinønrrabelø. ¹³Nømbe sølgandø tabig marmuimburobe nømbe sølgandø tabig mariimíitøwei utønrrun. Kaguende nømbe kwalømguen nømui asr maig miaben, kaig marmelane, purø tabig mørørai inchib, kasrag marøbelø gøn. Truiløbe køsøngønrrapteelø, chillig inchib mindishibelø treelø gøn. Nøm ñimba lincha mab warainug, kaig kegørrørskøbigu purø tab gúi mørøb nømbe warabelø gøn.

¹⁴Kan mun gøben ashippe, ka yandø ashmøtø, truiba itølulrrab isua ashib, katø chigøben kaig maramigwane muraaraig mormø marøbelø gøn. Katø Tiusweimburabeløyu kullateelane chull asingarua purø may guegørrørskøb, katø parø indamigwangucha neyu kusrebelø gøn. Truiløbe kaig nebuig pønrrønrrai pønsraig misaamera gøn.

¹⁵Sølgandø tabig amønaig mayugurri tarømisra, tru Beorwei nusrkai Balaam daig maig marøb unigwan merrarrawa amba pelig køn. Tru Balaamma kaig mara an bagaraig utamigwan undaaraben, ¹⁶tru nø treeg marigwane nune mur namig køn. Kan mula waminchimfig købendø, møwei wamdøga wamincha, Tius tru maig karuigwan eshkbilig chugúinguen mormø marigwan pasram merrarraig køn.

¹⁷Tru treeg misaamerabe kan kølømø piguumeru chi bigaig, purgølig latailø gøn, kan wañimera mur isig icha srua ambi latailø.



2 San Pedro 2.16

Truilane purø rrømbø løstøyu bønrrønrrai pønsrailø gøn. ¹⁸Nømui wambe ke purab nørreelø ke ka waminchig køptø wamincha, asr maig marøg kui inchen, tru gúindø trømbøig treeg mariiløtøga kegørrørskøbelø gøn, kailai utu meløwa, ke kaimabsrua tru kaig mayugurri wegørrarwan. ¹⁹Nømbe katøganelan ‘chi iløsrkaimiig elatsiilø gønrrai martrumøn’ chibelø gøn, nømdøweinguen trømbøig asamguengaig køsøngønrraptiig mariiløyu truitø srua ambiilø gøbendø. Kaguende møitøgucha nø chi marøb pasrailø kanarramabiibe, yandø truitø srua yaim basran. ²⁰Kaguende namui Señor Jesucristo tru Kaigyugurri Wesrabigwan nebua asha, i pirau køsøngømdiig maramigugurri yandø wegørra, katøyug øyeeg kaig mariiløytøwei iløsrka, truitø srua irramabeløbe, katøbe srøsrø lataguen gømmø, purø gailøguen gørrømisran. ²¹Trembe tru sølgandø tabig amønarnø maywan nebua ashmuig kuinguen søl gøbsruinrrun nømuimbe, yandø truigwan nebua asha, tru maig maramigwan martrai basrig newan tabigugurri katøle tarømisra ibgunrriibe. ²²Inchendø nømune misaamera øyan daibe ciertonwei nebuin gøn: “Werabe nuña, katøle trunundøwei man” daig. Inchen: “Kuchibe chab pirendø, katøle chilligutøwei latøgusan” daig.

Señor katø arrumig

3 ¹Nai undaarailø, na ñimun srøsrø pørig kømnetø katøgan na ñimun pørtrab inchar. Srøsrø børigu lata, mømim børigu lata, øyeeg, øyeeg melønrrigay chib watchab inchar, ñimui tabig chishchig isuiløyu. ²Katø Tiusweindø tarømariilø Tius maig karuigwan eshkabelø merrabsrøwei wamindigwanba, Jesucristo tru nøashib karua øriilø ñimun kusrenanig, Señor tru Kaigyugurri Wesrabig martrai karua basrigwanba, ñim pesannamø isua gønrrai ñimun pørar.

³Incha iigwanmerrig isua guy: srabe gwalømmerawane misaamera Tiusweimburabigwane ka indzatø ashib, chigøben cha mørøbelø treeg inchib amrrunrrun, nømui asr maig palai inchen treeg marøbelø. ⁴Inchabe trenchinrrun: “Cristo tru gatø attrab cha kørørmisriibe ¿mandiindah? cha. Chima tru merrabsrø namui kølli misaamera kwaikkurrimbunø, katø srøsrø pirøwan marikkurrimbunø maig købiibe trubatø kagøn” cha. ⁵Kaguende i misaamerabe iigwan nebua ashibelø gøbendø, ashmeelø misrøbelø

gøn, tru srømbalaba, pirøbabe treeg kønrrai Tius trendaikkurri merrab manasrøwei pønrrabig kui. Inchen tru pirø pimerayugurri webarrubiibe, katø pitøgatøweim basrabig kui. ⁶Inchawei tru urassrø pirøwanma sre bua pi bulingarua, chab pinisaig købig køn. ⁷Inchen srømbalameraba, pirøba Tius treeg kønrrai nø trendaikkurrindøwei møin gwaløm pønrrabeløbe, naatøga parramig kønrrai esegain bønrran tru maig maramigwan Tius asha maram gwalømweimba, katø tru kaig misaameran pinisailø gøm gwalømweimba.

⁸Katøgucha iigwan isua guy, nai undaarailø: Señorweimbe kan gwalømdø mil años lataig køben, mil añosbe kan gwalømdø lataig køn. ⁹Señorbe nø treeg martrab misra kørrømisrigwane, peguen marmø ka pinaptinchab gømøtø gøn, møiløbe treeg martrab taigwan peguen marmønma isua tøgagúindøgucha. Treeg kømøtø, nøbe ñimun tammay muniitø, muniitø wabig køptø, mugucha ka pinønrrain gømøtø, mayeeløba nømui kaig mariilan isua møra, Tiusweimay lliranrai indan.

¹⁰Pøs tru Señor arrum gwalømbe kan niliig arrub lataitøwei chi isumø gøben attrun. Inchen srømbalamerabe purø rrømbøig kørig kømdiig wanrrøb nørøtø misren, katø truyu chine pønrrabeløbe naarab pill-llanrrun. Inchen pirøba, truyu chigurrimbunø pønrrabelane kerrigu parra, pinisaig kønrrun.

¹¹Inchawei kerriguba øyeeg kenaguen gømfiig chab mindishib pinisaig kønrrabig købene, i Tiusweyasiitø tarømisra amønib, katø ke nundø isub tabig llirab amønamiig trurren balan! ¹²Tius tru arrum gwalømwan muniirab, ke petø punrraimab inday. Tru gwalømbe srømbalamerabe naarawa, chab pinøben, chigøben truyu pønrrabiibe tru naarabigu chab piranrrun. ¹³Tius tru tranrrab misra kørrømisrigwan nambe munig meler, tru srømbala srøigwanba, srø birøwanba truiløyube tru sølgandø tabig marig tøgagwan.

¹⁴Inchawei nai undaarailø, tru iilan munig køppatø, chishchig, ñimbe mu mandamgailø, nøba chi isumgaig nui merrab treeg pønrramigwandø truba rruba tranrrab muniiray. ¹⁵Ñimbe iigwan isua asha tøgaguy, namui Señor truba tammay muniitø, muniitø waibe, nam kaigyugurri wesrailø gømigweyasig kui. Iigwandøwei namui undaaraig nuneg Pablogucha pørin gøn ñimun, Tius nun maig kusrebig kønrrai traniitøga. ¹⁶Nui pøriiløyu trumørig

iilan nòbe ñimun wamindan, truiløyu kanbalømerabe tab
 chigúínguen møramgailø gøben, truburab nebua ashmeeløba, tab
 pønrrømeeløbabe Pabloi pøriilan ke ka kalø marøb, peemaytø
 gusrenanan, Tiuswei wam pøriilan katøganbalømerasrø lataitøwei.
 Nøm treeg marøppe, nømdøwei pinisailø gømigwan lab pønrran.
 17Inchawei nai undaarailø, iigwan yandø kanmaytø chab
 wammørarbe, tab asha amønay, tru larrø gailø may wamindiitøga
 ñimun peløsrka, ñim tabig mur pønrrainukkurri kørørøsrkainab
 pønrrømønrrappe.

18Masken ñimbe namui Señor Jesucristo tru Kaigyugurri
 Wesrabigwan katøguchínguen tab nebua ashib, katø nui ka yandø
 tab indigu nørrørab inday. Purø nuig, purø tøriibe, møyia lata,
 managatig nuyasiitø gønrrun. Treeg kønrrun.

1 San Juan

Øsig kømigwan tranøb wam

1 ¹Nambe ñimun iigwan pørøppe, tru srørøgurri købigwan tru nam mørigwan, namashib namui kaptøga asigwan; maig kõtashchab nam tab asigwan, namui tasiimeratøga katørab indigwan, tru Øsig køm wamweimburab pører. ²Tru øsig kømibe yandø ashchai kenamisren, nambe trunun asig køn. Incha nambe trunun øyeeg chib wammørørskøb eshker, tru managatig øsig kømigwan. Truibe Møskaimba pasrøwa, namun kenamisrig køn. ³Nam ashib, nam mørøb indigwan, trunun nambe ñimungucha wammørørsker, ñimgucha namba kandø lataig kandø isua bønrrønrai. Inchen tru nam kandø lataig kandø isua bønrraibe, Møskaimba, nui Nusrkai Jesucristoba pønrraig, truig køn. ⁴Iilan nambe ñimun pører, namui kasrag købigwan newan tøgagønrrab.

Tøryu amøñib

⁵Jesucristo namun wammørørskøb kusrenanigwan mõi ñimun nam eshkaibe iig køn: Tiusbe tør gøben, nuinuube chigucha løstiibe kaagøn cha trendaig. ⁶Nambe nøba kanbalatø tab lincha bønrrer chibendø, nam løstøytøwei amøñibene, nambe ka isatø indig webiben, tru newan ciertonig maig køben treeg amønaig kømøtø webinrrun. ⁷Tius tøryu basrab lataitøwei nam tøryu amøñibene, trumaybe nambe kangurrin gangurri kandø isua lincha bønrrer. Inchen Tiuswei Nusrkai Jesucristoi animbe chigurrimbunø namui kaig marigwan chish maran.

⁸Nambe ‘chi kaig marig chigar guer’ chib pønrrøwabe, namasiitøwei kegørrab pønrrøben, tru newan ciertoniibe

namuinug basrømøn. ⁹Nam chigøben kaig mariilan ‘treeg marøbwei inchar’ cha Tiuswan eshkabene, nøbe namui kaig mariilan ulø baymø pesannab, chigurrimbunø namui kaigwan chish marøb indamig nøbe chi isumgaig sølgandø marøbig køn. ¹⁰Inchen nam ‘chigucha kaig mara gømeelø guer’ chib pønrrøwabe, trube, nambe Tiuswane ka isaptiig kui mara tøgagøben, nui wambe namuinug basrømøn.

Namuimburo purøwaminchibig Jesucristo

2 ¹Nai ureezheelø, iigwan ñimun pørar ñim chigøben kaig marmønrrai. Møikkøben kaig marindøgucha, namuimbura Møskawei merrab kan purøwaminchibig tøgaguer, Jesucristo tru sølgandø tabigwan. ²Namui kaig mariiløgurri Tiuswei namig købigwan nø uta basramisra namuyasig nø kwaig køn, trurrigu namuiwandø gømøtø, yu pirau maya misaamerai kerriguelaimba.

³Tius maig maramigwan martrai pønsrailan nam møra marabe si, trube, nam nun nebua ashibelø guermab asamig kønrrun. ⁴Inchen møikkøben: “Nabe Tiuswan ashibig kur” chibendø, nø maig maramig martrai karuilan møra marmubene, truike isaptiig kui webiben, tru newan ciertoniibe nuinuube pasrømøn. ⁵Trune Tiuswei wam maig karuigwan møra marøbig, truike si, Tiuswan kerrigu newan tabig undaarabig misrin gøn. Trumaybe nambe nøba kanbalatø lincha pønrrermab aser.

⁶Møikkøben Tiusba kanbalatø lincha basrar chibiibe, Jesucristo nø maig uñibig køben, treetøwei unamig køn.

Kan srøig martrai karua pasrig

⁷Nai undaarailø, i maramigwan martrai karua basrigwan na ñimun pøriibe srøig kømøtø, tru ñim merrabsrøngurri trendø tøgagúig truitøwein gøn, tru martrai karua basrig tru trendø merrabsrøngurri tøgagúig tru wamwan ñimbe møra gøn. ⁸Inchen gøben nabe ñimun martrai karua basrig ñimun srøig pørar, nuinug lata, ñimuinug lata ciertonig. Kaguende



1 San Juan 2.7

tru lɔstiibe yandø pureb iben, tru tɔr newan ciertoniibe yandø pilabguen basran.

⁹Møikkøben 'tɔryu basrar' chibendø, nui nunewan tsalø inchibiibe katøgucha lɔstøyu srø basran. ¹⁰Inchen nui nunewan undaarabiibe tɔryu basran. Incha nuinuube srurrengwangerubiibe chigagøn. ¹¹Inchen nui nunewan ashig kɔmui inchibiibe lɔstøyu basrab, katø lɔstøyu unan. Incha nɔtøwei chumay ib pasrarmabguen ashmøn, kaguende lɔstiibe nui kabmeran ashmønrrai kasrøben.

¹²Ñim ureezheelan, na ñimun pɔrar.

Kaguende Jesucristoi munchigurri ñimui kaig mariilan ulø baymønrrab pesannaig køn.

¹³Na ñim mɔskalan pɔrar,

kaguende srøsrøgurri manawei nø pasrabigwan ñim nebua ashibelø gúimba.

Na ñim matsørelan pɔrar,

kaguende Satanás, tru larrø gaigwan ñim kanaig kuimba.

Na ñimun ureezheelan pørig køn,

kaguende Mɔskawan ñim nebua ashibelø gúimba.

¹⁴Na ñim mɔskalan pɔrar,

kaguende nun srøsrøgurri manawei pasrabigwan ñim nebua ashibelø gúimba.

Na ñim matsørelan pørig køn,

kaguende ñimbe kørørmø,

mur pønrrabelø gúikkurri,

gatø Tiuswei wam ñimui manrrau pasrøben,

Satanás, tru larrø gaigwan kanaig kuimba.

¹⁵Yu pirauigwan purø undaaramøwei, katø yu pirau chi kɔbigwangøba undaaramøwei indamig køn. Møikkøben yu pirauigwangøba undaarabene, Tius Mɔskawei undag kɔbiibe nuinuube kaagøn. ¹⁶Kaguende yu piraugurri arrubiibe, øyeeg køn: asr maig marøg kɔben mariilø, kaptøga chigøben chull asiilø, katø namui chigøben kɔbiitøga truba nørreelø gømmørø indiilø. Øyeeløbe Tius Mɔskaweinukkurri arrumøtø, yu piraugurrindøwei arrubig køn. ¹⁷Inchendø pirøbe, katø truyu chigurrimbunø chull indiiløbañau patsab iben, trune Tius maig kønrrain gøben treegwan marøbiibe managatig øsig kønrrun.

Criston ashig kòmui inchibelø

¹⁸Ureezheelø, yandø srabe gwalømmerna puin gøn. Tru Criston ashig kòmui inchibig attrab gúi ñimbe wammørøbelø gøn. Inchawei mõi yangucha tru ‘Cristo guer’ chibelø truba rruba amrruin gøn. Treekkurri nambe yandø srabe gwalømmerna gúi aser. ¹⁹Truiløbe namui utugurri webambuppe, webambubwei inchendø, namuielø gømuig køn. Pøs namuielø gúi kuimbe, namba pønrrabig pønrrabsruig kuinrrun. Inchendø webambuppe, ke mayeeløbabe kerrigu namui utuelø gømuin gúi törgandø ashchain gúig køn.

²⁰Inchendø ñimbe Espíritu Santoiwan itølusig tøgar gua, treekkurri ñimbe chiwandøgucha ashibelø gøn. ²¹Nabe ñimun pørøppe, newan ciertonigwan ashmeelø gúimba gømøtø, ñim ashibelø gúimba bōrar. Katø ñimbe ashibelø gøn, chitøgucha isatø indiibe tru newan ciertonigugurri arrumíig kuin gúi. ²²¿Tru isaptiibe mu guerah? ¿Tru isaptiibe Jesúsuan ‘Cristo gømøn’ chibig kòmuitarru? Iig køn tru Criston ashig kòmui inchibiibe, tru Møskawan lata, Nusrkawan lata ‘Tius kømøn’ chibig, truig. ²³Mutøgucha Nusrkawan ‘ashmíig kur’ chibiibe Møskawangucha chigaig køn. Inchen mōikkøben Nusrkaweimburab ‘nøbe mu gúi ashig kur’ chibiibe, trube Møskawangucha treetøwei tōga basran.

²⁴Inchawei ñim srøsrøgurri wamindi mōrigwane truyutø pønrrabig bōnrrønrrab inday. Tru ñim srøsrøgurri wamindi mørøb amrruig ñimuinug pasrabig basrøbene, trube, ñimgucha Nusrkaweinuuba, Møskaweinuuba pønrrabig bōnrrønrrabguen. ²⁵Inchen Jesucristo tru namun tranrrab misra kōrrømisriibe iig køn, tru managatig øsig kōmig.

²⁶Na ñimun iigwan pørøppe, isatø may wamincha ñimun kegørrørskønrrab inchibelaiburab pōrar. ²⁷Pøs ñimuimburappe, tru Espíritu Santoi itølusigwan ñim nun uta tōgagúig ñimui manrrau pasrabig pasraikkurri, ñimbe mu gatøgane chi kusrennamig palain gømøn. Kaguende tru itølusiitøwei ñimune chiwandøgucha kerriguh kusrenanen, tru kusrenaniibe ciertonig, ka isatø indig kōmøwein gøben, nui Espíritu ñimun maig kusrenanen, trumay Cristoinug pønrrabig pønrray.

²⁸Inchawei ureezheelø, mōimbe nuinug kanbalatø pønrrabig pønrray, nø kenamisren, chi isumø, nui merrab pønrrab, katø,

nø arruben, nui merrab korig misra korrømisramig kaanrrai.
 29 Jesucristobe sɔlgandø tabig kui ñim ashibelø guabe, trube,
 mutøgucha sɔlgandø marøbelane Cristoinug kal-lawar gúin gúi
 asamig køn.

Tiuswei ureemera

3 ¹ iAu ñimguen asay! Tius nui undag købig namun yeeg
 nuig tranigwan, Tiuswei ureemera gøn chaguen namun
 wamiilø gømnegatig. Pøs nambe treeløwein guer. Treekkurri
 pirau misaamerabe namune ashmeelø gøn, kaguende nømbe
 Tiuswan ashmeelø gua. ² Nai undaarailø, yandø nambe Tiuswei
 ureemera guer. Incha namune møimbatøbe tru wendøsrø nam
 maig kømigwane kenamarmø srø gúindøgucha, yandø Jesucristo
 kenamisrene, nø lataitøwein gømig kønrrab gúi nambe asha
 guer. Kaguende nø maig kuigwan yandø tuyube nam nebua
 asam gønrrab gøn. ³ Møitøgucha nuinuube treeg punrraitamab
 isua munig megamig tøgaipe nøasiitø nui manrrøwan chishchig
 tøgagøn, Jesucristo chishchig køb lataitøwei.

⁴ Mutøgucha kaig marøbiibe tru maig maramigwan martrai
 Moisés pørigwane kalø marøb itøbunan. Kaguende tru kaig
 mariibe tru pørigwane itøbunig, treeg køn. ⁵ Ñimbe yandø ashibelø
 gøn, Jesucristobe yu piraumay arruppe, namui kaig mariilan
 kerranrrab arrig kui. Katø nuinuube chigucha chi kaig mariibe
 kaagøn. ⁶ Mutøgucha nuinuutø pasrabig pasrabiibe kaigwan
 marøbig marmuben, katø mutøgucha kaigwan marøb uñibiibe
 nune ashmøwei, katø mu gúi nebua ashmíig køn. ⁷ Ureezheelø,
 mugøben ñimun peløsrkainab pønrrønrrab gømø. Sɔlgandø marøb
 uñibiibe, sɔlgandø tabig køn, Cristo nø newan sɔlgandø tabig køb
 lataitøwei. ⁸ Kaigwan marøb uñibiibe nugwaimandzigwein gøn.
 Kaguende nugwaimandziima srøsrøgurri kaigwan marøbig køn.
 Inchawei Tiuswei Nusrkai kenamisrøppe, tru nugwaimandzig kaig
 mariilan pinishinrrabwein guenamisrig køn.

⁹ Mutøgucha Tiusweinug kal-labiibe kaigwane marøb uñmøn,
 kaguende tru øsig kømig Tiusweinug pasrabig nuinug pasrøben.
 Treekkurri kaigwane marøbig martrab gaiman, kaguende nøbe
 Tiusweinug kal-laweig kuikkurri. ¹⁰ Møilø Tiuswei ureemera gúin
 gúi, katø møilø nugwaimandzigwei ureemera gúin gúi, øyeegu
 nebua asamdiig køn: mutøgucha maig kønrrabigwan sɔlgandø

tabigwan marøb uñmøwei, katø nui nunewan undaaramøwei inchibiibe Tiuswein gømøn.

Kangurrin gangurri undaarayagun

¹¹Kaguende Tiuswei wamwan srøsrøgurri ñim wamindi mōriibe iig køn: nam kangurrin gangurri undaarayamig. ¹²Caín lataitøwein gømugun. Truima tru kwaimandzig, larrø gaigwein gua, nui nunewan kweetsig køn. ¿Nøbe chigurrin gweetsig køh? Kaguende Caín nō mariiløbe kaig mariilø gøben, nuneg mariiløbe sølgandø tabig mariiløgurriin gúig køn.

¹³Nai nunelø, kan ¿øyeebe chincharre? treeg kermab isumøtay, pirau misamera ñimun ashig kømui inchene. ¹⁴Nambe kwamigugurri øsig bønrramnuumay puraamba pønrrabrain gúi, asha bønrrer, kaguende namui nunelan nam undaabelø gúikkurri. Nunewan undaaramíibe kwamigugurri webimø, srø basran. ¹⁵Mutøgucha nui nunewan ashig kømui inchibgøba uñibiibe kweechiptiig køn. Ñimbe ashibelø gúinrrun kan kweechiptiibe tru managatig øsig kømigwane chigaig kui. ¹⁶Jesucristobe nui øsig kuigwan namuyasig trana, kwaben, øyee marigu nui undag købigwan nambe truyu nebua aser. Inchawei namgucha treetøwei namui nunelayasig nam øsig bønrraigwan tranamig køn. ¹⁷Inchen mōikkøben yu pirau chi palømfíg tøgag købendø, nui nunebe palaig megamne trunun ashatøgucha merø gúi inchib, purugumubene, trube ¿Tiuswei undag købiibe nuinuube chinch basrønrrab gø? ¹⁸Nai ureezheelø, undaarappe, ka wamdøgatø gømøwei, ka wamincha mōriitøgatø gømøwei, ñimui mariiløtøga kenamarøb, cierton undaarayagun.

Tiuswei merrab chi isumø pønrramig

¹⁹Nam øyamay marøb pønrrøwabe, newan ciertonigweimburabeløyu pønrrabelø gøbrain gúi mōra, yandø namui manrrømeran Tiuswei merrab chi isumø tōga bønrramig kønrrun. ²⁰Namui manrrøguen namun chiwan gøben kalø gøn chib kebachib pasrøbene, Tiusbe namui manrrø lataitøguen gømø, purø nuig kui køppe, nøbe chiwandøgucha kerrigu ashibig køn. ²¹Undaarailø, namui manrrø chiyu gøben ‘kalø gøn’ chib namun kebachimubene, nambe Tiuswei merrab chi isumø pønrramig tøgaguer. ²²Incha katø nam chigøben nun miawabe, nun

utønrrun, kaguende marmø gømmø, nui maig maramigwan martrai pønstrailan nambe mōra marøb, katø chiwan gøben nui merrab marøppe, nun kasrag kōmdiig marøbelø gúikkurri. ²³Inchen martrai tru nō karua bōnsraibe iig kōn: nui Nusrkai Jesucristoi munchiyu kōreb, katø kangurrin gangurri nō maig karuig kōben treeg undaarab indamig. ²⁴Nui maig maramigwan martrain bōnsrailan mōra marøbeløbe Tiusweinuutø pōnrrabig bōnrrøben, katø treetøwei Tiusbe nōmuinug pasrabig basran. Øyeekkurri Tiusbe namuinug pasrai asha guer, tru Espíritu Santon namun tranig truikkurri.

Espíritumeran Tiuswei Espíritu gøtashchab tab asamig

4 ¹Nai undaarailø ‘nambe Tiuswei Espíritutøga waminchibelø guer’ chibelan mundøgucha ke chi tain gúindø kōreb pōnrrømøtay. Treeg kōmøtø, nōm espíritu tøgagúigwan maig kōtashchab ashibmerrig asamig kōn, Tiuswei Espíritu gúin gúi, kabe peg espíritu gúin gúi. Kaguende yu piraube webambin gøn ka isatø ‘Tius maig karuigwan eshkabelø guer’ chibelø. ²Ñimbe Tiuswei Espíritun øyeegu ashchun: chi espíritutøgucha ‘Jesucristobe mōg misra arrig kōn’ chibiibe si, truike Tiusweinukkurri arrubig kuin gúi. ³Inchen chi espíritutøgucha ‘Jesucristobe mōg misra arrumuig kōn’ chibiibe, truike Tiusweinukkurri arrubig kōmøtø gøn. Truike tru Jesucriston ashig kōmui inchib tsalø inchibigwei espíritu gøn, tru attrab gøn daigwan ñim wammōra gúig. Incha mōimbe yandø chabguen yu pirau pasrabguen indan.

⁴Nai ureezheelø, ñimbe Tiusweyelø gua, tru isa waminchipteelan ñimbe chinchamamø, kanawa puraambin gøn. Kaguende ñimuinug pasrabiibe, pirau pasrabig lataig kōmø, mas purø nuig kōn. ⁵Nōmbe yu piraeløtø gua, yu pirau chi kōbigwan nōm waminchen, yu piraeløbe nōmune ke tru gúindø mōran. ⁶Inchen nambe Tiusweyelø guer. Inchawei mutøgucha Tiuswan nebua ashibiibe namune mōren, Tiuswan ashmíibe namune mōrmøn. Øyeegu nambe aser, tru newan cierton Espíritunba, katø tru isa pelørkøptø espíritunba.

Tiusbe tru undag kōbig kōn

⁷Nai undaarailø, kangurrin gangurri undaarayagun. Kaguende undag kōbiibe Tiusweinukkurri arrubig kōn. Inchen mutøgucha

undaguibe Tiusweinug kal-laweig køb, katø Tiuswan nebua ashib inchibig køn. ⁸Undag købigwan chigaibe Tiuswan nebua ashmíg køn, kaguende Tiusbe tru undag købig køben. ⁹Tius nui undag købigwan namun kenamarøppe, øyamay kenamarig køn: tru nui kandø Nusrkawan yu piraumay øra, nøgurri nam srøig øsig kømigwan tøgagønrrai. ¹⁰Tru undag købiibe øyeeg marigu basran: Tiuswan nam undaguelø gúig kuimba gømøtø, nø namun undaarawa, nui Nusrkawan nam kaig mariilaimburø Tiuswei namig købigwan nø utab namuyasig kwanrrai ørigu.

¹¹Nai undaarailø, Tiusma namune øyamay undaaraiø købene, namgucha treetøwei kangurrin gangurri undaarayamig køn.

¹²Mugucha Tiuswane managuen asiibe kaagøn. Inchendø nam kangurrin gangurri undaarayabene, Tiusbe namuinug pasrabig basrøben, nui undag købiibe namuinug kerrigu newan tabig pasramisrin gøn. ¹³Nambe nuinug nøba pønrrabig bønrrab, katø nøbe namba pasrabig basranmab asamig kønrraimbe, nø namun nui Espíritun tranikkurrin gøn. ¹⁴Incha nambe namashib asha, maig kuigwan eshker, Tius Møskai nui Nusrkawan yu pirau misagwan Kaigyugurri Wesrabig kønrrai ørigwan. ¹⁵Møikkøben ‘Jesúsbe Tiuswei Nusrkain gøn’ chibiibe Tiusweinuutø pasrabig basrøben, katø Tiusbe nuinug pasrabig basran.

¹⁶Tius nui undag købigwan namuimburab tøga basraigwan nambe nebua ashib, køreb inder. Tiusbe tru undag købig køn. Inchen møikkøben undag købigwan tøga basrabiibe Tiusweinug basrøben, katø Tiusbe nuinug basran. ¹⁷Øyamaybe Tiuswei undag købiibe namuinug kerrigu newan tabig kørrømisran, Tius tru maig kuigwan asha marøb gwaløm nambe nun chi kørmø pønrramig kønrrai. Kaguende Jesucristo maig køben, nambe yu pirau treelø guer. ¹⁸Inchawei undag købig pasrøbene, kørig købiibe chigagøn. Masken treeg kømøtø, undag købig kerrigu newan tabiibe kørig købigwane kerrigu tarømaran. Kaguende kørig købiibe tru purø rrømbøig attrabigwan utam gønrrab gúimba køriiran. Møikkøben kørig købigwan tøgaiibe katøgucha tru undag købigwan kerrigu newan tøgagømø, palab pasran.

¹⁹Nambe undaarabelø guer, kaguende Tius nømerrig namun undaaraiø kua. ²⁰Møikkøben: “Nabe Tiuswan undaguig kur” chibendø, nui nunewan tsalø ashibiibe, truiibe treeg kømubendø, isaptiig køn. Kaguende nui nunewan nui kaptøga asigwanguen

undaaramíibe mas Tiuswan kaptøga mana asiimígwane ìchinch
 undaaranrrab gø? ²¹Katø tru martrai Tius nø karua basrig iigwan
 tøgaguer: Tiuswan undaguibe katø nui nunewangucha undaarau
 taigwan.

**Isubigwan Jesucristoinuutø pasra tøgagúitøga
 chi arrubigutøgucha puraambub**

5 ¹Mutøgucha Jesúsbe Cristo gúitamab kørebiibe Tiusweinug
 kal-laweig køn. Incha mutøgucha Møskawan undaarabiibe
 katø truigwei uregwangucha undaaran. ²Nambe øyamay tru
 Tiuswei uremeran undaguelø guermab wetøgørrer, Tiuswan
 nam undaaraikkurrimba, katø nui tru maig maramigwan martrai
 pønsrailan møra marikkurrimba. ³Tiuswan nam undaaraibe
 nui tru maig maramigwan martrai pønsrailan nam møra marig,
 truig køn. Inchen tru martrai nø karua pønsrailøbe ke martrab
 gaimamdiibe gømøn. ⁴Mutøgucha Tiusweinug srøig kal-lawaiibe
 yu pirau chine pureb arrubigu kebeñmø, purayan. Tru namun
 pirau treegu kebeñmø, kanawa purainrrai marøbiibe tru namui
 isubigwan Jesucristoinuutø pasra tøgagúig, truig køn. ⁵¿Yu pirau
 chine pureb arrubigu kebeñmø, kanawa puraibiibe mu gøh?
 Jesúsbe tru Tiuswei Nusrkain gúitamab kørebíg, truitøwein gøn.

Tiuswei Nusrkaweimburab maig kuigwan eshkan

⁶Tru pitøgaba, anindøgaba arrubiibe, tru i Jesucristo gøn,
 pitøgatø gømøtø, pitøgaba, anindøgaba arrubig. Tru treeg
 arrigwane Espíritu Santo eshkan, kaguende tru Espíritube tru
 newan ciertonig kua. ⁷Inchawei pøn gøn, tru ‘treeg køn’ cha
 eshkabeløbe. ⁸Truiløbe Espíritu Santoba, piba, animba gøn. Inchen
 tru pønbe chi pegwan waminchimøtø, trunundøwei wamindan.
⁹Møguelø ‘treeg køn’ cha, eshkaigwanguen nam ka utiibe, Tius
 namun ‘treeg køn’ cha, eshkawa pasriibe treetøguen gømø, purø
 nuikken gøn. Kaguende Tius ‘treeg køn’ cha, nø eshkawa pasrøppe,
 nui Nusrkaweimburab wamindig køn. ¹⁰Tiuswei Nusrkawan
 kørebiibe, Tius nui Nusrkaweimburab ‘treeg køn’ cha, eshkaigwane
 nøasiitø nui manrrau tøga basran. Trune Tius maig taigwan
 køremíibe Tiuswane ka isaptiig kui lataig maran, kaguende
 Tius tru nui Nusrkaweimburab ‘treeg køn’ cha, wamindigwane
 treeg kuitamab køremuikkurri. ¹¹Inchen Tius tru ‘treeg køn’ cha,

wamindiibe iig kòn: ‘Tru managatig øsig kømigwan Tius nò namun tranen, tru øsig kømibe nui Nusrkaweinug pasran’ daig. ¹²Inchawei Nusrkawan tøgaiibe tru øsig kømigwan tøgagøben, Tiuswei Nusrkawan chigaibe tru øsig kømigwan chigaig kòn.

Maig kømigwan srabe wamindiilø

¹³Ñim Tiuswei Nusrkawei munchiyu kørewa bønrrabelan nabe ñimun iigwan pørar, managatig øsig kømigwan ñim tøgar gúi ashchai.

¹⁴Inchawei nambe Tiuswane chi kørmø kemalla miamdiig kui aser, kaguende nam nun chigøben miappe, nò maig kønrrain gøben nam trumay miabene, nòbe namune mørøbig kuimba.

¹⁵Trube, nam chigøben miailan nò mørøbig kui ashibelø gúi kòppe, namun chigøben paløtan cha, nam miawa pønrsailane, trube, utabguen indermab isumig kòn.

¹⁶Møikkøben ñui nunewan kaig marøb pasrai asig, tru managatig møra pasramsromay srua inrrabgaig købene, nuyasig Tiuswan ‘purugurra’ cha miamig kòn. Inchen truigwane Tiusbe nui øsig kuigwan tøgagønrrai tranrrun. Iibe kalø marig ke kwamigugatig srua inrrabgaigwan marøbelayasig kòn. Kaig marig kwamigugatig srua inrrai marøbikkucha kòn. Truigweimburappe, Tiuswan ‘purugurra’ cha, nabe miay chimur. ¹⁷Chigurrimbunø sølgandø tabig mariimíibe kaig marig kørørmisran. Inchendøgucha tru kaig mariilø møiløbe tru managatig møra pasramsromay srua inrrabgailø gøn.

¹⁸Mutøgucha Tiusweinug kal-lawaiibe kaig maramigwan marøbig marøb uñmuin gúi aser. Kaguende tru Tiuswei Nusrkai nune ashib tøga basrøben, tru kwaimandzig, larrø gaibe nune chinchab gaiman. ¹⁹Nambe Tiusweyelø guermab asha bønrrer. Inchen yu pirauigwane kerrigu mayamba tru kwaimandzig, larrø gaibe nò merrarrowa, nò ashib karub pasran. ²⁰Katø Tiuswei Nusrkaimbe arrua, namune chigúi møramigwan tranin gúi aser, tru newan ciertonigwan nebua ashchai. Incha nambe kanbalatø bønrrer tru newan ciertoniguba, tru nui Nusrkai Jesucristoinuuba. Truibe tru cierton Tius køb, katø managatig øsiguig køb gøn. ²¹Nai ureezheelø, tru taska mari tiusmerane mendamisray.

2 San Juan

Ciertoniiba, undag købiiba

¹Na, Tiusweimburabelan pera marøb pasrabig i kilgawan pørar, Tius lawa wesrua tøgagúig ishuumisagwan nui ureemeranba, tru na newan ciertonigu undaarailan. Katø natø gømøtø, mayeeløba tru newan ciertonigwan nebua ashibeløbe truiløgucha ñimune undaaran. ²Nambe ñimun undaarappe, tru newan ciertonig namui manrrau pasraikkurrin gøn. Inchen tru ciertoniibe namba managatig pasrønrrun. ³Tius Møskaweimba, katø Señor Jesucristo, tru Møskawei Nusrkaweimba, nui ka yandø tab indig køben, namun lastima asig køben, chi isumgaig tab gøbig køben namuim bala pønrrønrrun, tru newan ciertoniguba, undag købiguba.

Undaguelø gømigwan karua basrig

⁴Nabe truba rrua kasraarar ñimui ureemerai utu møiløgøben Tiuswei newan ciertonigu amønain gúimba, Tius Møskai namun maig karua basrig køben, treekke. ⁵Ñi, ishug misagwan, na mõi ñun pørigwan, martrai kan srøig karua basra pørig kuig lataig inchimørrunrrig chinrrainchar. Treeg kømøtø, tru srøsrøgurri namun maig karua basrigwan trunundøweim børar, tru kangurrin gangurri undaarayagun daigwan. ⁶Iig køn nam tru undag købigwan tøgø bønrramibe, Tius tru maig maramigwan martrai pønrrailan trunun møra marøb amønamig. Inchen tru martrai karua basrigwan ñim srøsrøgurri møriibe undag købigu amønñinrain daig, truig kuig køn.

Namui isubigwan Cristoinug pønsra amønaig

⁷Pøs yu piraube isa may wamincha kegørrørskøbelø truba rruba webambin gøn ‘Jesucristobe yu piraumay møg lataig misra arrumuig køn’ chibelø. Øyeeg inchibiibe tru may wamincha kegørrørskøbig, tru Criston ashig kømui inchib tsalø ashibig, truig kønrrun. ⁸Ñimasiitøwei tab asha melay, ñim chigøben tabig marøb melailan kaptøasha bønrrømønrrappe. Treeg kømøtø, ñimui utamigwan kerrigu newan utamig kønrrai melay.

⁹Møikkøben Cristo kusrenanigutø pasrønrrab inchimøtø, nuinetø nemarøb purab gusrennrrab inchibiibe, Tiuswane chigaig køn. Trune Cristo maig kusrenanigutø pasrabig basrabiibe, truike si, Møskawanba, Nusrkawanba tøgag køn. ¹⁰Møikkøben ñimuinug arrua, tru treeg kusrenanigwan gømø gusrenanene, ñimui yau ‘amø’ cha, kebermøwei, ni gatø ‘manguen arrin gøn’ damig kømøwein gøn. ¹¹Kaguende ‘manguen arrin gøn’ chibiibe tru nø kaig mariiløyu nøgucha tøgatø marøb pasran.

Srabe wamindiilø

¹²Nabe ñimun truba rruba pøramig tøgagøbendø, kilgayu tintatøga børmøtø, nabe ñimuimay attrab isur, malaugue ñimba waminchab namui kasrag købigwan newan tøgagønrrab.

¹³Tru ñui lawa wesruig numøsrawei ureemerabe ñun ‘tab ka uñguh’ chib wam øran.

3 San Juan

Gayoimburab tab waminchib

¹Na, Tiusweimburabelan pera marøb pasrabig, nai tab linchibig Gayon pørar, newan ciertonigu na undaaraigwan. ²Nai undaaraig, nabe ñuyasig Tiuswan miappe, ñui møsig Tiusweimburab tab gøb lataitøwei, chiyutøgucha tab pub attraimba, katø ñui asrugucha kwanrrø gømø, tab unamig kønrraimba miabig kur. ³Nabe truba rruba kasraarar møløgøsrøn namui nunelø amrrua, tru newan ciertonig maig køben ñibe truyutø pasrab, katø treegutø ñi maig unigwan nan eshkaben. ⁴Tru newan ciertonig maig køben, nai ureemera treeg amønan daig wammøramibe, katøgan chi peg wammøri lataitøguen gømø, purø nu tab gøtan.

⁵Nai undaaraig, namui nunelan ñi tabig purugub pasraibe, ñi purø tabig marig køn, ñuimbe asiimeelø gúingucha gatøguchinguen tabig marøb. ⁶Truiløbe iglesiayuelai merrab ñi treeg undaguig køn cha wamindan. Ñi nømui ambamigwan ambub amrrai puruguabe, Tiuswan kasrag kømdiig kønrrai, tabig martrabguen. ⁷Kaguende nømbe Jesucristoi munchin undag køb webambamig køn, Tiuswan ashmø misaamerane chigucha chi purugúig utømø. ⁸Inchawei treekkurri nambe treeg marøb møguelane purugub asamig nebunrrun, Tiuswei tru newan ciertonigweimburab namgucha purugúig kørrømisrtrai.

Diótrefes söl marmø kaig marøb

⁹Nabe iglesian kan kilga pørig kuig køn. Inchendø Diótrefesbe na karuilan mørmíig køn, kaguende nømui utu chiyutøgucha ke nø garub pasrønrrab inchibig kua. ¹⁰Inchawei treekkurri nabe ippe,

nø chi mariilan ñim isunrrai wamindamønrrun, tru nø namun isa wamincha wam gusruigwan. Incha trutø gømøtø, nøbe nunelan utømøwei, katø utønrrab inchibelan meramba, iglesiyagurri webetamba inchibig køn.

¹¹Nai undaaraig, kaig mariilan asha marmøtø, tabigwan asha mar. Tabig marøbiibe Tiuswein gøn. Inchen kaig marøbiibe Tiuswane ashmíig køn.

¹²Mayeeløba Demetrioimburappe tabig waminchibelø gøn. Tiuswei tru newan ciertoniitøweinguen nune treeg marøbig køn cha eshkan. Inchen namgucha truigweimburappe ‘treegwein gøn’ chib eshkan waminder. Inchen nam ‘treeg køn’ cha wamindiibe, isa gømø rrendaig kuig ñibe ashibig køn.

Srabe wamindiilø

¹³Nabe ñun eshkamig truba rruba tøgagøbendø kilgayu tintatøga børøg kømøtan. ¹⁴Nabe maya yanayutø ñun ashchab attrab isur malaugue waminchab.

Chi isumgaig tab gøbiibe ñiba basrønrrai isur. Tru tab lincha amøñibeløbe ñune ‘ka uñgu’ tan. Katø ñigucha namui asiilan kanun ganun nømunashib treetøweih chirrunrrig.

San Judas

¹Na Judas, Santiagoi nuneg, Jesucristoi marøb megabiibe Tius Møskai wamiilø undaarailan, Jesucristobe chi kømønrrai ashib tøgä basrailan na pørar. ²Purø lastima asigwanba, chi isumgaig tab gøbigwanba, undag købigwanba ñim uncha tøgagønrraimab isur.

Isa peetø gusrenanøbelø

³Nai undaarailø, ñim lata, na lata kanguelarrøtø tru nam kaigyugurri wesraig pønrraigweimburab ñimun pørtrab truba rruba isuig kuig køn. Inchendø truburab pørmøtø, ‘øyeeg, øyeeg melay’ chib waminchib pøramig truba palai ashar, tru Tiuswei misaameran Tiuswei tru tabig srø wamwan Jesucristoimburab managatigweyasig treetø gønrrai kanmaytø tranig købigwane mur tranrrab pønrrai chinrrab. ⁴Kaguende mõiløgøben mu ashmøwatø ñimui utu nilø kebambin gøn. Truiløbe kaigyu pønrramig kønrrai manasrøwei treeg mariilø gøbig køn. Tru Tiuswan ashmeelø kaig møgueløbe namui Tiuswei ka yandø tab indigwane nømun maig marøg køben maramigweyasig merrarraawa tøgagøn. Katø, tru nøtø kandø Mayeelaim Bala Pasrabig, namui Señor Jesucristone nømbe ‘ashmeelø guer’ chibelø gøn.

⁵Ñimbe yandø ashibelø gúindøgucha, nabe gatø isungarunrrab inchar, Israel misaameranma Egipto biraugurri Señorbe wesrappe, wesrabendø, wendøsrømbe nun tru køremeelane pinisaig købigwan. ⁶Katø ángelesmeran chigucha nømune srøsrø chiyu pønrrønrrai pønrrøben, truyutø bønrrømøtø, trunun elachippa, tarømisrøbelane purø rrømbø løstiigu pønrrønrrai Tiusbe managatig cadenastøga merrarraawa pønrraig køn, tru maig maramigwan asha maramig purø nu gwalømweyasig. ⁷Katø

Sodoma misaameraba, Gomorra misaameraba, tru buluwan ciudameraba rreetøwei, ishumburba, møgueløba trømbøig kaig marøb, katø møgueløbe nøm møgueløasiyaitø trømbøig marøb gømig, trutø srua ambiilan managuen kwamø nagu mōra melønrrai kebeta, pønsraig køn, trunun gatøganelø isua asha gømig kønrrai.

⁸Katø øyeeg købenguen tru møguelø piaig lataigutø amønibeløbe nømui asrwan kaig kønrrai marøb, katø ashib karub purrabelane mormø, kaashib, katø tru srømbalasreelø truba nørreelanguen tsalø wamab inchibelø gøn. ⁹Trune tru arcángel Miguel gøbenguen, tru nugwaimandziiba Moiséswei asr cha aleguiab gua, truikken tsalø wamab kaig nebubash chinrrab inchimøtø: “Øyeebe maramig kømøn chib, Señor ñun namubash” cha. Trutøh taig købig køn. ¹⁰Trune tru i møgueløbe nøm chigúinguen mormubendø, tsalø wamabelø gøn. Nømun tre lataig asønaigutø nøm chigúi mōrigwane, animalmera chugúi mormeelø lataig trømbøig marøbelø gøn, nòmasiitø minchib treramig.

¹¹¡Ay, nømuimbe maig kønrrerah! Kaguende nømbe Caínwei maywan merrarraa amban. Nømbe an ganag købiitø Balaam kebeninuutøwei kegørøra, katø mormuikkurri Coréwan pinisailø lataitøwei pinisailø gøn. ¹²Nim Tiuswei undag købigwan tōga kasraatø lincha mab waramig tōgagúiløyube, nømbe ke ka trømbøig mindishibelø treelø gøn. Nømbe chigucha kørikkar ka nømuimburab øska mab, øska muchibashtø inchibelø. Nømbe wañimera chi pigarwan ambumay imay isig srua ambig latailø gøn. Katø mamig nigamig puben, niimø tusrmera latailø, srølbāñau kitiilø, pamay kwailø gøn. ¹³Nømbe maryu pi welarmera namig latøgushib kurra arrubigu, kan pichall weguchib latailø gøn, tru nømui trømbøig ashikken gønrrabgaig mariiløbe. Estrellasmera nømui ambamwan gømø, pella ambub latailø gøn. Truilaimbe purø rrømbøig løstøyu managatig pønrrønrrai pønstramig tamariilø pønrran.

¹⁴Adánweinukkurrimbunø misaamera srøig, srøig kurra arrubig siete nemisren arrubig tru Enockucha, tru i kaig misagweimburab manawei trencha eshkawa pasrig købig køn: “Au, Señorbe nui tarømari ángelesmeran purø nørø sötø beraig arrun cha, ¹⁵maya misaameran maig kønrrabigwan asha marøb, nøm chu bønrramigwan pønrrønrrai pønstrønrrab, tru larrø gailane nøm kailø gúimaytø larrø kaig mariilan mundøgucha treeg martrab. Katø tru larrø gailø chigurrimbunø mōrøbguen mōram gaig wamindi wammeratøga

nun waminchibelan treeg korrømartrappa arrun taig køn.” ¹⁶Nømbe chiwandøgucha kaig kêtangøba chib, chiwandøgucha søl marmø, kalø marangøba chib waminchibelø gøn, nømui kaig isuilø maig køben, nømbe treeg amøñibelø gua. Katø nømui triitøgabe nòmasiitø purø nørreelø misrøb wamindamba, katøganelane truba tabzhig misrøb wamindamba inchibelø gøn, nømuyasig chigøben tøgagug købiitø.

Tiuswei misaameran isuatø amøñinrrai waminchib

¹⁷Trune ñim, nai undaarailøbe, namui Señor Jesucristo nøashib karua øriilø merrabsrøwei wamindigwan isua guy. ¹⁸Kaguende truiløbe ñimune øyeeg taig købig køn: “Yandø srabe gwalømmerawane misaamera tabigwane ke ka indzatø mørøbelø, nømun maig amøñig køben treeg trømbøig marøb amøñibelø kønrrun” daigwan. ¹⁹Iiløwein gøn, tru misaameran ka nørøtø marøb pirisha bønserøbelø. Nømbe nømui asr maig palai inchen, treeg marøbelø, Tiuswei Espiritune chigar gøn.

²⁰Trune ñim, nai undaarailøbe, ñimui isubig newan chishchig Tiusweinuutø tøga bønrraigu gatøguchinguen nørørab ambay, Espiritu Santo maig wamindingaruben trumay Tiusba waminchib. ²¹Ñimbe Tiuswei undag købigutø amøñippe, truyutø amønay, namui Señor Jesucristoi lastima asiitøga managatig øsig kømigwan tranrraitamab isua muniirab.

²²Møiløgøben treeg kuitamab isumba, katø treeg kømuitamab isumba inchibelane ñimbe lastima tøgaguy. ²³Katøganelane nagugurri wesrui, trumay kaigyugurri wesrub. Inchen gatøganelane lastima tøgagømig køn. Inchendø purø ashiptø maray, trømbøig marøg købigu nøm trømbøig mariiløtøga chillig inchib kewa llirab pønrrailanguen ashikken gømui inchib.

Tiuswan tabig wamindiilø srabeig

²⁴Tru ñim kaigyu korrømønrrai asamig maramburab maramig tøgag, katø truba rrua kasrag nui tørguegwalmabiisrø chigucha chi tamgailø chishchig ñim kemalla pønrramig kønrrai tøga basrabig, ²⁵Tius kandø wabig, namun Kaigyugurri Wesrabigwan namui Señor Jesucristogurri tørguegwalmabiiba, purø nuig muguen nebua isumgaiba, mayelaim bala asamburab ashib pasraiba, mugucha manchinrraingaig karuiba, iilan nuin gønrrai inder, manasrøngurri, møyia lata, katø managatig. Treeg kønrrun.

El Apocalipsis

Jesucristo San Juanwan torgandø ashchai kenamarig

1 ¹Iibe Jesucriston Tius torgandø kenamarig køn, nø nui karuig melabelan kenamartrai, tru maya yanayutø purainrrabigwan. Jesucristobe nui marøb megabig Juanwan kan ángelwan øra, kenamarig køn. ²Inchen Juanbe nø maig asigwan kerrigu isa gømø, maig kuigwan wamindan, Tiuswei wamwanba, Jesucristo maig eshkaigwanba.

³Mayanguen tab gúig køn, tru chinetø pub attrabig pørigwan lebigweimbe. Katø trunun leben møra, tru maig taigwan marøbelø chigucha maya nuguen tab gúilø gøn. Kaguende yandø tru pub attrabiibe pub pasran.

Juan siete iglesiameran pørøb

⁴Na, Juanbe, Asia birau siete iglesiameran pørar. Ka yandø tab indigwanba, katø tru chi isumgaig tab gøbigwanba ñimuin gønrraimab isur, Tius tru mõi ya køb, merrabsrø køb, attrabig køb, truigweinukkurrimba, katø siete espíritumera, tru Tius wamisra karub waigwei merrab pønrrabelainukkurrimba, ⁵katø Jesucristoinukkurrimba arrubigwan. Nøbe waminchippe, maig kuigwan eshkaig køb, katø tru maya kwabelai utu nømerrig øsiirabig køb, katø nøbe pirau maya reymeraim bala nø garub pasrabig køb indan. Truibe namune undaarab, nambe kaig mariiløyu lusri latailø gúigwan nui anindøga elatsørka, ⁶katø namune reymera latawei ashib karub pønrrønrrai mara pønstraig køn, sacerdotesmera Tius nui Møskaweyasig. iTørguegwalmabiiba, maramburab mariibabe nuin gønrrai managatig! Treeg kønrrai.

7 ¡Au! Cristobe wañiyu arrun.

Inchen mayeelø ashen,
katø nun tru kelarrab kwanøbeløguen ashchun.
Inchen pirau maya misaamerabe
truba rruba isui inchib kishchun nun ashippe.
Øø, øyeeg kønrrun.

8 Tru Señor Tius, Newan Maramburab Marøbiibe trendan:
“Srøsrīiba, Srabeibabe na gur cha, Aba, Zetaba latawei, tru mōi ya
køb, merrabsrø køb, katø attrabig.”

Juan kan piab lataigu Criston asig

9 Na Juan, ñimui nuneg, chigøben purø rrømbøig puben
isumdiigu lata, katø Tius nø ashib karub wainug lata,
chigúindøgucha ñimba, Jesucristoba kanbalatø pasrabig
basrabig kur. Nan kan pi tøbøtag pirø basrabig, Patmos tainug
wanrrai kegutsig wabig kur, Tiuswei wamgurrimba, katø
Jesucristoimburabigwan eshkaikkurrimba. 10 Kan isrin gwaløm
Espíritu nan tōga basramisren, nai wendaube kan wam kan
trompeta wanrrøb lataig nan truba mur trenchibig køn:

11 —Ñi chi asigwan kan kilgayu pøra, tru siete iglesiameran ør
cha, Efesomayba, Esmirnamayba, Pergamomayba, Tiatiramayba,
Sardismayba, Filadelfiamayba, katø Laodiceamayba.—

12 Inchen tru wam nan waminchibiibe muin gøtashchab
keesha ashene, truyube oro gandilerumera siete nørreelø
pønrraptinchibig køn. 13 Inchene tru siete kandilerumerai
tøbøtaabe kan mugøsrøn møg lataig pasraptinchibig køn, nui
kewagúibe katsig søchi gørrig keweikke. Inchen nui pechoyu
pørønaibe oro gøbig køn. 14 Turyu pusruube kan pulø isig lataig,
wañi lataig puløzhig, nui kabmerabe kan nagurø lataig køben,
15 nui srøbmerabe broncen nagu pill-llanen tørbilabig lataig
pilabig køben, nui wambe kan nu bi mullib wanrrøb lataig
købig køn. 16 Nui kusrmay taskube estrellamera siete sruaig,
nui trigugurrimbe kan espada pinrrøba purø rrøsrig tōgaig
webarrubig køn; nui maløbe nøsig tør gøptø pilamburab pilab
lataikke.

17 Inchen nabe nun ashippe, nui katsigu kwaig lataig beninabig
køn. Inchen nøbe nui kusrmay tasiitōga nan trenchib estsarøbig
køn:

—Chi korig kui inchimota cha. Nabe Srøsriiba, Srabeiba, ¹⁸tru Øsig Wabig kur cha, kwain tsubig kua. Inchendø ash, chibig køn, øsiguig war cha, managatig. Nabe kwamigwei llavimeranba, katø tru kwabelø pønrrainug llavimeranba tøgagur cha.

¹⁹Inchawei ñi chi asigwane pør chibig køn, mõi ya maig kuigwanba, katø wendøsrø maig kønrrabigwanba. ²⁰Inchen tru estrellamera siete nai kusrmay tasigu ñi asigweimburappa, katø tru siete oro gandilerumeraimburappa tru mu asiimíg pasrabiibe øyeeqwan eshkabig køn: tru siete estrellamerabe siete iglesiamerayu ángelesmera gøben, tru siete kandilerumerabe tru siete iglesiameran eshkabig køn.

Efeso iglesian wam ørøb

2 ¹Efeso iglesiai ángelwan iigwan pør:

Tru siete estrellameran kusrmay tasigu srua basrab, katø tru siete oro gandilerumerai utu uñib inchibiibe øyah tan cha: ²Nabe ñui chi mariilan ashar cha, ñui maramelan mur tranrrab megaigwanba, megabig megaigwanba. Katø ñibe kaig marøbelane ka tøgagømig awentanrrab gaimab, katø truilø gømubendø, ‘Cristo nøashib karua øriilø guer’ chibelan, nøm treeløwein gúitashchab ñi asha, ka isapteelø gúin gúi merrarrab indi ashar. ³Katø maya kaig nebuindøgucha ñibe megabig megab, nagurrindø treegu kørrømisrmø megain gúi ashar.

⁴Inchendø nabe ñun chiyu gøsrøn kalø gøn damig tøgagur: ñibe srøsrøbe truba undaguig kuig, mømbe trunun elatsin gøn. ⁵Inchawei mandøgurri peñibrermab isu, tru srøsrø undag købigwan, ñui kaig mariilan isua møra, Tiusweimay llirawa, srøsrø marigwan mar. Treeg inchimuisruandøbe, nabe ñuimay arrua, ñui kandilerune pasrainukkurri kusramønrrun, ñi isua mørmubene. ⁶Treeg kuindøgucha, ñibe ñuimburappe iigwan tøgagøn: Nicolaítasmera marigwane tsaliig køben, nagucha truilø marigwane tsaliig kur.

⁷Kalubaibe mør Espíritu iglesiameran wamindigwan. Maig kuindøgucha truyu pureb ibigwane tru øsig køm tusryu mamigwan manrrai nabe tranamønrrun, Tius nø waisrø purø tabzhiisrø tru tøbøtag pasrabigwan.

Esmirna iglesian wam ørøb

8'Esmirna iglesiai ángelwan iigwan pør:

Tru Srøsriig køb katø Srabeig køb, tru kwawa, katøyug øsiirab inchibiibe øyah tan cha: 9Nabe ñi truba rruba chigøben kaig nebuinab megaigwanba, ñi waacha gúigwanba ashar cha. Inchendø ñibe waacha gømøtø, puaig køn. Katø tru 'judíos ker' chibelø ñuimburab truba rruba chigøben kaig waminchen ashar cha. Inchendø nømbe treelø gømøn, nømui tulundzuni yaeløbe mayamba nømbe Satanáswein gøn.

10Ñimbe kørig kui inchimøtay, maya yana gømøwatø chigøben nebuinab pønrramigwan. Au, nugwaimandziibe møilan gøben ñimui utugurri kailan keeri yau kebetønrrun, maig inchibelø gøtashchab ashchab. Inchen ñimbe kwalømmerra diez nemisramne truba kaig indinab melamig nebunrrun. Kwamnegatig megabig megau, nabe øsig køm coronan tranamønrrun cha.

11Kalubaibe mør Espíritu iglesiameran wamindigwan. Maig kuindøgucha truyu pureb ibiibe katøle kwangarunrrabig mindisaig kønrraamøn cha.

Pergamo iglesian wam ørøb

12'Pergamo iglesiai ángelwan iigwan pør:

Tru espada pinrrøba purø rrøsrigwan srua basrabiibe øyah tan cha: 13Satanás nø wamisra merrarrowa karub wainug ñibe truyu pasrabig kui nabe ashar cha. Inchendø ñibe nai munchiwan pesannamø, tøgagøbig tøgagøb, ñui isubigwan nainuutø pasra tøgagúigwan elachib 'trugatiig kømur' chib pasrømøwei indig køn, tru Antipas nan elachimø pasrabig naimburab waminchibigwan kweechib gwalømmerrawanguen Satanás nø marøb uninug.

14Inchendø kan chigøsrøndø ñun kalø gøn damig tøgagur: møiløgøsrøn tru Balaam gusrenanigwan marøbelan ñibe truyu tøgagøn cha. Tru Balaambe Balacwan øyamay martrai kusrenanig køn, Israelwei misaameran srurrengwargarub taska mari tiusmerayasig kweetsi mamimeran mangarumba, katø møgueløba, ishumburmeraba trømbøig martrai karumba inchib. 15Katø treetøwei ñigucha ñuinug tøgagøn møiløgøsrøn Nicolaítasmerai

kusrenaniilan elachig kɔmui inçhibelan. ¹⁶Treeg kɔbene, ñui kaig mariilan isua mɔra, Tiusweimay llirau. Treeg marmɔwabe, nabe petɔ ñuimay arrua, nai trigu espadatɔga truilɔba kwayamɔnrrun.

¹⁷Kalubaibe mɔr Espiritu iglesiameran wamindigwan. Maig kuindɔgucha truyu pureb ibigwane nabe tru mamig maná taig sɔrig basrabigwan manrrai tranɔb, katɔ kan pulɔ sruuzhig tranɔb indamɔnrrun. Incha tru sruuzhigube kan munchi srɔig pɔrig pasrɔnrrun, truigwane mugucha asiimfíg tru utabiitɔwei nebua ashchun.

Tiatira iglesian wam ɔrɔb

¹⁸Katɔ Tiatira iglesiai ángelwan iigwan pɔr:

Tiuswei Nusrkai, tru nui kabmerabe kan nagurɔ latailɔ tɔgaig, katɔ nui srɔbmerabe kan brɔncen chishtɔ pinɔmɔren, tɔrbilabig lataig tɔgaibe ɔyah tan cha: ¹⁹Nabe ñui chi mariilan ashar cha, ñui undag kɔbigwan gɔben, ñui isubigwan nainuutɔ pasra tɔgagúigwan gɔben, ñi marɔb megaigwan gɔben, katɔ chigúingucha tammay megaigwan gɔbengue. Incha gatɔ mɔimbe srɔsrɔ lata gɔmɔ, katɔguchingen marɔb megai ashar.

²⁰Inchendɔ kan chigɔsrɔn ñun kalɔ gɔn damig tɔgagur: isatɔ ‘Tius maig karuigwan eshkabig kur’ chibig, tru ishug Jezabelwan ñibe tɔgagɔmgaig kuingucha ka tɔgagɔn cha, nɔbe kusrenniitɔgaba, katɔ chull asɔska trɔmbɔig isungaruitɔgaba, tru nai marɔb melabelan ishumburmeranba, mɔguelanba trɔmbɔig maringarub, katɔ taska mari tiusmerayasig kweetsi mamimeran mangarub inçhibigwan. ²¹Nabe nune maya yana gɔsrɔn muniiraig kɔn, nui kaig mariilan isua mɔra, Tiusweimay lliiranrrai. Inchen nɔbe nui trɔmbɔig maramigwane treeg marmɔnrrab katɔyug isua mɔrɔg kɔmuindan. ²²Au, nabe nune camayu tsunrrai kwanrrɔ gutsamɔnrrun. Katɔ nɔba itɔlulɔpteelane nabe truba rruba trɔmbɔig nebuilɔ gɔnrrai maramɔnrrun, tru ishuubamisra nɔmui kaig mariilan nɔm isua mɔrmuisruandɔbe. ²³Incha gatɔ tru mendig amɔñib ureemerane nabe purɔ isumdiig mara, kweetsamɔnrrun. Nabe isuigwan lata, manrrɔwan lata nabe tɔrguelarrab ashibig kuin gúi maya iglesiamera nebua ashchun. Incha nabe ñimun mɔigwandɔgucha ñimui mariilɔ maig kɔben, kanun ganun treeg tranamɔnrrun. ²⁴Trune ñim katɔgan sɔtɔ Tiatirasɔ warabelɔ tru kaig

kusrenaniilan marmøwei, Satanáskurri purø nørrø kusreb chib tøgagúilan nebua ashmøwei inchibelane nabe ñimune trenchar: Katøgan chi peg maramibe maskucha negwanmumønrrun cha. ²⁵Inchendø ñim tøgagøbguen indigwane na arrumnegatig elachimø, isua møra tøgaguy.

²⁶Maig kuindøgucha truyu pureb ibiibe, na maig martrai karuig køben trunun srabegatig marøbigwane chu birausrøn gøben misag nørrø pønrrabelan truilaim bala mugucha mandamgaig karumigwan tøgagønrrai tranamønrrun, ²⁷nai Møskai martrai tranøb lataitøwei.

‘Inchen tru treeg karumigwan utabiibe

tru misag nørrø pønrrabelane

kan tsandzøn bōrōtsiitōga mu kurraasamgaig karub martrun, nōmune kan pirō gōtsōmeran lataitō pusha betab.’

²⁸Incha gatø tru tør-rrab arruben webarrub estrellan tranamønrrun. ²⁹Espíritu iglesiameran wamindigwan, kalubaibe mør.

Sardis iglesian wam ørøb

3 ¹Katø Sardis iglesiai ángelwan iigwan pør:

Tru Tiuswei siete espíritumeranba, siete estrellameranba tōgaibe øyah tan cha: Nabe ñui mariilan ashar cha. Ñibe øsiguig køn chib waminabig købendø, kwaig køn. ²!Kiagasrø! Chiwan gøben ke pinamitø balab pønrrabelane tamar. Kaguende nai Tiuswein gabyu ñui mariiløbe newan tabig kōmui ashar. ³Inchawei kusrenaniilan ñi mōra utigwane mōra marøb, ñui kaig mariilan isua mōra, Tiusweimay lllirab inchi. Ñi kiagasrømuissruandøbe, kan niliig lataig nabe ñuimay arrumønrrun, ñi chu ura attrab gúinguen mōrmøwatø.

⁴Inchen gøben misaamera Sardissrø kan mamdø køn nōmui kewagúilan chillig incha gōmeelø. Truiløbe naba amōñinrrun puløzheelan kewar, kaguende nōmbe øyeegwanwei kenrrabelø gøn. ⁵Maig kuindøgucha truyu pureb ibiibe puløzheelø kenanig kønrrun. Incha nabe managatig øsig purrønrrabelai munchimeran pørig libroyugurri nui munchiwan kerramumønrrun. Incha nabe nai Møskawei merrappa, nui ángelesmerai merrappa, øibe nain gøn cha, nui munchiwan eshkamønrrun. ⁶Kalubaibe mør Espiritu iglesiameran wamindigwan.

Filadelfia iglesian wam ørøb

7'Katø Filadelfia iglesiai ángelwan iigwan pør:

Tru Newan Tabig, Newan Ciertonig, tru rey Davidwei llaviwan sruaig, tru nø kurene, mugucha kasrønrrab gaimab, katø nø kasrøbene, mugucha kurtrab gaimab inchai marøbiibe, øyah tan cha: 8Ñi chi mariilan kerrigu nabe ashar cha. Au, nabe ñui merrab kan yaskab kura pasrar, truigwane mugucha kasramgaig. Ke trengatig nebua marøppe, marmubendø, nai wamwan møra marøb, ñibe nai munchiwan 'ashmíig kur' chib isømøn. 9Au, nabe Satanáswei tulundzuni yaelø 'Judíosmera guer' chibendø, judíos kòmeelø, ka isatø inchibelan, ñui merrab tømboñsrønrrai indamønrrun. Incha nabe ñune undaguig kui nebua ashchun. 10Kaguende na karuilan tammay marøbig marøb megaikkurri nagucha ñun asamønrrun chi kømønrrai pirau muba kuimburab warab misaameran maig inchibelø gøtashchab asamig pirau ørøba yandø purø rrømbøig puben.

11Nabe petø arrumønrrun. Ñi tabig tøgagúigwane elachimøta, ñui coronan mu katøgan merrarramønrraimbe. 12Maig kuindøgucha truyu pureb ibigwane nai Tiuswei yau kan pilar lataig maramønrrun. Inchen managuen nøbe truyugurrimbe webinrraamøn. Inchen nabe nuinuube nai Tiuswei munchiwan pørøb, nai Tiuswei ciuda, tru srø Jerusalén, nai Tiuswei srømbalasrøngurri kørraarrubigwei munchiwan pørøb, nai srø munchin pørøb indamønrrun. 13Kalubaibe mør Espíritu iglesiameran wamindigwan.

Laodicea iglesian wam ørøb

14'Katø Laodicea iglesiai ángelwan iigwan pør:

Tru Amen, tru treeg køppe treeg, tru newan ciertonigwan eshkabig, tru Tius chiwandøgucha pølbasa maren, nømerri trendø pasrabiibe iilan øyah tan cha: 15Ñui chi mariilan ashar cha. Ñibe pishin gømøwei, pachibig kømøwein gøn. Pishin gúi, kabe pachibig kui, treeg kuikken søl gøbsruinrrun. 16Inchawei pishin gømøwei, pachibig kømøwei, mørøtø gurag kuikkurri, nabe nai trigugurri wennamønrrun. 17Ñibe trendan: "Nabe puaig, truba tøga misraig, chigucha yandø palaimíig kur" cha.

Inchendø ñibe uñmuinguen uñib waacha, ñiguen øyeezhig misrin gønmaab asamdiig, katø waacha chiguchagaig, ashchab gaimabig, køsatiig, øyeeg købendø, ñibe ashmøn. ¹⁸Inchawei nabe ñun øyee mar tamønrrun. Nagu parra purøørig oro chishchigwan naiwan penø cha, trutøgabe puaig kønrrig cha. Katø kemeløgucha naiwan puløzheelø penø cha, ñui asr køsatiig kørig kømdiigwan kasrønrrappe. Katø ñi ashibig misramig kabyu srølamig møgucha naiwan penø.

¹⁹Mayeelan na undaarailane øyee marmøta chib nabe namab, katø ichaguchib inchibig kur, søl martrai. Maig isuppe, treegwan martrab kandø isua, ñui kaig mariilan isua møra, Tiusweimay llirau. ²⁰Au, nabe yaskabu wamab pasrar. Møikkøben nai wamwan møra, yaskabwan kurene, nuinug kebya, nabe nøba maben, nøbe naba manrrun.



²¹Maig kuindøgucha truyu pureb ibigwane na wamisra karub wainug naba wanrrai tranamønrrun, maig kuindøgucha na truyu puraarrub arrua, nai Møskaimba nò wainug wamisrøb lataitøwei wamig kønrrai. ²²Kalubaibe mør Espíritu iglesiameran wamindigwan.—

Tiuswan srømbalasreelø truba rruba tabig waminchib

4 ¹Øyeelø chab puraiben, na ashene, kan yaskab srømbalasrø kurig pasraptinchibig køn. Inchen kan wam trompeta wanrrøb lataig srøtø tru na møriibe nan øyah waminchib trenchibig køn: —Yusrø nebamø cha; iilai wendau purainrrabigwan na ñun kenamartrumøn— cha.

²Inchen tru urastø Espíritu nò nan tøga basramisren, srømbalasrømbe tru karub wamisra wamig kan pasrig pasrai nabe ashibig kur. Inchen truyube kan mugøsrøn wabig køn. ³Inchen truyu wabiibe kan jaspe sruuba, cornalina sruuba lataig købig køn. Inchen tru nò waim bøtøgatanbe kan køshømbøtø kan esmeralda srug latazhig pasrabig køn. ⁴Tru wamisra karub waim bøtøgatanbe wamisra karub purrailø katøgan veinticuatro pønrrai ashibig kur. Truiløyube kølli misaamera veinticuatro purrabelø gøn, puløzheelø kewar, nømui turyube corona orotøga mariilø petsargue. ⁵Inchen tru nò wamisra karub wainug truyugurrimbe sre bilabelø gøben, wammera gøben, palaig rrashibelø gøben webambubig køn. Katø tru karub waig merrappe lámparamera nag bilabelø siete pilab pønrrabig køn, truiløbe tru Tiuswei siete espíritumera gøn. ⁶Inchen tru karub waig merrappe kan mar wabig køn, bigriu tørguelarrøzhig lataig.

Tru karub wainug pøtøgatanbe merrabmayba, wendaumayba, pinrrø mendamayba pibgatø øsiguelø pønrrabelø gøn, truiløbe merrabmayba, wendaumayba kabmeratø netseelø. ⁷Inchen tru øsiguig srøsrriibe kan león lataig køben, tru wendauibe kan toro lataig køben, katø tru wendauibe kan møwei malø lataig køben, tru pib gønrrabyuibe kan wasrø pala uñib lataig købig køn. ⁸Inchen tru pibgatø øsigueløbe møitøgucha kwaldzariimera seisbatø tøgar, truiløbe wambiimay, umbumay kabmeratø netseelø, yem gwaløm øyah tamigwane pinømø, trenchibelø gøn:

“Newan tabig, newan tabig, newan tabig

Señor Tius Newan Maramburab Marøbig;

tru købig, mõi ya wabig, tru attrabig” chib.

⁹Tru managatig øsig wanrrabig, tru karub wainug wabigwan, tru pibgatø øsiguelø maya nuguen tab gønrrun chib, tabig kui asha tab inchib, ungwa, ungwa chibelø gøn. ¹⁰Incha trendaimørig tru kølli misaamera veinticuatroeløbe nui merrab tømønørøb sraløptø sraløbelø gøn køriibala tabig waminchab tru managatig øsig wabigwan. Incha nømui coronameran tru nø karub wainug merrab trenchib petabelø gøn:

¹¹ “Señor namui Tius,

ñibe maya nuguen tabigwanba,
tabig kui asha tab indigwanba,
maramburab maramigwanba
utambuawei utønrrabiibe ñi gøn chib,
kaguende chiwandøgucha kerrigu ñi marig kuimba,
Ni treeg kønrrai isuikkurri treeg mariilø,
treeg pønrran” chib.

Ubisha-unø kilgawan kurøb

5 ¹Incha tru wamisra karub wainug wabigwei kusrmay taskube kan libro palamay umbumay pørigwan nabe srua wai ashibig kur, truike siete selløstøga melsra kasraig. ²Inchen kan ángel maramburab maramig tøgag truba mur trenchib payibig køn:

—Sellømeran kølsrøb, kilgawan kurøb, ¿treegwan martraptiig tabiibe mu guerah?— cha. ³Inchendø ni srømbalasrø lata, pirau lata, pirø umbu lata tru libron kurtraptiibe mu gawei, katø tru umbu pørigwan maig køtashchab trawashchaptiibe mu gawein gøbig køn. ⁴Inchen nabe truba kishibig kur, kaguende tru libron kurtraptiibe mu gawei, katø tru umbumay pørigwan maig køtashchab trawashchaptiibe mu gawein gøben. ⁵Inchen møikkørøn tru utuig kan kølli misaabe nane trenchibig køn:

—iKishmøta! cha. iAsh! cha. Tru León Judáwei misag sötøygurriig, tru Davidwei misagugurri arrubiibe nun tru ashig kømui inchibelan nømun kerriguwan chi inchaingaig kanawa gørrømarøb pureb yaig køn cha, sellømeran kølsrøb, kilgawan kurøb inchabig.—

⁶Inchen tru karub wainuube kan ubisha-unø kweetsig købig lataig asønabendø, katøle kurra pasrai ashibig kur, tru pibgatø øsiguelaimba, kølli misaameraimba tøbøtaabe. Tru Ubisha-

unøbe siete kigulmeraba, siete kabmeraba tōgaig købig køn. Inchen tru kabmerabe tru Tiuswei siete espíritumera gøbig køn, tru pirau ørøba truørø øriilø. ⁷Inchen nøbe arrua, tru karub wainug wabigwei kusrmay taskugurri libron utabig køn. ⁸Inchen nø libron utøbene, tru pibgatø øsigueløba, tru veinticuatro kølli misaamerababe tru Ubisha-unai merrab tōmbønsrøb sraløptinchibelø gøn. Møitøgucha arpa sruartø, katø oro copamera may irrabzhiitø netsig sruar gøbig køn. Tru may irrabzhiibe Tiuswei misaamera Tiusba wamindiilø truig købig køn. ⁹Katø kan cantaig srøig øyeeg cantabelø gøn trenchib:

“Libron uta, sellomeran kølsrøb inchabiibe
ñitøwein gøn chib.

Kaguende ñibe kweetsig kua,
ñui anindøga namune Tiusweyasig ñi penig køn chib,
chi misaamerandøgucha,
chi wam waminchibelandøgucha,
chi misag sètømerandøgucha,
misaamera nørrø pønrrabelø
chu birausreelandøgucha.

¹⁰Incha ñibe nòmune namui Tiusweyasig reymera latawei karub
purrabelø gønrraimba,
sacerdotesmera gønrraimba mara purrønnen,
nømbe pirau karumburab karunrrun” chib.

¹¹Incha gatø na ashene, tru karub waim bōtøgatanbe
ángelesmera truba nørrø pasrabigwei wamwanba, tru øsiguelai
wamwanba, tru kølli misaamerai wamwanba mørøbig kur.
Truiløbe purø nørrø gøptø, millones y millones købig køn. ¹²Incha
truba rruba mur trenchibelø gøn:

“Tru Ubisha-unø kweetsig købiibe
tru maramburab maramigwan gøben,
chiwandøgucha palømø, tøgagúigwan gøben,
muguen nebua kusremgaigwan gøben,
maramburab maramigwan gøben,
tabig kui asha tab indigwan gøben,
törguegwalmabigwan gøben,
purø tabig wamindigwan gøben,
utambuawei utønrrabiibe ñitøwein gøn” cha.

¹³Incha gatø tru srømbalasrø lata, pirau lata, pirø umbu lata, maryu lata tru chigurrimbunø Tius marig øsiguig pønrrabeløbe øyah taig mørøbig kur:

“Tru wamisra karub wainug wabigwanba,
katø tru Ubisha-unanbabe,
tru purø tabig wamindiiba,
tabig kui asha tab indiiba,
tørbilabiiba, maramburab maramibabe,
managatig patsømfig nuin kønrrain” chib.

¹⁴Inchen tru pigbatø øsigueløbe trenchibelø gøn: “iTreeg kønrrun!” chib. Inchen tru kølli misaamerabe tømønrsrøb srالا, køriibala Tiuswan tabig waminchibelø gøn.

Tru siete sellosmera

6 ¹Inchen tru srøsrø sellon Ubisha-unø kølsra, kuren, na ashene, tru pigbatø øsiguelai utuig, møikkøsrøn kan wam palaig rrashib lataig truba mur trendaig mørøbig kur:
—iAmø!— chib.

²Inchen na ashene, kan pulø gaulli pasraptinchibig køn. Inchen truigwan itøgwana wabiibe nui taskube kan arco sruaig købig køn. Inchen nune petsamig kan corona tranen, nun ashig kømui inchibelan kerriguwan chinchaingaig kanawa kørrømarøb pureb yaig køn, katø kanabig kananrrab.

³Inchen Ubisha-unø tru pamay gønrrabyu sellon kølsra, kurene, tru øsiguig srøsrøigwei wendauibe nane:
—iAmø!— chibig køn.

⁴Inchen gatøgan gaulli webiptinchibig køn, piguiig. Inchen truyu itøgwana wabigwane pirau muba kuimburab ambumay, imay tab waramigwan kerranrrai nune mu katønrraingaig treegwan martrai tranig køn, kangurrin gangurri kwetchai. Katø nune kan truba nu espadagucha tranig køn.

⁵Inchen Ubisha-unø tru pøn gønrrabyu sellon kølsra, kurene, tru pøn gønrrabyu øsiguiibe trendaig mørøbig kur:
—iAmø!— cha.

Inchen na ashene, kan yalø gaulli pasraptinchibig køn. Inchen truyu itøgwana wabiibe tasigube palansa sruaig købig køn.

⁶Inchene tru øsiguelai utube kan wam øyah taig nabe mørøbig kur: “Mawa, mawa marøb megaig anbe tirigu pa libra benam

netø gøben, katø mawa, mawa marøb megaig anbe cebada seis libras penam netø gønrrun cha. Inchendø aceitenba, vinonbabe mindishinrrab gømø” cha.

⁷Inchen Ubisha-unø tru pib gønrrabyu sellon kòlsra, kurene, tru pib gønrrabyu øsiguiibe trendaig mørøbig kur:

—iAmø!— cha.

⁸Inchen na ashene, kan pulø øskø gaulli pasraptinchibig kòn. Inchen truyu itøgwana wabiibe, “Kwamig” cha wamig kòben, tru wendaube, tru kwabelø pønrraig, “Hades” cha wamig, truig arrubig kòn. Inchen tru i parwane maramburab marøb kweechib martrai traniilø gøbig kòn espadatøga gøben, parøtøga gøben, kaig kwanrrømeratøga gøben, kau umbu namig animalmeratøga gøben pirø muba kuimburab pib millonesyube millonbatø, pib milyube milbatø, kwetchai.

Trattøgatø gønrrabyu selloba, seis kònrrabyu selloba

⁹Inchen Ubisha-unø tru trattøgatø gønrrabyu sellon kòlsra kuren, na ashene, tru Tiuswei wamgurrimba, Tiusweimburab eshkaikkurrimba kweetsiilai mõiimerane altar umbu ashibig kur.

¹⁰Inchen truiløbe mur trashib trenchibelø gøn: “Señor, Mayeelaim Bala Pasrabig, newan tabig, newan ciertonig, ÷tru pirau warab misaameran maig maramigwan asha marøb, namui ani lusigwan ulø bayib indamigwane, chu uraskatig munugunrrab?” cha.

¹¹Inchen nòmune kanun ganun kemig puløzheelø tranabe: “Maya yanatø gatøguchi ka israb munuguy chibig kòn, ñimui nunelø Cristoiwan ñim lataitøwei marøb melabelan treetøwei kweetsiilø nemisramnegatig.”

¹²Inchen Ubisha-unø tru seis kònrrabyu sellon kòlsra kuren, na ashene, purø rrømbøig mur pirø gønøben, pørrbe igatø! yaliig misrøbig kòn, kan yalø llensu lataikke. Inchen pølbe kerriguba ani lataig misrøbig kòn. ¹³Inchen estrellamerabe srømbalasrøngurri pirausrø kørrelø gøn, kan higuera tusr nui srabe higos niguiizheelan mur isig icha kørørørkøb lataitøweingue. ¹⁴Inchen srømbalabe kan kilga guirrøb lataitø pinøben, nørø tunmeraba, katø pi tøbøtag pønrrab pirømeraba truiløbe mayamba nøm pønrrainukkurri nørørøsrø malsrailø gøbig kòn. ¹⁵Inchen pirau reymera gøben, nørø gusreb møguelø gøben, maya suldaumeraim bala ashib karub pønrrabelø gøben, puarmera gøben, mas nørriig

marøbelø gøben, karuindiig melabelø gøben, karuindiig melømeelø gøben, søteeløba pirø rrabmerayuba, nørø tunmerayu tru nørø srug utuwanba trubabelø gøn. ¹⁶Incha tunmeranba, peñameranba trenchib trashibelø gøn:

—iNamuim bala itøgørrørray! cha. Tru karub wainug wamisra wabigwei maløwanba, tru Ubisha-unai purø rrømbøig namig købigwanba ashmønrrab sørørray chib. ¹⁷Kaguende tru purø rrømbøig kørig kømdiig nø namig wam gwaløm puin gøn cha. ¿Kan treegube mu gúim basramisra pasramdiig kønrrab gø?—chibelø gøn.

**Israel misaameran 144.000-wan Tiuswein
gúi asamdiig kønrrai marcailø**

7 ¹Øyeeg chab puraiben, nabe pibgatø ángelesmera pørr gal-labgatømay gøben, pørr guebibgatømay gøben, kandarøgatømaysrøn gøben, imaygatømaysrøn gøben, pirau pib palø pønrrai ashibig kur, tru pib paløyugurri isig ichib webarrubigwan pirau lata, maryu lata, chi tusrmerandøgucha isig ichimønrrai katab. ²Inchen gatøgan ángel, pørr gal-labgatøsrøngurri nebarri ashibig kur. Truibe Øsig Wab Tiuswein marcan srugaig tru pibgatø ángelesmera pirowanba, marwanba mindishinrrab maramburab maramigwan utabelan mur trashib trenchibig køn: ³—Pirowan lata, marwan lata, tusrmeran lata mindishimøtay cha, namui Tius tru marøb melabelan nuielø gúi asamdiig kønrrai nømui kappalømerayu chab marcamnegatig.—

⁴Inchen tru marcailø mam gøn chitamørtrab na mørene, 144.000 mil gøn, chibig køn, tru doce nusrkalo Israelweinukkurri nørø karrab misaamera,

⁵Judáweinukkurri karrab misaamera 12.000 gøben,
Rubénweinukkurri karrab misaamera 12.000 gøben,
Gadweinukkurri karrab misaamera 12.000 gøben,

⁶Aserweinukkurri karrab misaamera 12.000 gøben,
Neftaliweinukkurri karrab misaamera 12.000 gøben,
Manasésweinukkurri karrab misaamera 12.000 gøben,

⁷Simeónweinukkurri karrab misaamera 12.000 gøben,
Levíweinukkurri karrab misaamera 12.000 gøben,
Isacarweinukkurri karrab misaamera 12.000 gøben,

⁸Zabulónweinukkurri karrab misaamera 12.000 gøben,

Joséweinukkurri karrab misaamera 12.000 gøben,
Benjaminweinukkurri karrab misaamera 12.000 gøn daig
mørøbig kur.

Truba rruba nu misag sötø puliig kewar

⁹Øyeeg chab puraiben, na ashene, mømibe tru wamisra karub
waigwei merrappa, tru Ubisha-unai merrappabe misag purø nu,
muguen mundzangaig pønrrabelø gøn, misaamera nørø pønrrabig
chu birausreelø gøben, nørø kanbalatø warabelø chi misaamera
gøben, peg peg misag sötømera gøben, peg peg wam waminchib
misaamera gøbengue. Truiløbe puløzheelø kewar, tasigube palma
ishiimera srUAR, ¹⁰mayeeløba trenchib mur trashibelø gøn:

“Kaigyugurri wesraibe namui Tius,
tru wamisra karub wainug wabigweinukkurrimba,
tru Ubisha-unainukkurrimba arrubig køn” chib.

¹¹Inchen maya ángelesmerabe tru karub wainuuba, kølli
misaameraimba, tru pibgatø øsiguelaimba, truilaim bötøgatan
pønrrøwa, tru karub waigwei merrab piraugatig tømønøsrøb srala,
Tiuswan køriibala tabig waminchib, ¹²trenchibelø gøn:

“iTreeg kønrrun! cha.
Purø tabig wamindiiba,
tørguegwalmabiiba,
muguen nebua kusremgaiba,
maya nuguen ungwa, ungwa taiba,
tabig kui asha tab indiiba,
maramburab mariiba,
mugucha chindamgaiba,
iiløbe managatig namui Tiuswein gønrrain chibelø gøn.
Treeg kønrrun.”

¹³Inchene møikkøsrøn kan kølli misag nan payibig køn:
—¿I puløzhig kewarbe mumera gøh? cha. ¿Chugurri
amrruh?— cha.

¹⁴Inchene nabe:

—Nai Señor, ñibe asha basrainrrabguen— chibene, nøbe nan
trenchibig køn:

—Iiløbe tru purø rrømbøig isumdiigugurri purørruwar gøn cha.
Nømbe nømui keilan tsarar, Ubisha-unai anindøga puløzhig marar
gøn cha.

- 15 Treekkurri nømbe Tius tru wamisra karub wainug merrab
pønrran cha.
Yem, gwaløm nui tab yau nuyasig marøb pønrran cha.
Inchen tru karub wainug wabiibe,
nømuim bala nø sötø basraitøga
nømun chinchimønrrai ashchun cha.
- 16 Yandø nømbe parøgwai mORMøwei,
pimulgwai mORMøwei, pørr bati mORMøwei,
kabe gatøgan pekkurri pachig kui mORMøwei inchun cha.
- 17 Kaguende tru wamisra karub wain døbøtag Ubisha-unø
pasrabiibe
nømun kan ubishameran lataig ashib pera basrøwa,
tru øsig kømigwan tranøb pigabmerasrømay pera inrrun cha.
Inchen Tiusbe nømui kabmerayu kappiwan pinømrøtrun—
cha, trenchibig køn.

Tru siete gønrabyu sello

8 ¹Ubisha-unø tru siete gønrabyu sellon kølsra kurene,
srømbalasrømbe kan media ura wasrønzhig kørrømisrøbig
køn.

²Inchene ángelesmera sieteelø Tiuswei merrab pønrrai ashibig
kur. Inchen nømune siete trompetas tranøbig køn. ³Inchen
gatøgan ángel arruabe, tru altar gueta pasramisrøbig køn, truipe
may irrabzheelø pusramig, orotøga marigwan mutaig. Inchen
nune may irrabzheelø truba nu rranøbig køn, tru mayeelø
Tiuswei misaamera Tiusba wamindiilan tru may irrabzhiibamara,
tru wamisra karub waigwei merrab tru altar orotøga marig
pasrabiibala trannrrai. ⁴Inchen tru may irrabig patig naguishba,
Tiuswei misaamera tru nøba wamindiiløbabe Tiuswei merrab
nebibig køn tru ángelwei tasigugurri. ⁵Inchen tru ángelbe tru may
irrabzhig pusrigwan muta, tru altaryugurri trøsr naarrørswan
netsøgana, pirausrø pinøguchene, palaig rrasamba, chi
wanrringuen mORMaigaig wanrramba, sre bilamba, pirø gønamba
inchibig køn.

Trompetamera siete

⁶Inchen tru ángelesmera sieteelø tru siete trompetameran
sruarbe urrønrrab yandø tamara pønrramisrøbelø gøn.

⁷Inchen tru srøsrø ángel nui trompetan urrøbene, sre srug naaba, animba lindisaig arruben, pirau trunun kørøbetig købig køn. Inchen truørø pirøbe muba kuimburab tøbøtag lutau pachen, katø tusrmera treetøwei pirø muba kuimburab tøbøtag lutau pachen, katø mayam bumera pillizheelø chigucha chishtø bachibig køn.

⁸Inchen tru ángel pagatø gønrabyuig nui trompetan urrøbene, kan purø nu tun ørøba naarab lataigwan maryu keguchene, marbe tøbøtag lutau ani misren, ⁹truyu øsig purrabeløbe tøbøtag lutau chab gwaben, katø tru maryu barcomera maya købiibe tøbøtag lutau chab pinabig køn.

¹⁰Inchen tru ángel pøn gønrabyuig nui trompetan urrøbene, kan truba nu estrella srømbalasrøngurri nu nag tulu lataig naarab peñippe, pimera kuimørig nørø bimeran gøben, katø kølømø bi gal-labzheelan gøben, mayamba pøngatøyu partø, partø ka gørrømisren, kane itøbenig kørømisrøbig køn. ¹¹Tru estrellabe Ajenjo munchi gøbig køn. Inchen pimera tru pønyu kanun itøbenimburappe, larrø rrømbø møbgølig misren, misaamerabe tru møb pimeragurri truba rruba nørø gwabelø gøen.

¹²Inchen tru ángel pib gønrabyuig nui trompetan urrøbene, nøsig lata, katø pøl lata tøbøtag lutau mindisailø kørømisren, katø estrellamera chigucha maya købig tøbøtag lutau mindisaig pilømeelø gørrømisrøbig køn, yem lata, kwaløm lata pib urabatø purø løstiig kønrai.

¹³Inchen na møimbe ashene, kan wasrø srømbalawan llirab arri mørøbig kur, mur trashib, øyah chib: “iAy karrengucha gúita! iAy karrengucha gúita! iAy karrengucha gúita! iPirau warab misag waachameran maig kønrrer! chib, tru gatøgan pøngatø ánglesmera trompetan urrøbene.”

Tru trattøgatø gønrabyu trompeta

9 ¹Inchen tru ángel trattøgatø gønrabyuig nui trompetan urrøbene, kan estrella srømbalasrøngurri pirausrø peni ashibig kur. Inchen tru estrellane tru purø rrømbø umbu rrabyu llaviwan tranig køn. ²Tru purø rrømbø umbu trabwan kurene, truyugurrimbe naguish kan nu hornoyugurri lataig nebarrubig køn. Inchen nøsiiba, pala srønzhig chishchig pasrabiibabe tru trabyu naguishkurri løstørabig køn. ³Inchen

tru naguishyugurrimbe chapullmera piraumay werruben, truilane pirau alacránmera lataitøwei mu chindamgaig martrai tranig køn. ⁴Incha truilane pirau puwan lata, kauwan lata, chi tusrwandøgucha mindishimønrrain garuig køn, tru Tiuswei sellon kappaløyu chiga misaamerandø mindishinrraingue. ⁵Inchendø kweechippe, kweechimøtø, trattrø bøl ørøba purø rrømbøig pusrkwaig melønrrain gøbig køn. Inchen tru pusrkwabiibe misagwan kan alacrán gwanen busrkwabig lataig købig køn.

⁶Inchen tru gwalømmerawane misaamerabe kwamigwane labendø, chinchagucha kwanrrab gaimanrrun. Kwag kuimbe inchendø, kwamibe nømuinukkurrimbe tarømisrtrun.

⁷Tru chapullmerabe kaullimera guerrayu kwayamig tamariilø lataig asønabelø gøbig køn. Nømui turyube orotøga marig latalilø corona betsar gøbig køn. Inchen nømui maløbe kan misag malø lataliløgue. ⁸Inchen nømui pusruube ishuwei lataig køben, nømui trugulmerabe kan leónwein rrugul lataig tøgar gøbig køn. ⁹Nømui asrwan merrammay chinchimønrrai katabig kan tsandzøn lataig tøgar, katø nømui kwaldzarig ichen wanrrøbiibe, kan guerrayu kwayanrrab carretillameran kaulli sètø srúa lulen wanrrab lataig trømbøig wanrrabig køn. ¹⁰Inchen tru mørrmerabe kan alacránwei lataig køben, katø kalmera kwanøbig tøgar gøbig køn. Inchen nømui mørrmerayube misaameran trattrø bøl ørøba maramburab marøb mindisamig tøgar gøbig køn. ¹¹Inchen nømun ashib karub pera basrabiibe, tru purø rrømbø umbu rrabyu ángel gøbig køn, hebreomaybe Abadon munchi gøben, griegomaybe Apolión munchi.

¹²Tru i trømbøig kørig kømdiig srøsriibe chab puraiben, katøgucha trømbøig kørig kømdiig attrabig par balabig køn.

Seis kønrrabyu trompeta

¹³Inchen tru ángel seis kønrrabyuig nui trompetan urrabig køn. Inchen Tiuswei merrab pasrabig orotøga mari altaryu, tru pibgatø kigulmerayugurrimbe kan wam webarri mørøbig kur, ¹⁴tru seis kønrrabyuig trompeta srúa ángelwane trenchib:

—Tru pibgatø ángelesmera Eufrates nu bi menda lusrig pønrrabelan lelachi— cha.

¹⁵Inchen tru pibgatø ángelesmeran ke yandø treeg pumweimba, tru gwalømweimba, tru bølweimba, tru bilaweimba treeg martrai tamariilø pønrrabelan pirau muba kuimburab maya misag basrabigwan tres milyu milbatø kwetchai, tru ángelesmerane elatsiilø gøbelø gøn. ¹⁶Inchen tru suldaumera kauilli balartø doscientos millones køn daig mørøbig kur.

¹⁷Pøs øyamay nan piab lataigu øyeeg kenamisren kaullimeran øyeeg ashar: tru itøgwanarbe nømui asrwan merrammay chinchimønrrai katabiibe, nag lata biguig køben, pillizhig køben, øskøig azufre lataig køben tøgar gøbig køn. Tru kaullimerai turmerabe leónmerain dur latailø gøben, nømui trigugurrimbe naaba, naguishba, azufreba webarrubig køn. ¹⁸Inchen pirau muba kuimburab misaamera pøn millonyube millonbatø gwaben, pøn milyube milbatø kwabig gøn, tru i pøngatø trømbøig naaba, naguishba, azufreba kaullimerai trigugurri webarruben. ¹⁹Pøs tru kaullimera mu chindamgaig maramig tøgagúibe nømui triguba, mørryuba basrabig køn. Kaguende nømui mørrmerabe ulmera latailø turmera tøgar gøbig køn, truiløtøga misaameran mindishibelø.

²⁰Inchen misaamera tru i øyeeg trømbøig chab puraiben, kwamø kørørmisrøbeløbe øyeeg puraibenguen nømui taska mariilan treeg marmønrrab isua mørøb elachimeelø gøn, tru kwaimandziimeran køriibala tabig wamindamigwan lata, nømui taska mari tiusmeran lata, tru nøm orotøga mariilan lata, tsandzøn andøga mariilan lata, broncetøga mariilan lata, sruutøga mariilan lata, tsiitøga mariilan lata, truilan elachig kømub, truiløbe ashmøwei, mormøwei, ammøwei inchibelan. ²¹Katø kweetsamigwan lata, misag wanna trømbø maramelan lata, møgueløba, ishumburmeraba trømbøig maramigwan lata, nilamigwan lata treeg marmønrrab isua møra, Tiusweimay llirameelø gøn.

Angel kan libro-unan sruaig

10 ¹Inchen gatøgan ángel maramburab marøbig srømbalasrøngurri kørørrarubig køn. Truibe wañindøga pinøgasaig, tur balabe kan køshømbøtø tøgag, nui maløbe kan nøsig lataig pilabig køben, nui srøbmerabe ølneb kan nag bilabig lataig købig køn. ²Taskube kan libro-unan kura sruaig basrabig køn. Incha kusrmay srøbwane mar bala bunappe, atsimay

srøbwane pirau buna basramisrøbig køn. ³Inchabe truba mur trashibig køn, kan león rrashib lataikke. Inchen tru trashibene, siete palaig rrashibeløbe tru trasaigwan treetøweih trashib lötabelø gøn. ⁴Inchen tru siete palaig rrashibelø chab waminchen, nabe pørtrab inchene, srømbalasrøngurri nane kan wam treeg mørø waminchibig køn:

—Tru siete palaig rrashibelø wamindigwane pørmøtø, ñuinetø esegau— cha.

⁵Inchen tru ángel mar balaba, pirø balaba na pasrai asiibe kusrmay tasigwan srømbalaneb kusrawabe, trenchibig køn:

⁶“Srømbalawan lata, truyu pønrrabelan lata, pirøwan lata, tru pirau pønrrabelan lata, marwan lata, truyu chine purrabelan lata marøbig, tru managatig øsig wabikken ashen, truigwei merrab trendamønrrun cha: Yandø mas srarrønrraamøn cha. ⁷Pøs tru ángel siete gønrrabyuig trompetan urram gwalømmera puben, urrab pølbasurene, Tiuswei chigøben maramig søriilø pønrrabeløbe yandø marig kørrømistrun cha, tru nui marøb melabelø tru nø maig karuigwan eshkabelø maig eshkaig, treeg.”

⁸Tru srømbalasrø wam na møriibe nan katøyug waminchib trenchibig køn:

—Inrrø cha. Incha tru ángel mar balaba, pirø balaba puna basrabig tasku libro-unø kura srua basraigwan utø— cha.

⁹Inchen nabe ángelweimay ya, tru libro-unan tranrra chibene:

—iCha! chibig køn. Inchabe, iMa! chibig køn. Ñui trigube kuizhig miel lataig kua, ñui patsaube møbig misrtrun— cha.

¹⁰Inchen nabe tru libro-unan ángelwan uta, mabene, nai trigube kan miel lataig kuizhig købendø, na chab mabene, nai patsaube larrø møbgølig misrøbig køn. ¹¹Inchabe nane trenchibelø gøn:

—Ñibe misaamera nørø kanbalatø warabelanba, misag nørø pønrrabelanba, peg peg wam waminchib misaameranba, reymeranba Tius maig eshkanrrai karuigwan treeg kønrrun chib katøyug eshkamig nebunrrun— cha.

Tiusweimburab maig kuigwan eshkabelø pailø

11 ¹Incha nane kan caña, unaasin tsig lataig tranabe, trenchibig køn:

—Kurra, Tiuswei yawanba, tru altarwanba unaasha, katø truyu Tiuswan køriibala tabig waminchibelan munchi cha. ²Inchendø

Tiuswei yau, tru yawambigwane unashmøta cha. Kaguende judíos kømø misaamera Tiuswan ashmeelan tranig basran cha. Truiløbe tru Tiusweindø tarø mari ciudawane pøn bila y tøbø bilaba itø lulrrab gøn cha. ³Inchen nabe pailø naimburab maig kuigwan waminchibelan øramønrrun cha, eshkanrrab amrrai. Truiløbe yaliig trøsrkøleelø kewar kwalømmerna mil doscientos sesenta nemisramne naimburab eshkan waminchun— cha.

⁴I tru pailø naimburab maig kuigwan waminchibeløbe, tru pagatø olivo tusrmera gøb, tru pagatø kandilerumera køb gøn, Tius pirøwan nø ashib karub pasrabigwei merrab pønrrabelø. ⁵Møikkøben chigøben nømun kaig martrab inchene, nømui trigugurrimbe nag webarringarua, nømune kerrigu chishtø barrøbelø gøn. Møikkøben nømun mindishinrrab inchibeløbe øyeeg kwamig nebunrrun. ⁶Tru Tiusweimburabigwan eshkabeløbe srømbalawan kasramig maramburab martrabelø gøn, nøm Tiusweimburabigwan eshkan amønib gwalømmernawan sre bumønrrai. Katø treetøwei pimerangucha anim bimer misrtrai marøg købene, anim bimer martrabelø gøn. Katø pirøwangucha kaig nebunrrai, kaig kwanrrømera gøben, kaig bølømmerna mindishinrrabelø ørtrun, nømun mammay mindishig køben mindishinrrai.

⁷Yandø tru Tiusweimburabigwan maig kuigwan nøm chab eshkanbene, tru purø rrømbø umbu rrabyugurri animal purø rrømbøgølig nebarrua nømba kwayam lawa, nø kanawa, truilane kwetchun. ⁸Inchen kwailai asrmerabe ciudayu mayeelø llirai mayu waramisrtrun tru nømui Señorwan kurusu mesraig nu ciudayu, truike Sodomaba, Egiptoba lataig asønabig køn cha waminug. ⁹Inchen misag nørø kanbalatø warabeløba, peg peg misag sötømeraba, peg peg wam waminchibeløba, chu birausreelø gøben misag nørø pønrrabeløba, truiløbe pøn gwalømmenrra tru kwailai asrmerane ashib gønrrun. Incha truilai asrmerane sørinrrabmerayu sørøbashmønrrun. ¹⁰Inchen misaamera pirau warabeløbe tru kwaig warabelaimburab truba rruba kasraarawa, kasrag købiitø kangurri gangurri ketiilø ørtrun, kaguende tru pailø Tius maig karuigwan eshkabeløbe tru nømun mumaygucha gømfig igatø! isua mōra melønrrai marøbelø guikkurri.

¹¹Indiibe pøn gwalømmenrrayube øsig kømig Tiusweinukkurri arrubig nømuinug kebiben øsiiranrrai Tius nømun urrøben, katø

kurra, pønrramisrøptinchen, mayeelø ashibelane purø rrømbøig kørig købig arrubig køn. ¹²Inchene tru pailøbe srømbalasrøngurri kan wam truba mur wamindi mørøbelø gøn, trenchibig: “Yusrø nerruy” cha. Inchen nòmun ashig kòmui inchibeløbe ashibelø gøn, nømbe kan wañiyu srømbalasrømay nebamben. ¹³Inchen treeg puraibendø, kan truba mur pirø gønabig arruben, tru pirø gønabikkurri ciudayu yamerabe milmørig cienbatø kegørrabig køn. Inchen treegu misaamera siete mil gwabelø gøn. Inchen kwamø kørørmisrøbeløbe truba rrømbøig kørig kuilø, Tius srømbalasrø wabigwan truba rruba tabig waminchibelø gøn.

¹⁴Srøstriigwei wendauig trømbøig chab puraibendø, tru kørig kømndiig pøn gønrrabyuibe petø attrun.

Tru siete gønrrabyu trompeta

¹⁵Inchen tru ángel siete gønrrabyuig nui trompetan urrøbene, srømbalasrømbe wammera purø mur trenchibelø gøn:

“Pirau reymera nøm ashib karub tøgagúiløbe namui

Señorweimba, nui Cristoimba misran cha.

Inchen nøbe managatig ashib karub wanrrun” cha.

¹⁶Inchen tru kølli misaamera veinticuatroelø tru nøm karub purrainug Tiuswei merrab purrabeløbe pirau tømønørøb srala, Tiuswan køriibala tabig waminchib, ¹⁷trenchibelø gøn:

“Mayanguen ungwa, ungwa,

Señor Tius Newan Maramburab Marøbig,

møi ya pasrabig, katø manawei købig.

Kaguende ñui purø nuig maramburab mariitøga

ñibe ashib karub pølbasaran cha.

¹⁸Misaamera nørø pønrrabeløbe truba rruba namig kurrig køn cha.

Inchendø ñui purø rrømbøig namig købig pub,

katø tru kwabelan maig kønrrabigwan asha maramikkucha yandø pub indin gøn cha.

Inchen ñui marøb melabelø

tru ñi maig karuigwan eshkabelanba,

katø tru ñui misaameranba,

ñui munchiwan kaig kui lataig maramigwan køriguelanba,

nørø gusrebelanba, treeg kømeealanba,

truilan truburø ketamikkucha puin gøn cha.

Trugurri pirøwan mindishib pinishibelangucha pinisamig
puin gøn” cha, trenchibelø gøn.

¹⁹Inchen Tiuswei ya tru srømbalasrø pasrabig kurene, tru israelitasmeraba Tius acuerdo marig, tru arcabe, truyu kena basrabig køn. Inchen palaig bilabelø gøben, wammera gøben, palaig rrashibelø gøben, katø kan truba mur pirø gønabig køben, purø rrømbøig sre srug pubig køben arrubig køn.

Ishuuba, dragonba

12 ¹Inchene srømbalasrømbe kan truba nuig chigøben kønrrab gúitamab asha gømig kenamisrøbig køn. Kan ishug nui asrwan pøsrøga pinøbuli lataig, srøb umbube pølwan tøgag, turyu corona estrellamera doce tøgag petsaig købig køn. ²Tru ishuube kwanrriig kua, yandø unø tammisrtrab trømbøig pusrkwai inchib, truba trashibig køn.

³Inchene srømbalasrømbe gatøgan chigøben kønrrab gúitamab asha gømig kenamisrøbig køn. Kan dragon piguiig purø nuig, turmerabe siete tøgag, katø kigulmera diez tøgag, turmørig tabzheelø petsartø gøbig køn. ⁴Incha srømbalasrø estrellamerane kanbalø ørøba nui mørrtøga srua, tøbøtag lutau pirau pinøbetabig køn. Incha tru dragonbe tru unø tammisrtrab ishuweim binrrøgue pasramisrøbig køn, tammisren latatø unan manrrab. ⁵Inchen tru ishuube kan møg-unø tammisren, truike misag nørø pønrrabelan chuelandøgucha ashib karuppe, kan tsandzøn bōrøtsigwan srua basramisra mu kurraasamgaig karub martrabig købig køn. Inchendø nui nusrkawane kerrappa, Tiusweimayba, nø wamisra karub wainuumayba nune srua yaig køn. ⁶Inchen ishuube mu misag warab waraimøsrømay luløbig køn, tru ishug tsumig Tius tamara basriisrømay, kwalømmerna mil doscientos sesenta nemisramne trusrø mannøb tøgagønrrai.

⁷Inchen trugurrimbe srømbalasrømbe Miguel nui ángelesmeraba purø rrømbøig kwayabelø gøn tru dragonba.

Inchen dragonbe nui kaig ángelesmeraba kwayabendø,

⁸chinchaguen kanab gwayanrrab gaimaben, yandø trugurri srømbalasrømbe nømuimbe yandø chu pønrramikkaig patsabig køn.

⁹Inchen tru purø nu dragon, tru merrabsrø ulwane pinøgutsig køn, truigwane nugwaimandzig cha wamamba, Satanás cha wamamba indigwan, tru pirau maya misagwan

kegørrørskøbigwan. Truigwane nui kaig ángelesmeranbañau pirau pinøbusrig køn.

¹⁰Inchen nabe srømbalasrø kan wam truba mur trendaig mørøbig kur:

“Møimbe yandø kaigyugurri wesraiba,
katø maramburab maramiba,
namui Tius nø ashib karub wamiba,
katø nui Cristo mu mandamgaig karub marøb wamiba puin
gøn cha.

Kaguende Satanás Tiuswei merrab yem, gwaløm
namui nunelan ‘yeeg kailø gøn’ chib,
‘øyeeg marøbelø gøn’ chib pasrabigwane pinøgutsin gøn cha.

¹¹Namui nuneløbe tru Ubisha-unai aningurrimba,
nøm Tiuswei wamwan wamindikkurrimba
kanawa pønrramisran cha.

Kwamig nebubene, kwanrraptø bønrraig køn cha,
nømbe øsig kømigwangøba isumøtø.

¹²Inchawei treekkurri, srømbalameraba,
gatø kerrigu truyu pønrrabelø
chigucha truba kasraaray cha.

Inchendø inusiamus, pirau chi øsig købelø lata,
marmerayu lata øsigueløbe chincher! cha.

Kaguende nugwaimandzig ñimuimay
ke ne namig kuin gørrayan cha,
nui llirab unamibe yana unamig kømønrrab gúimba.”

¹³Inchen dragon nune pirausrø pinøgutsi mørabe, tru ishug møg-unø tøgagøbigwane pasraarøb mendøben, ¹⁴tru ishuwane purø nu wasrøwei pagatø kwaldzariimeran tranig køn, ulweim bulugurri purø yabsrø nø tsumsrømay pala kurra inrrai tru mu misag warab waraimøsrømay. Tru pøn bila y tøbø bilaba nun mannøb tøgagømsrømay. ¹⁵Inchen ulbe ishuwan pasraarøb ya, nui triimay pi weguchibig køn, kan nu biiburabig, tru ishuwan pi srua yaig kønrrai. ¹⁶Inchendø pirøbe tru dragon trigugurri nu bi wegutsigwane anchippa kerrigu piñiptinchibig køn, tru ishuwan purugunrrab. ¹⁷Treenchene, dragonbe ishuwan purø rrømbøig namaptø, tru ishuweinukkurri katøburø amrrub misaameraba kwayam lanrrab ibig køn, Tius tru maig maramigwan martrai karuigwan møra marøbelø, Jesucristoimburabigwan tabigwan

elachimø marøb tōga pōnrrabig bōnrrabelōba. Incha tru dragonbe tru mar menda pisrumyu pasramisrōbig kōn.

Pagato animal trōmbōgōleelō

13 ¹Inchen maryugurrimbe kan animal purō rrōmbōgōlig webarrubig kōn, turmera siete, kigulmera diez tōgaig, kigulmōrig purō tabzhig petsargue. Inchen turmōrig munchi pōriibe Tiuswan purō rrōmbōig wamabig pōrig tōgar gōbig kōn. ²Inchen tru trōmbōgōligwan na asiibe kan tiiri lataig kōbig kōn, srōbmerabe wig srōb lataig kōben, nui triibe leōnwein rrig lataikke. Trunun tru dragonbe nui maramburab maramigwanba, nō wamisra karub waigwanba, mu mandamgaig mayangatikkucha karug kōben karub martrai tru animal trōmbōgōligwan tranōbig kōn. ³Inchen tru trōmbōgōligwei turmerabe, mō tur gōsrōnbe purō rrōmbōig kōrriindig kwanrraptiig lataig kōbendō, tru treeg kōrriindiibe tammisrin gōben, mayeelō yu piraelōbe truba kwaara ashīb, tru wendautō ambubelō gōn. ⁴Incha misaamerabe tru dragonwan kōriibala tabig waminchibelō gōn, kaguende dragonbe tru trōmbōgōligwan nui karumburab karumigwan martrai tranikkurri. Katō tru trōmbōgōligwangucha treetōwei kōriibala tabig waminchib trenchibelō gōn:

—¿Kan i trōmbōgōlig lataibe katōgane mu gūin gōnrrab gō? chib. ¿Kan nōbabe mu gūin gwayam lanrrautah?— chib.

⁵Incha tru animal trōmbōgōligwane katō kan trig tranig kōn purab nuig misrōb wamindamba, purō rrōmbōig wamamba inchai, katō pōn bila y tōbō bilaba mu mandamgaig martraimba. ⁶Inchen tru animal trōmbōgōliibe nui trigwan kurōbig kōn, Tiuswan purō rrōmbōig waminchab. Incha Tiuswei munchiwanba, nō pasraigwanba, srōmbalasrō purrabelanba purō rrōmbōig wamabig kōn. ⁷Incha tru Tiuswei misaameraba kwayabasha, nō ka ganabasig kōn. Incha chi misag sōtōmeran gōben, kanbalatō warabelō chi misaameran gōben, peg peg wam waminchib misaameran gōben, nōrrō misag pōnrrabig chu birausreelan gōben, truilaīm bala mu manchinrraingaig karumigwan tōgagōnrraingucha tranig kōn. ⁸Tru animal trōmbōgōligwane tru maya misag pirau warabelōbe kōriibala tabig waminchibelō gōn, tru chiwangurrimbunō marøb urassrōwei Ubisha-unō kweetsig

kønrabigwei libroyu tru managatig øsig purrønrabelan pørigu
nømui munchimeran truyu chigarbe.

⁹Møikkøben kalubaibe mør.

¹⁰Merrarrawa srúa ambinanrrabelane,
merrarrawa srúa amben,
espadatøga kweetsinanrrabelane,
espadatøga kwetchun.

Øyeelø pubene, tru Tiuswei misaamerabe chi arringucha ka
melaptø melamiguba, katø isubigwan Jesucristoinuutø pasra tøga
bønrramiguba masken treegutø melabig melamitøwein gønrrun.

Tru animal purø rrømbøgølig

¹¹Inchen gatøgan animal trømbøgølig piraugurri nebarri ashar.
Truibe pagatø kigulmera ubisha-unai lataig asønabig tøgaig
købendø, waminchippe, dragon lataig waminchibig køn. ¹²Truibe
tru animal trømbøgølig srøsriigwei mu manchinrraingag marøb
karuigwan nø tøga basramisra, nui merrab treetøwei marøb
karubig køn. Incha pirøwanba, pirau warab misaameranbabe tru
animal trømbøgølig srøtiig tru purø rrømbøig kørriindig tøgaig
købig, chi øsig kønrabgaig kua, tammisraigwan køriibala tabig
waminchai inchibig køn. ¹³Incha gatø nøgucha misaamera nui
maramburab marigwan asha gønrrai chigøben truba nørreelø
marøbig køn, misaamera ashen srømbalasrøngurringuen
piraumay nag kørraarringarub. ¹⁴Tru treeg asha gømig tru
animal trømbøgølig srøsriigwei merrab marbasikkurri, nøbe
pirau warabelan peløsrka chab guegørrørskøbig køn. Incha tru
trømbøgølig srøsriibe tru espadatøga truba kørro gørrriindig
købendø, kwamø, øsig købigwan tab inchab, trunun asha,
treetøwei mara basrtai pirau misaameran karubig køn. ¹⁵Incha
tru trømbøgølig srøtiigwan treetøwei mara pasrigwane øsig
kømigwan nøbe tranøbig køn, tru mara pasriibe waminchibig
misra, nun køriibala tabig waminchimeelane mayeelan kwanrrai
martrai. ¹⁶Incha trutø gømtø, nørro gusreb møguelan gøben,
treeg kømeeelan gøben, puarmeran gøben, waachameran gøben,
karuindiig melabelan gøben, karuindiig melømeeelan gøben
mayeelanba kusrmay tasigu gúi, kappaløyu gúi marcangarubig køn,
¹⁷tru trømbøgøligwei munchin gúi, numeron gúi marcaig chigaibe
mugucha yanmøwei, penømøwei inchai.

¹⁸Yubesi chigúi ashchappe, purø nu isumig basran. Tab chigúi mörøbiibe, tru trömbögøligwei numeron maya rrandashchab ash. Kaguende kan møwei numero gøn. Tru numero 666 køn.

144.000-elø cantaig

14 ¹Inchen na ashene, Ubisha-unøbe Siòn daig Tun bala pasrai ashibig kur. Inchen 144.000 tru nøba pønrrabeløbe Ubisha-unai munchiwanba, Møskawei munchiwanba nømui kappaløyu pørig tøgær pønrrabelø gøn. ²Inchen srømbalsrøngurrimbe kan wanrrøbig mörøbig kur, kan truba rruba nu bi wanrrøb lataig, kabe kan palaig mur trashib mullib lataig, truba yamelø arpas kønabelø kønøben wanrrøb lataig wanrrøbig køn, truiibe. ³Incha tru wamisra karub waigwei merrappa, tru pibgatø øsiguelai merrappa, kølli misaamerai merrappa tru 144.000-eløbe kerrigu srøig mana møriimøzhig cantabelø gøn. Tru cantaigwane mugucha cantam gusrenrrab gaimaben, pirau tru misaamerai utugurri 144.000 tru Tiuswein gønrrai wesruiløtøwei cantabelø gøn, trunune. ⁴Iiløbe ishumburmeraba trömbøig marmøwar, nømui asrwan trömbøig marøb mun katørameelø, chishelø gøn. Iiløbe Ubisha-unø chu iben, chu uragucha elachimø, mendig amønibelø gøn. Iiløbe maya misagwei utugurri nømune nuin gønrrai wesruilø gøn, Tiusweyasiiba, Ubisha-unayasiiba nømunmerrig pølbasa traniilø. ⁵Nømui trigube chigucha isa wamindiibe chigar gøbig køn, mu mandamgaig chishelø.

Pøngatø ángelesmera eshkab wamindiilø

⁶Inchen gatøgan ángel srømbalawan pala arri ashibig kur, Tiuswei tabig srø wam mana patsømíigwan pirau warabelan eshkanrrab: chu birausrøn gøben misag nørø pønrrabelanba, chi misag sötømera gøben warabelanba, peg peg waminchib misaameranba, kanbalatø warabelø chi misaameran gøben truilanba. ⁷Inchabe truba mur waminchib øyah chibig køn: “Tiuswane køriibala marøb, truba rruba tabig wamindamig køn chib. Kaguende tru maig kønrrabigwan asha maramig yandø pun chib. Srømbalawanba, pirøwanba, marwanba, kølømø bimeranba marøbigwane køriibala tabig waminday” chib.

⁸Inchen gatøgan ángel tru wendau øyah chib, ibig køn: “iBabilonia truba rruba nuibe yandø penan, yandø penan! chib,

truørø tru misag norrø pønrrabelan kerriguba nui trømbøig marøg købiitø keerøba chinchimmørø indi vinon mutsamne incha, mutsiiranøbig.”

⁹Inchen tru wendau katøgan ángel tru pøn gønrrabyuibe truba mur øyah trenchib ibig køn: “Møikkøben tru trømbøgøligwanba, tru nø maig kuig treetøwei asha marigwanba køriibala tabig waminchib, katø nui marcan kappaløyu gúi, tasku gúi utab inchibiibe ¹⁰nøgucha tru mumaygucha gømui møra melønrrai mari vinon Tiusweinukkurri arrubigwan mutchun cha, Tiuswei namig købigwan truigwandø tamara copayu usrigwan. Katø Tiusweindø tarømari ángelesmerai merrappa, Ubisha-unai merrappa naaba, azufrebaigu mumaygucha gømui purø rrømbøig kui meganrrun. ¹¹Tru purø rrømbøig kui melønrrai marøb naguishbe managatig nebarrub pasrøben, nømuimbe yem gwaløm pishindø tab purramibe managuen kaagøn, tru trømbøgøligwanba, katø nundøwei asha treezhigwei marigwanba køriibala tabig waminchibelaimba, katø tru nui munchitøga marcarramabelaimba.” ¹²Incha øyeekkurriwei melabig melamig balan, tru Tiuswei misamera Tius tru maig maramigwan martrai karuigwan møra marøb, Jesúsuan tarømismø trag bulu melabelaimbe.

¹³Inchen nabe srømbalasrøngurri kan wam trendaig mørøbig kur:

—Iigwan pør cha: “Møingurrimbunøbe mayanguen tab gúilø gøn cha, Señorwan kørewa kwabelaimbe.”—

“Øø, treegwein gøn dan, Espíritu Santobe. Nømbe nømui muraara, muraara marøb melailøygurri isrønrrun. Kaguende nømui mariiløbe nomba lincha pasrabig basrønrrun” cha.

Pirau ellmariilan tulishib

¹⁴Inchen, na ashene, kan pulø wañi kenamisren, tru wañim balabe Møg Misra Arrubig lataig wamisra wabig køn, turyube orotøga marig kan corona betsaig, tasigube kan uses purø rrøsrig sruaig. ¹⁵Inchen gatøgan ángel Tiuswei yaugurri webarrua, truba mur trashib, tru wañim bala wabigwane trenchibig køn: “Ñui usestøga parøb tulishi cha. Kaguende piraube paramig yandø srønø gøben, parøb tulisamig nebun” cha.

¹⁶Trenchibene, tru wañim bala wabiibe pirau ellmarigu nui usestøga parøb puraibene, tru pirau ellmariibe tulisaig kørømisrøbig køn.

¹⁷Inchen gatøgan ángel srømbalasrø Tiuswei yaugurri webarruppe, truikkucha kan uses truba trøsrig sruaig købig køn.

¹⁸Inchen gatøgan ángel webarrubig køn, altaryugurri truiibe nag biløgamigwan nø ashibig. Incha tru trøsr uses sruaigwane truba mur trenchib wamabig køn: “Ñui trøsr useswan srua, pirau uvas tramerayu, uvas lusrømeran parøb tulishi cha. Kaguende uvasmerabe yandø srønø gøn” cha.

¹⁹Inchen ángelbe useswan pirø balawan parøb, puraya, pirau tru uvas tusryu uvas lusrømeran parabe, tru uvas kwaramig marig pasrabigu kebusrøbig køn, uvas piwan wesraig kønrrai. Truiibe Tiuswei tru purø rrømbøig kørig kømdiig namig købigwan eshkabig køn. ²⁰Tru uvas pi wesraibe ciudayu gømtø, wambig nørøsrøn basrøben truyu piwan wesraben, truyugurri ani webarruppe, kaullimeran frenossrøngatig neguchibig webarrubig køn, trescientos kilómetros ørøba ani luløbikke.

Angelasma trua sra be siete plagaswan suar

15 ¹Srømbalasrømbe katøgan chigøben kønrrab gúitamab asha gømig truba nuig ashibig kur kwaara asamdiig, siete ángelasma siete chine kaig nebunrrai marøb amrrunrrabelø yandø srabeelan tøgær. Truiløtøga yandø tru Tiuswei namig købiibe truyu yandø newan patsøgaig kørømisrøbig køn. ²Katø kan mar bigriu lataig naaba lindisaig ashibig kur. Tru animal trømbøgøligwanba, nundøwei tru treetøwei asha marigwanba, nui munchi numeronba utømø, treegu chinchamamø webambarbe tru mar tørguelarrøzhig bala Tius arpas traniilan srua bønrrabelø gøn. ³Nømbe tru Moisés Tiuswei marøb megabig cantaigwanba, katø Ubisha-unø cantaigwanba trenchib cantabelø gøn:

“Señor, purø nørreelø ñi chigøben mariiløbe,
kwaara asamdeelø mariilø gøn chib,
Señor Tius Newan Maramburab Marøbig.
Ñui maymerabe tabig sølgandeelø,
newan ciertonelø gøn chib.

iChusrøn gøben misag purø nørrø pønrrabelai
ñi Rey gøn! chib.

4 ¡Ay Señor! ¿Ñun kormíibe mu guaasamø? chib.

¿Ñui munchiwan tabig waminchimíibe mu gua asamø? chib.

Newan tabig chishiibe ñitøwein gøben,

truørø tru misag nørø pørrabelø kerriguba

ñui merrab amrrua kóriibala tabig waminchun chib.

Kaguende mumaytøgucha ñui sølgandø tabig mariilø

kenamisran” chib cantabelø gøn.

5 Øyeelø chab puraiben, na ashene, srømbalasrø Tiuswei yaambusrø tru Tius nø pasramig nuyasiitø tarømarig pasrabiibe kuri ashibig kur. 6 Inchen truyugurrimbe tru siete ángelesmera tru siete chine kaig nebunrrai marøb amrrunrrabelan sruar werrui ashibig kur. Truiløbe linotøga marig chishcheelø, tørbilabzheelø kewar, pørønaig orotøga marig pechoburab pørønawar gøbig køn. 7 Inchen mõikkørøn tru pibgatø øsiguelai utuibe tru siete ángelesmeran oro copamera siete tranøbig køn, Tius tru managatig øsig wabig, nui namig købigwan truyu netsøganiilan. 8 Inchen Tiuswei tru tab yaube Tiuswei tørguegwalmabikkurrimba, maramburab marig pasraikkurrimba naguishtø tinbuløben, mugucha kebamrrab gaimabelø gøn truyube, tru ángelesmera siete tru chine kaig nebunrrai marøb amrrunrrabelan ángelesmera kan gan srua ambiilø maig punrrabig chab purayamnegatig.

Copamera tiuswei namig købiitø netsailø

16 1 Inchen kan wam truba mur wamindi mørøbig kur, Tiuswei purø tab yaugurri tru siete ángelesmeran trenchib:

“Ambay cha. Incha tru siete copas Tiusweinukkurri purø rrømbøig kørig kømdiig namig købig tøgäig arrubigwan pirau lushchigay” cha.

2 Inchen tru srøsrø ángelbe ya, nui copan pirø balawan lushene, tru animal trømbøgøligwei marcan tøgäwanba, nun tru treetøwei asha marigwan kóriibala tabig waminchibelanba kan pisrø purø rrømbøig pusrkwab pill-llabig webarrubig køn.

3 Inchen tru ángel par gønrabyuig nui copan mar bala lushene, maryu pibe kan kwaigwei ani lataig misrøbig køn. Inchen maryu chine øsiguig purrabeløbe mayamba chab gwabig køn.

4 Inchen tru ángel pøn gønrabyuig nui copan nørø bimerayuba, pigabmerayuba lushene, kerriguba anindø misrøbig køn. 5 Inchen

tru pimeran ani misrtrai marøb pasrab ángelbe trendaig mørøbig kur:

“Ñi, Señor, tabig sølgandø marøbig,
møi ya køb, katø manasrøngurri købig,

Tius Newan Tabig ñibe treeg køn cha.

Kaguende ñibe iilan maig kønrrabigwan asha maran cha.

6 Pøs tru pirau misaamerabe tru ñui misaameranba,

Tius maig karuigwan eshkabelanba

kweecha aniwan lusikkurri,

møimbe nømungucha ñibe ani mutsøsrain gøn cha.

Kaguende nømune øyeeg maramigweim balaig kuig køn” cha.

7 Inchen tru altaryugurri trendaig mørøbig kur:

“iØø, treegwein gøn cha,

kan ñi Señor Tius Newan Maramburab Marøbig.

Ñui maig maramigwan ñi asha mariibe,

ciertonig, sølgandø tabig mariilø gøn!” chib.

8 Inchen tru ángel pib gønrrabyuig nui copan nøsig bala itølushene, tru nøsiibe nui pachibiitøga misagwan parrøbig køn.

9 Inchen misaamerabe tru purø rrømbøig pachibiitøga parrig kørrømisra, Tiuswei munchiwan tsalø wamabelø gøn, tru øyeeg chine kaig nebub attrai arringarub maram burab marøbigwan. Treeg kuindøgucha nømbe isua møra, Tiusweimay llirameelø gøn, nun truba tabig waminchab.

10 Inchen tru ángel trattrøgatø gønrrabyuig nui copan tru animal trømbøgølig wamisra karub waigwan itølushene, nø ashib karub tøga waibe kerriguba løstiig kørrømisrøbig køn. Inchen misaamerabe pusrkwabiitø nilømeran ke tsachatø mørøbelø gøn. 11 Incha tru srømbalasrø wab Tiuswan tsalø wamabelø gøn, tru chine nømun pusrkwabeløgurrimba, katø trømbøig pill-llab pisrømeragurrimba. Treeg indingucha, nømui kaig mariilan isua møra Tiusweimay llirameelø gøn.

12 Inchen tru ángel seis kønrrabyuig nui copan tru Eufrates purø nu bi bala kelushene, tru pimerabe kølaptinchibig køn, pørr gal-labsrøngurri amrrub reymera puraambamig kønrrai may gura kørrømartrab.

13 Inchen dragonwei trigugurrimba, tru animal trømbøgøligwei trigugurrimba, tru ka isatø “Tius maig karuigwan eshkabig kur’ chibigwei trigugurrimba pøngatø trømbøig marøb

kwaimandziimera urututuumera lataig asønabelø werrubelø gøn.

¹⁴Iiløbe kwaimandziimerai mōsiimera gøbig køn, nui maramburab marigwan kenamarøbelø. Truiløbe pirø ørøba maya reymeraisrømay webambubelø gøn, kwayamig truilan tulundzuningarunrrab, Tius Newan Maramburab Marøbigwei tru purø nu gwaløm kwayamig.

¹⁵“Au, nabe kan niliig lataig arrumønrrun. Mayanguen tab gúig køn pesannamø, ashiptø megabigweimbe, nui keigwan tab asha tøgagøb, katø ñi kōsaatiig uñen, ñui kōsagwan misagasinab, kōrig buraimønrrappe.”

¹⁶Incha truiløbe tru reymeran tru hebreomaybe Armagedón dainug tulundzuningarubelø gøn.

¹⁷Inchen tru ángel siete gønrrabyuig nui copan tru chiguchagayu srønzhig bala lushene, srømbalasrø tru Tiuswei yau tru wamisra karub wainukkurrimbe kan wam truba mur trenchibig webarrubig køn:

—Yandø chab patsøgaig kørørmisran— cha. ¹⁸Inchen palaig bilabelø gøben, sre mullibelø gøben, palaig rrashibelø gøben arruben, pirøbe purø rrømbøig kōnabig køn, misaamera yu pirau srøtø warab urassrøngurri øyeeg lataibe managuen kōnømuinrrunikke. ¹⁹Inchen tru purø nu ciudadabe pōnbaliig misrøb lanrra, pirisaig kørørmisren, yu pirau ciudadamera pōnrrabeløbe kerrigu tuin bitis kegōrrabelø gøn. Inchen Tiusbe tru Babilonia purø nu ciudadawan isua, tru nui copayu purø rrømbøig namig købig tōgaigwan mutsøsrøbig køn.

²⁰Inchen tru pirø pi tøbøtag bōnrrabeløbe mayamba trubab chab lulen, katø nørø tunmera chigucha chab rrubabelø gøn. ²¹Inchen srømbalasrøngurrimbe misaameraim bala sre srug ibig køn, truba nørreelø, pib arroba lutau guatsiguelø. Inchen mōgueløbe tru treeg trømbøig srug kørøben, Tiuswan tsalø wamabelø gøn. Kaguende tru treeg kaig nebub arrubiibe igatø! purø rrømbøig købig køn.

Tru trømbøig marøb ishuwan nō chu basramnug pasrønrrai pasrøb

17 ¹Inchen tru siete ángelesmera tru copas siete srua pōnrrabelai utuig kan ángel arruabe, nan trenchibig køn:

—Amø cha. Tru nørø bi balamerawan wabig tru nui asrwan mōguelan anwei yanøb ishuwan nun chu pasrønrrai pasramigwan eshkarrumøn cha. ²Pirau reymerabe tru ishuuba purø rrømbøig maren, katø pirau warab misaamerabe mutsiirain gøn cha, nō tru treeg trømbøig mariibe vino lataig køben trunun mucha.—

³Inchen Espiritu nò nan tōga basramisren, tru ángelbe mu misag warab waraimòsrōmay nan srua iben, trusrōmbe kan ishug kan animal piguiig trōmbōgōligu itōgwana wai ashibig kur. Tru animalbe Tiuswan purò rrōmbōig wamabig munchimera pōriitò netsaig, truike turmera siete, kigulmera diez tōgaig kōbig kōn. ⁴Tru ishuube piguiiba, yalò biguiiba keweig kōbig kōn, orotōgagōben, tab sruuzheelōtōgagōben, perlastōgagōben tabzhig tamaraig. Tasigube kan oro copa mutaig kōbig kōn, tru mōguelōba trōmbōig marōptò kōsōngōmdiig mariiba, ashikken gōnrrabgaig mariibatò netsiigwan. ⁵Katò nui kappalōyube kan munchi òyeebe mandò termab muguen nebua isumgaig pōrig tōgaig kōbig kōn:

Babilonia purò nuig,

mōguelōba kaig marōptò warab ishumburweimba,

pirau trōmbōig kōsōngōnrraptiig mariilaimba usrin gōn.

⁶Tru ishuwane mutsiguig wai ashibig kur, Tiuswei misaamera kweetsilai aniwanba, katò Jesúsweimburab waminchibelan kweetsilai aniwanba mucha.

Inchen nabe ashippe, truba gōrrò gwaarig kōrrōmisrinaben, ⁷tru ángelbe nan trenchibig kōn:

—¿Chindimbarre kwargu? cha. Nabe ñune tru ishuweimburappa, tru animal trōmbōgōlig ishuan niga basrabig turmera siete, kigulmera diez tōgaigweimburappa, òyeebe mandò chibig kermab mu nebua isumgaigwan chi chibig kui eshkarrumòn cha. ⁸Tru animal trōmbōgōlig ñi asiibe merrabsrōmbe òsig kōbig yandò treeg kōmòn cha. Inchendò tru purò rrōmbò umbu rrabyugurri nebatrun cha, tru managatig mōra basramnuumay inrrab. Inchen chiwangurrimbunò maròb urassrōwei yu pirau warab misaamera nōmui munchimeran tru managatig òsig purrōnrrabelai pōrig libroyu pōrig chigarbe, tru animal trōmbōgōligwan ke kwaara ashchun cha, sròtòbe òsig kua, mòi yambe pinig mu gaagua, katōyug attrabig kui ashippe.

⁹Igwan tab maig kōtashchab ashchappe, yube purò may isubig kōmig palōnrrun: Tru siete turmerabe tru siete tunmera gōn, tru ishug pōtò waig. Katò tru turmeratōwei siete reymerangucha eshkabig kōn. ¹⁰Tru siete reymerai utu trattōgatòbe chab gōrrabguen inchen, kan mōikkōsrōn truilōyuibe mōin gwalōm ashib karub pasrōben, kane katōgucha arrumò, srò gōn cha. Inchendò yandò truig arruabe, nune maya yanatò kōrrōmisramig nebunrrun. ¹¹Tru animal trōmbōgōlig,

merrabsrømbe øsig pasrabig købig, mõi yambe øsig pasrømíibe, tru ocho gønrrabyu rey gøn, tru sieteelai utugurri webarrub reytøwei, truiibe tru managatig møra basramnuumay inrrabig.

¹²Tru diez kigulmera ñi asiibe ashib karub purramigwan utømø srø bønrrab reymera gøn cha. Inchendø tru animal trømbøgøliiba kegøtø, truiløbe reymera lataitøwei mugucha manchinrraingaig karumigwan kan uratø tøgagømig utønrrun cha. ¹³I tru reymera diezøløbe ke kandø isua bønrramisra, nømui maramburab maramig tøgagúigwanba, mugucha manchinrraingaig karumig tøgagúigwanba tru animal trømbøgøligwan tranrrun cha. ¹⁴Inchen nømbe Ubisha-unøba kwayaben, Ubisha-unøbe nømune kananrrun. Kaguende nøbe Maya Misagwan Karub Ashib Pønrrabelaim Bala Nø Garub Ashib Pasrabig, katø Maya Reymerai Nø Rey gua. Inchen nøba pønrrabeløbe Tius wamiilø, lawa wesruilø, nun elachimø melabelø gøbig køn— cha.

¹⁵Katø ángelbe nane trenchibig køn:

—Møgueløba kaig marøptø tsub ishug wamisra wainug, tru pimera ñi asiibe, tru chi misamera gøben, misamera purø nørro pønrrabelø gøben, misag nørro pønrrabig gøben, peg peg wam waminchibelø gøben, truilø gøn cha. ¹⁶Inchen diez tru kigulmera ñi asiiba, tru animal trømbøgølibabe tru ishug nui asrwan møguelan anwei yanøbigwane ashig kømui inchib tsalø asha, nundø mu keesha asiimíig tsunrrai mara, køsaatiig yandiig kørromarabe, tru ishuweí yauwane ma, naatøga patrrun chibig køn. ¹⁷Kaguende Tiusbe nø maig martrab isuigwan trunun nøm isua martrai nømui manrrømerayu pasrin gøn cha. Treeg punrraimbe nømbe kandø isua bønrramisra, tru animal trømbøgøligwan nømui ashib karub purraigwan tranøb inchai, Tius nø mandø wamindig treeg nebumnegatig. ¹⁸Tru ishug ñi asiibe tru purø nu ciuda gøn cha, pirau reymeran nø merrarrawa karumburab karub tøga basrabig.—

Babilonia purø nu ciuda yandø pinab

18 ¹Øyeeg chab puraibene, katøgan ángel srømbalasrøngurri kørraarri ashibig kur, mu mandamgaig karub maramigwan purø nuig tøgagig. Inchen pirøbe tru ángelwei törguegwalmabiitøga törgwaløm gørrømisrøbig køn. ²Incha truba mur wamab trashib trenchibig køn:

“iTru purø nu ciuda Babiloniabe
yandø penan, yandø penan! chib.

Møimbe kwaimandziimera yandø nòm waramig nòmui misrøb,
chigurribunø kaig mõiimerai warain rrab misrøb,
kaig illimera køsøngømdiig asamguengailai kanbalatø waraig
le misrøb indin gøn chib.

3 Kaguende misaamera nørø pønrrabelø mayamba,
nø ke chinchimmørø inchib, møgueløba trømbøig
maringarub vinon mucha, mutsiirain gøn cha.

Inchen pirau reymerabe tru ishuuba trømbøig maren,
pirau yanøb, penab inchibeløbe puarmera misrin gøn cha,
tru nun maig marøg køben trømbøig marøb pasrai anmeratøga.”

4 Inchen srømbalaserungurri katøgan wam trendaig mørøbig kur:
—Ñim nai misaamerabe tru ciudayugurri webambay cha,
nø kaig mariiløyu ñimgucha treetøwei tøgatø marøb
melømøwei,
katø chine kaig nebunrrai marøb arrubig nebumøwei
inchain chib.

5 Kaguende nui kaig mariiløtø srømbalaserongatig tunbasrig
pasrøben,
Tiusbe tru ishug sølgandø tabig marmuilan isua basran cha.

6 Nø kanelan maig tranig,
nungucha truburø treetøwei pamay rranay chib.
Mutsamig nø gatøganelai tamarin copayutøwei
nuimbe pamay mutsamigwan kandiig lindisha tamaray
chib.

7 Nøbe maya nuguen tabigu wag køben wab,
katø nø maig isuigwan maig købash tsuig købene,
møimbe treetøwei mandøguen gømui møra meganrraimba,
kishib meganrraimba maray chib.

Kaguende nøbe nui manrraube trenchibig køn:
“Nabe yube kan reina lataig wamisra war cha.

Nabe keg kucha gwaitøguen gømøwei,
katø managuen isub kisamig chigawein gømønrrun” cha.

8 Inchawei treekkurri ke kan gwalømyutø chine kaig nebunrrai
marøb amrrunrrabeløbe itømaytø attrun cha:
kwamig køben, kisamig køben, parø arrubig købengue.

Nun naatøga patrun.

Kaguende Señor Tius Newan Maramburab Marøbiibe maig
maramigwan truig nø asha maran cha, nune.

9'Inchen pirau reymera tru ishuuba larrø rrømbøig marøb, chull gøtanmaptø chine palømfīg purø tabigu nøba warabeløbe nun isub, truba rruba wamab kishchun nun tru parrig naguishwan ashippe.

10Nun øyeekkatig nebui meganrrai maren, nømbe trunun kørīg køb yabsrøndøø bønrrabelø gøn trenchib:

“iKarrengucha gúita! iKarrengucha gúita!

iBabilonia, kan yeeg purø nu ciuda,

chigøben nørriig marøbig!

iKe kagøppa, ke kan urayutø ñune øyeeg pinisainab pasramig nebuita!” chib.

11'Inchen pirau yanøb, penab inchibeløbe nun isub wamab kisan, kaguende yandø nømui yanamelan mugucha penønrrabig kaaben. 12Nømui chine nørro yanamelø, oro gøben, an gøben, tab sruuzheelø gøben, perlas køben, linotøga marig purø tab llensuzheelø gøben, yalø bigøzheelø gøben, seda llensumera gøben, pigø llensuzheelø gøben, chine tsiimera may irrabzheelø gøben, marfildøga mariilø gøben, tab tsiizheeløtøga mariilø gøben, broncetøga mariilø gøben, hierrotøga gøben, marmoldøga mariilø gøben, 13canela gøben, chigøben may irrabzheelø gøben, incienso gøben, mirra gøben, asru srøliilø may irrabzheelø gøben, vino gøben, aceite gøben, purø tab harina gøben, tirigu gøben, niisrai animalmera gøben, ubishamera gøben, kaullimera gøben, kaulli sruig carromera gøben, karuindiig melabelan gøben, misaameran gøben, øyeelan yandø mu penønrrabig kaaben.

14'Incha ciudawane trenchinrrun cha: “iÑi purø chull inchib lurra maig mamimerabe ñuyasiibe kaanrrai chab pinøben, katø ñi chull inchib mailø mayzheelø trurrigu tabzheeløbe ñuyasiibe kaanrrai chab pinin gøn chib, yandø managuen katøbe asamikkaikke!” 15Inchen penab, yanøb inchibelø tru ciudayugurri pua misra gøbeløbe, ciudawan øyeekkatig trømbøig nebunrrai maren, kørīg købiitø yabsrøndøø bønrrønrrun cha, truba rruba wamab, kishib, 16trenchib:

“iKarrengucha gúita! iKarrengucha gúita!

iKan yeeg purø nu ciuda,

kemig lino llensu purø tabiitøga marig,

yalø bigøzheelø gøben, pigøzheelø gøben,

orotøgaba, tab sruuzheeløtøgaba, perlastøgaba

tabzhig tamarigwan keweig købig!

17 ¡Ke kagøppa, kan urayutø chigurrimbunø nørrø købig
yeekkucha chab pinita!” chib.

’Inchen mayeelø tru barcomeran srubeløba, mayeelø maryu
amburab iburab misag llibabeløba, barcon ashib truyu purugub
llibabeløba, tru maryu llibab an marøbeløba, truilø kerriguelø
yabsrøndøø bønrrabelø gøn cha. 18 Incha tru Babilonia ciuda
parrig naguishwan ashabe, trenchib trashibelø gøn cha: “iØyeeg
nu ciudatøweimbe katøgane chuguen kaagúig køn!” chib. 19 Incha
nømui tur bala usrø busrøb, trenchib wamab kishibelø gøn cha:

“iKarrengucha gúita! iKarrengucha gúita!

ikan yeeg purø nu ciuda chib,
mayeelø maryu barcos tøgarmarabe truyu yeeg chine
købiitøga puarmera misrig!
iMøimbe ke kan urayutø chab pinisaig kørørmisrin gøn!
chib.

20 ¡Inchen ñi, srømbalabe, tru ciuda øyeeg pinøben kasraarau!
chib.

iÑim Tiuswei misaameraba,
katø Cristo nøashib karua øriiløba,
Tius maig karuigwan eshkabeløba kasraaray! chib.
Kaguende Tiusbe ciudawan øyeeg nebunrrai marøppe,
ñimgurri øyeeg maramigwan asha mara basrin gøn.”—

21 Inchen kan ángel purø murig, kan tirigu guichib srug lataig,
purø nuigwan kusrawa, muta, maryu trenchib keguchibig køn:

“Babilonia nu ciudawane øyeetøwei tsakkandø tranrra
gueguchen,
katøbe managuen asamig kaanrrun cha.

22 Yandø ñuinuube arpas kønabelø kønøben møramig kawei,
chigøben kønabelan tabzhig køni møramig kawei,
lus urrabelø urri møramig kawei,
trompetas urrabelø urri møramig kawei,
katø taska chigøben tabzhig marøbelø mu gawei,
tirigu guichib srug tirigun kichen

katøbe managuen wanrri møramig kawein gønrrun chib.

23 Katøbe managuen ñuinuube lámpara biløben,
tru tørwan asamig kawei,
katø kasharabyu keg misrtrabiiba,
srai misrtrabiiba kasrag waminchen,

trunun mōramig kawein gōnrrun cha.
 Kaguende ñuinug penab, yanøb inchibeløbe
 yu pirau purø nørreelø gøbig køn chib.
 Katø ñibe trømbø marøb piimailøtøga
 pirau misag nørro pōnrrabelan mayamba
 chab guegørrøsrkaig køn cha.

24 Babilonia ciudayube

Tius maig karuigwan eshkabelan kweetsiilai aniwamba,
 Tiuswei misaameran kweetsiilai aniwamba,
 katø yu pirau mayeelan kweetsiilai aniwamba
 wetørraig køn.”

Srømbalasrø cantailø

19 ¹Øyeelø chab puraiben, srømbalasrømbe kan wam purø nu
 sôteelai lataig øyah chib gúi mørøbig kur:

“iKan øyeebe maya nuguen tab gøn! chib.

iKaigyugurri wesraiba, tørguegwalmabiiba,
 maramburab maramibabe namui Tiuswein gøn! chib.

²Kaguende maig maramigwan nø asha mariibe,
 ciertonig, sølgandø tabig mariilø gøn chib.

Kaguen nøbe tru mōgueløba purø rrømbøig marøb ishug
 tru nui trømbøig mariiløtøga pirau mindishibigwan
 mōra basrønrrai pasrin gøn chib.

Katø Tiuswei karuindiig melabelan
 nø ani lusingaruigwan
 nungucha ulø bayib treetøwei maran” chib.

³Incha gatøyug trenchibelø gøn:

“iKan øyeebe maya nuguen tab gøn! chib.

Tru ishuwei parrig naguishbe
 managatig nebib pasrabig pasrønrrun” chib.

⁴Inchen tru veinticuatro kølli misaameraba, tru pibgatø øsig
 purrabeløbabe pirausrøngatig tømboñsrøb srالا, tru wamisra
 karub wainug wabig, Tiuswan køriibala tabig waminchib
 trenchibelø gøn:

“iTreeg kønrrun! chib.

iKan øyeebe maya nuguen tab gøn!” chib.

⁵Inchen tru wamisra karub wainukkurrimbe kan wam mørø
 trenchibig køn:

—iÑim Tiusweiwan marøb melabelø mayeeløba,
 katø Tiuswan køriibala pønrrabeløba,
 tru nørreelø kusrebelø gøben,
 katø treeg komeelø gøben,
 namui Tiuswane purø tabig waminday!— chib.

Ubisha-unø kasharam gwaløm

⁶Inchen kan truba nu soteelai wammera lataig, kabe kan truba
 nu bi wanrrøb lataig, kabe kan palaig rrashibelø lataig trendaig
 mørøbig kur:

—iKan øyeebe maya nuguen tab gøn! chib.
 Kaguende namui Tius Newan Maramburab Marøbiibe nø
 ashib karub pasran chib.

⁷Kasraarab, katø truba tab gúi mørøb,
 katø nune maya nuguen tabig waminchigun chib.
 Kaguende mømbe Ubisha-unø kasharab kasraaramig pun cha.
 Nui srain gønrrabiibe tamara basran cha.

⁸Incha srain gønrrabigwane lino llensu,
 chishig tørbilabigwan kenrrai tranig køn— chib.

(Pøs tru lino purø tab llensuzhiibe tru Tiuswei misaamera nøm
 sølgandø tabig mariilan eshkabig køn.)

⁹Inchen ángelbe nan trenchibig køn:

—Iigwan pør cha: “Tru Ubisha-unai kasharab yaumay manrrab
 linchab amrrunrrai eshkailøbe mayanguen tab gúilø gøn”— cha.
 Inchabe nane treekkucha chibig køn:

—Iiløbe Tius nø newan cierton wamindiilø gøn— chib.

¹⁰Inchen nabe ángelwei merrab tømboñsra køriibala tabig
 waminchab inchene, ángelbe nane trenchiptinchibig køn:

—iAu, øyeeg marmøta! cha. Ñiba, ñui nuneløba tru ciertonigwan
 Jesús kenamariigwan treetøwei elachimø, pønrrabelø lataitøwei,
 nagucha Tiuswei marøb megabiitøwein gur cha. iTiuswane
 køriibala tabig waminchi! cha. Kaguende tru ciertonigwan Jesús
 kenamariibe Tius maig karuigwan eshkabelan Tius maig tamigwan
 isungarub pasrabig, truitøwein gøn— cha.

Pulø gaulli itøgwanaig

¹¹Inchen srømbalabe kurig basrai ashiptindinaben, truyube
 kan kaulli puliig kenamisrøbig køn. Inchen truyu tru itøgwana

wabigwane trencha wamig købig køn: “Nø maig køppe, Managucha Treetø Tabig, katø Newan Ciertonig” cha, treeg wamig, kaguende nøbe sølgandø tabig mariitøga maig maramigwan asha marøb, katø kwayab inchibig køn. ¹²Nui kabmerabe kan nagurø bilab lataig pilabelø gøben, nui turyube coronamera truba yam betsaig, kan munchi pørig tøgäig købig køn, trunune chi chibig kuigwane nõtøwei asha gøbig køn. ¹³Nui kewagúibe anindøga pisig keweig købig køn. Inchen nui munchibe “Tiuswei Wam” cha wamig købig køn. ¹⁴Inchen tru nørø sötø srømbalasreelø mayamba pasrabiibe lino llensuzheelø puløzhig chishcheelø kewar, pulø gaulli itøgwanar nui wendautø amrrubelø gøn. ¹⁵Inchen nui trigugurrimbe kan trøsr espada webarrubig køn, trutøga misaamera nørø pønrrabelan kørrinchab. “Incha nøbe ashib karuppe, kan tsandzøn børtsiitøga karub lataig ashib karunrrun.” Incha gatø nøbe tru uvaswan pi wesrunrrab kwarainug kebusra, Tius Newan Maramburab Marøbigwei purø rrømbøig namig købiitøga tru uvas piwan wesrunrrab pusøbunønrrun. ¹⁶Incha nui kewagúiguba, srøptsimburappa øyeeg munchi pørig tøgäig købig køn:

Maya Reymeraim Bala Nø Rey;

Maya Misagwan Ashib Karub Pønrrabelaim Bala

Nø Garub Ashib Pasrabig, chibig.

Tru animal trømbøgøligwan chinchamamub

¹⁷Inchen kan ángel nøsigu pasramisrabe, maya illimera srømbalawan llirab amønibelan mur wamab trendai ashibig kur: “Amrrua, tulundzunay cha, mamig purø nørø, Tius tamarigwan manrrab. ¹⁸Reymerai yauwan gøben, maya suldaumeran ashib pønrrabelai yauwan gøben, chiwangucha kørmø gwayam møguelai yauwan gøben, kaullimerai yauwan gøben, tru itøgwanabelai yauwan gøben, mayeelai yauwan, tru karuindiig melabelai yauwan gøben, karuindiig melømeelai yauwan gøben, kusreb møguelai yauwan gøben, katø treeg kòmeelaiwan gøbengue.”

¹⁹Inchen tru animal trømbøgøligwanba, pirau reymeranba, nømui suldau sötømeranba tulundzunin gúi ashibig kur, truiløbe tru pulø gaulli itøgwanaiba, truigwei suldaumeraba kwayanrrab. ²⁰Inchen tru animal trømbøgøligwane merrarraig købig køn, tru isatø ‘Tius maig karuigwan eshabig kur’ chibigwanbañau. Truibe tru trømbøgøligwei merrab tru maramburab mariilan

asha gønrrai marøbig købig køn. Tru treeg mariitøga peløsrka chab guegørrørskai g købig køn, tru trømbøgøligwei marcatøga marcarramabelanba, katø tru trømbøgøligwan treezhigwei asha marigwan køriibala tabig waminchibelanba. Inchen tru animal trømbøgøligwanba, tru Tiusweinukkurri arrubig lataig marendø, peemaytø marøbgøligwanba tru nag pisu lataig azufreba, naarabigu øsiiba kebusriilø gøbig køn. ²¹Inchen tru gatøganelø kørørmisrøbelane tru kauilli balaigwei trigugurri espada webarrubig chab gweechen, maya illimerabe truilai yaumeran ke kaasha mabelø gøn.

Tru mil años

20 ¹Inchen kan ángel tru purø rrømbø umbu trabyu llaviwanba, truba nu cadenanba tasku sruaig srømbalasrøngurri kørraarri ashibig kur. ²Incha tru ángelbe tru dragon trømbøgølig, tru ul merrabsriig, tru nugwaimandzig, Satanás taigwane cadenatøga mil añoswei merrarrawa, lusra basrøbig køn. ³Incha tru purø rrømbø umbu rrabyu kegucha, yaskabwane muguen kurtraingaig kasra basrøbig køn, misaamera nørø pønrrabelan peløsrkøb kegørrørskømønrrai tru mil años nebumnegatig. Yandø treeg chab puraiben, katø kan maya yanatø picha, elatsamig kømig palønrrun.

⁴Katø purramisra karub purrailø ashibig kur. Inchen truyube maig maramigwan asha marøb purramigwan utabeløbe purramisrøbelø gøn. Katø Jesúsweimburabigwan eshkaikkurrimba, Tiuswei wamgurrimba nømui turmeran pariilø gøbelai møsiimerangucha ashibig kur. Truiløbe tru trømbøgøligwanba, tru nun treetøwei asha marigwanba køriibala tabig waminchimøwei, katø kappaløyu lata, tasigu lata, marcarramamøwei inchar gøbig køn. Incha truiløbe katøle øsiirawa, Cristoba mil años ashib karub purrabelø gøn. ⁵Inchen tru kwabelø gatøganeløbe tru mil años purayamnegatig øsiirameelø gøn. Iig køn, tru kwawa katøyug srøsrø øsiirai. ⁶Mayanguen tab gúilø gøn trurrigu Tiusweindø tarømariilø, tru kwawa katøyug srøsrø øsiirabelai utu øsiirabelaimbe. Yandø tru kwab gwanrrai gatøle kwangarub arrubiibe nømune chigucha chi martrab gaimanrrun, nømbe masken Tiusweimba, Cristoimba sacerdotesmera gua, nøba mil años ashib karub purrønrrun.

Nugwaimandzigwan yandø kerriguwan kanawa gørrømarøb

⁷Incha yandø tru mil años nebuben, tru Satanáswane tru merrarrowa keera wanninukkurri elachen, ⁸nøbe pirau misaamera nørø pønrrabelan kegørrøsrkønrrab webinrrun, yu pirau walligurri, wagurri, ambugurri, igurri misag warabelan —tru Gog taigwanba, Magog taigwanba— kwayamig tulundzunønrrab. Inchen tru kwayanrrabeløbe nu gøptø mar mendawan kan pisrum lataig købig køn. ⁹Incha Tiuswei misaamera warainug tru bötøgatanba, Tiuswei undaaraig ciuda bötøgatanba pirau ørøba nømbe algønab amrrua tulsruben, nag srømbalasrøngurri kørøarruppe, chishtø barrøbig køn. ¹⁰Inchen tru nugwaimandzig chine mara peløsrka nømun kegørrøsrkøbigwane tru nag pisu lataig azufreba naarabigu kegutsig købig køn, tru animal trømbøgøligwanba, tru isatø ‘Tius maig karuigwan eshkabig kur’ chibigwanba kebetinug. Inchen truyube nømun yem, gwaløm managatig purø rrømbøig kui møra melønrrai martrun.

Wamisra karub waig purø nuig køramdiig

¹¹Inchen kan wamisra karub waig puliig purø nuig pasrai ashibig kur, truyu wabigwanba. Inchen nui merrabgurrimbe pirøba, srømbalababe yandø kerrigu trubab chab lulen, nømuimbe chuguen pønramig kaabig køn. ¹²Katø truyube tru kwabelø nørø gusreb misaamera gøben, treeg kømø misaamera gøben, Tiuswei merrab pønrrai ashibig kur. Inchen libromeran kuren, katøgan libro, tru managatig øsig purrønrrabelai munchimeran pøri librongucha kurøbig køn. Inchen tru kwabelane tru libromerayu maig pørig bønrrøben truyu asha, maig maramigwan treeg asha marøbig køn, nøm maig mariilø gøben treekke. ¹³Inchen marbe tru piyu kwaig purrabelø gøbelan tranen, katø tru kwangarubig taiba, tru kwabelø pønrraig “Hades” taiba, truilø chigucha nømuinug tru kwabelø pønrrabelan tranen, nømun møigwandøgucha maig maramigwan treeg asha mariilø gøbig køn, nøm maig mariilø gøben treekke. ¹⁴Inchen tru kwangarubigwanba, tru kwabelø pønrraigwanbabe tru nag pisu lataigu kebetiilø gøbig køn. Inchen tru nag pisu lataibe tru srøsrø gwaig kømnetø katøyug kwamig, truig køn. ¹⁵Inchen tru managatig øsig purrønrrabelai munchimeran pøri libroyu nømui munchimeran truyu

wetørramuinabeløbe mutøgucha tru nag pisu lataigu kebetiilø gøbig køn.

Srømbalaba, pirøba srøizheelø

21 ¹Incha gatø kan srømbala srøiba, srø birøba ashibig kur. Kaguende yandø srømbalaba, pirøba srøteelø gøbeløbe yandø chab pinøben, yandø mar chigucha pinin gøbig køn. ²Inchen nabe tru ciuda Tiusweindø tarømarig, tru Jerusalén srøigwane srømbalasrøngurri kørraarri ashibig kur, Tiuswei merrabgurri. Tru ciudabe kan srai misrtrabig tabzhig keweig tamara pasrab lataig pasrabig køn nui keg kønrrabigweyasig. ³Inchen tru wamisra karub wainukkurrimbe kan wam truba mur waminchib øyah taig mørøbig kur:

“iAu! mømbe Tius nø pasraig yabe yandø misaameraba pasran cha.

Tiusbe nømbe pasrønrrab pasrøben,
nømgurrimbe nui misaamera gønrrun cha.

Inchen Tiustøwei nøashib truyu nømbe pasrøwa,
nømui Tius kønrrun chib.

⁴ Incha nøbe nømui kappimeran kerrigu pinømrøtrun cha. Inchen yandø kwamig kawei, kisamig kawei,
wamab trasamig kawei, pusrkwabig kawein gønrrun chib.

Kaguende merrab chi købiibe chab purayan” cha.

⁵Inchen tru wamisra karub wainug wabiibe trenchibig køn: “Nabe chiwangurrimbunø srøitø maramønrrun” cha. Inchabe katø nane trenchibig køn:

—Pør cha. Kaguende i wambe maig taibe treeg køb, katø ciertonig køb gøn— cha.

⁶Inchabe katø nan trenchibig køn:

—Yandø chab marig kørromisran cha. Nabe Aba, Zetaba latawei, Srøsriiba, Srabeiba gur cha. Møikkøben pimulgwaigwane øsig kønrrai tranøb pi, tru kølømo bigabyu piwan, ka yandø ketig mutchai tranamønrrun cha. ⁷Møikkøben chine nebuingucha truyu pureb ibiibe iilan keta tranamig tøgagúigwan ketig utønrrun chibig køn. Inchen nabe nui Tius køben, nøgurrimbe nai nusrkain gønrrun cha. ⁸Inchen chigøben kaig puben kørab llirawa ambubeløba, chiweingucha køremeeløba, ashikken gønrrabgaig trømbøig marøbeløba, kweechipteeløba, møguelø ishumburba

trømbøig marøbeløba, kwaimandzigweimburabelan marøb, trømbø marøb piimabeløba, chiwangøben kan tius kui lataig inchibeløba, mayeelø isapteeløba, mayamba iiløbe nømuimburappe tru nag pisu lataig azufreba naarabigumay ambamig kōnrrun cha. Truibe tru srøsrø kwaig kōmnetø tru katøyug kwamig truig kōn— cha.

Tru srø Jerusalén

⁹Inchen kan ángel tru sieteelai utuig tru srabeig chine kaig nebunrrai marøb amrrunrrabelan tru siete copas netsiig mutarwei utuig arruabe, nan trenchibig kōn:

—Yusrø amø cha. Ubisha-unai srai misrtrabig, tru srawan eshkarrumøn— cha.

¹⁰Inchen Espíritu nø nan tōga basramisren ángelbe kan truba nu tun trurrigu pala tunsrømay pera ya, nane Jerusalén, tru ciuda Tiusweindø tarømarigwan kenamarøbig kōn, srømbalatrøngurri, Tiusweinukkurri kōrraarubigwan. ¹¹Tru ciudabe Tiuswei tōrguegwalmabigwan tōgaig tōrbilabig kōrraarubig kōn, kan purø tab sruuzhig, kan jaspe srug tōrbilabzhig lataig, kabe kan bigriu tōrguelarrøzhig lataikke. ¹²Tru ciuda bōtøgatanbe srug busrig lendiig trurrigu palaig kusraig købig kōn, yaskabmera doce tōgaig. Tru yaskabmørig kan ángel pōnrrøben, tru yaskabmerayube munchimera pōriilø pōnrrabig kōn, Israelweinukkurri karrab misaamerai tru doceelai munchimeran. ¹³Ciudayu tru yaskabmerabe pōrr gal-labgatømay pōn, kandarøgatømay pōn, katøgandarøgatømay srø pōn, pōrr binebgatømay pōn gøbig kōn. ¹⁴Inchen tru ciudayu pōtøgatan tru srug busrig palaig kusruigwan niga basrønrrabig pølsrugu pōtøburab doce warig tōgaig købig kōn. Inchen trumørig tru Ubisha-unai tru doce nøashib karua øriilai munchimeran pōriilø gøbig kōn.

¹⁵Incha tru naba waminchibiibe ciudawan gøben, truyu yaskabmeran gøben, tru sruutōga pusrig palaig marigwan gøben unaasamig kan oro caña tsig sruaig købig kōn. ¹⁶Tru ciudabe mumaytøgucha atsi gømíig latazhig købig kōn, lendømay lata, yamay lata. Angelbe tru ciudawan cañatōga unaashene, 2.200 kilómetros købig kōn. Yamay lata, lendømay lata, mumaytøgucha latazhig købig kōn. ¹⁷Incha tru pōtøburab palaig marigwan palamay mayan gøtashchab unaashene, 75 metrosig købig kōn, tru ángel misag unaasimay unaashen.

¹⁸Tru pøtøburab palaig kusrub mariibe jaspe sruutøga marig køben, ciudabe orotøgatø marig kan bigriu tørguelarrøzhig lataig købig køn. ¹⁹Inchen tru ciudayu palaig marigwan niga basrønrrabig katsigwan pusriiløbe chi sruutøgagøben tabzheeløtøga purø tabzhig kønrrai marig købig køn:

Srøsriibe jaspetøga marig køben,
tru wendauibe zafirotøga marig køben,
pøn gønrrabyuibe ágatatøga marig køben,
pib gønrrabyuibe esmeraldatøga marig køben,

²⁰trattøgatø gønrrabyuibe ónicetøga marig købig køn.
Inchen seis kønrrabyuibe cornalinatøga marig køben,
siete gønrrabyuibe crisólitotøga marig køben,
ocho gønrrabyuibe berilotøga marig køben,
nueve gønrrabyuibe topasiotøga marig køben,
diez gønrrabyuibe crisoprasatøga marig køben,
once gønrrabyuibe jacinto taig sruutøga marig køben,
srabeig doce gønrrabyuibe amatistatøga. Øyeeg sruumeratøga
marig købig køn.

²¹Tru doce yaskabmerabe doce perlas købig køn, yaskabmørig kan perlatøgatø marig kandiig kemesraimøzhikke. Inchen tru ciudayu mas lendiig llirainuube orotøgatø marig købig køn, igatø! kan bigriu tørguelarrøzhig lataikke.

²²Tru ciudayube Tiuswei yawane ashmur; kaguende Señor Tius Newan Maramburab Marøbiiba, Ubisha-unøba, nømashib tru ya gøbig køn. ²³Tru ciudabe tør gønrrai pørr bilamig balain gømwøwei, pøl bilamig balain gømwøwein gøn; kaguende Tiuswei tørguegwalmabiibe tru ciudawan kebiløben, tru ciudayu pilab pasrabiibe Ubisha-unø gøn.

²⁴Inchen misaamera purø nørrø pønrrabelø tru kaigyugurri wesrailøbe tru ciudawei toryu amøñiben, pirau reymerabe nømui chigurrimbunø purø tabzheelø tøgagúilane srúa amba, tranrrun.

²⁵Kwalømbe chu uraskucha yaskabmerabe kurindø bønrrønrrun.

Kaguende truyube yem misrøbiibe kaanrrun. ²⁶Misag nørrø pønrrabelø nømui chigurrimbunø purø tabzheelø tøgagúigwanba, maya nuguen tab indigwanba ciudayumay srúa amrrunrrun.

²⁷Truyube chishig kómíig kaiba, katø ashikken gønrrabgaig marøbeløba, katø isapteeløbabe managuen kebamrraamøn. Truyu kebambuppe, tru Ubisha-unai libroyu managatig øsig purrønrrabelai munchimeran pørig tøgartøwei kebamrrun.

22 ¹Incha ángelbe kan nu bi chishchig, tru øsig kømig tranøb piwan nan eshkabig køn. Truibe torguegwalmabzhig kan bigriu lataig, tru Tiusweimba, Ubisha-unaimba wamisra karub wainukkurri webarrubig køn. ²Tru ciuda tøbøtagwan mas lendiig llirainuube, tru nu bi mendabe øsig kømigwan tranøb tusr ambumay imay pinøgasrøbig pasrabig køn, truibe mamimera peg, peezhig doce nigabig køn, pølmørig, pølmørig lurramig. Inchen tru tusryu ishiimerabe misag nørrø pønrrabelai kwanrrømeran tamaramigweyasig købig køn. ³Tru ciudayube Tius kaig nebui warønrrun dainamig kaanrrun. Inchen Tiusweimba, Ubisha-unaimba wamisra karub waibe tru ciudayu pasrøben, nuiwan marøb melabeløbe truyu køriibala tabig waminchun. ⁴Malaugue nun ashib, nui munchiwan nømui kappalømerayu pørig tøgagøb inchun. ⁵Truyube yandø yem misrtrabig kawei, truyube tør gønrrai piløgamig palain gømøwei, nøsig pilam balain gømøweim burrønrrun. Kaguende Tius Señorbe nømune nø bilønrrun. Inchen nømbe managatig ashib karub purrønrrun.

Cristo arrumibe lutau gøn

⁶Angelbe katø nan trenchibig køn:

—I wamindiiløbe maig taibe treeg køb, katø ciertonig køb gøn cha. Señor, tru nø maig karuigwan eshkabelan nø maig tamigwan isungarub pasrab Tiusbe, nui ángelwan ørin gøn cha, tru petø chigøben pureb attrabigwan nuiwan marøb melabelan eshkanrrai.—

⁷“¡Au! Nabe petø arrumønrrun dan. Chi pureb attrabigwan i libroyu pøriilan møra marøbigweimbe mayanguen tab gúig køn” dan.

⁸Iigwan ashib, mørøb inchibiibe, Juan, na gur. Incha yandø tru chab ashib, chab mørabe, tru ángel nan kenamarøbigwei merrab nun køriibala tabig waminchab tømboñsrøb sralene, ⁹nøbe nane trenchiptinchibig køn:

—iøyeeg marmøta! cha. Nagucha Tiuswei marøb megabiitøwein gur cha, ñiba, ñui nunelø, tru Tius maig karuigwan eshkabeløba, katø mayeelø i libroyu wamindiilan møra marøbeløba, truilø lataitøweingue. ¡Tiuswane køriibala tabig waminchi!— chibig køn.

¹⁰Inchabe katø nane trenchibig køn:

—Chi pureb attrabigwan i kilgayu wamindig pønrrabelane kasrøppa, esegamøta cha. Kaguende tru treeg nebunrrabiibe yandø

lutau basran cha. ¹¹Sølgandø tabig marmíibe, trube, katøgucha treegwan ka marøb uñ cha. Trømbøig ashikken gønrabgaig marøbiibe, trube, katøgucha treeg ka marøb uñ cha. Inchen sølgandø tabig marøbig kuabe, trube, katøgucha treeg marøbig marøb uñ cha. Inchen Tiusweyasiitø tarømarig kuabe, treetø pasrabig basrau— cha.

¹²“Au, na, Jesúsbe, petø arrumønrrun cha, nøm møitøgucha maig marig køben, truburø na tranamig tøgagúigwan tranrrab srua. ¹³Nabe Aba, Zetaba lataig, Srøsriiba, Srabeiba, katø Pølbasarøiiba, Patsabiiba, truiibe na gur cha.

¹⁴Mayanguen tab gúilø gøn, nømui keilan tsarøbeløbe, tru øsig kømig tranøb tusryuigwan mu merønrraingaig mamig tøgagøb, tru ciudayu yaskabmerawan kebambub indamig. ¹⁵Trune tru wera lataig inchibeløba, trømbø marøb piimabeløba, møgueløba, ishumburba trømbøig marøbeløba, kweechipteeløba, chiwangøben kan tius kui lataig inchibeløba, mutøgucha isa wamindamigwane larrø chullelø ke chi tabig kui lataig isa waminchibeløba, iiløbe wambig kørørmisrtrun.

¹⁶Na, Jesúsbe, nai ángelwan iigwan ñimun eshkanrrai ørar tru iglesiamerayasig. David kønrrai tru srøl namerrig pasrabig kua, katø nabe Davidweinukkurrindøwei larrøbicha arrubig kur, tru løtsø tør-rram uras torguegwalmab estrella.”


¹⁷Inchen Espíritu Santoba, Ubisha-unai Sraimbabe: “iAmø!” tan. Iigwan mørøbikkucha: “iAmø!” chi. Inchen møikkøben pimulgwaibe, amø. Katø møikkøben mutchappe, tru øsig kømig tranøb piwan, ka yandø ketig, muchi.

¹⁸Maig pub attrabigwan i libroyu pørigwan wamindi mørøbelane mundøgucha, isuptø martrai, nabe eshkar: Møikkøben iilan ka yandø nemarøbigwane chine kaig nebub amrrunrrabigwan nune Tiusbe nemartrun tru i libroyu pørig pønrrabelan. ¹⁹Katø møikkøben i libroyu maig pub attrabigwan wamindiilan kerrabigwane tru øsig kømigwan tranøb tusrwanba, tru Tius nuindø tarømari ciudawanba, Tiusbe nungucha kerranrrun, i libroyu truilaimburab chi pørig pønrrabigwan.

²⁰Iilan maig kønrrabigwan waminchib eshkabiibe trendan: “Arrumø gømmø, nabe petø arrumønrrun” cha.

Treeg kønrrun. Amø bøs, Señor Jesús.

²¹Namui Señor Jesucristoi tru ka yandø tab indiibe mayeeløba pasrønrrun. Treeg kønrrun.



El Apocalipsis 22.16

Palabras Claves

Adopción

Adopción kan menda unan trag nusrkai lataig konrrai maramig

Ro 8.14-17, 19, 23, 29; 9.4

2 Co 5.17

Gá 4.1-7

1 Jn 3.2

Adulterio

mendaiba trømbøig marøb itøluløb

(Ex 20.14)

(Pr 22.16-19; 7.1-17)

Mt 5.28

Jn 8.3-11

Ro 7.3

1 Co 5.1-2; 6.9-10

Gá 5.19

He 13.4

Amigos, amistades

trendø asiilø linchibelø; lata tab lindiyabellø

(Pr 18.24)

Jn 13.35; 15.13-15

2 Co 6.14

Gá 6.1,10

Stg 4.4

Amor

manrraugurri undag tøga; katoganweimburab tab kōnrrai marøb

Jn 3.16

Ro 5.8

Ef 2.4-5

1 Jn 4.8-10

Mt 22.37-38

1 Jn 5.3

Mt 5.44; 22.39

Mr 9.38-41

Jn 13.35; 15.12, 17

1 Co 13.1-13

1 Jn 2.9-11; 3.14; 4.7-11, 20-21

Angeles

Tius nø chi karuben marøb pōnrrōnrrai nø mara pōnsraig srømbalasreelø

Mt 1.20; 2.13,19-20; 4.11; 25.31

Mr 12.25

Le 22.43

Hch 5.19; 12.7-10

He 1.4, 14; 13.2

Ap 5.11; 7.11; 8.2-13

Armadura espiritual

Tiusweimburabeløyu Tiusweimburabeløtøga kwayab tøga pōnrraig

2 Co 10.3-5

Ef 6.10-18

Bienaventuranzas

chine maya nuguen tab købig, kasrag købig

Mt 5.3-12

Lc 6.20-23

Brujerías

kebashøbig kwaiman-dzigweimburabelan mariiø
 (Ex 22.18) Is 47.9, 12)
 (Jr 27.9) (Mal 3.5)
 Hch 8.9-25; 13.6-11 Gá 5.19-20
 Ap 9.21; 18.23; 21.8, 15

Cielo

Tius nø waisrø
 (Gn 1.1,8) Mt 5.12,34
 Jn 14.2-3; 17.24
 Col 3.1 Ap 4.1-11; 21.9-22.5

Comunión cristiana

Tiuswei ureemera kōppe, kanguelarrøtø kandø isua pønrrab
 (Sal 122.1) Mt 18.20
 Hch 2.42,46 1 Co 1.10; 14.26
 He 10.24-25; 13.1

Conducta del cristiano

Tiuswei ureemerabe mandø amønarnig
 Mt 5.38-48; 7.12 Ro 12.9-21; 13.8
 1 Co 10.24 Ef 4.25-5.2
 Fil 2.3-5 Col 2.6-7; 33.17
 1 Ts 5.12-22 1 Ti 4.12
 He 12.14-17; 13.1-9, 15-17 1 Pe 2.1-16

Confesión de pecados

kaig mariilan Tiuswan 'øyeeg, øyeeg marer' cha eshkab
 (Sal 32.5; 51.1-19; 66.18) (Pr 28.13)
 Ro 10.9 2 Co 7.9-10
 Stg 5.16 1 Jn 1.8-9

Confianza en Dios

Tiusbe ashchaitamab, ke nundø isua pasrab
 (Sal 27.1) Fil 1.6 He 4.16; 10.35
 1 Jn 5.14

Consuelo

chigøben puig isuig meløwa, tab kui pønrramigwan tøgagøb
 (Sal 23) (Lm 3.19-25)
 Mt 5.4; 11.28-30 Jn 14.16-18, 26
 Ro 15.4 2 Co 1.4
 Fil 2.1-2 1 Ts 4.18
 2 Ts 2.16-17

Cosas dudosas

chiwan køben tabig køh, kabe tabig kømøh, chindermab isua pasraig
 Ro 14.1-23
 1 Co 8.9-13; 10.23-24, 31
 Col 3.2,17
 1 Ts 5.22 1 Jn 2.15-17

Crecimiento espiritual

Tiusweim-burabeløyu nebua ashib, nurab ib
 Ef 3.16-19 Col 1.9-11; 2.6-7; 3.16
 2 Ti 2.15 He 6.1-3
 1 Pe 2.2
 2 Pe 1.5-8; 3.18

Cristo, su deidad

Cristobe Tius køn
 Mt 26.63-64
 Jn 1.1-14, 18; 10.30; 14.9; 17.10; 20.28
 Ro 9.5 Col 1.15-19; 2.9
 Tit 2.13 He 1.3, 8
 1 Jn 5.20

Cristo, su humanidad

Cristobe Tiustø kømøtø, katø nøbe møg misrig køn
 Lc 2.1-7 Jn 1.14
 Gá 4.4 Fil 2.5-9
 He 4.15

Cristo, sus nombres y descripciones

Cristobe katøgan peg, peg munehimera tøgag køn, munehimørig chi chibig
 kuigwan eshkabig tøgag
 Mt 1.23; 9.27; 12.18; 27.37
 Mr 1.11; 10.17; 12.10; 14.61-62
 Lc 1.32, 78; 6.5; 7.34; 9.20; 20.17; 23.2, 35
 Jn 1.9, 14, 18, 36, 41; 3.2, 29; 4.19,25-26; 6.35, 51; 8.58; 9.5,17; 10.7, 9, 11;
 11.25; 12.13; 4.6; 15.1; 20.16, 28
 Hch 3.14-15; 4.27; 5.31; 7.56; 9.22; 10.36, 42; 13.47
 Ro 1.4; 3.25; 8.29; 9.5, 23-24; 10.12; 11.26
 1 Co 11.24; 2.8; 15.23, 45-47
 2 Co 4.4; 9.15
 Ef 1.6, 22; 2.14
 Col 1.13-20, 27; 2.9-10
 1 Ti 2.6
 Tit 2.13
 He 1.2, 6; 2.10; 3.1; 4.14; 5.6; 6.19-20; 12.2, 24; 13.20
 1 Pe 2.4, 6, 22, 25; 5.4 2 Pe 1.19
 1 Jn 1.1; 2.1; 5.20
 Ap 1.4-5; 3.14; 5.5; 13.8; 19.11, 13,15; 21.6; 22.13,16

Criticar, hablar mal de, acusar

munøgøben 'øyeeg køn' chib, 'øyeeg kalø marøptiig køn' waminchib
 Lc 6.37 Jn 8.1-11
 1 Co 6.1-8 Ef 4.31
 Tit 3.1-2 Stg 33.5-12
 3 Jn 9-10

Cuentas rendidas a Dios

chine, chine mariilan Tiuswan Sørømø, eshkab
 Mt 25.14-30 Lc 12.42-48
 Ro 2.1-29; 14.10-12 2 Co 5.10
 He 4.13

Cuidados por Dios

Tiusbe nuyelan elachimø, ashib pasrabig køn
 (Sal 23.1-6; 34.10; 37.4-5) Mt 6.33
 Jn 10.9, 11,14-15,27-28 2 Co 4.8-10; 9.8
 Fil 4.19 1 Pe 1.5; 5.7

Culpa, libres de (ver también Perdon)

kaig marig yandø chigar
 (Sal 32.1-2) Ro 8.1-2
 2 Co 5.21 Ef 1.7
 Col 2.13-14

Demonios (espíritus malos)

kwai-mandziimera
 (Lv 17.7) (1 Sa 16.14-23; 18.10-11)
 Mt 4.24; 8.28-34; 25.41
 Hch 16.16-18; 19.11-12
 Ef 6.12 Ap 18.2

Desánimo

chi marøg kømub kullaarabig
 (Jos 1.9) (Sal 27.14; 43.5)
 Lc 6.20-23 Jn 14.1-3, 27; 16.23
 2 Co 4.16 He 13.8
 Ap 22.1-5

Día de descanso

kwalamelan kwallmø, isrin kwaløm,
 (Gn 2.2-3) (Ex 20.9-11)
 (Dt 5.12-15) Mt 12.1-12
 Lc 13.10-16; 14.1-6 Jn 5.9-18
 Ro 14.5-6 Col 2.16-17

Diablo

nugwaimandziig, tru Satanás
 Mt 12.24; 13.19 Lc 10.17-18
 Jn 8.44; 14.30 2 Co 4.4; 11.3, 14
 Ef 2.2; 6.12-16 2 Ts 2.8-10
 1 Ti 3.6 Stg 4.7 1 Pe 5.8-9
 1 Jn 3.8
 Ap 12.7-10; 20.1-10

Dieta (ayunar)

Tiuswandø mas lanrrab isua chigucha mamø pureb
 Mt 4.2; 6.16-18; 9.14-15 2 Co 6.12-13; 8.8-13; 10.23-26, 31
 Col 2.16-17 1 Ti 4.3-5

Disciplina de Dios (ver Juicio (disciplina) de los creyentes)

Tiuswan mORMub kalØ maren, Tiusbe nuyelan ØlmarØb tamarØbig kØn

Discípulo, seguir a Cristo

Cristoi wendautØ kusreb mendig uñibig

Mt 10.37-39; 16.24-26

Le 9.23-26, 57-62

2 Co 5.14-152

Ti 2.1-13

Divorcio

srawan kui, kewan kui kucha, yandØ tarØmisrØb

Mt 5.31-32; 19.3-12

Mr 10.2-12

Lc 16.18

2 Co 7.10-16

Dominio propio

chigØben ambumay imay srua irramamØ tab isua pasrab

Ro 13.14

1 Co 9.24-26; 16.13

Gá 5.22-25

1 Ti 6.11-12

2 Ti 2.3-5

Dones espirituales

Tiusweimburabigu kaimamØ, marØbig kØnrrai Tius nØ keta traniilØ

Ro 12.6-8

1 Co 12.4-29

Ef 4.11-13

Enfermedades

kwanrrØmera

(Sal 41.3; 103.9)

Mt 4.23

Mr 16.17-18

Jn 9.2-3; 11.4

Stg 5.13-1

Esperanza

Tiuskurri chiwan kØben ke trunundØ isua muniirab

(Jr 17.5-8)

Jn 20.29

Hch 23.6; 26.6-8

Ro 5.3-5; 8.22-25; 12.12; 15.4

1 Co 13.13; 15.19

Col 1.23

2 Ts 2.16

Tit 1.1-2; 2.12-13

He 6.18-19; 7.19

1 Pe 1.3-4

1 Jn 3.3

Espíritu Santo

Tiuswei Espíritu Santo

(Gn 1.1-3, 26)

(Is 48.16)

Jn 14.16-17, 26; 15.26; 16.7-8, 13-14

Hch 1.4-5, 8; 2.4; 15.28; 16.6

Ro 8.2, 9, 11, 16, 26

1 Co 2.12; 3.16; 6.19; 12.1-31

2 Co 13.14

Gá 4.6; 5.16-17, 22-23

Ef 1.13-14; 4.30; 5.18

1 Ts 5.19

1 Pe 1.2

1 Jn 2.26-27

Esposos, esposas, familia

kan mōmisaaba, ishuumisaaba kasharawar, nui ureebañau
 (Gn 18.19) (Ex 20.12)
 (Dt 6.6-9)
 (Pr 12.4; 22.6-15; 29.15; 31.10-31)
 1 Co 7.3-5 Ef 5.22-24, 25-32; 6.1-3
 Col 3.18-20 1 Ti 3.11
 Tit 2.3-5 1 Pe 3.1-7

Fe

isubigwan Jesucristoinug pasra pōnrraig
 (Hab 2.4)
 Ro 33.28-29; 4.2-5; 5.1; 10.17 Gá 3.1-14
 Ef 2.8-10 He 11.1-40
 Stg 1.3-6; 2.14-26

Frutos del Espíritu

Espíritu Santoi-nukkurri *chigōben tabig arrubig Criston kōrebigweinug*
kenamisrōb
 Mt 3.8-10; 7.16-20; 12.33; 13.8, 23
 Ro 7.4 2 Co 9.10
 Gá 5.22-23 Ef 2.10; 5.9
 Col 1.3-8 Stg 3.17-18

Gran Comisión

pirau chutōgucha Criston eshkab kusrenanōb, misaameran piu ulsrōb, nui
 mendig amōñibelō kōnrrai marōb
 Mt 28.19-20 Mr 16.15-16
 Lc 24.47-48 Jn 20.21
 Hch 1.8

Hijos de Dios (ver Adopción y Salvación)

Tiuswei ureemera

Hombre Viejo (ver Naturaleza Vieja)

kaigwan tōga kal-laig kaig marōb pasrabig

Humildad

chu uragucha tammayig, ka isaba inchimīg
 Heh 20.19 Ro 12.3
 Fil 2.3-10 Stg 4.6, 10
 1 Pe 5.5-6

Iglesia, cuerpo de Cristo

Tius wami misaamera Criston kōrebelō nui asr kōb lataig kōn
 Mt 16.18-19
 1 Co 1.10; 12.12-31
 Ef 1.22-23; 4.11-16; 5.22-32
 Col 1.24 He 10.24-25
 1 Pe 2.4-10

Infierno

managuen kwamø nagu mumayguen kōmuig mōra melaisrø

Mt 5.22; 13.41-42, 47-50; 18.8-9; 22.13; 25.41, 45-46

Mr 9.48

Lc 16.23-26

Ap 20.14-15

Inmundicia, impureza

chigøben trømbøig kōsøngønrraptiig mariilø

Mt 15.11, 17-20

Mr 7.15, 18-23

Jn 9.16; 18.28

Hch 10.14, 28

Ro 1.28-32; 14.14

2 Co 6.17

Ef 5.5

Tit 1.15

Stg 3.6

Jud 8

Ap 3.22; 21.27

Inspiración de las Escrituras (ver Palabra de Dios)

Tiuswei wamwane Tius øyamay chinrrai isungaruben treeg øriilø kōn

Juicio de los incrédulos

Señor Jesueriston kōremeelan mōra pønrrønrrai chu pōnsrailø kōmig

Mt 13.37-42; 25.41-46

2 Ts 1.7-9

Ap 20.11-15

Juicio (disciplina) de los creyentes

Criston kōrebelø Tiuswan mōrmub kalø marene, tru nōmdø kalø

amōnaigwan ølmarøb nøbe murba tranøb mōrøsrkøbig kōn

1 Co 11.31-32

2 Ti 3.16-17

He 12.5-11

Ap 3.19

Juicio y premios de los creyentes

Señor Jesucriston kōrebeløbe maig kōnrrabigwan asha mariilø kua, nōmui

ketig utamigwan utab

Mt 6.2-4; 25.14-30, 34

Lc 6.22-23; 19.11-27

Ro 14.10-12

1 Co 3.9-15

2 Co 5.10

1 Ti 4.8

Juzgar a otros y a sí mismo

katøganelan maig kōnrrabigwan asha marøb, katø naasiitøwei tabig søl

pasrabraitashchab isua ashib

Mt 7.1-5

Lc 6.37

Ro 2.1-3; 14.1-13

Stg 4.11-12

Libertad cristiana

Tiuswei ureemera kōppe, kaig maramigu srúa ambiilø kōmumig

Jn 8.31-36

Ro 6.6-7, 17-22; 7.6; 8.1-4

Gá 5.1, 13-14

Liderazgo cristiana

Criston kan ashibig Tiuswei chi maramelan iglesiayu pera marøb pasrabig

Mt 5.16; 16.18

Jn 10.1-18

Hch 6.1-6

1 Ti 3.1-7; 5.1, 17-19

Tit 1.6-10

Stg 5.14

1Pe 5.1-4

Maestros falsos; profetas falsos

isa, peemaytø kusrenanøbelø; Tius maig karuigwan eshkabelø ker chibendø,
isapteelø

(Is 5.20)

Mt. 23.1-36; 24.11-24

1 Ti 4.1-5

Tit 1.10-16

2 Pe 2.1-22

Matrimonio (ver Sexo y matrimonio; también Esposos, esposas y familia)

møømisaaba, ishuumisaaba Tiuswei merrappa, misaamerai merrappa keeba,
sraimbato pønrramigwan isua pønrramisrøb

Muerte

øsig kømig yu pirau patsab

(Sal 116.15)

Lc 23.43

Jn 14.1-3

Ro 14.8

1 Co 5.1, 6-8

Fil 1.21-23

1 Ts 4.13-18; 5.9-10

2 Ti 4.7-8

He 9.27

Ap 20.4-6, 11-15; 21.4

Mundo (la relación del cristiano al mundo)

Criston ashibiibe yu pirau nun ashmø misaaba mandø pasramig

Mt 5.13-16

Jn 15.18-21; 16-33; 17.14-18

Ro 12.1-2

2 Co 6.14-18

Gá 6.14

2 Ti 2.4

Tit 2.12

Stg 1.27; 4.4

Naturaleza vieja; naturaleza nueva

tru kaigwan trendø tøga kal-iaig køllig pasrabiiba; Criston nebua asha, srøig
kal-iawa pasraiba

Ro 6.1-23; 7.1-25

2 Co 5.17

Gá 2.20; 5.16

Ef 4.22-24

Col 3.1-10

Nuevo pacto

Tius misagweyasig katøgan acuerdø srøig øyeeg martrab cha, mara pasrig
(Jr 31.31-34)

Mt 26.28

Mr 14.24

Lc 22.20

1 Co 11.25

2 Co 3.5-6

He 7.18-22; 8.6-13; 9.11-28; 13.20

Obediencia

Tius nò chi martrai karua pònsrailan mòra maròb	
(Dt 10.12-13; 26.16)	(1 Sa 15.22)
(Sal 40.8)	(Pr 4.13-15)
Mt 7.24-27	Lc 8.15
Jn 14.15, 21	Ro 6.16-18
Gá 2.20	Ef 6.1
2 Ti 3.16	Tit 3.1
Stg 4.17	1 Pe 1.14-15

Ofrendas, generosidad

Tiusweyasig keta tranòppe, mera kòmò, kettrab isua ketòb	
(1 Cr 29.9)	(Pr 3.9-10; 19.17)
(Mal 3.10)	
Mt 5.42	Lc 6.38
1 Co 16.1-4	2 Co 8.10-15; 9.1-15

Oración

Tiusba waminchib	
(Sal 34.4, 6; 66.18-19; 145.18)	(Jr 33.3)
Mt 7.7-11; 9.37-38; 21.22	Mr 11.24-25
Lc 18.1-8, 9-14	Jn 14.13-14; 15.7; 16.23-24
Ro 10.9-13	Ef 5.20; 6.18
Fil 4.6-7	1 Ts 5.17-18
1 Ti 2.1-3, 8	He 4.16; 11.6; 13.15
Stg 11.5; 4.3; 5.14-20	1 Pe 3.7
1 Jn 1.9; 5.14-15	

Paciencia (ver también Perseverancia)

chu uraskucha tammay megabig megab	
Ro 15.4	Gá 6.9
He 12.1	Stg 1.3
1 Pe 2.19-20	

Padre Nuestro

Cristo nui pera uniilan Tius tru namui Mòskaimba wamindamigwan kusrenanig	
Mt 6.9-15	Lc 11.2-4

Palabra de Dios

Tiuswei wamwan maya misagwei pòrig	
(Sal 19.7-11; 119.9-11)	Mt 24.35
Jn 5.39	Hch 20.32
2 Ti 3.15-17	He 4.12
1 Pe 2.2	2 Pe 1.19-21

Pecado

kaig marig pasrabig	
(Pr 6.16-19)	(Is 53.6; 59.2-3)
Mt 5.21-48; 15.11, 16-20	Jn 8.34
Ro 3.23; 5.12; 6.16, 23; 14.23	Stg 1.15; 4.17

Perdon

kaig mariilan ulø payamik-kaig, yandø pesannaig
 (Sal 32.5; 51.1-19; 103.3, 12) (Pr 28.13)
 (Is 1.18) Mt 6.12, 14-15; 18.15-35
 Mr 11.25-26 Lc 17.3-4
 Hch 3.19 Ef 1.7; 4.32
 Col 1.13-14; 3.13 1 Jn 1.8-10

Persecución (ver también Sufrimiento)

Criston kuikkurri chigøben kaig marinab melab
 Mt 5.10-12; 10.22 Hch 5.41
 Ro 8.17-18; 12.17-21 2 Ti 3.12
 He 11.36-40 Stg 1.2-4
 1 Pe 2.19-21; 3.9-16

Perseverancia (ver también Paciencia)

Tiusweimburabeløyu chigúingueha tarøismrøm, melabig melab
 Mt 10.22; 24.13 Mr 4.16-17
 Jn 8.31 Ro 2.7; 12.12
 1 Co 15.58 Gá 6.9
 Col 1.23 2 Ti 2.3
 2 Ts 3.13 He 3.6,14

Preocupación

chiwangøben ke kan chinchaptø inchib isub
 Mt 6.31-34 Fil 4.6-9, 19
 2 Ts 3.3 1 Pe 5.7

Privilegios y bendiciones gozados por lo creyentes

Criston kørebelø kømibe chine tabig truba maramig, katø Tiusweinukkurri
 tabig arrubigwan utamig arrub
 Jn 17.2-3 Hch 5.41
 Ro 5.1-5, 8-11; 8.15-17, 32, 37-39 1 Co 6.11
 Ef 1.3-14 He 2.10-18; 7.22-28
 Stg 2.5 1 Pe 1.3-5
 2 Pe 1.4

Profecías cumplidas por Cristo

Cristoimburab chitø nebunrrabelø kuigwan manasrøwei eshkawa pønsrailø
 Cristo nø arruben kerrigu nun treeg nebuig køn
 (Is 7.14) Mt 1.23
 (Mi 5.2) Mt 2.6
 (Sal 2.7) Mt 3.17
 (Is 35.5-6) Mt 9.35; 11.5
 (Sal 78.2) Mt 13.34
 (Zac 11.12) Mt 26.15
 (Is 50.6) Mt 26.67
 (Zac 11.13b) Mt 27.5a
 (Is 53.7) Mt 27.12-14
 (Is 53.5) Mt 27.26

(Sal 69.21)	Mt 27.34
(Sal 109.25)	Mt 27.39
(Am 8.9)	Mt 27.45
(Sal 22.1)	Mt 27.46
(Is 53.9)	Mt 27.57-60
(Zac 13.7)	Mr 14.50
(Sal 22.16)	Mr 15.19-20, 24
(Sal 31.5)	Lc 23.46
(Sal 38.11)	Lc 23.49
(Sal 41.9)	Jn 6.71
(Sal 22.18)	Jn 19.23-24
(Sal 34.20)	Jn 19.33
(Zac 12.10)	Jn 19.34

Pruebas, dificultades

maig inchibelø kōtashchab chigōben puinab chine, chine nebuinab melab
 (Jōb 1.6-22; 42.12-17)
 Ro 8.28 2 Co 4.17-18
 1 Ts 3.3-4 He 12.7, 11
 Ap 3.19

Pureza, santidad

chigucha chi kaig mariiba lindiimfig, chishchig pōnrramig
 2 Co 7.1 Fil 2.14-15
 1 Ts 4.7; 5.22 1 Ti 5.22
 He 12.10, 14-16 Stg 3.17; 4.8
 1 Pe 1.14-16 1 Jn 3.3

Regla de Oro

namunma maig palōben, katōganelan treetōwei tab indamig
 Mt 7.12 Lc 6.31

Reino de Dios

Tius nō ashīb karub pasrainug; Tiusbe nō maig maramigwan marōb pasraig
 Mt 6.33; 12.18; 13.24-33, 36-50; 19.12, 23-24; 22.16; 26.29
 Mr 4.26-29
 Lc 9.62; 17.20-21; 19.11-27; 21.31; 22.16
 Jn 3.3,5; 18.36 Hch 1.6; 28.31
 Ro 14.17
 1 Co 4.20; 6.9-10; 15.20, 24-26 Gá 5.21
 Ef 5.5 Col 1.13
 He 12.28 Stg 2.5
 2 Pe 1.10-11 Ap 11.15; 12.10

Responsabilidad del cristiano

Cristoi misaamerabe nō maig amōñinrrain kōben, treeg amōñib
 (Lv 19.32)
 Mt 5.13-16; 28.18-20 Mr 5.19; 16.15
 Lc 3.10-14; 24.47-48 Hch 1.8
 Ro 1.16; 10.13-14 2 Co 5.18-20

Gá 6.1-5
 1 Jn 3.17-18
 Col 3.22
 1 Pe 2.13-17; 3.15

Col 4.1
 Ro 13.1-7
 1 Ti 2.1-3

Resurrección

kwabelø katøle øsiirawa kurramig
 Mt 22.30
 1 Co 15.12-32, 35-38, 51-57
 1 Ts 4.13-18

Jn 5.28-29; 11.25-26
 Fil 3.20-21
 1 Jn 3.1-2

Riquezas, el peligro de las

chigøben nørrø tøgagúigutø kemenda pasramibe kørig kømdiig køn
 Mt 6.19-21, 31-33; 13.22
 Lc 12.13-21; 16.9-13
 Stg 1.9-11

Mr 10.23-31
 1 Ti 6.3-10, 17-19
 1 Jn 3.17

Sabiduría

chiyutøgucha purø tab isua
 (Pr 1.1-4.27; 8.11; 9.10)
 Mt 7.24-27; 25.1-13
 Ef 5.15
 Stg 1.5-8; 18-23

1 Co 1.17-31; 3.18-23
 2 Ti 3.14-17

Salvación

Tiusbe Criston kørebelane kaig martrai maramburab marøb pasrabigwei
 taskugurrimba, katø møra melønrrai marøbigweinukkurrimba wesrubig
 køn

(1s 55.6-7; 64.6-7)

Jn 1.12; 3.1-17; 5.24; 6.37; 10.27-30
 Ro 3.10, 23; 5.6-12; 6.23; 8.15-16, 31-39; 10.9-13
 2 Co 1.21-22
 1 Ti 1.12
 1 Pe 1.5, 21-23

Hch 4.7-12
 1 Co 1.21-22
 Ef 1.45; 2.8-10
 Tit 3.3-7
 1 Jn 1.10; 5.11-13

Santificación, santificado, santo

kaiyugurri wesraig, chishig tabigweindø tarømarig
 (Ex 19.3-6)
 Jn 17.17
 1 Co 1.2; 6.11
 He 2.11; 10.10, 14, 29; 13.12

Hch 20.32; 26.18
 Ef 5.26
 Ap 7.9-17

Segunda venida de Cristo

Señor Jesucristo katøle yu piraumay arrumig
 Mt 24.3-44
 Lc 21.25-36
 Hch 1.11
 Fil 4.5
 He 9.28
 2 Pe 3.10-13
 Ap 1.7; 22.12, 17, 20

Mr 8.38; 13.24-37
 Jn 14.2-3
 1 Co 4.5
 1 Ts 1.9-10; 4.15-18
 Stg 5.7-8
 1 Jn 3.2

Señales de los últimos tiempos

srabe kwalømmerra luturaab kui asamig kønrrai mana asiimíig chigøben
kønrrabig

(Dn 9.27; 11.31)

Mt 24.3-44

Lc 17.22-37; 21.5-36

2 Ts 2.1-12

1 Ti 4.1-3

2 Ti 3.1-5; 4.3-4

2 Pe 3.3-13

Sexo y matrimonio

kasharawarmerra nømui sraløba, nømui keløba mandø kømig
(Gn 2.20-24)

Mt 5.27-28, 31-32

1 Co 7.1-17, 25-40

Ef 5.22-33

Col 3.18-19

1 Ts 4.3-8

He 13.4

1 Pe 3.1-7

Soledad

Tiusbe managuen nuyelane elachimíig køn

(Sal 23; 27.10; 91.9-11)

(Is 41.10)

Mt 28.20b

Jn 14.16-17

He 2.11; 13.5b-6

Sufrimiento

Cristogurri chigøben isumdiig nebuinab

Ro 8.18

2 Co 1.3-7

Fil 1.29; 3.10

2 Ti 2.11-13

1 Pe 1.3-9; 2.19-21; 4.12-16; 5.8-10

Sumisión a Cristo

Cristo nø maig chiben, treeg megamig

Lc 6.46-49

Ro 6.12-16; 12.1-2

1 Co 6.19-20

2 Co 5.15

Fil 2.9-11

Temor

Tiusbe nuyelane chiyugøben kørig kui inchimønrrai purugubig køn

(Sal 27.1-2; 34.1-4; 56.11)

(Pr 33.25-26)

Jn 14.27

Fil 4.13, 19

2 Ti 1.7

1 Pe 3.13-14

1 Jn 4.18

Tentación

chiyugøben kaigyu kebenøsrkønrraindinab

Mt 4.1-11; 26-41

Jn 16.33

Ro 14.13

1 Co 10.12-13

Gá 6.1-2

Ef 6.10-18

He 2.18; 4.15-16

Stg 1.2-4, 12-15; 4-7

1 Pe 55.8-9

2 Pe 2.9

1 Jn 4.4

Jud 24-25

Tristeza (ver también Desánimo y Desilusión)

isuin pasramig

Mt 11.28-30 Jn 16.20-22

2 Co 1.3-5; 4.16-18; 6.10 1 Ts 4.13-14

Ap 21.4

Unidad cristianaCristoi misaamera kōppe, kanguelarrōtō tabig lincha pōnrrab
(Sal 133.1-3)

Jn 13.34; 17.11, 20-23 Ro 12.10

1 Co 1.10,13; 10.16-17 Ef 4.2-6, 31

Fil 2.1-4 1 Jn 1.3, 7

Victoria

chiyugōbcn kanawa webarrua pasrab

Ro 8.35-39 1 Co 15.55-57

2 Co 2.14 1 Jn 4.4; 5.4

Ap 2.7, 11, 17, 26; 3.5, 12, 21; 12.11

Vida cristiana (ver también Conducta del cristiano)Cristo nō maig kusrenaniilan unamig
(Sal 119.9-11)

Jn 15.4, 7, 10 2 Co 5.17

Gá 2.20 Col 2.6-7

1 Pe 2.2 1 Jn 5-7

Virgen María

Señor Jesucristoi usri

(Is 7.14)

Mt 1.18-20; 2.11; 12.46-50 Mr 6.3

Lc 1.26-56; 2.1-51; 8.19 Jn 2.1-5; 19.25-27

Hch 1.14

Voluntad de Dios

Tius maig martrain kuig

(Pr 3.5-6)

Ro 12.1-2 Ef 5.15-17; 6.6

1 Ts 4.3-8; 5.18 1 Pe 2.13-15

2 Pe 3.9 1 Jn 2.17